

Holy Bible

Aionian Edition®

**Malagano ga Ambi
Mwera Bible**

AionianBible.org
The world's first Holy Bible untranslation
100% free to copy and print
also known as "The Purple Bible"

Holy Bible Aionian Edition ©
Malagano ga Ambi
Mwera Bible

CC Attribution ShareAlike 4.0, 2018-2024
Source text: eBible.org
Source version: 2/21/2024
Source copyright: CC Attribution ShareAlike 4.0
Pioneers.org, 2019

Formatted by Speedata Publisher 4.19.2 (Pro) on 5/6/2024
100% Free to Copy and Print
TOR Anonymously
<https://AionianBible.org>

Published by Nainoia Inc
<https://Nainoia-Inc.signedon.net>

We pray for a modern public domain translation in every language
Report content and format concerns to Nainoia Inc
Volunteer help is welcome and appreciated!

Celebrate Jesus Christ's victory of grace!

Preface

Mwera at AionianBible.org/Preface

The *Holy Bible Aionian Edition* ® is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aiōdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aiōdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Take the time to understand these eleven words. The original translation is unaltered and a note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by-nd/4.0, allowing 100% freedom to copy and print, if respecting source copyrights. Check the Reader's Guide and read online at AionianBible.org, with Android, and TOR network. Why purple? King Jesus' Word is royal... and purple is the color of royalty!

Table of Contents

NEW TESTAMENT

Matei	11
Maliko	35
Luka	50
Yowana	76
Itendi	96
Bhaloma	122
1 Bhakolinto	132
2 Bhakolinto	142
Bhagalatia	149
Bhaepheso	153
Bhapilipi	157
Bhakoloshai	160
1 Bhateshalonike	163
2 Bhateshalonike	165
1 Timoteo	167
2 Timoteo	170
Tito	172
Pilimoni	174
Bhaebhulania	175
Yakobho	183
1 Petili	186
2 Petili	189
1 Yowana	191
2 Yowana	194
3 Yowana	195
Yuda	196
Nng'ibhulo	197

APPENDIX

Reader's Guide

Glossary

Maps

Destiny

Illustrations, Doré

NEW TESTAMENT



A Yeshu gubhashite, "Atati mwaaleshelelanje, pabha bhakakwimanyanga ibhatendanga."

Gubhagebhenenje nngubho yabho kwa tendela shikoma.

Luka 23:34

Matei

1 Sheshino ni shitabhu sha nndondonga gwa mena gwa lubheleko lwa a Yeshu Kilishitu bha ulongo gwa a Daudi, bha ulongo gwa a Bhulaimu, puyaaliiji nnei. **2** A Bhulaimu gubhankwete Ishaka, a Ishaka gubhankwete Yakobho, a Yakobho gubhankwete Yuda na ashaakulugwe na ashaapwakwe, **3** a Yuda gubhankwete Peleshi naka Shela anyinabhabhonji pubhashemwaga a Tamali, a Peleshi gubhankwete Eshiloni, a Eshiloni gubhankwete Lami. **4** A Lami gubhankwete Aminadabhu. A Aminadabhu gubhankwete Nashoni, a Nashoni gubhankwete Shalmoni. **5** A Shalmoni gubhankwete Bhoashi, akwabhe Bhoashi pubhashemwaga a Laabhu, a Bhoashi gubhankwete Obhedi kwa akongobhabho a Luti, a Obhedi gubhankwete Yeshe, **6** Nabhalabho a Yeshe gubhankwete Mpalume Daudi. A Daudi gubhankwete Shelemani ku bhakongwe bhaliiji akongobhabho a Ulia bhukala. **7** A Shelemani gubhankwete Leobhoamu, a Leobhoamu gubhankwete Abhiya, a Abhiya gubhankwete Ashapu, **8** A Ashapu gubhankwete Yoshepati, a Yoshepati gubhankwete Yolamu, a Yolamu gubhankwete Ushiya, **9** a Ushiya gubhankwete Yoshamu, a Yoshamu gubhankwete Ashi, a Ashi gubhankwete Eshokia, **10** a Eshokia gubhankwete Manashe, a Manashe gubhankwete Amoni, a Amoni gubhankwete Yoshiya, **11** a Yoshiya gubhankwete Yekoniya na ashaapwakwe, mobha Bhayaudi gubhankwete ku Bhabhuloni. **12** Bhayaudi bhakapelekanjeje ku Bhabhuloni, a Yekoniya gubhankwete Sheatieli, a Sheatieli gubhankwete Shelubhabheli, **13** a Shelubhabheli gubhankwete Abhiudi, a Abhiudi gubhankwete Eliakimu, a Eliakimu gubhankwete Asholi, **14** A Asholi gubhankwete Shadoki, a Shadoki gubhankwete Akimu, a Akimu gubhankwete Eliudi, **15** a Eliudi gubhankwete Eliashali, a Eliashali gubhankwete Matani, a Matani gubhankwete Yakobho, **16** a Yakobho gubhaakwete a Yoshepu bhaaliji ambujehabho a Malia, anyinabhabho a Yeshu bhaashemwa a Kilishitu. **17** Bhai puyaliiji ibheleko likumi limo na nsheshe kutandubhila a Bhulaimu mpaka a Daudi na ibheleko likumi limo na nsheshe kutandubhila a Daudi mpaka pubhapelekenjeje ku utumwa ku Bhabhuloni, na ibheleko likumi limo na nsheshe kutandubhila pubhapelekenjeje ku utumwa ku Bhabhuloni mpaka pubhabhelekeke a Kilishitu. **18** Kubhelekeke kwa a Yeshu Kilishitu pukwaliiji nnei, a Malia anyinabhabho a Yeshu, bhali mumtemela na a Yoshepu, bhakanabhe gwabhala gubhaabhwani a Malia bhali na shitumbo kwa komboywa naka Mbumu jwa Ukonjelo. **19** Pabha a Yoshepu bhashinkubha bhanguja bhakapinjileje kutokomaya ntemela gwabho, kwa nneyo gubhapijile kwaaleka kwa nng'iyoy. **20** Bhali nkuganishiya genego, nnugono malaika jwa Bhakulungwa gwabhakoposhele nng'agamii alinkuti, "A Yoshepu bha ulongo gwa a Daudi, nnajogope kwaatola a Malia bhabhe akongobhenu, pabha Mbumu jwa Ukonjelo ni abhatendile bhabhe na shitumbo. **21** Shihbakole mwana jwanume, shimunsheme lina iyakwe Yeshu, pabha jwenejo apinga tapula bhandu bhakwe na yambi yabhonji." **22** Genego gashinkukoposhela nkupinga limalie lilibhe libhalugwile Bhakulungwa kuka nkulondola jwabho, **23** "Nng'ishana shakole shitumbo, shankole mwana

jwanume, shibhanshemanje lina iyakwe Manueli," malombolelo gakwe, "A Nnungu pamo na uwe". **24** Kwa nneyo, a Yoshepu bhakajumusheje gubhatendile malinga shibhaluguliwe naka malaika jula, gubhaatolile a Malia kubha akongobhabho. **25** Bhakaamanyiji akongobhabho a Malia mpaka bhakankoleje mwana jwanume. Na a Yoshepu gubhanshemile lina iyakwe, Yeshu.

2 A Yeshu kubhabhelekeke ku Bheteleemu, nkowa gwa ku Yudea, mobha ga a Elode pubhaliiji a mpalume, a Yeshu bhakabhelekeke, bhakwiimanyanga ndondwa gubhaikengenene ku Yelushalemu kopoka kulikoposhela iyubha, **2** gubhabhushiyenje, "Kwali kwei mwana abhelekeke, mpalume jwa Bhayaudi? Twashinkulubhona lutondwa lwakwe lulikoposhela, putwaliiji kulikoposhela iyubha na uwe tushikiya kuntindibhalila." **3** A Mpalume Elode bhakapilikaneje genego, gubhatengwisha na bhandu bhowe bha ku Yelushalemu. **4** Bhai, gubhaashemilenje bhakulungwanji bhaabhishila bhowe na bhaajiganya bha Shalia, gubhaabhushiyenje, "Kilishitu shabhelekeke kwei?" **5** Gubhaajangwilenje, "Ku Bheteleemu nkowa gwa ku Yudea malinga shiishite jandikwa naka nkulondola jwa a Nnungu kuti, **6** 'Ugwe Bheteleemu uli munkowa gwa ku Yudea, Ugwe nngabha jwanshoko muilambo imanyika ya ku Yudea, Pabha kunngwako apinga koposhela kalongolele, shaabhalongolelanje bhandu bhangu Ishilaeli.'" **7** Penepo, a Elode gubhaashemilenje kumtemela bhakwiimanyanga ndondwa bhala, gubhaabhushiyenje shakani pulwankoposhelenje lutondwa. **8** Kungai gubhaatumilenje ku Bheteleemu bhalinkuti, "Nnjendangane nkabhushishiyenje ukoto ngani jika jwene mwanajo. Mummonangaga kunnugulilanje nkupinga na nne nyende ngantindibhalile." **9** Bhakapilikananjeje malobhe ga a mpalume bhakwiimanyanga ndondwa bhala gubhajabhwenenje, bhai lutondwa lubhalubhweninji bhalinginji kulikoposhela iyubha lula gulwaalongolelenje, gulupite jima panani paaliiji mwana pala. **10** Bhakalubhonenje lutondwa gubhainonyelenje kaje. **11** Bhai, gubhajinilenje nnyumba, gubhammweninji mwana jula na akwabhe a Malia, gubhatemingeni ulungulungo kuntindibhalila. Kungai gubhagopwelenje ibhajigelenje, gubhampelenje upo, shaabhu na lubhani na manemane. **12** A Nnungu bhakwaaleyagaga nng'agamii, bhanaabhujilanje kabhili a Elode, gubhapitilenje mpanda guna kubhaja kunngwabhonji. **13** Bhajeninji bhala bhakajabhulanjeje, malaika jwa Bhakulungwa gwabhakoposhele a Yoshepu nng'agamii, gwabhaluguliile, "A Elode bhapinga kunnoleya mwanajo bhammulaje, bhai nnjumushe! Muntole mwanajo na akwabhe mmutushilanje ku Mishili, nkatamangane mpaka pushininnugulilanje kabhili." **14** A Yoshepu bhakajumusheje gubhantolile mwana jula na akwabhe, gubhajabhwenenje nashilo nashilo kubhutushila ku Mishili. **15** Gubhatemi kweneke mpaka pubhaawile a Elode. Genega gashinkukoposhela nkupinga gamalile galugwilwe na Bhakulungwa kwa ntenga guka nkulondola jwabho, "Nashinkunshema mwanangwa kopoka ku Mishili." **16** A Elode bhakamumanyenje kuti bhashitembwa na bhakwiimanyanga ndondwa bhala, guyaashimile kaje. Gubhaamulishe bhabhulagwanje bhana bha shileu bhowe

pa shilambo sha Bheteleemu na ilambo ya nnyenje jakwe bha yaka ibhili na pai jakwe. Bhashinkutenda nneyo kwa tolelela pubhalugulilwe na bhaashomanga ndondwa bhala malanga gubhalubhweninji lutondwa kuikoposhela lyubha. 17 Nneyo gakumailaga malobhe galugwilwe na ankulondola bha a Nnungu a Yelemia bhalinkuti, 18 "Lilobhe lishipilikanika ku Lama, ililo na nguto yaigwinji. A Laeli bhanakwagutilanga ashibhana bhabho, numbe bhangapinga tagwa ntima, pabha bhana bhowe bhawilenje." 19 Bhakaweje a Elode, malaika jwa Bhakulungwa gwabhakoposhele a Yoshepu nng'agamii ku Mishili kula, 20 gwabhalugulile, "Nnjumushe! Muntole mwana na akwabhe, mmujangane ku shilambo sha Ishilaeli, pabha bhapingangaga kummulaga mwanajo bhala, bhawilenje." 21 Bhai, a Yoshepu bhakajumusheje, gubhantolile mwana jula na akwabhe, gubhabhujengene ku shilambo sha Ishilaeli. 22 Ikabheje a Yoshepu bhakapilikanje kuti a Lekelao, bhana bhabho a Elode, bhashibha a mpalume bha ku Yudea gubhajogwepe kubhuja. Bhalabho bhakalugulilwe nng'agamii, gubhapite nkowa gwa ku Galilaya, 23 nikwenda tama ku shijiji sha ku Nashaleti. Nkupinga gamalile malobhe galugwilwe na ashinkulondola bha a Nnungu, "Shibhashemwe Bhanashaleti."

3 Gene mobhago gwabhakoposhele a Yowana bhaabhatisha, bhalilunguya kuanga ja ku Yudea, 2 bhalinkuti, "Mwiipetanje, pabha Upalume gwa Kunnungu ubhandishile." 3 Bhenebha a Yowana bhalugwilwe na ankulondola bha a Nnungu a Ishaya bhalinkuti, "Lilobhe lika mundu linapilikanika kuanga, 'Mwaalashyanje Bhakulungwa mpanda gwabho, Nngoloyanje mushibhapite.'" 4 A Yowana shibhawalaga shiwalo sha mabhetya ga ngamia, na nshipi gwa lipende nshigunu. Shalya shabho pushaaliji maije na bhushi gwa mukonde. 5 Bhai, bhandunji kukoposhela ku Yelushalemu na nkowa gowe gwa ku Yudea na ilambo yowe ya nnyenje lushi lwa Yolodani, gubhaajendelenje. 6 Bhakaipetanjeje yambi yabhonji na bhalabho gubhaabhatishenje mmashi ga lushi lwa Yolodani. 7 Ikabheje a Yowana bhakaabhonanjeje Mapalishayo na Mashadukayo bhabhagwinji bhalikwaajilanga nkupinga bhabhatishwanje, gubhaalugulilenje, "Mmanganya bhana bha lijoka! Gani ammalanijilenje njibhutukanje njimwa ja a Nnungu jikwiya? 8 Bhai nnanguyanje kwa itendi, kuti mwiipetilenje. 9 Nnaganishyanjeje mmitima jenunji kuti, 'Uwe, ulongo gwa a Bhulaimu!' Ngunakummalanjilanga kuti, a Nnungu bhanakombola kugayuya aga maganganga gabhe bha ulongo bha a Bhulaimu. 10 Na libhago libhishilwe tayali mmatepo ga mikongo, bhai kila nkongo ukaogoya iepo ya mmbone upinga shelwa nileshele pa moto. 11 Nne ngunakummatishanga kwa mashi kulangula kuti mwiipetilenje. Ikabheje bhene bhakwiya nnyuma jangubho bhashikola mashili kumbunda nne, numbe ngaatopela nkali jigala ilatu yabho. Bhenebho shibhammatishanje kwa Mbumu jwa Ukonjelo na moto. 12 Bhenebho bhashikamula shipeta mmakono gabho nkupinga bhapete, ngano bhabhishe munngokwe na maashe bhajoshe pa moto gwangamika." 13 Gene mobhago a Yeshu gubhaishe ku lushi lwa Yolodani kukoposhela ku Galilaya, gubhaajendele a Yowana nkupinga bhabhatishwe. 14 Ikabheje a Yowana gubhalingile kwaibhili bhalinkuti, "Nne namwene ngunapinga bhatishwa na mmwe, pakuti nnanyiila nne?" 15

Ikabheje a Yeshu gubhaajangwile, "Nnaino mmwe nneshepe ibhe nneyo, pabha inapinjikwa tutende yowe ibhaapinga a Nnungu." Bhai, a Yowana gubhakundile. 16 A Yeshu bhakabhatishweje gubhakopweshe mmashi, shangupe ku nnungu kukuugukaga, gubhamweni Mbumu jwa a Nnungu alituluka mbuti nnjubha nikwaatula panani jabho. 17 Lilobhe gulipilikanishe koposhela kunnungu, "Jweneju mwanangu jungumpinga annonyela."

4 Kungai Mbumu jwa Ukonjelo gwabhalongweye a Yeshu mpaka kuanga nkupinga bhakalingwe naka Lishetani. 2 Gubhatabhile mobha makumi nsheshe shilo na mui, kungai gubhakwete shibhanga. 3 Bhai, Lishetani gwabhaishile kukwaalinga, alinkuti, "Monaga mmwe nni Mwana jwa a Nnungu, ngaamulishe maganganga gabhe mikate." 4 A Yeshu gubhajangwile, "Ishijandikwa, 'Mundu akaalamilala nktepe, ikabhe kwa kila lilobhe libhaabheleketa a Nnungu.'" 5 Lishetani gwabhalongweye kwenda ku Yelushalemu, Shilambo sha Ukonjelo, gwabhakweshiye kunani kaje liekalu, 6 gwabhalugulile, "Monaga nni Mwana jwa a Nnungu, mwileshele pai, pabha ishijandikwa. 'A Nnungu shibhaamulishe malaika bhabho kukunjantula, shibhannjigalanje mmakono gabhonji nkupinga nnaiulaye lukongono lwenu pa liganga.'" 7 A Yeshu gubhannugulile, "Nneilapeila ishijandikwa, 'Nnaalinje Bhakulungwa a Nnungu bhenu.'" 8 Kungai Lishetani gwabhalongweye kabhili kunani shitumbi shashile, gwabhalangwiye upalume gwa kila shilambo pa shilambolyo na indu yakwe yowe ya konja, 9 akwaalugulilaga, "Nng'wilaga ulungulungo nindindibhalila, shinimpe indu yowei." 10 Penepo, a Yeshu gubhannugulile, "Shoka apano Lishetani! Ishijandikwa, 'Mwaatindibhalile na kwaakumulala maengo Bhakulungwa a Nnungu bhenu jikape.'" 11 Bhai, Lishetani gwabhaleshile a Yeshu na ashimalaika gubhaikengene kukwaatumishila. 12 Bhai a Yeshu bhakapilikanje kuti a Yowana bhashitabha nnegelesha, gubhapite ku Galilaya. 13 Gubhajabhwile ku Nashaleti shijiji shaaliji ku Galilaya, gubhapite tama ku Kapalanaumu, shilambo shaaliji nnyenje litanda lya Galilaya, mumpika gwa ilambo ya makabhila ga Shabhuloni na Naputali. 14 Bhai gulimalile lilobhe lyalugwilwe na a Ishaya ankulondola bha a Nnungu bhalinkuti, 15 "Ilambo ya makabhila ga Shabhuloni na Naputali, kuloya kubhaali kung'ambu lushi lwa Yolodani, ku Galilaya ilambo ya bhandu bhanga bha Bhayaudi, 16 bhandu bhatemingenye nnuhindu bhashikushibhonanga shilangaya shikulungwa, bhatemingenye nnuhindu na shiwili sha shiwo, shilangaya shishikwaalangashiyanga." 17 Kuumila penepo a Yeshu gubhatandwibhe kulunguya bhalinkuti, "Mwiipetanje yambi yenunji, pabha Upalume gwa Kunnungu ubhandishile!" 18 A Yeshu bhalipita nnyenje litanda lya Galilaya, gubhaabhwini bhandu bhabhili, a Shimoni guna bhashemwaga a Petili na apwabho a Ndeleya, bhalitejelanga lyau nkutanda yamaki. 19 Bhai, gubhaalugulinje, "Nngagulanje, shininnjiganyanje kwaajyanabhonji bhandunji kwangu nne, malinga shinkutandanga yamaki." 20 Shangupe gubhaleshilenje mau gabhonji, gubhaakagwilenje. 21 Bhakajenjeje mmujo kashoko, gubhaabhwini bhananji bhabhili a Yakobho na apwabho a Yowana, bhana bha a Shebhedayo. Pubhalinginji

muntumbwi na ainabhabhonji a Shebhedayo, bhalialayanga mau gabhonji. Bhai, a Yeshu gubhaashemilenje, 22 shangupe gubhaguleshilenje ntumbwi gula na ainabhabhonji, nigubhaakagwilenje. 23 A Yeshu bhatendaga owela mmbali yowe ya ku Galilaya na jiganya mmashinagogi na kwaalugushiyanga Ngani ja Mmbone ja Upalume gwa a Nnungu. Na lamy kila ilwele ibhakwetenje bhandu. 24 Yowe ibhatendile ila guishumile nkowa gowe gwa ku Shilia. Bhalwelenji bha kila namuna na bhakwetenje maoka na bhalwelenji shialala na bhandunji bhapolokanga, gubhaapeleshelenje nabhalabho gubhaalamiyenje bhowe. 25 Bhandunji bhahagwinji gubhaakagwilenje koposhela mmbali ja ku Galilaya na ku Dekapoli na ku Yelushalemu na ku Yudea na ku ng'ambu lushi lwa Yolodani.

5 A Yeshu bhakaabhonanjeje bhandunji bhahagwinji, gubhakwelile pa shitumbi gubhatemi. Bhaajiganywa bhahho gubhaajendelenje, 2 nabhalabho gubhatandwibhe kwaajiganyanga bhalinkuti. 3 Mbaya bhaalaganga mmitima jabhonji, pabha Upalume gwa Kunnungu gwabhonji. 4 Mbaya bhainjikenje, pabha shibhaangalaywanje. 5 Mbaya bhaitimalikenje, pabha shibhapegwanje shilambo. 6 Mbaya bhakwetenje lilaka na lokolila tenda ibhapinga a Nnungu, pabha shibhatendanje. 7 Mbaya bhakwetenje shiya, pabha a Nnungu shibhaabhonelanje shiya. 8 Mbaya bhakwetenje ng'anyiyo ya mmbone mmitima jabhonji, pabha shibhaabhonanje a Nnungu. 9 Mbaya bhaaloleyangana ulele, pabha shibhashemwanje bhana bha a Nnungu. 10 Mbaya bhaapotekwanga kwa ligongo lya tenda ibhapinga a Nnungu, pabha Upalume gwa Kunnungu gwabhonji. 11 "Mbaya mmanganyanji bhandunji bhantukanangaga na kumpotekanga na kunnambillanga kila indu yangali ya mmbone kwa ligongo lyangu nne. 12 Mwiionyanjanje na angalila pabha upo yenunji yaigwinji kunnungu. Ni nnepeyo shibhaapotekenje ashinkulondola bha a Nnungu bhukala, nkanabhe bhelekwanje. 13 "Mmanganyanji mbuti njete ja shilambolyo! Nnjete jikanonye jitagwe nndi jinonye kabhili? Jikapwaa kabhili, ikabhe kujawa palanga jilibhatwe na bhandunji. 14 "Mmanganyanji mbuti shilangaya sha shilambolyo! Mbuti shilangaya sha shilambo shili pa shitumbi shikaishika. 15 Wala bhandu bhakakoleyanga kandili niunishila lidebhe, ikabheje pabhika panani mesha jaumulishilanje bhowe bhalinginji nnyumba. 16 Nneyo peyo shilangaya shenunji shilangaye pa bhandunji, nkupinga bhaibhonanje itendi yenunji ya mmbone, bhaakuyanje Ainabhenunji bhali kunnungu. 17 "Nnaganishiyanje kuti njikwiya angabhanya Shalia ya a Musha na majiganyo ga ashinkulondola bha a Nnungu. Nangaika kuangabhanya, ikabhe kuamalishiya. 18 Kweli ngunakummalanjilanga, mpaka kunnungu na shilambolyo pushiipitepo, shakwa nkali shishoko sha shalia shipinga shoywa mpaka gowe pushigamalile. 19 Bhai, jojowe akaakunda nkali amuli jimo jili jajishoko punda yowe, nikwaajiganyanga bhananji bhanakundanje, jwenejo shaabhe jwanshoko Muupalume gwa Kunnungu. Ikabheje jwene shaakunde shalia nikwaajiganyanga bhananji kukunda shalia, jwenejo shaabhe jwankulungwa Muupalume gwa Kunnungu. 20 Kwa nneyo ngunakummalanjilanga, aki jenunji ibhaga jikapunde ja Ashimapolishayo na bhaajiganyanga bha Shalia, ngu, nkajinjilanga Muupalume gwa Kunnungu. 21 "Mpilikenenje

bhanyikala bhashinkulugulilwanga, 'Nnabhalaje! Shabhalajejo shapate ukumu.' 22 Ikabheje nne ngunakummalanjilanga, jojowe akuntumbalila mpwakwe shaukumulwe, akunnyegaya mpwakwe shapelekeke ku lukumbi kuukumulwa. Na akunshema mpwakwe nngumba anapinjikwa kuleshelwa pa moto gwa ku Jeanamu. (Geenna g1067) 23 "Bhai, monaga nnpinga shoya mbepei yenu pa shitala, nikumbushila kuti mpwenu ashikola mpwai na mmwe, 24 nneshe mbepei yenu pa shitala, nkatandubhe kulundana naka mpwenu, kungai mmuje nshoye mbepei yenu. 25 "Shangupe mpatane naka mmagongo njenu nninginji mumpanda nkanabhe ika ku bhaukumula. Nkupinga mmagongo njenujo anapeleshe kubhaukumula, na bhaukumula nikunkamuya ku bhalinda bhantabhanje. 26 Kweli ngunakummalanjilanga, nkapopoka mwenemo mpaka pushinnipe mmbiya yowe. 27 "Mpilikenenje kuti bhandunji bhashinkulugulilwanga, 'Nnalabhelabhe!' 28 Ikabheje nne ngunakummalanjilanga, jojowe akunnola jwankongwe kwa kunnokolila, muntima gwakwe alebhelebehe najo. 29 Bhai, monaga liyo lyenu lya kunnilo linnebhiyaga, nnikolotole nkajae kwaatalika. Mbaya shiobhe shibhalo shimo pa shiilu shenu, nngalingana shiilu shenu showe kujawa pa moto gwa ku Jeanamu. (Geenna g1067) 30 Monaga nkono nniilo gwenu unnebhiyaga, nngukate nkajae kwaatalika. Mbaya shiobhe shibhalo shimo pa shiilu shenu, nngalingana shiilu showe kuleshelwa pa moto gwa ku Jeanamu. (Geenna g1067) 31 "Numbe yalugwilwe, 'Mundu akunneka nkagwe, anjandishile talaka.' 32 Ikabheje nne ngunakummalanjilanga, akumpa nkagwe talaka ikabhe kwa ligongo lya labhalabha, anakuntenda alabhelabhe, naka jwannume annombaga jwankongwe aleshilwe na ambujegwe, analabhalabha. 33 "Kabhili mpilikenenje kuti bhanyikala bhashinkubhalanjilwanga, 'Nnalumbile kwa unami, ikabhe nnaapinjikwa ntende imwaalumbile Bhakulungwa,' 34 Ikabheje nne ngunakummalanjilanga, nnalumbilanje wala kunnungu, pabha shitengu sha Upalume gwa a Nnungu, 35 wala shilambolyo, pabha palibhatila makongono gabho, wala ku Yelushalemu, pabha shilambo sha a Mpalume bhakulu. 36 Wala nnalumbile kwa ntwe gwenu, pabha nkaakombola kulutenda lumbo lwenu lumo lubhe lwanawe eu lwanapi, 37 Mmeleketaga, 'Elo,' bhai ibhe 'Elo,' mmeleketaga, 'Nngabha,' bhai ibhe 'Nngabha.' Pabha shoshowe shiipunda penepo kushikoposhela kuka Lishetani. 38 "Mpilikenenje kuti yabheleketwe, 'Liyu kwa liyo, lino kwa lino.' 39 Ikabheje nne ngunakummalanjilanga, nnampindikulile mundu akunshima. Mundu ankomagga lipapa litukwa lya kunnilo, muntendebhushiye na lya kunshinda. 40 Mundu anng'ukumulaga nkupinga atole lishati lyenu, munneshele atole na likoti lyenu, 41 Mundu anshishiilihiaga munjigalile nshingo gwakwe maili jimo, munjigalile maili gabhili. 42 Akunnjuga shindu mumpu, na jwalakwe apinga kumpoleka nnantundumalile. 43 "Mpilikenenje yabheleketwe kuti, 'Mwaapinje atami ajenu, na kwaashima amagongo ajenu.' 44 Ikabheje nne ngunakummalanjilanga, mwaapinje amagongo ajenu na mwaajujile kwa a Nnungu bhakumpoteka, 45 nkupinga mmanganje bhana bha Ainabhenunji bha kunnungu. Pabha bhenebho bhanakwaalangashiyanga lyubha bhandu bhowe bha mmbone na bhangelinji bha mmbone na bhananyeya ula ku

bhakwetenje aki na bhangakolanga aki. 46 Kwa nndi a Nnungu bhampanganje upo mwaapingangaga bhandu bhakumpinganga? Pabha, nkali bhakamula koli pubhatendanga nneyo peyo? 47 Monaga mwaabhuyangaga abhali ashaalongo ajenunjipe, bhuli nkutendanga shindu shashi sha punda? Pabha nkali bhandu bhangabha Bhayaudi pubhatendanga nneyo peyo? 48 Bhai, nkamilikanje malinga shibhakamilishe Ainabhenunji bha kunnungu.

6 "Mwiteiganje nnatendanje indu ya mmbone pa bhandu nkupinga bhammonanje. Nngabha nneyo, Ainabhenunji bha kunnungu bhakampanganje upo. 2 "Bhai, punkunnjangutula jwangali shindu, nngombe mmbila. Nnatende malinga shibhaatendanga bhagulumba mmashinagogi na mmipanda, nkupinga bhalumbilwanje na bhandunji. Kweli ngunakunnuguilanga, bhene bhanganjabho bhapatilenje upo yabhonji. 3 Ikabheje punkunnjangutula mundu jwangali shindu, nkali mundu jwa tome na mmwe, anamumanye inkutenda. 4 Nshoye mbepei yenu kwa nng'iyu, na Ainabhenu bhakwiibhona indu ya nng'iyu, shibhanng'upe. 5 "Punkwaajuganga a Nnungu, nnatendanje malinga bhagulumba. Pabha bhanganjabho, pubhajuganga bhanaapinganga kujima mmashinagogi na nnyenje mipanda nkupinga bhalolwanje na bhandunji. Kweli ngunakummalanjilanga, bhalabhonji bhapatilenje upo yabhonji. 6 Ikabheje mmwe punkwaajuga a Nnungu, njinjile kukati jenu, nng'ugale nnango, mwaajuje Ainabhenu bhakabhonekana. Na bhalabho Ainabhenu bhakwiibhona indu ya nng'iyu, shibhanng'upe. 7 "Punkwaajuganga a Nnungu, nnajobhelanje malinga bhandunji bhanganjabha Bhayaudi. Pabha pubhaaganishiyanga kuti a Nnungu shibhaapilikilanje kwa ligongo lya gwinji gwa malobhe gabhonji. 8 Nnabhanganje malinga bhanganjabho. Pabha Ainabhenunji bhaimanyi inkupinganga, nkali nkanabhe kwaajuganga. 9 Bhai, nnjuganje nei, 'Atati nni kunnungu, Lina lyenu likuywe. 10 Upalume gwenu guishe. Linkupinga mmwe litendeshe pa shilambolyo malinga shiikutendeka kunnunguko. 11 Ntupe lelo shalya sha togolela lelo. 12 Ntuleshelele itulebhile, malinga na uwe shitukwaaleshelelanga bhatulebhilenje. 13 Nnatubhishe mmalinjilo, ikabheje ntumbuye naka Lishetani jula. Pabha upalume ni gwenu na mashili na ukunjelo pitipiti. Amina.' 14 "Pabha Mwaaaleshelelangaga bhandu ibhannebhilenje, nneyo peyo Ainabhenunji bha kunnungu shibhanneshelolanje innebhilenje. 15 Ikabheje nkaaleshelelanga bhandunji yambi yabhonji, na bhalabho Ainabhenunji bhakanneshelolanje innebhilenje. 16 "Punkutabhanga, nnaumalanje kumeyo malinga bhagulumba. Bhaumalanga kumeyo nkupinga bhahonekanje na bhandu kuti bhashitabhanga. Kweli ngunakummalanjilanga bhanganjabho, bhapatilenje upo yabhonji. 17 Ikabheje mmwe punkutabha, nnabhe kumeyo na mpakale mauta muntwe. 18 Nkupinga bhandunji bhanamumanyanje kuti nnatabha, ikabheje mmumanyishepe na Ainabhenu bhakaabhoneka, nabhalabho Ainabhenu bhakwiibhona ya nng'iyu shibhanng'upe. 19 "Nnabhisihanje shibhiko pa shilambolyo pano, ipukuu na nkubha inaangabhanya na bhagwii bhanakaaanga nijibha. 20 Ikabhe mwibhishilanje indu yenuji kunnungu kwikaangabhanika na ipukuu na nkubha, nkali bhagwii bhakakaanga nijibha. 21 Pabha

pushili shibhiko shenu, na ntima gwenu shugubhe popo. 22 "Liyo mbuti kandili ja shiilu, bhai liyo libhaga lyalikoto, shililangaye shiilu shenu showe. 23 Ikabheje liyo libhaga lilwele shiilu shenu showe shishibhe nnuhindu. Bhai, ibhaga shilangaya shili nkati jenu shilepelaga kulangaya, shilubhe lubhindu lwa punda! 24 "Jwakwa ntumwa akombola kwaatumishilanga bhakulungwanji bhabhili, pabha shanshime jumo nikumpinga junajo, eu shalongane naka jumo nikumpetekuya junajo. Nkakombola kwaatumishila a Nnungu na tumishila mali. 25 "Kwa nneyo ngunakummalanjilanga, nnakolanje lipamba ga gumi gwenunji, kuti nniyanganje nndi eu mpapilanje nndi, wala ga ilu yenuji kuti nng'walanje nndi. Bhuli, gumi ukapunda shalya? Bhuli, shiilu shikapunda iwalo? 26 Mwilolanje ijuni ya mukonde, ikapanda, wala ikauna na wala yangali ngokwe jojowe. Nkali nneyo Ainabhenunji bha kunnungu bhanakwiliya. Bhuli, mmanganyanji nngabha mmammbonenji kupunda ijuniyo? 27 Gani munkumbi gwenunji kwa kola lipamba kwakwe anakombola kwijenesheya kapela lyubha limo lya mobha gwake galama? 28 "Kwa nndi kola lipamba ga iwalo? Nnolanje malubha ga mukonde shigakutikonja? Gakakamula liengo wala gakatota. 29 Ikabheje ngunakummalanjilanga, nkali a Mpalume a Shelemani bhayene na yowe ibhaakwete bhanganjabho kwa konja malinga lilubha limo. 30 Bhai ibhaga a Nnungu bhanakuliwasha liamba lya mmigunda, lelo lipali na malabhi lililishelwa pa lituto lya moto, bhuli bhakapanda kunn'washanga mmanganyanji? Mmanganya nkwenje ngulupai jishoko. 31 "Bhai, nnakolanje lipamba, 'Shitulye indi eu shitupapile indi eu shituwale indi!' 32 Pabha bhandu bhakakwaamanyanga a Nnungu bhanaabhushilanga yene yoweyo. Ainabhenunji bhali kunnungu bhamumanyi kuti nnakwiipinganga indu yoweyo. 33 Ikabhe, nnoleyanje oti Upalume gwa a Nnungu na aki jabho na gene gowego, a Nnungu shibhannjenjeshyanje. 34 Bhai, nnaabhushilanje ya malabhi, pabha malabhi shigaabhushile gayene. Shilaje sha lyubha limo shinatogolela kwa lyubha lyolyo.

7 "Nnaukumulanje bhananji, a Nnungu bhanakwiya kunn'ukumulanga. 2 Pabha shinkwaukumulanga bhananji, nneyo peyo na mmanganyanji pushinn'ukumulanje, shipimilo shinkwapimilanga bhananji na a Nnungu shibhampimilanje shosho. 3 Bhai, pakuti nnakushibhona shipande shili nniyo lika mpwenu, na lipoto lili nniyo lyenu nnalibhone? 4 Nkukombola bhuli kunnugulila mpwenu, 'Leka nikushoye shipande nniyo lyako,' akuno nninkwete lipande nniyo lyenu? 5 Mmwe mmagulumba! Nshoyeti lipande litemi nniyo lyenu, penepo shinnole ukoto nkombola shoya shipande shili nniyo lika mpwenu. 6 "Nnaapanganje ashimbwa indu ya ukunjelo, bhanatendebhukanga nikunnumanga, wala nnaaleshelelanje lulu yenuji ashingulubhe, bhanalibhatanga. 7 "Nnjuganje na mmanganyanji shimpegwanje, nnoleyanje na mmanganyanji shimpatanje, nng'olishiyanje na mmanganyanji shing'uguilwanje. 8 Pabha, jojowe ajuga anaposhela, aloleya anapata, na aolishiya anagulilwa. 9 Bhuli, apali jojowe munkumbi gwenunji atenda mwanagwe annjugaga nkate shampe liganga? 10 Eu annjugaga shamaki, shampe lijoka? 11 Bhai, monaga mmanganyanji, nkali nninginji mwangali bha mmbonenji, nnamanyanga kwaapanganje ashibhana bhenu indu ya

mmbone, bhuli! Ainabhenunji bhali kunnungu bhakapunda kwapanganga ya mmbone bhakwaajugangabho? 12 “Bhai yowe inkupinganga bhandu bhantendelanje na mmanganyanji mwaatendelanje nneyo peyo. Pabha genega ni malombolelo ga Shalia ja a Musha na majiganyo ga ashinkulondola bha a Nnungu. 13 “Nnjinjilangane pitila nnango gwa nyilila, pabha mpanda guloya kuobha ushipanuka na nnango gwa jinjilila kweneko gushipanuka na bhabhagwinji bhaapitanga gwene mpandago. 14 Ikabheje nnango gwanshoko na mpanda gukwenda kugumi gushibhana na bhakuubhonanga gwene mpandago, bhashokope. 15 “Mwiteigane na ashinkulondola bha unami, bhakunjilanga bhalibhonekanga mbuti ngondolo, ikabheje kwa nkati maogo ga jogoya. 16 Bhai, shimwaamanyanje kwa itendi yabhonji. Bhuli, bhandu bhalikabhanga shabhibhu mmaukutu ga mibha, eu tini mmbigili? Ng’oo! 17 Bhai, nkongo gwa mmbone gunaogoya iepo ya mmbone, nkongo gwangali gwa mmbone gunaogoya iepo yangali ya mmbone. 18 Nkongo gwa mmbone gukaogoya iepo yangali ya mmbone, na wala nkongo gwangali gwa mmbone gukaogoya iepo ya mmbone. 19 Nkongo gowoge gukaogoya iepo ya mmbone gupinga shelwa na leshelwa pa moto. 20 Kwa nneyo, shimwaamanyanje ashinkulondola bha unami kwa itendi yabhonji. 21 “Nngabha kila mundu anjema, ‘Mmakulungwa, Mmakulungwa,’ shajinjile Muupalume gwa Kunnungu, ikabhe jwene shatende ibhapinga Atati bhali Kunnungu. 22 Lyubha Iya ukumu bhabhagwinji shibhamalanjilanje, ‘Mmakulungwa, Mmakulungwa! Kwa lina lyenu twatendaga londola na kwa lina lyenu twatendaga shoya maoka, na tenda ilapo yaigwinji.’ 23 Penepo shinaabhalanjilanje, ‘Ngu, nangamnyanya mmanganyanji, nnjokanganile apano mmanganya nkutendanga yambi.’ 24 “Kwa nneyo, mundu jojowe apilikana malobhe gangu nitenda, shalandane naka mundu akwete lunda, ashenjile nyumba pa ndandali nirole iishi yakwe ukoto na nyumba nikamilika mbuti jishenjilwe pa liganga likulu. 25 Ula gujinyele, nushi gwigumbele mashi, mbungo jikulungwa jikupugaga nikoma nyumbajo, ikabheje jangagwa pabha jashinkuolelwa ukoto nikamilika mbuti jishenjilwe pa liganga likulu. 26 “Ikabheje jojowe apilikana malobhe gangu ninngatenda, shalandane naka mundu nngumba ashenjile nyumba jakwe pa lianji. 27 Ula gujinyele, na nushi guigumbele mashi, na mbungo gujipujile nikoma nyumba jila, gujigwile, numbe kwa ng’indo gwa nkulungwa.” 28 A Yesu bhakamaliyeje kubheleketa gene malobhego, bhandu bhashinkukanganigwanga na majiganyo gabho. 29 Pabha bhatendaga jiganya malinga mundu akwete ukulungwa, nngabha malinga bhaajiganya bha Shalia bhananji.

8 A Yesu bhakaeleje kopoka kushitumbi, bhandunji bhabhagwinji gubhaakagulenje. 2 Bhai, gwaisho mundu jumo akwete mangundula nitindibhala alinkuti, “Mmakulungwa, mpingaga nnakombola kunamiya!” 3 A Yesu gubhagolweye nkono, gubhankwashiye bhalinkuti, “Ngunapinga! Ulame.” Shangupe gwalamile mangundula gakwe. 4 Kungai a Yesu gubhannugulile, “Upilikane, unannugulile mundu jojowe, ikabhe ujende ukailanguye ku bhaabhisila, ukapeleshe mbepei malinga shiyalugwilwe na a Musha kwaakong’ondelanga kuti namile.” 5 A Yesu bhaliinjila ku Kapalanaumu, nkulungwa jwa

manjola jumo gwabhajendele, gwabhashondelesheye 6 alinkuti, “Mmakulungwa, ntumishi jwangu kumui, ashigona nwele kaje.” 7 A Yesu gubhaalugulile, “Shinyie ninnamiye.” 8 Bhakulungwa bha manjola bhala gubhaajangwile bhalinkuti, “Mmakulungwa, nne nngabha najwa mmbone kwa jinjila mmwe nnyumba jangu, ikabheje mmelekete lilibhepe naka ntumishi jwangu shalame. 9 Pabha nkali nne nili pai ja ukulungwa uka mundu juna, njikola ashimanjola bhalinginji pai jangu. Ninnugulilaga jumo, ‘Jabhula!’ Anajabhula, naka juna, ‘Jia!’ Alikwiya, naka ntumwa jwangu, ‘Tenda ashi!’ Anaatenda.” 10 A Yesu bhakapilikaneje genego, gubhakanganyige, gubhaalugulilene bhaakulupalilangaga bhala, “Kweli ngunakummalanjilanga, nganabhe kummona mundu pa shilambo sha Ishilaeli akwete ngulupai jikulungwa malinga jeneji. 11 Bhai, ngunakummalanjilanga kuti bhandu bhabhagwinji bhapinga kwiyangana kopoka kulikoposhela lyubha na kulititila, nabhalabhonji bhapinga tamangana pa kalamu na a Bhulaimu na a Ishaka na a Yakobho Muupalume gwa Kunnungu. 12 Ikabheje bhapingikwangaga kubha Muupalume shibhabinjilwanje ku lubhindu lwa palanga, kushibhagutanje na tauna meno.” 13 Kungai a Yesu gubhaalugulile bhakulungwa bha manjola bhala, “Mmuje kumui, ibhe malinga shinshite kulupaila.” Naka ntumishi jwabho gwalamile malanga gala. 14 A Yesu gubhaishe kungwabho a Petili, gubhaaimene akwebhabho a Petili anyinabhabho akongobhabho bhali bhagonile pashinanda, bhalwele. 15 Bhai, a Yesu gubhaakwashiye nkono gwabho bhalwele bhala na shilwele shila shikwaalekaga, gubhainwishe nikwatumishilanga. 16 Likaishileje ligulo gubhaapeleshelenje bhandunji bhabhagwinji bhakwetenje maoka, gubhaabhinjilenje ashimaoka kwa bheleketape. Na kwaalamyanga bhalwelenji bhowe. 17 Bhashinkutenda nneyo nkupinga limalile lilibhe lyalugwilwe na ankulondola bha a Nnungu a Ishaya kuti, “Bhashitola ugwangali mashili gwetu, Bhashijigala ilwele yetu.” 18 A Yesu bhakalubhoneje lugwinjili lwa bhandu lwaatimbilile, gubhaumulishenje bhaajiganywa bhahho bhajombokanje litanda. 19 A Mwalimu bha Shalia bhamo gubhaajendele, gubhaalugulile, “Mmaajiganya, nne mbinga kunkagula kokowe kushinnjende.” 20 A Yesu gubhaajangwile, “Nansheto akwete lishembo, na ijuni ishikola maui, ikabhe Mwana juka Mundu jwangali pa pumulila.” 21 Kungai mundu jwa munkumbi gwa bhaajiganywa bhahho gwabhalugulile, “Mmakulungwa, nnesheoti nyende ngaashishe Atati.” 22 Ikabheje a Yesu gubhannugulile, “Ngagula! Bhandunji bhakakwaapinganga a Nnungu nimalinga bhawilenje, bhalekanje bhawilenje bhashikane ashaayenenji.” 23 A Yesu gubhakwelile muntumbwi, pamo na bhaajiganywa bhahho, gubhapitengenene. 24 Kashokope, mbungo jikulungwa jikupugaga nnitanda mula, mpaka mabhimbili ga mashi gugajinjile muntumbwi mula. Ikabheje a Yesu bhashinkugona lugono. 25 Bhaajiganywa bhahho gubhapite kwaajumuya bhalinkutinji, “Mmakulungwa, ntutapule, tunatitila!” 26 A Yesu gubhaalugulilene, “Mmanganya nkwetenje ngulupai jishoko, pakuti nnajogopanga?” Bhai gubhajimi, gubhajikalipile mbungo na mabhimbili gala, guitendile jii kwa kaje. 27 Bhandu bhala gubhalapilenje bhalinkutinji, “Bhenebha bhandu bhashi? Nkali mbungo na mabhimbili inakwaakunda!” 28 A Yesu bhakaisheje kung’ambu ku shilambo sha Bhagadala,

gubhaimenenye bhandunji bhabhili bhakwetenje maoka bhalikoposhelanga kumakabhuli. Bhashinkujogoyanga na jwakwa mundu akombolaga kupita gwene mpandago. 29 Gubhatandwibhenje jobhela bhalinkutinji, "Nkutuloleya nndi mmwe Bhanabhabho a Nnungu? Bhuli, nshikwiya kutupoteka gakanabhe ika malanga gakwe?" 30 Bhai, tome na penepo lyashinkupagwa likundi lya ngulubhe ilishungwa. 31 Bhai, ashimaoka bhala gubhaashondelesheyenje a Yesu bhalinkutinji, "Ibhaga ntushoyaga, ntuleshe tukaajinjilanje ashingulubhe bhal." 32 A Yesu gubhaluguilenje, "Ayaga, njjendangane." Gubhaashoshileyenye bhandunji bhala, gubhapite kwaajinjilanga ashingulubhe. Likundi lyowe lya ngulubhe gulieleleshele nnitanda, guiwile yowe. 33 Ikabheje bhashunga bha ngulubhe ila gubhabhutukenje, gubhapitengene kunnjini. Kweneko gubhatalashiyenje ga ngulubhe ila na ga bhandunji bhakwetenje maoka bhala. 34 Kwa nneyo bhandunji bhowe pa shilambo pala gubhaajendelenje a Yesu, bhakaabhonanjeje gubhaashondolesheyenje bhajabhule pa shilambo shabhonji.

9 A Yesu gubhakwelile muntumbwi, gubhajombweshe litanda gubhaishe kushilambo shabho. 2 Kweneko bhandu gubhaapeleshelenje mundu jumo apolweshe, agonile pa shinanda. A Yesu bhakajibhoneje ngulupai jabhonji, gubhammalanjile mundu apolweshe jula, "Ambwiga! Mwiilume ntima, yambi yenu nsheshelelwe." 3 Bhaajiganya bha Shalia bhananji gubhaganishiyenje mmitima jabhonji kuti, "Bhene bhandubha bhanakwaakupulu a Nnungu!" 4 A Yesu gubhaimanyi ng'anyi yabhonji, gubhashite, "Pakuti nnaganishiyanga ya nyata mmitima jenunji? 5 Shei shipepeshe, kubheleketa, 'Uleshelelwe yambi yako,' eu kubheleketa, 'Jinuka ujende?" 6 Ikabheje, mmumanyanje kuti Mwana juka Mundu ashikola ukulungwa pa shilambolyo gwa kwaaleshelelaga bhandu yambi yabhonji." Penepo gubhammalanjile mundu apolweshe jula, "Jinuka utole shinanda shako ujende kunngwako." 7 Bhai mundu apolweshe jula gwajimi, gwapite kunngwakwe. 8 Bhandu bhowe palugwinjili pala bhakaibhonanje yeneyo, gubhalapilenje na jogopa gubhaakushiyenje a Nnungu bhaapelenje bhandu gwene ukulungwago. 9 Na a Yesu bhakajabhuleje penepo, gubhaabhwani bhandu bhamo lina lyabho a Matei, bhatemi nnyumba ja bhakamula koli. Bhai, a Yesu gubhaabhalanjile, "Nngagule." Nabhalabho a Matei gubhajimi, gubhaakagwile. 10 A Yesu bhakatatele kumui kwa a Matei nkulya shalya, bhakamula koli bhahagwinji na bhakwetenje yambi bhananji, gubhaikengenenje nitamanabhonji nkulya pamo na bhaajiganywa bhabho. 11 Ashimapalishayo bhakabhonanje nneyo, gubhabhalanjilenje bhaajiganywa bhabho, "Pakuti bhaajiganya bhenunji bhanalya shalya na bhakamula koli na bhakwetenje yambi?" 12 A Yesu bhakapilikaneje, gubhaabhalanjilenje, "Bhakotonji bhakakunnoleyangana mmitela, ikabheje bhakunnoleyangana mmitela bhalweljenji. 13 Bhai, njjendangane nkajiganyanje malombolelo ga gene malobhe gano, 'Shingupinga shiya, nngabha mbepei.' Nangaika kwaashemanga bhakwetenje aki, ikabheje bhakwetenje yambi." 14 Kungai bhaajiganywa bha a Yowana Bhabhatisha gubhaajendelenje a Yesu, gubhaabhushiyenje,

"Uwe na Mapalishayo tunatabha. Pakuti bhaajiganywa bheni bhakaatabhanga?" 15 A Yesu gubhaajangwilenje, "Bhuli, bhashemilwenje kundowa bhalipinjikwanga kwigutanjila bhalinginji naka nnyene nkulomba? Ikabheje shigaishile mobha nkulomba shashoywe, penepo shibhatabhanje. 16 "Jwakwa mundu atatela shibhamba sha ambi munngubho ja bhukala, pabha shibhambasho shishikwinyale nipunda pwengula nngubhojo. 17 Wala bhandu bhakaataganga divai ja ambi mmipatila ja bhukala. Bhatendangana nneyo, divaijo shijikwebhe nipapula mipatilajo na divai nijitika, ikabheje bhandu bhanataganga divai ja ambi mmipatila ja ambi, na yowe shiilonjeye ukoto." 18 A Yesu bhalinkubheleketa genego, a kalongolele bha Shiyaudi gubhaishe, nitindibhala bhalinkuti, "Mwali jwangu ashiwa nnainope, shonde ngunakunnjuga tulongane nkammishile nkono gwenu shalame." 19 A Yesu gubhajabhule nikwaakagula pamo na bhaajiganywa bhabho. 20 Bhakongwe bhamo bhalwalaga shilwele sha nsholosholo yaka likumi limo na ibhili, gubhaakagwile a Yesu shilinyuma, gubhakwashiye liibhiko lya ngubho jabho. 21 Bhashinkutenda nneyo pabha bhashinkwiibhalanjila bhayene, "Ngwayape ngubho jabho shiname." 22 Bhai, a Yesu gubhatendebhwishe nigubhaabhwani, gubhaabhalanjile, "Mwanangu, unakole lipamba! Ngulupai jako jikulamiye." Bhakongwe bhala gubhalamile shilwele shabho shila malanga gala. 23 A Yesu bhakaisheje ku nyumba ja bhakulungwa bhala gubhaabhwani bhaagombanga imbata na bhandunji bhahagwinji bhalinginji nshililo, 24 gubhaabhalanjilenje, "Nshokangane! Mwaliju jwanngawa, ikabheje ashigonape." Nigubhaeshilenje kwa kaje. 25 Bhai, bhandunji bhala bhakashokangananjeje, a Yesu gubhajinjile nkati, gubhankamwile nkono, mwali jula gwajimi nnyene. 26 Jene nganijo gujishumile nshilambo showe. 27 A Yesu bhakajabhuleje penepo, ashinangalole bhabhili gubhaakagwilenje bhajibhelanga, bhalinkutinji, "Mmaulongo gwa a Daudi, ntubhonele shiya." 28 A Yesu bhakaisheje kumui, ashinangalole bhabhili bhala gubhaajendelenje, bhalabho gubhabhushiyenje, "Bhuli, nnikulupalilanga kuti ngunaakombola kunnamiyanga?" Nabhalabhonji gubhaajangwilenje, "Elo Mmakulungwa," 29 Penepo a Yesu gubhakwashiye meyo gabhonji, bhalinkuti, "Ibhe malinga shinshite kulupalilanga." 30 Meyo gabhonji gakubhalakukaga. Nume a Yesu gubhaakalipilenje, "Nnannuguilanje mundu jojowe genega." 31 Ikabheje gubhajabhulenje, nishumya ngani ja a Yesu nshilambo showe. 32 Na bhandunji pujabhalungaga, mundu jumo bhuhhu akwete lioka, gwapelekele kwa a Yesu. 33 Shangupe akashoyweje lioka, mundu jula gwatandwibhe bheleketa. Bhandunji gubhalapilenje bhalinkutinji, "Yene indui tukanabhe kuibhona pa Ishilaeli!" 34 Ikabheje Mapalishayo gubhashitenje, "Bhanashoya maoka kwa mashili gaka nkulungwa jwa maoka." 35 A Yesu bhatendaga owela ilambo yowe na ijiji yowe, bhalijiganya mmashinagogi na lunguya Ngani ja Mmbone ja Upalume gwa a Nnungu, na lanya ilwele yowe na kila ungakola mashili. 36 Bhai, bhakabhoneje lugwinjili lwa bhandu gubhaabhonelenje shiya, pabha bhashinkutotoshelanga na bhashinkulolanga lipamba malinga ngondolo yangali nshunga. 37 Penepo gubhaabhalanjilenje bhaajiganywa

bhabho, “Maneng’eno gamagwinji, ikabheje bhakamula maengo bhashokope. 38 Bhai, mwaajuganje bhayene maneng’eno bhatume bhakamula maengo ku maneng’eno gabho.”

10 A Yeshu gubhaashemilenje bhaajiganywa bhabho likumi limo na bhabhili, gubhaapelenje mashili ga shoya maoka na lamy ilwele na ungakola mashili gwa kila namuna. 2 Mena gabhonji mitume likumi limo na bhabhilibho ni gegano, bhantai a Shimoni bhashemwaga a Petili, na apwabho a Ndeleya, na a Yakobho na a Yowana bhana bha a Shebhedayo, na 3 a Pilipi na a Bhatolomeyo, na a Tomashi na a Matei bhakamula koli, na a Yakobho bhanabhabho a Alupayo, na a Tadei 4 na a Shimoni Bhakanaani, na a Yuda Ishikaliote bhaatendebhwishe a Yeshu. 5 A Yeshu gubhaatumilenje mitume likumi limo na bhabhili bhala gubhaalajiyenje bhalinkuti, “Nnajandangane ku bhandu bhangabha Bhayaudi, wala nnajinjanje mwiilambo ya Bhashamalia. 6 Ikabhe njjendangane ku bhandu bha Ishilaeli bhaobhahilenje mbuti ngondolo. 7 Pushinnjendangane nnunguyanje nnei, ‘Upalume gwa Kunnungu ubhandishile.’ 8 Nnamiyanje bhalwelenji, nnyuyanje bhawilenje na nnyamyanje bhakwetenje mangundula na nshoyanje maoka. Nshipegwanga gwayoyo, nshoyanje gwayoyo. 9 Nnajigalanje mmbiya yoyowe mmiuko jenunji. 10 Nnajigalanje nng’uko mumpanda, wala lishati lya tingiganya, wala ilatu ya tindiganya, wala imbo. Pabha atenda maengo anapinjikwa alipwe. 11 “Nnjinjilangaga nshilambo eu shijiji shoshowe, munnoleyanje mundu jwa pwa na ntamangane kunngwakwe mpaka pushinjabhulanje. 12 Punkujinjiilanga nnyumba, mwaajujilanje ulele. 13 Na ashaayene gwene muigo bhamposhelangaga, bhai ulele gwenunji shugwapwaanje, ikabheje bhakamposhelanje, ulele gwenunji shugummujiilanje mmanganyanji. 14 Monaga mundu akanaga kumposhelanga eu kumpilikaniilanga, bhai pushinshokanje jene nyumbajo eu shene shilambosho, nkung’undanje ndutuli mmakongono genunji ibhe shilangulo sha kwaaleyanga ga kana ntenga gwa a Nnungu. 15 Kweli ngunakummalanjilanga, lyubha lya ukumu bhandunji bha shene shilambosho bhapinga patanga mboteko, kupunda yaapatilenje bhandunji bha ilambo ya Shodoma na Gomola. 16 “Nnolanje, ngunakuntumanga malinga ngondolo munkumbi gwa maogo, bhai nkolanje lunda malinga lijoka na mwiitimalikanje malinga ngunda. 17 Mwiiteiganje na bhandunji, pabha shibhanshitakiyanje kulukumbi na kunkomanga ibhoko mmashinagogi gabhonji. 18 Shimpelekwanje ku bhatagwala na bhapalume kwa ligongo lyangu nne, nkupinga nngong’ondelanje kunngwabhonji na kubhandunji bhangabha Bhayaudi. 19 Bhai, pushimpelekwanje ku bhakumula, nnakolanje lipamba kuti shimmeleketanje nndi, pabha malanga gaishilaga shimpegwanje sha bheleketa. 20 Pabha nngabha mmanganyanji shimmeleketanje, ikabhe Mbumu jwa Ainabhenunji a Nnungu abheleketa kupitila mmanganyanji. 21 “Mundu shantendebhushe mpwakwe nkupinga abhulagwe na ainamundu shibhantendebhushe mwanagwabho na bhana shibhaatendebhukanje bhaakwetenje nikwaabhulaganga. 22 Bhandunji bhowe bhapinga kunshimanga mmanganya kwa ligongo lyangu nne. Ikabheje shaipililile mpaka kumpelo, shatapulwe. 23 “Bhandu bhampotekangaga nshilambo shimo,

mmutushilanje shilambo shina. Kweli ngunakummalanjilanga, nkamaliyanga ilambo yowe ya Ishilaeli Mwana juka Mundu akanabhe ika. 24 “Nkujiganywa akakumpunda nkujiganya jwakwe, wala ntumwa akakwaapunda bhakulungwa bhakwe. 25 Inakomboleka bhaajiganywa kubha malinga bhaajiganya bhabho, naka ntumwa kubha malinga bhakulungwa bhakwe. Monaga bhaashemilenje bhayene nyumba Bhelishebhuli, shibhaashemanje mena ga nyata kaje bhandu bha nnyumba jabho. 26 “Bhai, nnaajogopanje bhene bhandunjabho, pabha shoshowe shiunishilwe shipinga unukulwa, na shoshowe shiishwe shipinga undukulwa. 27 Lingummalanjilanga pa lubhindu, mmalanganje pashilangaya na limpikenenje shinong’ona nnunguyanje palugwinjili. 28 Nnaajogopanje bhabhulaganga shiilupe, ikabheje bhakaakombolanga kuobhya mbumu, mbaya kwaajogopa bhakombola kuobhya shiilu na mbumu kumoto gwa ku Jeanamu. (Geenna g1067) 29 Ndyondyo ibhili ikaushwa kwa ela jimope? Ikabheje jwakwa nkali jumo agwa pai gwangali Ainabhenunji a Nnungu kumumanya, 30 ikabheje mmanganyanji, nkali umbo ya mmitwe jenunji ishibhalanganya yowe. 31 Bhai nnajogopanje, mmanganyanji mmammbonenji kupunda ndyondyo yaigwinji. 32 “Mundu jojowe aangunda pa bhandu kuti jwangu, na nne shinyiye kunkong’ondela kwa Atati bhali kunnungu. 33 Ikabheje jojowe shaangane pa bhandu, numbe nne shininkane kwa Atati bhali kunnungu. 34 “Nnaganishiyaje kuti njikwiya peleka ulele pa shilambolyo, nngabha! Nangajiya peleka ulele ikabhe ngondo. 35 Pabha njikwiya kwaalekanyanga mundu na ainagwe, mwali na akwabhe, akwemundu na nkamwanagwabho, 36 ashaamagongo bhaka mundu, bhandu bha nnyumba jakwe. 37 “Akwaapinga ainagwe eu akwabhe kupunda shaambinga nne, akakombola kubha nkujiganywa jwangu, wala akumpinga mwanagwe eu nabhiti jwakwe kupunda nne, akakombola kubha nkujiganywa jwangu. 38 Wala mundu akaujigale nshalabha gwakwe ningagula akakombola kubha nkujiganywa jwangu. 39 Mundu apinga kulama gwangali ngulupalila nne, akakola gumi gwa pitipiti, ikabheje shakunde bhulagwa kwa ligongo lya ngulupalila nne, shakole gumi gwa pitipiti. 40 “Akumposhelanga mmanganya, anamboshela nne, na amboshela nne, anakwaposhela bhandumile bhala. 41 Akumposhela nkulondola jwa a Nnungu kwa ligongo lyabha nkulondola jwa a Nnungu, shaposhele upo ilandana na ika nkulondola jwa a Nnungu. Akumposhela akwete aki kwa ligongo lyabha akwete aki, shaposhele upo ilandana na ika akwete aki. 42 Na mundu jojowe shampe jumo jwa munkumbi gwa bhene bhashoko bhashokobha, kapela shikombe sha mashi gaima, pabha bhaajiganywa bhangu, kweli ngunakummalanjilanga, jwakwapi shalepele poshela upo yakwe.”

11 A Yeshu bhakamaliyeje kwaalajiyanga bhaajiganywa bhabho likumi limo na bhabhili bhala, gubhahabhwilenje penepo, gubhapite jiganya na lunguya mwiilambo yabhonji. 2 A Yowana bhabhatisha bhali bhatabhilwe kuligelesha gubhapilikene ga itendi ya a Yeshu Kilishitu. Bhai, a Yowana gubhaatumilenje bhaajiganywa bhabho bhakaabhuyanje. 3 Gubhaabhushiyenje, “Mmwe ni bhakwiya bhala, eu twaalindile bhana?” 4 A Yeshu

gubhaajangwilenje, “Nnjendangane nkaalugulilanje a Yowana indu inkwipilikananga na inkwibhonanga, 5 ashinangalole bhanalolanga na ashinangwabha bhanakwendanga na bhakwetenje mangundula bhanalamanga na ashinangapilikane bhanapilikananga na bhawilenje bhanayukanga na bhaalaga bhanalungushiwanga Ngani ja Mmbone. 6 Mbaya mundu jojowe akalebha kwa ligongo lya leka ngulupalila nne.” 7 Bhai, bhantenga bha a Yowana bhala bhalijabbulanga, a Yesu gubhatandwibhe kwaabhalanjilanga makundi ga bhandu ngani ja a Yowana, “Mwashinkwendangana kuanga kulola nndi? Kulola litete lilitikinywa na mbungo? 8 Igala, mwapitengeneje kulola nndi? Mundu awete nngubho ya konja? Bhandu bhaawalanga nngubho ya konja mwaakutamanga nnyumba ya ashimpalume bha shilambo. 9 Ikabheje, mwapiteneje lolanga nndi? Nkulondola jwa a Nnungu? Elo, ngunakummalanjilanga, mumweninji nkulungwa kupunda nkulondola jwa a Nnungu. 10 “A Yowana ni bhantenga bhalugwilwe Mmajandiko ga Ukonjelo, ‘Nnole, ngunakuntuma muntenga jwangu annongolele, ashanng’alashiye mpanda gwenu.’ 11 Kweli ngunakummalanjilanga, akanabhe koshela jwa nniibhondo ali jwankulungwa kwaapunda a Yowana bhabhatisha. Ikabheje, jwene ali jwanshoko Muupalume gwa Kunnungu, ni jwankulungwa kwaapunda bhenebho. 12 Tandubhila mobha ga a Yowana bhabhatisha mpaka nnaino, Upalume gwa Kunnungu gunakomanilwa na bhandunji bhanalinganga kuutola kwa mashili na bhakwetenje mashili bhanakuutolanga. 13 Pabha ashinkulondola bha a Nnungu howe na Shalia, mpaka mobha ga a Yowana, bhashinkulondolanga ga gene mobha gano. 14 Bhai, monaga shinkundanje, a Yowanabho ni a Eliya bhapinjikwaga bhaishe. 15 Akwete makutujo apilikane. 16 “Bhai, nandanye na nndi alu lubheleko? Malinga bhashanda bhatemingenenje kushoko, bhali kwaabhalanjilanga ashaajabhonji bhalinkutinji, 17 ‘Twanngombelenje imbete, ikabheje mwangainanga! Twajimbile nyimbo ya ililo, ikabheje mwangagutanga!’ 18 Pabha a Yowana bhaishe, bhakaalya wala papila, gubhashitenje, ‘Bhashikola lioka.’ 19 Mwana juka Mundu gwaishe, alilya na papila, gubhashitenje, ‘Mwaalolanje bhaakongolela kulya na kolelwa, ashaambwiga ajabho bhakamula koli na bhakwetenje yambi!’ Nkali nneyo lunda lwa a Nnungu lumanyishe kuti lwammbone kwa itendi yakwe.” 20 Kungai a Yesu gubhatandwibhe kwaagambanga bhandunji bha mwiilambo mubhatendile ilapo ya igwinji, pabha bhandu bhakwe bhangapinganga kwiipeta. 21 “Ole gwenunji bhandu bha ku Kolashini! Ole gwenunji bhandu bha ku Bhetishaida! Pabha, ilapo itendeshe kungwenunji monaga ikatendeshe ku Tilo na ku Shidoni, bhandu bhabhonji bhakaipetilenje kwa wala maguniya na pakala liu kuti bhaleshilenje yambi. 22 Ikabheje, ngunakummalanjilanga, lyubha lya ukumu mmanganya nkupinga patanga mboteko ya punda ya bhandunji bha ku Tilo na ku Shidoni. 23 Na mmanganyanji bhandu bha ku Kapalanaumu, bhuli, shinkuywanje mpaka kunnungu? Nkupinga tuluywanga mpaka kundamo ja bhawilenje! Pabha, ilapo itendeshe kungwenunji monaga ikatendeshe kubhandu bha ku Shodoma, shene shilambosho shikaapali mpaka lelo. (Hadēs 986) 24 Ikabheje ngunakummalanjilanga, lyubha lya ukumu mmanganyanji nkupinga patanga mboteko ya punda ya bhandu

ku Shodoma.” 25 Gene malangago a Yesu gubhashite, “Ngunatenda eja kwenu mmwe Atati, Mmakulungwa bha kunnungu na pa shilambolyo, pabha yene indu nshikwaiyanga bhakwetenje lunda na bhaashomanga, nikwaunukulilanga bhana bhashoko bhashoko. 26 Elo Atati, pabha shiishite kunnonyela mmayene.” 27 Gubhaabhalanjilenje bhandunji, “Atati bhashingamuya indu yowe. Jwakwapi akummanya mwana ikabhe Atati, wala akwaamanya Atati ikabhe Mwana, na jowowe apingaga Mwana kung’unukulila. 28 “Nnjyangananje mmowe nkuabhukanga na topelwa na mishigo, nne shinimpumulyanje. 29 Nkundanje kulungoywa na nne malinga ng’ombe atabhiwala lingongota, nkupinga mwijiganyanje kwangu nne. Pabha nne najwakwiitalika na najwashinunu, numbe mmanganyanji shimpumulilanje. 30 Pabha lingongota lyangu likaatona na nshigo gwangu ukaatopa.”

12 Gene malangago, a Yesu bhatendaga pita mmigunda ja ngano Lyubha lya Pumulila. Bhai, bhaajiganywa bhahho gubhakwetenje shibhanga, gubhatandwibhenje kupulula maashe ga ngano, nitauna. 2 Mapalishayo bhakagabhonanje gene, gubhaalugulilenje a Yesu, “Nnole, bhaajiganywa bhenu bhanatendanga indu ikapinjikwa tenda Lyubha lya Pumulila.” 3 A Yesu gubhaajangwilenje, “Bhuli, nkanabhe shomanga ibhatendile a Daudi na ashaajabhonji puhalinginji na shibhanga? 4 Shibhashite jinjila nnyumba ja a Nnungu gubhalile mikate jabhishilwe kwa ligongo lya a Nnungu jila. Pabha bhenebho nkali na ashaajabhonji bhakaapinjikwangaga kulya jene mikatejo, ikabhe bhaabhisilape. 5 Eu bhuli, nkanabhe shomanga nshitabhu sha Shalia ja a Musha kuti, puyakoposhelaga Lyubha lya Pumulila bhaabhisilanga bhatendaga lekanga kagula Shalia nniekalu, ikabheje bhakaganishiwanga kuti bhanalebhang? 6 Bhai, ngunakummalanjilanga kuti pepano apali ali jwankulungwa kupunda liekalu. 7 Kaliji nkamumanyinji malombolelo ga gene malobhe gano, ‘Shingupinga shiya nngabha mbepei,’ nkanaaukumulanje bhandunji bhangelebhanga. 8 Pabha, Mwana juka Mundu, ni nkulungwa jwa Lyubha lya Pumulila.” 9 A Yesu gubhashoshile penepo, gubhainjile nshinagogi jabhonji. 10 Ashinkupagwa mundu akwete nkono upolweshe. Bhai, bhandu gubhaabhusiyenje a Yesu, “Bhuli, ilipinjikwa kunamiya mundu Lyubha lya Pumulila?” Bhashinkwaabhuhyanga nkupinga bhapatanje shiumilo sha kwaashitakia. 11 Ikabheje a Yesu gubhaabhalanjilenje, “Tujile mundu munkumbi gwenunji, ngondolo jwakwe atumbushilaga nniimbo, bhuli, akanshoya mwenemo pabha Lyubha lya Pumulila? 12 Na mundu ni jwa mana kupunda ngondolo! Bhai, shalia jetu jinakutupinga kutenda ya mmbone Lyubha lya Pumulila.” 13 Kungai gubhannugulile mundu jula, “Goloya nkono gwako.” Gwaugolweye, ukulamaga nibha malinga guna gula. 14 Ikabheje Ashimapalishayo gubhakopokenje palanga, gubhatendilenje nkungulu shanabhuli shibhaabbulaganje a Yesu. 15 A Yesu bhakagamanyenje gene, gubhajabhwile kweneke. Bhandu bhahagwinji gubhaakagwilenje, nigubhaalamiyenje bhalwelenji howe, 16 gubhaamulishenje bhanannuguilanje mundu ga bhenebho, 17 nkupinga gamalile malobhe gubhabhelekete a Ishaya ankulondola bha a Nnungu bhalinkuti, 18 “Nnole

ntumishi jwangu juning'agwile, Jungumpinganga anonyela muntima gwangu. Shimishe Mbumu yangu muka jwenejo, Jwalakwe shalunguye ya aki ku bhandunji bhangabha Bhayaudi. **19** Akakola mitau wala kujobhela, Wala lilobhe lyakwe likapilikanika mmipanda. **20** Nnai upondeshe akautemanya, Wala utambi ushoya lyou akauima, Mpaka pushatende ukumu jipinjikwa jitagwale. **21** Bhandu bhangabha Bhayaudi shibhalikulupalianje lina lyakwe." **22** Penepo bhandu gubhaapeleshelenje a Yesu mundu jumo nangalole aliji bhuhbu ligongo ashinkukola maoka. A Yesu gubhanshoshiye lioka jula, gwakombwele kubheleketa na lola. **23** Lugwinjili lowe gubhakanginwenje bhalinkutinji, "Bhuli, pana jwenejo Ulongo gwa a Daudi?" **24** Ikabheje Mapalishayo bhakapilikanajeje genego, gubhashitenje, "Jwene munduju anashoya maoka kwa mashili gaka Bhelishebhuhi, nkulungwa jwa maoka." **25** A Yesu, bhakaimanyeje ng'aniyo yabhonji, gubhaalugulilenje, upalume gogowe ugabhanikaga makundi nikanana, shiugwe, na shilambo eu likaja lyolyowe ligabhanikaga makundi nikanana, likalonjeja. **26** Ibhaga Lishetani anashoya maoka, bhai, upalume gwakwe shigulonjeje shanabhuli? **27** Mmanganya nkutinji ngunashoya maoka kwa mashili gaka Bhelishebhuhi, bhuli, bhaakulupalila bhenunji bhanakwashoyanga kwa mashili gakeni? Kwa lyene ligongolyo bhanganyabho shibhann'ukumulanje. **28** Ikabheje monaga ngunashoya maoka kwa mashili ga Mbumu jwa a Nnungu, bhai, mmumanyanje kuti Upalume gwa a Nnungu ung'ishilenje. **29** "Jwakwa mundu akombola kujinjila nnyumba jika mundu akwete mashili nikumpokonyola indu yakwe, gwangali tandubha kuntabha. Penepo shakombole kumpokonyola indu yakwe. **30** "Jojowe akakwilunda na nne, anangana, naka jojowe akalopola pamo na nne, anajaanganya. **31** Kwa lyene ligongolyo, ngunakummalanjilanga, bhandu shibhaleshelelwanje yambi yabhonji yowe, na matukano gowe, ikabheje ga kuntukana Mbumu jwa Ukonjelo bhakaleshelelwanga. **32** Na kabhili, abheleketa lilobhe lya kuntuaka Mwana juka Mundu shaleshelelwe, ikabheje abheleketa lilobhe lya kuntuaka Mbumu jwa Ukonjelo, akaleshelelwa, wala nshilambolyo sha nnaino shino, wala shikwiyasho. (aiōn g165) **33** "Nkongo ubhaga gwa mmbone na iepo yakwe shiibhe ya mmbone, na nkongo ubhaga gwangali gwa mmbone na iepo yakwe shiibhe yangali ya mmbone, pabha nkongo pukumanyika kwa iepo yakwe. **34** Mmanganya nninginji malinga majoka! Nkukombolanga bhuli kubheleketa indu ya mmbone nninginji mmangali bha mmbonenji? Pabha mundu yabheleketa ingumbele muntima gwakwe. **35** Mundu jwa mmbone anatenda indu ya mmbone, pabha nshibhiko shakwe mushigumbala indu ya mmbone, ikabheje mundu jwa nyata ntima, anatenda indu ya nyata pabha ntima gwakwe ushigumbala indu ya nyata. **36** "Bhai, ngunakummalanjilanga, lyubha lya ukumu bhandu bhapinga kwiya jangulanga ga malobhe gowe gangali ga mmbone gubhabheleketenje. **37** Pabha kwa malobhe genu shinnyije bhoneka kuti nkwele aki, na kwa malobhe genu shinng'ukumulwe." **38** Penepo Mapalishayo na bhaajiganya bha Shalia bhananji gubhaalugulilenje a Yesu, "Mmaajiganya, tunapinga tushibhone shilangulo kopoka kwenu mmwe." **39** Nabhalabho gubhaajangwilenje, "Alu lubhelekolu lwa lebha

na lukakulupalika kwa a Nnungu! Nnangunganga shilangulo, nkapegwanga ikabheje shilangulo sha a Yona ankulondola bha a Nnungu. **40** Shibhashite tama a Yona mobha gatatu shilo na mui nnpitiu lika shamaki, nneyo peyo Mwana juka Mundu shatame mobha gatatu nnitaka shilo na mui. **41** Bhandu bha ku Ninawi shibhakoposhelanje mobha ga ukumu, nabhalabhonji shibhaluukumulanje alu lubhelekolu kuti lushilebha, pabha bhandu bha ku Ninawi bhaipetilenje kwa ligongo lya miungu ja a Yona, na mbeni apano apali ali nkulungwa kupunda a Yona. **42** A Malikiya bha kwibhanda shibhakoposhele alu lubhelekolu pushiluukumulwe, na bhalabho shibhaluukumule kuti lushilebha, pabha bhenebho bhashinkukopoka kwa taliya, nkupinga bhapilikane malobhe ga lunda ga a Shelemani, na mbeni apano apali ali nkulungwa kupunda a Shelemani. **43** "Lioka anshokaga mundu, anatimbiilatimbiila nng'anga nkuloleya pa pumuli na anapabhone. **44** Penepo anakwilugulila nnyene, 'Shimuje kumu kungoposhele,' ikabheje pabhuja nakupaimana pangali shindu, pali papyejilwe nikonjelewa, **45** shajende kwaatolanga ashimaoka bhananji shabha, bhajogoyanga kupunda jwenejo, na bhowe bhanakwiya kunijinjilanga mundujo. Na ali jika mundujo shiijithe jangali ja mmbone kupunda kundandubho. Na malinga shiipingabha kwa lubheleko lwa lebhalu." **46** A Yesu bhali nkubheleketa na bhandu bhahagwinji, anyinabhabho na ashaapwabho gubhaikengene nijimangana palanga, bhalinganga kubheleketa nabho. **47** Bhai, mundu jumo gwabhalugulile, "Anyinabhenu na ashaapwenu pubhalinginji palanga, bhanapinganga kubheleketa na mmwe." **48** Ikabheje a Yesu gubhaajangwile bhandu bhala, "A mama nne agani? Na ashapwanga nne ashigani?" **49** Kungai gubhaagolosheyenje nkono kwaalunguyanga bhaajiganywa bhahbo, bhalinkuti, "Nole abha ashaamama na ashaapwanga! **50** Pabha jojowe atenda yakupinga Atati bhali kunnungu, jwenejo ni mpwanga nne na nnumbwangu nne na a mama nne."

13 Lyubha lyolyo, a Yesu gubhajabhawile pamu pala, gubhapite tama nnyenje litanda. **2** Makundi gamakulungwa ga bhandu gashinkwaatimbiila mpaka a Yesu gubhakwelile muntumbwi gubhatemi. Bhandu bhowe gubhajimigene nnyenje litanda. **3** Nabhalabho a Yesu gubhaalugulilenje indu yaigwinji kwa ndango, bhalinkuti, "Mpilikanaje! Nkupanda ashinkwenda panda mmbeju. **4** "Paliji nkumiya mmbeju, ina gwigwilile mumpanda, ijuni gwiishe nilya. **5** Ina gwigwilile pamaganga pangali litaka lyaligwinji. Gwiimelile shangupe pabha litaka likataliyeje, **6** lyubha likabhaleje, gwiinyalile, na pabha mbuhbu yakwe yangajendeya gwiijumwile. **7** Ina gwigwilile pa mikongo ja mibha, na jalakwe gujikulile niutalila. **8** Ina gwigwilile pa litaka lya mmbone, gwiimelile, gwiogwele ina makumi kumi na ina makumi shita na ina makumi gatatu. **9** Akwete makutujo na apilikane!" **10** Bhaajiganywa bhahbo gubhaajendelenje nikwaabhuya, "Pakuti nnabheleketa na bhandunji kwa ndango?" **11** A Yesu gubhaajangwilenje, "Mmanganya nshijaliwanga kwiimanya indu ya nng'iyoye ya Upalume gwa Kunnungu, ikabheje bhangananyibho bhanganaliwanga. **12** Pabha akwete shindu apinga pegwa na jenjeshewa, ikabheje jwangali shindu, nkali shakwete shila, shipinga tolwa. **13**

Ngunabheleketa nabhonji kwa ndango, pabha bhanalolanga ikabheje shakwa shibhakushibhonanga, bhanapilikanilanga ikabheje bhakapilikananga, wala bhakaelewanga. **14** Gatimilile gubhabhelekete ankulondola bha a Nnugu a Ishaya ga kuti, Bhakulungwa bhaashite, 'Kupiiikana shimpilikananje, ikabheje nkaelewanga. Nkupinga lolanga, ikabheje nkashibhonanga shindu **15** Pabha mitima ja bhene bhandunji bha jishitopa Bhashiibhanga makutu gabhonji, Bhashikupilanga meyo gabhonji. Gwangali nneyo, bhakalolilenje na meyo gabhonji, Bhakapilikanenje na makutu gabhonji, Bhakaelewenje mmitima jabhonji, Bhakandendebushilenje, bhashite Bhakulungwa, ngaalamiyenje.' **16** "Kabheje mbaya mmanganyanji, pabha meyo genunji ganalola na makutu genunji ganapilikananga. **17** Kweli ngunakummalanjilanga, ashinkulondola bha a Nnugu na bhandunji bha aki bhabhagwinji bhashinkulokolilanga kugabhona gunkugabhonganga, bhanagabhonganje, na pilikana gunkupilikananganga, bhanagapilikananje. **18** "Bhai, mmanganya mpilikananje lutango luka nkupanda. **19** Jojowe akupilikananga lilibhe lya Upalume gwa Kunnungu gwangali kulielewa, pali malinga mmebeu igwilile mumpanda ila, na Lishetani anakwiyatola shipandilwe muntima gwakwe shila. **20** Mmbeu jipandilwe pa liganga jila jinalandana naka mundu akupilikananga lilibhe lya a Nnugu, shangupe anakuliposhela nikwiinyela, **21** ikabheje akakulibhika muntima gwakwe nilonjeya, na pushiika shilaje kwa ligongo lya lyene lilibhelo, shangupe anatenguka. **22** Mmbeu jigwilile pa mikongo ja mibha, inalandalana naka mundu akupilikananga lyene lilibhelo, ikabheje ga lipamba lya shilambolyo shino na ga pinga kola indu inautaila lilibhelo, na lyalakwe likaogoya iepo. (aiōn g165) **23** Mmbeu jipandilwe nritaka lya mmbone jinalandana naka mundu akupilikananga lyene lilibhelo na kulielewa, na jwalakwe malinga mmbeu iogoya iepo, jimo makumi kumi na jina makumi shita na jina makumi gatatu." **24** A Yeshu gubhaalugulilenje bhandunji lutango luna, "Upalume gwa Kunnungu ushilandana naka mundu apandile mmbeu ya mmbone mungunda gwakwe. **25** Ikabheje bhandu bhalibhagonilenje, mmagongo njjabho gwaishe, gwapandile likonde mungunda gwabho gwa ngano, gwaijabhulile. **26** Bhai, ngano ikameleje na tandubha tumbuka, likonde nalyalakwe gulikulile. **27** Bhatumishi bha bhayene nngunda bhala gubhaajendelenje, nikwaalugulila, 'Mmakulungwa, imwapandile mmbeu ya mmbone mungunda gwenu. Igala nnaino likonde kulikopweshe kwei?' **28** Nabhalabho gubhaajangwilenje, 'Amagongo ajangu bhatendile nneyo.' Bhai, bhatumishi bhabho gubhaabhushiyenje, 'Bhuli nnpinga tujende tukatutumbule?' **29** Nabhalabho gubhaajangwilenje, 'Nngabha, inabha pushintutumbulanje likonde nnatutumbulanga na ngano. **30** Nnekanje yowe ikule pamo mpaka mobha ga maneng'eno. Gene mobhago shinaalugulilanje bhaunanga, nkumbillanjenje likonde mmatuto nijoka. Ikabheje ngano nnoolanje nkabhikanje mungokwe jangu.'" **31** A Yeshu gubhaalugulilenje bhandunji lutango luna, "Upalume gwa Kunnungu unalandana na mmbeu ja aladali jatolile mundu jumo, gwapandile mungunda gwakwe. **32** Mmbeu jene jajishoko kupunda mmbeu yowe, ikabheje jimelaga jinakula nipunda yalya yowe mungunda, nibha malinga nkongo gwankulungwa, nkali ijuni inakwiyashenga maui nnyambi yakwe."

33 A Yeshu gubhaabalanjilenje lutango luna, "Upalume gwa Kunnugu ushilandana na ngedule jibhatolile bhakongwe bhamo, gwaangenyane utandi madebhe gabhili na nushu, utandi gowe guumwishe." **34** A Yeshu bhashinkwaalugulilanga bhandu gene gowego kwa ndango. Bhangaalugulilanga shindu shoshowe gwangali ndango, **35** nkupinga litimilile lyeila, lyalugwilwe na ankulondola bha a Nnugu, "Shimelekete nabhonji kwa ndango Shing'unukule gaishiywe tandubhila kupanganywa kwa shilambolyo." **36** Kungai a Yeshu gubhaalajilenje bhandunji bhala, gubhajinjile nnyumba. Bhaajiganywa bhabho gubhaajendelenje, gubhaabhalanjilenje, "Nntulugulile ukoto ga lutango lwa likonde mungunda." **37** A Yeshu gubhaabhalanjilenje, "Apanda mmebeu ya mmbone ila, Mwana juka Mundu, **38** Nngunda gula shilambolyo. Mmbeu ya mmbone ila, bhandunji bhalinginji Muupalume gwa Kunnungu. Ikabheje likonde lila bhandunji bhaka Lishetani. **39** Mmagongo apandile likonde lila ni Lishetani. Mauno, mpelo gwa shilambolyo na bhaunanga, ashimalaika. (aiōn g165) **40** Malinga makonde shigakuti kumbililwa nijokwa moto, pushijiyebha lyubha lya mpelo gwa shilambolyo. (aiōn g165) **41** Mwana juka Mundu apinga kwatumanga ashimalaika bhakwe bhakaalopolanje koposhela Muupalume gwabho bhowerinji bhalinginji shiumilo sha bhandu kutenda yambi, na bhowe bhaatendanga ya nyata. **42** Nikwaaleshelanga nnishembo lya moto, kweneko bhapinga gutanga na tauna meno. **43** Kungai, bhanguja bhala bhapinga ng'anyimanga mbuti lyubha Muupalume gwa Ainabhabhonji. Akwete makutujo na apilikane! **44** "Upalume gwa Kunnungu unalandana na shibhiko shiishiwe mungunda. Mundu jumo gwashibhweni, gwashiishiwe kabhili. Ashinkuungalala kwa kaje, gwapite kuusha yowe yakwete, gwaumile nngunda gula. **45** "Kabhili, Upalume gwa Kunnungu unalandana naka mundu jumo ausha indu, nkuloleya liganga lya konja lya mmbiya yaigwinji lishemwa lulu. **46** Akajibhoneje lulu jimo ja mmbiya yaigwinji, gwapite usha yowe yaakwete, gwaumile lulu jila. **47** "Kabhili, Upalume gwa Kunnungu unalandana na lya litejilwe mmashi, yamaki ya kila namuna gwitanjile. **48** Lya lila likagumbaleje, bhandunji gubhauitenje kunyenje bhaali, gubhatemingenenje, gubhaagwilenje yamaki ya mmbone gubhatajilenje mwiikapu yabhonji na yangali ya mmbone gubhajailenje. **49** Nneyo pushijiyebha kumpelo gwa shilambolyo, shibhakoposhelanje ashimalaika, bhapinga agulanya bhandunji, bhagali bha mmbone na bhakwetenje aki, (aiōn g165) **50** na kwaleshelanga pa moto bhagali bha mmbonebho. Kweneko shibhagutanje na tauna meno." **51** A Yeshu gubhaabhushiyenje, "Bhuli, nngaelewenje gene gowego?" Gubhaajangwilenje, "Elo." **52** Nabhalabho gubhaabhalanjilenje, "Bhai nneyo, kila bhaajiganya bha Shalia bhajiganywe ga Upalume gwa Kunnungu, bhanalandana na bhayene nyumba bhashoya nshibhiko shabho indu ya ambi na ya bhukala." **53** A Yeshu bhakamalyeje kubheleketa ndango yowego gubhajabhulile, **54** gubhapite kushijiji shabho ku Nashaleti. Kweneko gubhaajigenyenje bhandunji nshinagogi jabhonji, mpaka gubhakanganigwenje, gubhashitenje, "Jweneju kwapatile kwei lwene lunda na mashili ga tenda yene ilapoi?" **55** Bhuli, jweneju nngabha mwanagwabho apundi shelemala bhala? Bhuli, akwabhe nngabha a Malia na ashapwakwe nngabha a Yakobho na a Yoshepu na a

Shimoni na a Yuda? 56 Bhuli, ashalumbuge, bhowe nngabha tultama nabhonji pano? Bhai, kwapatile kwei gene gowega?" 57 Bhai, gubhaashimilenje. Ikabheje a Yesu gubhaalugulilenje, "Nkulondola jwa a Nnungu akalepela kukuywa, ikabheje pa shilambo shakwe na kunngwakwe!" 58 Kwa nneyo, bhangatenda ilapo yaigwinji pepala kwa ligongo lya ungakulupalila gwabhonji.

14 Gene mobhago a mpalume Elode gubhapilikene ngani ja a Yesu. 2 Bhai, gubhaalugulilenje bhatumishi bhabho, "Bhenebha a Yowana bhabhatisha bhashiyuka, pabha mashili gabho ganatenda ilapo." 3 Pabha a Elode bhashinkwaakamula a Yowana, nikwatabha kuligelesha kwa ligongo lya a Elodia, akongobhabho a Pilipi, apwabho. 4 Pabha a Yowana bhashinkwaalugulila a Elode "Nngabha alali mmwe kwaalomba bhene bhakongwebho!" 5 A Elode bhashinkupinga kwaabbulaga a Yowana, ikabheje bhashikwaajogopanga bhandunji, pabha bhamumanyinji kuti, a Yowana ankulondola bha a Nnungu. 6 Lyubha lya shikuumu sha bhelekwa kwabho a Elode, mwali jwabho a Elodia ashinkuina pa bhajeninji. A Elode guyaanonyele, 7 mpaka gubhalumbile kumpa mwaliyo shoshowe shapinga juga. 8 Najwalakwe, akuno ajiyenywe na akwabhe, gwashite, "Mmbe nnainope nshipeta, ntwе gwa a Yowana bhabhatisha." 9 A Elode gubhainjishe, ikabheje kwa ligongo lya lumbila kwabho na ga bhajeninji, gubhaamulise apegwe. 10 Bhai, a Elode gubhantumile mundu kuligelesha akaakate ntwе a Yowana. 11 Ntwе gwabho guuise guli nshiniya, gubhampеle mwali jula, najwalakwe akwaapaga akwabhe. 12 Bhaajiganywa bha a Yowana gubhaikengenje, gubhatolilenje maiti gala, gubhashishilenje. Kungai gubhapite kwaabhalanjilanga a Yesu. 13 A Yesu bhakapilikaneje ngani ja a Yowanajo, gubhajabhwiе pepala na ntumbwi, gubhapite kujika kwangali bhandu. Ikabheje bhandu gubhamumanyinji, gubhaakagwilenje na makongono kukoposhela mwiilambo yabhonji. 14 Bhai, bhakaisheje kumbwani gubhaluweni lugwinjili lwa bhandu, gubhaabhonelenje shiya, gubhaalamiyenje bhalwele bhabhonji. 15 Ligulo, bhaajiganywa bhabho gubhaajendelenje gubhaalugulilenje, "Putuli pano pa anga na ligulo liishe. Bhai, mwaalajilanje bhandunji bhajendangane kushijiji bhakaiumilanje shalya." 16 A Yesu gubhaalugulilenje, "Ikapinjikwa bhajendangane, mmanganyanji mwaapanganje shalya." 17 Na bhalabhonji gubhaalugulilenje, "Jitukwete mikate nng'anope na yamaki ibhili." 18 A Yesu gubhaalugulilenje, "Mmbanganje yowe akuno." 19 Gubhaamulise bhandu bhatamangane mmanyai. Kungai a Yesu gubhatolile mikate nng'ano jila na yamaki ibhili ila, gubhalolile kunnungu, gubhaatendeje eja a Nnungu. Kungai gubhagebhenye mikate jila, gubhaapelenje bhaajiganywa bhabho, na bhalabhonji gubhaapelenje bhandunji. 20 Bhandu bhowe gubhalilenje, nijukuta. Kungai bhaajiganywa gubhakundikenyenje malepei gala, gubhagumbeyenje ikapu yaishoko likumi limo na ibhili. 21 Bhandu bhailenje bhala pubhalinginji bhanabhalume elupu nng'ano, gwangali kwabhalanganishiyanga bhanabhakongwe na bhana. 22 Shangupe, a Yesu gubhaamulishenje bhaajiganywa bhabho bhakwelanje muntumbwi, bhalongolelanje jomboka litanda akuno bhalikwaalajilanga bhandunji. 23 Bhakaalajilanjeje

bhandunji, gubhakwelile kushitumbi jikape kujuga Nnungu. Lyene ligulolyo pubhaliji jikape kweneko, 24 na gene malangano ntumbwi gula pugwaliji tome pakati pakati litanda, ikabheje gwatendaga komwa na mabhimbili pabha mbungo jatendaga puga kopoka mmujo jabhonji. 25 Shilo, tome na kumashelo, a Yesu gubhaajendelenje bhaajiganywa bhalikwenda panani mashi. 26 Bhaajiganywa bhabho bhaakabhonanjeje bhalikwenda pantundu mashi gubhajogopenje kwa kaje, gubhashitenje, "Lioka!" Gubhajobhelenje bhalijogopanga. 27 Shangupe, a Yesu gubhabheleketе nabhonji, "Mwilumanje ntima, ni nne. Nnajogopenje!" 28 A Petili gubhaalugulile, "Mmakulungwa, ibhaga kweli mmwe, nngulile nyiye kweneko pantundu mashi." 29 A Yesu gubhashite, "Ayaga, nnjiye." A Petili gubhatulwishe muntumbwi mula gubhatandwibhe kwenda panani mashi, bhalikwaajendela a Yesu. 30 Ikabheje bhakajibhoneje mbungo jila, bhakujogopaga, gubhatandwibhe titimila, gubhagutile nguto, "Mmakulungwa, nndapule!" 31 Penepo a Yesu gubhagolweye nkono gwabho, gubhaakamwile nikwaalugulila, "Mmwe nkwete ngulupai jishoko! Pakuti mwangakulupalila malobhe gangu?" 32 Kungai gubhakwelilenje muntumbwi mula, na mbungo jila jikupumulaga. 33 Bhowe bhalinginji muntumbwi mula guhaatindibhalilenje, bhalinkutinji, "Kweli mmwe ni Bhanabho a Nnungu." 34 Gubhajobokenje litanda, gubhaikengenje kushilambo sha Geneshaleti. 35 Bhandunji bha kwekula bhakamumanyanjeje, gubhashumiyenje nganijo mmbali yowe. Bhai gubhaapeleshelenje a Yesu bhalwelenji bhowe, 36 gubhaashondelesheyenje bhaalekanje bhaakwayanje nkali libhiniko lya ngubho jabho. Na bhowe bhaakwashiyenje gubhalamilenje.

15 Kungai Mapalishayo na bhaajiganywa bha Shalia gubhaikengenje koposhela ku Yelushalemu, gubhaajendelenje a Yesu, nikwaabhuya, 2 "Pakuti bhaajiganywa bhenu bhakakamulanga ikubho itujiganywe na bhanangulungwa bhetu? Bhakaanabhanga makono ukoto pa shalya." 3 A Yesu gubhaajangwilenje, "Pakuti numbe mmanganyanji nnalekanga Shalia ja a Nnungu, nikagulila ikubho yenunji? 4 A Nnungu bhaashite, 'Gwaajogope ainago na akwenu, pabha ishijandikwa, akwaatukana ainagwe eu akwabhe, abhulagwe.' 5 Ikabheje mmanganyanji nnajiganyanga kuti mundu abhaga na shindu shakwaapa ainagwe eu akwabhe, ikabheje ashibheleketе, 'Shene shindushi njikwaapa a Nnungu,' 6 bhai, akapinjikwa kabhili kwaajogopa ainagwe nikwaapa! Nnei shinkuti kulinyeaganya liobhe lya a Nnungu nkukagula ikubho yenunji. 7 Mmanganyanji mmagulumba! A Ishaya bhalondwele ukoto genu mmanganyanji." 8 A Nnungu bhanabheleketе, "Bhene bhandunjibha bhananyogopanga kwa malobhepe, ikabheje mitima jabhonji jishitalikangana na nne. 9 Kundindibhalila kwabhonji kwayoyo, Pabha majiganyo gabhonji ni malajilo ga shigundupe." 10 A Yesu gubhaashemilenje bhandu bhagumbelenje bhala, gubhaalugulilenje, "Mpilikananje, na mmumanyanje! 11 Shindu shalya mundu shikakuntenda mundu anyate, ikabhe malobhe gakopoka nkang'wa, ni gakuntenda mundu anyate." 12 Kungai bhaajiganywa gubhaajendelenje, nikwaabhuya, "Bhuli, mmumanyi kuti Mapalishayo bhashinkutumbalanga bhakapilikananjeje malobhe genu?" 13 A

Yeshu gubhaajangwilenje, “Litepo lyolyowe lyangapandwa na Atati bha kunnungu, lipingatutumbulwa. 14 Mwaalekanje bhanganayabho, ashikalongolele nangalole. Nangalole annongoyaga nangalole mwine, bhowe bhanaabhili shibhatumbushilanje nniimbo.” 15 A Petili gubhashite, “Ntulugulile ukoto ga lutango.” 16 A Yeshu gubhashite, “Nkali mmanganya mpaka nnaino nkanabhe kumumanyanga? 17 Bhuli, nkakumumanyanga kuti shoshowe shijinjala nkang’wa shinakwenda nnpitiu na kungai shinaepukwa kulilindi? 18 Ikabheje malobhe gakopoka nkang’wa mugakoposhele muntima, na genego ni gaktenda mundu anyate. 19 Pabha muntima inakoposhele ng’aniyo ya nyata, kubhulaga na labhalabha na gwii na kong’ondela unami na matukano. 20 Genego ni gaktenda mundu anyate. Ikabheje kulya shalya gwangali nabha makono kukakutenda mundu anyate.” 21 A Yeshu gubhajabhwiile pepala gubhapite tama mmbali ja ku Tilo na ku Shidoni. 22 Bhai, bhakongwe bhamo Bhakanaani bha shene shilambosho gubhaaishile, gubhautiye lilibhe bhalinkuti, “Mmakulungwa, Bhaulongo gwa a Daudi, mmonene shiya! Mwali jwangu analaga kaje lioka.” 23 Ikabheje a Yeshu bhangaajungula. Bhai, bhaajiganywa bhabho gubhaajendelenje, nikwaabhalanjila, “Mwaalugulile bhajabhule, pabha bhanakutukagula bhalijobhela.” 24 A Yeshu gubhajangwile, “Nangatumwa ikabhe kubhandu bha ku Ishilaeli bhalingini malinga ngondolo iobhile.” 25 Penepo bhakongwe bhala gubhaatindibhalile, bhalinkuti, “Mmakulungwa, nrjiye kunnyangutile.” 26 A Yeshu gubhaajangwile, “Nngabha mmbone tola shalya sha bhana nikwijaila mbwa.” 27 Bhakongwe bhala gubhashite, “Kweli, Mmakulungwa, ikabheje nkali mbwa inalya malepeyo gagwa pa mesha ya ashinangologwe.” 28 Penepo a Yeshu gubhajangwile, “Mama, ngulupai jenu jikulungwa, bhai, ntendelwe malinga shinkupinga.” Lioka jula akunshokaga mwali jula, nigwalamile malanga gala. 29 A Yeshu gubhashoshile pepala gubhapite nnyenje litanda Iya Galilaya, gubhajombweshe ku shitumbi, nigubhatemi. 30 Bhandu bhabhagwinji gubhaaishilenje bhalikwaapeleshelanga bhalemelenje na ashinangalole na ashinangwabha na bhuhbu na bhalwelenji bhabhagwinji, gubhaabshihilenje mmujo jabho, nabhalabho a Yeshu gubhaalamiyenje. 31 Lugwinjili Iwa bhandu lula Iwashinkulapa bhakaabhonanje ashibhubhu bhalibheleketanga, bhalemelenje bhalamilenje, ashinangwabha bhalijimajimanga, na ashinangalole bhalilolanga, bhandu gubhaainiyenje a Nnungu bha Ishilaeli. 32 Bhai, a Yeshu gubhaashemilenje bhaajiganywa bhabho, gubhashite, “Ngunakwaabhonelanga shiya bhandunjibha, pabha bhashitamangana na nne mobha gatatu, nnaino bhanginginji shalya. Ngapinga kwaalekanga bhajabbulangane gwangali kulya shalya, bhanaondokanga mumpanda.” 33 Bhaajiganywa bhabho gubhaalugulilenje, “Putulipano paanga, shitupate kwei shalya sha jukuta bhandu bhabhagwinji nnei?” 34 A Yeshu gubhaabhushiyenje, “Mikate jilingwa jinkwetenje?” Gubhaajangwilenje, “Shabha na yamaki ishokope.” 35 Bhai, a Yeshu gubhaamulisherje bhandu bhatamangane pai. 36 Gubhatolile mikate shabha jila na yamaki ila, gubhatendile eja kwa a Nnungu, gubhagebhenye, gubhaapelenje bhaajiganywa

bhabho, na bhalabhonji gubhaagabhanishiyenje bhandunji. 37 Bhowe gubhalilenje nijukuta. Kungai gubhakundikenyenje malepei, gubhagumbeyenje ikapu shabha yaikulungwa. 38 Bhalilenjebho pubhalinginji bhanabhalume elupu nsheshe, gwangali kubhalanganishiya bhanabhakongwe na bhana. 39 Bhai, a Yeshu gubhaalajilenje bhandunji, gubhakweilele muntumbwi, gubhapite mmbali ja ku Magadani.

16 Mapalishayo na Mashadukayo gubhaajendelenje a Yeshu, bhalikwaatejelanga, gubhaajujilenje bhaatendelenje shilangulo kopoka kunnungu. 2 A Yeshu gubhaajangwilenje, “Shiikaga shigulogulo mmanganya nkutinji, ‘Malabhi kupingasha ukoto pabha liunde lishishejela!’ 3 Kulisha nkutinji, ‘Lelo kukasha ukoto mbungo jipinga puga, pabha liunde lishishejela na maunde gashibhindula!’ Bhai, mmanganya nmananyililanga kujimanya miongwewa kwa lola liunde, ikabheje nkakwimanyanga ilangulo ya jene miongwewa jino? 4 Lubheleko Iwa lebha na lukakulupalika kwa a Nnungu! Nnapinganga shilangulo, ikabheje lukapegwa shilangulo shoshowe ikabhe shilangulo sha a Yona.” Bhai, gubhaaaleshilenje, nigubhajabhulile. 5 Bhaajiganywa bhabho bhakajombokanje ng’ambu jabhili ja litanda, gubhang’amulenje kuti bhashilibhalanga kujigala mikate. 6 A Yeshu gubhaalugulilenje, “Mwilolesheyenje na mwiteiganje na ngedule ya Mapalishayo na Mashadukayo!” 7 Ikabheje bhalabhonji gubhatakungenenje ashayenenji, “Bhanabheleketana nneyo pabha twangajigala mikate.” 8 A Yeshu gubhaimanyi ng’aniyo yabhonji, gubhaalugulilenje, “Mmanganya mmandunji bha ngulupai jishoko! Pakuti nnabheleketanga ga ligongo Iya ngajigala mikate? 9 Bhuli, nkanabhe ng’amulanga? Bhuli, nkaakumbushilanga punagebhenye mikate nng’ano jila kwa bhanabhalume elupu nng’ano? Bhuli ikapu yaishoko ilingwa imwagumbeyenje ya malepei? 10 Eu, mikate shabha jila jibhagabhanishiywenje bhanabhalume elupu nsheshe, bhuli, imwakundikenyenje ikapu yaikulungwa ilingwa ya malepei? 11 Pakuti nkang’amulanga kuti ngabheleketanga ga mikate? Ikabheje mwiteiganje na ngedule ya Mapalishayo na Mashadukayo!” 12 Penepo bhaajiganywa gubhamumanyinji kuti bhashikwaalugulilanga bhaiteiganje nngabha na ngedule ya mmikate, ikabheje bhaiteiganje na majiganyo ga Mapalishayo na Mashadukayo. 13 A Yeshu bhakaisheje mmbali ja ku Kaishalia Pilipi, gubhaabhushiyenje bhaajiganywa bhabho, “Bhandu bhakutinji Mwana juka Mundu ni gani?” 14 Gubhaajangwilenje, “Bhananji bhakutinji a Yowana Bhabhatisha, bhananji a Eliya, bhananji a Yelemia, e jumo munkumbi gwa ashinkulondola bha a Nnungu.” 15 A Yeshu gubhaabhushiyenje, “Na mmanganyanji bhuli, nkutinji nne gani?” 16 A Shimoni Petili gubhajangwile, “Mmwe a Kilishitu, Bhanabhabho a Nnungu, bhali bhabhakoto.” 17 A Yeshu gubhashite, “Mbaya mmwe a Shimoni bhanabhabho a Yona, pabha nngabha mundu ann’gibhulile yenei, ikabhe Atati bhali kunnungu. 18 Nne ngunakunnugulila mmwe a Petili, mmwe lindandawe na panani lindandawe ngupinga shenga likanisha Iyangu, wala mashili ga kundamo ja bhawilenje gakaiikombola. (Hadēs 986) 19 Shinimpe punguo ya Upalume gwa Kunnungu, shoshowe shishintabhe pa shilambolyo, shishitabhwe kunnungu na shoshowe shishinngopole pa shilambolyo, shishigopolwe

kunnungu.” 20 Kungai gubhaalimbiyenje bhaajiganywa bhabho, bhanannugulilanje mundu jojowe kuti bhenebho a Kilishitu. 21 Tandubhila gene malangago a Yeshu gubhatandwibhe kwaalugulilanga bhaajiganywa bhabho gwangali nng'iyu kuti bhanapinjikwa kwenda ku Yelushalemu, na kweneko bhapinga potekwa na bhanangulungwa na bhakulungwanji bhaabhishila na bhaajiganya bha Shalia. Kutu, bhapinga bhulagwa na lyubha lya tatu shibhayuwe. 22 A Petili gubhaatolile kunte-mela, gubhatandwibhe kwaakalipila, “Inabhe nneyo Mmakulungwa! Lyeneli likankoposhela!” 23 Ikabheje a Yeshu gubhatendebhushije, gubhaalugulile a Petili, “Nnyabhulile apano, Lishetani! Mmwe nnang'ibhila. Ng'aniyo yenu nngabha ya a Nnungu ikabhe ya shigundu!” 24 Kungai a Yeshu gubhaalugulilenje bhaajiganywa bhabho, “Mundu jojowe apinga ngagula nne, anapinjikwa aikane nnyene, ajigale nshalabha gwakwe angagule. 25 Pabha, mundu apinga kulama gwangali ngulupalila nne, akakola gumi gwa pitipiti, ikabheje shakunde bhulagwa kwa ligongo lya ngulupalila nne, shakole gumi gwa pitipiti. 26 Mundu shiimpwale nndi apataga indu yowe ya pa shilambolyo na akuno aliohbhya gumi gwakwe gwa pitipiti? Eu, mundu shashoye shindu shashi pa gumi gwakwe gwa pitipiti? 27 Pabha, Mwana juka Mundu shaishe na ukonjelo gwa Ainagwe pamo na ashimalaika bhakwe, penepo shanniye kila mundu malinga shashite tenda. 28 Kweli ngunakummalanjilanga, bhapalinji bhananji pepano bhakawanganga bhakanabhe kummonanga Mwana juka Mundu alikwiya malinga Mpalume.”

17 Gakapiteje mobha shita, a Yeshu gubhaatolilenje a Petili na a Yakobho na a Yowana apwabho, gubhajombokenje ku shitumbi shashileu. 2 Kweneko, a Yeshu gubhapindikwisha luhombo pa meyo gabhonji, kumeyo kwabho kwashinkung'anyima malinga lyubha na nngubho yabho puyaliji yanawe malinga shilanganya. 3 A Musha na a Eliya gubhaakoposhelenje, gubhalinginji nkubheleketa na a Yeshu. 4 Penepo a Petili gubhaalugulile a Yeshu, “Mmakulungwa, shankonja uwe kubha apano! Mpingaga shinjenje mabhanda gatatu, limo lyenu na lina lya a Musha na lina lya a Eliya.” 5 Pubhalinji nkubheleketa nneyo, liunde lya nawe likwaanishilangaga, lilobhe gulipikanishe koposhela nniundemo. “Jweneju ni mwanangu jungumpinga, anonyela, mumpilikkanilanje.” 6 Bhaajiganywa bhakapilikkanenje nneyo gubhagwilenje namangu, gubhajogopenje kaje. 7 A Yeshu gubhaajendelenje, nikwaakwayanga, gubhashite, “Nnjimangane, nnaajogopenje!” 8 Bhakalolanje kunani bhanganmonanga mundu juna, ikabhe a Yeshu jikape. 9 Bhai, pubhalinginji bhalielalanga kopoka kushitumbi, a Yeshu gubhaalimbiyenje bhalinkuti, “Nnannugulilanje mundu indu imwiibhweninji, mpaka Mwana juka Mundu pashayuwe.” 10 Kungai bhaajiganywa bhabho gubhaabhushiyenje, “Pakuti bhaajiganya bha Shalia bhakutinji inapinjikwa bhatandubhe kuika a Eliya?” 11 A Yeshu gubhaajangwilenje, “Kweli, a Eliya shibhaishe kualaya indu yowe. 12 Ikabheje ngunakummalanjilanga, a Eliya bhaaishe bhangananywa bhanganamanyanga, ikabhe bhashinkwaatendelanga mwaapinjenje. Nneyo peyo mwana juka Mundu apinga potekwa mmakono gabhonji.” 13 Penepo bhaajiganywa bhala gubhamumanyinji kuti bhatendaga

kwaabhalanjilanga ga a Yowana Bhabhatisha. 14 Bhakaikanganenje ku bhandu bhagumbelenje bhala, bhandu bhamo gubhaajendele a Yeshu, nikwaatindibhalila, 15 gubhashite, “Mmakulungwa, mummonene shiya mwanangu ashikola shialala, numbe analaga kaje, papagwinji anagwila pa moto eu mmashi. 16 Nashinkumpeleka kubhaajiganywa bhenu ikabheje bhagakombolanga kunshoya.” 17 A Yeshu gubhajangwile, “Alu lubheleko lwangali ngulupai na lwa puganika! Shindame na mmanganya mpaka shakani? Shinikakatimile na mmanganya mpaka shakani? Munnjijenajonji akuno mwanajo,” 18 Bhai, a Yeshu gubhankalipile liokajo, nigwanshoshile mwana jula, gwalamile malanga gala. 19 Kungai bhaajiganywa gubhaajendelenje a Yeshu shintemela, gubhaabhushiyenje, “Pakuti uwe twangakombola kunshoya lioka jula?” 20 A Yeshu gubhaajangwilenje, “Kwa ligongo lya ungakulupalila gwenunji. Kweli ngunakummalanjilanga, ibhaga shinkolanje ngulupai, nkali jajishoko malinga mbeju ja aladali, shinkombolanje kushilugulila nkali ashi shitumbishi, ‘Shokapa ujende akula,’ shishijende. Shakwa shoshowe shikaakomboleka kungwenunji.” 21 Ikabheje lioka jwa nnei akashoka ila kwa tabha na juga. 22 Pubhalinginji pamo ku Galilaya, a Yeshu gubhaalugulilenje, “Mwana juka Mundu apinga kamuywa ku bhandunji. 23 Bhapinga kummulaganga, ikabheje lyubha lya tatu shayuywe.” Bhaajiganywa gubhainjenje kaje. 24 A Yeshu na bhaajiganywa bhabho bhakaikanganenje ku Kapalanaumu, bhakamula koli ja liekalu bhala gubhaajendelenje a Petili, gubhaabhushiyenje, “Bhuli, bhaajiganya bhenuinji bhallipila koli ja Liekalu?” 25 A Petili gubhajangwile, “Elo, bhallipila.” Bhai a Petili bhakajinijele nnyumba, bhakanabhe bheleketa lilobhe, a Yeshu gubhaabhushiyenje, “A Shimoni, mmwe nkubhona bhuli? Ashimpalume bha shilambolyo bhanalonganga koli kwa ashigani? Kwa ashaayene shilambo eu ku bhajeninji?” 26 A Petili gubhajangwile, “Kopoka ku bhajeninji.” A Yeshu gubhaalugulile, “Bhai monaga nneyo, bhashilambo bhakaalipanga koli. 27 Ikabheje tunaatumbayanje, nriende kulitanda nkatambishe ndowana, shamaki shatandubhe tanjilajo muntole, munnung'unukule kang'wa, nkatimo shimwiimane mmbiya ya koli. Ntole nkaapanganje pangunne na mmayene.”

18 Gene mobhago bhaajiganywa gubhaajendelenje a Yeshu, gubhabhushiyenje, “Gani ali jwankulungwa Muupalume gwa Kunnungu?” 2 A Yeshu gubhanshemile mwana jumo, gubhannjimishe pakati jabhonji, 3 gubhashite, “Kweli ngunakummalanjilanga, nkatendebhukanje nibha malinga bhana, ngu, nkajinjilanga Muupalume gwa Kunnungu.” 4 Jojowe akwiinyegaya nibha malingaaju mwanaju, jwenejo shaabhe jwankulungwa Muupalume gwa Kunnungu. 5 Jojowe akumposhela mwana jumo malinga jweneju kwa ligongo lyangu nne, anamboshela nne. 6 Jojowe shannebhye jumo jwa bhashokonji bhaangulupalanga nne, mbaya akatabhilwe liganga likulungwa nnuoi nileshelewa pa shilindili sha mashi. 7 Ole gwenunji bhandu bha pa shilambolyo kwa ligongo lya ilokoli. Illokoli shiikoposhele, ikabheje ole gwakwe jwene shaikumbuyejo. 8 “Monaga nkono eu lukongono lwenu lunnebhayaga, nnuukate na njae kwataliya. Mbaya nnjinjile mugumi gwa pitipiti nni

gwangali nkono eu lukongono, nngalingana na leshelwa pa moto gwa pitipiti nni na makono na makongono genu ganaabhili. (aiōnios g166) 9 Liyo lyenu linnebhayaga, nnikolotole na kulijaa kwataliya. Mbaya nnjinjile mugumi gwa pitipiti nni na shongo, nngalingana leshelwa pa moto gwa ku Jeanamu nni na meyo genu ganaabhili. (Geenna g1067) 10 "Mwiteiganje! Nnanyegayanje jumo jwa bhashokonjibha. Ngunakummalanjilanga, ashimalaika bhabhonji kunnunguko mobha gowe pubhalinginji tome na Atati bha Kunnungu. 11 Pabha Mwana juka Mundu ashinkwiya kwaatapulanga bhandu bhaobhilenje. 12 Nkubhononga bhuli? Mundu akolaga ngondolo makumi kumi, anng'obhaga jumo, shatende bhuli? Anakwiileka ngondolo makumi tisha na tisha ila pa shitumbi, nikwenda kunnoleya aobhile jula. 13 Kweli ngunakummalanjilanga, ampataga apinga kwinyonela kupunda makumi tisha na tisha yangaobha ila. 14 Nneyo peyo, Ainabhenunji bha Kunnungu bhakaapinga aobhe nkali jumo jwa bhashokonjibha. 15 "Mpweni annehelaga, munjendele nkanneye nninginji mmabhilipe. Ampilikanaga mumpatile mpweni. 16 Akampilikane, nrijendele naka mundu jumo eu bhahlili na mmayene, nkupinga kwa ukong'ondelo gwa bhandu bhahlili eu bhatatu, monaga lipali lilibhe limanyishe nimala. 17 Akaapilikanlanje bhanganayabho, mwaaluguilanje bhandu bha nnikanisha. Na monaga akaapilikanlanje, mumone malinga bhandu bhakakwaamanyanga a Nnungu eu bhakamula koli. 18 "Kweli ngunakummalanjilanga, shoshowe shishintabhanje pa shilambolyo, shishitabhwe kunnungu, na shoshowe shishinnogopolanje pa shilambolyo shishigopolwe kunnungu. 19 Kweli ngunakummalanjilanga kabhili, bhahlili bhenunji pa shilambolyo bhalaganangaga shoshowe sha juga, Atati bhali kunnungu shibhaatendelanje. 20 Pabha popowe pubhaimanaga bhandu bhahlili eu bhatatu kwa ligongo lyangu nne, nne mbali pamo na bhanganayabho." 21 Kungai a Petili gubhaajendele a Yesu, gubhaabhushiye, "Bhuli Mmakulungwa, mpwanga anebhele palingwa nineshelele? Nkali pa shabha?" 22 A Yesu gubhaajangwile, "Ngaalugula mala shabhape, ikabhe nkali makumi shabha mala shabha. 23 Pabha Upalume gwa Kunnungu unalandana naka mpalume jumo atendile eshabhu ika ntumishi jwakwe. 24 Eshabhu ikatandubheje, gubhapeleshelwe mundu jumo alongwaga ligambo mmbiya yaigwinji. 25 Jwene mundujo akakweteje shindu sha lipa, bhakulungwa bhakwe gubhaamulische aushwe jwenejo na akagwe na ashibhanagwe na indu yowe yaakwete, nkupinga lipila ligambo lila. 26 Bhai, ntumishi jula gwabhatindibhalile, nigwashite, 'Nnindile shininnipe ligambo lyenu lyowe.' 27 Bhakulungwa bhala gubhammonele shiya ntumishi jula, gubhannesehelele ligambo lila, gubhanneshile aijabhulile. 28 "Ntumishi jula gwajabhawile, gwang'imene ntumishi nnjakwe anongaga ligambo lya mmbiya makumi kumi. Gubhankamwile, nikunkida pa nngulo alinkuti, 'Unipe inguulonga!' 29 Ntumishi nnjakwe jula akuntindibhalilaga nikunshondelesheya, alinkuti 'Nninde shininnipe yowe'. 30 Ikabheje jwangakunda, gwapite kuntabha kuligelesha mpaka pushalipe ligambo lyowe. 31 "Bhai, bhatumishi ajakwerenji bhakaibhonanaje itendeshe gubhainginikenje kwa kaje, nigubhapite kwatashiyanga bhakulungwa bhabhonji gakoposhele. 32 Bhakulungwa bhala gubhanshemile ntumishi

jula, gubhammalanjilile, 'Ugwe ujwanyata ntima! Gwashinkunyaga nikuleshelele, gunikuleshelele ligambo lyako lyowe. 33 Bhuli, ikapinjikweje ugwe kummonnela shiya ntumishi nnjako malinga shinkubhonele shiya nne?' 34 "Bhai, bhakulungwa bhala gubhatumbele kaje, nigubhampeshelele akapotekwe mpaka pushalipe ligambo lyowe. 35 A Yesu gubhashite, Atati bhali kunnungu shibhatendelanje nneyo peyo monaga mundu akannesehelele mpwakwe mpaka muntima."

19 A Yesu bhakamaliyeje kubheleketa gene malobhego, gubhajabhawile ku Galilaya nigubhapite ku Yudea, kung'ambu lushi lwa Yolodani. 2 Bhandu bhabhagwinji gubhaakagwilenje kweneke, gubhaalamiyenje bhalwelenji. 3 Mapalishayo bhananji gubhaashilenje, gubhaalinjilenje bhalinkutinji, "Bhuli, alali mundu kunneka nkagwe kwa shimilo shoshowe?" 4 A Yesu gubhaajangwilenje, "Bhuli, nkanabhe shomanga Majandiko ga Ukonjelo kuti a Nnungu kundandubho bhashikumpanganya mundu jwa shileu naka jwankongwe, 5 nigubhashite, 'Kwa lyene ligongolyo, jwanume shabhaleshe ainagwe na akwabhe, nilundana na akagwe, na bhanaabhili shibhabhanganje shiilu shimo?" 6 Kwa nneyo, bhanganayabho nngabha bhahlili kabhili, ikabhe shiilu shimo. Bhai, shibhalundikenye a Nnungu, mundu analakanye." 7 Ikabheje Mapalishayo gubhaabhushiyenje, "Bhai, kwa ndi a Musha bhashinkutulajila kunneka, nikunnjandishila talaka jwankongwe?" 8 A Yesu gubhaajangwilenje, "A Musha bhashinkunnekanga ntendanje nneyo kwa ligongo lya nonopa mitima jenunji, ikabheje kundandubho ikaliji nneyo. 9 Bhai ngunakummalanjilanga, jojowe shanneshelele nkagwe ikabhe kwa ligongo lya labhalabha, nilomba jwankongwe juna, analabhalabha na akunnomba jwankongwe aleshilwe jula analabhalabha." 10 Bhaajiganywa bhabho gubhaaluguilenje, "Ibhaga indu ya mundu naka nkagwe ili nneyo, mbaya nngalomba." 11 A Yesu gubhaaluguilenje, "Nngabha bhowe shibhakundanje gene majiganyo gano, ikabhe bhajaliwenje na a Nnungu kutama gwangalomba bhala. 12 Pabha ipali iumilo ya tama gwangalomba, bhana shibhelekwa, bhana bhashiunwanga ntonga na bhandu, na bhana kwa ligongo lya tumishila Upalume gwa Kunnungu. Akombola kukunda gene majiganyo gano, akunde." 13 Kungai bhandu gubhaapeleshelenje a Yesu bhana bhabhashoko nkupinga bhaabhishilanje makono nikwaajuilanga. Ikabheje bhaajiganywa bhabho gubhaakalipilenje. 14 A Yesu gubhashite, "Mwaalekanje bhanabho bhajiyangane kwangu nne, wala nnaabhiilanje, pabha Upalume gwa Kunnungu gwa bhandunji bhalinginji malinga bhanabha." 15 Bhai, gubhaabhishilenje makono nkwaajuilanga mboka, nigubhashoshile pepala. 16 Mundu jumo ashinkwaishila a Yesu, gwabhabhushiye, "Mmajiganya mmambbone, ndende shindu shashi sha mmbone nkupinga mbate gumi gwa pitipiti?" (aiōnios g166) 17 A Yesu gubhammalanjilile, "Pakuti, unanjema najwambbone? A Nnangupe jikape nibhali bhammbone. Upingaga kujinjila mugumi gwa pitipiti, ukunde amuli ya a Nnangu." 18 Mundu jula akwaabhuyaga, "Amuli yashi?" A Yesu gubhashite, "Unabhalaje, Unalabhelabhe, Unajibhe, Unakong'ondele unami, 19 Gwaajogope ainago na akwenu, na gumpinje ntami nnjako malinga shukwiipinga gwamwene."

20 Nshanda jula gwabhalugulile, “Gene gowego nigakamwile, shindubhile nndi kabhili?” 21 A Yesu gubhannugulile, “Monaga upingaga kukamilika, kaushe indu yako, mmbiyayo ukaapanganje bhaalaga, na ugwe shukole shibhiko kunnungu, kungai ujije kuungagule.” 22 Nshanda jula akapilikaneje genego, gwaijabhulile ali ainjisho, pabha ashinkubha tajili. 23 A Yesu gubhaalugulilenje bhaajiganywa bhahho, “Kweli ngunakummalanjilanga ipingabha ukomu tajili kujinjila Muupalume gwa Kunnungu. 24 Ngunakummalanjilanga kabhili, ikakomala kuka nnyama jwankulungwa jwa langwa ashemwa ngamia, kupeleta pa lilanga lya ingano, nngalingana tajili kujinjila Muupalume gwa Kunnungu.” 25 Bhakapilikananjeje nneyo bhaajiganywa bhala gubhalapilenje kwa kaje, nigubhashitenje “Bhai gani, shakombole kutapulwa?” 26 A Yesu gubhaalolilenje, nigubhashite, “Ku bhandu indu malinga yeneyo ikaakomboleka, ikabheje kwa mashili ga a Nnungu, yowe inakomboleka.” 27 Kungai a Petili gubhashite, “Bhuli uwe? Tushileka yowe kunkagula mmwe, bhai shitupate nndi?” 28 A Yesu gubhaajangwilenje, “Kweli ngunakummalanjilanga kunnungu na shilambolyo pushihijiyebha ya ambi, Mwana juka Muntu shatame pa shitengu shakwe sha ukonjelo, nune mmanganya likumi limo na bhahili nngagwilenje nne, shintamangane mwiitengu likumi limo na ibhili nnikwaukumulanga makabhila likumi limo na gabhili ga Ishilaeli. 29 Na jojowe aleshile nyumba, eu ashaapwakwe eu ashaalumbugwe, eu ainagwe eu akwabhe, eu bhana eu migunda, kwa ligongo lyangu nne, shaposhele mala makumi kumi na shakole gumi gwa pitipiti. (aiōnios g166) 30 Ikabheje bhahagwinji bhalinginji bhantai, shibhabhanganje bha kumpelo, na bhalinginji bha kumpelo shibhabhanganje bhantai.

20 “Upalume gwa Kunnungu ushilandana naka mundu akwete nngunda gwa mishabhibhu, nilabha lyamba kukwaatolanga bhakamula maengo kubhakamulanje liengo mungunda gwakwe. 2 Gubhalegene nabhonji kwaalipanga ela jimo kwa lyubha limo, kungai gubhaapelekenje kunnungunda gwabho. 3 Jikaisheje shaa tatu ja lyamba gubhapite kabhili kushoko gubhaabhwinenji bhandunji bhana bhajimingenenje kushoko, bhanginginji shatenda. 4 Gubhaalugulilenje, ‘Njendangananje nkakamulanje liengo kunnungunda gwangu gwa mishabhibhu, na nne shininnimpanganje aki jenunji.’ 5 Bhai, gubhapitengene. Bhayene nngunda bhala gubhapite kabhili shaa shita ja mui, na shaa tisha ndendungo, gubhatendile nneila peela. 6 Nkali shaa kumi na moja ja shigulogulo, gubhapite kabhili, gubhaaimenenje bhandunji bhana bhajimingenenje kushoko. Bhai, gubhaabhushiyenje, ‘Pakuti nshijimangana totolo gwangali kamula liengo?’ 7 Gubhaajangwilenje, ‘Pabha jwakwapi atupele liengo.’ Nabhalabho gubhaalugulilenje, ‘Njendanje nkakamulanje liengo mungunda gwa mishabhibhu.’ 8 “Kukapilileje, bhayene nngunda bhala gubhannugulile nkujimilila jwabho, ‘Gwaashemanje bhaakamula maengo gwaalipanje nshaala gwabhonji, tandubhila jwa kumpelo, mpaka jwa ntai.’ 9 Bhai, gubhaikengene bha kumpelo bhala, gubhaposhelenje kila mundu ela jimo. 10 Bhakaikanganjeje bhatainji bhala, pubhaganishiyenje shibhapegwanje kupunda bhananji bhala, ikabheje na bhalabhonji gubhapegwilenje ela jimo jimo 11 Gubhaposhelenje ela yabhonji, gubhatandwibenje

kwainginishila bhakulungwa bhala. 12 Bhalinkutinji, ‘Abha bhandunji bhatolilwenje kumpelo bhashikamulanga liengo lishaa limope, pakuti nshikututendela malinga bhanganayabha, uwe tushikamula liengo kwa kaje nibhalilwa na lyubha totolo?’ 13 “Bhakulungwa bhala gubhannangwile jumo, ‘Ambwiga, shakwa shininkumbile! Bhuli, twangalagana nshaala gwa ela jimo kwa lyubha limo?’ 14 Nntole aki jenu, mwijabhulile. Njipinga kwaapanganga bha kumpelobha malinga mmwe. 15 Bhuli, ngapinjikwa tenda shingupinga namwene kwa indu yangu? Bhuli, nnamonela lupimilo pabha njibha nannguja?’” 16 A Yesu gubhamaliye bheleketi bhalinkuti, “Bhalinginji kumpelo shibhabhanganje bha ntai, na bha ntai, shibhabhanganje bha kumpelo.” 17 A Yesu pubhajombokaga kwenda ku Yelushalemu, bhashinkwaatolanga bhaajiganywa likumi limo na bhahili bhala kuntelela na bhalinginji mumpanda gubhaalugulilenje, 18 “Mpilikananje! Tunakwenda ku Yelushalemu, na kweneko Mwana juka Muntu apinga kamuywa ku bhakulungwa bhaabshila na bhaajiganya bha Shalia na bhalabhonji shibhanng’ukumulanje abhulagwe. 19 Shihankamuyanje kubhandu bhagabha Bhayaudi, nkupinga bhannyegayanje na akomwe ibhoko na komelwa munshalabha, ikabhe lyubha lya tatu shayuywe.” 20 Penepo anyinabhabhonji bhana bha a Shebhedayo gubhaashile a Yesu bhali na ashibhana bhahho, gubhaatindibhalile nikwaajuga shindu. 21 A Yesu gubhaabhushiyenje, “Nkupinga nndi?” Bhakongwe bhala gubhaalugulile, “Nnumbile kuti ashibhanangubha shibhatamangananje Muupalume gwenu jumo nkono nshinda na juna nkono nnilo.” 22 A Yesu gubhaalugulilenje, “Nkakushimanya shinkujuganga. Bhuli, shinkombolanje kwiipililila malanga ga mbotoko malinga shimbanga pitila nne?” Gubhaajangwilenje, “Shitukombole.” 23 A Yesu gubhaalugulilenje, “Kweli shimwiipilililanje malanga ga mbotoko gumbinga pitila nne, ikabheje gani shatame kunkono nnilo eu nkono nshinda gwangu, nngabha gangu nne, ikabhe shibhapegwanje bhapanjilwenje na a Nnungu bhala.” 24 Bhaajiganywa likumi limo bhala bhakapilikananjeje genego, gubhaatumbalilenje ashaajabhonji bhahili bhala. 25 A Yesu gubhaashemilenje, gubhaalugulilenje, “Mmumanyinji kuti bhaatagwala bha bhandu bhagabha Bhayaudi bhanakwaatagwalanga bhandu kwa mashili, na bhakulungwanji bhahonji bhanakwabhonelanga nneyo peyo. 26 Kwenu mmanganya inabhe nneyo, ikabhe mundu apinga kubha jwankulungwa, abhe ntumishi jwenunji, 27 na mundu apinga kubha jwantai munkumbi gwenunji abhe ntumwa jwenunji. 28 Nneyo peyo, Mwana juka Muntu jwangaika kukamulilwa maengo, ikabheje kukamula liengo na shoya gumi gwakwe nkupinga kwaagombolanga bhandu bhahagwinji.” 29 A Yesu na bhaajiganywa bhahho bhalishokangana ku Yeliko, lugwinjili lwa bhandu gulwaakagwile. 30 Bhai, bhashinkupagwanja ashinangalole bhahili bhatemingenenje nnyenje mpanda, bhakapilikananjeje kuti a Yesu bhapinga pita gwene mpandago, gubhautienje lilobhe, “Mmakulungwa, Bhaulongo gwa a Daudi, nntubhonele shiya!” 31 Lugwinjili lwa bhandu lula bhakwaakalipilanganga kupinga bhapumulanje. Ikabheje bhanganayabho gubhapundilenje kweya lilobhe, “Mmakulungwa, Bhaulongo gwa a Daudi, nntubhonele shiya!” 32 A Yesu

gubhajimi, gubhaashemilenje nikwabhuwanga, "Nkupinganga nintendelanje nndi?" 33 Gubhaajangwilenje, "Mmakulungwa, tunajuga tulole." 34 Bhai, a Yesu gubhaabhonelenje shiya, gubhaakwashiyenje meyo gabhonji, na shangupe gubhalolilenje, nigubhaakagwilenje.

21 A Yesu na bhaajiganywa bhabho bhakabhandishilanjenje ku Yelushalemu gubhaikengenene ku Bhetipage tome na shitumbi sha Misheituni, gubhaatumilenjeje bhaajiganywa bhabho bhabhili, 2 gubhaalugulilenje, "Nnjendangane kushijiji shili mmujo jenunji, kweneko shimung'imananje mbunda atabhiilwe naka mwanagwe. Mwagopolanje nkajije nabhonji. 3 Monaga mundu ammuyangaga shoshowe, munnugulilanje, 'Bhakulungwa bhanakwaapinganga,' nabhalabho shangupe shibhampanganje." 4 Genega gashinkutendeka nkupinga gatimilile gegala galugwilwe na ankulondola bha a Nnungu bhalinkuti, 5 "Mwaabhalanjilanje bhashilambo ku Shayuni, 'Munole, Mpalume jwenu anakwiya! Ashikwitimalika na ashikwela mbunda, Mwana jwa mbunda.'" 6 Bhaajiganywa bhala gubhapitengene, nigubhatendilenje malinga shibhalugulilwenje na a Yesu. 7 Gubhanjiye nabhonji mbunda jula naka mwanagwe, gubhatandikenje nngubho yabhonji panani jabhonji na a Yesu gubhakwelile nitama panani nngubho paka mwana mbunda. 8 Bhandu bhagumbelenje bhala gubhatandikenje nngubho yabhonji ina mumpanda, na bhandu bhananji gubhatemilenje maagala gubhatandikenje mumpanda. 9 Bhandu bhahagwinji bhalinginji mmujo na bhalinginji nnyuma bhala, gubhautiyenje lilobhe bhalinkutinji, "Nnumbiilwe Bhaulongo gwa a Daudi! Apegwe mboka jwene akwiya kwa lina Iya Bhakulungwa! Bhalumbiliilwe a Nnungu bhali Kunnungu!" 10 A Yesu bhakajinjileje ku Yelushalemu, shilambo showe gushigumbele njasha. Bhandunji gubhalinginji nkubhuya, "Jweneju gani?" 11 Likundi Iya bhandunji munkumbi mula gubhashitenje, "Bhenebha a nkulondola bha a Nnungu a Yesu, kopoka ku Nashaleti shilambo sha Galilaya." 12 Bhai, a Yesu gubhajinjile ku liekalu, gubhaabhinjilenje palanga bhandu bhaushangaga na uma indu ku liekalu, gubhapindikulenye mesha ya bhaatindiganya mmbiya bhala na itengu ya bhaushanga ngunda. 13 Gubhaalugulilenje, "Ishijandikwa Mmajandiko ga Ukonjelo, 'Nyumba jangu shijishemwe nyumba ja nyujila nne.' Ikabheje mmanganya nshikujitendanga lishembo Iya bhaapokonyola indu." 14 Ashinangalole na bhalemelenje gubhaajendelenje ku liekalu, nabhalabho a Yesu gubhaalamiyenje. 15 Bhai, bhakulungwanji bhaabhisila na bhaajiganywa bha Shalia bhakaibhonanjenje ilapo ibhatendile a Yesu, na bhana bhashoko pubhautiyangaga lilobhe ku liekalu bhalinkutinji, "Bhalumbiliilwe Bhaulongo gwa a Daudi," gubhatumbelenje. 16 Kwa nneyo gubhaalugulilenje, "Bhuli, nkupilikana ibhaabheketetanga?" A Yesu gubhaajangwilenje, "Elo, ngulipilikana! Bhuli, nkanabhe shomanga Mmajandiko? 'Kwa kang'wa ya bhana bhashoko na ashinambombe Shihannumbililanje.'" 17 Bhai, gubhaaleshilenje, gubhajabhwiye pa shilambo pala gubhapite ku Bhetania, gubhagonile kweneko. 18 Lyambape a Yesu bhalibhujia kwenda ku Yelushalemu, gubhakwete shibhanga. 19 Gubhagubhweni nkongo guma gwa tini nnyenje mpanda, gubhaujendele, ikabheje bhangashibhona shindu ikabhe maambape. Bhai, gubhaulugulile

nkongo gula, "Unaogoye kabhili iepo pitipiti!" Shangupe nkongo gwa tini gula ukunyalaga. (aiōn g165) 20 Bhaajiganywa bhakaubhonanjenje bhashinkulapanga, gubhashitenje, "Kwa nndi agu nkongogu ushinyala shangupe?" 21 A Yesu gubhaajangwilenje, "Kweli ngunakummalanjilanga, monaga nkolangaga ngulupai gwangali lipamba, shinkombolanje tenda nngabha ga ntinipe, ikabheje nkali kushilugulila ashi shitumbishi, 'Tutumbuka ukatumbushile mmashi,' shiitendeshe. 22 Na nkolangaga ngulupai, shoshowe shishinnjunganje kwa a Nnungu, shimpegwanje." 23 A Yesu bhakajinjileje ku liekalu bhali nkujiganya, bhakulungwanji bhaabhisila na bhanangulungwa bha bhandunji gubhaajendelenje nikwaabhuya, "Nnatenda genega kwa ukulungwa ukeni? Gani ampele jene amuliji?" 24 A Yesu gubhaajangwilenje, "Na nne ngunakumuyanga, nnyangulangaga, bhai na nne shininnugulilanje ngunatenda genega kwa ukulungwa ukeni. 25 Bhuli, ubhatisho gwa a Yowana kugwakoposhele kwei? Bhuli, kugwakoposhele kwa a Nnungu eu ku bhandu?" Ikabheje gubhabheketelenje ashaayenenji, Tulugulaga, "Kugwakoposhele kwa a Nnungu," shibhatubhuye, "Bhai, pakuti mwangakulupailanga?" 26 Na tulugulaga, "Kugwakoposhele ku bhandu," tunakwaajogopanga bhandunji pabha bhowe bhanakundanga kuti a Yowana ankulondola bha a Nnungu. 27 Bhai, gubhaajangwilenje, "Tukakumumanya!" Nabhalabho a Yesu gubhaalugulilenje, "Numbe nne ngannugulilanga ngunatenda genega kwa ukulungwa gwashi." 28 "Mmanganya nkubhonanga bhuli? Bhandu bhamo bhashinkukola bhana bhabhili. Gubhannugulile jwankulu jula, 'Mwanangu, lelo ukakamule liengo kunnunda gwa mishabhibhu.'" 29 Nshanda jula gwajangwile, 'Ngajenda!' Ikabheje gwaibhushiye, kungai gwapite kamula liengo. 30 Ainamundu bhala gubhannugulile jwa nnung'una jula nneila peila, jwalakwe akwaajangulaga, 'Atati shinyende!' Ikabheje jwangajenda. 31 Bhuli, bhene bhabhibhu jwei atendile ibhapinga Ainamundu?" Gubhaajangwilenje, "Jwankulu jula." Bhai, a Yesu gubhaalugulilenje, "Kweli ngunakummalanjilanga, bhakamula kuli na bha labhalabha shibhannogolelanje kujinjila Muupalume gwa a Nnungu." 32 Pabha a Yowana bhanng'ishilenje na kunnanguyanga mpanda gwa aki mwangaakulupailanga, ikabheje bhakamula kuli na bha labhalabha bhashinkwaakulupailanga. Nkali nkagabhonanjenje gowego mmanganya mwangaipetanga nikwaakulupaila. 33 A Yesu gubhashite, mpiikananje lutango luna. Bhandu bhamo bhashinkulima nngunda gwa mishabhibhu, gubhatimbiliye lubhigo, gubhaolile liiko Iya minyila divai, gubhashenjile na nyingo ja tama bhalinda. Kungai gubhaakolishiyenje bhaalima, gubhajabhwiye kwenda shilambo sha talika. 34 Gakaisheje mobha ga maneng'eno, gubhaatumilenje bhatumishi bhabho ku bhaalimanga bhala, nkupinga bhakatolelanje ndalo. 35 Bhaalimanga bhala gubhaakamwilenje bhatumishi bhala, jumo gubhankomilenje na juna gubhannugulilenje na juna gubhankomilenje maganga mpaka gwawile. 36 Bhandu bhala gubhaatumilenje kabhili bhatumishi bhana, bhabhagwinji punda bhalongolelanje bhala. Bhaalimanga bhala gubhaatendelenje nneila peila malinga bhalongolelanje bhala. 37 Kumpelo gubhantumile mwanagwabho akuno bhaliganishiya, shibhannogopanje pabha mwanangu. 38 Ikabheje bhaalimanga

bhala bhakammonanje mwanagwabho gubhabheleketenje ashaayeneni, “Jweneju ni apinga lishi, tummulaje tutole ulishi gwakwe!” 39 Bhai, gubhankamwilenje, gubhampelenje kunyenje nngunda gwa mishabhibhu gula, gubhammulegenje. 40 “Lelo, bhayene nngunda gwa mishabhibhu pushibhaishepo, shibhaatendanje bhuli bhaalimangabho?” 41 Gubhajangwilenje, “Shibhaabhalaganje bhaalimanga bhanganji bha mbonenijho, na nngunda gula shibhaapanganje bhaalimanga bhananji, shibhajiye kwaapanganga ndalo.” 42 Penepo a Yesu gubhaalugulilenje, “Bhuli, nkanabheshomanga yenei Mmajandiko? ‘Liganga libhalikanilenje bhaashenga Nnaino lishibha liganga likulu lya pa ndumba. Bhakulungwa bhatendile lyeneli, Na kungwetu uwe ni lya lapa!’ 43 “Kwa nneyo ngunakummalanjilanga, Upalume gwa a Nnunu upinga shoywa kungwenunji, bhapegwanje bhandunji bha ilambo ina, shibhakombolanje kutenda ibhapinga a Nnunu.” 44 Na jwene shaagwile lyene ligangalyo, shatemekanje ipande, na jojowe shilingwile lyene ligangalyo, shakandaganywe. 45 Bhakulungwanji bhaabhisila na Mapalishayo bhakapilikananje ndango ya a Yesu, gubhamunyaninji kuti bhanakwaabheleketanga. 46 Kwa nneyo gubhaloleyenje mwakwaakamulila, ikabheje bhatendaga kwaajogopanga bhandunji, pabha bhandunji bhamunyaninji kuti ankulondola bha a Nnunu.

22 A Yesu gubhabheleketete nabhonji kabhili kwa lutango bhalinkuti, 2 “Upalume gwa kunnungu ushilandana naka mpalume jumo antendele mwanagwe kalamu ja ndowa. 3 Bhai, gubhatumile bhatumishi bhabho bhajendangane kukwaatolanga bhashemilwenje ku ndowa, ikabheje bhashemilwenje bhala bhashinkukananga. 4 Gubhatumile kabhili bhatumishi bhana, bhalinkuti, ‘Mwaalugulilanje bhashemilwenje bhala, kalamu jangu nnaino tayali, malume gangu ga ng’ombe ya jimbala na matumbwe iinjilwe na kila shindu tayali, nnijyangane ku ndowa.’ 5 Ikabheje bhangaikumanga, gubhajibhulilenje, juna ku nngunda gwakwe na juna ku indu yakwe nnyene, 6 bhananji gubhaakamwilenje bhatumishi bhala nikwatukananga, gubhaabhulegenje. 7 A mpalume bhala gubhatumbele, gubhatumile manjola kukwaabhalaganga bhaabhulegenje bhatumishi bhabho, na joka moto shilambo shabhonji. 8 Kungai gubhaalugulilenje bhatumishi bhabho, ‘Kweli, kalamu ja ndowa pujili tayali, ikabheje bhashemilwenje bhala bhanganjijikwanga. 9 Bhai, nnjendangane mmalekano na bhobhowe bhushimwaimanaje mwaashemanje bhaikangane ku ndowa.’ 10 Bhatumishi bhala gubhashoshilenje, gubhapitengene mipanda, gubhaishe nabhonji bhandu bhowe, bha mbonenji na bhanginginji bha mbonenji. Nyumba jila gujigumbele bhajeninji. 11 “Ikabheje a mpalume bhakajinjileje kukwaalolanga bhajeninji, gubhamweni mundu jumo jwangawala nngubho ja ndowa. 12 Bhakulungwa gubhammushiye, ‘Ambwiga, nnjinjile bhuli gwangali wala nngubho ja ndowa?’ Ikabheje jwangajangula, gwaitamile ilili. 13 Penepo a mpalume bhala gubhaalugulilenje bhatumishi, ‘Muntabhanje makono na makongono nkanjaanje palanga ku luhindu, kweneke shikubhe shililo na yaga meno.’ 14 A Yesu gubhamalishaye bhalinkuti, ‘Bhashemilwenje bhabhagwinji, ikabheje bhaagwilwenje bhashokope.’ 15

Kungai, Mapalishayo gubhajabhulengene, nigubhapengeneni shanabhuli pushibhaatanjinyenje a Yesu kwa malobhe gabho. 16 Bhai, gubhaatumilenje bhaajiganywa bhabhonji na bhandunji bha a Elode, gubhaabhushiyenje, “Mmaajiganya, tumumanyi kuti mmwe mmandu bha kulupalika, na nnaajiganya mpanda gwa a Nnunu kwa kulupalika na nkakunjugopa mundu jojowe, pabha mmwe mwangali luagu. 17 Bhai, ntulugulile nkubhona bhuli? Alali eu nngabha alali kulipa koli kwa a Kaishali?” 18 Ikabheje a Yesu gubhaumanyi ungumanyika gwabhonji, gubhaalugulilenje, “Mmanganya mmagulumba, kwa nndi nnaninganga? 19 Nnanguyanje mmbiya ja lipila koli.” Gubhaalangwiyenje. 20 Bhai, a Yesu gubhaabhushiyenje, “Pishaji na majandikoga gakeni?” 21 Gubhaajangwilenje, “Ya a Kaishali.” Penepo a Yesu gubhaalugulilenje, “Bhai, ya a Kaishali mwaapanganje a Kaishali, na ya a Nnunu mwaapanganje a Nnunu.” 22 Bhakapilikananje nneyo gubhalapilenje, gubhajabhulengenenje nikwaaleka. 23 Lyene lyubhalyo, Mashadukayo bhananji bhaabheleketanga kuti, bhawilenje bhakayukanga, gubhaajendelenje a Yesu. 24 Bhai, gubhaabhushiyenje bhalinkutinji, “Mmajiganya, a Musha bhalugwile, mundu alombile awaga gwangali leka bhana, inapinjikwa jwannung’una abhatole bhakongwebho, nkupinga abhakolele bhana akulugwe. 25 Bhai, panngwetu pano bhashinkupagwanga bhandu shabha. Jwankulu ashinkulomba gwawile gwangali kolela bhana, gwanneshele mpwakwe bhashitenga bhala. 26 Nibha nneyo peyo kuka mpwakwe jwa bhili, naka jwa tatu, mpaka bhowe shabha. 27 Bhakawanganje bhowebho, bhakongwe bhala nabhalabho gubhawile. 28 Bhuli, lyubha lishibhayukanje, shibhabhe bhakongwe bhakeni? Pabha bhashinkulombwa na bhowe shabha.” 29 A Yesu gubhaajangwilenje, “Mmanganya nnapuganikanga kwa ligongo lya nngagamanya Majandiko ga Ukonjelo wala mashili ga a Nnunu. 30 Pabha bhawilenje pushibhayukanje bhakalombanga wala lombwa, shibhabhanganje mbuti ashimalaika kunnungu. 31 Ikabheje ga yuka bhawilenje, bhuli, nkanabhe shomanga gubhannugulilenje a Nnunu gala? Bhalinkuti, 32 ‘Nne a Nnunu bha a Bhulaimu na bha a Ishaka na bha a Yakobho!’ Bhai, bhenebho nngabha a Nnunu bha bhandu bhawilenje, ikabheje bha bhandu bhakotonji.” 33 Bhandu bhagumbelenje bhala bhakapilikananje nneyo, gubhalapilenje kwa majiganyo gabho. 34 Mapalishayo bhakapilikananje kuti a Yesu bhashikwaapeyanga Mashadukayo, gubhaimenenje pamo. 35 Jumo munkumbi gwabhonji, akujimanya Shalia, akwaabhuyaga a Yesu nkwaalinga, 36 “Mmaajiganya, amuli jashi jili jikulungwa Nshalia ja a Musha?” 37 A Yesu gubhaajangwile, “Mwaapinje Bhakulungwa a Nnunu bhenu kwa ntima gwenu gowe na mbumu yenu yowe na kwa lunda lwenu lowe’. 38 Jeneji ni amuli jikulungwa na ja ntai. 39 Bhalili jilandana na jenejo, ‘Mwaapinje atami ajenu malinga shinkwipinga mmayene’. 40 Shalia yowe ya a Musha na majiganyo ga ashinkulondola bha a Nnunu inashimilika kwa yene amulii.” 41 Mapalishayo bhakaimanaje pamo, a Yesu gubhaabhushiyenje, 42 “Mmanganya nkubhonaga bhuli ga a Kilishitu? Bhuli, mwana juka gani?” Gubhaajangwilenje, “Bhaulongo gwa a Daudi.” 43 A Yesu gubhaabhalanjilenje, “Bhai, ikomboleka bhuli kwa a Daudi kwa longoywa naka Mbumu jwa Ukonjelo bhanakwaashema a Kilishitu

Bhakulungwa? Pabha bhashinkubheleketa, 44 'Bhakulungwa bhashinkwaalugulila Bhakulungwa bhangu. "Ntame nkono nnilo gwangu, Mpaka pushinaabhikarje ashaamagongo ajenu pa makongono genu." 45 Bhai, ibhaga a Daudi bhanakwaashema a Kilishitu 'Bhakulungwa' nibha bhuli bha ulongo bhahho?" 46 Wala jwakwa mundu abhajangwile. Tandubhila penepo jwakwa mundu alinjile kwaabhuya kabhili.

23 Kungai a Yeshu gubhaabhalanjilenje bhandunji bhagumbelenje na bhaajiganywa bhahho, bhalinkuti. 2 Bhaajiganya bha Shalia na Mapalishayo bhashipegwanga ukulungwa gwa shitengu sha a Musha. 3 Kwa nneyo nkamulanje na tenda shoshowe shishibhannugulilanje. Ikabheje nnakaguyanje itendi yabhonji, pabha bhakaatendanga malinga shibhaajiganyanga. 4 Bhanatabhanga mishigo ja topa nikwaatwikanga bhandunji mmakoyo, ikabheje ashaayenenji bhakapinganga kujangutula nkali kwa lukowe. 5 Bhanatendanga itendi yabhonji nkupinga bhalolwanje na bhandunji. Bhanawalanga mabhadili gamakulungwa pa shenyi na mmakono gajandikwe Shalia na leupya mbundo ya pai ya ngubho yabhonji. 6 Bhanaapinganga tama mwiitengu ya mmujo nkalamu na mmashinagogi. 7 Bhanapinganga kukomaywa kwa jopoekwa kushoko na bhanapinganga shemwa na bhandunji, Bhaajiganya. 8 Ikabheje mmanganyanji nnashemwanje, Bhaajiganya, pabha bhaajiganya bhenunji bhamope, na mmanganya mmowe malinga bhandu bha lutumbo lumo. 9 Wala nnanshemange mundu jojowe, Atati, pa shilambolyo, pabha Ainabhenunji bhamope, bhali kunnungu. 10 Wala nnashemwanje, Ashikalongolele, pabha kalongolele jwenunji jumope, ni a Kilishitu. 11 Ali jwankulungwa munkumbi gwenunji anapinjikwa abhe ntumishi jwenunji. 12 Jojowe akwiikuya apinga nyegaywa, na akwiinyegaya apinga kuywa. 13 Ole gwenunji bhaajiganya bha Shalia na Mapalishayo, mmagulumba! Pabha nnakwaugailanga bhandunji nnango gwa Upalume gwa Kunnungu, mwaashayenenji nkajinjilanga, na wala bhapinganga jinjila bhala nkakwaalekanga bhajinjilangane. 14 Ole gwenunji mmaajiganya bha Shalia na Mapalishayo bhagulumba! Pabha nnapokonyolanga nyumba ya bhashitenga na nnajuganga Nnungu kwa leupya, nkupinga mmonekananje kubhandu kuti mmambonenji, kwa nneyo shinng'ukumulwanje kupunda bhananji. 15 Ole gwenunji bhaajiganya bha Shalia na Mapalishayo, mmagulumba! Nnaowanga mmashi na pa litaka nkupinga mumpatanje mundu shakagule dini jenunji. Mumpatangaga, nnakutendanga mwana jwa ku Jeanamu pabhili kupunda mwaashayenenji. (Geenna g1067) 16 Ole gwenunji ashikalongolele nangalole! Mmanganya nkutinji mundu alumbilaga kwa lina lya liekalu, kwene kulumbilako nngabha shindu, ikabheje alumbilaga kwa shaabhu ili nniekalu, kwene lumbilako kunakuntabha. 17 Mmanganya ashikalongolele bhangu! Shei shipundile, shaabhu eu liekalu litenda jene shaabhujjo jibhe ja ukonjelo? 18 Kabhili nnkutinji kuti mundu alumbilaga kwa shitala nngabha shindu, ikabheje alumbilaga kwa mbepei ibhishilwe pa shitala, kwene lumbilako kunakuntabha. 19 Mmanganya ashinangalole! Shei shipundile, upo ila, eu shitala shitenda mbepeiyo ibhe ja ukonjelo? 20 Alumbila kwa shitala

analumbila kwa shitala, na kwa indu yowe ili pa shitala. 21 Na alumbila ku liekalu ashilumbila ku liekalu na kwa bhatama nkati bhala. 22 Na alumbila kunnungu ashilumbila ku shitengu sha Upalume gwa a Nnungu, na bhaatama panani jakwe. 23 Ole gwenunji bhaajiganya bha Shalia na Mapalishayo, mmagulumba! Nnashoyanga lipungu lya kumi, nkali maamba ga mmboga, bhishali na tindi, akuno nnilekanga indu ya mana ya Shalia malinga, aki na shiya na ngulupai. Genega gumpinjilwenje kugabhika mmitima gwangali kulibhala gana. 24 Ashikalongolele nangalole! Nnashoyanga libhembe, ikabheje nimila ngamia, nnyama jwankulungwa. 25 "Ole gwenunji bhaajiganya bha Shalia na Mapalishayo, mmagulumba! Mmanganya nninginji malinga mundu aukanga ikombe na bhakuli kua, ikabheje nkati mugumbele indu impatilenje kwa pokonyola na shojo. 26 Mmwe a Palishayo nangalole! Nng'ukanje oti shikombe nkati na kua shikukonje. 27 "Ole gwenunji bhaajiganya bha Shalia na Mapalishayo, mmagulumba! Puninginji mbuti likabhuli lipashilwe shokaa, kwa palanga linabhoneka kukonja, ikabheje nkati kushigumbala maupa ga bhawilenje na ikoko yaigwinji. 28 Nneyo peyo mmanganya nnabhonekanga na bhandunji mbuti nkwetenje aki, ikabheje nkati nshigumbalanga ugulumba na ungamanyika. 29 "Ole gwenunji bhaajiganya bha Shalia na Mapalishayo, mmagulumba! Nnashenjelanga makabhuli ga ashinkulondola bha a Nnungu na konjeleya makabhuli ga bhandunji bhakwetenje aki. 30 Nnikutinji, 'Monaga uwe tukapali bhukala ja ashinakulu bhettu, tukanakunde kwaabhulaganga ashinkulondola bha a Nnungu!' 31 Kwa nneyo, nnakong'ondelanga mwaashayenenji kuti mmanganya bha ulongo gwa bhaabhulegenje ashinkulondola bha a Nnungu. 32 Bhai, mmalyanje liengo libhatandubhenje bhanyikala bhenunji lila. 33 Mmanganya nninginji malinga majoka, bhana bha majoka! Shinnjikubhutukanje bhuli ukumu ja ku Jeanamu? (Geenna g1067) 34 Pabha nnolanje, nne ngunakumpeleshelanga ashinkulondola bha a Nnungu, bhandunji bhakwetenje lunda na bhaajiganya bha Shalia. Bhananji nkupinga kwaabhulaganga na kwaakomelanga munshalabha bhananji, shimwaakomanje ibhoko mmashinagogi genunji na kwaabhanganga shilambo kwa shilambo. 35 Kwa nneyo kugambwa kowe shikung'ishilanje kwa ligongo lya minyai ja bhandunji bhakwetenje aki jjiitishile pa litaka. Elo, tandubhila kubhulagwa kwa a Abheli bhaaliji bhanguja, mpaka kubhulagwa kwa a Shakalia bhanabhabho a Bhalakiya, bhumwaabhulegenje ku liekalu pakati shitala na liekalu. 36 Kwele ngunakummalanjilanga, lwene lubhelekolu lupinga ukumulwa kwa ligongo lya genego. 37 "Ugwe Yelushalemu, Ugwe Yelushalemu! Ukwaabhulaganga ashinkulondola bha a Nnungu, na kwaakomanga maganga mpaka kuwa bhatumilwenje kunggwako bhala. Palingwa njilinga kwaakundikanyanga ashibhanago, malinga nanunu jwa nguku shakuti kwiigutamila yana yakwe, ikabheje gwaangapinga. 38 Bhai nnoje, nyumba jako shijibhe liame na ushubha. 39 Pabha, nkamonanga kabhili mpaka pushimmeleketanje, 'Apegwe mboka jwene akwiya kwa lina lya Bhakulungwa."

24 A Yeshu gubhakopweshe ku liekalu nigubhajjabhulile, bhaajiganya bhahho gubhaajendelenje nikwaalanguya

majumba gatimbilile liekalu. 2 A Yeshu gubhaabhalanjilenje, "Nnikugabhonanga gene gowega! Kweli ngunakunnugulilanga, lyakwapi liganga nkali limo shililepeshe panani liganga, yowe ipinga bhomolwa." 3 A Yeshu bhakatameje pa shitumbi sha Misheituni, bhaajiganywa bhobho gubhaajendenje shintemela, gubhaabhushiyenje, "Nntulugulile genega pushigakoposhele shakani? Shilangulo shashi shishilanguye kwiya kwenu na mpelo gwa shilambolyo?" (aiōn g165) 4 A Yeshu gubhaajangwilenje, "Mwiteganje mundu anantembanje. 5 Pabha bhandu bhahagwinji shibhaikangane bhalinkutinji, 'Nne a Kilishitu,' na bhalabhonji shibhaatembanje bhandu bhahagwinji. 6 Shimpilikananje ililo ya ngondo na ngani ya ngondo, ikabheje nnajogopanje, pabha genego ganapinjikwa gakoposhele, ikabheje mpelo ukanabhe. 7 Shilambo shipinga komana na shilambo shina, upalume gumo upinga komana na upalume guna. Shipinga pagwa shibhanga na ungumila kwa ilambo. 8 Yene yoweyo mbuti kutandubha kwa mboteko ya shitumbo nkupinga kwiigopola. 9 "Kungai bhandu bhowe shibhantendebhukanje nkupinga mpotekwanje na bhulagwa. Na bhandunji bhangabha Bhayaudi bhapinga kunshimanga kwa ligongo lyangu nne. 10 Kabhili, bhahagwinji bhapinga lekanga ngulupai jabhonji na tendebhukana na shimana. 11 Bhapinga koposhelanga ashinkulondola bha unami bhahagwinji bhapinga kwaapuganyanga bhandu bhahagwinji. 12 Kwa ligongo lya jenjesheka liebho, kupingana kwa bhandu shukubhujile nnyuma. 13 Ikabheje shaikakatimilile mpaka kumpelo shatapulwe. 14 Ngani ja Mmbone ja Upalume gwa a Nnugu jipinga lunguywa pa shilambolyo, kubha ukong'ondelo ku bhandu bhowe, penepo ni pushuishe mpelo gula." 15 Ashomajo agamanye malombolelo ga malobhe ga a Yeshu gakwiya gano. Nigubhashite, a Danieli ankulondola bha a Nnugu bhalugwile ga nnjimwa ja nyatiya. Pushinnjibhonanje jijimi pa ukunjelo, 16 bhalinginji ku Yudea bhahutushilanje mwiitumbi. 17 Ali pashitubhili anatushe pai kutola indu nnyumba jakwe. 18 Ali kunngunda anabhujie kumui kutola nngubho yakwe. 19 Ole gwabhonji bhanabhakongwe bhakwetenje ndumbo na bhajonjeyanga gene mobhago. 20 Nnjuganje kwa a Nnugu nkupinga kubhuka kwenunji kunabhe mobha ga mmbepo eu Lyubha lya Pumulila. 21 Pabha gene mobhago shipinga pagwa shilaje shikanabhe koposhela shitandubhile kupanganywa shilambolyo mpaka lelo, wala shikajiya pagwa kabhili. 22 Monaga gene mobhago a Nnugu bhakanapunguye jakwa muntu jojowe akatapwilwe, ikabheje gapinga punguywa kwa ligongo lya bhandu bhaagwilwenje na a Nnugu. 23 Bhai, muntu annugulilangaga, a Kilishitu pubhali apano, eu kubhali akula, nnankulupalilanje. 24 Pabha bhaapinga koposhelanga Bhakiliishitu na ashinkulondola bha unami. Bhapinga tendanga ilangulo ya ikulungwa na ya lapa ya kombola nkali kwapuganyanga bhaagwilwenje na a Nnugu. 25 Mpiilikananje, njikunnimbiyanga gakanabhe koposhela genego. 26 Bhai, bhannugulilangaga, nnolanje, kubhali kuanga, nnajendangane kweneko, eu, nnolanje, mubhali nnyumba, nnakulupalilanje. 27 Pabha malinga nnjai shijikuti meta nibhoneka kulunde kowe, pushijiyebha malinga pushabhoneshe Mwana juka Muntu lyubha lyashaishe. 28 Malinga, pene puguli ntui, nipugaimana matumbui, kwa nneyo

shene shilanguloshi shinalangula kuti ku mpelo gwa shilambolyo kubhandishile. 29 Shangupe shipitaga shilaje sha gene mobhago, lyubha lipingabha nnubhundu, mwei ukalangaya na ndondwa ipingagwa pai na mashili ga indu ya kunnungu gapinga tenganyika. 30 Kungai, shilangulo shika Mwana juka Muntu shishibhoneshe kunnungu, penepo makabhila gowe ga pa shilambolyo gapinga kwiigutanjila, shibhammonanje Mwana juka Muntu alikwiya mmaunde ga kunnungu ali na mashili na ukunjelo gwanngwinji. 31 Na bhalabho shibhaatumanje ashimalaika bhobho na lipenga lya oneya, bhalabhonji bhapinga kwaalopolanga bhaagwilwenje bhobho kopoka mmbali yowe ya pa shilambolyo. 32 Bhai kwa nkongo mwiijiganyanye alu lutangolu, shangupe nyambi yakwe puitandubha ipuka, nnakumumanyanga kuti shuku shibhandishile. 33 Nneyo peyo mmanganya pushinggabhonanje genega, mmumanyanje kuti bhahandishile. 34 Kweli ngunakummalanjilanga, alu lubhelekolu lukapela gakanabhe koposhela gowego. 35 Kunnungu na shilambolyo shiipite, ikabheje malobhe gangu gakapita. 36 Ikabheje, ga lyene lyubhalyo, eu malanga jwakwa muntu akugamanya shigabhe shakani, wala ashimalaika bha kunnungu, wala Mwana, ikabhe Atati jikape. 37 Pabha malinga shiyaliji mobha ga a Nuu, puipingabha mobha ga kwiya kwakwe Mwana juka Muntu. 38 Pabha gene mobhago, nduluko jikanabhe tuluka, bhandunji bhatenda lyanganga na kolelwa na lombwa, mpaka a Nuu pubhainjile nshapina. 39 Bhangashimanyanga shipinga koposhela, mpaka pujaishe nduluko, jikwaajolangaga bhowe. Na malinga pushijiyebha lyubha lya kwiya kwakwe Mwana juka Muntu. 40 Gene mobhago bhandunji bhahili shibhabhanganje mungunda, jumo shatolwe na juna shaleshwe. 41 Bhanabhakongwe bhahili shibhabhanganje bhaliyaganga, jumo shatolwe na juna shaleshwe. 42 Bhai, nsheyanje, pabha nkakulimanyanga lyubha lishibhaishe Bhakulungwa bhenunji. 43 Ikabheje nnimanyanje lyeneli, monaga bhayene nyumba bhakalimanyi lyubha lya kwiya nngwii, bhakasheshiye, ngubhakajileshileje nyumba jabho kujibhwa. 44 Kwa nneyo na mmanganya nsheyanje, pabha Mwana juka Muntu shaishe malanga gunkakugamanyanga. 45 A Yeshu gubhapundile kubheleketa bhalinkuti, bhai gani ntumishi akulupalika na akwete lunda, bhakulungwa bhakwe shibhantende abhe jwa nkulungwa ku bhandu bhobho, abhapanganje shalya pa malanga gakwe? 46 Mbaya jwene ntumishi, bhakulungwa bhakwe pushibhaishe shibhann'gimane alitenda nneyo. 47 Kweli ngunakummalanjilanga, shibhammisho jwene ntumishijo agoye indu yabho yowe. 48 Ikabheje ntumishi jwangali jwa mmbone aibheleketelaga muntima gwakwe kuti, bhakulungwa bhangu bhanakabha kubhujia, 49 kungai gwatandwibhe kwaakomanga bhatumishi ajakwe na tandubha lya na papila pamo na bhakolelwanga, 50 bhakulungwa bhakwe ntumishijo shibhaishe lyubha lyangaganishiwa na malanga gangamanyika. 51 Shibhankome kwa kaje na kunkundikanya likundi limo na bhagulumba. Kweneko shikubhe shililo na tauna meno.

25 Gene mobhago, Upalume gwa Kunnungu upinga landana na bhali likumi limo bhajigelenje taa yabhonji, gubhapitengene kukumposhela nkulumba. 2

Nng'ano munkumbi gwabhonji pubhalinginji bhangumba na nng'ano bhashinkukolanga lunda. 3 Bhangumba bhala bhaashinkujigalanga taa yabhonji gwangali mauta ga sheituni ga jenjesheya. 4 Ikabheje bhakwetenje lunda bhala bhashinkujigalanga mauta nnyupa na taa yabhonji. 5 Pabha nkulomba ashinkukabha kwiya, bhali bhowe bhala gubhatandwibhenje kugweela na gubhagonilenje. 6 Ikabheje pakati shilo guipilikanishe njobhela ya kuti, nkulomba anakwiya, nnjendangane nkaposhelanje. 7 Penepo bhali bhowe bhala gubhajumukenje, gubhakolokweyenje taa yabhonji. 8 Bhangumba bhala gubhaabhalanjilenje bhakwetenje lunda bhala kuti, ntipanganje mauta gashoko pabha taa yetu inaimika. 9 Ikabheje bhakwetenje lunda bhala gubhashitenje, gakatujenela tubhowe! Mbaya nnjendangane nkaumanje kugaushwa! 10 Bhai, bhali bhangumba bhala bhakajabhulanjeje kuuma mauta, nkulomba gwaishe, na bhali bhalinginji tayali bhala gubhajinjenje nnyumba pamo nakankulomba, na nnango ukuugalwaga. 11 "Kungai bhali bhananji bhala gubhaikengene nishema, 'Mmakulungwa, mmakulungwa, ntuugulile!' 12 Ikabheje bhenebho gubhaajangwilenje, 'Kweli ngunakummalanjilanga, ngakummanyanga mmangananyi.'" 13 Kungai a Yesu gwubhashite, "Bhai, nsheyanje, pabha nakulimanyanga lyubha wala malanga." 14 "Pabha Upalume gwa Kunnungu ushilandana naka mundu apinjile jabhula mwanja, akwaashemangaga bhatumishi bhakwe nikwaakamuyanga indu yakwe. 15 Gubhampela kila mundu malinga shibhammweni kombola kwakwe, jumo mmbiya nng'ano na juna mmbiya ibhili na juna mmbiya jimo, kungai gubhajabhwise. 16 Shangupe a apegwile mmbiya ng'ano jula gwatendile upindi, gwapatile mmbiya ina nng'ano. 17 Nneyo peyo na jwene apegwile mmbiya ibhili gwapatile mmbiya ina ibhili. 18 Ikabheje apegwile mmbiya jimo jula gwapite olela pai mmbiya ja bhakulungwa bhakwe jila. 19 "Gakapiteje mobha gamagwinji, bhakulungwa bha bhatumishi bhala gubhabhujile, gubhatandwibhe pita bhalanganya mmbiya ibhakamwiye na ibhapatilenje muupindi. 20 Ntumishi apegwilwe mmbiya nng'ano gwaishe ali ajigele mmbiya nng'ano ina, akwaalugulilaga, 'Mmakulungwa, mwashinkumba mmbiya nng'ano, nnole mmbiya nng'ano ina imbatile.' 21 Bhakulungwa bhakwe gubhannugulile, 'Sha mmbone, ntumishi nnguja na jwaakulupalika. Ushikulupalika kwa indu ya ishoko, shinikupe gamakulungwa. Jiya uangalale pamo na nne.' 22 "Ntumishi juna apegwilwe mmbiya ibhili gwaishe, gwashoshiye mmbiya ibhili ina yapatile gwashite, 'Mmakulungwa, mwashinkumba mmbiya ibhili bhali ntole na mmbiya ina ibhili imbatile.' 23 Bhakulungwa bhakwe gubhannugulile, 'Sha mmbone, ntumishi nnguja na jwaakulupalika. Ushikulupalika kwa indu ya ishoko, shinikupe ya ikulungwa. Jiya uangale pamo na nne.' 24 "Kungai gwaishe apegwilwe mmbiya jimo jula, gwashite, 'Mmakulungwa, nimmanyi mmwe mmanonopa ntima, nnauna munkapandileje na kulopola munkamishiyeje mmbeju. 25 Nashinkujogopa, gung'ishiye mmbiya jenu pai. Bhai, nntole mmbiya jenu.' 26 "Bhakulungwa bhakwe gubhannugulile, 'Ugwe ntumishi jwangali jwa mmbone na nkata! Gwamumanyi kuti ngunauna mungapandileje na ngunalopola mungamishiyeje. 27 Bhai, gwashinkupinjikwa kujibhika mmbiya jangu kubhenki na nne

pushimujepo ngatolile mmbiya jangu na pwaida! 28 Bhai, mumpokonyolanje mbiyajo nkampanganje akwete mmbiya likumi limo jula. 29 Pabha, akwete shindu apinga pegwa na jenjeshewa. Ikabheje jwangali shindu jula, nkali shakwete shila shapokonyolwe. 30 Na gaka ntumishi jwangali pwaida jula, munnjaanje palanga kulubhindu! Kweneko kupingabha shililo na tauna meno." 31 Pushaishe Mwana juka Mundu mu ukonjelo gwakwe na ashimalaika bhakwe, penepo shatame pa shitengu shakwe sha upalume. 32 Bhandu bha ilambo yowe shibhaimanaje mmujo jabho na bhalabho bhapinga agulanya bhandu mbuti nshunga shakuti agulanya ngondolo na mmbui. 33 Shibhaibhishe ngondolo nkono nnilo na mmbui kunkono nshinda. 34 Kungai a Mpalume shibhaalugulilanje bhalinginji kunkono nnilo bhala, "Nnjiyangane mmanganya mpegwilenje mboka na Atati, mposhelanje upalume gummishilwenje tandubhila kupanganywa kwa shilambolyo. 35 Pabha nashinkukola shibhanga gumbelenje shalya, nashinkukola nnjota gumbelenje mashi, nashinkubha nannjeni gumboshelenje. 36 Punaliji na uukunu gumbelenje nngubho, punaliji nannwele gung'ikenje kunnola na ngatabhweje gung'owelenje." 37 Penepo, bhandunji bhakwetenje aki bhala shibhaajangulanje bhakulungwa, "Mmakulungwa, shakani putwammweni nni na shibhanga nikumpa shalya, eu nni na nnjota nikumpa mashi? 38 Shakani putwammweni nni mmajeni nikumposhela, eu nni na uukunu nikumpa nngubho nng'wale? 39 Shakani putwammweni nni mmalwele eu ntabhilwe gutuishe kukunng'owela?" 40 A mpalume shibhaajangulanje, "Kweli ngunakummalanjilanga, shindu shoshowe shimuntendenje jumo jwa ashaapwanga bhanyegalangabha, nshinkundendelanga nne." 41 Kungai shibhaabhalanjilanje bhalinginji ku nkono nshinda gwabho bhala, "Nnyabhuilanje apano mmaaloshwa! Nnjendangane ku moto gwa pitipiti gwaalashiwe Lishetani na ashimalaika bhakwe. (aiōnios g166) 42 Pabha nashinkukola shibhanga mwangambanganga shalya, nashinkukola nnjota mwangambanganga mashi ga ng'wa. 43 Punaliji nannjeni mwangamboshelanga, na punaliji na uukunu mwangambanganga nngubho, punaliji nannwele na punatabhilwe mwangang'owelanga." 44 Penepo na bhalabhonji shibhaajangulanje, "Mmakulungwa shakani putwammweni nni na shibhanga eu nnjota, nni mmajeni eu nni na uukunu, eu mmalwele eu ntabhilwe twangannjanguitila?" 45 Na bhalabho shibhaajangulanje, "Kweli ngunakummalanjilanga, kila punkanilenje kwaatendelanga ashaapwanga bhanyegalangabha, nshinkukananga kundendela nne." 46 Bhai, bhanganjabho shibhajandangane ku mbotoko ya pitipiti, ikabhe bhakwetenje aki bhala, shibhajandangane ku gumi gwa pitipiti. (aiōnios g166)

26 A Yesu bhakamaliyeje bheleketa gowego, gubhaabhalanjilenje bhaajiganywa bhabho, 2 "Mmumanyinji gapitaga mobha gabhili shipinga pagwa shikukuu sha Pashaka na Mwana juka Mundu apinga tendebhukwa shaakomelwe munshalabha." 3 Gene mobhago bhakulungwanji bhaabhisila na bhanangulungwa bha bhandunji gubhaimenenje pamo nnyumba ja a Kayapa, bhaaliji Bhakulungwa Bhabhisila. 4 Gubhabheleketenje shibhatandanje bhuli, nkupinga bhaakamulanje a Yesu kwa unami bhaabhulaganje. 5 Ikabheje gubhashitenje lyenelyo linatendeshe mobha ga shikukuu,

jinakoposhela njasha ku bhandu. 6 A Yeshu pubhaliji ku Bhetania kunngwabho a Shimoni bhaakwete mangundula bhukala, 7 bhakongwe bhamo bhaakwete shupa sha alabhashita sha mauta ga nunjila ga mmbiya yaigwinji, gubhaaishile pubhaalyaga shalya pala, gubhaajitile mauta gala muntwe. 8 Bhaajiganywa bhahho bhakabhananjeje genego guyaashimilenje, gubhashitenje, "Kwa nndi jonanganya nnei? 9 Pabha aga mautaga gakaushiwe kwa mmbiya yaigwinji na elayo nipegwa bhalaganga." 10 A Yeshu gubhaimanyi ng'aniyo yabhonji, gubhaabhalanijenje, "Pakuti nnakwaabhuyanga bhakongwebha? Pabha bhenebha bhashindendela shindu sha mmbone. 11 Bhalaganga nni nabhonji mobha gowe, ikabheje nne ngabha na mmanganya mobha gowe. 12 Abha bhakongwebha bhashinyitila mauta nkupinga mika tayali kwa mashiko gangu. 13 Kweli ngunakummalanjilanga, kila pushijilunguywe Ngani ja Mboneji pa shilambolyo, shene shibhatendile bhakongweshi, shipinga lunguywa nkwaakumbushila." 14 Kungai, a Yuda Ishikalote, jumo munkumbi gwa likumi limo na bhahili bhala, gubhaajendelenje bhakulungwanji bhaabhisila, 15 gubhashite, "Shimmbanganje nndi ninkamuyanganga a Yeshu?" Gubhaabhalanganishiyeje mmbiya makumi gatatu. 16 Tandubhila penepo a Yuda bhatendaga loleya shanabhuli shibhaatendebhushe a Yeshu. 17 Lyubha lya tandubha shikukuu sha mikate jangatagwa ngedule, bhaajiganywa bhahho gubhaajendelenje a Yeshu nikwaabhuya, "Kwei kunkupinga tukakolokoye shalya sha Pashaka?" 18 A Yeshu gubhaajangwilenje, "Nnjendangane kunjini kuka mundu jumo, nkammalanjanje, Bhaajiganya bhashite, 'Malanga gangu gubhang'agulile a Nnunu gabhandishile. Kunngwenu mbinga lila Pashaka na bhaajiganywa bhangu.'" 19 Bhaajiganywa gubhatendilenje malinga shibhalugulilwenje na a Yeshu, gubhakolokoyenje Pashaka. 20 Likaisheje ligulo, a Yeshu gubhatemi nkulya shalya na bhaajiganywa bhahho likumi limo na bhahili bhala. 21 Bhalingini nkulya, a Yeshu gubhashite, "Kweli ngunakummalanjilanga, jumo jwenunji apinga ndendebhuka." 22 Bhaajiganywa gubhainjikenje kwa kaje, jumo jumo gubhatandubhenje kwaabhuya, "Mmakulungwa! Bhuli, nne?" 23 A Yeshu gubhajangwile, "Shapambe pamo na nne mmakuli ni apinga ndendebhuka. 24 Mwana juka Mundu anakwenda malinga Majandiko shigaataya, ikabheje ole gwakwe apinga kuntendebhuka Mwana juka Mundu! Mbaya jwene mundu akanabheleke." 25 A Yuda bhapinjile kwaatendebhuka, gubhaabhusiye, "Mmajiganya! Bhuli, nne?" A Yeshu gubhaajangwile, "Mmwe mmelekete." 26 Bhalingini nkulya, a Yeshu gubhatolile nkate, gubhatendile eja kwa a Nnunu, gubhagebhenye, gubhaapelenje bhaajiganywa bhahho bhalinkuti, "Ntolanje nnyanganje, sheshino shiilu shangu." 27 Kungai gubhatolile shikombe, gubhatendile eja kwa a Nnunu, gubhaapelenje bhalinkuti, "Mpapijanje mmowe, 28 pabha jejino minyai jangu jikong'ondela malagano, jijitika kwa ligongo lya bhandu, nkupinga bhaleshelelwanje yambi yabhonji. 29 Ikabheje ngunakunnugulilanga, ngapapila kabhili divai ja shabhibhu mpaka lyubha pushimbapile divai ja ambi na mmanganya Muupalume gwa Atati." 30 Bhakajimbanjeje lwimbo, gubhashoshilenje, gubhapitengene ku shitumbi sha

Misheituni. 31 Kungai a Yeshu gubhaabhalanijenje, "Shilo sha lelo, mmowe shinngananje nineka, pabha ishijandikwa kuti, 'Shininkome nkushunga, na ngondolo shiipwilingane.'" 32 Ikabheje nyukaga shininnongolelanje kwenda ku Galilaya." 33 A Petili gubhaabhalanije a Yeshu, "Nkali bhowe bhalekangaga kunkulupalila nikummutuka, nne ngammutuka." 34 A Yeshu gubhaabhalanije a Petili, "Kweli ngunakummalanjila, shilo sha lelo lipongo akanabhe kongobhela shinngane patatu." 35 A Petili gubhaabhalanije, "Nkali ipinjikwaga kuwa pamo na mmwe, ngu ngankana." Bhaajiganywa bhananji bhala gubhabhelekenye nneyo peyo. 36 Kungai a Yeshu gubhapite nabhonji ku bhushitani ja Getishemane, gubhaabhalanijenje bhaajiganywa bhahho, "Ntamangane apano, nne naejejele mmujo kukwaajuga a Nnunu." 37 Gubhaatolile a Petili na bhana bhahili bha a Shebhedayo, gubhatandwibhe kuinjika na tenguka. 38 Gubhaabhalanijenje bhaajiganywa bhahho, "Ntima gwangu gushinjika tome nawa, ntamangane apano, nsheyanje pamo na nne." 39 Bhai, gubhapite mmujo kashoko, gubhagwile namanguku, gubhajujile, bhalinkuti, "Atati, itendekaga ai mbotekoi inabate, ikabheje nngabha malinga shinguti pinga nne, ikabheje malinga shinkupinga mmwe." 40 Gubhaajendelenje bhaajiganywa bhala, gubhaimenenje bhagonilenje. Gubhaalugulile a Petili, "Pakuti mwangasheyanga na nne kapela shaa jimo? 41 Nsheyanje nkujuga, nkupinga nnalingwanga. Ntima unapinga, ikabheje shiilu shangali mashili." 42 Gubhapite gwabhili kukwaajuga a Nnunu bhalinkuti, "Atati, ikatendeshe ai mbotekoi kupita gwangali mmbata, bhai inkupinga itendeshe." 43 Gubhaajendelenje kabhili bhaajiganywa bhala, gubhaimenenje bhagonilenje, pabha bhashinkutopelwanga na lugono. 44 Bhai, gubhaaleshilenje, nigubhapite kukwaajuga a Nnunu gwatatu kwa malobhe gala pegala. 45 Kungai gubhaajendelenje bhaajiganywa bhala, gubhaalugulilenje, "Bhuli nnagonangape na pumulila? Nnolanje! Malanga gaishe, Mwana juka Mundu apinga kamuywa mmakono ga bhakwetenje yambi. 46 Nnjumukanje tujabhule! Nnolanje, andendebhuka jula abhandishile." 47 Bhai, a Yeshu pubhaaliji nkubheleketi nabhonji, shangupe gubhaishe a Yuda, bha munkumbi gwa likumi limo na bhahili bhala. Bhali bhalongene nabhonji likundi likulungwa lya bhandunji, bhali bhajigelenje mapanga na ndonga, bhatumilwenje na bhakulungwanji bhaabhisila na bhanangulungwa bha bhandunji. 48 Na bhaatendebhwishe a Yeshu bhala bhashinkwaapanganga bhandunji shilangulo bhalinkuti, "Bhene bhushinaajambatebho mwaakamulanje." 49 Bhai a Yuda gubhaajendele a Yeshu, bhalinkuti, "Ngunakunkomaya, Mmajiganya!" Gubhaajembete. 50 A Yeshu gubhaabhalanije, "Ambwiga ntende shinng'ishile." Bhandunji bhala gubhaikengene, gubhaakamwilenje a Yeshu nikwaatabha. 51 Jumo munkumbi gwa bhalingini na a Yeshu bhala akugoloyaga nkono gwakwe, gwaolomwele upanga gwankomile ntumishi jwa Bhakulungwa Bhaabhisila, gwankatile likutu. 52 A Yeshu gubhamalanjile, "Bhika upanga gwako nnigonelo lyakwe, pabha jowowe abhulaga na upanga shabhalugwe na upanga. 53 Bhuli, nkakumumanyanga kuti ngakombwele kwaajuga Atati, nabhalabho shangupe bhakambeleshele makundi gamakulu

makulu likumi limo na bhabhili ga malaika? 54 Ikabheje pushigamaille bhuli Majandiko gataya kuti inapinjikwa kubha nneyo?" 55 Gene malangaga a Yesu gubhaabhalanjilenje likundi lya bhandunji lila, "Bhuli, nshikwiya ngamulanga nninginji na mapanga na ndonga mbuti nankupokonyola? Mobha gowe munaliji nniekalu nilijiganya mwangangamulanga. 56 Ikabheje gowega gashitendeka nkupinga gamaille majandiko ga ashinkulondola bha a Nnungu." Penepo bhaajiganywa bhowe gubhaaeshilenje, nigubhabhutukenje. 57 Bhai, bhandunji bhaakamwilenje a Yesu bhala gubhaapelekenje kumui kwa a Kayaba, Bhakulungwa Bhaabhisshila, kubhaimenenje bhaajiganya bha Shalia ja a Musha na bhanangulungwa. 58 A Petili gubhaakgwile nnyuma mpaka kulugwani lwa Bhakulungwa Bhabhisshila, gubhainjile nkati gubhatemi pamo na bhalinda, nkupinga bhalole shipinga koposhela. 59 Bhai, bhakulungwanji bhaabhisshila na bhalukumbi bhowe gubhaloleyenje ukong'ondelo gwa unami nkupinga bhaabbulaganje a Yesu, 60 ikabheje gubhalepelenje, nkali bhapalinji bhaakong'ondela bhabhagwinji bha unami. Kungai gubhaikengene bhakong'ondela bhabhili, 61 nigubhashitenje, "Bhenebha bhashinkubheleketa, "Ngunakombola kulibhomola Liekalu lya a Nnungu nikulishenga kabhili kwa mobha gatatu." 62 Bhakulungwa Bhabhisshila gubhajimi gubhaabhalanjile a Yesu, "Bhuli, nkaajangula? Ibhakunkong'ondelanga nndi bhandunjibha?" 63 Ikabheje a Yesu bhangaajangula. Bhakulungwa Bhaabhisshila gubhaabhalanjile, "Nnumbile kwa lina lya a Nnungu bhakwete gumi na ntubhalanjile monaga mmwe ni a Kilishitu, Bhanabhabho a Nnungu!" 64 A Yesu gubhaalugulile, "Mmwe ni nkubheleketa! Ikabheje ngunakummalanjilanga, tandubhila nnaino, shimumonanje Mwana juka Mundu atemi nkono nniilo gwa Bhakulungwa Bhakwete Mashili, alikwiya mmaunde ga kunnungu." 65 Penepo Bhakulungwa Bhaabhisshila gubhapapwile nngubho yabho gubhashite, "Bhashikupulu! Tunapinga bhaakong'ondela kabhili? Mpilikenenje shibhashite kupulu. 66 Nkubhonanga bhuli mmanganya?" Gubhaajangwilenje, "Inapinjikwa bhabhulagwe!" 67 Kungai gubhaaunilenje mata kumeyo, gubhaakomilenje ubha na bhana gubhaakomilenje mapapa, 68 bhalinkutinji "Mmwe a Kilishitu, bhai ntulondolele ghai ankomile!" 69 A Petili pubhaliji bhatemi palanga lugwani, bhai, ntumishi jumo jwankongwe jwa Bhakulungwa Bhaabhisshila akwaajendelaga, nigwashite, "Mmwe pumwaliji pamo na a Yesu bha ku Galilaya." 70 A Petili gubhakanile pa lugwinjili lwa bhowe gubhashite, "Ngakushimanya nkali shinkubheleketa." 71 Nabhalabho bhalikopoka pa nnango gwa lugwani, ntumishi juna jwankongwe gwabhabhweni, akwaalugulilangaga bhalinginji pepala bhala alinkuti, "Abha pubhaliji pamo na a Yesu Bhanashaleti." 72 Ikabheje a Petili gubhakanile kabhili bhalilumbila, "Ngakummanya aju munduju." 73 Kungai, bhandunji bhalinginji pepala gubhaajendelenje a Petili, gubhaabhalanjilenje, "Kweli mmwe nkumbi gumo, nkali kubheleketa kwenu kunakummanyiya." 74 Penepo a Petili gubhatandwibhe kwiiloshana na lumbila bhalinkuti, "Ngakummanya aju munduju!" Shangupe lipongo likukongobhelaga. 75 A Petili gubhakumbushile malobhe gubhabhalanjilwe na a Yesu,

"Lipongo akanabhe kongobhela, shinngane patatu." Bhai, gubhakopweshe palanga, gubhaguitile kwa kaje.

27 Lyambape, bhakulungwanji bhaabhisshila bhowe na bhanangulungwa bha bhandunji, gubhatemingenenje shitamo sha pinga kwaabbulaga a Yesu. 2 Gubhaatabhilenje mindondolo, gubhapite kwaakamuyanga kwa a Pilato bhaaliji bhakulungwa bha shilambo sha ku Yudea. 3 Kungai a Yuda bhaatendebhwishe a Yesu bhala, bhakamumanyeye kuti a Yesu bhashikumulwa, nigubhaigambile, gubhaabhujishiyenje bhakulungwanji bhaabhisshila na bhanangulungwa bha bhandu mmbiya ipande makumi gatatu ila. 4 Bhalinkuti, "Njilebha kwa kuntendebhuka mundu jwangalebha abhulagwe." Ikabheje bhanganayabho gubhashitenje, "Uwe nndi? Kwali mmayene." 5 Na bhalabho a Yuda gubhaisheshe mmbiya ila nniekalu, gubhakopweshe palanga, nikwenda kwiitabhila. 6 Bhakulungwanji bhaabhisshila gubhaitoilienje mmbiya ila nigubhashitenje, "Nngabha alali kuibhika nshibhiko sha mbepei, pabha mmbiya ya minyai." 7 Bhai, gubhabheleketenje ashaayenenji, nigubhaumilenje nngunda guka nkugumba lilongo pabhe pa shishila bhajeninji 8 Kwa nneyo nngunda gula pubhashemangaga, Nngunda gwa Minyai. 9 Gugamaille malobhe ga ankulondola bha a Nnungu a Yelemia ga kuti, "Gubhatoilienje mmbiya ipande makumi gatatu, galama jika jwene jubhampanjilenje bhei bha Ishilaeli jula, 10 gubhaumilenje nngunda guka nkugumba lilongo, malinga shibhamalanjile Bhakulungwa." 11 A Yesu gubhajimi mmujo ja bhakulungwa bha shilambo sha ku Yudea, bhai, bhakulungwa bhala gubhaabhushiye bhalinkuti, "Bhuli, mmwe a mpalume bha Bhayaudi?" A Yesu gubhaabhalanjile, "Mmwe ni nkubheleketa." 12 Ikabheje bhakulungwanji bhaabhisshila na bhanangulungwa pubhalinginji nkwaukumula, bhangaajangula. 13 Kwa nneyo a Pilato gubhaabhushiye, "Bhuli, nkapolikana indu yowe ibhakunnugulanga?" 14 Ikabheje a Yesu bhangaajangula nkali lilobhe limo, bhakulungwa bhala gubhakanganigwe kwa kaje. 15 Bhai, gwashinkupagwa nkubho mobha ga shikukuu sha Bhayaudi shishemwa Pashaka, bhakulungwa bhatenda kwaugulilanga atabhilwe jumo jubhampinjilenje bhandunji. 16 Gene mobhago ashinkupagwa mundu jumo atabhilwe ashumaga ga ya nyata ntima, lina lyakwe a Bhalabha. 17 Bhai, bhandunji bhakaimananjeje pamo, a Pilato gubhaabhushiye, "Jwei junkupinganga ning'ugulilanje, a Bhalabha eu a Yesu bhaashemwa a Kilishitu?" 18 Bhashinkubheleketa nneyo pabha bhashinkumumanya kuti bhashikwaapeleshalanga a Yesu kwa ligo gwa ligo lya lupimilo. 19 A Pilato bhakatameje pa shitengu sha ukumu, akongobhabho gubhaapeleshele ntenga, nikwaabhalanjila, "Nnatende shindu shoshowe kuka jwene mundu jwangalebhajo, pabha shilo njilaga nkwaagamaila bhenebho." 20 Ikabheje bhakulungwanji bhaabhisshila na bhanangulungwa gubhaakwishiyenje bhandunji bhajuganje bhaugulwe a Bhalabha na a Yesu bhabhulagwe. 21 Bhai, bhakulungwa bhala gubhaajangwilenje, "Nnapinganga ning'ugulilanje jwei munkumbi gwa bhene bhabhilibha?" Gubhaajangwilenje, "A Bhalabha!" 22 A Pilato gubhaabhushiye, "Bhai, naatende nndi a Yesu

bhaashemwa a Kilishitu?" Bhowe gubhashitenje, "Bhakomelwe munshalabha!" 23 A Pilato gubhaabhushiyenje, "Kwa nndi? lbhalebhile nndi?" Nabhalabhonji gubhapundilenje jobhela, bhalinkutinji, "Bhakomelwe munshalabha!" 24 Bhai, a Pilato bhakabhoneje kuti bhakaakombolanga kwa shoshowe na nnjasha inatandubha, gubhatolile mashi ninabha makono gabho pa lugwinjili lula bhalinkuti, "Nne nangali sha gambwa kwa bhulagwa kuka jwene munduju, kwali mwaashayene." 25 Bhandunji bhowe gubhajangwilenje, "Shiwo sha bhene bhandubha tugambwe uwe na ashbhana bhetu!" 26 Bhai a Pilato gubhaaugulilenje a Bhalabha, na ashimanjola bhakaakomanje ibhoko a Yesu, gubhaakamwiyenje bhakomelwe munshalabha. 27 Kungai ashimanjola bha bhakulungwa bha Shiloma gubhaajinjijenje a Yesu nnugwani lukulungwa lwa nyumba ja bhakulungwa bha Shiloma, gubhaimenenje likundi lyowe nikwaatimbiila a Yesu. 28 Gubhaaulilenje nngubho yabho, nikwaawasha lijoo lya nnangali. 29 Gubhaeleyenje ingwa ja mibha, nikwaawasha muntwe, gubhaapelenje nnai kunkono niilo gwabho. Gubhaatindibhalilenje nikwaanyegaya bhalinkutinji, "Shalamu a Mpalume bha Bhayaudi." 30 Kungai gubhaunilenje mata, gubhatolilenje nnai gula, nikwaakomanga muntwe. 31 Bhakaanyegayanje, gubhaulilenje lijoo lila, gubhaawashiyenje nngubho yabho, kungai gubhapite kwaakomelanga munshalabha. 32 Bhalinginjii nkujabbulangana, gubhaabhweninjii bhandu bhamo lina lyabho a Shimoni, bha ku Kilene, gubhaashishilishiyenje bhaujigale nshalabha gwa a Yesu. 33 Bhakaikanganenje pashemwaga Goligota, malombolelo gakwe Shibhanga sha Ntwe, 34 gubhaapelenje divai ja anganya na shindu sha shashama. Ikabheje a Yesu bhakapayeje gubhakani kupapila. 35 Bhali bhahambilwe munshalabha, gubhagabhenenje nngubho yabho kwa shikoma, nkupinga limalile lilibhe libhalugwile ankulondola bha a Nnungu, bhashinkugabhananga nngubho yangu kwa shikoma. 36 Gubhatemingene pala muulinda. 37 Gubhakomelenje panani ntwe gwabho, ukumu jabho jijandikwe "BHENEBA NI A YESHU, A MPALUME BHA BHAYAUDI." 38 Malanga gogo bhaapokonyola bhabhili bhashinkukomelwanga mmishalabha pamo na a Yesu, jumo kunkono niilo gwabho na juna kunkono nshinda. 39 Na bhandunji bhapitangaga mumpanda gubhaatukenenje, bhalitikinyanga mitwe jabhonji bhalinkutinji, 40 "Mmwe mwabhelenje kuti shinnibhomole liekalu nishenga kwa mobha gatatu, mwitapule mmayene, mmaga Mwana gwabho a Nnungu, nntulushe munshalabha!" 41 Nneyo peyo bhakulungwanji bhaabhishila na bhaajiganya bha Shalia, na bhanangulungwa gubhaanyegeyenje a Yesu bhalinkutinji. 42 "Bhashinkwaatapulanga bhananji ikabheje bhanalepela kwiitapula bhayene! Eti bhenebho a mpalume bha Ishilaeli! Bhai, nnaino bhatulushe munshalabha na uwe shitwaakulupalile. 43 Bhanakwaakulupalila a Nnungu na bhashite kuti Bhanababho a Nnungu, bhai nnaino, a Nnungu monaga bhaapinga bhaatapule." 44 Nneyo peyo nkali bhaapokonyola bhakomelwenje mmishalabha pamo na bhenebho bhala gubhaatukenenje. 45 Bhai, tandubhila shaa shita ja mui lwashinkupagwa lubhinda pa shilambolyo mpaka shaa tisha. 46 Jikaisheje shaa tisha a Yesu gubhautiye lilibhe bhalinkuti, "Eloi,

Eloi lama shabhakitani?" Malombolelo gakwe "A Nnungu bhangu, a Nnungu bhangu, pakuti nshineka?" 47 Ikabheje bhananji bhajimingenenje pepala, bhakapilikananenje nneyo gubhashitenje, "Bhanakwaashema a Eliya." 48 Shangupe jumo jwabhonji gwabhutwishe lubhilo, gwatolile shiponji ninyobhya divai ja shashama, gwabhishile munnai, nikwaapa bhapapile. 49 Bhananji gubhashitenje, "Nneshe tulole monaga a Eliya bhanakwiya kwaatapula." 50 Bhai, a Yesu gubhakweshiye lilibhe kabhili, gubhawile. 51 Penepo lipashiya lyaliji nkati liekalu gulipapwishe ipande ibhili, tandubhila kunani mpaka pai, shilambo gushiungumile na maganga makulu kakukaikaga, 52 makabhuli gakuunukaga na bhandunji bha ukonjelo bhawilenje gubhayushiywenje, 53 na bhalabhonji bhakayukanenje na a Yesu bhakayusheje, gubhapitengene ku shilambo sha ukonjelo, yani ku Yelushalemu, gubhaakoposhelenje bhandunji bhabhagwinji. 54 Bhai, bhakulungwa bha manjola na ashimanjola bhalinginjii muulinda gwa a Yesu, bhakabhonanjenje litaka liliungumila na yowe yakoposhele ila, gubhajokopenje kwa kaje, gubhashitenje, "Kweli aju munduju paaliji Mwana jwa a Nnungu." 55 Bhashinkupagwanga bhanabhakongwe bhabhagwinji pepala bhalolanga bhalu bhajimingenenje kwataliya. Bhanganjabho nibhaakagwilenje a Yesu kopoka ku Galilaya na kwaatumishila. 56 Munkumbi gwabhonji bhashinkupagwa a Malia Magidalena na a Malia anyinababhonji a Yakobho na a Yoshepu pamo na anyinababhonji bhana bha a Shebhedayo. 57 Ikaisheje ligulo, gubhaishe bhandu bhamo atajili bha shilambo sha ku Alimataya, lina lyabho a Yoshepu. Nabhalabho pubhaaliji bhaajiganywa bha a Yesu. 58 Gubhaajendele a Pilato gubhaajijile bhapegwe maiti ga a Yesu. Bhai, a Pilato gubhaamulise bhapegwe. 59 A Yoshepu gubhatolile maiti gala, gubhaijilile nshanda sha takata, 60 gubhabhishile maiti gala nnikabhuli lyabho lya ambi libhabheshiye nniganga likulu. Kungai gubhaingilishiye liganga pa nnango gwa likabhuli, gubhaijabhulile. 61 A Malia Magidalena na a Malia bhana bhala, gubhatemingene kuloya ku likabhuli. 62 Likapiteje Lyubha lya Kolokoya, bhakulungwanji bhaabhishila na Mapalishayo gubhaajendelenje a Pilato, 63 gubhashitenje, "Mmakulungwa, tushikumbushila nnami jula akanabhewa ashinkubheleketi kuti, 'Gapitaga mobha gatatu shinyushe.'" 64 Kwa nneyo nng'amulise likabhuli libhe muulinda mpaka lyubha lya tatu, nkupinga bhaajiganywa bhakwe bhananjibhanje na kwaabhalanjilanga bhandunji kuti bhayushile. Na unami gwa kumpelo shuunyate kupunda unami gwa kundandubho gula." 65 A Pilato gubhaabhalanjilenje, "Ayaga, manjola nkwetenje, nrijangane nkabhikanje ulinda malinga shinkukombolanga." 66 Bhai, gubhabhishilenje ulinda ku likabhuli, nibhika lulembo panani liganga lya ibhila lila na kunani jakwe, nkupinga mundu ashoyaga imanyishe, nigubhaabhishilenje ashimanjola.

28 Likapiteje Lyubha lya Pumulila, lyambape lyubha lya tandubha juma, a Malia Magidalena na a Malia bhana bhala, gubhapitengene kulola likabhuli. 2 Shangupe litaka likuungumilaga, pabha malaika jwa Bhakulungwa ashinkutuluka kopoka kunnungu nikuliingilishiya kunyenje liganga lila, nikulitamila. 3 Kubhonekana kwabho bhashinkung'anyima malinga nnjai, na nngubho yabho yashinkuwejela kwa

kaje. **4** Bhalinda bha likabhuli lilla gubhaungumilenje kwa jogopa, gubhalinginji mbuti bhashiwanganga. **5** Ikabheje malaika jula akwaabhalanjilangaga bhanabhakongwe bhala, "Nnajogopanje, nimumanyi kuti nnakwaaloleyanga a Yeshu bhakomelwe munshalabha. **6** Bhakwapi apano, pabha bhayushile malinga shibhashite lugula. Nnjiyangane nnolanje pubhaagonekenje. **7** Bhai, nnjendangane shangu nkaabhalanjilanje bhaajiganywa bhabho kuti, bhayushile bhakaweje na nnaino bhanakunnongolelanga kwenda ku Galilaya, kweneko shimwaabhonanje. Ayaga, nimmalanjilenje." **8** Bhanabhakongwe gubhashoshilenje shangu pa likabhuli pala, bhalinginji na lipamba na angalala kwa kaje, gubhabhutukenje lubhilo kukwaalugulilanga bhaajiganywa bhabho. **9** Shangupe, a Yeshu gubhaimene nabhonji, gubhashite, "Shalamu!" Bhanabhakongwe bhala gubhaajendelenje, gubhaatindibhalilenje nikwaakamula makongono gabho. **10** Kungai a Yeshu gubhaabhalanjilenje, "Nnajogopanje! Nnjendangane nkaabhalanjilanje ashaapwanga bhajendangane ku Galilaya, kweneko shibhamonanje." **11** Bhanabhakongwe bhala bhalijabhulangana, bhalinda bhananji bha likabhuli lila, gubhapitengene kunnjini kuupeleka ntenga ku bhakulungwanji bhaabhishila, ga indu yowe ikoposhele. **12** Bhai, gubhaimenenje pamo na bhanangulungwa, bhakapatananjeje, bhanangulungwa bhala gubhaapelenje bhalinda bhala mmbiya yaigwinji, **13** bhalinkutinji, "Mmanganya ntayanje kuti, 'Bhaajiganywa bhabho bhashinkuikangana shilo gubhaajibhilenje uwe tuli tugonile.'" **14** Monaga bhakulungwa bhapilikanaga, uwe shitukungulushe nabho na mmanganya nkatendwanga shindu." **15** Bhalinda bhala gubhatolilenje mmbiya ila, gubhatendilenje malinga shibhajigenywenje. Na lyene lilibhe lila gulilonjeye kushuma ku Bhayaudi bhowe, mpaka lelo. **16** Bhaajiganywa likumi limo na jumo bhala, gubhapitengene ku Galilaya ku shitumbi shibhaalajiyenje a Yeshu. **17** Bhaakabhonanjeje, gubhaatindibhalilenje, ikabheje bhananji bhashinkukolanga lipamba. **18** A Yeshu gubhabhandishilenje, gubhaabhalanjilenje, "Njipegwa ukulungwa gowe kunnungu na pa shilambolyo. **19** Bhai, nnjendangane nkaatendanje bhandunji bha ilambo yowe bhabhe bhaajiganywa bhangu, nnikwabhatishanga kwa lina Iya Atati na lika Mwana na Mbumu jwa Ukonjelo, **20** na kwaajiganyanga kukamula malajilo gowe guning'amulishenje. Na nne puni pamo na mmanganya mpaka mpelo gwa shilambolyo."

(aiōn g165)

Maliko

1 Kutandubha kwa Ngani ja Mmbone ja a Yesu Kilishitu bhanabhabho a Nnungu. **2** Malinga shiijandikwe nshitabu sha ankulondola bha a Nnungu, a Ishaya. "A Nnungu bhashite, 'Ngunakuntuma muntenga jwangu anngolele, anng'alashiye mpanda gwenu.'" **3** Apali mundu anapilikanika kuanga alinkuti. 'Mwaalashiyanje Bhakulungwa mpanda gwabho, nngoloyanje mushibhapite.'" **4** A Yowana Bhaabhatisha kubhakoposhele kuanga, bhalilunguya kuti bhandunji bhaipetanje na bhatishwa nkupinga a Nnungu bhaaleshelelanje yambi yabhonji. **5** Bhandunji kukopoka mmbali yowe ya ku Yudea na bhashilambo bha ku Yelushalemu gubhaajendelenje kuanga kula, gubhaipetilenje yambi yabhonji, na a Yowana gubhaabhatishenje ku Lushi Iwa Yolodani. **6** A Yowana shibhawalaga shiwalo sha mabhetya ga ngamia, na nshipi gwa lipende nshigunu. Shalya shabho pushaaliji maije na bhushi gwa mukonde. **7** Bhalabho bhatendaga lunguya bhalinkuti, "Nnyuma jangu bhanakwiya bhakwete mashili kumbunda nne, numbe nne ngapwaa nkali kutepa nigopola mbundo ya ilatu yabho. **8** Nne pungubhatisha kwa mashi, ikabheje bhenebho shibhammatishanje kwa Mbumu jwa Ukonjelo." **9** Gene mobha pego, a Yesu gubhaishe kukopoka kushijiji sha Nashaleti shilambo sha ku Galilaya, gubhabhatishwe na a Yowana ku Lushi Iwa Yolodani. **10** Bhakakoposheje mmashi, shangupe gubhabhweni kunnungu kuugwishe na Mbumu alikwaatulusila ali mbuti nnjubha. **11** Lilobhe kukopoka kunnungu likupilikanikaga lilinkuti. "Ugwe mwanangu junguupinga unonyela." **12** Shangupe Mbumu akwaalongoyaga a Yesu kwenda kuanga, **13** kweneke gubhatemi mobha makumi nsheshe bhalilingwa naka Lishetani. Kweneke pubhaaliji pamo na bhannyama bha mukonde, akuno ashimalaika bhalikwaatumishilanga. **14** A Yowana bhakatabhweje nngiesha, a Yesu gubhapite ku Galilaya, gubhalungwiye Ngani ja Mmbone ja a Nnungu bhalinkuti, **15** "Malanga gamalile, na Upalume gwa a Nnungu ubhandishile. Mwiipetanje yambi yenunji na nrjikulupalilanje Ngani ja Mmbone!" **16** A Yesu pubhapitaga nnyenje litanda Iya Galilaya, gubhaabhweninji bhaatanda yamaki bhabhili. A Shimoni na apwabho a Ndeleya bhalitandanga yamaki na Iyau. **17** A Yesu gubhaalugulilenje, "Nngagulanje nnyiyangane ninngijanyanje kwaajiya nabhonji bhandu kwa a Nnungu." **18** Shangu gubhaleshilenje mbo gabhonji, gubhaakagwilenje. **19** Bhakajendeje mmujo kashoko gubhaabhweninji a Yakobho na apwabho a Yowana bhana bha a Shebhedayo. Na bhalabhonji mubhalinginji muntumbwi bhalialayanga mau gabhonji. **20** Shangupe a Yesu gubhaashemilenje, na bhalabhonji gubhaaleshilenje ainabhabhonji a Shebhedayo muntumbwi na bhatumishi, nigubhaakagwilenje. **21** Gubhaikengene ku Kapalanaumu, likaishileje Iyubha Iya Pumulila, a Yesu gubhajinjile nshinagogi, gubhatandwibhe kujiganya. **22** Bhandunji bhowe bhaapiikenenje gubhaimukenje kwa majiganyo gabho. Pabha bhakajiganyaga mbuti bhaajiganya bha Shalia, ikabheje malinga mundu akwete ukulungwa. **23** Malanga gogo gwakoposhele mundu jumo aliji nshinagogi mula, akwete lioka lyangali Iya mmbone, **24**

nigwakweshiye lilobhe alinkuti, "Nkutupinga nndi mmwe a Yesu Bhanashaleti? Bhuli nshikwiya kutumaliya? Nne nimmanyi mmwe agani, mmwe Mundu jwa ukonjelo jwa Nnungu!" **25** A Yesu gubhankalipile lioka jula bhalinkuti. "Pumula! Gunshoshe munduju." **26** Bhai, lioka jwangali jwa mmbone jula gwanngwishiye mundu jula shialala, gwagutile kwa utiya, kungai nigwanshoshile. **27** Bhandu bhowe gubhakanganigwenje, gubhabhuyenenje, "Sheneshi nndi? Igala majiganyo ga ambi? Abha bhandubha bhashikola mashili ga kugabhalanjila nkali maoka gangali ga mmwe na ganakwaapilikan!" **28** Shangupe ngani ja a Yesu gubhishumile mmbali yowe ya ku Galilaya. **29** Bhakakopokanganeye nshinagogi mula, a Yesu gubhalongene na a Yakobho na a Yowana kwenda kumui kwa a Shimoni na a Ndeleya. **30** Bhai, akwebhabho a Shimoni bhakongwe pubhaaliji bhalwele, bhagonile pa shinanda. A Yesu bhakaisheje shangupe gubhaabhalanjilenje. **31** A Yesu gubhaajendele bhakongwe bhala gubhaakamwile nkono, nikwaajinula. Na shilwele shila shikwaashokaga, gubhatandwibhe kwaatumishilanga. **32** Likaishileje ligulo, gubhaapeleshelenje a Yesu bhalwelenji bhowe na bhandu bha shikilwanga maoka. **33** Bhandunji bhowe bha shene shilambo shila gubhaloposhelenje pa nnango gwa nyumba jila. **34** Na a Yesu gubhaalamiyenye bhandu bhabhagwinji bhakwetenje ilwele, gubhaashoshiyenje maoka gamagwinji, ikabheje bhagagaleka gabheleketete pabha gabhamanyi kuti bhalabho agani. **35** Malabhi gakwe, kumashelo a Yesu gubhajabhwile nikwenda kujika kukwaajuga a Nnungu. **36** A Shimoni na ashaajabhonji gubhapitengene kukwaaloleya. **37** Bhakaabhonanje gubhaalugulilenje, "Bhandu bhowe bhanakunnoleyanga." **38** A Yesu gubhaabhalanjilenje, "Twandangane ku ilambo ina ya tome ngalunguye na kweneke, pabha na kweneke ni kundendile nyiye" **39** Bhai, gubhapitile kila mmbali ya ku Galilaya bhalipita lunguya mmashinagogi na shoya maoka. **40** Mundu jumo nnwele mangundula gwabhajendele a Yesu akwaatindibhalilaga alinkuti, "Mpingaga, nnikombola kunama!" **41** A Yesu gubhamonele shiya, gubhagolweye nkono gwabho, gubhankwashiye bhalinkuti, "Ngunapinga, ulame!" **42** Shangupe mangundula gala gakunshokaga mundu jula, gwalamile. **43** Kungai a Yesu gubhammalanjile mundu jula ajabhule akuno bhalikunkomelesheya kuti, **44** "Upilikane, unammalanjile mundu jowowe shene shindushi, ikabhe ujende ukaalangule bhaabshishila shiushite lama, na ukashoye mbepei kwa lama kwako malinga shiamulishwe na a Musha, nkukong'ondela kuti ulamile." **45** Ikabheje mundu jula akajabhuleje gwatandwibhe kushumya ngani jila kila mmbali akuno alitalashiya gamagwinji, mpaka a Yesu gubhalepele kwenda shilambo shoshowe ni bhoneka ku bhandu, gubhatemi kunyenje shilambo, kujika. Nkali nneyo bhandunji koposhela kila mmbali gubhaajendelelenje.

2 Gakapiteje mobha gashoko, a Yesu gubhabhujile kabhili ku Kapalanaumu na bhandunji gubhapikenenje kuti bhaishe kumui. **2** Bhai, gubhaikengene bhandunji nigumbala nnyumba mpaka palanga nnango. A Yesu bhatendaga kwaalungushiyanga ngani jabho, **3** penepo gubhaikengene bhandunji nsheshe bhannijigelenje mundu

jwa poloka ibhalo. 4 Ikabheje, kwa ligongo lya shuluka bhandu, bhanganombolanga kumpeleka mundu jula tome na a Yeshu. Bhai, gubhabhomolenje shipagala sha nyumba shitwela shibhajimi a Yeshu. Bhakabhomolaneje lilanga, gubhantuluyenje mundu jula ali agonile pa likai. 5 A Yeshu bhakajibhoneje ngulupai jabhonji, gubhammalanjile mundu jwa poloka jula, "Mwanangu uleshelelwe yambi yako." 6 Na bhaajiganya bhananji bha Shalia bhapalinji penepo, gubhaganishiyenje mmitima jabhonji, 7 "Bhaabheleketa bhuli abha? Bhanakwaakupulu a Nnungu! Jwakwapi mundu akombola kuleshelela yambi ikabhe a Nnungu jikape." 8 Shangupe a Yeshu gubhaimanyi ng'aniyo yabhonji, nigubhaalugulilenje, "Pakuti nkuganishiyanga nneyo mmitima jenunji? 9 Shei shipepeshe kummalanjila mundu apolweshe, 'Uleshelelwe yambi yako,' eu kummalanjila, 'Jinuka! Tola likai lyako ujende?' 10 Bhai, pungupinga mmumanyanje kuti, Mwana juka Mundu, anakombola leshelela bhandu yambi pa shilambolyo." Penepo gubhammalanjile mundu jwa poloka jula, 11 "Ngunakubhalanjila jima, tola likai lyako ujende kunngwako!" 12 Akuno bhandu bhaliukunnolesheyanga, shangupe mundu jula gwajimi, gwatolile likai lyakwe nigwaijabhulile. Bhandu bhowe gubhakanganigwenje nikwaakuya a Nnungu bhalinginji, "Ngu, tukanabhe kushibhona shindu malinga sheneshi." 13 A Yeshu gubhapite kabhili kunyenje litanda lya Galilaya. Lugwinjili lwa bhandu gulwaajendele, gubhatandwibhe kwaajiganyanga. 14 Na pubhapitaga mumpanda gubhaabhwani a Lawi bhanabhabho a Alupayo, bhatemi nnyumba ja lipila koli. Gubhaalugulile "Nngagule," A Lawi gubhajimi gubhaakagwile. 15 Kungai, a Yeshu gubhatemi nkulya shalya, nnyumba ja a Lawi. Bhakamula koli bhabhagwinji na bhakwetenje yambi bhananji, gubhatemingenenje nkulya, pamo na a Yeshu na bhaajiganywa bhabho. Pabha bhandu bhabhagwinji bhashinkwaakagulanga. 16 Bhai, bhaajiganya shalia bha munkumbi gwa Mapalishayo, bhakaabhonanjeje a Yeshu bhaliya na bhakwetenje yambi na bhakamula koli, gubhaabhushiyenje bhaajiganywa bhabho, "Kwa nndi abha bhanalya na bhakamula koli na bhakwetenje yambi?" 17 A Yeshu bhakaapilikananjeje gubhaabhalanjilenje, "Bhabhakotonji bhakakunnoleyanga mmitela, bhakunnoleyanga mmitela bhalwelenji. Nangajiya kukwaalolelyanga bhakwetenje aki, ikabheje bhakwetenje yambi." 18 Gene mobhago bhaajiganywa bha a Yowana Bhabhatisha, na bha Mapalishayo bhatendaga tabhanga. Bhai, gubhaikengene kukwaabhuya a Yeshu, "Bhaajiganywa bha a Yowana na bha Mapalishayo bhanaatabhanga, kwa nndi bhaajiganywa bhenu bhakaatabhanga?" 19 A Yeshu gubhajangwile, "Bhuli, bhashemilwenje kundoa bhalinginji kwanga tabha akuno bhatemingene na nnyene nkulomba? Bhalinginji na nnyene nkulomba bhakaatabhanga. 20 Ikabheje shigaishe mobha nkulomba shashoywe, penepo shibhatathanje." 21 "Bhandu bhakaakatanga shibhamba sha nngubho ja ambi nitotela munngubho ja bhukala. Na bhatendangaga nneyo, shibhamba sha nngubho ja ambisho, shipinga guluka nipapula nngubho ja bhukalajo, na papapwishepo shipapunde pwegwuka. 22 Wala bhandu bhakaataganga divai ja ambi mmipatila ja bhukala. Ibhaga bhatendangaga nneyo, divai ja ambiji shijikae mipatila ja bhukalajo, na divai na mipatila shijipwengushe.

Divai jaambi pataga mmipatila jaambi!" 23 Lyubha limo lya Pumulila, a Yeshu bhatendaga pita mmigunda ja ngano, bhaajiganywa bhabho gubhatandwibhenje kutema maashe ga ngano. 24 Mapalishayo gubhaabhalanjilenje a Yeshu, "Nnole! Kwa nndi bhaajiganywa bhenu bhanatendanga shindu shikapinjikwa Lyubha lya Pumulila?" 25 A Yeshu gubhaajangwilenje, "Nkanabheshomanga shibhatendile a Daudi na ashaajabhonji pubhakwetenje shibhanga? 26 Shibhashite jinjila Nniekalu, bhukala a Abhiashali pubhaaliji Bhakulungwa Bhaabhisshila, gubhalile mikate jabhishilwe kwa a Nnungu. Jikapinjikwaga kuligwa ikabhe na bhaabhisshilangape, numbe a Daudi gubhalile nikwaapanganga na ashaajabhonji?" 27 Bhai, a Yeshu gubhaalugulilenje, "Lyubha lya Pumulila lyashinkubhikwa kwa ligongo lya bhandunji na nngabha bhandunji bhashinkubhikwanga kwa ligongo lya Lyubha lya Pumulila! 28 Kwa nneyo, Mwana juka Mundu, ni Nkulungwa, nkali jwa Lyubha lya Pumulila."

3 A Yeshu gubhajinjile kabhili nshinagogi, na nkati mula ashinkupagwa mundu jumo apolweshe nkono. 2 Bhandu bhananji bhalinginji mwenemo, gubhaalolesheyenje a Yeshu ibhaga shibhannanye Lyubha lya Pumulila nkupinga bhapatanje shiumilo sha kwaalugula. 3 A Yeshu gubhannugulile apolweshe nkono jula, "Jiya ujime pakati pakati pano." 4 Kungai, a Yeshu gubhaabhushiyenje bhandunji bhala, "Bhuli, inapinjikwa Lyubha lya Pumulila kutenda ya mmbone eu kutenda yangali ya mmbone, kunnamya mundu eu kummulaga?" Ikabheje bhanganjulanganga. 5 Penepo a Yeshu gubhaalolilenje bhowe bhali bhatumbele, akuno bhalinginji, kwa ligongo lya mitima jabhonji jangapinga kulupalila. Kungai gubhammalanjile mundu jula, "Goloya nkono gwako!" Jwalakwe gwagolweye nkono gwakwe, na shangupe guulamile. 6 Shangu Mapalishayo gubhakopokenje palanga, gubhatemingenenje pamo na bhandunji bha a Elode nkupangana muutendelo, kupinga bhaabhulaganje a Yeshu. 7 A Yeshu gubhajabhwiye penepo na bhaajiganywa bhabho, gubhapite kilitanda lya Galilaya, na lugwinjili lwa bhandu lukwaakagulaga, kukopoka ku Yelushalemu na ku Yudea, 8 na ku Idumea na kung'ambu lushi lwa Yolodani na ku Tilo na ku Shidoni. Lwene lugwinjili lwa bhandulo lwashinkwajendela ku Yelushalemu bhakapilikananjeje indu yaigwinji ibhatendaga. 9 Kwa ligongo lya gwinji gwa bhandu, a Yeshu gubhatumile bhaajiganywa bhabho bhaabhisshilane ntumbwi gumo, nkupinga bhanabhandishilwe na bhandunji. 10 Pabha bhashinkulama bhandu bhabhagwinji, bhalwelenji bhowe gubhanokolenenje nkupinga bhaakwayanje bhalamanje. 11 Na maoka gangali ga mmbone gala pugaabhonaga a Yeshu, gatendaga kwaagwiyanga bhandunji bhala mmujo jabho, akuno galijobhela, galinkuti, "Mmwe Bhanabhabho a Nnungu!" 12 Ikabheje a Yeshu gubhaakalipilenje bhanaamanyianje ku bhandu. 13 A Yeshu gubhajombweshe kwiitumbi, gubhaashemilenje bhubhaapinjilenje bhayene. Bhai gubhaajendelenje, 14 gubhaagwile bhandu likumi limo na bhabhili, gubhaashemilenje mitume, nkupinga bhatame nabhonji bhaatumanje liengo lya pita lunguya, 15 na bhakombolanje kushoya maoka. 16 Bhai, bhene likumi limo na bhabhili bhaagulwenje bhala mena gabhonji pugajiji, a Shimoni,

bhagegwilwe lina Iya a Petili na a Yesu 17 na a Yakobho na a Yowana apwabho, bhana bha a Shebhedayo, a Yesu gubhaapelenje lina Iya Bhoanege, malombolelo gakwe “Bhana bha njai,” 18 A Ndeleya na a Pilipi na a Bhatolomeyo na a Matei na a Tomashi na a Yakobho bhanabhabho a Alupayo na a Tadei na a Shimoni Bhakanaani na 19 a Yuda Ishikaliote bhaatendebhwishe a Yesu. 20 Kungai a Yesu gubhajinjile nnyumba. Lugwinjili Iwa bhandu lukugumbalaga kabhili, a Yesu na bhaajiganywa bhobho gubhalepelenje nkali kulya shalya. 21 Bhai, ashaalongo ajabhonji bhakapilikananjeje genego gubhapitengene kukwakamula, pabha bhandunji gubhabheleketangaga kuti bhalwele shalubha. 22 Nabhalabhonji bhaajiganya bha Shalia gubhaikengene kukopoka ku Yelushalemu, gubhashitenje, “Bhashikola Bhelishabhuli! Numbe bhanashoya maoka kwa mashili gaka nkulungwa jwa maoka.” 23 Penepo, a Yesu gubhaashemilenje gubhaabhalanjilenje kwa ndango, “Lishetani shakombole bhuli kwiibhinga nnyene? 24 Ibhaga upalume gumo ugabhanikaga nibha makundi gataukangana, gwene upalume ukalonjeya. 25 Na kabhili, bha likaja limo bhalekanaga nibha likaja litaukangana, lyene likajalyo likalonjeya. 26 Na ibhaga, upalume uka Lishetani ugabhanikaga nibha ikundi, ukalonjeya, ikabhe shigupele. 27 “Jwakwapi mundu akombola kujinjila nnyumba jika mundu akwete mashili, nikumpokonyola indu yakwe, ikabhe antabheoti mundu akwete mashilijo, penepo shakombole kumpokonyola indu yakwe. 28 “Kweli ngunakummalanjilanga, bhandu shibhaleshelelwanje yambi yabhonji yowe na kwaakupulu kowe a Nnungu, 29 ikabheje, akummeleketela yangali ya mmbone Mbumu jwa Ukunjelo, ngu akaleshelelwa, pabha shene shambisho shinalonjeya pitipiti.” (aiōn g165, aiōnios g166) 30 A Yesu bhashinkubheleketela genego, pabha bhashinkwaalugulilanga kuti, “Bhashikola lioka jwangali jwa mmbone.” 31 Anyinabhabho na ashaapwabho a Yesu gubhaikengene, nijimangana palanga, gubhantumilenje muntenga kukwaashema. 32 Bhandu bhahagwinji bhashinkwaatimbilianga bhali bhatemingenenje. Bhai bhananji, gubhaalugulilenje, “Anyinabheni na ashaapwenu pubhalinginji palanga bhanakunoleyanga.” 33 A Yesu gubhaajangulenje, “A mama nne na ashaapwanga nne ashigani?” 34 Penepo gubhaalolilenje bhandunji bhaatimbililenje bhala, gubhashite, “Nnolanje! Abha ashaamama nne na ashaapwanga nne. 35 Mundu jowowe atenda ibhapinga a Nnungu, jwenejo mpwanga nne na nnumbwangu nne na nyinagwangu nne.”

4 A Yesu gubhatandwibhe kujiganya kabhili bhali nnyenje litanda Iya Galilaya. Lugwinjili lukulungwa Iwa bhandu lukwaishilaga, kwa nneyo gubhakwelile muntumbwi gubhatemi. Bhandu bhowe gubhatemingenye nnyenje litanda. 2 Gubhajigenye indu yaigwinji kwa ndango, na nkujiganya kwabho gubhashite, 3 “Mpilikananje! Nkupanda ashinkwenda panda mmbeju. 4 Alipita miya mmbeju Ila, ina guigwilile mumpanda, ijuni gwiishe guilile. 5 Ina guigwilile pa liganga likulu pangali litaka lyaligwinji, pabha litaka likataliyeje guimelile shangupe. 6 Lyubha likabhaleje ikunyalaga, na pabha mbubhu yakwe ikataliyeje, gujumwile. 7 Ina guigwilile pa mikongo ya mibha, mibha guikulile niutalila, mmbeju Ila yangaogoya iepo. 8 Ina guigwilile pa litaka Iya mmbone, guimelile, guikulile niogola, lubheju lumu lukuogoyaga iepo, lumu

makumi gatatu na luna makumi shita na luna makumi kumi.” 9 Kungai gubhashite, “Akwete makutujo apilikane!” 10 A Yesu bhakatameje pa jika, bhaajiganywa bhobho likumi limo na bhahili bhala, na bhandunji bhana bhaapilikanishiyangaga bhala, gubhaabhushiyenje malombolelo ga ndango Ila. 11 Nabhalabho gubhaalugulilenje, “Mmanganyanji nshikolanga shikono sha kuimanya indu ya nng’iyo ya mu Upalume gwa a Nnungu, ikabheje bhananjibho, yowe shibhabhalanjilwanje kwa ndango, 12 kwa nneyo, ‘Bhalolanje, ikabheje bhanashibhonanje shindu. Bhapilikananje, ikabheje bhanaimanyanje. Bhanakwiipetanga. Nileshelelwa yambi yabhonji na a Nnungu.” 13 Bhai, a Yesu gubhaabhalanjilenje, “Bhuli, mmanganya nkakulumanyanga lwene lutangolu? Bhai shimuimanyanje bhuli, ndango ina? 14 Nkupanda anapanda lilibhe Iya a Nnungu. 15 Mbeju igwilile mumpanda, inalandana na bhandunji bhakulipilikananga lilibhe Iya a Nnungu. Ikabheje bhalipilikanangaga, shangupe Lishetani anakwiya kulishoya mmitima jabhonji. 16 Na mmbeju yagwilile pa liganga likulu, inalandana na bhandunji bhakulipilikananga lilibhe Iya a Nnungu, shangupe bhanakuliposhelanga nikwiinonyela. 17 Ikabheje bhakulibhikanga mmitima jabhonji, kwa nneyo likaishila pa melela njiga nilonjeya, na ikoposhelaga ya ukomu eu ya shilaje ga ligongo Iya lilibhelo, shangupe bhanalekanga. 18 Mbeju yagwilile pa mibha, inalandana na bhandunji bhakulipilikananga lilibhe Ila, 19 ikabheje ga lipamba Iya ndamo ya pashilambolyo, na tembwa ga angalila indu na mboka na shilokoli yajinjilangaga inautalila lilibhe Ila, bhanogoyanje iepo. (aiōn g165) 20 Ikabheje mmbeju yagwilile pa litaka Iya mmbone, inalandana na bhandunji bhakulipilikananga lilibhe Iya a Nnungu, nikuliposhela, niogoya iepo, bhana makumi gatatu na bhana makumi shita na bhana makumi kumi.” 21 A Yesu gubhapundile kwaabhalanjilanga, “Bhuli, bhandunji bhanakoleyanga kandili niunishila lidebhe eu nibhika nng’ungu? Nng’oo! Pujibhikwa panani. 22 Bhai, shoshowe shishiiywe, shishiundukulwe, na shoshowe shiunishilwe, shishiunukulwe. 23 Akwete makutujo apilikane!” 24 Na kabhili gubhaalugulilenje, “Nnganishiyanje inkupilikanangayo, shipimilo shinkwaapimilanga bhandunji shila, a Nnungu shibhampimilanje shosho, numbe nijenjeshewa. 25 Pabha akwete shindu shapunde kujenjeshewa, jwangali shindu, nkali shakwetesho shapokonyolwe.” 26 A Yesu gubhapundile kubheleketela, “Upalume gwa a Nnungu unalandana naka mundu apandile mmbeju munngunda gwakwe. 27 Shilo anagona lugono na mui anajabhula, na penepo mmbeju Ila inamela nikula, akuno akakushimanya shitendeka. 28 Pabha litaka Iyene linameya mmbeju nikula niogola iepo, puitandubha kuipuka liamba, nikwiya liashe, kungai ngano jinasha nniashe mula. 29 Na yalya ikomalaga, shangupe mundu jula anatola mbopo jakwe, nipita anjila pabha miongwe ya maneng’eno jiishile.” 30 Kabhili a Yesu gubhashite, “Upalume gwa a Nnungu utulandanye na nndi? Eu utulashiye kwa lungando lwashi? 31 Malinga lubheju Iwa aladali lushoko kupunda mmbeju yowe ipandwa. 32 Ikabheje lupandwaga, lunamela nikula nibha nkongo gwankulungwa kupunda mikongo jowe munngunda mula. Nyambi yakwe inakula nikola shiwili, na ijuni inashenga maui gabhonji.” 33 A Yesu gubhajigenye malobhe gamagwinji kwa ndango ina yaigwinji ya malinga nneyo, gubhabheleketela nabhonji

malinga shibhaelewanganga. **34** Shakwapi shibhabhelekataga gwangali ndango, ikabheje gubhabhaga jikape na bhaajiganywa bhabho, bhatendaga kwaatalashiyanga indu yowe. **35** Lyubha lyolyo ikashileje ligulo, a Yesu gubhaalugulilenje bhaajiganywa bhabho, "Tujomboshe litanda, twendangane mpaka ku ng'ambu." **36** Bhai, gubhaluleshilenje lugwinjili lwa bhandu lula, na a Yesu bhangatuluka kabhili muntumbwi mula gubhajabhulengene. Na mitumbwi jina gujikagwile. **37** Bhai, mbungo jikulungwa gujitandwibhe kupuga, mabhimbili gakugomaga muntumbwi mula, mpaka ntumbwi ukutandubhaga kugumbala mashi. **38** A Yesu mubhaliji nnyuma ntumbwi bhagonile bhajegamile pa nto. Bhai, bhaajiganywa gubhaajumwiyenje bhalinkutinji, "Mmajiganya, bhuli, nkaimuka kuti tupingawa?" **39** Bhai, gubhajumwische, gubhajikalipile mbungo jila nikugaamulisha mabhimbili ga mashi, bhalinkuti, "Nyenyel! Mpumule!" Penepo mbungo jila gujipumwile, nibha ilili kaje. **40** Kungai a Yesu gubhaalugulilenje bhaajiganywa bhabho, "Pakuti nnajogopanga? Launo mwangalinginji ngulupai?" **41** Gubhajogopenje kwa kaje, gubhabhuyenenje, "Bhenebha agani, nkali mbungo na mabhimbili ganakwaapilikana?"

5 Bhai, gubhaikengene ku ng'ambu litanda lya Galilaya, ku shilambo sha Bhagelashi. **2** A Yesu bhakatushesheje muntumbwi, shangupe gubhaimikene naka mundu jumo jwa shikilwa maoka gangali gammbone, alikopoka ku makabhuli. **3** Jwene mundujo kwatamaga ku makabhuli na jwakwapi mundu akombolaga kuntabha kabhili kwa mindondolo nkali ja itale, **4** pabha papagwinji bhalinjilenje kuntabha pingu na mindondolo ja itale ikabheje, atendaga kutula mindondolo ja itale jila na kuitemanya pinguyo, na wala jwakwapi mundu ankombolaga. **5** Mui na shilo kwatamaga ku makabhuli na mwiitumbi, alijobhela akuno alipita kwiilengula mmaganga. **6** Na akaabhoneje a Yesu kwaataliya, gwabhabhutushile, gwapite kwaatindibhalila. **7** Kwa lilobhe lya utiya nigwashite, "Nkumbinga nndi mmwe a Yesu bhanabhaho a Nnungu bha kunani kaje? Shonde shonde, kwa lina lya a Nnungu nnamboteshel!" **8** Ashinkubheleketa nneyo pabha a Yesu bhammalanjile kuti, "Ugwe lioka gwangali gwa mmbone, gunshoshe munduju." **9** Bhai, a Yesu gubhammushiye, "Bhandu bhakuushemanga gani?" Gwajangwile, "Lina lyangu 'Likundi' pabha putuli tubhabhagwinji." **10** Lioka jwangali jwa mmbone jula, gwabhashondelesheye a Yesu bhanaabhanganganje nshilambo mula. **11** Pa tome jakwe lyashinkupagwa likundi lya ngulubhe ilipitalya nshitumbi. **12** Bhai, ashimaoka bhala gubhaashondelesheyenje a Yesu bhalinkutinji, "Ntupeshe ku ngulubhe kula tukaajinjilanje." **13** A Yesu gubhaaleshilenje, nigubhapite kwaajinjilanga ashingulubhe bhala. Na likundi lyowe lya ngulubhe lya ishila elupu ibhili, guieleleshele nnikote shibhutuka mpaka gutumbushile nntanda. **14** Bhashunga bha ngulubhe ila gubhabhutukenje, gubhapite shumyanga jene nganijo kunnjini na mmigunda. Bhandunji gubhapitengene kulola itendeshe. **15** Gubhaajendelenje a Yesu, gubhamweninji mundu akwete likundi lya maoka jula ali atemi, awete nngubho na ali na lunda lwakwe lwa mmbonepe, nigubhajogopenje. **16** Bhandunji bhagabweninji genego pugatendekaga, gubhaatalashiyenje bhananji gampatile

mundu jwa shikilwa maoka jula na ga ngulubhe ila. **17** Bhai, gubhatandubhenje kwaajuga a Yesu bhajabhule nshilambo shabhonji mula. **18** A Yesu bhalikwela muntumbwi bhajabhule, mundu jula gwabhajujile alongane nabho. **19** Ikabheje a Yesu gubhakanile. Ikabhe gubhammalanjile, "Ujende kunngwako, ukaabhalanjilanje ashaalongo ajako yowe ibhakatendele Bhakulungwa na shibhashite kukubhonela shiya." **20** Bhai, mundu jula gwapite, gwatandwibhe pita lunguya yowe ibhantendele a Yesu nshilambo shashemwaga Dekapoli, malombolelo gwake ilambo kumi, na bhandu bhowe gubhakanganigwenje. **21** A Yesu bhakajombosheje na ntumbwi kubhuja kung'ambu, lugwinjili lukulungwa lwa bhandu lukwaagumbailaga, gubhajimi nnyenje litanda. **22** Penepo gubhaishe bhakulungwa bhama bha shinagogi bhashemwaga a Yailo. Bhakaabhoneje a Yesu gubhaigwishiye pa makongono gabho, **23** gubhaashondelesheye bhalinkuti, "Mwali jwangu jwannung'una nwele tome nawa. Shonde twende nkammishile makono genugo nkupinga alame." **24** Bhai, a Yesu gubhalongene nabho. Na bhandunji bhahagwinji gubhaakagwilenje, akuno bhalinokolananga nkwaabhandishila. **25** Bhashinkupagwa na bhakongwe bhama bhatendaga lwa nsholoholo yaka likumi limo na ibhili. **26** Bhene bhakongwebho bhashinkulajilila kwenda mubhamitela bhahagwinji. Na bhashinkujonanga indu yabho yaigwinji nkulwaya na bhanalame, ikabhe nipunda kulwaliya. **27** Bhakapilikaneje ngani ja a Yesu, gubhapite, nipekenya lugwinjili lwa bhandu lula kunyuma ja a Yesu, gubhapite kwaya nngubho jabho. **28** Bhashinkutenda nneyo, pabha bhashinkwiibheleketela bhayene kuti, "Ngwayape nngubho jabho, shiname." **29** Shangupe nsholoholo gula ukupumulaga, gubhaibhweni nshiilu shabho kuti bhalamile shilwele shabho shila. **30** A Yesu gubhaimanyi kuti gashikwashoka mashili. Bhai gubhalutendebhushile lugwinjili lula, gubhabhushiye, "Gani angwashiye nngubho jangu?" **31** Bhaajiganywa bhabho gubhaajangulenje, "Nnilola bhandunji shibhakuti kunngumbalila, nkubhuya bhuli gani ankwashiye?" **32** Ikabheje a Yesu gubhapundile kuloleya bhammone atendile shenesho. **33** Penepo bhakongwe bhala, bhali bhagamanyi gaapatile, gubhatandwibhe ungomila kwa jogopa, gubhapite kwigwiya pa makongono ga a Yesu na gubhatalashiye gowe gatendeshe. **34** A Yesu gubhaabhalanjile, "A mwali, ngulupai jenu jinnamiye. Njende kwa ulele, na shilwele shenu nnamile." **35** A Yesu bhakanabhe pumula kubheleketa, bhandunji kukopoka kumui kwa a Yailo bhala gubhaikengene, nikwaalugulila, "Mwali jwenu awile. Ga bhuli kupunda kwaabhuya Bhaajiganya?" **36** Ikabheje a Yesu bhakapilikaneje gubhabheleketenje gala, gubhaabhalanjile a Yailo, "Nnajogope, mmwe nkulupalipele." **37** Penepo wala bhangaleka mundu jowowe abhakagule ikabhe, a Petili na a Yakobho na a Yowana apwabho. **38** Gubhaikengenjenje kunngwabho bhakulungwa bha shinagogi bhala, na a Yesu gubhapilikene njobhela na ililo na gubhaaimenenje bhandu bhahagwinji bhalikwigutanjilanga. **39** Gubhajinjile nnyumba, gubhaalugulilenje, "Pakubha nnajobhelanga na guta? Mwali jwangawa, ashigonape." **40** Ikabheje bhalabhonji gubhaeshilenje. Bhai, gubhaakopoyenje bhowe palanga, gubhaatolile ainagwe na akwabhe mwali jula na bhaajiganywa bhabho bhatatu bhala,

gubhajiinjilene kukati kwagonile mwali. **41** Kungai gubhankamwile nkono, gubhammalanjile, "Talita kumi" Malombolelo gakwe, "Mwali ngunakuubhalanjila ujinushe!" **42** Shangupe mwali gwajimi, gwatandwibhe kujima jima. Pali jwa yaka likumi limo na ibhili. Penepo bhandu gubhakanganigwenje kwa kaje. **43** A Yesu gubhaakomelesheyenje bhanammalanjilanje mundu jene nganijo. Kungai gubhaabhalanjilene bhampanganje shalya mwali jula.

6 A Yesu gubhajabhwiye, nigubhapite ku shilambo shabho na bhaajiganywa bhobho gubhaakagwilene. **2** Likaishileje lyubha lya Pumulila, gubhatandwibhe jiganya nshinagogi. Bhandu bhahagwinji bhapiikenenje bhashinkulapanga, gubhashitenje, "Bhaijiganye kwei genega? Na lwene lundalu bhalupatile kwei, na yene ilapoi, bhaatenda kwa mashili gashi?" **3** Bhuli, bhenebha nngabha a pundi shelemala bhanabhabho a Malia, akulubhabhonji a Yakobho na a Yoshepu na a Yuda na a Shimoni? Bhuli, ashaalumbubhabhonji tukatama nabhonji apano? Bhai, gubhaakanilene. **4** A Yesu gubhaalugulilene, "Nkulondola jwa a Nnunu akalepela kuywa, ikabhe pa shilambo shakwe na kwa ashaalongo ajakwe na pa likaja lyakwe." **5** Kwa nneyo bhangatenda ilapo pepala, ikabhe bhashinkwabhishilanga makono bhalwelenji bhashoko nikwalamyanga. **6** A Yesu bhashinkulapa ligongo lyangakulupalila kwabhonji. Gubhapite muujiji pita jiganya. **7** Gubhaashemilene bhaajiganywa bhobho likumi limo na bhahili bhala, gubhaatumilenje bhahili bhahili. Gubhaapelenje mashili ga shoya maoka. **8** Gubhaalugulilene kuti, "Mumpandamo nnajigalanje shindu shoshowe, ikabhe ntindisho, nnajigalanje nkate wala nkobha wala mmmbiya. **9** Nng'walanje makubhashi, nnajigalanje nngubho ja tindiganya." **10** Gubhaalugulilene kabhili, "Pamui popowe pushimposhelwanje, ntamangane popo mpaka pushinshokangane." **11** Na popowe pala bhakamposhelanjene, eu kumpilikanianga, nshokangane na nkung'undanje litutuli mmakongono genunji ibhe shilangulo sha kwaaleyanga. **12** Bhai, gubhapite kwaalungushiyanga bhandu bhaijetanje yambi yabhonji. **13** Bhashinkushoyanga maoka gamagwinji na kwaapakanga bhalwelenji mauta na kwaalamyanga. **14** Bhai, a mpalume a Elode gubhapilikene gowego, pabha kuiniywa kwa a Yesu kwashinkushuma mmmbali yowe. Bhandu bhananji bhatendaga bheleketanga kuti, "A Yowana bhahatisha bhashiyuka bhakaweje, pabha bhashikola mashili ga tenda ilapo." **15** Bhana bhatendaga bheleketanga kuti, "A Eliya." Bhananji bhahinkutinji, "Bhalabho ni ankulondola bha a Nnunu, malinga ashinkulondola bhananji bha bhukala." **16** Ikabheje a Elode bhakapilikaneje jene nganijo gubhashite, "Bhenebha a Yowana bhunaainjile bhala, bhashiyuka!" **17** Pabha a Elode bhashinkuamulisha a Yowana bhakamulwe nitabhwa. Pabha a Elode bhashinkwaatola shilombani a Elodia bhaaliji akongobhabho a Pilipi apwabho a Elode. **18** Pabha a Yowana bhashinkwaalugulila a Elode ikapinjikwa mmwe kwaatola shilombani bhakongwe bha apwenu. **19** Bhai, a Elodia bhashinkukola nnjimwa gubhaaloleye a Yowana nkupinga kwaabhubhala, ikabheje gubhalepele. **20** Pabha a Elode bhatenda kwajogopa a Yowana, bhalabho bhamumanyi kuti pubhaliji bhandu bhakwete aki, na bha Ukonjelo, kwa nneyo gubhaibhiliile. A Elode gubhapinjile kwapiikanishiya

a Yowana, ikabheje kila pubhaapilikanishiyaga, bhatendaga tenguka kwa kaje. **21** Gulikoposhele lyubha lya pwaa, lyubha lya shikukuu sha bhelekwa kwabho a Elode. Gubhaalashienje shalya bhanangulungwa bha lukumbi lwabho, na bhakulungwanji bha manjola, na ashikalongolele bhakulu bha ku Galilaya. **22** Bhai, mwali jwabho a Elodia gwajinjile nkati nigwainile, gwabhanonyeye ainagwe a Elode na bhajeninji bhobho. Penepo a mpalume a Elode gubhannugulile mwali jula, "Juga shoshowe shukupinga shini kupe." **23** Gubhalumbile bhalinkuti, "Shoshowe shushunyuje shinikupe, nkali gabhana upalume gwangu." **24** Mwali jula gwakopweshe palanga kukwabhuya akwabhe, "Nyuje nndi?" Na bhalabho gubhannjanganjile, "Ntwe gwa a Yowana bhaabhatisha." **25** Mwali gwajinjile kwa a mpalume alitumanduma gwashite, "Ngunapinga nnainope, mme nshaani ntwegwa a Yowana bhaabhatisha." **26** A mpalume gubhainjishe kwa kaje, ikabheje kwa ligongo lya lumbila na ligongo lya bhajeninji bhapalinji bhala, bhanganani. **27** Bhai, shangupe gubhantumile linjola akaainje a Yowana. Na linjola gwapite kuligelesha gwabhainjile a Yowana. **28** Gwaishe nago ntwegwa, gwampele mwali jula na jwalakwe gwabhapele akwabhe. **29** Bhaajiganywa bha a Yowana bhakapilikananje genego, gubhapitetolanga maiti ga a Yowana gubhashishilenje. **30** Mitume bhala gubhabhujilene gubhaimenenje na a Yesu, gubhaalugulilene yowe ibhatendilene na jiganya. **31** A Yesu gubhaalugulilene, "Twendangane kujika kwangali bhandu nkapumulilanje kashoko." Bhashinkwaalugulilanga nneyo pabha bhashinkupagwanga bhandu bhaajendelaganga na bhuja, a Yesu na bhaajiganywa bhobho gubhalepelenje kupata nkali lilanga lya kombola kulya shalya. **32** Bhai, gubhakwelilenje muntumbwi gubhapitengene kujika. **33** Bhandu bhahagwinji kopoka mulambo mowe bhaabhwinenji pubhajabbulanganaga, gubhakumanyinji kubhajendanganaga. Gubhapitengenene lubhilo kulongolela kubhaapite a Yesu na bhaajiganywa bhobho, gubhalinginji bhatainji kuika. **34** A Yesu bhakatulusheje muntumbwi, gubhaaimenenje bhandu bhagumbelenje, gubhaabhonelenje shiya, pabha pubhalinginji malinga ngondolo yangali nshunga. Gubhatandwibhe kwaajiganyanga indu yaigwinji. **35** Ikaishileje tome na ligulo, bhaajiganywa bhobho gubhaajendelenje a Yesu gubhaalugulilene, "Nnaino kupitile, na putuli pano pa anga. **36** Mbaya mwaalugulilanje bhandu bhajendanganega mulambo na mmigunda ja tome, bhakaumilanje shalya." **37** A Yesu gubhaalugulilene, "Mwaapanganje shalya mmanganya." Nabhalabhonji gubhaabhusiyenje, "Bhuli, tujende tukaume mikate ja mmmbiya ya mishaala ja shaka shimo jika mundu?" **38** A Yesu gubhaabhusiyenje "Nkwetenje mikate jilingwa? Nkalolanjeti." Bhakalolanjeje, gubhaalugulilene, "Jipali mikate ng'ano na yamaki ibhili." **39** A Yesu gubhaaumilishenje bhaajiganywa bhobho bhaatamikanje bhandu pai mmanyi gamabhii, mmakundi makundi. **40** Bhandu gubhatemingenene mmakundi makundi ga bhandu makumi kumi na makundi ga bhandu makumi nng'ano. **41** Kungai a Yesu gubhatolile mikate nng'ano na yamaki ibhili ila, gubhalolile kunnungu, gubhatendile eja kwa a Nnunu, gubhagebhenye mikate jila na gubhaapelenje bhaajiganywa bhobho nkupinga bhaagabhanishianje bhandu.

Na yamaki gubhatendile nneila peila. 42 Bhandu bhowe gubhalienje nijukuta. 43 Gubhalokotenje malepeyo ga ipande ya mikate na yamaki, nigumbayanga ikapu likumi limo na ibhili. 44 Bhandu bhalienje mikate jila pubhalinginji bhanabhalume elupu ng'ano, gwangali bhalanganishiya bhanabhakongwe na bhana. 45 A Yeshu gubhaamulishenje bhaajiganywa bhabho bhakwelanje muntumbwi, bhajombokanje litanda bhalongolelanje ku Bhetishaida, bhayene gubhalepeshe bhalikwaalajilanga bhandu. 46 Bhakaalajilanjeje bhandu gubhapite jikape kushitumbi kukwaajuga a Nnungu. 47 Shigulogulo ntumbwi pugwaliji pakati pakati litanda, a Yeshu pubhaliji jikape kunyenje litanda. 48 Bhai, gubhaabhwini bhaajiganywa bhalilajilanga na ngoi ya nokolela ntumbwi, kunokola mashi, pabha mbungo jashinkupuga shilinyuma. Kumashelo a Yeshu gubhaajendelenje bhalikwenda pantundu mashi bhalipinga kwaapitangana. 49 Ikabheje bhakaabhonanjeje bhalikwenda pantundu mashi, gubhaganishiyeje pana shiwili shabho, gubhajobhelenje. 50 Pabha bhowe bhakaabhonanjeje a Yeshu bhashinkujogopanga. A Yeshu gubhabheleketete nabhonji, "Mwilumanje, ni nne. Nnajogopanje." 51 Kungai gubhakwelile muntumbwi mubhalinginji mula na mbungo jikutondobhaga. Nabhalabhonji gubhalapilenje kwa kaje. 52 Pabha bhangagamanya malombole ga mikate jila. Mitima jabhonji jashinkutopa. 53 Gubhajombokenje litanda, gubhaikengene ku shilambo sha Geneshaleti gubhajimigene. 54 Bhakakopokanjeje muntumbwi mula, shangupe bhandu gubhaamanyinji a Yeshu. 55 Bhai, gubhapitengene lubhilo nshilambo showe, gubhatandwibhenje kwaajigalanga bhalwelenji mmakai nikwapeleshela a Yeshu kokowe kubhapilikenenje bhapali. 56 Mowe mubhapitaga a Yeshu, ibhe mujiiji eu mmijini eu mmigunda, bhandu bhatendaga kwaabhikanga bhalwelenji pa lubhala, gubhaashondelesheyenje a Yeshu bhaakwayanje nkali libhiniko lya nngubho yabho. Na bhowe bhaakwashiyenje gubhalamilenje ilwele yabhonji.

7 Mapalishayo na bhaajiganya bha Shalia bhananji kukopoka ku Yelushalemu, gubhapitengene kwa a Yeshu. 2 Gubhaabhwini bhaajiganywa bhananji, bhalilyanganga shalya gwangali nabha makono, malinga shiikupinjikwa na ikubho ya Shiyaudi. 3 Pabha Mapalishayo na Bhayaudi bhowe bhashinkubhikanga mmitima jabhonji miungu ja bhanangulungwa bhahonji, nngalya shindu gwangali nabha. 4 Na kabhili bhakalyanganga shindu sha kopoka kushokoni gwangali kuukanga, na jaapali mikubho jina jibhayobhelelenje, malinga kuukanga bhilika na migabho na indu ya shabha. 5 Bhai, Mapalishayo na bhaajiganya bha Shalia gubhaabhwishiyenje a Yeshu, "Kwa nndi bhaajiganywa bhenu bhakaatendanga malinga shitushite jiganywa na bhanangulungwa bhetu, ikabheje bhanalyanganga gwangali nabha makono?" 6 A Yeshu gubhaajangwilenje, "Mmanganya mmagulumba, a Ishaya bhashinkulondola ukoto genu mmanganya kuti. 'A Nnungu bhanabheleketeta kuti, bhene bhandunjibha bhananyogopanga kwa malobhepe, ikabheje mitima jabhonji jishitalikangana na nne. 7 Kundindibhalila kwabhonji kwayoyo, Pabha majiganyo gabhonji ni malajilo ga shigundupe.' 8 "Mmanganya nnaekanga malajilo ga a Nnungu, nkupinga nkamulanje miungu ja bhandu."

9 A Yeshu gubhapundile kubheleketeta, "Mmanganya nnaekanga Malajilo ga a Nnungu nkupinga nkagulanje ikubho yenunji. 10 Pabha a Musha bhaashite, 'Gwaajogope ainago na akwenu.' Na kabhili bhaashite, 'Akwaatukana ainagwe na akwabhe, anapinjikwa abhulagwe'. 11 Ikabheje mmanganya nnajiganyanga, 'Monaga mundu akwete shindu sha kwaapa ainagwe eu akwabhe, abheleketeta kuti, njikwapa a Nnungu, 12 bhai, akapinjikwa kabhili kwaapa ainagwe eu akwabhe.' 13 Nneyo shinkuti kulinyegayanga lilobhe lya a Nnungu ligongo lya miungu jenunji. Nnatendanga indu yaigwinji malinga yeneyo." 14 A Yeshu gubhabheleketete kabhili na lugwinjili lula bhalinkuti, "Mmbilikananje mmowe na mmumanyanje. 15 Shakwa shalya, shalya mundu shikuntenda anyate, ikabhe ikunkopoka nkati ni ikuntenda anyate. 16 Akwete makutu ga piikanilajo apilikane." 17 Bhakaalekanjeje bhandu, gubhajinjile nnyumba, bhaajiganywa bhabho gubhaabhwishiyenje malombolelo ga lutango lula. 18 Na bhalabho a Yeshu gubhaalugulilenje, "Bhuli, nkali mmanganya nkakumumanyanga malinga bhananji? Nkakumumanyanga kuti shalya, shalya mundu shikakuntenda anyate?" 19 Pabha shikakunjinjila muntima ikabhe mmatumbope, kungai akakwenda kulilindi?" Kwa bheleketeta nneyo a Yeshu bhashinkwiitenda yalya yowe kubha ya mmbone. 20 A Yeshu gubhapundile bheleketeta, "Shikunkopoka mundu muntima shenesho shikuntenda anyate. 21 Pabha muntima uka mundu munakopoka ng'aniyo yangali ya mmbone ya labhalabha na gwii na bhulaga, 22 ya utwai na shienga na kwetela indu na unami na kujajatika na lupimililo na matukano na mbwinya na ungumba. 23 Yene yowei muikopoka muntima uka mundu, yeneyo ni ikuntenda anyate." 24 A Yeshu gubhajabhwise pepala, gubhapite mbali ya ku Tilo na ku Shidoni. Kweneko gubhajinjile nnyumba jimo, pubhapingaga inamanyishe na bhandu ikabheje bhangakombola kwiya. 25 Penepo bhakongwe bhama bhashinkukola mwali akwete maoka, gubhapilikene ngani ja a Yeshu. Bhai, gubhaishe nikwiigwiya pa makongono ga a Yeshu. 26 Bhene bhakongwebho pubhaaliji Bhagiliki bha ku Poinike shilambo sha Shilia. Bhai, gubhaajujile a Yeshu bhanshoye mwali jwabho lioka jula. 27 A Yeshu gubhaalugulile, "Mwaalekanje bhana bhajukutanjeti, nngabha mwammbone kutola shalya sha bhana nikwiipa mbwa." 28 Ikabheje bhakongwe bhala gubhajangwile, "Kweli Mmakulungwa, ikabheje nkali mbwa ili pai mesha inalya malepeyo ga bhana." 29 A Yeshu gubhaalugulile, "Kwa ligongo lya lilobhe limmeleketelyo, nnjende, lioka linshoshile mwali jwenu!" 30 Bhai, gubhapite kunngwabho, gubhann'igimene mwali jwabho agonile pa shinanda na lioka jula anshoshile. 31 Kungai a Yeshu gubhajabhwise penepo gubhapite mbali ja ku Tilo kupitila ku Shidoni, gubhaishe ku litanda lya Galilaya kupitila ku Dekapoli. 32 Bhai, gubhaapeleshelenje mundu bhuhbu na akaapilikana, gubhaajujilenje bhammishile makono. 33 A Yeshu gubhanshoshiye pa bhandu nikwenda najo kunyenje, gubhannjinjiye ngowe yabho mmakutu gakwe na gubhaunile mata nikunkwaya pa lulimi lwakwe. 34 Kungai a Yeshu gubhalolile kunani kunnungu, gubhatulwiye mbumu, gubhannugulile, "Epata," Malombolelo gakwe "Uguka." 35 Shangupe makutu gakwe gakuugukaga na lulimi lula guluugwishe, gwabheleketete ukoto. 36

A Yeshu gubhaamulishe bhanannugulilanje mundu yeila. Ikabheje pubhapundaga kwaalimbiyanga, nipubhapundangaga kushumiya ngani. 37 Bhandu bhashinkulapanga kwa kaje, gubhashitenje, “Bhanatenda indu yowe ukoto, bhanakwaatendanga ashinangapiikane, kupiikana kabhili na ashibhubhu kubheleketa.”

8 Gene mobhago, lugwinjili lwa bhandu gulugumbele kabhili. Pabha bhakakwetenenje shalya, a Yeshu gubhaashemilenje bhaajiganywa bhahbo, gubhaalugulilenje, 2 “Ngunakwaabhonelanga shiya bhandunjibha pabha bhashitamangana na nne mobha gatatu na bhanganjini shalya. 3 Naalugulilangaga bhajabhulungane kunngwabhonji bhalinginji na shibhanga, shibhaondokanje mumpanda, pabha bhananji kubhakopokenje kwatalika.” 4 Bhaajiganywa bhahbo gubhaabhushiyenje a Yeshu, “Putuli pano p akonde, tuate kwei mikate ja yukuta bhandu bhowebha?” 5 A Yeshu gubhaabhushiyenje, “Nkwetenje mikate jilingwa?” Gubhaajangwilenje, “Shabha.” 6 Bhai, gubhaamulisenje bhandu bhatamangane pai. Gubhatolile mikate shabha jila gubhatendile eja kwa a Nnungu, gubhajigebhenye, gubhaapelenje bhaajiganywa bhahbo bhaapanganje bhandu, na bhalabhonji gubhaapelenje. 7 Bhashinkukolanga na yamaki ishokope. A Yeshu gubhatendile eja kwa a Nnungu, gubhaalugulilenje bhaapanganje bhandu. 8 Bhandu gubhalilenje na yukuta. Gubhakundikenyenje malepei gubhagumbeyenje ikapu shabha. 9 Bhandu bhaililenje bhala pubhalinginji mbuti elupu nsheshe. A Yeshu gubhaalajilenje bhandu, nikwaalekanga bhajendangane kumui. 10 Kashokope gubhakwelile mmashua pamo na bhaajiganywa bhahbo, gubhapitengene shilambo sha ku Dalumanuta. 11 Mapalishayo gubhaikengenene, gubhatandwibhenje kutaukangana na a Yeshu. Nkwaalinga, gubhapinjilenje bhatende shilangulo kopoka kunnungu. 12 A Yeshu gubhatulwiye mbumu, nigubhashite, “Pakuti alu lubhelekolulunapanga ilangulo? Kweli ngunakummalanjilanga, alu lubhelekolulukapegwa shilangulo shoshowe.” 13 Bhai a Yeshu gubhaaleshilenje, gubhakwelile kabhili mmashua, gubhatandwibhe mwanja gwa jomboka litanda. 14 Bhaajiganywa bhashinkulibhalanga jigala mikate, ikabhe nkate gumope gwapali mumashua. 15 A Yeshu gubhaaleshiyenje bhalinkuti, “Nnolanje! Mwiteiganje na ngedule ya Mapalishayo na ya a Elode.” 16 Bhaajiganywa gubhatandwibhenje kubheleketa ashaayenerji, “Bhanabheleketa genego pakubha twangali mikate.” 17 A Yeshu gubhamumanyi gubhaalugulilenje, Kwa nndi nnaganishiyanga ga ngajigala mikate? Bhuli, nkanabhe kumumanyangape? Bhuli mitima jenunji jishinonopa? 18 Bhuli, nkwenetenje meyo na nkalolanga? Nkwetenenje makutu na nkapilikananga? Bhuli, nkakumbushilanga. 19 Lyene lyubha linagebhenye mikate ng'ano na kwaliyanga bhandu elupu ng'ano? Imwalokotenje ikapu ilingwa ya malepeyo? Gubhajangwilenje “Ikapu likumi limo na ibhili.” 20 Na punagebhenye mikate shabha na kwaliyanga bhandu elupu nsheshe, imwalokotenje ikapu ilingwa? Gubhajangwilenje, “Shabha.” 21 Bhai, gubhaalugulilenje, “Nkanabhe ng'amulangape?” 22 A Yeshu na bhaajiganywa bhahbo gubhaikengenene ku Bhetishaida, gubhaapeleshelenje

mundu jumo nangalole, nikwashondelesheya a Yeshu bhankwaye nkupinga alame. 23 A Yeshu gubhankamwile nkono, gubhapite najo kunyenje shijiji. Gubhanng'unile mata mmeyo, gubhankwashiyi na makono, gubhammushiye, “Bhuli, ulikushibhona shindu shoshowe?” 24 Nangalole jula gwalolile, nigwashite, “Ngunakwabhonanga bhandu bhahagwinji mbuti mikongo jilikwenda.” 25 Kungai a Yeshu gubhankwashiyi kabhili na makono kumeyo, na jwalakwe gwabhalakwile meyo nigwalamile, gwaibhweni indu yowe ukoto. 26 A Yeshu gubhannugulile ajende kunngwakwe nikung'amulisha, “Unabhuje kushijiji!” 27 Kungai a Yeshu na bhaajiganywa bhahbo gubhapitengenene mujiji ya ku Kaishalia Piliipi. Bhalinginji mumpanda a Yeshu gubhabhushiyenje bhaajiganywa bhahbo, “Bhandu bhakutinji nne gani?” 28 Gubhaajangwilenje, “Bhananji bhakutinji mmwe a Yowana Bhabhatisha na bhananji bhakutinji a Eliya na bhananji bhakutinji jumo jwa munkumbi gwa ashinkulondola bha a Nnungu.” 29 Nabhalabho a Yeshu gubhaabhushiyenje, “Na mmanganya bhuli, nkutinji nne gani?” A Petili gubhaajangwile, “Mmwe a Kilishitu, nng'agwilwe na a Nnungu.” 30 A Yeshu gubhaalimbiyenje bhanannugulilanje mundu jojowe jene nganji. 31 A Yeshu gubhatandwibhe kwaajiganyanga bhaajiganywa bhahbo kuti, inapinjikwa Mwana juka Mundu apotekwe na kanwa na bhanangulungwa na bhakulungwanji bhaabhisila na bhaajiganywa bha shalia. Abhulagwe na lyubha lya tatu shaayushe. 32 A Yeshu bhashinkwaalugulilanga gwangali nng'yo. Penepo a Petili, gubhaatolile a Yeshu kunyenje na gubhatandwibhe kwaakalipila. 33 Ikabheje a Yeshu gubhatendebhwishe, gubhaalolilenje bhaajiganywa bhahbo, gubhaakalipile a Petili bhalinkuti, “Njoshela apano, Lishetani gwe! Pabha ukaganishiya ga a Nnungu ikabhe ga shigundupe.” 34 Kungai a Yeshu gubhaashemilenje bhandu bhagumbelenje bhala na bhaajiganywa bhahbo, gubhaalugulilenje, “Mundu jojowe apinga ngagula nne, anapinjikwa aikane nnyene, ajigale nshalabha gwakwe angagule. 35 Pabha mundu apinga lamya gumi gwakwe shaguobhye, ikabheje akuguobhya gumi gwakwe kwa ligongo lyangu nne na ligongo lya Ngani ja Mmbone, shagutapule. 36 Bhuli, shiimpwale indi mundu apegwaga indu yowe ya nshilambolyo showe akuno aliobhya gumi gwakwe? 37 Eu mundu shashoye shindu shashi pa gumi gwakwe? 38 Mundu jojowe munkumbi gwa lubheleko lwangakulupalika kwa a Nnungu na lwa yambulu, ashangolele oni nne na malobhe gangu, nne mwana juka Mundu shininkolele oni jwene mundujo, malanga pushing'ishe Muukonjelo gwa Atati pamo na ashimalaika bha Ukonjelo bha kunnungu.”

9 A Yeshu gubhapundile kwalugulilanga, “Kweli ngunakummalanjilanga, bhapalinji bhananji bhalinginji pepano bhakawanganga bhakanabhe kuubhonanga Upalume gwa a Nnungu ulikwiya kwa mashili.” 2 Gakapiteje mobha nng'ano na limo, a Yeshu gubhaatolilenje a Petili na a Yakobho na a Yowana, gubhapite nabhonji kushitumbi shashileu kwa jikape. Kweneko gubhapindikwishe lubhombu lwabho, mmujo jabhonji, nibhoneka shinape. 3 Nngubho yabho yashinkung'anyima niwejela kwa kaje, wala jwakwapi nkushapa jojowe pa shilambolyo akombola kushapa nikwitwenda iwejele

malinga nneyo. 4 Gubhakoposhelenje a Eliya na a Musha gubhakangulokenje na a Yeshu. 5 A Petili gubhaalugulile a Yeshu, "Mmajiganya, shankonja uwe kubha apano. Bhai, tushenje itala itatu, shimo shenu mmwe, na shina sha a Musha na shina sha a Eliya." 6 Mbeni bhakashimanyaga shibhabheleketaga, pabha bhenebho na ashajabhonji bhashinkujogopanga. 7 Kungai gulyaunishilenje liunde malinga shiwili, lilobhe likupilikanikaga nniundemo "Jweneju Mwanangu jungumpinga, mumpilikanishiyenje." 8 Shangupe bhakang'wang'wayanje, bhangammonaga mundu juna ikabhe a Yeshu ikape. 9 Bhai, gubhalginginji nkuuelele shitumbi, a Yeshu gubhaalimbienye bhanannugulilanje mundu jowowe indu ibhaibhweninji, mpaka Mwana juka Mundujo, pushayushe awaga. 10 Bhai, gubhalibhishilenje mmitima lyene lilobhelo, bhalibhuyananga ashaayenenji malombolelo ga yuka kopoka kubhawilenje. 11 Gubhaabhushiyenje a Yeshu, "Pakuti bhaajiganya bha Shalia bhakutinji mpaka bhatandubhe kuika a Eliya?" 12 A Yeshu gubhaajangwilenje, "Elo, a Eliya bhanakwiyati kualaya yowe. Nkali nneyo, kwandi bhai ishijandikwa Mmajandiko ga Ukonjelo kuti Mwana juka Mundu anapinjikwa potekwa na kanwa?" 13 Ikabheje ngunakummalanjilanga, a Eliya bhaaishe, nabhalabhonji nigubhaatendenje yowe ibhapijilenje, malinga shibhajandishilwe Mmajandiko ga Ukonjelo." 14 Bhakaishilanjije bhaajiganywa bhananji bhala, gubhalubhweninji lugwinjili lukulungwa lwa bhandu lwaatimbililenje bhalitaukangana na bhaajiganya bha shalia. 15 Shangupe lugwinjili lwa bhandu bhaakabhonanje a Yeshu, bhowe bhashinkulapanga kwa kaje, gubhaabhutushilenje kukwalamushila. 16 A Yeshu gubhabhushiyenje, "Nkutaokangana nndi?" 17 Mundu jumo munkumbi mula gwabhajangwile, "Mmajiganya, njikwiyanjajo mwanangu kwenu mmwe, ashikola lioka likuntenda anabheleketete. 18 Papagwinji ashikilwaga anakunngwiya pai na kopoka shiulo nkang'wa, alitauna meno na ng'ang'anala shiilu showe. Njinkwaajuganga bhaajiganywa bhenu bhanshoyanje ikabheje bhagakombolanga." 19 A Yeshu gubhaalugulilenje, "Mmanganya lubheleko lwangulupai! Shindame na mmanganya mpaka shakani? Shinikakatimile mpaka shakani? Munnjijyanajonji akuno." 20 Gubhampelenje. Shangupe lioka jula akaabheneje a Yeshu, gwanngwishiye nikunng'ungumiya, aligalabhuka na kopoka shiulo nkang'wa. 21 A Yeshu gubhaabhushiyenje ainamundu, "Genega pugampatile kutandubhila shakani?" Nabhalabho gubhajangwile, "Tandubhila ali mwana. 22 Papagwinji lioka linakunngwishiya pamoto na mmashi, nkupinga limmulaje. Bhai, ibhaga nnakombola, ntubhonele shiya na ntujangutile!" 23 A Yeshu gubhaalugulile, "Kwa nndi nkuti, nkombolaga? Gowe ganaakomboleka kuka mundu akulupalila." 24 Penepo ainamundu bhala gubhagutile bhalinkuti, "Ngulikupalila! Nnyangutile kwa ungakulupalila gwangu." 25 A Yeshu bhakalubhoneje lugwinjili lwa bhandu luli kwaajila shibhutuka, gubhankalipile lioka jula bhalinkuti, "Lioka ukuntenda mwanaju anabheleketete na anapilikane, ngunakuamulisha gunshoshe nshandaju na unannjinjile kabhili!" 26 Lioka jula gwagutile, gwann'ungumiye kwa kaje, kungai

gwanshoshile. Nshanda jula paliji mbuti ashiwa, na bhananji gubhashitenje kuti, "Awile!" 27 Ikabheje a Yeshu gubhankamwile nkono, gubhannjinwile na jwalakwe gwajimi. 28 Bhai, a Yeshu bhakajinjileje nnyumba, bhaajiganywa bhabho gubhaabhushiyenje pajika, "Pakuti uwe twangakombola kunshoya?" 29 Na bhalabho a Yeshu gubhaabhalanjilenje, "Lioka lya malinga lyeneli nkakombolanga kulishoya, ikabhe kwa juga Nnangupe." 30 A Yeshu na bhaajiganywa bhabho gubhashoshilenje pepala, gubhapelengenyeje na mwanja gwabhonji pitila ku Galilaya. Na bhalabho a Yeshu bhakapinjileje mundu amumanye kubhali, 31 pabha butandaga kwaajiganyanga bhaajiganywa bhabho. Gubhaalugulilenje, "Nne Mwana juka Mundu shingamuywe kubhandu na shibhammulaganje, ikabheje lyubha lya tatu shinyushe." 32 Bhaajiganywa bhabho bhagalimanyanga lyenelyo. Ikabheje gubhajogopenje kwaabhuya. 33 Bhai, gubhaikengenenje ku Kapalanaumu. Pubhaliji nnyumba, a Yeshu gubhaabhushiyenje, "Mwataukanganaga nndi mumpanda?" 34 Ikabheje bhanganjabho gubhatemingenenje iili, pabha mumpanda bhatenda taukangana ga gani ali nkulungwa jwabhonji. 35 A Yeshu gubhatemi pai, gubhaashemilenje likumi limo na bhabhili bhala, gubhaalugulilenje, "Mundu apinga kubha nkulungwa, anapinjikwa abhe jwa kumpelo na ntumishi jwa bhowe." 36 Kungai gubhantolile mwana jwa nshoko, gubhannjimisho pakatipakati jabhonji, gubhannjambete, gubhaalugulilenje, 37 "Akumposhela mwana jwa nshoko malinga jweneju kwa lina lyangu, anamboshela nne, na amboshela nne, akaamboshela nnepe, ikabheje na bhandumile bhala." 38 A Yowana gubhaalugulile a Yeshu, "Mmajiganya, tushikummona mundu jumo alishoya maoka kwa lina lyenu, na uwe gutulinjile kunnimbiya pabha nngabha jwa munkumbi gwetu." 39 Ikabheje a Yeshu gubhashite, "Nnannimbiyanje, pabha jwakwapi mundu atenda ilapo kwa lina lyangu, popo pepo nimeleketela yangali ya mmbone. 40 Pabha akakututauka, pali na uwe. 41 Mundu jowowe shampanganje mashi ga ng'wa, ligongo nshibhanganga bhandu bha a Kilishitu, kweli ngunakummalanjilanga akapelela upo yakwe. 42 "Mundu jowowe shannebhye jumo jwa munkumbi gwa bhashokonji bhangukupalilangabha, kaliji mbaya jwene mundujo, atabhiwe liganga likulungwa lya yajila nnukoi lwakwe nileshelela mmaali. 43 Nkono gwenu unnebhayaga muukate! Mbaya jinjila mugumi gwangali nkono gumo, nngalingana na kola makono ganaabhili, nileshelela kumoto gwa ku Jeanamu. (Geenna g1067) 44 Mwenemo mbiu yakwe ikawa, wala moto gwake ukaimika. 45 Na lukongono lwenu lunnebhayaga, nnukate! Mbaya jinjila mugumi nni na lukongono lumo, nngalingana kola makongono ganaabhili, nileshelela kumoto gwa ku Jeanamu. (Geenna g1067) 46 Mwenemo mbiu yakwe ikawa, wala moto gwake ukaimika. 47 Na liyo lyenu linnebhayaga nnishoye! Mbaya jinjila mu Upalume gwa a Nnangu nninkwete shongo, nngalingana kola meyo ganaabhili, nileshelela kumoto gwa ku Jeanamu. (Geenna g1067) 48 Mwenemo mbiu yakwe ikawa, wala moto gwakwe ukaimika. 49 "Pabha kila mundu shaukangwe na moto malinga mbepei puiukangwa na njete. 50 Nnjete ni ja mmbone, ikabheje jikanonye jitagwe indi nkupinga jinonye? Ntamangane kwa ulele munkumbi gwenunji, nkupinga kunong'aya shilongani."

10 A Yesu gubhajabhwiye pepala gubhapite ku shilambo sha ku Yudea na mmbali ya ku ng'ambu lushi lwa Yolodani. Bhandu bhabhagwinji gubhaajendelenje kabhili, na bhalabho gubhaajigenyenje malinga shigwaliji nkubho gwabho. **2** Bhai, Mapalishayo gubhaajendelenje, gubhabhushiyenje nkwaalinga, "Bhuli, ilipinjikwa jwannume kunneka nkagwe?" **3** A Yesu gubhaajangwilenje bhalinkuti, "Bhuli a Musha bhannajilenje nndi?" **4** Na bhalabho gubhashitenje, "A Musha bhakundile kuti, jwannume ajandishe talaka anneshe nkagwe." **5** A Yesu gubhaalugulilenje, "A Musha bhashinkunnjandishilanga jene shalajo kwa ligongo lya nonopa mitima jenunji. **6** Ikabheje kutandubhila kupanganywa kwa shilambolyo, a Nnungu bhashinkupanganya bhandu bhabhili, jwannume na jwankongwe. **7** Kwa nneyo, jwannume shabhalekanje ainagwe na akwabhe nilundana na akagwe, **8** numbe shibhabhanganje shindu shimo. Kwa nneyo bhakabhanganga bhabhili ikabhe shindu shimo. **9** Bhai, shibhalundenye a Nnungu, mundu anelekanye." **10** Bhakajinjilanje kabhili nnyumba, bhaajiganywa bhabho gubhaabhushiyenje ga genego. **11** Na bhalabho a Yesu gubhaalugulilenje, "Akwaaleka akagwe nilomba jwankongwe juna, analabhalabha. **12** Numbe jwankongwe akwaaleka ambujegwe, nilombwa naka jwannume juna, analabhalabha." **13** Bhandunji bhashinkwapeleshelanga a Yesu bhana bhashoko bhashoko nkupinga bhaakwayanje, ikabheje bhaajiganywa bhabho gubhaakalipilenje. **14** A Yesu bhakabhoneye nneyo, guyaashimile nigubhaalugulilenje, "Mwaalekanje bhana bhashoko bhashoko bhanyiilanje, wala nnaibhiliilanje, pabha Upalume gwa a Nnungu gwa malinga bhene bhanganjabha. **15** Kweli ngunakummalanjilanga, mundu jojowe akauposhele Upalume gwa a Nnungu malinga mwana jwa nshoko, akajinjila mwenemo." **16** Kungai gubhaajambetenje bhana bhala, nigubhaabhushilenje makono, nikwaajuilanga mboka. **17** A Yesu bhakatandubheje mwanja gwabho kabhili, mundu jumo gwabhaishile lubhilo, gwabhatindibhalile pamakongono gabho, gwabhabhushiyeye, "Mmajiganya mmambone, ndende bhuli mbate gumi gwa pitipiti?" (aiōnios g166) **18** A Yesu gubhannjanguwile, "Pakuti unanjema najwa mmbone? Jwakwapi ali jwa mmbone ikabheje a Nnungu jikape. **19** Gwiimanyi amuli shiikuti lugula, 'Unalabhelabhe na unabhulaje na unajibhe unakong'ondele namu na unalambile na gwaishimunji ainaga na akwenu." **20** Nshanda jula gwabhalugulile, "Mmajiganya, gene gowego njikunda tandubhila ushanda gwangu." **21** A Yesu gubhannolile gubhampinjile, nigubhannugulile, "Ushitubhilwa shindu shimo, ujende ukaushe yowe yuukwete, elayo, ukaapanganje bhaalaga, na ugwe shiukole shibhiko kunnungu, kungai ujiye unagule." **22** Akapilikaneje genego, gwajabhwiye ali ainjishye, pabha ashinkukola indu yaigwinji. **23** A Yesu gubhalolile akuno na kukono, gubhaalugulilenje bhaajiganywa bhabho, "Shiibhe ukomu kwa matajili kujinjila mu Upalume gwa a Nnungu." **24** Bhaajiganywa gubhakanganigwenje kwa malobhe gabho. A Yesu gubhaajangwilenje kabhili, "Ashibhanangu nnolanje, shiishite komala kwa akulupalila mali, kujinjila mu Upalume gwa a Nnungu! **25** Ikakomala ngamia kupeleta pa lilanga lya ingano, kupunda akwete indu kujinjila mu Upalume gwa a Nnungu." **26** Bhaajiganywa bhabho

gubhapundilenje kukanganigwa nigubhabhalanjilenje, "Bhai, igala gani shakombole kutapulwa?" **27** A Yesu gubhaalolilenje, nigubhashite, "Kubhandu ikakomboleka, ikabheje kwa a Nnungu nngabha nneyo, pabha kwa a Nnungu yowe inakomboleka." **28** A Petili gubhashite, "Nnole, uwe tushileka yowe nikunkagula mmwe." **29** A Yesu gubhashite, "Kweli ngunakummalanjilanga, jwakwa mundu jojowe aleshile nyumba, eu ashapwakwe, eu ashalumbugwe, eu akwabhe, eu ainagwe, eu bhanagwe, eu migunda, kwa ligongo lyangu nne, na kwa ligongo lya Nngani ja Mmbone, **30** ikabhe agano malanga gano, Shaposhele pa makumi kumi, nyumba, eu ashaapwakwe na ashaalumbugwe, eu akwabhe, eu bhanagwe na migunda, na mboteko, na malanga gakwiyago, gumi gwa pitipiti. (aiōnios g165, aiōnios g166) **31** Ikabheje, bhabhagwinji bhalingi bhantai, shibhabhanganje bha kumpelo, na bhalinginji bha kumpelo, shibhabhanganje bhantai." **32** Bhai bhalinginji mumpanda, kujomboka kwenda ku Yelushalemu a Yesu gubhaalongolelenje, bhaajiganywa bhabho gubhakanganigwenje, na bhakagulangaga bhala gubhajogopenje. A Yesu gubhaatolilenje bhaajiganywa bhabho kutemela, gubhatandwibhe kwaalugulilanga, gapinga kwaakoposhela, **33** bhalinkuti, "Mpilikananje, tunakwenda ku Yelushalemu, kweneko nne Mwana juka Mundu ngupinga tendebhukwa, nikamuywa ku bhakulungwanji bhaabhishila na bhaajiganywa bha shalia, bhalabho shibhang'ukumulanje mulagwe, na shibhangamuyanje kubhandu bha ilambo ina, **34** bhalabho shibhanyegayanje, ning'unilanga mata na ngomanga na mishapilo, nimulaga na lyubha lya tatu shinyushe." **35** A Yakobho na a Yowana bhana bha a Shebhedayo, bhashinkwaaajendelanga a Yesu gubhaalugulilenje, "Mmajiganya, tunakunnjuga ntutendele shindu shimo shitupinga kunnjuga." **36** A Yesu gubhaabhushiyenje, "Nkupinganga nintendelanj nndi?" **37** Gubhaajangwilenje, "Ntubhishe tutame jumo kunkono gwenu gwa nnilo na juna kunkono gwenu gwa nshinda mu Ukonjelo gwenu." **38** A Yesu gubhaalugulilenje, "Nkakushimanyanga shinkujuganga! Bhuli, shinkombolanje kuipililila malanga ga mboteko malinga shimbanga pitila nne, eu shinkombolanje kupitila malanga ga mboteko, malinga shingubinga pitila nne?" **39** Gubhaajangwilenje, "Shitukombole." A Yesu gubhaalugulilenje, "Kweli shimwiiipilililanga malanga ga mboteko gumbanga pitila nne, na shinkombolanje kupitila malanga ga mboteko, malinga shingubinga pitila nne. **40** Ikabheje gani shatame nkono nnilo eu kunkono nshinda, nngabha gangu nne, ikabhe shibhapeganje bhapanjilwenje na a Nnungu bhala." **41** Bhaajiganywa bhana bhakapilikananjeje genego, gubhashimilwenje na a Yakobho na a Yowana **42** Kwa nneyo a Yesu gubhaashemilenje, gubhaalugulilenje "Mmumanyinji kuti, bhene bhaganishiwanga kuti bhaatagwala bha bhandu bha ilambo ina, bhanakwaatagwalanga bhandu kwa mashili, na bhakulungwa bhabho bhanakwawashilishiyanga kukunda ukulungwa gwabho. **43** Ikabheje ikabha nneyo kwa mmanganyanji, apingabha jwankulungwa munkumbi gwenunji, shabhe ntumishi jwenunji. **44** Apingabha kalongolele munkumbi gwenunji, shabhe ntumwa jwa howe. **45** Pabha nne Mwana juka Mundu nangaika kuutumishilwa, ikabhe kutumishila na shoya

gumi gwangu kwa ligongo lya kwaagombolanga bhandu bhahagwinji.” 46 Bhai, gubhaikengenenge ku Yeliko, nabhalabho a Yesu na bhaajiganywa bhahho pubhahshokanganaga shene shilambosho na lugwinjili lwa bhandu, a Bhatimayo anangalole bhaajuga, bhanabhabho a Timayo, bhashinkutama nnyenje mpanda. 47 Bhakapilikaneje kuti a Yesu Bhanashaleti bhanapita penepo, gubhatandwibhe kuutiya lilobhe bhalinkuti, “A Yesu, Mwana jwa a Daudi, mmonete shiya!” 48 Bhandu bhahagwinji gubhaakalipilenje, nkupinga bhapumule, ikabheje gubhapundile kuutiya lilobhe “Mwana jwa a Daudi monela shiya!” 49 A Yesu gubhajimi gubhashite, “Mwaashemanje” Bhai, gubhaashemilenje anangalole bhala, gubhaalugulilenje “Mwilume ntima! Nnjinushe bhanakunshema.” 50 Nabhalabho gubhajaile nkogo gula, gubhaumbile, gubhaajendele a Yesu. 51 A Yesu gubhaabhushiye, “Nkupinga nintendele nndi?” Anangalole bhala gubhaajangwile, “Mmajiganya ngunapinga nole.” 52 A Yesu gubhaalugulile, “Nnjabhule, ngulupai jenu jinnammiye. Shangupe gubhatandwibhe kulola kabhili, gubhaakagwile a Yesu mumpanda.”

11 Bhai, bhalingini tome na ika ku Yelushalemu, gubhaikengenenge ku Bhetipage na ku Bhetania tome na shitumbi sha mikongo jishemwa Misheituni. Gubhaatamilenje bhaajiganywa bhahho bhahili, 2 gubhalugulilenje, “Nnjendangane kushijiji shili mmujo jenunji, pushinnijilanje mwenemo, shimung’imananje mwana mbunda atabhililwe, akanabhe jigala mundu. Munngopolanje nkanjiye najoji. 3 Monaga mundu amuyangaga, ‘Pakuti nnatendanga nneyo?’ Munnugulilanje ‘Bhakulungwa bhanakummpinga na shibhamujenajo shangupe.’” 4 Bhai, gubhapitengenenge, gubhang’imenenje mwana mbunda atabhililwe pa nnango gwa nyumba, nnyenje mpanda njindo, pubhanngopolangaga, 5 bhandu bhananji bhajimingenenge tome na penepo gubhaabhushiye, “Kwa nndi nnakungopolanga mwana mbundajo?” 6 Gubhaajangwilenje malinga shibhalajilwenje na a Yesu, nabhalabho gubhaaeshilenje bhajabhulanje. 7 Gubhaapeleshelenje a Yesu mwana mbunda jula. Gubhatandikenje nngubho pantundu jakwe na gubhaakweshenje a Yesu. 8 Bhandu bhahagwinji gubhatandikenje nngubho yabhonji mumpanda, na bhananji gubhatandikenje maagala gubhatemilenje mmigunda. 9 Bhandu bhowe bhalongololenje na bhakagulangaga nnyuma, gubhautienje lilobhe bhalinkutinji, “Bhainiye! Bhaposhele mboka bhakwiya kwa lina lya Bhakulungwa! 10 Ushipegwa mboka Upalume ukwiya, gwa ainabhetu a Daudi. Bhainiye a Nnungu kunani kaje kunnungu!” 11 A Yesu gubhajinjile kunjini ku Yelushalemu gubhapelengenye kwenda ku liekalu, gubhalolile indu yowe mowe. Pabha yashinkubha ligulo, gubhabhujile ku Bhetania na bhaajiganywa bhahho likumi limo na bhahili bhala. 12 Malabhi gakwe bhalinkushokanganaga ku Bhetania, a Yesu gushaapoteshe shibhanga. 13 Bhai, gubhagubhweni nkongo ntini kwa taliya uli na maamba. Gubhagujendele nkuganishiya pana shibhakaiimane iepo. Bhakaisheje gubhagaimene maambape, pabha nngabha miongwe ja ogoya iepo. 14 A Yesu gubhaulugulile ntini gula, “Tandubhila lelo na mobha gowe, mundu akalya iepo

yako.” Na bhaajiganywa bhahho gubhapilikenenje malobhe gubhabhelekete. (aion g165) 15 Bhai, gubhaikengenenge ku Yelushalemu. A Yesu gubhapite ku Liekalu, gubhatandwibhe kwabhanganjilanga palanga, bhandunji bhaushangaga na uma indu mwenemo. Gubhapindikwile mesha ya bhatindiganya mmbiya, na itengu ya bhausha ngunda. 16 Na wala bhaganneshelala mundu jojowe, kujinjira wala kopoya shindu ku Liekalu. 17 Kungai gubhaajigenyenje bhalinkuti, “Ishijandikwa Mmajandiko ga Ukonjelo kuti, ‘Nyumba jangu shijishemwe nyumba ja jujila kwa bhandu bhowe!’ Ikabheje mmanganya nshikujitendebhuyana nibha lishembo lya kwiya bhagwii!” 18 Bhakulungwanji bhaabhishila, na bhaajiganya bha Shalia, bhakapilikanenje genego, gubhatandwibhenje loleya shanabhuli pushibhaabhulaganje. Ikabheje bhashinkujogopanga, pabha lugwinjili lwa bhandu lwatendaga kanganywa, kwa majiganyo gabho. 19 Likaisheje ligulo, a Yesu na bhaajiganywa bhahho gubhashoshilenje pa nnjini pala. 20 Pa lyamba yakwe bhalipitangana, gubhagubhweninji nkongo ntini gula gujumwile gowe kuumila kumbubhu. 21 A Petili gubhakumbushile, gubhaalugulile a Yesu, “Mmajiganya, nno! Ntini gumuuloshile gula, gujumwile!” 22 A Yesu gubhaalugulile, “Nnapinjikwanga mwakulupalilanje a Nnungu. 23 Kweli ngunakunnugulilanga, mundu ashilugulilaga ashi shitumbishi, ‘Tutumbuka ukaleshele mmashi,’ akuno akakola lipamba muntima gwakwe, ikabhe alikulupalila kuti yowe yabheketayo inatendeka, shatendelwe shene shindusho. 24 Kwa nneyo ngunakunnugulilanga, punkujuganga shindu kwa a Nnungu, nkulupalilanje kuti mpegwilwenje na shimpegwanje. 25 Punkujuganga Nnungu, munneshelanjene jojowe annehilenje, nkupinga Ainabhenunji bhali kunnungu, bhanneshelanjene yambi yenuji.” 26 “Ikabheje nkaaleshelanjene ajenuji, nkali Ainabhenunji bha kunnungu, bhakanneshelanjene yambi yenuji.” 27 Gubhaikengenenge kabhili ku Yelushalemu, bhai gubhapitilaga kuliekalu, bhakulungwanji bhaabhishila, na bhaajiganya bha Shalia ya Musha, na bhanangulungwa gubhaajendelenje a Yesu, 28 Gubhaabhushiye, “Nnatenda genega kwa ukulungwa gwashi? Na gani ampele gwene ukulungwa gwa tenda yene indu?” 29 A Yesu gubhaalugulilenje, “Shinimmujanje oti, nnyangulangaga, numbe nne shininnugulilanje ngunatenda yenei kwa ukulungwa gwashi. 30 Mashili ga ubhatisho gwa a Yowana kugakopweshe kunnungu eu kubhandu?” 31 Gubhatandwibhenje kubhuyana ashaayenenji bhalinkutinji, “Tulugulaga kuti kugakopweshe kunnungu, shibhatubhuye pakuti mwangaakulupalilanga? 32 Na tulugulaga kuti kugakopweshe ku bhandu, ntape.” Bhagajangulanga nneyo, nkwaajogopanga bhandu, pabha bhowe bhakulupalilanjene kuti, a Yowana pubhaliji kweli ankulondola bha a Nnungu. 33 Bhai, gubhaajangwilenje a Yesu, “Tukakumanya.” Na bhalabho a Yesu gubhaalugulilenje, “Na nne ngannugulilanga ngunatenda genega kwa mashili gashi.”

12 Bhai, a Yesu gubhatandwibhe bheleketa nabhonji kwa ndango. “Bhandu bhamo bhashinkulima nngunda gwa mishabhibu. Gubhashenjele ubhigo, gubhaolile liimbo lya minyila shabhibu, nishenga na nnala. Gubhaapelenje ngunda gula bhaalimanga, nkupinga bhalipilanje, gubhapite mmwanja.

2 Miongwe ga manenge'eno jikashileje, gubhantumile ntumwa jwabho kubhaalima, akatole shabhibhu ya mauno gabho. 3 Bhai bhaalimanga bhala gubhankamwilenje ntumwa jula, gubhankomilenje, nigubhamminjilenje gwangali shindu. 4 Bhayene nngunda gubhantumile kabhili ntumwa juna, nkali jwenejo gubhann'uleyenje muntwe, gubhampentekuyenje. 5 Gubhantumile juna, naka jwenejo gubhammulegenje. Bhayene nngunda gubhaatumilenje bhananji bhabhagwinji, bhana bhashinkwaakomanga na bhananji gubhaabhulegenje. 6 Bhai gwalepeshe jumope, mwanagwabho jwa jika jubhampingogaga. Kungai gubhantumile jwenejo bhalinkuti, 'Shibhannjogopanje mwanangu.' 7 Ikabheje bhaalimanga bhala, gubhabhalanjilenenje kuti, 'Jwenejo apinga tola ulishi, bhai tummulaje nkupinga ulishigo, ubhe gwetu!' 8 Bhai gubhankamwilenje, nikummulaga, gubhannjailenje kunyenje nngunda gwa mishabhibhu gula.' 9 "Bhai bhayene ngunda shibhatende nndi? Shibhaishe nikwabhulaganga bhaalimanga bhala, na nngunda gula nikwapanganga bhandu bhana. 10 Bhuli nkanabheshomanga yenei Mmajandiko ga Ukonjelo? Kutu, 'Liganga libhalikanilenje bhaashenganga, Nnaino lishibha liganga likulu lya pa ndumba. 11 Lyeneli bhatendile Bhakulungwa, Na kunngetu uwe lya lapa.'" 12 Bhai bhakulungwanji bhaabshishila, gubhapijilenje kwaakamula, pabha bhamumanyinji kuti lwene lutangolo, lwaalugulangaga bhalabhonji. Ikabheje gubhajogopenje lugwinjili lwa bhandu. Bhai gubhaaleshilenje, gubhajabbulengene. 13 Bhai, Mapalishayo bhananji na bhandunji bha a Elode, gubhatumilenje bhakaatenganje a Yesu, kwa malobhe gabho. 14 Bhakaikangananje gubhaalugulilenje, "Mmajiganya, tumumanyi kuti mmwe mmanguja, na gunkubheleketa ga kweli, na mmangali luagu, ikabhe nnajiganya ya kweli, ya mpanda gwa a Nnungu. Bhuli, iipinjikwa kulipa koli kwa a Kaishali eu nng'oo? Twaape koli eu tunape." 15 Ikabheje a Yesu bhagumanyi ugulumba gwabhonji, gubhaalugulilenje "Pakuti nnaninganga? Mmbanganjeti dinalijo nijilole." 16 Gubhaapelenje. Bhai gubhaabhusiyenje, "Jene pishaji na majandikoga, gakeni?" Gubhajangwilenje, "Ga a Kaishali." 17 Bhai a Yesu gubhaalugulilenje, "Ya a Kaishali, mwaapanganje a Kaishali, na ya a Nnungu, mwaapanganje a Nnungu." Bhai, gubhakanganigwenje kwa kaje kwa shene shijanguloshu. 18 Bhai Mashadukayo bhalugulanga kuti kwakwapi kuyuka kwa bhandunji, gubhaajendelenje a Yesu, nikwabhuya bhalinkutinji, 19 "Mmajiganya, Mmalajilo ga a Musha, bhashikutujandishila nnei, 'Mundu awaga nikunneka nkagwe gwangali kolela mwana, mpwakwe antole jwene nshitungajo, ankolele mwana nkulugwe.'" 20 Bhai bhashinkupagwanga bhanabhalume shabha, bha likaja limo. Jwankulu gwalombile, gwawile gwangali kukolela mwana. 21 Jwabhili gwantolile na jwalakwe gwawile gwangali kukolela mwana, nneyo peyo nkali jwa tatu. 22 Bhai bhanaabhowe shabha, gubhawilenje gwangali kuleka mwana. Bhai kungai bhakongwe nabhalabho gubhawile. 23 Bhai lyubha lya yuka, bhakongwe bhala shibhabhe bhakeni? Pabha bhowe shabha bhaalombilenje." 24 A Yesu gubhaaangwilenje, "Bhuli mmanganyanji nnaobhanga, kwa ligongo lya nngagamanya majandiko ga Ukonjelo, na wala mashili ga a Nnungu. 25 Pabha pushibhayukanje bhandu bhowe, kukapagwa kulomba

wala kulombwa, ikabhe shibhabhanganje malinga ashimalaika bha kunnungu. 26 Na ga yuka bhawilenje, mwangashomanga nshitabhu sha a Musha, majandiko gataya ga shitekete shakolelaga moto shila? A Nnungu pubhaabhalanjile a Musha kuti, 'Nne a Nnungu bha a Bhulaimu na a Ishaka na a Yakobho.' 27 Kwa nneyo bhenebho nngabha a Nnungu bha bhawilenje, ikabhe a Nnungu bha bhakotonji. Bhai mmanganya nnaobhanga kwa kaje." 28 Bhai bhaajiganya bhamo bha shalia, bhaapali pubhataukangananga a Yesu na ashimashadukayo, gubhamanyi kuti a Yesu bhashijangula ukoto, kwanneyo gubhaabhusiye a Yesu, "Je amuli jili jikulungwa kupunda yowe?" 29 A Yesu gubhaaangwile, "Jikulungwa ni ajino, 'Upilikane ugwe Ishilaeli! Bhakulungwa a Nnungu bhetu, ni Bhakulungwa bhamope. 30 Kwa nneyo Mwaapinje Bhakulungwa a Nnungu bhenu, kwa ntima gwenu gowe, na kwa mbumu yenu yowe, na kwa lunda lwenu lowe, na kwa mashili genu gowe.'" 31 Na jabhili jakwe, ni ajino, 'Mumpinje ntami njenu malinga shinkwiipinga mmayene.' Jakwa amuli jina jikulungwa kupunda yenei." 32 Bhai bhaajiganya bha Shalia ya a Musha bhala gubhashite, "Mmaajiganya, penepo mmelekete ukoto, kuti a Nnungu bhamope, bhakwa bhana ikabhe bhenebho pebho. 33 Kwa nneyo, inapinjikwa kwaapinga bhenebho, kwa ntima gowe, na kwa lunda lowe, na kwa mashili gowe, na kumpinga ntami njenu, malinga shinkwipinga mmayene. Pabha lyeneli ni lya mmbone kupunda kwaapa a Nnungu indu ya mbepei ya tiniya na indu yowe ya bhishila." 34 A Yesu bhakabhoneje kuti bhene bhandubho bhashijangula kwa lunda, gubhaalugulile, "Mmwe, mwangataliya na Upalume gwa a Nnungu." Bhai tandubhila penepo, jwakwa mundu alinjile kabhili, kwaabhuya shindu. 35 Bhai a Yesu bhali nkujiganya ku Likanisha, gubhabhusiye, "Pakuti bhaajiganya bha Shalia bhakutinji, a Kilishitu Bhana bhahho a Daudi? 36 Na a Daudi bhayene, bhakagumbayweje na mbumu jwa ukonjelo gubhashite, 'Bhakulungwa, bhashinkwalugulila Bhakulungwa bhangu. Ntame nkono gwangu gwa kunnilo, Mpaka pushinaabhikanje ashaamagongo ajenu, pa libhatila makongono genu.'" 37 "A Daudi bhayene bhanakwashema a Kilishitu Bhakulungwa. Bhai ikomboleka bhuli, a Kilishitu kubha bhana bhahho?" Na bhandu bhahagwinji, bhatendaga kwaapilikanishiyanga kwa nonyelwa. 38 A Yesu mmajiganyo gabho gubhashite, "Mwiteiganje na bhaajiganya bha shalia, bhapita timbililanga mmashoko, bhali bhawetenje kanshu yabhonji yaileu, nkupinga bhakomaywanje kwa ishima na bhandunji, 39 bhatamangana mwitengu ya mmujo, ya nshinagogi na nkalamu. 40 Bhanapokonyolanga indu ya bhanabhakongwe bhashitenga, akuno bhalikwitembanga kujuga kwa malobhe gamagwinji! Bhenebho shibhajiye ukumulwanga kwa mboteko ya kaje." 41 Bhai a Yesu bhashinkutama tome na shibhiko sha ekalu. Bhatenda kwaaloesheyanga bhandunji, pubhatagangaga mmbiya nshibhiko. Matajili bhahagwinji gubhatajilenje mmbiya yaigwinji. 42 Bhai gubhaishe bhakongwe bhamo bhashitenga bhalaga, gubhatajile shilingi ibhili. 43 Penepo a Yesu gubhaashemilenje bhaajiganywa bhahho, gubhaalugulilenje, "Kweli ngunakummalanjilanga, bhakongwe bhashitenga bhaalagabha, bhashitaga kupunda bhananji bhowe nshibhiko sha Likanisha. 44 Pabha bhananji bhowe ibhatajilenje ipundile ya indu yabhonji, ikabheje bhakongwebha, nkali nkulaga

kwabhomu, bhashitaga yowe ibhakwete, bhashitaga nkali ibhakulupailaga.”

13 Bhai a Yesu pubhakopokaga ku Likanisha, bhaajiganywa bhambho bhama gubhaalugulile, “Mmaajiganya, nnole oti gene magangana shigashitebha gamakulungwa, na majumbaga shigashitebha gamakulungwa!” **2** A Yesu gubhaajangwile, “Kwali nnikugabhona gene majumba shigashitebha gamakulungwa? Lyakwa liganga shililepeshe pantundu liganga lina, linabhomolwe.” **3** Na a Yesu pubhaatemi ku shitumbi sha Misheituni, kuloya ku Likanisha, a Petili na a Yakobho na a Yowana na a Ndeleya gubhaabhushiyenje kujika, **4** “Ntubhalanjile, genega pushigakoposhele shakani? Na gabhandishilaga kukoposhela, shilangulo shakwe shishibhe nndi?” **5** A Yesu gubhatandwibhe kwabhaalanjilanga, “Mwiiteiganje, munda anantembanje. **6** Pabha bhandunji bhahagwinji shibhaikangananje kwa lina lyangu, bhalikwitayanga kuti bhenebho ni nne! Nabhalabhonji shibhaobhyanje bhandu bhahagwinjinji. **7** Bhai pushimpilikananje ngani ja ngondo na ntenga kopoka kungondo, nnajogopanje pabha genego ganapinjikwa gakoposheleti. Ikabheje mpelo uyene ukaika shangu. **8** Pabha shilambo shimo shishikomane na shilambo shina na upalume gumo shigukomane na upalume guna, shigapagwe maungumilo ga litaka mulambo na shishikoposhele shibhanga shapunda. Genego shigabhe malinga kutandubha kupoteka kwa shitumbo nkwigopola mwana. **9** “Ikabheje mmanganyanji mwiiteiganje. Pabha shibhankamulanje kumpelekanga nngumbi ya bhanangulungwa bha nnyumba ya jujila Nnungu nikunkomanga. Numbe shimpelekwanje kubhakulungwanji ga ligongo lyangu nne, nkupinga ubhe ukong'ondelo gwabhonji. **10** Ikabheje shikulungolele oti kulunguywa kwa Ngani ja Mbone kubhandu bhowe, mpelo gula ukanabheika. **11** Kwa nneyo pushibhankamulanje nikunshitakiyanga, nnaganishiyanjeti ga bheleketa, ikabheje mmeleketaanje lilobhe lyolyowe shilinjilanje malanga gogo pego, pabha nngabha mmanganyanji shimmeleketaanje, ikabhe Mbumu jwa Ukonjelo. **12** Pabha jwannung'una shantendebhushe nkulugwe abhulagwe, ainamundu shibhantendebhushe mwanagwabho, nkali bhana shibhaatendebhukanje bhaakwetenje kupinga bhahulagwanje. **13** Bhandu bhowe shibhanshimanje ligongo lya lina lyangu. Ikabheje shaipililele mpaka kumpelo, jwenejo nishatapulwe.” **14** Bhai mundu ashoma shene shitabhu shino, anapinjikwa apilikanihiye ukoto malombolelo ge malobhe gakiwiyaga. A Yesu gubhapundile bheleketa, “Penepo shinshibhonianje shindu shibhabhelenje a Daniel a nkulondola bha a Nnungu ga shindu sha nnjimwa ja shonanga, shijimi pakapinjikwa, bhai, bhalinginji ku Yudea bhahutushilanje mwitumbi. **15** Ali pashitubhili anatulushe pai, nijinjila nnyumba kutola nngubho yakwe. **16** Najwalakwe ali kunngunda anabhujje nnyuma kutola indu yakwe. **17** Ikabheje mboteko yabhonji bhanabhakongwe bhakwetenje ndumbo na bhaajonjeyanga gene mobhago! **18** Ikabheje njuganje genego ganakoposhele mobha ga shipwepwe. **19** Pabha gene mobhago shipinga koposhela shilaje shikulungwa, shikanabhe koposhela tandubhila

kupanganywa kwa shilambolyo mpaka nnaino na wala shikakoposhela kabhili. **20** Kaliji Bhakulungwa bhakanaupikaye gwinji gwa gene mobhago, jwakwa mundu akatapwilwe. Ikabheje kwa ligongo lya bhaagwilwenje, bhashikugapunguya gene mobhago. **21** “Penepo mundu alugulaga, ‘Nnole, a Kilishitu kubhali akuno’ eu ‘Kubhali akula,’ nnakulupailanje. **22** Pabha shibhakoposhelanje ashi kilishitu bha unami, na ashinkulondola bha unami, shibhatendanje ilangulo na ilapo, nkupinga itendekaga bhaapuganyanje nkali bhaagwilwenje bha a Nnungu. **23** Ikabheje mmanganyanji mwiiteiganje. Pabha nimmalanjilenje gowe gakanabhe koposhela. **24** “Bhai gene mobhago shipitaga shilajesho, lyubha shilitajwe luhindu na lwei lukalangaya. **25** Ndongwa shiigwe, na mashili ga kuliunde shigatenganyishe. **26** Penepo shibhamonanje Mwana juka Mundu ngulikwiya, kukoposhela kuliunde na mashili gamagwinji na Ukonjelo. **27** Penepo shinaatumanje ashimalaika bha a Nnungu, pita kwatolanga bhaagwilwenje, kopoka mmbali nsheshe ya shilambolyo, kukoposhela mpelo gumo gwa shilambolyo mpaka mpelo gwa liunde. **28** “Mwiiganyanje kwa lutango lwa ntini, lujambi lwake puluipuya maamba gaambi, nnakumumanyanga kuti shuku shibhandishile. **29** Nneyo peyo na mmanganyanji, pushingabhonanje genego galikoposhela, mmumanyanje kuti nne Mwana juka Mundu puni pannango. **30** Kweli ngunakummalanjilanga, alu lubhelekolu lukamala, gakanabhe koposhela gene gowega. **31** Kunnungu na shilambolyo shiipite, ikabheje malobhe gangu gakapita. **32** “Ikabheje ga lyene lyubhalyo na malanga gakwe jwakwa mundu akugamanya, nkali ashimalaika bha kunnungu, wala Mwana, ikabhe Atati jikape. **33** Mwiiteiganje na sheya, pabha nkakugamanyanga malanga pushigakoposhele genego. **34** Pushiibhe malinga mundu ajabhula mwanja, akuno alikwaaleshelanga bhatumwa bhakwe kila mundu na liengo lyakwe, nikunnajila nkulinda asheye. **35** Bhai nsheyanje nnijuga Nnungu, pabha nkakumumanyanga shakani pushibhabhujje bhayene nyumba, monaga shiibhe ligulo, eu pakati shilo, eu malanga ga kongobhela lipongo, eu lyamba, **36** ibhaga shibhaishe kwaimushila, bhanang'imananje nngonilenje. **37** Lyene lingummalanjilanga mmanganyanji, ngunakwabhaalanjilanga bhowe. Nsheyanje!”

14 Gali galepeshe mobha gabhilipe kuishila lyubha lya Shikukuu ja Pashaka na Shikukuu ja Mikate Jangatagwa Ngedule. Bhakulungwanji bhaabhisila na bhaajiganya bha Shalia ya a Musha gubhaloleyenje shumilo sha unami sha kwaakumulila a Yesu bhaabhaluganje. **2** Ikabheje gubhashitenje, “Tunaakamule lyubha lya shikukuu, inakoposhela nnjasha.” **3** Bhai a Yesu bhali ku Bhetania, kungwabho a Shimoni bhalwalile mangundula, bhali bhatemi nkulya, gubhaishe bhakongwe bhama bhajigele shupa sha mauta ga nunjila ga nado, shialewe kwa liganga lya alabhashita, gubhakaile shupa shila, nikwakushulila a Yesu mauta ga nunjila gala muntwe. **4** Bhandunji bhana bhalinginji pepala guyaashimilenje, gubhabhalanjilenenje, “Kwa nndi bhanajonanga mautaga? **5** Gakaushiywe, nipata mmbiya ya mbuti nshaala gwa shaka shimo uka mundu, nikwapanganga bhaalaga!” Gubhaakalipilenje bhakongwe bhala. **6** Ikabheje a Yesu gubhaalugulilenje,

"Mwaalekanje, kwa ndi nnaakwaabhuyanga? Shibandendeleshi shambone. 7 Pabha bhalaga nmatama nabhonji mobha gowe, mpingangaga kwa malanga gogowe, shimwaatendelanj ya mmbone. Ikabheje nne ngatama na mmanganyanji mobha gowe. 8 Bhenebha bhashitenda shibhakombwele, bhashimbakaya mauta shiilu shangu kwa ligongo lya shikwa. 9 Kweli ngunakummalanjilanga kuti, popowe pashilambolyo pushibhalunguyanje Ngani Jambone, lyene libhatendile bhene bhakongwebha, shiitaywe nkwaakumbushila." 10 Kungai a Yuda Ishikalote, bhomo bha munkumbi gwa bhaajiganywa likumi limo na bhabhili bhala, gubhapite ku bhakulungwanji bhaabhisila nkupinga kwaatendebhuka a Yeshu. 11 Bhakulungwanji bhaabhisila bhakapilikananje genego, guyaanonyelenje, gubhakundilenje kwapa mmbiya. Bhai a Yuda gubhaloleye malanga gammbone ga kwaatendebhuka a Yeshu. 12 Lyubha lya tandubha Shikukuu ja Mikate Jangatagwa Ngedule, malanga ga ingwa mwana ngondolo jwa Pashaka, bhaajiganywa bhabho gubhaabhushiyenje, "Kunkupinga lila kwei shalya sha Pashaka takakolokoye?" 13 Bhai a Yeshu gubhaatumilenje bhaajiganywa bhabho bhabhili, bhaliikalugulilanga, "Njendangananje kunjini, kweneko shing'imananje na bhandu bhomo bhajigele lulo lwa mashi, mwaakagulanje, 14 mpaka nyumba jishibhainjile, mwenemo nkaabhalanjilanje bhayene nyumba kuti, 'Bhaajiganya bhanabhuya, jili kwei kati jajikulungwa ja bhajeninji, pushindame nne na bhaajiganywa bhangu nkulya Pashaka?' 15 Nabhalabho shibhannanguyanje kati jajikulungwa kunani jibhishilwe ukoto. Mwenemo nkolokoyanje shalya shetu." 16 Bhai bhaajiganywa bhala gubhapitengenene kunjini, gubhakongenene gowe malinga shibhabhalanjilwenje na a Yeshu. Gubhakolokoyenje shalya sha Pashaka. 17 Bhai likaisheje ligulo, gubhaikengenene a Yeshu na bhaajiganywa bhabho likumi limo na bhabhili. 18 Na bhalabhonji bhalinginji bhaliyanganga, a Yeshu gubhashite, "Kweli ngunakunnugulilanga, jumo jwenunji alya na nne, shandendebhushe." 19 Penepo bhaajiganywa bhala gubhatandwibhenje kuinjika, jumo jumo gubhaabhushiyenje a Yeshu, "Bhuli nne?" 20 A Yeshu gubhaalugulilenje, "Jumo munkumbi gwenunji mmanganya, likumi limo na bhabhili, jwene apamba munkungu na nne. 21 Pabha nne Mwana juka Mundu shiniwile malinga shinyandishilwe Mmajandiko ga Ukonjelo, ikabheje mboteko yakwe, jwene mundu apinga ndendebhuka nne Mwana juka Mundu. Kaliji mbaya akanabheleke jwene mundujo." 22 Nabhalabhonji pubhalinginji nkulya, a Yeshu gubhatolile nkate, gubhatendile eja kwa a Nnungu, gubhagebhenye nikwaapanganga bhaajiganywa bhabho bhalinkuti, "Ntolanje, sheshino shiilu shangu." 23 Kungai gubhatolile nngabho, gubhatendile eja kwa a Nnungu, gubhaapelenje bhowe, gubhalepeyenenje. 24 Gubhaalugulilenje, "Jejino minyai jangu, jikong'ondela malagano, jijitika kwa ligongo lya bhandu bhaleshelelwanje yambi yabhonji na a Nnungu. 25 Kweli ngunakummalanjilanga, ngapapila kabhili divai ja shabhibhu mpaka lyubha pushimbapile divai jaambi mu Upalume gwa a Nnungu." 26 Bhakajimbanjeje lwimbo, nigubhajabhulengenene kwenda kushitumbi sha Misheituni. 27 A Yeshu gubhaalugulilenje bhaajiganywa bhabho, "Mmowe shinngananje nineka. Pabha ishiwandikwa Mmajandiko ga

Ukonjelo 'Shininkome nkushunga, na ngondolo shiipwilingane.' 28 Ikabheje nyuywaga, shininnongolelanje kwenda ku Gallilaya." 29 A Petili gubhaalugulile, "Nkali bhowe bhannekangaga, nne nganneka!" 30 A Yeshu gubhaajangwile a Petili, "Kweli ngunakummalanjila, shilo sha lelo, lipongo likanabhe kongobhela pabhili, shinngane patatu." 31 Ikabheje a Petili gubhapundile bheleketa, "Nkali ipinjikwaga kuwa na mmwe, ngu, nganneka." Bhaajiganywa bhowe gubhabheleketenje nneyo peyo. 32 Bhai gubhaikengenene kushitalu shishemwa Getishemana. Na a Yeshu gubhaalugulilenje bhaajiganywa bhabho, "Ntamangananje apano, nne nguli juga Nnungu." 33 Kungai gubhaatolile a Petili na a Yakobho na a Yowana, a Yeshu gubhatandwibhe kuinjika na tenguka kaje. 34 Gubhaalugulilenje bhaajiganywa bhala, "Ntima gwangu unainjika tome nawa. Ntamangananje apano nsheyanje." 35 Gubhapite mmujo kashoko, gubhagwile, gubhajujile bhalinkuti, "Ibhaga inakomboleka, bhai malanga ga mbotekoga gang'embushe." 36 Gubhashite, "Atati, kwenu mmwe yowe inakomboleka. Mpingaga, nng'embuye na gene malanga ga mbotekoga, ikabheje nngabha malinga shingupinga nne, ikabhe malinga shinkupinga mmwe." 37 Bhai gubhabhujile, gubhaakongenene bhagonilenje lugono. Gubhaabhushiyene a Petili, "Bhuli a Shimoni! Nshigona? Mwangakombola kusheya kapela lishaa limo?" 38 Kungai gubhaalugulilenje, "Nsheyanje nnijuganga, nkupinga nnajinjilangane mmalinjilo. Ntima ulipinga, ikabheje shiilu shangali mashili." 39 Gubhapite juga kabhili bhalibhujila malobhe gala pegala. 40 Kungai gubhabhujile kabhili, gubhaaimenenje bhaajiganywa bhagonilenje, pabha meyo gabhonji gashinkutopelwa na lugono, wala bhangakombolanga kwaajangula. 41 Bhakaishilanje gwatatu, gubhaalugulilenje, "Launo nnagonanga na pumullila? Nnaino itogolele! Malanga gaishe, nne Mwana juka Mundu kukamuywa mmakon ga bhandu bhakwetenje yambi. 42 Nnjumukanje, tujabhule, nnolanje andendebhuka jula abhandishile." 43 Bhai a Yeshu pubhaliji nkubheleketa genego, shangupe gubhaishe a Yuda bhaaliji munkumbi gwa bhaajiganywa likumi limo na bhabhili bhala, bhali bhalongene na likundi lya bhandunji bhajigelenje mapanga na ndonga, bhalikoposhelanga ku bhakulungwanji bhaabhisila na bhaajiganya bha Shalia ja a Musha na bhanangulungwa. 44 Bhene bhaatendebhwishe a Yeshu, bhashinkwaapanganga bhandunji bhala shilangulo, bhalinkuti, "Bhene bhushinaajambatebho, mwaakamulanje mwaabhanje muulinda." 45 Bhai shangupe a Yuda gubhaishe, gubhaajendele a Yeshu, gubhashite, "Mmajiganya!" Nigubhaajambete. 46 Bhai bhandunji bhala gubhaakamwilenje a Yeshu nikwaatabha. 47 Jumo munkumbi gwa bhajimingene pamo na a Yeshu bhala, gwaolomwele upanga, gwaleshele nikunkata likutu ntumwa jwa Bhakulungwa Bhaabhisila. 48 A Yeshu gubhaabhushiyenje bhandunji bhala, "Nshinyilanga na mapanga na ndonga kungamula mbuti ngwi? 49 Mobha gowe punaliji na mmanganya kunyumba ja a Nnungu nilijiganya, mwangamulanga. Ikabheje nnaino ganakoposhela genega nkupinga gamalile Majandiko ga Ukonjelo." 50 Penepo bhaajiganywa bhowe gubhabhutukenje nikwaaleka a Yeshu. 51 Ashinkupagwa nshanda jumo abhakagulaga a Yeshu ali aiunishile nngubho jimope ja kitani, bhai gubhalinjilenje kunkamula. 52 Ikabheje gwaleshile nngubho

jila, gwabhwutwische makonope. 53 Bhai gubhaapelekenje a Yesu kubhakulungwanji bhaabhisshila, kweneke gubhaimenenje bhakulungwanji bhaabhisshila bhowe, na bhanangulungwa, na bhaajiganya bha Shalia ya a Musha. 54 A Petili gubhaakagwile a Yesu kwataliya, gubhajinjile nnugwani lwa Bhakulungwa Bhaabhisshila, gubhatemi pamo na bhalinda bhalijota moto. 55 Bhai bhakulungwanji bhaabhisshila na bhalukumbi bhowe bha Lukumbi Lukulu lwa Bhayaudi, gubhaloleyenje shiumilo sha kwa bhulajila a Yesu. Ikabheje bhangashipatanga. 56 Bhandu bhabhagwinji gubhakong'ondelenje ya unami, ikabheje ukong'ondelo gwabhonji gwangalandana. 57 Na bhananji gubhakong'ondelenje ya unami bhalinkutinji, 58 "Twashinkwaapilikana bhenebha bhalinkuti, 'Nne shimomole Liekalu lishenjilwe na bhanduli, nishenga lina kwa mobha gatatu, nngabha na makono.'" 59 Ikabheje nkali nneyo, ukong'ondelo gwabhonji gwangalandana. 60 Bhai penepo Bhakulungwa Bhaabhisshila gubhajimi pakati pakati jabhonji gubhaabhushiye a Yesu, bhalinkuti, "Bhuli, nkajangula shindu? Bhandunjibha bhakunkong'ondelanga nndi?" 61 Ikabheje bhenebho gubhatemi ilili, bhangajangula shindu. Bhakulungwa Bhaabhisshila gubhaabhushiye kabhili, "Bhuli mmwe ni a Kilishitu, Bhana bhabho a Nnungu bha Ukonjelo?" 62 A Yesu gubhajangwile, "Elo! Ni nne. Numbe shimmonanje nne Mwana juka Mundu ndemi nkono nnilo gwa Bhakulungwa bhakwete mashili, ngulikwiya mmaunde ga kunnungu." 63 Penepo Bhakulungwa Bhaabhisshila gubhapapwile nngubho yabho, bhalinkuti, "Tupinjila nndi bhaakong'ondela bhana? 64 Mpiikenenje matukano gabho! Bhai mmanganyanji nktinji bhuli?" Bhowe gubhapetenenje kuti, bhabhulagwe. 65 Bhai bhananji gubhatandwibhenje kwaunilanga mata, gubhaaunishilenje kumeyo, nikwaakomanga akuno bhalikwabhuwanga, "Nnondole, gani ankomile!" Na bhalinda gubhaakomilenje mapapa. 66 Bhai a Petili bhali nnugwani mula, ntumishi jumo jwankongwe jwa Bhakulungwa Bhaabhisshila gwaisho, 67 akaabhoneje a Petili bhalijota moto, gwabhalolile nigwashite, "Nkali mmwe, pumwaaliji pamo na a Yesu Bhanashaleti." 68 Ikabheje a Petili gubhakanile bhalinkuti, "Ngakushimanya shinkubheleketasho!" Kungai a Petili gubhakopweshe palanga lugwani. Penepo lipongo gwakongobhele. 69 Jwankongwe jula akaabhoneje a Petili kabhili, gwabhalugulilenje bhandunji bhalinginji penepo, "Bhene bhandubha, bha munkumbi gwabhonji." 70 A Petili gubhakanile kabhili. Bhandunji bhatemingenenje pepala, gubhaalugulilenje a Petili, "Nngabha unami, mmwe nkumbi gumo, pabha mmwe mmandu bha ku Galilaya." 71 Ikabheje a Petili gubhatandwibhe kulosha na lumbila, "Ngakwamanya bhene bhandu bhunkwalugulangabha." 72 Penepo lipongo gwakongobhele gwabhili. Bhai a Petili gubhakumbushile malobhe gubhalugulilwe na a Yesu kuti, "Lipongo likanabhe kongobhela pabhili, shingane patatu." A Petili gubhatengwische niguta.

15 Lyambape, bhakulungwanji bhaabhisshila, na bha lukumbi bhowe bha Lukumbi Lukulu lwa Bhayaudi, na bhanangulungwa, na bhaajiganya bha Shalia ya a Musha, gubhapetenenje. Nigubhaatabhilenje a Yesu, gubhaapelekenje kwa a Pilato. 2 A Pilato gubhaabhushiye a Yesu, "Bhuli mmwe

A mpalume bha Bhayaudi?" A Yesu gubhaajangwile, "Elo, malinga shinkubheleketeta." 3 Bhakulungwanji bhaabhisshila, gubhaashitakiyenje a Yesu kwa indu yaigwinji. 4 A Pilato gubhaabhushiye a Yesu kabhili, "Bhuli nkaajangula shindu? Nnole indu yaigwinji ibhakunnugulangai." 5 Ikabheje a Yesu bhangajangula shindu kabhili, a Pilato gubhakanganigwe. 6 Mobha ga shikukuu, a Pilato bhashinkukola nkubho gwa kwaugulilanga bhandu nkutabhwa jumo, jubhakumpinganga. 7 Penepo ashinkupagwa nkutabhwa jumo, ashemwaga a Bhalabha, atabhilwe pamo na ajakwenji kwa ligongo lya nnjasha yabhuleje bhandu. 8 Lugwinjili lwa bhandu gulwaajendelenje a Pilato, nikwaajuga bhatendelanje malinga nkubho gwabho. 9 A Pilato gubhaabhushiyenje, "Bhuli nnipinganga ninng'ugulilanje A mpalume bha Bhayaudi?" 10 Bhashinkubheleketeta nneyo, pabha bhamumanyi kuti bhakulungwanji bhaabhisshila, bhashikwaakamuyanga a Yesu mmakono gabho, kwa ligongo lya lupimililo. 11 Ikabheje bhakulungwanji bhaabhisshila gubhaakwishiyenje bhandunji kuti, bhaajuganje a Pilato mbaya bhaaugulilanje a Bhalabha. 12 A Pilato gubhaabhushiyenje kabhili, "Bhai nkupinganga naatende nndi, bhene bhunkwaashemanga a mpalume bha Bhayaudi?" 13 Bhandu bhowe gubhautiyenje lilobhe bhalinkutinji, "Mwaakomele munshalabha!" 14 A Pilato gubhabhushiye, "Bhalebhile nndi?" Ikabheje bhandunji bhala gubhautiyenje lilobhe, "Mwaabhambe munshalabha!" 15 Bhai a Pilato nkupinga kulunonyeya lugwinjili lwa bhandu lula, gubhaaugulilenje a Bhalabha. Gubhalajile a Yesu bhakomwe ibhoko, gubhaakamwiyenje bhaakomelanje munshalabha. 16 Nabhalabhonji bhalinda, gubhaapelekenje a Yesu nkati lugwani, nk ndamo ja a mpalume kwashemwaga Plaitolio, gubhaashemilenje likundi lyowe lya bhalinda. 17 Gubhaawashiyenje a Yesu lijoo lya nnangali, gubhaeleyenje ingwa ja mibha, gubhaawashienje muntwe. 18 Penepo gubhatandwibhenje kwaakomaya kwa mbenji bhalinkutinji, "Tunakunkomaya A mpalume bha Bhayaudi!" 19 Gubhaakomilenje na nnai muntwe, gubhaaunilenje mata, gubhaatindibhalilenje kwa mbenji. 20 Bhakaatendelanje mbenji, gubhaaulilenje nngubho ja shambalau jila, nikwaawasha nngubho yabho, gubhaakopoyenje nikwaapeleka kunyenje shilambo, kukwaabhamba munshalabha. 21 Bhandu bhamo bha ku Kilene, lina iyabho a Shimoni, ainabhabhonji a Alekishanda na a Lupo, bhatendaga pita mpanda bhalikoposhela kunnungunda. Bhai gubhaashishilishiyenje kujamula nshalabha gwa a Yesu. 22 Gubhaapelekenje a Yesu mpaka pashemwaga Goligota, malombolelo gakwe, Shihanga sha Ntwe. 23 Gubhaapelenje divai jiengenywe na ntela gwa litindili ushemwa manemane, ikabheje bhangaposhela. 24 Gubhaakomelenje munshalabha, gubhagebhenyenje nngubho yabho, gubhatendilenje shikoma, kuti gani shaapate jeneji. 25 Bhai, pugaaliji malanga ga shaa tatu ja iyamba pubhaabhambilenje munshalabha. 26 Na gubhabhishilenje mmbila ja kwaalugula, jijandikwe kuti, "A MPALUME BHA BHAYAUDI." 27 Pamo na a Yesu, bhashikunkubhambwanga bhaapokonyola bhabhili, jumo kunkono gwabho gwa nnilo na juna kunkono nshinda. 28 Bhai penepo, gugamalile majandiko ga a Nnungu galugula kuti, "Gubhabhishilwe nkumbi gumo na bhaalebhangana." 29 Bhai

bhandunji bhapitanganaga gwene mpandaga, nikwaabhonanga a Yeshu bhali bhabhambilwe munshalabha, gubhaatukenenje akuno bhalitikinyanga mitwe jabhonji bhalinkutinji, "Ayaga! Mmwe nkukombola kubhomola Liekalu nishenga lina kwa mobha gatatu! 30 Bhai nnaino mweitapule mmayene, ntulushe munshalabhamo!" 31 Nneyo peyo bhakulungwanji bhaabhisila na bhaajiganya bha Shalia ya a Musha, gubhaatendenje mbenji bhalibhalingananga, "Bhashitapula bhananji, ikabheje bhayene bhakaakombola kwiitapula! 32 Nkali bhene bhakomelwenje mmishalabha pamo na a Yeshu bhala, gubhaatukenenje bhalinkutinji, a Kilishitu, A mpalume bha bha Ishilaeli, nnaino bhatulushe munshalabha tulole, tukulupalile." 33 Tandubhila malanga ga shaa shita mpaka shaa tisha, lubhindu gulutotile shilambo showe. 34 Malanga ga shaa tisha, a Yeshu gubhautiye lilobhe bhalinkuti, "Eloi, Eloi, lama shabhakitani?" Malombolelo gakwe, "A Nnungu bhangu, a Nnungu bhangu, pakuti nshineka?" 35 Bhai bhandu bhananji bhajimengenenje penepo gubhashitenje, "Mpilikananje, bhanakwaashema a Eliya." 36 Mundu jumo gwabhwitwisha kutola shiponji, nilobheka nnjashama, nitabhila munnai, nikwaapa a Yeshu bhayonde akuno alinkuti, "Nnekanje, tulole monaga shibhaishe a Eliya kukwatuluya munshalabha." 37 Penepo a Yeshu gubhautiye lilobhe, gubhawile. 38 Bhai lipanshia likulungwa lya Nlikanisha gulipapwisha ikanje ibhili kumila kunani mpaka pai. 39 Bhai bhakulungwa bha manjola bhaajimi penepo bhalikwalesheya a Yeshu, bhakabheneje bhaliwa shana nneyo, gubhashite, "Kweli, abha bhandubha pubhaliji Bhana bhabho a Nnungu." 40 Bhai bhashinkupagwanga bhanabhakongwe bhalolanganga bhalinginji kwataliya, munkumbi gwabhonji bhapali a Malia Magidalena, na a Malia anyinabhabhonji a Yakobho, apwabho a Yoshe, na a Shalome. 41 Bhenebha ni bhalongenenje na a Yeshu ku Galilaya nibhaatumishilangaga, numbe bhapalinji bhanabhakongwe bhana bhabhagwinji, bhaikengenenje na a Yeshu ku Yelushalemu. 42 Ikaishileje ligulo, pabha pulyaaliji lyubha lya kolokoya indu ya Lyubha lya Pumulila. 43 A Yoshepu, bhandu bha ku Alimataya bha ishimika bha munkumbi gwa Bhalukumbi Lukulu lwa Bhayaudi, na bhalabho bhatenda lolela kuika kwa Upalume gwa a Nnungu. Bhai gubhailumile ntima, gubhaajendele a Pilato, gubhaajujile shiilu sha a Yeshu. 44 Ikabheje a Pilato gubhakanganigwe bhakapilikaneje kuti a Yeshu bhawile. Bhai gubhaashemile bhakulungwa bha manjola bhala, gubhaabhushiye monaga a Yeshu bhawile. 45 A Pilato bhakapilikaneje kubhakulungwa bha manjola bhala kuti a Yeshu bhawile, gubhaapele a Yoshepu shiilu shila. 46 Bhai a Yoshepu gubhaumile shanda ja nngubho ja alili, gubhatulwiye shiilu shila pai, gubhailijile shanda. Gubhaashishile nnikabhuli lyaokwelwe nnganga likulungwa, gubhaingilishiye liganga likulungwa kuibhila pannango gwake. 47 Bhai numbe a Malia Magidalena, na a Malia anyinabhabho a Yoshe, gubhapawenenji pubhashishilwe a Yeshu.

16 Likapiteje Lyubha lya Pumulila, a Malia Magidalena, na a Malia anyinabhabhonji a Yakobho, na a Shalome, gubhaumilenje mauta ga nunjila, nkupinga bhakapakanje shiilu sha a Yeshu. 2 Bhai lyubha lya tandubha jene juma jila, lyamba lyubha likatandubheje kukopoka, gubhapitengenenje

kulikabhuli. 3 Bhalinginji mumpanda gubhabhuyenenje, "Gani shaatunokolele kunyenje, liganga likulungwa liibhilwe pannango gwa likabhuli lila?" 4 Ikabheje bhakalolanjeje, gubhalibhweninji liganga lila linokolelwe kunyenje, na pulyaaliji lyalikulungwa kaje. 5 Bhakajinjilanjeje nnikabhuli, gubhammweninji nshanda atemi nkono gwa nnilo, awete ngubho janawe jajileu, gubhaimukenje kaje. 6 Penepo nshanda jula gwabhahbalanjilenje, "Nnaimukanje, a Yeshu Bhanashaleti bhunkwaloleyangabho, bhayushile, apano bhakwa, nnolanje pubhaagonekenje. 7 Nnaino, nnjendangananje nkaabhalanjilanje bhaajiganya bhabho, na a Petili kuti, bhanakunnongolelaga ku Galilaya. Kweneko shimwaabhonanje malinga shibhammalanjilenje." 8 Bhai, gubhakopkengenenje nnikabhuli mula shibhutuka, bhaliungumilanga nkujogopa akuno bhalikanganigwanga. Bhangammalanjilanga shindu mundu jojowe, pabha bhashinkujogopanga kwa kaje. Gubhapite kwaalugulilanga a Petili. 9 (note: **The most reliable and earliest manuscripts do not include Mark 16:9-20.**) A Yeshu bhakayusheje, lyambape lyubha lya tandubha juma, gubhatandwibhe kwaakoposhela a Malia Magidalena, bhaashoshiye maoka shabha gangali ga mmbone. 10 A Malia bha ku Magidala gubhapite kwaabhalanjilanga bhalonganangaga na a Yeshu, bhalinginji nkwigutanjila. 11 Ikabheje bhowe bhapiilikenje kuti a Yeshu bhabhakoto, numbe a Malia bha ku Magidala bhaaweni, bhangakulupailanga. 12 Gakapiteje malanga gashoko, a Yeshu gubhaakoposhelenje bhaajiganywa bhabhili, bhaliibhoneka shinape. Bhaajiganywa bhala pubhalinginji mmwanja gwa mwijiji. 13 Nabhalabhonji gubhapitengenenje kukwabhalanjilanga ashaajabhonji bhalepekenje. Nkali bhanganyabho bhangaakulupailanga. 14 Kungai a Yeshu gubhaakoposhelenje bhaajiganywa likumi limo na jumo bhala bhaliyanganga. Kungai gubhaakalipilenje kwa ligongo lya ngakulupalila na kunonopa mitima kwabhonji, pabha bhangaakulupailanga bhaabhwinenji bhakayusheje bhala. 15 Bhai, gubhaalugulilenje, "Njendangananje nshilambolyo nkalungyanje Ngani ja Mmbone kubhandu bhowe. 16 Shaakulupalile nibhatishwajo shatapulwe, ikabheje bhangakulupailanga, shibhaukumulwanje. 17 Na yene ilanguloi shiibhe na bhene bhaakulupailangabho, shibhashoyanje maoka kwa lina lyangu, shibhabheleketanje shibheleketi sha ambi. 18 Bhakumulangaga majoka ene bhang'wanganaga shindu sha bhulaga, shikaabhanganga. Shibhaabhisilanje makono bhalwelenji na shibhalamanje." 19 Bhai, Bhakulungwa a Yeshu bhakamaliyeje kubheleketi nabhonji, gubhanyakwilwe kunani Kunnungu, gubhatemi kunkono nnilo gwa a Nnungu. 20 Bhaajiganywa bhala gubhapitengenenje mmbali yowe kuulunguya, Bhakulungwa gubhakamwile liengo kupitila bhanganyabho, na gubhakong'ondele lilobhe lyabho kwa ilangulo yabhonekaga nkulunguya kwabhonji.

Luka

1 Bhandu bhabhagwinjini bhashilajililanga kujandika ukoto ngani ja indu yatendekaga munkumbi gwetu. **2** Bhashinkujandikanga malinga shitwatagulilwe na bhandunji bhagabhweninji pugatendekaga, kuumila kundandubho na bhalunguyangaga lilobhe lya a Nnungu. **3** Kwa nneyo, mmakulungwa a Teopili, numbe nne ngakagulileje ukoto yowe kuumila kundandubho, nijibhona inapwaa ninnjandishile shiyashite tendeka, **4** nkupinga na mmwe muumanye ukweli gwa yowe innjigenywe ila. **5** Mobha ga upalume gwa a Elode ku Yudea, bhashinkupagwa bhaabhisila bhamo lina lyabho a Shakalia, bha likundi lya a Abhiya. Akongobhabho pubhashemwaga a Lishabheti bha shipinga sha a Aluni, bhakulungwa bhaabhisila. **6** Bhowe bhanaabhili bhashinkubhanganga bhandunji bha aki kwa a Nnungu, bhalikagulilanga amuli na malajilo ga Bhakulungwa gwangali kugambwa. **7** Ikabheje bhakakwetenjeje bhana, pabha a Lishabheti pubhaaliji nannii na bhanaabhili pubhalinginji bhakongopanji kaje. **8** Lyubha limo lya nimbua gwa liengo lya bhishila gwa a Shakalia nniekalu, **9** malinga shigwaliji nkubho gwabhonji, a Shakalia bhashinkuagulwa kwa shikoma, bhajinjile nniekalu bhakatutumye lubhani. **10** Akuno lugwinjili lowe lwa bhandu pubhalinginji palanga bhalikwaajuganga a Nnungu, malanga ga tutumya lubhani. **11** Malaika jwa Bhakulungwa akwaakoposhelaga, gwabhajimile nkono niilo gwa shitala sha tutumishiya lubhani. **12** A Shakalia bhakammoneje malaika jwa a Nnungu jula gubhatengwishe na jogopa. **13** Malaika jwa a Nnungu jula gwabhalugulile, "A Shakalia, nnajogope pabha kujuga kwenu kupilikenwe, na akongobhenu a Lishabheti, shibhankolele mwana jwannume, na mmwe shimunsheme lina lyakwe a Yowana." **14** "Mpinga kwiinonyela kwa kaje na bhandu bhabhagwinji bhapinga angaililanga kubhelekwa kwakwe. **15** Shabhe jwankulungwa pa meyo ga Bhakulungwa, akapinjikwa kung'wa togwa wala ukana, apinga gumbaywa Mbumu jwa Ukonjelo, kuumila nnutumbo lwa akwabhe. **16** Shaabhatendebhuyanje bha Ishilaeli bhabhagwinji bhabhujilanje Bhakulungwa a Nnungu bhabhonji. **17** Shaalongolele pa meyo ga Bhakulungwa alikomboywa na mbumu na mashili malinga a Eliya. Apinga lundanya mitima ja ashainamundu na bhana bhabhonji, apinga kwaatendanga bhakakwaakundanga a Nnungu kubha na ng'anyiya ya aki, nkupinga abhaalashiye Bhakulungwa bhandunji shibhabhanganje tayali kwaaposhela." **18** A Shakalia gubhammushiye malaika jula, "Yeneyo nne pushiniimanye bhuli? Nne nankongopa na akangu na bhalabho bhakongopele." **19** Malaika jwa a Nnungu gwabhalugulile, "Nne Gabhulielu, ntumishi nguujima pameyo ga a Nnungu, njitumwa kumelekete na mmwe, nintashiye jene ngani ja mmboneji. **20** Pabha mmangakulupalila gapinga koposhela kwa malanga gakwega, shimme bhuhhu, nkakombola kubheleketa mpaka lyubha pushigakoposhele gunimmanjilega." **21** Penepo bhandu bhaalindililangaga a Shakalia gubhakanganigwenje kwa nndi bhashikabhiya Nniekalu mula. **22** Bhakakoposheje palanga bhakakombweleje kubheleketa nabhonji. Gubhamumanyinji kuti ipali ibhaiweni Nniekalu mula. Ikabheje gubhapundile bheleketa

nabhonji kwa ilangulo ya makono, pabha bhashinkubha bhuhhu. **23** Nnimbua gwabho gwa liengo lya bhishila ukamaleje, a Shakaliya gubhabhujile kumui. **24** Pangakabhika a Lishabheti gubhajukwite shitumbo. Gubhatemi pamui miyei nng'ano. **25** Bhalinkuti, "Nnei ni shibhandendele Bhakulungwa bhakamoneje, bhashinjosheya oni jangu, jinakolaga pa meyo ga bhandunji." **26** Mwei gwa shita gwa shitumbo sha a Lishabheti, malaika jwa a Nnungu Gabhulielu ashinkutumwa na a Nnungu ajende ku Nashaleti ja ku Galilaya, **27** kwa a mwali bhaishana bhashemwaga a Malia, ntemela gwa a Yoshepu bha shipinga sha a Daudi. **28** Malaika jula gwabhajendele, nikwaabhalanjila, "Shalamu shenu mwala a Malia! Nshipegwa nema yaigwinji! Bhakulungwa pubhali na mmwe." **29** A Malia bhakapilikaneje gene malobhego gubhatengwishe kaje, nikwiibhuya sha muntima, shene shalamushi malombolelo gakwe nndi? **30** Malaika jula gwabhalugulile, "Nnajogope a Malia, pabha Bhakulungwa bhashikumpa nema. **31** Pilikana! Shinnjukute shitumbo, na shinkole mwana jwannume na munsheme lina lyakwe Yeshu. **32** Jwenejo apingabha jwankulungwa na shashemwe Mwana jwa bhali Kunani Kaje. Bhakulungwa a Nnungu shibhampe shitengu sha upalume sha anaigwa a Daudi. **33** Kwa nneyo shabhe Nkulungwa jwa shipinga sha a Yakobho pitipiti na upalume gwakwe ukakola mpelo." (aiōn g165) **34** A Malia gubhammushiye malaika, "Pushiitendeshe yeneyo bhuli, na nne niibhelele mwali nng'ishana nganabhe kummanya jwannume?" **35** Malaika jula gwajangwile, "Mbumu jwa Ukonjelo shannjiile na mashili ga Bhakulungwa a Nnungu shiganng'unishile mbuti shiwili, kwa nneyo, mwana shabhelekwejo, shashemwe jwa Ukonjelo, Mwana jwa a Nnungu. **36** Na mmumanye kuti nkali alongo ajenu a Lishabheti na ukongopa gwabho bhajukwite shitumbo sha mwana jwannume, aguno mwei gwabho gwa nng'ano na gumo kwa bhene bhamanyishe na bhandu kuti anannii. **37** Pabha shakwa shikaakomboleka kwa a Nnungu." **38** A Malia gubhashite, "Nne nantumwa jwa Bhakulungwa, ibhe malinga shiumalanjile." Bhai malaika jula gwajabhwile. **39** Gakapiteje malanga gashoko, a Malia gubhapite shangu ku shilambo shimo sha kuitumbi ya ku Yudea. **40** Kweneko gubhajinjile nnyumba ja a Shakalia, nikwaalamushila a Lishabheti. **41** A Lishabheti bhakapilikaneje lamushilwa na a Malia, shitumbo sha a Lishabheti shikutukulaga nkwiinonyela. Na bhalabho a Lishabheti Mbumu jwa Ukonjelo akwaagumbalaga, **42** nigubhabhelekete kwa lilobhe lya utiya, "Nshipegwa mboka kupunda bhanabhakongwe bhowe, na mwana junkupinga kunkolajo ashipegwa mboka. **43** Kwa bhuli nne njikywa nnei, nkali anyinamundu bha Bhakulungwa bhangu bhangu owele? **44** Nno! Ngapilikanejeje kulamushila kwenu, shitumbo shangu shikutukulaga nkwiinonyela. **45** Mbaya mmwe nkulupalile kuti yene immalanjilwe na Bhakulungwa ila shiitendeshe." **46** Na bhalabho a Malia gubhashite, "Ntima gwangu unakwaakuya Bhakulungwa, **47** Na mbumu yangu inakwiinonyela ligongo lya a Nnungu Bhaatapula bhangu. **48** Pabha bhashikuubhona ungakola mashili uka ntumishi jwabho. Kwa nneyo kuumila nnaino ibheleko yowe shibhanjemanje akwete mboka, **49** Pabha a Nnungu Bhakwete Mashili, bhashindendela gamakulungwa. Na lina lyabho ni bha ukonjelo. **50** Bhenebho

bhanakwaabhonelanga shiya bhene bhakwaajogopanga bhala, kuumila lubheleko mpaka lubheleko. 51 Pabha kwa mashili ga nkono gwabho bhashitenda gamakulungwa. Bhashikwapwilinganyanga bhakwetenje mbwinya mmitima jabhonji, 52 Bhashikwaatuluyanga bhapalume mmitengu yabhonji ya upalume, Nikwaakweyanga bhaitimalikenje. 53 Bhakwetenje shibhanga bhashikwaatendanga bhajukutanje ya mmbone, Ikabhe matajili bhashikwaalekanga bhapwilingane gwangali shoshowe. 54 Bhashikunnjangutula ntumishi jwabho Ishilaeli, Bhalikumbushila miadi ja kummonela shiya. 55 Kwa a Bhulaimu na lubheleko lwabho pitipiti, Malinga shibhaabhalanjilenje bhanangulungwa bhetu.” (aiōn g165) 56 A Malia nigubhatemi na a Lishabheti malinga myei jitatu, nigubhabhujile kunngwabho. 57 Mobha ga kwigopola a Lishabheti gakaishileje, gubhaigopwele mwana jwannume. 58 Ashaatami ajabho na ashaalongo ajabho bhakapilikananje, kuti Bhakulungwa bhaabhonele shiya sha kaje a Lishabheti, gubhaengelelenje pamo na bhenebho. 59 Lyubha lya nane gubhaikengenene kukuntaga mwana unyago, nigubhapanjilenje kumpa lina lya ainagwe, Shakalia. 60 Ikabheje akwabhe nigubhakanile, bhalinkuti, “Nngabha, ikabhe shashemwe a Yowana.” 61 Gubhaalugulilenje, “Pakuti jwakwa mundu muulongo gwenu ashemwa lyene linalyo!” 62 Bhai gubhaabhushiyenje ainagwe kwa ilangulo ya makono bhamumanyanje lina lyashi libhapinga kumpa mwanagwabho. 63 Numbé a Shakalia gubhajujile shibhao sha jandika, gubhajandishe nnei, “Lina lyakwe a Yowana.” Gubhakanganigwenje bhowe. 64 Popo pepo a Shakalia, gubhakombwele kubheleketa kabhili, bhalinkwaakuya a Nnungu. 65 Ashaatami ajabho bhowe gubhajogopenje, na bhandu bhowe bhatendaga kungulushilanga jene nganijo mmbali yowe ya shilambo sha mwiitumbi ya ku Yudea. 66 Bhowe bhapiikenenje genego, gubhaganishiyenje mmitima jabhonji nikwiibhuya, “Igala jwene mwanaju apingabha mundu jwashi?” Pabha nkono gwa Bhakulungwa pugwaaliji naka jwenejo. 67 A Shakalia, ainagwe mwana, gubhagumbeywe naka Mbumu jwa Ukonjelo, gubhalondwele nnei, 68 “Bhapegwe mboka Bhakulungwa a Nnungu bha Ishilaeli, Pabha bhashikwiya kukwagombolanga bhandu bhahho. 69 Bhashikutupa Nkutapula jwa makangala, Jwa uukulu gwa a Daudi bhatumishi bhahho. 70 Bhabhelenje kuumila bhukala Kupitila bhaalondola bhahho bha Ukonjelo, (aiōn g165) 71 Kuti shibhatutapule mmakono ga ashaamagongo ajetu Na bhowe bhakutushimanga. 72 Pubhashite kuti shibhaabhonelanje shiya bhanangulungwa bhetu, Na shibhakumbushile malagano gabho ga Ukonjelo. 73 Bhashinkulumbila kwa ambuje a Bhulaimu, Kuti shibhatutende uwe 74 Tugombolwe mmakono ga ashaamagongo ajetu, Kupinga twatindibhalile gwangali lipamba, 75 Kwa Ukonjelo na aki Mobha getu gowe. 76 Na ugwe mwanangu, shushemwe, nkulondola jwa Bhakulungwa a Nnungu. Shugwaalongolele Bhakulungwa kukwaalashiya mpanda gwabho, 77 Kwaalungushiyanga bhandu bhahho kuti, shibhatapulwanje Kwa leshelwa yambi yabhonji. 78 A Nnungu bhetu shibhatutende nneyo kwa ligongo lya potekwa ntima na shiya shabho, Na Ntapulo gwabho shiututulushile kukopoka kunnungu malinga nshenje, 79 Kupinga kwaumulishilanga bhowe bhatemingenene nnuhindu lwa shiwo, Bhatulogoye

ndamo yetu tutame kwa ulele.” 80 Mwana gwakulile na gwapundile kukola mashili muntima. Gwatemi kuanga mpaka lyubha lyailangwile ku bhandu bha Ishilaeli.

2 Gene mobhago, a Kaishali bhashemwaga a Augushito, bhakulungwa bhakulu bha upalume gwa Shiloma bhashinkulajiya bhalikwaapinganga bhandunji bhowe bhalinginji muupalume gwabho bhakajandikwanje. 2 Kwene kujandikwako pukwaaliji kutandubha kwene kuumila a Kileniashi pubhaaliji bhakulungwa bha shilambo sha ku Shilia. 3 Bhai bhowe bhapinjikwenje gubhapitengenene kuujandikwa kila mundu kushilambo shakwe shabheleke. 4 A Yoshepu nabhalabho ni gubhajabhwise ku Nashaleti, shilambo sha ku Galilaya, pabha pubhaaliji bha ulongo bha shipinga shimo na bhakulungwa a Daudi, gubhapite ku Bheteleemu shilambo sha ku Yudea kubhabheleke bhakulungwa a Daudi. 5 Gubhapite kuujandikwa na bha ntemela gwabho a Malia bhali na shitumbo. 6 Bhalinginji ku Bheteleemu, lyubha lyabho lya kwigopola likuishilaga, 7 gubhankwete mwana lielo lyabho, gubhanng'washiyé nngubho shinambombe, gubhanngoneshe pa lila ng'ombe, pabha bhakapatilenje pa gona nnyumba ja bhajeninj. 8 Tome na ku Bheteleemu bhashinkupagwanga bhashunga bhatamanganaga mukonde, shilo bhalinginji muulinda gwa ngondolo yabhonji. 9 Malaika jwa a Nnungu gwabhakoposhelenje na Ukonjelo gwa Bhakulungwa a Nnungu ukwamulishilangaga powe. Gubhatengukenje. 10 Ikabheje malaika gwabhalugulilenje, “Nnatengukanje! Pabha njikwiya kummalanjilanga ngani ja mmbone, jakwaanonyelanga bhandu bhowe. 11 Lelo nshilambo sha a Daudi ashibheleke nkutapula jwenunji, jwenejo ni Kilishitu ali Nkulungwa. 12 Na sheshino shishibhe shilangulo shenunji. Shimunng'imananje nambombe awashiywe nngubho ya shinambombe, agonekwe pa lila ng'ombe.” 13 Shangupe likundi lyalikulungwa lya ashimalaika bhananji bha kunnungu bhakwiilundangaga pamo naka malaika jula, bhalikwainiyanga a Nnungu bhalinkutinji. 14 “Bhakuywe a Nnungu kunani kunnungu, Na pa shilambolyo pabhe na ulele, ku bhandu bhakwaanonyelanga.” 15 Ashimalaika bhala, bhakajabhulangeneje kubhuya kunnungu, bhashunga gubhabhalanjilenene. “Twendangananje ku Bheteleemu tukalibhone lyene likoposhele libhatubhalanjile Bhakulungwa.” 16 Bhai, gubhapitengenene lubhilo, gubhaimenenje a Malia na a Yoshepu naka nambombe jula agonekwe pa lila ng'ombe. 17 Bhashunga bhakammonanje mwana jula gubhaalungushiyenje bhandu bhowe ngani jakwe jibhapiikenenje jila. 18 Bhowe bhapiikenenje jene ngani jibhaluguilwangaga na bhashungajo bhala gubhakanganigwenje. 19 Ikabheje a Malia gubhagabhishile gowe muntima akuno bhaliganishiya. 20 Bhashunga bhala gubhabhujengenene, akuno bhalikwakuyanga na kwaainiya a Nnungu, kwa gowe gubhapiikenenje na kugabhona, gashinkubha malinga shibhalugulilwenje. 21 Gakamalijeje mobha nane mwana gwatagwile unyago, gubhanshemilenje lina lyakwe Yeshu, lina lyapegwilwe na malaika jwa a Nnungu, akwabhe bhakanabhe jukuta shitumbo. 22 Lukapiteje luuko, malinga Shalia ja a Musha shijilajila, a Yoshepu na akongobhabho a Malia gubhampelenje mwana ku Yelushalemu kukunkamuya ku Bhakulungwa, 23

malinga Shalia ja Bhakulungwa shijishite, “Kila mwana jwa lielo jwannume shaabhe jwa ukonjelo jwa Bhakulungwa.” 24 Nneila peila gubhashoshiyenje mbepei ya njobha ibhili eu mabhunda gabhili ga ngunda, malinga Shalia ja Bhakulungwa shijapingaga. 25 Gene mobhago ku Yelushalemu bhashinkupagwa bhandu bhamo, pubhaliji bhandu bha aki na bhatendaga kwaatindibhalila a Nnungu, pubhashemwaga a Shimoni. Bhenebho bhatendaga lolela gwa lilaka ntapulo gwa bha Ishilaeli. Mbumu jwa Ukonjelo paaliji pamo na bhenebho alikwaataga ntima. 26 Mbumu jwa Ukonjelo ashinkwaibhulila kuti bhakawa bhakanabhe kummona Kilishitu jwa Bhakulungwa. 27 Bhai bhaililongoywa na Mbumu jwa Ukonjelo, a Shimoni gubhapite ku Liekalu. A Yoshepu na akongobhabho, gubhampelenje mwana Yesu Nniekalu kukutendela malinga nkubho gwa Shalia ja a Musha shijapingaga. 28 A Shimoni gubhamposhele mwana Yesu jula mmakono gabho, akuno bhalikwakuya a Nnungu, bhalinkuti. 29 “Mmakulungwa nnaino malagano genu gamalile, Mpingaga munneshe ntumishi jwenu akapumulile kwa ulele malinga shimwalajile. 30 Pabha meyo gangu gaubhweni ntapulo gwenu, 31 gummishile tayali ku bhandu bha ilambo yowe, 32 sheneshi ni shilangaya shipinga kwaamulishilanga bhandu bhangani kubha Bhayaudi, na Ukonjelo ku bhandu bhenu bha Ishilaeli.” 33 Ainamundu na akwabhe Yesu gubhakanganigwenje kwa malobhe gabheleketwe kwa ligongo lika mwana. 34 A Shimoni gubhaapelenje mboka, gubhaalugulile a Malia, akwabhe Yesu, “Aju mwanaju ashibheleka kwa ligongo lya kutuluywa na kukuywa kwa bhandu bhahagwinji nshilambo sha Ishilaeli. Na jweneju shaabhe shilapo shipinga kanwa na bhandu. 35 Kwa nneyo ng’aniyo ya bhandu bhahagwinji ipinga bhoneka gwangali nng’iyo! Na mmwe mmayene ntima gwenu upinga kumpoteka mbuti nng’omilwe na lipanga.” 36 Bhashinkupagwa bhakongwe bhamo bhakongopa, a nkulondola bha a Nnungu lina lyabho a Ana abhiti a Panueli bha shipinga sha a Asheli. Bhashinkulombwa nitama nshilombani yaka shabha ambunjebhabho ni gubhawile. 37 Gubhatemi nshitenga yaka makumi nane na nsheshe. Mobha gowego mubhatamaga Nniekalu bhalitabha nkwaajuga a Nnungu shilo na mui. 38 Popo pego, gubhaikopweye mmujo, gubhatendile eja kwa a Nnungu na gubhalungwiye ngani jika jwene mwanajo kubhandu bhowe bhatemingenenje nkulindilila kutapula kwa Yelushalemu. 39 Ainamundu na anyinamundu bhakatendanje yowe yalajilwe na Shalia ja Bhakulungwa, gubhabhujengene kunngwabhonji ku Nashaleti nshilambo sha ku Galilaya. 40 Mwana gwakulile, gwapundile kukola mashili, gwagumbele lunda na nema ja a Nnungu pujaaliji naka jwenejo. 41 Ainamundu na anyinamundu malinga shigwaliji nkubho gwabhonji gwa kwenda ku Yelushalemu kila shaka mobha ga shikukuu ja Shiyaudi jishemwa Pashaka. 42 Yesu akaishileje yaka likumi limo na ibhili malinga shigwaliji nkubho gwabhonji bhowe gubhajombokenje kwenda kushikukuu. 43 Shikapiteje shikukuu, gubhatandubhenje mwanja gwa bhujja kunngwabhonji, ikabheje Yesu gwalepeshe ku Yelushalemu, gwangali ainagwe na akwabhe kumumanyanga. 44 Pubhaganishiyangaga kuti mwali munkumbi gwa bhandu, gubhapitengenjenje mwanja gwa totolo, kungai gubhatandubhenje kunnoleya kubhaulongo na kwa ashaambwiga ajabhonji. 45 Pabha bhagammonanga,

gubhabhujengenenje ku Yelushalemu pita kunnoleya. 46 Lyubha lya tatu, gubhanng’imenenje ku Liekalu ali atemi munkumbi gwa bhaajiganya bha Shalia alikwaapilikanishiyanga akuno alikwaabhuyanga. 47 Bhowe bhapilikenenje malobhe gakwe, bhashinkulapanga kwa ijangulo yakwe na lunda lwakwe. 48 Ainagwe na akwabhe bhashinkukanganigwanga bhakammonanjeje. Akwabhe a Malia gubhammushiye, “Gwe mwanangu, kwa nndi ushikututenda nnei? Nne na ainago tushikuuleleya kwa lipamba.” 49 Jwalakwe gwabhajangwilenje, “Kwa nndi mmanganya kunoleyangaga? Nkakumumanyanga kuti nne ngunapinjikwa nnyumba ja Atati?” 50 Ikabhe bhankwetenje bhagamamanyanga malombolelo ga malobhe gabhaalugulilenje gala. 51 Bhai gubhalongenenenajonji kubhuja ku Nashaleti, gwapundile kwaakundanga. Akwabhe gubhagabhishile muntima gene gowego. 52 Na jwalakwe Yesu gwapundile kukula kwa shanga na lunda, gwapundile kupingwa na a Nnungu na bhandunji.

3 Shaka sha kumi na nng’ano sha tagwala kwabho a Kaishali Tibhelio, a Pontio Pilato pubhaliji bhakulungwa bha shilambo sha ku Yudea. A Elode pubhaliji bhakulungwa bha shilambo sha ku Galilaya, na akulubhabho a Pilipi pubhaliji bhakulungwa bha ilambo ya ku Itulea na ku Tilakoniti. A Lishaniashi pubhaaliji bhakulungwa bha shilambo sha ku Abhilene, 2 a Anashi na a Kayapa pubhalinginji bhakulungwanji bha bhaabshilila. Gene mobhago a Yowana bhanabhabho a Shakalia gulyajile llobhe lya a Nnungu kuanga kula. 3 Bhai a Yowana gubhapite mitala yowe jipikene na lushi lwa Yolodani bhaililunguya kuti, bhandu bhalekanje yambi yabhonji na bhatishwa, nkupinga a Nnungu bhaaleshelelanje yambi yabhonji. 4 Malinga shiishite jandikwa nshitabhu sha a Ishaya a nkulondola, “Lilobhe lika mundu linapiilikanika kuanga. ‘Mwaalashiyanje Bhakulungwa mpanda gwabho. Nngoloyanje mushibhapite. 5 Kila liimbo shilikulilwe, Kila shitumbi na shikweya shiilinganywe. Papindile shipagoloywe, Mipanda jangali ja mmbone jipinga alaywa. 6 Na, bhandu bhowe shibhaubhonjanje ntapulo gwa a Nnungu.” 7 Bhai a Yowana gubhaabhalanjilenje bhandu bhahagwinji bhaikanganaga kuubhatishwa, kuti “Mmanganya bhana bha lijoka! Gani ammalanjilenje nnjibhutukanje nnjimwa ja a Nnungu jikwiya? 8 Bhai nnanguyanje kwa itendi kuti mwiipetilenje yambi yenunji nikwaabhujila a Nnungu. Nnatandubhanje kwibheleketela kuti ‘Uwe a Bhulaimu ainabhetu!’ Numbe ngunakummalanjilanga, a Nnungu bhanakombola kugayuya magangaga nibha bhana bha a Bhulaimu. 9 Bhai nnaino, libhago libhishilwe mmatepo ga mikongo, kupinga kuushelanya nkongo. Kila nkongo ukaogoya iepo ya mmbone upinga shelwa nileshelwa pa moto.” 10 Lugwinjili lwa bhandu lukwaabhuyaga, “Bhai tutende bhuli?” 11 A Yowana gubhaajangwilenje. “Akwete nngubho ibhili anngabhile jwangali ngubhojo, akwete shalya atende nneyo peyo.” 12 Numbe bhakamula koli gubhaikengenjenje kupinga kubhatishwa, gubhaabhushiyenje, “Tutende bhuli mmaajiganya?” 13 Numbe a Yowana gubhaabhalanjilenje, “Nnalonganje koli japunda jimmalanjilwenje.” 14 Numbe ashimanjola na bhalabhonji gubhaabhushiyenje, “Na uwe tutende ndi?” Gubhaajangulenje, “Nnatolanje indu ikamundu jowewe

kwa mashili wala nnanshitakiyanje mundu kwa kunnambilila. Ntoglelanje na mishala jenunji.” 15 Bhandu bhatendaga lolalanga kwiya kwa bhaagombola, bhai gubhatandubhenje kwiibhuyanga mmitima jabhonji, pana a Yowana bha ni a Kilishitu. 16 Penepo a Yowana gubhaabhalanjenje bhowe, “Nne ngunakumbhatishanga na mashi, ikabheje bhanakwiya bhakwete mashili kumbunda nne, numbe nne nangatopela nkali kubha ntumishi jwabho. Bhenebho shibhambhatishanje kwa Mbumu jwa Ukonjelo na kwa moto. 17 Bhenebho bhashikamula nkubhato mmakono gabho, bhalipanga kubhata yalya yabho na peta, ngano bhakabhishe munngokwe na maashe gangali shindu nijoka pa moto gwangaimika piti piti.” 18 Bhai kwa genego na miungu jina jamigwinji, a Yowana bhakwaalungushiyangaga bhandunji Ngani ja Mmbone. 19 Ikabheje a Yowana bhashinkwaakalipila bhakulungwa a Elode, kwa ligongo lya kwaatola shilombani a Elodia, bhaliji akongobhabho akulubhabho na indu ina yangali ya mmbone ibhaitendekanyaga. 20 Kungai a Elode akuno bhalipunda kwitendekanya yangali ya mmbone, nigubhaatabhile a Yowana. 21 Bhandu bhowe bhakamalanjeje kubhatishwa, a Yesu na bhalabho bhakubhatishwaga. Na pubhaaliji bhalijuga kwa a Nnungu, kunnungu kukuugukaga, 22 na Mbumu Jwa Ukonjelo akwaatulushilaga alibhoneka mbuti ngunda. Lilobhe likupilikikaniga kukopoka kunnungu. “Ugwe mwanangu junguupinga, unonyela.” 23 A Yesu pubhatandwibhe liengo lyabho kulugwinjili bhali na yaka malinga makumi gatatu, na bhandunji pubhaganishiyangaga kuti mwana jwa a Yoshepu, a Yoshepu pubhaliji bhanabho a Eli, 24 a Eli pubhaaliji bhanabhabho a Matiasi, a Matiasi pubhaaliji bhanabhabho a Lawi, a Lawi pubhaaliji bhanabhabho a Meliki, a Meliki pubhaaliji bhanabhabho a Yanai, a Yanai pubhaaliji bhanabhabho a Yoshepu, 25 a Yoshepu pubhaaliji bhanabhabho a Matatiashi, a Matatia pubhaaliji bhanabhabho a Amoshi, a Amoshi pubhaaliji bhanabhabho a Naumu, a Naumu pubhaliji bhanabhabho a Eshili, bhanabhabho a Nagai, 26 a Nagai bhaliji bhanabhabho a Matatiashi, a Maati bhaliji bhanabhabho a Matatiashi, a Matatia pubhaliji bhanabhabho a Shemeni, a Shemeni bhanabhabho a Yosheki, a Yosheki bhanabhabho a Yoda, 27 a Yuda bhaaliji bhanabhabho a Yowanani, a Yowanani bhaaliji bhanabhabho a Lesha, a Lesha bhaaliji bhanabhabho a Shelubhabeli, a Shelubhabeli bhaaliji bhanabhabho a Sheatieli, a Sheatieli bhaaliji bhanabhabho a Neli, 28 a Neli bhaaliji bhanabhabho a Meliki, a Meliki bhaaliji bhanabhabho a Adi, a Adi bhaaliji bhanabhabho a Koshamu, a Koshamu bhaaliji bhanabhabho a Elimadamu, a Elimadamu pubhaaliji bhanabhabho a Eli, 29 a Eli bhaaliji bhanabhabho a Yoshua, a Yoshua bhaaliji bhanabhabho a Eliesheli, a Eliesheli bhaaliji bhanabhabho a Yolimu, a Yolimu bhaaliji bhanabhabho a Matiasi, a Matiasi bhaaliji bhanabhabho a Lawi, 30 a Lawi bhaaliji bhanabhabho a Shimoni, a Shimoni bhaaliji bhanabhabho a Yuda bhaaliji bhanabhabho a Yoshepu, bhanabhabho a Yonamu, a Yonamu bhaaliji bhanabhabho a Liakimu, 31 a Liakimu bhaaliji bhanabhabho a Melea, a Melea bhaaliji bhanabhabho a Mena, a Mena bhaaliji bhanabhabho a Matata, a Matata bhaaliji bhanabhabho a Nashani, a Nashani bhaaliji bhanabhabho a Daudi, 32 a Daudi bhaaliji bhanabhabho a Yeshe, a Yeshe bhanabhabho a Obhedi, a Obhedi bhaaliji

bhanabhabho a Boashi, a Bhoashi bhaaliji bhanabhabho a Shalmoni a Shelemani bhaaliji bhanabhabho a Nashoni, 33 a Nashoni bhaaliji bhanabhabho a Aminadabhu, a Aminadabhu bhaaliji bhanabhabho a Alamu, a Alamu, bhaaliji bhanabhabho, a Eshiloni, a Eshiloni bhaaliji bhanabhabho a Peleshi, a Paleshi bhaaliji bhanabhabho a Yuda, 34 a Yuda bhaaliji bhanabhabho a Yakobho, a Yakobho bhaaliji bhanabhabho a Ishaka, a Ishaka bhaaliji bhanabhabho a Bhulaimu, a Bhulaimu bhaaliji bhanabhabho a Tela, a Tela bhanabhabho a Naoli, 35 bhaaliji bhanabhabho a Shelungi, a Shelungi bhaaliji bhanabhabho a Leu, a Leu bhanabhabho a Pelegi, a Pelegi bhaaliji bhanabhabho a Ebheli, a Ebheli bhaaliji bhanabhabho a Shala, 36 a Shala bhaaliji bhanabhabho a Kenani, a Kenani bhaaliji bhanabhabho a Alupakishadi, a Lupakishadi bhaaliji bhanabhabho a Shemu, a Shemu bhaaliji bhanabhabho a Nu, a Nu pubhaaliji bhanabhabho a Lameki, 37 a Lameki pubhaaliji bhanabhabho a Metushela a Metushela pubhaaliji bhanabhabho a Eneko, a Eneko pubhaaliji bhanabhabho a Yaledi, a Yaledi pubhaaliji bhanabhabho a Maalaleli, a Maalaleli pubhaaliji bhanabhabho a Kenani, 38 a Kenani bhaaliji bhanabhabho a Enoshi, a Enoshi bhaaliji bhanabhabho a Sheti, a Sheti bhaaliji bhanabhabho a Adamu, a Adamu bhaaliji bha a Nnungu.

4 A Yesu gubhabhujile kopoka ku lushi lwa Yolodani, bhali bhagumbelwe Mbumu jwa Ukonjelo, gubhalongweywe naka Mbumu jwa Ukonjelo mpaka kuanga. 2 Kweneko gubhalinjilwe naka Lishetani kwa mobha makumi nsheshe. Gene mobha gowego bhangaalya shoshowe, kungai gubhaipilikene shibhanga. 3 Penepo Lishetani gwabhabhalanjile, “Ibhaga mmwe nni Mwana jwa a Nnungu, nnyuye liganga lino libhe nkate.” 4 A Yesu gubhannangwile, “Ishijandikwa. ‘Mundu akalamilala nkatepe.’” 5 Kungai Lishetani gwabhakweshiye kunani kaje, akwaalungulaga upalume gwa ilambo yowe gwanakamope. 6 Lishetani gwashtite “Shinimpe ntagwale yene ilambo yowe, na indu yakwe yowe pabha nijpegwa yowe, mbingaga kumpa mundu ngunakombola. 7 Yene yowe shiibhe yenu ndindibhalilaga.” 8 A Yesu gubhannangwile, “Ishijandikwa, ‘Mwaatindibhalile Bhakulungwa a Nnungu bhenu, Na kwaakumulila maengo bhenebho jikape.’” 9 Lishetani gwabhalongweywe kwenda ku Yelushalemu, gwabhakweshiye kunani nnala gwa Liekalu, gwabhalugulile, “Ibhaga mmwe nni Mwana jwa a Nnungu mwigwiye pai, 10 pabha ishijandikwa. ‘Shibhaumulishanje ashimalaika bha kunnungu, kukumpa ulinda,’ 11 Kabhili, ‘Shibhannjigalanje mmakono gabhonji, Nnakwiikubhala lukongono nniganga.” 12 Ikabheje a Yesu gubhannangwile, “Ishijandikwa, ‘Nnaalinje bhakulungwa a Nnungu bhenu.’” 13 Lishetani akabhalinjeje kila muutendelo, gwabhaleshile kwa malanga gashoko. 14 Penepo a Yesu gubhabhujile ku Galilaya bhalilongoywa kwa mashili ga Mbumu jwa Ukonjelo, na ngani jabho gujishumile ku Galilaya na ilambo yowe ya tome. 15 Bhenebho bhatendaga jiganya bhandu mmashinagogi gabhonji, na bhowe gubhaalumbililenje. 16 Bhai, a Yesu gubhapite ku Nashaleti, kubhalelelwe, na malinga shibhayobhelele, Lyubha lya Pumulila gubhainjile Nshinagogi. Gubhajimi kupinga bhashome Majandiko ga Ukonjelo. 17 Gubhaposhele shitabhu

sha a Ishaya ankulondola, gubhashiunukwile gubhapaimene pajandishwe. **18** "Mbumu jwa Bhakulungwa pali na nne, Pabha bhashing'agula Naapeleshelanje bhalaga Ngani ja Mmbone. Bhashinduma naalungushiyanje bhatabhilwenje kuleshelwa kwabhonji, Na ashinagalole bhalolanje, Na kwaagombolanga bhabhanelwanga, **19** Na kulunguya shaka sha uguja gwa Bhakulungwa." **20** Gubhaunishile shitabhu shila gubhampele ntumishi nigubhatemi, bhandunji bhowe bhalingini nshinagogi mula gubhaakolondolesheyenje meyo. **21** Nigubhatandwibhe kwa kwaabhalanjilanga, "Lelo gene Majandikoga gamalile nnpilikananga." **22** Bhowe gubhalumbililenje na kanganigwa kwa malobhe ga mmbone gubhatayaga a Yesu, gubhashitenje, "Bhuli jweneju nngabha mwanagwabho a Yoshepu?" **23** A Yesu gubhaajangwilenje, "Nimumanyi shimmalanjilanje lutango lwa kuti, 'Mmitela ilamyé gwamwene,' nakabhili shimmalanjilanje, 'Yowe itupilikene ishitendeka ku Kapalanaumu ntende na pa shilambo shenu pano.'" **24** Gubhapundile kubheleketa bhalinkuti, kweli ngunakummalanjilanga jwakwapi nkulondola akundwa pa shilambo shakwe. **25** Ikabheje mpilikananje, kweli ngunakummalanjilanga! Yaka ya a Eliya bhashinkupagwanga bhashitenga bhabhagwinji nshilambo sha Ishilaeli. Gene mobhago ula janganya yaka itatu na nushu, gushikoposhele shibhanga sha punda shilambo showe. **26** Nkali nneyo a Eliya bhangatumba kuka nshitenga jojowe, ikabhe kuka jwankongwe nshitenga jwa ku Sheleputa shilambo sha Shidoni. **27** Na kabhili, bhapalinji bhamangundula bhabhagwinji yaka ya ankulondola a Elisha nshilambo sha Ishilaeli. Nkali nneyo jwakwapi jojowe alamyé, ikabhe a Naamani bhandu bha ku Shilia. **28** Bhowe bhalingini nshinagogi mula gubhatumbelenje kwa kaje bhakapilikananje gene. **29** Gubhajimigene, gubhaakukulumyenje a Yesu nshilambo shabhonji shashenjilwe pantundu shitumbi, gubhaapelekenje mpaka nnushingu nkupinga bhaanokolelanje nnikote. **30** Ikabheje a Yesu gubhapitile pakati jabhonji pepo, nigubhajihbulile. **31** Kungai a Yesu gubhaelele mpaka ku Kapalanaumu shilambo sha ku Galilaya, Lyubha Iya Pumulila bhatendaga jiganya bhandu. **32** Gubhakanganigwenje kwa majiganyo gabho pabha bhatendaga bheleketa mbuti mundu akwete ukulungwa. **33** Na Nshinagogi mula ashinkupagwa mundu ashinkushikilwa na lioka jwa nyata gwajobhele alinkuti **34** "Ntuleshe, tukwete nndi na mmwe a Yesu Bhanashaleti? Bhuli nshikwiya kutumaliya? Nne nimmanyi mmwe agani. Mmwe ni Mundu jwa ukonjelo jwa a Nnunu." **35** A Yesu gubhankalipile lioka jula bhalinkuti "Pumula! Nsheshe munduju!" Bhai lioka jula akanngwiyeje mundu jula pai bhandu bhowe bhalilolesheyanga, ni gwanshoshile gwangali kumpoteka wala kashoko. **36** Bhandu bhowe gubhakanganigwenje, gubhabhalanjilenenje. "Genega majiganyo gashi, kwa ukulungwa na mashili bhanakwaabhalanjilanga ashimaoka bhangali bha mmbone bhanshoshekanje mundu, na inatendeka!" **37** Ngani ja a Yesu jikushumaga mmbali yowe. **38** A Yesu gubhakopweshe Nshinagogi, gubhapite kunngwabho a Shimoni. Bhakongwe bhama akwebhabho a Shimoni bhatendaga sheluka kwa kaje, gubhaajujilenje bhaalamye. **39** A Yesu gubhajinjile nikwaakotimila bhalwele bhala, nikushikalipila shilwele shila, gushaashoshile. Shangupe bhakongwe bhala

gubhajinjilwe, gubhatandwibhe kwaatumishilanga. **40** Pulyatitimidaga lyubha, bhandu bhowe bhakwetenje bhalwelenji bha ilwele yoyowe ila gubhaapelekenje kwa a Yesu, nabhalabho gubhaakwashiyenje na makono, gubhaalamienje bhowe. **41** Bhandu bhabhagwinji gugaashoshilenje maoka gangali ga mmbone akuno galijobhela, "Mmwe Bhanabhabho a Nnunu." Ikabheje a Yesu gubhagakalipile, bhangagaleka gabhelekete, pabha gaamanyi kuti bhenebho a Kilishitu. **42** Malabhi gakwe lyamba a Yesu gubhajawile gubhapite kujika. Lugwinjili lwa bhandu lwatendaga kwaloleya. Gubhaaamananje, gubhalinjilenje kwaibhili bhanajabhule. **43** Ikabheje bhalabho gubhaajangulenje, "Ngunapinjikwa kulunguya Ngani ja Mmbone ja Upalume gwa a Nnunu nneila peila na mulambo ina, pabha njitumwa kwa ligongo Iya genego." **44** Gubhapundile kulunguya mmashinagogi ga ku Galilaya.

5 Lyubha limo a Yesu bhashinkujima nnyenje litanda Iya Geneshaleti na bhandu bhabhagwinji bhalibhaatimbililenje bhalinokolananga nkwabhandishila, kupinga pilikanishiya ilobhe Iya a Nnunu. **2** Gubhajibhweni mitumbwi jibhili nnyenje litanda. Ashaayene bhatanda yamaki bhashinkutulukanga kualaya mau gabhonji. **3** A Yesu bhakajinjileje mumashua gumo gwaaliji gwa a Shimoni, gubhaalugulile a Shimoni bhaunokolesheye mmashi ga taliya kashoko na mumpelo litanda. Gubhatemi, gubhajigenye lugwinjili lwa bhandu bhali mmashua. **4** Bhakamaliyeje kujiganya, gubhaalugulile a Shimoni, "Mpeleshe ntumbwi pa shilindili, nkatejelanje mau genunji ntandanje yamaki." **5** A Shimoni gubhaajangwile, "Mmakulungwa, tushisheya shilo showeshi nkutanda yamaki ikabheje shakwa shitupatile, ikabheje pabha nkubhalanga mmwe, shindejele mau gano." **6** Bhakatejelanjeje mau gabhonji, gubhapatilenje yamaki yaigwinji, nkali mau gugatandwibhe kukutuka. **7** Gubhaashemilenje ashaajabhonji bhalingini mmitumbwi jina gubhaikengenye kukwajangutanga, gubgumbeyenje yamaki mitumbwi jinaabhili, kujitandwibhe kutitimila mmashi. **8** A Shimoni Petili bhakabhoneje nneila, gubhaatindibhalile a Yesu, gubhashite, "Mwijabhulile apano Mmakulungwa, pabha nne nankulebha!" **9** A Shimoni na ashaajabhonji gubhakanganigwenje gaapata yamaki yaigwinji nneila. **10** Nneila peila a Yakobho na a Yowana bhana bha a Shebhedayo bhalingini bhatanda yamaki ajabhonji a Shimoni gubhakanganigwenje. A Yesu gubhaalugulile a Shimoni, "Nnajogope, kutandubhila nnaino nkatanda yamaki, ikabheje liengo lyenu shiibhe Iya tanda bhandu." **11** Bhai bhakajikwakwatanenje mitumbwi jila mpaka palanga ja litanda, gubhahshilenje yowe gubhaagugulenje a Yesu. **12** A Yesu pubhaliji, kushilambo shimo, jwannume jumo jwa mangundula shiilu showe, gwabhabhweni. Bhai akwiigwiyaga namanguku alikwaajuga a Yesu alinkuti, "Mmakulungwa, mpingaga, shinndakaye." **13** A Yesu gubhagolweye nkono gubhankwashiye akuno bhalibheleketa, "Ngunipinga, utakate!" Shangupe mangundula gala gakunshokaga. **14** A Yesu gubhannalajile mundu jula bhalinkuti, "Unamalanjile mundu jojowe, ikabhe ukailanguye ku bhakulungwa bhaabshihila, ukashoye mbepi ya takata kwako, malinga shijilugula shalia ja a Musha, ibhe ukong'ondelo kunngwabhonji kuti utekete."

15 Ikabheje ngani ja a Yesu jikupundaga kushuma kowe. Makundi ga bhandu gugalopweshe kukwapiikanishiya na kulamywa ilwele yabhonji. 16 Ikabheje a Yesu, papagwinji bhatendaga kwenda ku jika kukwaajuga a Nnungu. 17 Lyubha limo a Yesu bhatendagajiganya. Mapalishayo na bhaajiganya bha shalia kukoposhela mmbali yowe ya shilambo sha ku Galilaya na ku Yudea na ku Yelushalemu pubhalinginji popo bhatemingene. Na mashili ga Bhakulungwa pugaaliji na a Yesu nkupinga bhaalamyanje bhalwelenji. 18 Kashokope gubhaikengene bhandunji bhannjigelenje mmashila mundu jwa poloka, gubhalinjenje kunnjiniya nkati bhampelekanje kwa a Yesu. 5:18 19 Ikabheje kwa ligongo lya gwini gwa bhandu, bhagakombolanga kujinjija nkati. Bhai gubhakwelenje kushipagala, gubhapenwilenje nigubhantulwiyenje mundu jwa poloka jula na mashila, mpaka pakati pakati ja bhandunji mmujo ja a Yesu. 20 A Yesu bhakajibhoneje ngulupai jabhonji, gubhannugulile mundu jula, "Ambwiga nneshelelwe yambi yenu." 21 Mapalishayo na bhaajandika bha shalia gubhatandwibhenje kwiibhuyanga, "Bhenebha ni agani bhakwaakupula a Nnungubha? Jwakwapi mundu akombola kuleshelela yambi ikabhe a Nnungu jikape!" 22 Ikabheje a Yesu gubhaimanyi ng'aniyo yabhonji, gubhaabhushiyenje, "Kwa nndi nnakwiibhuyanga genega mmitima jenunji? 23 Shei shipepeshe, kubheleketi, 'Uleshelelwe yambi,' eu 'Jima ujende?' 24 Bhai pungupinga mmumanyanje kuti Mwana juka Mundu ashipegwa mashili ga leshelela bhandu yambi yabhonji pa shilambolyo." Penepo gubhammalanjile mundu jwa poloka jula, "Jima tola likai lyako gujendele kumui." 25 Shangupe, mundu jwa poloka jula gwajimi pa meyo gabhonji, gwatolile likai lyakwe, gwapite kumui akuno alikwaakuya a Nnungu. 26 Bhowe gubhakanganigwenje na shijogopele, gubhaakushiyenje a Nnungu, bhalinkutinji, "Lelo tuibhweni ilapo." 27 Gakapiteje genego, a Yesu gubhakopweshe palanga gubhaaweni bhakamula koli bhama bhashemwaga a Lawi bhatemi nnyumba ja kamulila koli. A Yesu gubhaabhalanjile, "Nngagule!" 28 A Lawi gubhajimi gubhaleshile yowe gubhaakagwile. 29 A Lawi gubhaashemele a Yesu shalya kunngwabho. Na likundi likulungwa lya bhakamula koli na bhandunji bhana pubhalinginji popo bhatemingene nkulya. 30 Mapalishayo na bhaajiganya bha shalia bhalinginji nkumbi gumo, bhakwaainginishilangaga bhaajiganywa bha a Yesu bhalinkutinji. "Kwanndi nnalyanganga na papila na bhakamula koli na bhandunji bhakwetenje yambi?" 31 A Yesu gubhaajangwilenje, "Bhabhakotonji bhakakunnolelyanga mmitela, ikabheje bhakunnolelyanga mmitela bhalwelenji. 32 Nangajiya kukwaloleyanga bhanguja, ikabhe bhakwetenje yambi nkupinga bhaipetanje." 33 Bhandunji bhala gubhaalugulilenje a Yesu, "Bhaajiganywa bha a Yowana Bhabhatisha bhanatabhanga mobhaga na juga, nkali bhaajiganywa bha Mapalishayo pubhatendanga nneyo peyo. Ikabheje bhaajiganywa bhenu mmwe bhanalyanganga na ng'wa." 34 A Yesu gubhaajangwilenje, "Bhuli, ashaambwigamundu bhaka nkulomba, bhalipinjikwanga kutabha akuno bhatemingene pamo na nnyene nkulomba? 35 Shigaishe mobha, nkulomba shibhanshoyanje pa bhandupo, penepo shibhatabhanje." 36 A Yesu gubhaabhalanjilenje aluno lutango luno nkupinga

kwaajiganyanga. "Jwakwa mundu apapula shibhamba ngubho ja ambi nitotela munngubho ja bhukala, ibhaga atendaga nneyo shajiangabhanye ja ambijo, na shibhambasho shikatolana na nngubho ja bhukalajo. 37 Wala jwakwa mundu ataga divai ja ambi mmipatila ja bhukala, pabha divai ja ambijo shiijpwengule mipatila ja bhukalajo, mipatila shiijpwengushe na divai shiijjitishe. 38 Divai ja ambi pataga mmipatila ja ambi. 39 Jwakwa mundu jikunnonyela kung'wa divai ja ambi ang'waga ja bhukala, pabha bhakutinji, 'Ja bhukala ni ja mmbone kaje.'"

6 Lyubha limo lya Pumulila a Yesu bhatendagapita mmigunda ja ngano, bhaajiganywa bhahbo gubhatandwibhenje kutema maashe ga ngano, nipulula nitikita na makono kutauna. 2 Ikabheje Ashimapalishayo bhana gubhaabhushiyenje, "Pakuti mmanganya nnaelekanga shalia ja Lyubha lya Pumulila?" 3 A Yesu gubhaajangulenje, "Bhuli mmangashomanga shibhatendile a Daudi na ashaajabhonji pubhakwetenje shibhanga? 4 Bhenebho bhashinkujinjila nnyumba ja a Nnungu, gubhatolile mikate ja ukunjelo jila, gubhalile nikwaapanganga na ajabhonji. Ikapinjikwaga mundu kulya jene mikatejo ikabhe bhakulungwanji bhaabhishila jikape." 5 A Yesu gubhaalugulilenje, "Mwana juka Mundu ni Nkulungwa jwa Lyubha lya Pumulila." 6 Lyubha lina lya Pumulila, a Yesu gubhajinjile nshinagogi gubhajigenyene. Nkati mula ashinkupagwa mundu jumo nkono gwakwe gwa nnilo gwashinkupoloka. 7 Bhaajiganya bha shalia na Mapalishayo bhatendaga loleyanga shiumilo sha kwaashitakiya a Yesu, kwa nneyo gwatemingene nkulolela ibhaga shibhannamyem mundu Lyubha lya Pumulila. 8 Ikabheje a Yesu gubhaimanyi ng'aniyo yabhonji, gubhammalanjile jwa poloka nkono jula, "Jinuka, ujime mmujo ja bhandu bhowe." Mundu jula gwapite jima mmujo. 9 Kungai a Yesu gubhaalugulilenje, "Ngunakummuyanga, shalia jibhalanga bhuli ga Lyubha lya Pumulila, jinakutuleka tutende ya mmbone eu tutende yangali ya mmbone, kutapula gumi guka mundu eu kubhulaga mundu?" 10 Gubhaalolinje bhandu bhowe bhatemingene pepala, gubhammalanjile mundu jula, "Goloya nkono gwako." Nigwagolweye, na nkono gwakwe guulamile. 11 Ikabheje gubhatumbelenje kwa kaje, gubhakungulushilenje shibhaatendanje nndi a Yesu. 12 Lyubha limo a Yesu gubhapite kushitumbi, nisheya nkwaajuga a Nnungu. 13 Pa lyamba lyakwe gubhaashemilenje bhaajiganywa bhahbo, gubhaagwile bhandu likumi limo na bhabhili gubhaashemilenje, mitume. 14 A Shimoni bhapegwilwe lina na a Yesu lya Petili na a Ndeleya apwabho na a Yakobho na a Yowana na a Pilipi na a Bhatolomeyo, 15 A Matei na a Tomashi na a Yakobho bha a Alupayo na a Shimoni bhashemwaga "A Shelote," Yani nshilambo apwatanila shilambo shakwe, 16 na a Yuda bhana bhahbo a Yakobho na a Yuda Ishikaliote bhaatendebhwishe a Yesu kungai. 17 Bhakaeleje kopoka kushitumbi na ajabhonji, a Yesu gubhajimi pashibhata. Penepo lyashinkupagwa likundi likulungwa lya bhaajiganywa bhahbo na lugwinjili lwa bhandu kukopoka mmbali yowe ja ku Yudea na ku Yelushalemu na mbwani ja ku Tilo na ku Shidoni, 18 gubhaikengenene kukwaapiikanishiya a Yesu na kuulamiywa ilwele yabhonji. Bhatendaga kwaalamyanja bhowe na bhashikilwanganga na

maoka bhatendaga lamywanga. 19 Bhandu bhowe bhatendaga lajililanga kwaakwaya, pabha gatendaga kwaakopoka mashili ga lamy bhandu bhowe. 20 A Yesu gubhaatendebhushilenje bhaajiganywa bhabho, gubhashite. "Mbaya mmanganya nninginji mmalaganga, pabha Upalume gwa a Nnungu gwenunji. 21 Mbaya mmanganya nkwetenje shibhanga nnaino, Pabha kungai shinjukutanje. Mbaya mmanganya nkugutanga nnaino, Pabha kungai shinng'ekanje. 22 "Mbaya mmanganya bhandunji bhanshimangaga, nikummambalanga na kuntukananga na kumputuyanga kwa ligongo lika Mwana juka Mundu. 23 Genego galikoposhela mmanganya nng'angalante, pabha, upo yenunji kunnungu shiibhe yaigwinji. Pabha bhanangulungwa bhabhonji bhashinkwatendelanga nneyo peyo ashinkulondola bha Nnungu. 24 Ikabheje ole mmanganya nninginji matajili, Pabha tayali mposhilenje. 25 Ole mmanganya nnjukutnje nnaino, Pabha kungai shintotokanje. Ole mmanganya nkuekanga nnaino, Pabha kungai mpinga kwiigutanjilanga. 26 Ole mmanganya bhandu bhannumbililanga, Pabha bhanangulungwa bhabhonji bhashinkwatendelanga nneyo peyo ashinkulondola bha unami." 27 "Ikabheje ngunakummalanjilanga nkumbilikananga mmwe, mwaapinganje bhamaagongo ajenunji, mwaatendelanje ya mmbone bhankunshimanga. 28 Mwaajujilanje mboka bhakunnoshanga, na mwaajujilanje kwa Nnungu bhene bhakuntendelanga yangali ya mmbone. 29 Mundu ankomaga lipapa palitukwa limo muntendebhushiye na lya bhili. Mundu ampokonyolaga likoti lyenu nnanng'ibhiliile kutola na lishati. 30 Jowowe akunnjuga shindu mumpe, na mundu ampokonyolaga indu yenu nnononje. 31 Mwaatendelanje bhandu malinga shinkupinganga mmanganya bhantendelanje. 32 "Ibhaga mwaapingangaga bhakumpingangape, igala shimpegwanje upo yashi? Pabha nkali bhakwetenje yambi bhalipingana. 33 Na ibhaga mwaatendelanga ya mmbone bhakuntendelanga ya mmbonepe shimpegwanje upo yashi? Nkali bhakwetenje yambi bhalitendanga nneyo peyo. 34 Na ibhaga nkwaapolekanga bhandu bhunkukulupalilanga shibhannipanje, shimpegwanje upo yashi? Nkali bhakwetenje yambi bhanakwaapolekanga bhakwetenje yambi ajabhonji nkupinga bhaabhujishiyanje yowe. 35 Ikabhe mmanganya mwaapinganje ashaamagongo ajenunji, na mwaatendelanje ya mmbone, mwaapolekanga nmalolelanje kubhujishiwa, na upo yenunji shiibhe yaikulungwa, na shimanganje bhana bha Bhakulungwa a Nnungu. Pabha bhenebho ni bhanguja kwa bhagali bha mmbone na bhakapinganga kutenda eja. 36 Nkolanje shiya malinga Ainabhenunji shibhali na shiya. 37 "Nnaakumulanje bhananji, na mmanganya nkaukulungwa, nnaagambanje bhananji na mmanganya nkagambwanga, mwaaleshelelanje ashaajenunji, na mmanganya shinneshelelanje. 38 Mwaapanganje bhananji ibhapinganga, na mmanganya shimpegwanje. Elo, shintabhanje mmapepe genunji shipimilo shigumbele nishinyilwa mpaka pakatika. Pabha shipimilo shosho pesho shinkwaapimilanga bhananji shimpinga pimilwanga na a Nnungu." 39 A Yesu gubhaatanjilenje aluno lutango luno. Bhuli, nangalole kukombola kunnongoya mpanda nangalole mwine? Bhowe bhakatumbushilanga nniimbo? 40 Nkujiganywa akakwaapunda bhaajiganya bhakwe, ikabheje nkujiganywa

amaliyaga kwiijiganya shalandane na bhaajiganya bhakwe. 41 Kwa nndi unakushibhona shikoko shili nniyo lika njako, ikabheje ukakushibhona shipande shili nniyo lyako? 42 Eu shiukombole bhuli kunnugulila njako, Mpwanga linda nikushoye shikoko nniyo lyako, na akuno ukakushibhona shipande shili nniyo lyako? Ugwe ngulumba! Utandubhe kushoya shipande shili nniyo lyako, penepo shulole ukoto, nikombola kushoya shikoko nniyo lika mpwako. 43 "Nkongongo gwa mmbone nngaogoya iepo yangali ya mmbone, na wala nkongo gwangali gwa mmbone nngaogoya iepo ya mmbone. 44 Nkongongo pubhakuumanyanga kwa iepo yakwe. Pabha bhandu bhakaakabhanga tini munkongo gwa mibha, na wala bhakaakabhanga shabhibhu nritepo lya mbigili. 45 Mundu jwa mmbone shatende ya mmbone ikopoka nshibhiko sha mmbone ili muntima gwakwe. Na mundu jwangali jwa mmbone shatende yangali ya mmbone ikopoka nshibhiko shangali shammbone ili muntima gwakwe. Pabha yaabheleketa mundu inggumbele muntima gwakwe." 46 "Kwa nndi nnanjemanga 'Bhakulungwa, Bhakulungwa,' akuno nkatendanga ingummalanjilanga? 47 Shininnugulilanje shilanda sha mundu jowowe anyiila nne, nipiliikanishiya malobhe gangu nikugakagulila. 48 Jwenejo analandana naka mundu akwete lunda, ashenjile pa ndandali niola nshingi ukoto mpaka nnindandawe na nyumba nishimilika. Nushi guigumbele mashi nipobhola, ndanje nikwenda koma nyumba jila, ikabheje jangatenganyika, pabha jashinkushengwa pa ndandali. 49 Ikabheje jowowe apilikana malobhe gangu anatende shindu shoshowe, jwenejo analandana na mundu ashenjile nyumba pa lianji gwangali kuolela ukoto, ndanje jakopoka nnushi jikaisheje, gujikomile nyumba jila, gujibhomweshe jowe nigwa."

7 Bhakabheleketeje gubhapinjile bhandu bhapilikananje gwa, a Yesu gubhapite kushilambo sha ku Kapalanaumu. 2 Kweneko bhashinkupagwa bhakulungwa bhama bha manjola ga Bhaloma, bhenebho bhashinkukola ntumwa jwabho jubhampinjile kaje. Jwene ntumwajo atendaga lwalome kuwa. 3 Bhakulungwa bha manjola bhala bhakapilikaneje nnganya ja a Yesu, gubhaatumilenje bhanangulungwa bha Bhayaudi bhajendangane bhakaajuganje a Yesu bhakannamye ntumwa jwabho. 4 Bhakaikanganje kwa a Yesu gubhaashondelesheyenje kaje, bhalinkutinji, "Bhenebha inapwaa kwaatendela nneyo, 5 pabha bhanakwapinganga bhandu bhetu, na bhashikutushenjela shinagogi jila." 6 Bhai a Yesu gubhalongene nabhonji, bhandunji bhala. Bhali tome na ika ku likaja lya bhakulungwa bha manjola ga Bhaloma bhala, bhakulungwa bha manjola bhala gubhaatumilenje asha ambwiga ajabhonji kubhaalugulilanje a Yesu kuti, "Mmakulungwa nnapunde kwiibhuya, pabha nne nangali malango ga kumposhela mmwe nnyumba jangu. 7 Na shumilo niibhone nangali shanga sha kwiya kunnngwenu mmwe. Ikabheje mmelekete lilobhepe na ntumwa jwangu shaalame. 8 Pabha nkali nne puni pai ja ukulungwa, pai jangu bhalinjilishi ashimanjola. Na nimmalanjiga linjola jumo, 'Jenda' alikwenda, nimmalanjilaga juna, 'Jiya' anakwiya, na nimmalanjilaga ntumwa jwangu, 'Tenda ashi,' najwalakwe alitenda." 9 A Yesu bhakapilikaneje genego bhashinkuimonga kaje, gubhatendebhwishe nikululola lugwinjili lwa bhandu

bhaakagulanganga bhala, gubhashite, "Nganabhe kummona mundu akwete ngulupai jikulongwa nnei nkali kubhandu bha Ishilaeli." 10 Bhandunji bhala bhakaikanganeje kumui, gubhann'imenenje ntumwa jula alamile. 11 Lyubha lyolyo a Yesu gubhapite kushilambo shimo shashemwaga ku Naini, bhali bhalongene na bhaajiganywa bhahbo na likundi likulongwa lya bhandu. 12 Bhai, bhali tome na nnango gwa lugwani gwa jinjilila nshilambo mula, gubhakoposhelenje bhandunji bhajigelenje maiti gaka nngwendo jumo mwana jwa jikape jwa bhakongwe bha shitenga. Bhandunji bhabhagwinji bha shene shilambo shila pubhalingnji pamo na bhakongwe bha shitenga bhala. 13 Bhakulongwa a Yesu bhakaabhoneje bhakongwe bhala gubhaabhonele shiya, gubhaalugulile, "Nnagute." 14 Kungai gubhapite kushikwaya shinanda shibhajigalilenje maiti shila, na bhajigelenje bhala gubhajimingenje. Nigubhashite, "Nngwendo! Ngunakuubhalanjila, jinuka!" 15 Nngwendo awile jula, gwajinwishe gwatemi, gwatandwibhe kubheleketa. A Yesu gubhankamwiye kwa akwabhe. 16 Bhandu bhowe gubhajogopenje, gubhaainyenje a Nnangu bhalinkutinji, "Ankulondola bhakulongwa bha a Nnangu bhakoposhele munkumbi gwetu. A Nnangu bhashikwiya kukwaajangutilanga bhandu bhahbo." 17 Jene nganijo jikushumaga ku Yudea kowe na ilambo ya tome. 18 Bhaajiganywa bha a Yowana gubhaalugulilenje a Yowana yowe yatendekaga ila. Nabhalabho a Yowana gubhaashemilenje bhaajiganywa bhahbo bhabhili, 19 gubhaatumilenje ku Bhakulongwa a Yesu bhakaabhuyanji. "Bhuli, mmwe Bhaatapula bhakwiya bhala eu twaalindiile bhana?" 20 Bhaajiganywa bhala bhakaaimananenje a Yesu gubhaabhalanjilenje, Tushitumwa na a Yowana Bhaabhatisha tummye kuti, "Bhuli, mmwe Bhaatapula bhakwiya bhala eu twaalindiile bhana?" 21 Popo pepo a Yesu bhatendaga kwaalamyanga bhandu bhabhagwinji bhalagangaga na ilwele na bhashikilwanga maoka na kwaapanganga kulola ashinangalole bhabhagwinji. 22 Bhai, a Yesu gubhaajangwilenje. "Nnjendangane nkaabhalanjilanje a Yowana yowe impilikenenje na kwiilolela mmashayenenji, ashinangalole bhanalolanga, ashinangwabha bhanakwendangana, bhamangundula bhanalama, ashinangapilikane bhanapilikana, bhawilenje bhanayuwanga, na bhaalaga bhanalungushiywanga Ngani ja Mmbone. 23 Mbaya jwene mundu ikakunshima kwa ligongo lyangu nne." 24 Bhaajiganywa bha a Yowana bhakajabbulanganeje penepo, a Yesu gubhatandwibhe kwaalugulilanga bhandu bhagumbelenje bhala nnganya ja a Yowana. "Pumwapitengenje mukonde kukushibhona nndi? Mwaganishiyanga kukulibhona litete litikinywa na mbungo? 25 Ikabhe nneyo, kumwapitengenje kulola nndi? Kumwapitengenje kukunnola mundu awalile ngubhu ya bhei jikulongwa? Bhaawalanga ngubhu ya bhei jikulongwa nitama ndamo ya poka mwaakutamangana mmajumba ga shipalume! 26 Bhai, mmalanjanje, mwapitengenje kulola nndi? Mwapitengenje kunnola nkulondola? Elo, numbe ngunakummalanjanje, kupunda nkulondola. 27 Bhenebha ni a Yowana bhalugwilwe Mmajandiko ga Ukonjelo. 'Ngunakuntuma muntenga jwangu, Anng'alashiye mpanda gwenu.'" 28 "Ngunakummalanjanje, munkumbi gwa bhabelekwenje

jkwakwapi ali jwankulongwa kwaapunda a Yowana Bhabhatisha. Ikabheje, jwene ali jwa nshoko kaje mu Upalume gwa a Nnangu, ni ali jwa nkulongwa kupunda bhenebho." 29 Bhandu bhowe bhapilikenenje genego na nkali bhaakamula koli nigubhakundilenje kuti a Nnangu ni bha aki na bhanguja pabha bhashinkubhatishwanga na a Yowana. 30 Ikabheje mapalishayo na bhaajiganywa bha shalia, bhashinkukananga yatumbiliwe na a Nnangu, kwa nneyo nigibhakanilenje kubhatishwa na a Yowana. 31 A Yesu nigubhaabhushiyenje, "Bhai bhandu bha lwene lubheleko naalandanyanje na nndi? Paakulandananga na shindu shashi? 32 Bhashilandananga na bhana bhatemingenje pa lubhala lwa ushiya indu, bhalishemananga ashayenenji. Twashinkunngombelenga imbete, ikabheje mwangainanga! Twashinkunngimbilanga nyimbo ya lilo ikabheje mmanganya mwangagutanga! 33 Pabha a Yowana bhashinkwiya, bhatendaga tabha na bhakang'waga divai, mmanganya gunshitenje. 'Bhakwete lioka!' 34 Najwalakwe Mwana juka Mundu ashiika, analya na kung'wa, mmanganya gunshitenje. 'Munnolanje, jwa doka na kolelwaju, mmbwiga nnjabhonji bhakamula koli na bhakwetenje yambi!' 35 Nkali nneyo, lunda lwa a Nnangu lumanyshe kuti lwa mmbone na lwa aki kubhandu bhowe bhakundilenje." 36 Bhapalishayo bhamo bhashinkwaashemela shalya a Yesu kunngwabho. Nigubhajinjile nnyumba ja a bhapalishayo bhala gubhatemi kulya shalya. 37 Bhai, pene pa shilambo pala, bhashinkupagwa bhakongwe bhamo bhakwete yambi. Bhakapilikaneje kuti a Yesu mubhali nnyumba ja a Palishayo bhala, gubhatolile shupa sha mauta ga nunjila shielewye kwa liganga lya alabhashita. 38 Nigubhajimi tome na makongono ga a Yesu bhaliguta, na minyoi jabho jilikwaandolishila a Yesu mmakongono. Bhakongwe bhala gubhaponwele makongono ga a Yesu kwa umbo yabho. Kungai gubhagalambile makongono gala na gubhaapekeye mauta ga nunjila gala. 39 Bhapalishayo bhaashemile a Yesu bhala, bhakagabhoneje genego, gubhaganishiyeni muntima gwabho, "Abha bhandubha kweli bhaakaliji ankulondola bha a Nnangu, ikaaliji bhamumanyi shibhali abha bhakongwe bhakwaakwayabha kuti bhakwete yambi." 40 A Yesu gubhaabhalanjile bhapalishayo bhala, "a Shimoni, shipali shindu shingupinga kummalanjila." Nabhalabho a Shimoni bhakwaalugulilaga, "Elo, mmelekete Mmajiganywa." 41 A Yesu gubhashite, "Bhandu bhabhili bhashinkupolekanga ela kubhandu bhamo, bhamo libhalongwaga ligambo lya nshaala gwa shaka shimo na nushu, bhana ligambo lya nshaala gwa mwei gumo na nushu. 42 Bhakalepelenje kulipa magambo gabhonji, bhandu bhala gubhaaleshelelenje bhanaabhili. Lelo penepo munkumbi gwa bhene bhabhilibho, bhei shibhapunde kwaapinga bhaaleshelela magambo bhala?" 43 A Shimoni gubhajangwile, "Penepo imanyishe kuti, bhaaleshelele ligambo likulongwa shibhapunde kwaapinga." A Yesu gubhaabhalanjile, "Elo penepo nnjangwile ukoto." 44 Penepo gubhaatendebhushile bhakongwe bhala, nikwaalugulila a Shimoni, "Nnikwaabhona abha bhakongwebha? Nne punyinijile munngwenu muno mwangamba mashi ga nabha mmakongono gangu, ikabheje abha bhakongwebha bhashinyobhya makongono gangu na minyoi jabho nimbonola na umbo yabho.

45 Mmwe mwanganyambata, ikabheje abha bhakongwebha shijinjilile nne apano bhatendaga nyambata makongono gangu. 46 Mmwe mwangambakaya mauta muntwe, ikabheje abha bhakongwebha bhashimbakaya mauta mmakongono gangu. 47 Kwa nneyo ngunakummalanjila kupinjija kwabho kwapunda kunalanguya kuleshelelwa kwa ilebho yabho yaigwinji. Aleshelelwe ilebho ishoko, kupinga kwakwe kushokope.” 48 Bhai a Yesu gubhaabhalanjile bhakongwebhala, “Nneshelwelele yambi yenu.” 49 Penepo bhatemingenenabho pashalya bhala gwaabhuyenenje, “Bhenebha bhandu bhashi, bhaakombola nkali kuleshelela yambi?” 50 Nabhalabho a Yesu gubhaabhalanjile bhakongwe bhala, “Ngulupai jenu jintapwile, njjende kwa ulele.”

8 Gakapiteje genego a Yesu bhashinkupita mwilambo na ijiji bhalipita lunguya Ngani ja Mmbone ja Upalume gwa Nnungu. Bhaajiganywa likumi limo na bhabhili bhala gubhalongenabhonji. 2 Na kabhili bhanabhakongwe bhana bhashoshiywenje maoka na bhalamywenje ilwele na a Yesu bhatendagalangana nabhonji. Bhene bhanganyabho pubhalinginji, a Malia Magidalena, bhashoshiywe maoka shabha, 3 a Yowana akongobhabho a Kusha bhatumishi bhakulu bha nnyumba ja a Elode na a Shushana na bhananji bhowepe, bhene bhanabhakongwebho bhatendaga kwajangutilinga a Yesu kwa mali gabhonji ashaayene. 4 Likundi likulungwa lya bhandunji lyashinkwaajila a Yesu kukoposhele ilambo na ilambo. Nabhalabho gubhaatanjilenje aluno lutango luno. 5 “Nkupanda ashinkwenda miya mmbeju yakwe. Pamiyaga pala mmbeju ina ikugwilaga mumpanda, bhapita mpanda gwaalibhetenje na ijuni gwiilile. 6 Ina gwiigwile nnindandawe, ikameleje gwiwile pabha pakakweteje mashi. 7 Ina gwiigwile mmibha. Mibha ila ikakuleje guitenjele. 8 Na ina guigwile palitaka lya mmbone, guimelile niogoya yaigwinji.” Bhakabheleketeje genego, gubhauituye lilobhe bhalinkuti, “Akwehe makutujo apilikane!” 9 Bhaajiganywa bhabho a Yesu gubhaabhushiyenje malombolelo ga lwene lutangolo. 10 Bhalabho gubhajangwile, “Mmanganya nkwenje shikono sha kwiimanya indu ya nng’iyo ya mu Upalume gwa a Nnungu, ikabhe nngabha bhananjibho, kwa bhanganyabho pungwaabhalanjilanga kwa ndango. Nkupinga bhalolagaga bhanashibhonanje shindu na bhapiikanangaga bhanamumanyanje.” 11 Bhai gegano malombolelo ga lutangolo. Mmbeju lilobhe lya a Nnungu. 12 Nneyo peyo shikoposhele kwa mmbeju igwilile mumpanda shinalandana na bhandunji bhakupilikananga lilobhe lila, kungai gwaishie ibhilishi gwalishoshiye mmitima jabhonji, bhanakulupalilanga nitapulwa. 13 Nneyo peyo shikoposhele kwa mmbeju igwilile pa lindandawe, shinalandana na bhandunji, bhakupilikananga lilobhe lila bhanakuliposhelanga nikwiinonyela. Ikabheje, namalinga mmbeju ila, bhene bhandunjibho pabha bhanganjini njjiga, bhanakulupalilanga kashokope na bhalingwangaga bhakaakabhanga kuwa ntima. 14 Nneyo peyo shikoposhele kwa mmbeju igwilile mmibha shinalandana na bhandunji bhakupilikananga lilobhe lila, ikabheje bhajabhulanganaga kashokope, bhanaakumulwanga na lipamba, na indu na mboka ya ndamo, bhalabhonji bhakaagoyanga iepo nikomala. 15 Nneyo peyo shikoposhele

kwa mmbeju igwilile pa litaka lya mmbone, shinalandana na bhandunji bhakupilikananga lilobhe lila kwa ntima gwa mmbone nikunda. Bhanganyabho bhanakwiikakatimilanga mpaka niogoya iepo. 16 Bhandu bhakakoleyanganda kandili nikujunishila eu kujibhika nng’ungu. Ikabheje pabhikwa panani, nkupinga bhandu bhajinjilanga bhashibhonanje shilangaya. 17 “Pabha shoshowe shishiywe, shipinga undukulwa na yowe ili ya nng’iyo ipinga manyika kulugwinjili. 18 “Kwa nneyo mwiiteiganje na inkupilikanangoya, pabha akwete shindu shajenjesheywe, ikabheje jwangali shindu, nkali shishoko shaaganishiya akwete shila, apinga pokonyolwa.” 19 Penepo anyinabhabho na ashaapwabho a Yesu gubhaikengeneneje kukwaalola, ikabheje bhangakombolanga kwaabhandishila kwa ligongo lya lugwinjili lwa bhandu. 20 A Yesu gubhabhalanjilwe kuti, anyinabhenu na ashaapwenu pubhalinginji palanga, bhanapinganga kummona. 21 Ikabheje a Yesu gubhaabhalanjilenje bhandu bhowe, “Bhakupilikanishiyanga na kulikamulila lilobhe lya a Nnungu bhanganyabho ni a mama na ashapwanga nne.” 22 Lyubha limo a Yesu na Bhaajiganywa bhabho bhashinkukwelanga mmashua, gubhaabhalanjilenje, “Tujomboshe litanda tuishe kung’ambu.” Bhai, mwanja niguatandwibhe. 23 Bhalinginji mmashua, a Yesu gubhagonile lugono. Mbungo na mabhimbili gamakulumakulu gugatabhile, mashi nigugatandwibhe kupakushila mmashua, nigubhajogopenje kaje, nibha atali. 24 Bhaajiganywa bhala gubhapite kukwaajumuyanga a Yesu, bhalinkutinji, “Mmakulungwa, Mmakulungwa, tunawa!” A Yesu nigubhajumwishe, nigubhajikalipile mbungo na mabhimbili gala, niguitondwebhe, kwa jii. 25 Penepo nigubhaabhushiyenje, “Jili kwei ngulupai jenujini?” Gubhakanganigwenje na jogopa, akuno bhalibhuyananga, “Igala bhenebha bhandu bhashi, nkali mbungo na mabhimbili bhanakwiamulisha nikwaapilikana?” 26 Gubhaikengeneneje kushilambo sha Bhagelashi, shilolana na ku Galilaya kung’ambu ja litanda. 27 A Yesu pubhaulukaga kumbwani, mundu jumo nshilambo jwa shene shilambo shila, akwete maoka, gwabhaishile. Kwa mobha gamagwinji jwene mundujo akawalaga nngubho wala akatamaga nnyumba, ikabhe ndamo jakwe pujaajili mmashembo ga shishila bhandu. 28 Akaabhoneje a Yesu, gwajobhele gwaigwishiywe pai mmujo jabho akuno alibheleketa kwa utiya, “Mmwe a Yesu bhanabhabho a Nnungu bhakulu, mmwe nndi na nne? Shonde, ngunajuga nnamboteshe!” 29 Ashinkubheleketa nneyo pabha a Yesu bhammalanjile lioka jula kuti anshoshe mundu jula. Jwene lioka jwangali jwa mmbone jula akakabhaga kunkamula mundu jula, nkali bhandu bhann’ugallanji nnyumba nikuntabha mindondolo ja itale na pingu mmakono na mmakongono, akakabhaga kukutulanya yoweyo, na lioka jula atendaga kumminganjila kuanga. 30 Bhai a Yesu gubhammushiye, “Lina lyako gani?” Gwajangwile, “Lina lyangu, ‘Manjola’ Pabha gashinkunjinjila maoka gamagwinji. 31 Ashimaoka bhala gubhaashondelesheyenje a Yesu bhanaabbinganjilanje ku Jeanamu. (Abyssos g12) 32 Penepo lyashinkupagwa likundi lya ngulubhe lilipitalya nshitumbi. Bhai ashimaoka bhala gubhaashondelesheyenje a Yesu bhaaleshelelanje bhakaajinjilanje ashingulubhe bhala. Na bhalabho a Yesu gubhaaleshelelanje. 33 Kwa nneyo ashimaoka

bhala bhakunshokanganaga mundu jula, gubhaajinjilenje ashingulubhe, gubhaelelenje nnikote shibhutuka, nititimila nritanda. **34** Bhalinda bha ngulubhe bhakagabnonanje gowe gakoposhele gala, gubhabhutukenje pita shumya nshilambo mula na mmigunda. **35** Bhandunji gubhaikengenenge kulola gakoposhele. Gubhaajendelenje a Yesu, gubhamweninji mundu ashoshilwe na maoka jula, atemi pa makongono ga a Yesu, awete nngubho, ali na lunda lwakwe lwa mmbone, gubhajogopenje. **36** Bhandu bhagawenenje pugatendekaga, gubhaatalashiyenje bhananji, shaashite lamywa mundu akwete maoka jula. **37** Bhashilambo bha Kugelashi gwaaajogopenje kwa kaje. Kwa nneyo gubhaajujilenje a Yesu bhashoshe. Bhai a Yesu gubhakwelile ntumbwi gubhaijabhulile. **38** Mundu ashoshiywe maoka jula, akwaashondelesheyag a Yesu alonganenabho. Ikabheje a Yesu gubhannajile bhalinkuti, **39** "Ubhuje kumui ukatalashiye yowe ibhakutendele a Nnungu." Bhai mundu jula gwajabhwiye pita lunguya ibhantendele a Yesu, mmbali yowe ya shilambo shila. **40** A Yesu bhakabhujeje, gubhaposhelwe na likundi likulungwa lya bhandu, pabha bhatendaga kwaalindililanga. **41** Penepo gubhaishe bhandu bhamo bhashemwaga a Yesu pa nnyuma, gubhaakwashiye libhiniko lya nngubho jabho. Popo pepo gubhalamile shilwele shila. **45** A Yesu gubhabhushiye, "Gani angwashiye?" Bhowe gwaajangulenje kuti jwakwapi ankwashiye. Na a Petili gubhashite, "Maaajiganya, lugwinjili lwa bhandu lushikunngumbalila nikuntimbilila ndendende!" **46** Ikabheje a Yesu gubhashite, "Apali mundu angwashiye, pabha njikiwipilikana mashili galinjoka." **47** Bhakongwe bhala bhakabhonje kuti ikakomboleka kwiya, gubhailangwiye bhalitetemela kwa jogopa, gubhaatindibhalile a Yesu. Penepo gubhatalashiye pa bhandu bhowe shiumilo sha kwaakwaya a Yesu na shibhashite lamywa gwanakamope. **48** A Yesu gubhaabhalanjile. "Mwanangu ngulupai jako jikulamiye. Ujende kwa ulele." **49** A Yesu bhakanabhe maliya kubheleketa a Yailo gubhapeleshelwe ntenga kukopoka kungwabho, "Mwali jwenu awile, igala gabhuli kupunda kwaabhuya bhaajiganya?" **50** A Yesu bhakapilikaneje genego, gubhaabhalanjile a Yailo, "Mmwe nnajogope nkulupalilepe, shalame." **51** Bhakaisheje kumui bhanganjira kujinjila naka mundu juna ikabhe na a Petili na a Yowana na a Yakobho pamo na bhankwetenje mwana jula. **52** Bhandu bhowe bphalangingi nkunngutula ililo. A Yesu gubhaabhalanjilenje, "Mpumulanje kuguta, pabha mwana jwangawa ashigonape!" **53** Bhalabhonji gubhaeshilenje, pabha bhamumanyinji kuti mwana awile. **54** Ikabheje a Yesu gubhankamwile nkono, nikunshema, "Mwanangu jumuka!" **55** Gumi gwakwe ukummujilaga, shangupe gwajumwishe. A Yesu gubhaalugulilenje bhampanganje shalya.

56 Bhankwetenje gubhakanganigwenje kwa kaje, ikabheje a Yesu gubhaamulishenje bhanannugulilanje mundu jojowe gene gatendeshe gala.

9 A Yesu gubhaashemilenje pamo likumi limo na bhabhili bhala, gubhaapelenje mashili na ukulungwa kupunda maoka gowe na kulamya ilwele. **2** Gubhaatumilenje bhajendanganje kulunguya Upalume gwa a Nnungu na kulamya bhalwelenji. **3** Gubhaalugulilenje, "Mmwanya gwenunji nnajamulanje shindu shoshowe, wala imbo, wala nkobha, wala shalya, wala mmbiya, wala likoti lya tindiganya. **4** Na nyumba jojowe jishimposhelwanje, ntamangane penepo mpaka lyubha lishinjabhulangane. **5** Bhandu bhakamposhelanjene, nshokangane shene shilambosho na punkujabhulanga mwikung'undanje litutuli lya mmakongono genunji, ibhe shilangulo kuti, bhashikananga ashaayene ntenga gwa Upalume gwa a Nnungu." **6** Bhai gubhajabhulengenenje pitalunguya Ngani ja Mmbone, shijiji na shijiji na lamy bhalwelenji kila mmbali. **7** Numbe bhakulungwa a Elode bhakapilikaneje gowe gatendeshe, gubhatengwisha, pabha bhandu bhananji bhatendaga bheleketanga kuti, "A Yowana bhashiyuka." **8** Bhana kuti a Eliya bhashikoposhela, bhana kuti ankulondola bha bhukala bhashiyuka. **9** Ikabheje a Elode gubhashite, "Monaga a Yowana bho naainjile, lelo jwene jungupilikana ngani jakwejo gani?" Gubhakwete lilaka lya kummona. **10** Mitume bhala bhakabhujanganeje, gubhaatalashiyenje Yesu yowe ibhatendilenje. A Yesu gubhaatolilenje, nigubhapitenabhonji kujika mpaka shilambo sha ku Bhetishaida. **11** Ikabheje bhandunji bhala bhakamumanyanje kubhapyete, gubhaakagulenje. A Yesu gubhaaposhelenje, gubhajigenye ga ngani ja Upalume gwa a Nnungu, na kwaalamyanga bhandu bhapingangaga kulamywa. **12** Lyubha lilititimila, likumi limo na bhabhili bhala gubhapite kwaalugulilanga, "Mwaalajilanje bhandunji bhajendanganje mwilambo na mmigunda ja tome, bhakaloleyanje shalya na mwagona, pabha putuli pano pakonde." **13** Ikabheje a Yesu gubhaabhalanjilenje, "Mmanganya mwaapanganje shalya." Gubhajangulenje, "Twangali shalya, ikabhe mikate nng'ano na yamaki ibhilipe. Igala tukaume shalya sha bhandu bhowebhal!" **14** Pabha pepala, bphalangingi bhanabhalume kuishila elupu nng'ano. Bhai, a Yesu gubhaabhalanjilenje bhaajiganywa bhobho, "Mwaatamikanje makundi ga bhandu makumi nng'ano nng'ano." **15** Bhaajiganywa gwaatendilenje malinga shibhabhalanjilwenje, gubhaatamikenje bhowe. **16** Kungai a Yesu gubhatolile mikate nng'ano na yamaki ibhili ila, gwaalolile kunani kunnungu, gubhatendile eja kwa a Nnungu ga mikate na yamaki ila, gubhagebhenye na gubhaapelenje bhaajiganywa bhobho bhaapanganje bhandunji. **17** Gubhalilenje bhandu bhowe, mpaka kujukuta, gubhalokotenyenje ipande ya malepei, nigumbaya ikapu likumi limo na ibhili. **18** Lyubha limo a Yesu bhatendaga juga Nnungu jikape, bhaajiganywa bhobho bhalinginji tome popo. Bhai a Yesu gubhaabhushiye, "Igala bhandunji bhakutinji nne gani?" **19** Nigubhaajangwilenje, "Bhananji bhakutinji, mmwe a Yowana Bhabhatisha, na bhananji, bhakutinji mmwe a Eliya, na bhananji bhakutinji, mmwe ankulondola bha bhukala bhashiyuka." **20** Penepo a Yesu gubhaabhushiye, "Na mmanganya nkutinji

bhuli, nne gani?" A Petili gubhajangwile, "Mwe a Kilishitu bha a Nnungu." 21 Penepo a Yesu gubhaalimbijenje na kwaalajiyanga bhanammalanjilanje mundu jojowe jene nganijo. 22 A Yesu gubhashite. "Mwana juka Mundu shapate mbotoko yaigwinji, na shakanwe na bhanangulungwa na bhakulungwanji bhaabshila na bhaajiganya bha shalia, na bhulagwa, ikabheje lyubha lya tatu shayushe." 23 Kungai gubhaabhalanjilenje bhandu bhowe, "Mundu jojowe apinga ngagula nne, anapinjikwa aikane nnyene, ajigale nshalabha gwakwe, angagule. 24 Pabha mundu apinga kuuatupa nnyene gumi gwakwe, shaaguoobhye, ikabheje apinga kugobhya gumi gwakwe kwa ligongo lya ngu nne, shaagutapule. 25 Bhuli shiimpwae nndi mundu, kupata indu yowe ya pa shilambolyo kwa obhya gumi gwakwe, eu kwiitimiya nnyene? 26 Pabha mundu jojowe amonela oni nne ga majiganyo gangu, Mwana juka Mundu shamonele oni jwenejo, lyubha lya shaiye muukonjelo gwakwe, na gwa Atati na shilangaya sha ukonjelo gwa ashimalaika bha kunnungu. 27 Ngunakummalanjilanga kweli, pano pepano bhapalinji bhananji bhakawanganga mpaka bhaubhonanje Upalume gwa a Nnungu." 28 Gakaishileje mobha nane, bhakabheleketeje genego a Yesu gubhaatolilenje a Petili, a Yowana na a Yakobho, gubhalongenerabhonji kushitumbi kukwaajuga a Nnungu. 29 Pubhaaliji nkwaajuga a Nnungu, nigubhapindikwiche kumeyo, nngubho yabho niwejela akuno ilimelemeta kwa kaje. 30 Shangupe bhandunji bhabhili a Musha na a Eliya gubhabhonekenje bhalikunguluka nabhonji. 31 Bhashinkubhonekanga bhalinginji na Ukonjelo, gubhakungulukenje ga nnganya ja bhulagwa kwabho shiippinga malila ku Yelushalemu. 32 A Petili na ashaajabhonji bhashinkugonanga lugono lwa tapatapa, ikabheje bhakajumukanjeje, gubhashibhweninji shilangaya sha Ukonjelo Gwapuya gwa a Yesu na bhandunji bhabhili bhali bhajimi nabhonji. 33 Bhai a Musha na a Eliya bhalijabhulangana kwaaleka a Yesu, a Petili gubhaalugulile a Yesu, "Mmakulungwa, shiipwae uwe tubhe apano! Bhai tushenje mishati jitatu, gumo gwenu, gumo gwa a Musha na gumo gwa a Eliya." Ikabheje a Petili bhakaimanyaga ibhabheleketaga. 34 A Petili bhali nkubheleketa genego, gulikoposhele liunde nikwaunishilanga, lyene liundelyo pulyaunishilangaga nigubhajogopenje kaje. 35 Lilobhe likupilikanikaga kukoposhele nniunde mula. "Jweneju ni Mwanangu juninng'agwile, mmpilikanishiyanje." 36 Likapilikanisheje lyene lilobhelo, a Yesu gubhabhoneshe bhali jikape. Bhaajiganywa gwaatemingeni ilili. Na gene mobha gala bhanganugulilanga mundu indu yoyowe ibhaibhwenenje ila. 37 Pamalabhi gwakwe, bhalelelanga kukopoka kushitumbi na bhaajiganywa bhahho bhatatu bhala, gubhaimikene na likundi likulungwa lya bhandu. 38 Penepo mundu jumo nnikundi mula, gwakweshiye lilobhe alinkuti, "Mmaaajiganya, shonde munjangutile mwanangu jwa jikaji! 39 Anashikilwa lioka, nikuntenda ajobhele na kunnungwi shialala, akuno shiulo shilikunkopoka nkang'wa. Alipunda kumpoteka kwa kaje na wala akakunneka shangu. 40 Naajujilenje bhaajiganywa bhenu bhanshoyanje, ikabheje bhakangombolanga." 41 A Yesu gubhashite, "Mmanganya lubheleko lwangali ngulupai na lwa puganika! Shiniipilile kutama na mmanganya mpaka shakani?" Kungai gubhaabhalanjile bhandu bhala,

"Munnjienajo mwana jwenujo apano." 42 Mwana jula alikwiya kwa a Yesu, lioka akunnungwiya shialala. Ikabheje a Yesu gubhankalipile lioka jula anshoshe, mwana jula gwalamiywe, gubhankamwiye kwa ainagwe. 43 Bhandu bhowe gubhakanganigwenje, kwa ukulungwa gwa mashili ga a Nnungu. Bhandunji bhala bhalinginji nkukanganigwa kwa yowe ibhaaitendile a ila, a Yesu gubhaalugulilenje bhaajiganywa bhahho, 44 "Mplikanishiyanje gegano. Mwana juka Mundu apinga kamuywa mmakono ga bhandu." 45 Ikabheje bhalabhonji bhanganamanyanga malombolelo ga shene shibheleketosho. Pabha shashinkuiya kupinga bhanashimanyanje, na bhalabhonji gubhajogopenje kwaabhuya malombolelo ga shene shibheleketosho. 46 Gujikoposhele mitau munkumbi gwa bhaajiganywa, kuti gani jwankulungwa kupunda bhowe. 47 A Yesu bhashinkwiimanya ng'aniyo yaliji mmitima jabhonji, bhai gubhantolile mwana jwanshoko, gubhannjimishite tome na bhayene, 48 gubhaalugulilenje, "Mundu jojowe akumposhela jwene mwana jwa nshokolu kwa lina lyangu, anamboshela nne na jojowe amboshela nne anakwaposhela bhwendumile bhala. Pabha ali jwanshoko munkumbi gwenunji, jwenejo jwankulungwa." 49 A Yowana gubhabhelekete, "Mmakulungwa, tushikwaabhona bhandu bhama bhalishoya maoka kwa lina lyenu, gutulinjile kwaibhili, pabha nngabha alongani ajetu." 50 Ikabheje a Yesu gubhaabhalanjilenje, "Nnang'ibhiliyanje pabha akakuntaukangajo nnjenunji." 51 Mobha ga tolwa a Yesu kwenda kunani kunnungu gakabhandishileje, gubhatumbilile kwenda ku Yelushalemu. 52 Bhai gubhaatumilenje mitume bhalongolelanje, na bhalabhonji gwaapitengene kushilambo shimo sha Bhashamalia nkupinga bhakaalashiyanje paishila. 53 Ikabheje bhashilambo bha pepala gubhakanilenje kwaaposhela, pabha a Yesu bhaliji mmwanja kwenda ku Yelushalemu. 54 Bhai, bhaajiganywa bhahho, a Yowana na a Yakobho, bhakabhonanje nneila, nigubhashitenje, "Mmakulungwa, nnipinga tusheme moto kunnungu kugwatiniyanje?" 55 Ikabheje a Yesu gubhaatendeushilenje nikwaakalipilanga. 56 A Yesu na bhaajiganywa bhahho gubhapitengeneni shilambo shina. 57 Bhalikwendanganina mumpanda, mundu jumo gwabhabhalanjile a Yesu, "Shininkagule kokowe kushinnjende." 58 A Yesu gubhashite, "Nansheto akwete lishemo, na ijuni ikwete maui, ikabheje Mwana juka Mundu jwangali nkali pa pumulila." 59 Kungai gubhannugulile mundu juna, "Ngagula." Ikabheje jwenejo gwashite, "Mmakulungwa, nneshe oti ngaashishe atati." 60 Ikabheje a Yesu gubhammalanjile, "Gwalekanje bhawilenje bhashikane ashaayene, ugwe ujende ukalunguye Upalume gwa a Nnungu." 61 Na mundu juna gwabhabhalanjile, "Mmakulungwa shininkagule, ikabheje nneshe oti ngalajile kumui." 62 A Yesu gubhaalugulile, "Jojowe akamwile lijela nitandubha kulima, atendebhukaga kulola nnyuma, jwenejo akapwaa mu Upalume gwa a Nnungu."

10 Gakapiteje genego Bhakulungwa gubhaagwilenje bhananji makumi shabha na bhabhili gubhaatumilenje bhabhili bhabhili, bhaalongolelanje kila shijiji na kila mmbali jibhatumbilile bhayene kwenda. 2 Gubhaalugulilenje, "Maneng'eno gamagwinji, ikabheje bhaaneng'ena bhashokope. Kwa nneyo, mwaajuganje

Bhakulungwa bha maneng'eno bhatume bhaaneng'ena munngunda gwabho." 3 Nnaino nriendangane, mmumanyanje kuti ngunakuntumanga, malinga bhana ngondolo pakati maogo. 4 Nnajigalaganje mpatila gwa ela, wala nkobha, wala ilatu, mumpanda nnammyanje abhali mundu jojowe. 5 Nnjijilanganaga nnyumba jojowe jila, ntandubhanje kujumushila nnei. Ulele ubhe na mmanganya ajino nyumba jino. 6 Monaga shapagwe mundu jwa ulele mwenemo, shatame nago, akapagwe shigummujilanje mwaashayene. 7 Ntamangane jene nyumbajo, nnilyanganga na papila shibhampanganjeyo, pabha ntumbisha anapinjikwa apegwe nshaala gwakwe. Nnaanjanje kushoka aji nyumbaji kwenda ajila. 8 Ibhaga nng'ikanganaga pa shilambo shoshowe na bhamposhelangaga, nniyanjanje ishimpegwanjeyo. 9 Mwaalamyanje bhalwelenji bha kweneko, na mwaalungushiyanje bhandunji kuti, Upalume gwa a Nnungu ummandishilenje. 10 Ikabheje nniyanjanlangaga shilambo shoshowe, bhakamposhelanje, njabhulanje, pushimpitangane mmipanda jabhonji mmeleketanje nnei. 11 Nkali ndutuli ja nshilambo shenunji jili mmakongono getu tunakung'undilanga. Ikabheje mmumanyanje kuti Upalume gwa a Nnungu ubhandishile. 12 Ngunakummalanjilanga, lyubha lya ukumu ja a Nnungu kwa shene shilambosho, shiibhe mbaya bhandunji bha shilambo sha Shodoma. 13 "Ole mmwe a Kolashini! Ole mmwe a Bhetishaida! Pabha ilapo itendeshe kungwenunji, ikatendeshe ku Tilo na ku Shidoni, bhandunji bha yene ilambo ila, bhakaipetilenje bhukalape, kwa wala nngubho ya magunia na kwiitutulila liu. 14 Nkali nneyo lyubha lya ukumu mmanganya shimpatanje mboteko kupunda bhandu bha ku Tilo na ku Shidoni 15 Numbemwe a Kapalanaumu, bhuli nkupinga kwikwewa kuishila kunnungu? Ninkupinga gwiyywa kuishila kundamo ja bhawilenje." (Hadēs g86) 16 Penepo a Yeshu gubhashite, "Akumpilikani shiyanga mmanganya, anambilikani shiya nne, na akumposhelenga anamboshela nne. Na jojowe akaamboshela nne, akakwaaposhela bhandumile bhala." 17 Kungai, makumi shabha na bhahili bhala gubhabhujilengene bhalikwiinyelanga, bhalinkutinji, "Mmakulungwa nkali maoka ganakutupilikana kwa lina lyenu." 18 A Yeshu gubhaalugulilenje, "Nammweni Lishetani aligwa mbuti kumeta, kopoka kunnungu. 19 Mpilikananje, njikum panganya amuli ja libhata majoka na ibhalabhala, na mashili gowe gaka mmagongo, wala shakwa shoshowe shishimmenganje. 20 Ikabheje, nnainonyelanje ligongo maoka kumpilikananaga, ikabhe mwiinyelanje pabha mena genunji gashijandikwa kunnungu." 21 Pala pepala, a Yeshu gubhangalile Mmbumu jwa Ukonjelo bhalinkuti, "Ngunakuntendala eja mmwe Atati, Mmakulungwa bha kunnungu na pa shilambolyo, pabha yene indui nshikwaiyanga bhakwetenje lunda na lumanyiyo, nikwaalungulanga bhana bhashoko. Elo Atati, pabha yene ni kunnonyela." 22 Kungai gubhashite, "Atati bhashingamuya indu yowe. Jwakwa akumanya Mwana ikabhe Atati, na wala akwaamanya Atati ikabhe Mwana na jojowe jwapinjile Mwana kunnangula yeneyo." 23 Kungai a Yeshu gubhaalolilenje bhaajiganywa bhahho, gubhaabhalanjilenje kujika. "Mbaya meyo gakiwibhona yene inkwibhonangai! 24 Nguti, ashinkulondola bhahagwinji na bhapalume, bhalokolilenje kwiibhona yene inkubhonangai, ikabheje bhangaibhonanga,

na kupilikana inkupilikananagai ikabheje bhangaipilikananaga." 25 Bhaajiganywa bhahho bha shalia gubhajimi nikwaabhuya, nkupinga kwaalinga, "Mmaajiganywa, ndende bhuli mbate gumi gwa pitipiti?" (aiōnios g166) 26 A Yeshu gubhaajangwile, "Ijandikwe nndi nshalia?" Nkushoma nndi mwenemo? 27 Gubhajangwile, "Mwaapinje Bhakulungwa a Nnungu bhenu, kwa ntima gwenu gowe, na kwa mbumu yenu yowe, na kwa lunda lwenu lowe, na kwa mashili genu gowe. Na kabhili mumpinje nntami njenu malinga shinkwiipinga mmayene." 28 A Yeshu gubhaabhalanjile, "Elo, nnjangwile ukoto! Ntende nneyo shinname." 29 Ikabheje nabalabho nkupinga kwilanguya kuti bhaimanyi ibhabhushiye, gubhaabhushiye a Yeshu, "Igala ntami njangujo ni gani?" 30 A Yeshu gubhaajangwile, "Mundu jumo kukopoka ku Yelushalemu atendaga elela kwenda ku Yeliko. Ali mumpanda, gwaimene na bhaapokonyola, gubhanng'ulilenje nngubho yakwe, na kunkoma nikunneka agonile pa mpanda pala, tome nawa. 31 Bhabhishila bhahho gubhapitile mpanda gula, bhakammoneje gubhammemele. 32 Na nneyo peyo Bhalawi bhahho gubhapitile, bhakaisheje pepala, gubhammweni, na bhalabho gubhammemele. 33 Ikabheje Nshamalia jumo aliji mmwanja gwakwe kupitila mpanda gogo, akammoneje gwammonele shiya. 34 Gwanng'egejele, nikunng'uka ilonda kwa mauta na divai nigwaitabhiile, kungai gwankweshiye mmbunda jwakwe nikumpeleka ku nyumba jimo ja bhajeninji nikunnwaya. 35 Malabhi gwakwe gwatolile mmbiya, dinali ibhili gwabhapele bhayene nyumba bhala, alinkuti, 'Munnwaye jwene munduju, na shoshowe shishimpundesho, pushimujepo shininnipe" 36 Kungai a Yeshu gubhabhushiye, "Penepo bhene bhatatu bhala jwei ailangwile kuti ntami njakwe mundu akamwilwe na bhaapokonyola bhala?" 37 Bhaajiganywa bha shalia bhala gubhaajangwile, "Ammonele shiya jula." A Yeshu gubhaajangwile, "Nnjende nkatende nneyo peyo." 38 A Yeshu na bhaajiganywa bhahho bhalikwendangana ku Yelushalemu, gubhaikengenene shijiji shimo, penepo bhakongwe bhahho bhashemwaga a Malata, gubhaaposehe kunnwabho. 39 A Malata bhashinkukola apwabho bhashemwaga a Malia, bhenebho bhashinkutama pa makongono ga a Yeshu bhalipilikani shiya majiganyo gabho. 40 Ikabheje a Malata bhatendaga kamula indu yaigwinji. Bhai gubhaajendele a Yeshu, gubhaalugulile, "Mmakulungwa, igala nkalola kuti apwangabha bhashineshela maengo gowe? Bhai mwaabhalanjile bhanyangute." 41 Ikabheje Bhakulungwa gubhaajangwile, "A Malata, a Malata, nnakwiibhuka na kwiabhuya nng'indu yaigwinji. 42 Ikabheje shiipinjikwa shindu shimope. A Malia bhashiagula shindu sha mmbone kaje, wala mundu ngaapokonyola."

11 Lyubha limo a Yeshu bhashinkutama pa jika bhalikwaajuga a Nnungu, bhakamaliyeje, nkujiganywa jwabho jumo gwabhalugulile, "Mmakulungwa ntujing'anye kwaajuga a Nnungu malinga a Yowana Bhabhatisha shibhajigenye bhaajiganywa bhahho." 2 A Yeshu gubhaabhalanjilenje, "Punkwaajuganga a Nnungu, mmeleketanje nnei, 'Atati nni kunnungu, lina lyenu likuywe, Upalume gwenu uishe. 3 Ntupe shalya shetu mobha gowe. 4 Ntuleshelele yambi yetu, Pabha numbe uwe tunakwaaleshelanga bhowe bhakutulebhanga, Nnatubhishe mmalinjilo, ikabhe ntutapule na jwangali jwa mmbone jula."

5 Kungai gubhaalugulilenje, Gani akwete mbwiga njjakwe, nikunnjendela pakati shilo, nikummalanjila, shonde mbwiga nrjangu unyaima mikate jitungu, 6 pabha mmbwiga nrjangu ashiika kukopoka mmwanja, na nne nangali sha kumpa. 7 Na jwalakwe ali nnyumba pemo akajangwile, unang'abhuye! Nne nnaino ng'ugele nnango. Nne na ashibhanangu tugonile, ngakombola jumuka kukuupa! 8 Nkali anajumusha nikumpa kwa ligongo lyabha mmbwiga mwine, ikabheje, kwa ligongo lya punda juga, shajumushe nikumpa shoshowe shaajuga. 9 Kwa nneyo, mmanganya nnjuganje, shimpegwanje, nnoleyanje, shimpatanje, nng'olishiyanje, shinng'ugulilwanje. 10 Pabha jojowe ajuga anapegwa, aloleya anapata, na alolishya anaugulilwa. 11 Igala nng'inamundu jwashi mwanagwe anjuganga shamaki, shampe lijoka paala pa shamaki? 12 Eu ajugaga liji, bhampe shibhalabhala? 13 Nkali mmanganya, nninginji mmangalinginji bha mmbone, nnakwaapanganga ashibhana bhenu indu ya mmbone. Bhuli, Ainabhenunji bha kunnungu bhakapunda kwaapanganga Mbumu jwa Ukonjelo, bhene bhakwaajuganga bhala? 14 Lyubha limo a Yesu bhatendaga kunshoya lioka antendaga mundu jumo abhe bhuhhu. Bhai lioka jula akanshoshaje, mundu jula gwakombwele kubheleketa, lugwinjili lwa bhandu lukukanganigwaga. 15 Ikabheje bhandunji bhana gubhashitenje, "Bhanashoya maoka kwa mashili gaka Bhelishebhuli nkulungwa jwa maoka." 16 Bhananji nkwaalinga, gubhapinginjenje bhatende ilapo, imanyishe kuti mashili gabho, gaakopoka kwa a Nnunu. 17 Ikabheje a Yesu bhaimanyi ng'aniyo yabhonji, gubhaalugulilenje, "Upalume gogowe ugabhanikaga ukalonjeya, likaja lyolyowe lilekanaga shilipalaganishe. 18 Monaga Lishetani anakwikana nnyene, upalume gwakwe shuulonjeje bhuli? Bhai ngunabheleketa nnei pabha nnanugulanga kuti, ngunashoya maoka kwa mashili gaka Bhelishebhuli? 19 Monaga nne ngushoya maoka kwa mashili gaka Bhelishebhuli, bhaakagula bhenunji bhashoyanga maoka kwa mashili gaka gani? Kwa nneyo, bhanganyabho shibhann'ukumulanje. 20 Monaga ngushoya maoka kwa mashili ga a Nnunu, bhai mmumanyanje kuti Upalume gwa a Nnunu unng'ishilenje." 21 Mundu akwete mashili ali na ikomanilo yakwe, atamaga muulinda gwa nyumba jakwe, indu yakwe yowe shiilame. 22 Ikabheje aikaga akwete mashili ga kumpunda nikunkombola, jwenejo shampokonyole ikomanilo yakwe yowe yaikulupalilaga na kumpokonyola indu yakwe. 23 Jjojowe akakwilunda na nne, anaangana na jojowe akalopola na nne, anajaanga. 24 "Lioka jwangali jwa mmbone abhingwaga kukamundu, anapita jimajima nng'anga kuleleya pa pumulila. Akapabhona anakwibhalanjila, 'Shimuje kundamo jangu.' 25 Abhujaga nikujimana nyumba jila jipajilwe na jikonjeleywe, 26 bhai, anakwenda kwaatolanga ashimaoka bhana shabha, bhanginginji bha mmbone kupunda jwenejo, na bhowe bhanakunjinjilanga mundu jula. Kwa nneyo mundu jula, ali jakwe ja kumpelo, jinabha mbaya ja kundandubho jila." 27 Bhalibheleketa genego, bhakongwe bhamo nnugwinjili lwa bhandunji lula, kwa lilobhe lya utiya gubhashite, "Mbaya bhakongwe bhankwete na libhele linnjonele." 28 Ikabheje a Yesu gubhashite, "Mbaya kaje bhene bhakulipikananga lilobhe lya a Nnunu nikunda." 29 Lugwinjili lwa bhandu lukajenjeshesheje, a

Yesu gubhaabhalanjilenje, "Alu lubheleko lwa lebha, lunapinga shilangulo. Ikabheje lukapegwa shilangulo shoshowe ikabhe shilangulo sha a Yona. 30 A Yona bhaliyi shilangulo sha bhandunji bha ku Ninawi, nneyo peyo Mwana juka Mundu shapingabha shilangulo kwa lwene lubhelekolu. 31 Lyubha lya ukumu, a Malikia bha ku Shebha shibhakoposhele kukulukana lwene lubhelekolu. Pabha bhenebho bhashinkukoposhele kwaataliya, kwiya pilikanishiya malobhe ga lunda ga a Shelemani, ikabheje apano apali ali jwankulungwa kupunda a Shelemani. 32 Bhandunji bha ku Ninawi shibhakoposhelanje lyubha lya ukumu, kukulukana lwene lubhelekolu. Pabha bhandunji bha ku Ninawi bhaipetilenje kwa ligongo lya ntenga gwa a Yona, ikabheje apano apali ali nkulungwa kupunda a Yona! 33 "Jwakwa mundu akoleya kandilili nikujunishila eu nikujijiya, ikabhe pakujibhika panani itengu nkupinga bhandunji bhaajinjilangana bhashibhonanje shilangaya. 34 Liyo lyenu ni kandili ja shiilu shenu, libhaga lyalikoto, shiilu showe shishibhe nshilangaya. Liyo lyenu likalole, shiilu shenu shishibhe nnuhindu. 35 Bhai mwiiteje, shilangaya shinkwetesho shinatendebhushe kubha lubhindu. 36 Bhai monaga shiilu shenu showe shikolaga shilangaya gwangali pakwete lubhindu, shene shiilusho shishibhe na shilangaya kwa kaje, malinga kandili shijikuti kummulishila kwa shilangaya shakwe." 37 A Yesu bhakabheleketeje genego, Apalishayo bhamo gubhaashemele shalya kunngwabho, gubhapite tama kulya. 38 Apalishayo bhala gubhakanganigwe bhakabhonje kuti bhanalya gwangali kunabha. 39 Bhakulungwa gubhaabhalanjile, "Mmanganya Ashimapalishayo nnaukanganga shikombe na shaani kua, ikabheje nkati nngumbelenje kukwetela indu na yangali ya mmbone. 40 Mmanganya mmagulumba! Bhuli, aelele kua nngati jojo aelele na nkati? 41 Bhai nshoyanje mbepei kwa indu inkwetenje, na yowe shiinkonjanjanje." 42 "Ikabheje ole, Mapalishayo, pabha nnakwaapanganga a Nnunu lipungu lya kumi nkali lya maamba ga liponda, ikabheje nakwaatendelanga bhandu ipinjikwa na ibhapinga a Nnunu. Pukupinjikwanga nshoyanje yeneyo, gwangali kuleka gana gala." 43 "Ole Ashimapalishayo, pabha nnapinganga kutama itengu ya mmujo mmashinagogi, na komaywa pa lugwinjili. 44 Ole, pabha nshibhanganga mbuti makabhuli gangabhikwa shilangulo, bhandunji bhallibhatanga pantundu jakwe gwangali kumumanya." 45 Bhaajiganya bhamo bha shalia, gubhaalugulile, "Mmaajiganya, malobhe genu ganakutupetekuya nkali uwe." 46 A Yesu gubhaajungwile, "Na mmanganya mmaajiganya bha shalia ole, pabha nnakwaatikwanga bhandunji mishigo jatopa jikajigalika, akuno mwaashyene nkaakwayanga nkali kwa lukowe lumo kwaajungutanga. 47 Ole, pabha nnashenjelanga makabhuli ga ashinkulondola bha a Nnunu bhahulegwenje na bhanangulungwa bhenunji. 48 Kwa nneyo nnakong'ondelanga itendi ya bhanangulungwa bhenunji, pabha bhashikwabhaluganga ashinkulondola bha a Nnunu, na mmanganya nnashenjelanga makabhuli gabhonji. 49 Kwa nneyo, kwa Lumanyiyo lwa a Nnunu gubhashite, 'Shinaapeleshelanje ashinkulondola na mitume, ikabheje bhananji shibhaabhaluganje, na bhananji shibhaapotekanje.' 50 Kwa nneyo lwene lubhelekolu lupingagambwa kwa ligongo lya minyai ja ashinkulondola bha a Nnunu bhowe, bhahulegwenje kumila ku ndandubho

ja shilambolyo. 51 Kutandubhila kubhulagwa kwa a Abheli mpaka a Shakalia bhabhulegwe pakati pakati shitala na pa ukonjelo. Elo, ngunakummalanjilanga lwene lubhelekolu shilugambwe kwa yene itendiyo. 52 "Ole gwenunji mmanganya bhaajiganya bha shalia, pabha nshishoyanga nshungulo gwa nnango gwa lumanyiyo, mwaashayene mwangajinjilanga na bhajinjilanga bhala nshikwaibhilihanga bhanajinjilanje." 53 A Yesu bhakakoposheje mwemula, ashimapalishayo na bhaajiganya bha shalia bhala gubhatandubhenje kwaashimanga na kwaatega kwa ibhuyo yaigwinji, 54 nkupinga bhapatanje mwakwaakumulila kwa malobhe gabho.

12 Gene malangago bhashinkuluimana lugwinjili lwa bhandu maelupu, mpaka kuishila kulibhatana, a Yesu gubhatandwibhe kwaalugulilanga bhaajiganywa bhahho, Mwiiteiganje na ngedule ya mapalishayo, yani ugulumba. 2 Shakwapi shoshowe shiunishilwe shikaapinga unukulwa, na shoshowe shiishiywe shipinga manyika. 3 Kwa nneyo, yowe immeleketenje palubhindo, bhandunji shibhapiilikananje pa shilangaya na yowe imwanyinyitangaga nnyumba nni nng'ugelenje milango, ipinga lunguywa pa shipagala sha nyumba. 4 Ngunakunnugulilanga mwashaambwiga ajangu, nnaajogopanje bhahulaganga shiilu bhala, ikabheje bhakaakombolanga kutenda shina kupunda shenesho. 5 Shininnangulanje gani apinjikwa kujogopwa. Munnjogopanje jwene akombola kubhulaga, na abhulagaga anakombola kunnjaa mundu ku moto gwa kujeanamu. Elo, ngunakummalanjilanga, munnjogopanje jwenejo. (Geenna g1067) 6 Bhuli ndyondyo nng'ano ikashwa kwa ela ishokope? Ikabheje nkali jumo akalibhalika na a Nnungu. 7 Nkali umbo ya mmitwe jenunji a Nnungu bhaimanyi pwili ilingwa. Bhai, nnajogopanje, mmanganya mmambonenji kupunda ndyondyo yaigwinji! 8 "Kweli ngunakummalanjilanga, mundu jojowe ahangunde palugwinjili, Mwana juka Mundu shankunde pa ashimalaika bha a Nnungu. 9 Ikabheje, mundu jojowe angana pa bhandu najwalakwe apinga kanwa pa ashimalaika bha a Nnungu. 10 "Jojowe abheleketa malobhe ga nyata kuka Mwana juka Mundu shaleshelwe, ikabheje akunkupulu Mbumu jwa Ukonjelo akaleshelwa. 11 "Mmanganya pushibhampelekanje mmashinagogi kuukumulwa na bhatagwala na bhakulungwanji, nnakolanje lipamba lya shana bhuli pushimwitapulanje eu muubheleketelo. 12 Pabha popo pepo Mbumu jwa Ukonjelo shannjiganyanje sha bheleketa." 13 Mundu jumo nngwinjili lwa bhandu lula gwabhalugulile a Yesu, "Mmaajiganya, munnugulile nkulwangu tugabhane ulishi gubhatuleshele atati." 14 A Yesu gubhannjangwile, "Ambwiga, bai amishile nne kubha akimu na ngugabhanya jwenunji?" 15 Bhai a Yesu gubhaalugulilenje bhowenji, "Mwiiteiganje na shilokoli shoshowe, pabha gumi uka mundu ukatamila ga gwinji gwa indu yakwete." 16 Kungai gubhaatanjilenje lutango, "Ashinkupagwa mundu jumo tajili, atungwile yalya munnungunda gwakwe. 17 Jwene mundujo gwaganishiye muntima gwakwe, 'Shindende bhuli na nne nangali pagosheya yalya yangu? 18 Shindende nnei, shimomole nngokwe yangu na shinjenje jikulungwa, mwenemo shimishi yalya yowe na indu yangu. 19 Penepo shiniibheleketete shamuntima, nnaino ukwete shibhiko sha pwaa yaka ya igwinji.

Bhai pumulila, gwiilile na gwiing'wele na kuangalila.' 20 Ikabheje a Nnungu gubhannugulile, 'Mmangumba mmwe, shilo sha lelo ntima gwenu upinga tolwa. Na indu yowe imwiibhishile ila shiibhe ikeni?' 21 A Yesu gubhamalishiye kwa bheleketa, "Na malinga mundu akwiibhishila indu nnyene, ikabheje kwa a Nnungu jwangali shindu." 22 Kwa nneyo a Yesu gubhaabhalanjilenje bhaajiganywa bhahho, "Kwa lyene ligongolyo, nnakolanje lipamba ga shalya sha lamila, wala ga iwalo. 23 Pabha gumi ni gwa mmbone kupunda shalya, na shiilu ni sha mmbone kupunda iwalo. 24 Nngalanje makungulu, gakapanda na gakaneng'ena na wala gangali nngokwe jojowe. Nkali nneyo a Nnungu bhanakugaliya. Mmanganya ni bhambonenji kupunda ijuni! 25 Gani munkumbi gwenunji kwa lajilila kwakwe akombola kwijenesheya kapela lyubha limo lya gumi gwakwe? 26 Bhai, monaga nakombolanga kutenda shindu shishoko malinga shenesho, kwa nndi nnajilanje na ganago? 27 Nnolanje malubha ga mukonde shigakuti bhulika. Gakapota wala gakaluka. Ikabheje ngunakummalanjilanga, nkali a Shelemani na shuma kwabho kowe bhangawashwa kwa konja malinga lilubha limo. 28 Bhai ibhaga, a Nnungu bhanakuliwasha nneyo liamba lya mukonde linkulibhonanga lelo na malabhi linaleshelwa pamoto, bhuli, mmanganya bhakanng'washanga kupunda genego? Mmanganya bha ngulupai jishoko! 29 "Bhai nnaabhusilanje ga shalya eu ga ya papila wala nnakolanje lipamba. 30 Pabha bhandu bhowe bhakakwaamanyanga a Nnungu, yeneyo peyo ni ibhaabhusilanga. Ikabheje Ainabhenunji bhamumanyi kuti mmanganya nnakwiipinganga yene induyo. 31 Ikabhe nng'abhusilanje oti Upalume gwa a Nnungu, na ina yowe shimpatanje." 32 "Nnajogopanje, mmandunji bha likundi lishoko! Pabha Ainabhenunji bhashiengwa kumpanganga Upalume gwabho. 33 Nng'ushanje indu yenunji, mmbiyayo mwaapanganje bhaalaga. Mwalashyanje mipatila jangalala nikwiibhishila shibhiko kunnungu kuikaamala. Kweneko bhagwii bhakajinjilanga, wala mang'ong'ota gakaalibhia. 34 Pabha pushili shibhiko shenu na ntima gwenu shigubhe popo. 35 "Mmanganje tayali kwa liengo, na kandili yenunji ilikolela, 36 mmanganje malinga bhatumishi bhakwaalindililanga bhakulungwa bhahonji bhahuje kukopoka kundoo, nkupinga shangu bhaugulilanje pushibhaolishiye. 37 Mbaya bhene bhatumishi bhakulungwa bhahonji pushibhabhuje, shibhaaيمانanje bhalisheyanga! Kweli ngunakummalanjilanga, bhene bhakulungwabho shibhaibhishe ukoto kwa liengo, nikwaatamikanga bhalyanganje shalya, akuno bhalikwaatumishilanga. 38 Nkali bhahuje pakati shilo eu kumashelo, mbaya bhene bhatumishi bhushaiamananje bhalisheyanga! 39 Mmumanyanje kuti, kaliji nnyene nyumba akagananyi malanga ga kwiya nngwii, akasheshiye, wala akanaleshe nyumba jakwe jibhomolwe. 40 Nneila peila numbe mmanganya mmanganje muulolelo, pabha Mwana juka Mundu anakwiya malanga gunkakugalolelanga." 41 A Petili gubhaabhusiye a Yesu, "Mmakulungwa, lwene lutangolu ntutanjile uwepe, eu bhandu bhowe?" 42 Bhakulungwa gubhajangwile, Bhai, igala gani ali nkulungwa jwa bhatumishi akwete lunda, lwa kwaatenda bhakulungwa bhakwe bhammishi kubha nkulungwa jwa bhatumishi bhahho, nkupinga abhapanjanje shalya malanga ga pwaa? 43 Shiibhe

mbaya jwene nkulungwa jwa bhatumishijo, bhakulungwa bhakwe pushibhabhujepo bhanng'imane alitenda nneyo. **44** Kweli ngunakummalanjilanga, shibhantende nkulungwa jwa indu yabho yowe. **45** Ikabheje jwene ntumishijo aibheleketelaga sha muntima, bhakulungwa bhangu bhanakabha kubhuja, nitandubha kwaakomanga bhatumishi ajakwe, bhanabhalume na bhanabhakongwe, nilya na ng'wa na kolelwa, **46** bhakulungwa bhakwe shibhabhujje lyubha lyangaliololela na malanga gangagamanya, shibhannagabhanye ipande ibhili, nikummika pamo na bhagakulupalikanga. **47** Ntumishi akugamanya gubhapinga bhakulungwa bhakwe, ikabhe akaatenda ibhapinga, shapanyangulwe kaje. **48** Ikabheje akakumumanya jula, atendaga ya kummulaya apanyangulwe, shapanyangulwe kashoko. Jojowe apegwilwe yaigwinji, shalongwe yaigwinji, akulupalilwe kwa yaigwinji, shiipinjikwe yaigwinji. **49** "Njikwiya koleya moto pa shilambolyo, mbaya ukaliji ukoleywe! **50** Ikabheje njikola ubhatisho gungupinjikwa matishwe, ngunapupa ntima mpaka gwene ubhatishogo umalile! **51** Pungkuganishiyanga nyile peleka ulele pa shilambolyo? Wala kashoko, nngabha nyile ikabhe malekano. **52** Na kutandubhila nnaino, bhandunji nng'ano bha likaja limo bhapinga taukangana, bhatatu kwa bhabhili, na bhabhili kwa bhatatu. **53** Ainamundu shibhantaushe mwanagwabho, na mwana shabhataushe ainagwe, anyinamundu shibhantaushe mwali jwabho, na jwalakwe mwali shabhataushe akwabhe, akwemundu shibhantaushe nkamwanagwabho na nkamwanamundu shabhataushe akwebhakwe." **54** A Yesu gubhabhekete kabhili na lugwinjili, "Pungkugabhonanga maunde galikoposhela kulititimila lyubha, shangupe nnabheleketanga, 'Shijinye ula,' na jinanya. **55** Nnjibhonangaga mbungo ja kwibhanda jinipuga, nnabheleketanga, 'Kupingabhala lyubha,' na pwikubha nneyo peyo. **56** Mmanganya mmagulumba! Nnamanyanga kulondola kunya kwa ula eu kubhala kwa lyubha, kwa lola shilambo na kunani, bhai kwa nndi nkakujimanyanga jene miongwe jino? **57** "Kwa nndi mwaashayene nkaamuanga kutenda ya aki? **58** Monaga mmagongo njenu alikwenda kunshitakiya, mbaya kujuga kuleshelelwa nninginji mumpanda, nkupinga anampeleshe ku bhaukumula, na bhaukumula bhanakunkamuya kwa ashimanjola, na bhalakwe ashimanjola bhanakuntabha. **59** Kweli ngunakummalanjila nkakopoka mwenemo, mpaka nnipe mmbiya ja malishiya."

13 Gene malangago bhandunji bhana gubhaabhalanjilenje a Yesu ga bhandunji bha ku Galilaya bhabhulegwenje na a Pilato na minyai jabhonji gujianganyishe na minyai ja bhannyama bhahonji bha bhishila. **2** Na bhalabho a Yesu gubhaabhushienje, "Pungkuganishiyanga bhene Bhagalilayabho bhashinkukolanga yambi kupunda Bhagalilaya bhananji, nkali bhaabbulagwanje shana nneyo? **3** Nngabha nneyo, ikabheje nkali mmanganya nkaipetanje, nneyo peyo shintitimilanje. **4** Bhuli, bhene kumi na nane bhagwililwenje na nnala ku Shiloamu niwanganga bhala, punkuganishiyanga kuti bhashinkukolanga yambi kupunda bhandunji bhowe bhatamanganaga ku Yelushalemu? **5** Ngunakummalanjilanga nngabha, ikabheje nkali mmanganya nkaipetanje, nneyo peyo mmowe shintitimilanje." **6** Kungai a Yesu gubhaatanjilenje aluno lutango luno, "Bhandu bhama bhashinkukola nkongo gwa

ntini munngunda gwabho gwa mishabhibhu. Gubhapite kupinga bhakakabhe iepo yakwe, ikabheje kuguimana gwangaogola tini nkali jimo. **7** Bhai, gubhamalanjile ntumishi jwabho, 'Lola! Kwa yaka itatu natendaga kwiya kabha iepo ya gwene nkongogu, nangapata shoshowe. Guushele! Kwa nndi unaangabhanya litaka gwayoyo?' **8** Ikabheje ntumishi jula gwabhajangwile, 'Mmakulungwa, namwaka tuuleshe, niguolele liimbo na niutajile mbolela. **9** Ibhaga pashaka uogolaga iepo, shammbone, ibhaga lepe, bhai shiguushele.'" **10** Lyubha limo lya Pumulila a Yesu bhatendaga jiganya nshinagogi jimo. **11** Penepo bhashinkupagwa bhakongwe bhama bhaaliji na shigongo kwa yaka kumi na nane, pabha ashinkwaatama lioka jwangali jwa mmbone. Nngongo gwabho gwashinkupinda, bhakakombolaga kujinuka nkali kashoko. **12** A Yesu bhakaabhoneje gubhaashemile, gubhaabhalanjile, "A mama nnamile shilwele shenu." **13** Gubhaabhisile makono bhakongwe bhala, shangupe nngongo gwabho guugolweshe, gubhaiyiye a Nnangu. **14** Ikabheje bhakulungwa bha shinagogi gubhatumbele pabhaa Yesu bhashikunnanya mundu Lyubha lya Pumulila. Kwa nneyo gubhalubhalanjile lugwinjili lwa bhandunji lula, "Nkwenenje mobha shita ga kamula liengo. Bhai, nnjyangane gene mobhago kunnamiywanje ilwele yenuji, ikabheje nnajiyangane lyubha lya Pumulila." **15** Penepo Bhakulungwa gubhajangwile, "Mmanganya mmagulumba! Munkumbi gwenunji gani akanann'ugule ng'ombe eu mbunda jwakwe nshitundu ampeleshe kung'wa mashi, lyubha lya Pumulila? **16** Nnaino, apano apali jwankongwe jwa shipinga sha a Bhulaimu apotekwaga naka lishetani kwa yaka kumi na nane. Bhuli, nngabha sha mmbone kunnagopola shitabho shakwe lyubha lya Pumulila?" **17** A Yesu bhakabheketeje geneho, ashaamagongo ajabho bhowe gubhakwetenje oni ikabheje bhananji guyaanonyelenje kwa kaje kwa ligongo lya indu ibhatendile ila. **18** A Yesu gubhabhushiye, "Upalume gwa a Nnangu ulandana na nndi? Shiniulandanye na nndi? **19** Malinga mbeju ja aladali jili jishoko kaje jatolile mundu jumo nipanda munngunda gwakwe, gujimelile nibha nkongo. Ijuni guishenjile maui nnyambi yakwe." **20** Kabhili gubhabhushiye, "Shiniulandanye na nndi Upalume gwa a Nnangu? **21** Malinga ngedule shibhatolile bhakongwe bhama nianganya na utandi madebhe gabhili na nushu kungai utandi gowe guukwebhile." **22** A Yesu gubhapite na mwanja gwabho kuloya ku Yelushalemu bhalipita mwilambo na mwijiji, bhalipita jiganya. **23** Mundu jumo gwabhabhushiye, "Mmakulungwa, bhuli, bhandunji bhapinga tapulwanga ni bhashokope?" **24** A Yesu gubhaalugulilenje, Ntumbilanje kaje kujinjila kupitila nnango gwa nshoko, pabha ngunakummalanjilanga, bhandu bhahagwinji shibhalinganje kujinjila ikabheje bhakakombolanga. **25** Shigaishe mobha bhayene nyumba shibhajime niugala nnango. Mmanganya nkupinga jimangana palanga nitandubha kuolishiya nninkutinji, Mmakulungwa ntuugulile nnango. Ikabheje bhenebho shibhannjanganje, ngakummanyanga mmanganya wala kunkoposhelenje. **26** Numbe mmanganya shintandubhanje kwaalugulila, twatendaga kulya na ng'wa pamo na mmwe na mwatendaga jiganya mwilambo yetu. **27** Ikabheje na bhalabho shibhaajanganje, "Ngakummanyanga mmanganya wala kunkukoposhelanga, nshokangane mmanganya mmowe

mmalebhanga." 28 Penepo ni pushipingapagwa shililo na kutauna meno, pushimwabhananje a Bhulaimu na a Ishaka na a Yakobho na ashinkulondola bhowe bha a Nnungu bhalingini mu Upalume gwa a Nnungu, ikabheje mmanganya nnokololwenje palanga! 29 Bhapinga kwiyangana bhandunji kukoposhela mmbali yowe ya shilambolyo nitama pa shalya shaabhishilwenje mu Upalume gwa a Nnungu. 30 Nnole, bhapali bhalingini bha kumpelo shibhabhanganje bha kundandubho na bha kundandubho shibhabhanganje bha gwa kumpelo. 31 Gene malangapego, Mapalishayo na bhandunji bhana gubhaajendelenje a Yesu gubhaalugulilenje, "Nnjabhule apano njenje mmbali jina, pabha bhakulungwa a Elode bhanapinga kummulaga." 32 A Yesu gubhaajangwilenje, "Nnjendangane nkaalilugulilanje lyene lyananshetolyo nneino, 'Lelo na malabhi shinjoye maoka na kwaalamyanga bhalwelenje na ntongo shimaliye liengo lyangu.' 33 Nkali nneyo, lelo na malabhi na ntongo, ngunapinjikwa nyende mwanja gwangu, pabha ikapinjikwa ankulondola bha a Nnungu bhahulugawe kunyenje shilambo sha Yelushalemu. 34 "Ugwe Yelushalemu! Yelushalemu! Unakwabhaluganga ashinkulondola bha a Nnungu nikwaakomanga maganga bhatumilwenje kunnungwako. Palingwa pumbinjile kwaagutamilanga bhana bhako pamo mbuti namwana jwa nnguku shakuti kwaagutamilanga bhana bhakwe mmapapiko gakwe, ikabheje gwangapinga. 35 Nnolanje! Shinneshelwanje ushubha nshilambo shenunji. Bhai, ngunakummalanjilanga, nkamonanga kabhili mpaka pushimmeleketanje kuti, 'Bhakwete Mboka bhene bhakwiya kwa lina lya Bhakulungwa.'"

14 Lyubha limo lya Pumulila a Yesu bhashinkwenda kulya shalya kumui kwa akalongolele bhamo bha Mapalishayo, bhandunji bhapalinji penepo gubhaalolesheyenje kwa kaje. 2 Mmujo jabho a Yesu ashinkupagwa mundu nnwele shitaka. 3 A Yesu gubhaabhushiyenje bhaajiganya bha shalia na Mapalishayo, "Ilipinjikwa eu ikapinjikwa kunnanya mundu Lyubha lya Pumulila?" 4 Ikabheje bhanganja bhala gubhatemingenje ilili. A Yesu gubhankamwile nnwele jula gubhannamiye, gubhanneshile aijabhulile. 5 Kungai gubhaabhushiyenje, "Munkumbi gwenunji gani mwanagwe eu ng'ombe jwakwe atumbushilaga nniiko, akananshoye pabha Lyubha lya Pumulila?" 6 Ikabheje bhagakombolanga kwajaangula. 7 A Yesu bhakaabhananje bhashemilwenje bhala shibhatendaga kwiagulilanga itengu ya mmujo, gubhaalugulilenje. 8 "Ibhaga mundu anshemaga kundoa, nnatame pa shitengu sha mmujo, inabha apali juna ashemilwe jwa kupunda mmwe. 9 Bhanshemilenje bhala shibhajiye kummalanjila, 'Mwaapiye abha.' Penepo nkupinga kola oni pa bhandu bhowe nnikwendatama shitengu sha nnyuma. 10 Ikabhe nshemwaga ntame shitengu sha nnyuma, nkupinga nnyene nyumba ajiyaga annugulile, 'Ambwiga, nniyiye mmujo muno.' Penepo nkupinga ishimiyya na bhowe bhatemingenje pamo na mmwe. 11 Pabha, jojowe akwiikweya apinga tuluywa, na akwiitulya apinga kweyya." 12 Kungai gubhaabhalanjile na bhashemile bhala, "Punkuteleka kalamu ibhe mui eu shilo, nnaashemanje ashaambwiga ajenu eu ashaalongo ajenu eu ashaatami ajenu bhalingini matajilipe, na bhalabhonji bhana kwiya kunshemanga nibha nnipliwe yumwaatendelenje ila.

13 Ikabheje, punkuteleka kalamu, mwaashemanje bhaalaga, bhaalemalanga na ashinangwabha na ashinangalole, 14 na mmwe shimpate mboka, pabha bhene bhanganjabho bhanginginji sha kunnipa. A Nnungu shibhampe upo yenu lyubha lishibhayukanje bhandunji bhakwetenje aki." 15 Mundu jumo munkumbi gwa bhatemingenje na a Yesu pa shalya gwashite, "Mbaya jwene mundu shalye kalamu mu Upalume gwa a Nnungu." 16 A Yesu gubhannangwile, "Bhandu bhamo bhashinkuteleka kalamu jikulungwa, gubhaashemilenje bhandunji bhahagwini. 17 Lyubha lya kalamu likaishileje gubhantumile ntumishi jwabho akaalugulilanje bhashemilwenje bhala kuti, 'Nnjyangane, indu yowe ili tayali.' 18 Ikabheje bhowe, gubhatandwibhenje kwiilugula jumo jumo. Jwa ntai gwashite, 'Njigombola nngunda, kwa nneyo ngunapinjikwa nyende ngaulole shonde bhai, uneshe nyende.' 19 Na juna gwashite, 'Njigombola ng'ombe ya lima, majela nng'ano, kwa nneyo ngunakwenda kwiilinga, shonde bhai uneshe nyende.' 20 Na juna gwashite, 'Njilomba, kwa nneyo ngaika.' 21 "Ntumishi jula gwabhujile nigwabhalugulile bhakulungwa bhakwe jene nganijo. Bhayene nyumba bhala gubhatumbele, gubhannugulile ntumishi jwabho, 'Ujende shangu kumpanda njindo na mmipanda ja pa shilambo pano, ujienabhonji nnyumba muno bhalaga, na ashinangwabha, na ashinangalole, na bhaalemalanga.' 22 Kungai ntumishi jula gwashite, 'Mmakulungwa, innajile ila ndendile, ikabheje mwaatama mwatangu.' 23 Bhakulungwa bhala gubhannugulile ntumishi jula, 'Ujende mmipanda njindo na mipanda ja pa shilambo pano ukaashishilishiyenje bhandunji bhajiyangane, nyumba jangu jigumbale. 24 Ngunakummalanjilanga mmowe kuti, jwakwapi nkali jumo munkumbi gwa bhunaashemilenje gwantai bhala shapaye shalya shangu.'" 25 Penepo, likukute likulungwa lya bhandu gulilongene na a Yesu. Bhai, gubhaatendebhushilenje bhandunji gubhaalugulilenje, 26 "Mundu jojowe apinga kubha nkujiganywa jwangu ambinje, kupunda shakutikwaapinga ainagwe na akwabhe na akagwe na ashibhanagwe, na ashaapwakwe na ashaalumbugwe na nkali kupunda shakuti kwiipinga nnyene. 27 Mundu akaujigale nshalabha gwakwe ningagula akakombola kubha nkujiganywa jwangu." 28 Pabha, gani munkumbi gwenunji apingaga kushenga nuala, akatandubha kutama nilola galama jakwe nkupinga amumanye ibhaga akwete mmbiyaya malila? 29 Inabha atandubhaga kushenga nshingi niilepela kumaliya, bhandunji shibhalolanjebho shibhann'ekanje, 30 bhalinkutinji. Aju munduju atandwibhe kushenga, ikabheje ashilepela malishiya. 31 Eu mpalume jwashii apinga kwenda komana na upalume guna, anatandubhe kutama ni niganishiya ibhaga shakombole na ashimanjola bhakwe elupu likumi limo, kwenda komana na a mpalume bhakwete manjola elupu makumi gabhili? 32 Abhonaga akakombola, shatume ntengo kupinga ulele bhakanabhe bhandishila. 33 Bhai nneyo pyo, akapagwa nkali jumo munkumbi gwenunji apingabha nkujiganywa jwangu, akaleshe indu yowe yakwete. 34 "Nnjete ni ja mmbone, ibhaga jikanonye, jitagwe nndi jinonye kabhili? 35 Jikapwaa kwa litaka wala kwa tenda mbolela. Ikabheje pakujijaa kwa taliya. Akwete makutujo apilikane!"

15 Lyubha limo, bhakamula koli na bhaatendanga yambi bhabhagwinji bhashinkwiyangana kukwaapiikanishiya a Yeshu. **2** Mapalishayo na bhaajiganya bha shalia gubhatandubhenje kuinginika, "Mwalolanje abha bhandubha! Bhanakwaashemanga bhakwetenje yambi, na bhanalya nabhonji." **3** A Yeshu gubhaatanjilenje lutango. **4** "Ibhaga, munkumbi gwenunji mundu akolaga ngondolo makumi kumi, jumo aobhaga, bhuli, akaalekanga makumi tisha na tisha bhala pakonde, nikwenda kunnoleya aobhile jula mpaka ampate?" **5** Ampataga, apinga kunnijaga pashilembele alikwiinonyela. **6** Aikaga kumui, apinga kwaashemanga ashaambwiga ajakwe nikwaalugulilanga, 'Twinonyele tubhowe, pabha nimpatile ngondolo jwangu aobhile.' **7** Nneyo peyo ngunakummalanjilanga, pwiipingabha kwiinonyela kunnungu, kwa ligongo lya kwiipeta mundu jumo akwete yambi, kupunda bhandu makumi tisha na tisha bhakwetenje aki, bhakaapinjikwanga kwiipeta." **8** "Eu nkubhonanga bhuli? Tujile jwankongwe jumo akwete ela likumi limo, aobhyaga jimo, shatende nndi? Shakoleye kandili nipejila nyumba nishaimba kuloleya mpaka ajibhone. **9** Ajipataga, shabhashemanje ashaambwiga ajakwe na ashaatami ajakwe alinkuti, 'Twinonyele, pabha ela jangu jaobhile jila nijibhweni.' **10** Nneyo peyo ngunakunnugulilanga, shiikutibha a nng'angalo kwa ashimalaika bha a Nnungu, kwa ligongo lya mundu jumo akwete yambi akwiipeta." **11** A Yeshu gubhapundile kubheleketa, Bhashinkupagwa bhandu bhama bhaakwete bhashanda bhabhili. **12** Jwannung'una jula akwaabhalanjilaga ainagwe. "Atati mmbe ulishi gwangu." Na bhalabho gubhaagabhanishiyeje mali gabho. **13** Gakapiteje mobha gashoko, jwannung'una jula gwaushiye ulishi gwakwe, gwapite kushilambo sha talika na ela yakwe ila, gwajonenje nkulabhalabha. **14** Akamaliyeje indu yowe, gushikoposhele shibhanga shapunda nshilambo mula, gwatandwibhe kulaga. **15** Gwajujile liengo kukanshilambo jumo jwa kweneko, jwalakwe gwampeleshe kunnungunda gwakwe kuliya ngulubhe. **16** Atendaga lokolila shalya sha ngulubhe, ikabhe jwakwapi mundu ampele shindu. **17** Ikabheje akalumatileje muntima gwakwe gwashite, bhatumishi bhalingwa kwa atati kula, bhalyanganga nilepela, akuno nne niliwa shibhanga? **18** Shimuje kwa atati ngaabhalanjile kuti, atati, njilebha Kunnungu na kwenu mmwe. **19** Ngapinjikwa kushemwa kabhili mwanagwenu. Nndende mbuti ntumishi jwenu. **20** Bhai gwajabhile kubhuja kwa ainagwe. "Ikabheje ali kwaataliya, ainagwe gubhamweni, nikummonela shiya gubhammutushile kukunnyambatila akuno bhalikunnambanga. **21** Mwanamundu gwashite. Atati njikwaalebhela a Nnungu, na njikunnebhela na mmwe. Ngapinjikwa kabhili kushemwa namwanagwenu. **22** Ikabheje ainagwe gubhaalugulilenje bhatumishi bhabho, 'Shangu! Ntolanje nngubho ya mmbone munng'wahanje! Munng'wahanje lupete na ilatu! **23** Munng'inganje ng'ombe jwa mmbone jwa jimbala, tulye na tuangalile! **24** Pabha kwangu nne mwananguju aawile, mbena jwankoto ashinkuobha, ikabheje nnaino abhoneshe.' Gubhatandubhenje kuangalila. **25** "Gene malangago nkulugwe jula, paliji akanabhebhuja kunnungunda. Pabhujaga alibhandishila kumui, gwapiikene nyimbo na iindo ya ina. **26** Gwanshemile ntumishi jumo, gwammushiye, 'Shipali nndi?' **27** Ntumishi jula gwannangwile, 'Mpwako abhujile, na

ainago bhashinkung'injila ng'ombe jwa mmbone jwa jimbala, pabha bhampatile mwana gwabho ali jwankoto.' **28** "Nshanda jwankulu jula guinshimile, gwakanile kujinjila nnyumba. Ainagwe gubhakopweshe palanga kukunshondelesheya ajinjile. **29** Ikabheje jwalakwe gwabhajangwile, 'Nno!le! Yaka yowe nne njikuntumishila na nganabhekana amuli yenu wala lyubha limo. Ikabheje nkanabhembra nkali mwana jwa mmbui jumo, ng'angalale na ashaambwiga ajangu! **30** Ikabheje mwana gwenu ajonenje indu yenu na majajana, akabhujeje shangupe nshinkung'injila ng'ombe jwa mmbone jwa jimbala.' **31** Ainagwe gubhannangwile, 'Mwanangu, ugwe puli na nne mobha gowega, na indu yowe ingwete nne yako. **32** Ikabheje tushipinjikwa kuangalila nkwinonyela pabha mpwako awile jula, mbena jwankoto, ashinkuobha, nnaino abhoneshe.'" **16**

A Yeshu gubhaalugulilenje bhaajiganywa bhabho, "Ashinkupagwa tajili jumo na nyapala jwakwe. Tajili jula ashinkulugulilwa, kuti nyapala jwabho anatapanya indu yabho. **2** Tajili jula gwanshemile, nikummuya, 'Indu yashi yako ugwe ingupilikana? Utende malonda ga indu yangu yuposhele na yulile, pabha ukaapinjikwa kubha nyapala kabhili.' **3** Nyapala jula gwaganishiye, 'Bhakulungwa bhangu bhanaminga liengo lya unyapala, shindende bhuli? Nangali mashili ga lima, pita juga ngunakola oni. **4** Elo, nishimanyi sha tenda nkupinga pushimingwe liengopo, bhandunji bhanjemelanje kunnwabhonji.'" **5** "Bhai, gwabhashemilenje jumo jumo, bhakwetenje magambo bhowe kubhakulungwa bhakwe, gwammushiye jwa ntai jula, 'Yukulongwa na bhakulungwa ilingwa?' **6** Jwalakwe gwajangwile, 'Nndobho 180 ya mauta ga sheituni.' Nyapala jula gwannugulile, 'Tola shipande sha ligambo lyako, shangu ujanidhe nndobho makumi tisha.' **7** Na gwammushiye akwete ligambo jwa bhili, 'Ugwe ulongwa nndi?' Jwalakwe gwajangwile, 'Magunia 1,000 ga ngano.' Nyapala jula gwannugulile, 'Tola shipande sha ligambo lyako, shangu ujanidhe magunia mia nane.'" **8** Bhai tajili jula gwannumbilile nyapala jula, kwa penya kwakwe. Pabha bhandunji bha pa shilambolyo pano bhanapenyanga pubhatendanga indu na ashaajabhonji, kupunda bhandunji bha Upalume gwa a Nnungu. (aiōn g165) **9** Na bhalabho a Yeshu gubhapundile kubheleketa, "Na nne ngunakummalanjilanga, mpanganje mbwiga na bhandunji kwa mali ga pa shilambolyo, nkupinga gamalaga, mposhelwanje kundamo ja pitipiti. (aiōnios g166) **10** Jowowe shakulupalilwe kwa indu yaishoko, shakulupalilwe nkali kwa indu yaikulungwa, na jowowe akaakulupalika kwa indu yaishoko, akaakulupalika nkali kwa indu yaikulungwa. **11** Bhai ibhaga, mmanganya nakulupalikanje kwa mali ga pa shilambolyo, gani shampanganje mali ga kweli? **12** Na nakulupalikanje kwa mali gaka mundu juna, gani shankamuyanje mali genunji mwaashayene? **13** "Jwakwapi ntumishi akombola kwaatumishilanga bhakulungwanji bhabhili, pabha shanshime jumo nikumpinga junajo, eu shann'ishimiye jumo na junajo nikunnyegaya. Nkakombolanga kwaatumishila a Nnungu pamo na mali." **14** Ashimapalishayo bhalinginji bhaapinganga mmbiya, bhakapilikananjeje genego, gubhaeshilenje nkwaanayegaya. **15** A Yeshu gubhaalugulilenje, "Mmanganya nnakwitendanga

nkwetenje aki pa bhandu, ikabheje a Nnungu bhajimanyi mitima jenunji, pabha shene shibhoneka sha mmbone kubhandu, a Nnungu pubhakushibhona sha bhiiyabhiya. **16** "Shalia na ashinkulondola, yaapali mpaka malanga ga a Yowana Bhabhatisha. Kutandubhila penepo, ngani ja mmbone ja Upalume gwa a Nnungu jinalunguywa, na kila mundu anakwiiinjijya kwa mashili. **17** Ikabheje ikakola ukomu kunnungu na shilambolyo kupita, kupunda nkali shipande shishoko sha Shalia kushoywa. **18** "Jojowe akunneka nkagwe nilomba juna, analabhalabha, na jojowe ankunomba jwankongwe aleshilwe, analabhalabha." **19** Ashinkupanga mundu jumo tajili, awalaga nngubho pa mmbiya yaigwiji ya langi ja shambalau na ya kitani ja takata, alipoka mobha gowe. **20** Na pannango gwakwe atendaga tama nkulaga jumo, liina lyakwe Lashalo, akwete ilonda shiilu showe. **21** Lashalo atendaga lokolila malepei gaagwaga pa mesha jika tajili jula, nkali mbwa yatendaga kwiya kunnambanga ilonda yakwe! **22** Bhai nkulaga jula akuwaga, ashimalaika bha kunnungu gubhantolilenje, nikwenda kummika pubhaliji a Bhulaimu. Na tajili na jwalakwe gwawile, nishikwa. **23** Tajili jula ali mmboteko ya punda kundamo ja bhawilenje, gwajinwile meyo, gwabhahweni a Bhulaimu kwataliya bhali nagwe Lashalo, (Hades g86) **24** Bhai, gwabhashemile kwa utiya, "Ambuje a Bhulaimu, mmonene shiya, muntume Lashalojo kapela shikowe ashubhishe mmashi, andolishiye nnulimi lwangu, pabha ngunapotekwa kwa kaje pamoto pano." **25** Ikabheje a Bhulaimu gubhajangwile, "Kumbushila mwanangu, kuti ugwe ushinkupoka nndamo jako, na Lashalojo ashinkulaga. Ikabheje nnaino, jwalakwe anapoka na ugwe unapotekwa kwa kaje. **26** Kupunda genego, pakatipakati jetu uwe na mmanganya, lishibhikwa liimbo likulungwa, nkupinga bhapinganga kwiya kunnungwenunji kukoposhela akuno bhanakombolanje, na bhapinganga kwiya kwetu uwe kukoposhela kweneko bhanakombolanje." **27** Tajili jula gwashite, "Bhai ambuje a Bhulaimu, shonde bhai muntume Lashalo ajende kulikaja iya atati, **28** pabha njikola ashapwanga nng'ano, akaalungushiyanje nkupinga bhanaikangane kumboteko kuno." **29** Ikabheje a Bhulaimu gubhajangwile, "Ashapwako bhakwetenje a Musha na ashinkulondola, bhaapiilikalanje bhanyabho." **30** Ikabheje na jwalakwe gwashite kabhili, "Nngabha nneyo ambuje a Bhulaimu, ikabhe mundu ayukaga nikwaajendelanga, shibhaipetanje." **31** Na bhalabho a Bhulaimu gubhajangwile, "Ibhaga bhakaapiilikalanje a Musha na ashinkulondola bha a Nnungu, bhakakundanga nkali mundu akayushile."

17 A Yesu gubhaalugulilenje bhaajiganywa bhahho, "Indu ikwaatendanga bhandu bhatendanje yambi shiikoposhelepe. Ikabheje ole gwakwe jwene mundu akwiitenda ikoposhele jula. **2** Ikaliji mbaya atabhilwe liganga likulungwa iya yajila nnukoi nitumbushiywa mmashi, nngabha kunnebhyo jumo bhene bhabhashokobha **3** Mwiiteiganje! "Monaga mpwenu annehelaga, munneye, aipetaga, munneshelele. **4** Na nkali annehelaga mala shabha kwa lyubha limo, na kila mwanja alikunjiila akuno alinkuti, 'Ngunakwiipeta nneshelele' munneshelele." **5** Mitume gubhaabhalanjenje Bhakulungwa a Yesu. "Ntujenjesheye ngulupai." **6** A Yesu gubhaajangwilenje. "Nkakwetenje ngulupai jishoko kapela ja malinga mmebeju ja aladali, nakakombolenje kuubhalanjila agu

nkujugju, 'Tutumbuka ukaiwandishile mbhaali,' ukampilikenenje." **7** "Ibhaga mundu jumo munkumbi gwenunijimo akwete ntumishi, analima eu anashunga ngondolo. Bhuli, pabhuja kukoposhela kunnungunda, shammalanjile ntumishijo. 'Tenda shangu kuulye shalya?' **8** Nng'oo! Shammalanjile, 'Ndeleshela shalya, gwilume undumishile mpaka maliye kulya na ng'wa, penepo numbe ugwe shulye na ng'wa.' **9** Bhuli, mundujo shantendele eja jwene ntumishijo kwa ligongo iya maliya yowe yalajilwe? **10** Bhai na mmanganya nneyo peyo nkamulangaga yowe innajilwenje, mmeleketanje kuti, 'Uwe tubhatumishi twangali mbwaiko, tushikamulape maengo getu.'" **11** A Yesu bhali mumpanda kwenda ku Yelushalemu bhashinkupita mumpika gwa ku Shamalia na ku Galilaya. **12** Bhalijinjala nshilambo shimo, bhandunji kumi bhamangundula bhashinkwajijilanga a Yesu, gubhajimingene kwa taliya. **13** Gubhautiyenje llobhe bhalinkutinji, "Mmakulungwa a Yesu, ntubhonele shiya!" **14** A Yesu bhakaabhananjeje gubhaabhalanjenje, "Nnjendangane nkailanganje kubhaabhisshila." Bhai, akuno bhalikwendangana, gubhalamilenje. **15** Jumo jula akabhoneje kuti alamile, gwabhujile alikwaakuya a Nnungu kwa lilibhe iya utiya. **16** Gwatindibhele pa makongono ga a Yesu nkutenda eja. Jwenejo paaliji Nshamalia. **17** Ikabheje a Yesu gubhabhushiye, "Bhuli, nngabha bhandu kumi bhalamiywenje? Tisha bhala bhalinginji kwei? **18** Bhakwapinji bhandu bhananji bhahujilengene kukwaakuya a Nnungu, ikabhe nnenipeju?" **19** Kungai gubhammalanjile mundu jula, "Jinuka gwiijendele, ngulupai jako jikulamiye." **20** Lyubha limo, Ashimapalishayo bhashinkwaabhuyanga a Yesu, "Upalume gwa a Nnungu puukwiya shakani?" Gubhaajangwilenje, "Upalume gwa a Nnungu ukaika kwa bhoneka. **21** Wala bhakabheleketanga, 'Aguno apano' eu 'Agula akula.' Pabha Upalume gwa a Nnungu muuli munkumbi gwenunji." **22** Kungai gubhaalugulilenje bhaajiganywa bhahho, "Shigaishe mobha gushinnokolilanje kapela nkaliwhweninji lyubha limo lika Mwana juka Mundu, ikabheje nkaliwhonanga. **23** Na bhandunji shibhammalanjanje, 'Nnolanje abhala akula eu, Abhano apano!' Nnaakagulanje. **24** Pabha shiibhe malinga kumeta kwa nnjai, jinabhalula shangupe nilangaya mmbali yowe, nneyo peyo shiipingabha lyubha iya kwiya Mwana juka Mundu. **25** Ikabheje gakanabhe koposhela genego, anapinjikwa apotekwe kwa kaje na kanwa na bhandunji bha luluno lubheleko luno." **26** Na malinga shiyaliji mobha ga a Nuu, shiipinga kubha gene mobha gaka Mwana juka Mundu. **27** Bhandunji bhatendaga lyanganga na ng'wa, bhatendaga lombanga na lombwa, mpaka lyubha libhajinjile a Nuu shapina. Nduluko gujiishe nikwaanititimiya bhowe. **28** Nneyo peyo shiibhe malinga puyakoposhele mobha ga a Lutu. Bhandunji bhatendaga lyanganga na ng'wa, bhaliumanga na pinda, bhalilimanga na shenga. **29** Ikabheje lyubha libhajawile a Lutu ku Shodoma, moto na bhonga yashinkunya mbuti ula kukopoka kunnungu, nikwaanititimiya bhowe. **30** Na malinga pushiibhe lyubha iya kwiya Mwana juka Mundu. **31** "Lyene lyubhalyo, jojowe shabhe pashitubhili na indu ili nnyumba, anatushe kutola indu yakwe. Nneyo peyo ali kunnungunda anabhujii kumui kutola shindu shoshowe. **32** Nkumbushilanje gaaimene akongobhabho a Lutu. **33** Jojowe shapinje kwiitapula nnyene shaiobhye, na

shaiobhayejo shaitapule. 34 Ngunakummаланjilanga, shene shiloshlo bhandunji bhabhili bhagonilenje pamo, jumo shotolwe na juna shalekwe. 35 Bhanabhakongwe bhabhili bhaliyaganga pamo, jumo shatolwe na juna shalekwe." 36 Bhandunji bhabhili shibhabhanganje mungunda, jumo shatolwe na juna shalekwe. 37 Penepo gubhaabhushiyenje, "Kwei Mmakulungwa?" A Yeshu gubhaajangwilenje, "Puugonile ntui ni pugaimana matumbui."

18 Bhai a Yeshu gubhatagulile lutango lwa kuti, inaapinjikwa kwaajuga a Nnunu mobha gowe, gwangali kuwa ntima. 2 Gubhashite, "Nshilambo shimo bhashinkupagwa bhaukumula bhama bhakaajogopaga a Nnunu na wala kujali bhandu. 3 Na nshilambo shosho, bhashinkupagwa bhakongwe bhama bhashitenga bhatendaga kwaajendela bhene bhaukumula bhala bhalinkuti, 'Nng'ukumule mbate aki jangu kuka mmagongo njangu.' 4 Gakupitaga mobha gamagwinji bhaukumula bhala bhalikana, ikabheje, kungai gubhailugulile bhayene. 'Nkali ngakwaajogopa a Nnunu na wala ngajali bhandu, 5 ikabheje pabha abha bhashitengabha bhanangoya ukomu, shinaukumule bhapate aki jabho, bhanapunde kwiya ndotoya!'" 6 Bhai Bhakulungwa a Yeshu gubhashite, "Mpilikananje shibhashite bheleketa bhene bhaukumula bhangali bha mmbone bhala. 7 Bhuli, a Nnunu bhakaatendelanga aki bhaagulwenje na bhayene, bhakwaagutilanga shilo na mui? Bhuli shibhakabhe kwaajangutilanga? 8 Ngunakunnugulilanga shibhaajangutilanje shangupe. Ikabheje, bhuli pa shilambolyo shipabhe na ngulupai mobha gashaishe Mwana juka Mundu?" 9 A Yeshu gubhaatanjilenje aluno lutango luno, bhene bhaibhonangaga kuti bhakwetenje aki, nikwaanyegayanga bhananji bhowe. 10 "Bhandunji bhabhili bhashinkujombokanga kwenda kwaajuga a Nnunu Kuliekalu, jumo paaliji Mpalishayo, na juna nkamula koli." 11 "Mpalishayo jula gwajimi, nikwaajuga a Nnunu shamuntima nnei, 'Mmwe a Nnunu ngunakuntendela eja pabha nne nngabha malinga bhananji, bhadokanga na bhalambilanga eu bha labhalabha. Ngunakuntendela eja pabha nne nngabha malinga aju nkamula koliju. 12 Ngunatabha pabhili kwa juma jimo, ngunashoya mbepei ya lipungu lya kumi lya indu yangu yowe ingupata.'" 13 "Ikabheje nkamula koli jula, ali ajimi kwataliya alijogopa nkali kujinula meyo gakwe kunnungu, ikabheje alikwiikoma pantima kwa kwibhonela shiya, gwashite, 'Mmwe a Nnunu mmonele shiya nne ngwete yambi.' 14 Ngunakummаланjilanga, Nkamula koli jula pabhujile kunnungwawe ali abhalanganishiywe aki na a Nnunu kupunda Palishayo jula. Pabha jojowe akwiikweya shaatulyuwe, na jojowe akwiitulya shaakweywe." 15 Bhandunji gubhaapeleshelenje a Yeshu bhana bhashoko nkupinga bhaabhishilanje makono na bhaajujilanje mboka. Bhaajiganywa bhabho bhakaabhonanje, gubhaakalipilenje. 16 Ikabheje a Yeshu gubhaashemilenje bhalinkuti, "Mwaalekanje bhana bhashoko bhanyiilanje, wala nnaaibhilianje, pabha Upalume gwa a Nnunu ni gwa bhandunji malinga bhanganyabha. 17 Kweli ngunakummаланjilanga, mundu jojowe akauposhele Upalume gwa a Nnunu malinga mwana jwanshoko, akajinjila Muupalumemo." 18 Akalongolele bhama bha Shiyaudi bhashinkwabhuya a Yeshu, "Mmajiganya mmbone, ndende bhuli mbate gumi gwa pitipiti?" (aiōnios

g166) 19 A Yeshu gubhaajangwile, "Pakuti nnaanema najwa mmbone? Jwakwa ali jwa mmbone ikabhe a Nnunu jikape. 20 Gwimanyi shalia. 'Unalabelabhe, unabhulaje, unajithe, unakong'ondele ya unami na gwaashimie ainago na akwenu.'" 21 Nshanda jula gwabhalugulile, "Gene gowego nigakamwile tandubhila kuuungwendo gwangu." 22 A Yeshu bhakapilikaneje genego, gubhammalanjile, "Ushitubhilwa shindu shimo, ukaushe indu yako yowe yuukwete, na mmbiyayo gwaagabhilanje bhalaga, na ugwe shiukole shibhiko shako kunnungu, kungai ujie kuungagule." 23 Ikabheje mundu jula akapilikaneje genego, gwainginishe kwa kaje, pabha ashinkukola mali gamagwinji. 24 A Yeshu gubhannolite gubhashite, "Shiibhe ukomu kuka tajili kujinjila Muupalume gwa a Nnunu! 25 Kweli, shiikombeshe ngamia kupeleta palilanga lya ingano, kupunda tajili kujinjila Muupalume gwa a Nnunu." 26 Bhandunji bhala bhakapilikaneje genego, gubhaabhushiyenje, "Bhai igala gani shakombole tapulwa?" 27 A Yeshu gubhajangwile, "Gakaakomboleka na bhandunji, kwa a Nnunu ganakomboleka." 28 A Petili gubhashite "Nnole uwe tushileka indu yetu yowe itukwete nikunkagula!" 29 A Yeshu gubhaalugulilenje, "Kweli ngunakummаланjilanga, mundu jojowe aleshile nyumba eu akagwe eu akulugwe eu bhankwetenje eu bhana kwa ligongo lya Upalume gwa a Nnunu, 30 Shaposhele yaigwinji kwa kaje agano mobha gano, na gumi gwa pitipiti mobha gakwiyo." (aiōn g165, aiōnios g166) 31 A Yeshu gubhaatolilenje likumi limo na bhabhili bhala kunyenje, nigubhaabhalanjilenje, "Mpilikananje! Tunajomboka kuloya ku Yelushalemu, kweneke gowe gajandikwe na ashinkulondola gaka Mwana juka Mundu shigatimilile. 32 Pabha shakamuywe kubhandu bha ilambo ina, na bhene bhanganayabho shibhampetekuyanje, shibhantukananje na kunn'uni la mata. 33 Shibhankomanje na mishapilo nikummulaga, ikabheje lyubha lya tatu shayushe." 34 Ikabheje bhaajiganywa bhabho bhangagamanyanga gene malobhego, pabha bhashinkuiwanga malombolele gakwe, kwa nneyo bhangagamanyanga gubhabheleketa. 35 A Yeshu bhakabhandishileje ku Yeliko, mundu jumo nangalole nkujuga ashinkupagwa nnyenje mpanda alijuga. 36 Akapilikaneje lugwinjili lwa bhandu lulipita gwabhushiywe, "Shipali nndi?" 37 Gubhammalanjilenje, "A Yeshu Bhanashaleti bhanapita." 38 Jwalakwe gwakweshiye llobhe alinkuti, "A Yeshu, bhanabhabho a Daudi, mmonele shiya!" 39 Bhandunji bhalongolelenje bhala gubhankalipilenje nkupinga apumule, ikabheje jwalakwe gwapundile kweya llobhe, "A Yeshu bhanabhabho a Daudi mmonele shiya!" 40 A Yeshu gubhajimi, gubhatumile bhanniyenabhonji pubhaliji pala. Nangalole jula akabhandishileje, a Yeshu gubhammushiye, 41 "Upinga nikutendele nndi?" Gwashite, "Mmakulungwa, ngunapinga nole." 42 A Yeshu gubhannugulile, "Bhai lolal Ngulupai jako jikulamiye." 43 Na shangupe nangalole jula gwakombwele kulola, gwabhakagwile a Yeshu alipita kwaakuya a Nnunu. Bhandunji bhowe bhakagabhonanje genego gubhainiyenje a Nnunu.

19 A Yeshu gubhajinjile nshilambo sha ku Yeliko, nipita pakatipakati ja shene shilambosho. 2 Bhashinkupagwa

bhandu bhamo pashilambopo bhashemwaga a Shakayo, bhakulungwa bha bhaakamula bhaali jaji. 3 Bhatendaga pinga bhaabhona a Yeshu shibhali, ikabheje kwa ligongo lya lugwinjili lwa bhandu na pabha bhashinkubha bhabhaupi, bhangakombola kwaabhona. 4 Kwa nneyo, kwa lubhilo, gubhalongolele, gubhakwelile munkongo gwankulungwa nkupinga bhaabhona a Yeshu, pabha shibhapite mpanda gogo. 5 Bhai a Yeshu bhakaisheje penepo, gubhalolile kunani gubhashite, "A Shakayo, ntulushe shangu, pabha lelo shindame kunngwenu." 6 A Shakayo shangupe gubhatulwishe, gubhaaposhelwe kunngwabho akuno bhalikwinonyela kaje. 7 Bhandu bhowe bhakagabhananje genego, gubhatandubhenje kuinginika bhalinkutinji, "Bhashikwenda tama kuka mundu akwete yambi." 8 Ikabheje a Shakayo gubhajimi mmujo, gubhaabhalanjile a Yeshu, "Mmakulungwa nno! Nne shing'abhanye mali gangu pakatipakati naapanganje bhaalaga, na ibhaga nintolele mundu shindu shoshowe kwa unami, shinimmujishiye pasheshe." 9 A Yeshu gubhaabhalanjile, "Lelo ntapulo ujinjile nnyumba muno, pabha jweneju nneila peila ni jwa shipinga sha a Bhulaimu. 10 Pabha Mwana jwa Mundu kwaishe kuloleya na tapula bhaobhilenje." 11 Bhandu bhatendaga kwaaplikanishiyanga a Yeshu, kwa nneyo gubhaatanjilenje lutango luna, bhashinkutenda nneyo pabha bhatendaga bhandishila ku Yelushalemu na bhandunji pubhaganishiyangaga kuti Upalume gwa a Nnungu unakwiya malanga gogo. 12 Gubhaalugulilenje, "Bhashinkupagwa bhandu bhamo bha shipinga sha upalume, bhashinkwenda kushilambo sha talika nkupinga bhakapegwe ukulungwa bhabhe a mpalume na bhabhuje. 13 Bhai, bhakanabhe jabhula bhashinkwaashemanga bhatumishi bhabho kumi, nikwapanganga kila mundu lipungu lya ela, bhalinkuti, 'Ntendelanjile upindi mpaka pushimuje.' 14 Ikabheje bhashilambo ajabhonji bhatendaga kwaapatanga, gubhaatumilenje mitume bhakagulanje, bhakalugulanje kuti, 'Tukakwaapinga abha bhatutagwale.'" 15 "Bhakapateje upalume gubhabhuje kumui, na shangupe gubhalajile bhatumishi bhala bhashemwanje, nkupinga bhamumanye kila mundu shapatile. 16 Ntumishi jwa nta gwaishe nigwashite, 'Mmakulungwa ela imwambele ila, ipatikene pwaida likumi limo.' 17 Na bhalabho gubhammalanjile, 'Utendile ukoto, ugwe ntumishi nnguja. Pabha ushikulupalika pa shindu shishoko, shinikupe ukulungwa gwa ilambo kumi!' 18 Ntumishi jwa bhili gwaishe, nigwashite, 'Mmakulungwa ela imwambele ila, mbatile pwaida paano.' 19 Bhakulungwa gubhammalanjile, 'Numbe ugwe shubhe nkulungwa jwa ilambo nng'ano.' 20 "Ntumishi juna gwaishe, nigwashite, 'Mmakulungwa ajino ela jenu, nashinkuiya ukoto nshigubho, 21 pabha nashinkunjogopa mmwe mmandu mmanonopa ntima. Mmwe nnatola yangali yenu, nnaneng'ena munkupandileje.' 22 Na bhalabho gubhammalanjile, 'Ngunakukumula kwa ligongo lya malobhe gako, ugwe ntumishi ujwangali gwa mmbone! Ibhaga gwamumanyi kuti nne namundu jwa nonopa ntima, ngunatola yangali yanngu na ngunaneng'ena mungapandileje. 23 Bhai kwa nndi unabhishe ela jangu kubhenki, na nne ngatolile na pwaida nkubhuja mwanja gwangu?' 24 Penepo gubhaalugulilenje bhalinginji pepala bhala, "Mumpokonyolanje elajo, nkampanganje apatile pwaida ja likumi limo jula." 25

Na bhalabhonji gubhaalugulilenje, "Mmakulungwa, pakubha tayali apatile likumi limo!" 26 Na bhalabho gubhaajangwilenje, "Jojowe akwete shindu shaajenjeshewe. Ikabheje jwangali shindu jula, nkali shakwete shila shaapokonyolwe. 27 'Nnaino, ga ashaamagongo ajangu bhakaapinganga nne kubha mpalume jwabhonji, mwajiyenabhonji apano, mwaabbulaganje pa meyo gangu.'" 28 A Yeshu bhakabheleketeteje genego, gubhalongolele mmujo kuloya ku Yelushalemu. 29 Bhakabhandishileje ku Bhetipage na ku Bhetania, tome na shitumbi sha Misheituni, gubhaatumilenje bhabhili munkumbi gwa bhaajiganywa bhabho, 30 gubhaabhalanjilenje, "Nnjendangane kushijiji shili mmujo jenuji. Pushinnjinjilangane, shimunnng'imananje mwana jwa mbunda akanabhe jigala mundu, atabhilwe. Munnngopolanje munnjiyenajonji apano. 31 Ibhaga mundu shammuyanje, nkunngopolelanga nndi, mummalanjanje, 'Bhakulungwa bhanakumpinga.'" 32 Bhai, gubhapitengene, niimana malinga shibhabhalanjilwenje. 33 Bhalikunngopolanga mwana jwa mbunda jula, bhayene gubhaabhushiyenje, "Nkunngopolelanga nndi mwana jwa mbundajo?" 34 Na bhalabhonji gubhaajangwilenje, "Bhakulungwa bhanakumpinga." 35 Bhai gubhaapeleshelenje Yeshu mwana jwa mbunda jula. Gubhatandikenje nngubho yabhonji panngongo gwakwe, gubhaakweshiyenje a Yeshu panani jakwe. 36 A Yeshu pubhapitaga mumpanda, bhandunji gubhatandikenje nngubho yabhonji. 37 Bhakaisheje tome na ku Yelushalemu, bhalelela shitumbi sha Misheituni, lugwinjili lowe na bhaajiganywa bhabho, gubhatandubhenje kuangalila na kwainiya a Nnungu kwa utiya, kwa ligongo lya ilapo yaigwinji ibhaibhweninji, 38 bhalinkutinji, "Bhakwete mboka A mpalume bhakwiya kwa lina lya Bhakulungwa. Ulele kunnungu na Ukonjelo kunani kajeko!" 39 Penepo Ashimapalishayo bhana bhalinginji nnikundi mula gubhaabhalanjilenje a Yeshu, "Mmajiganya, mwalimbiyanje bhaajiganywa bhenu!" 40 A Yeshu gubhaajangwilenje, "Ngunakummalanjilanga, bhanganyabha bhapumulangaga, maganga shigajobhele." 41 A Yeshu bhakabhandishileje na kushibhona shilambo sha Yelushalemu shila, gubhashigutile 42 bhalinkuti, "Kaliji ukaimanyi ata ugwe lelo ipelshela ulele! Ikabheje nnaino ishiiyiwa unaibhone. 43 Pabha ganakwiya mobha bhamagongo ajako, shibhakutimbililanjile nikuibhila mmbali yowe. 44 Shihakukandaganye ugwe na ashibhanago nkati pemo. Na bhakalekanga nkali liganga limo lijimi pa liganga lina, pabha gwangagamanya malanga ga ntapulo gwako." 45 Kungai a Yeshu gubhapite ku Liekalu, gubhatandwibhe kwaabhanganjilanga palanga bhatendangaga upindi 46 bhalinkuti, "Ishijandikwa, 'Nyumba jangu shijibhe nyumba ja kwaajujila a Nnungu,' ikabheje mmanganya nshitendanga lishembo lya bhaapokonyola." 47 Mobha gowe a Yeshu bhatendaga jiganya Nniekalu. Ikabheje ashikalongolele bha ashikalongolela, na bhaajiganya bha shafia na ashikalongolele bha bhandunji bhatendaga loleyanga namuna ja kwaabbulaga. 48 Ikabheje bhakamumanyangaga muutendelo, pabha bhandu bhowe bhatendaga kwaakagulilanga na kwaaplikanishiya.

20 Lyubha limo, a Yeshu pubhaliji bhalijiganya bhandu Nniekalu na lunguya Ngani ja Mmbone, ashikalongolele

bha bhakulungwanji bha bhaabhisila na bhaajiganya bha shalia na bhanangulungwa gubhaikengene, 2 nigubhaabhushiyenje, "Ntubhalanjile! Genega punkutenda kwa mashili gashi na gani ampele?" 3 A Yesu gubhaabhalanjilenje, "Numbe nne shinimmuyanje, 4 mashili ga a Yowana ga bhatisha kugakopweshele kwa a Nnunu eu kubhandu?" 5 Ikabheje bhalabhonji gubhabhalanjilenje, "Tutendaga kugakoposhele kwa a Nnunu, bhalabho shibatubhuye, 'Pakuti mmangaakulupalilanga?' 6 Na tulugulaga kugakoposhele kubhandu, bhandunji bhowe shibatukomanje na maganga, pabha bhowe bhanakulupalilanga kuti a Yowana pubhaaliji ankulondola." 7 Bhai, gubhajangulenje, "Tukakukumanya kugakoposhele kwei?" 8 A Yesu gubhaabhalanjilenje, "Nkali nne ngammalanjilanga ingutenda ino ngutenda kwa mashili gakeni?" 9 A Yesu gubhaatanjilenje bhandunji aluno lutango luno, "Bhandu bhano bhashinkulima nngunda gwa mishabhibhu, nikwaapolekanga nngunda gula bhaalimanga, kungai gubhajabhwile mwanja kwenda kushilambo sha taliya, gubhalonjeye kweneko. 10 Mobha ga maneng'eno, gubhantumile ntumishi jwabho ajende kubhaalimanga bhala, akatole ndalo ya maneng'eno ga nngunda gwa mishabhibhu. Ikabheje bhaalimanga bhala gubhankomilenje ntumishi jula, gubhamminjilenje gwabhujile gwaayoyo. 11 Bhayene nngunda bhala bhakuntumaga ntumishi juna, ikabheje nneila peila gubhankomilenje na kuntokomaya, gubhamminjilenje gwaayoyo. 12 Gubhantumile kabhili ntumishi jwatatu, najwalakwe, gubhann'uleyenje, gubhamminjilenje munngunda mula." 13 Bhai bhayene nngunda bhala gubhaganishiye, "Shindende bhuli? 'Shinintume mwanangu jwa jika jungumpinga peju, pana shibhann'ishimunji." 14 Bhaalimanga bhala bhakammonanjepi, gubhabhalanjilenje, 'Jweneju ni apinga tola ulishi. Bhai tummulaje, ulishi shigubhe gwetu.' 15 Bhai, gubhankwakwatilenje palanga nngunda gwa mishabhibhu gula, gubhammulegenje." A Yesu gubhabhushiyenje. "Bhai penepo bhayene nngunda bhala shibhaatendanje nndi bhene bhaalimangabho? 16 Shihajije nikwaabhaluganga bhaalimangabho na nngunda gwa mishabhibhugo shibaapanganje bhaalimanga bhanani." Bhandunji bhakapilikanenje gene malobhego, gubhashitenje. "Nngabha, Inakoposhele nneyo!" 17 Ikabheje a Yesu gubhaalolinje, gubhaalugulilenje, "Bhai, gene Majandiko ga malombolelo gakwe nndi? 'Liganga libhakanilenje bhaashenganga, Nnaino lishibha liganga likulu lya pa ndumba!' 18 Mundu jojowe agwilaga pantundu lyene ligangalyo apinga temekanga na lingwilaga mundu jojowe, lipinga kunkandaganya." 19 Bhaajiganya bha Shalia na ashikalongolele bha bhakulungwanji bha bhaabhisila gwaapinjilenje kwaakamula palapepala, pabha bhamumanyinji kuti lwene lutangolo bhatanjilenje ni bhobho pebho. Ikabheje bhatendaga kubhajogopanga bhandu. 20 Bhai, gubhaatumilenje bhandunji bhaitemilenje bhanguja, bhakaabhuyanje a Yesu ibhuyo ya kwaatanjiya kwa malobhe gabho, nkupinga bhaakamulanje bhaapelekanje kwa ashikalongolele bha ukulungwa. 21 Bhai, bhatumilwenje bhala gubhaabhushiyenje a Yesu, "Mmajiganya, tumumanyi mmwe nnaabheleketa na kujiganya indu ya uguja na mwangali luagu, mmwe nnaajiganya

indu ya a Nnunu ipinjikwa bhandu bhatendanje. 22 Bhuli, ni alali uwe kulipa koli kwa a Kaishali eu nngabha?" 23 Ikabheje a Yesu gubhang'amwile kuti bhanakwaatejelanga, nigubhaabhalanjilenje, 24 "Nnangulanje dinali. Bhuli, aji pishaji na gajandikwe pantundu jakwega ni ga keni?" Nigubhaajangwilenje, "Ga a Kaishali." 25 A Yesu nigubhaabhalanjilenje, "Bhai, ili ya a Kaishali mwaapanganje a Kaishali na ya a Nnunu mwaapanganje a Nnunu." 26 Bhagakombolanga kwaakamula kwa gene gaabhelekete palugwinjili gala. Nigubhakangangwenje majangulo gabho, gubhatemingenjeye ilili. 27 Kungai Ashimashadukayo bhalugulaga kuti bhawilenje bhakuyukanga, gubhaashilenje a Yesu nikwaabhuya, 28 bhalinkutinji, "Mmajiganya, a Musha bhashinkutujandishila kuti nkulu mundu awaga nikunneka jwankongwe nshitenga gwangali kunkolela bhana, inapinjikwa mpwakwe ajinjile majumba, kupinga ankolele bhana nkulugwe. 29 Bhai, gene mobhago bhashinkupagwanga bhanguwendo shabha bha nyumba jimo. Jwa lielo jula gwalombile na gwawile gwangali kuleka mwana. 30 Jwabhili jula gwajinjile majumba, na jwalakwe gwawile gwangali kukola mwana, 31 na jwatatu ni nneila peila. Nkubho gula nibha gula mpaka bhowe shabha bhala gubhawilenje gwangali kukolela bhana. 32 Kungai na jwankongwe jula gwawile. 33 Bhuli, pushibhayukanje, jwankongwejo shabhe nkagwe gani? Pabha ashinkulombwa na bhowe shabha bhala." 34 A Yesu gubhaabhalanjilenje, "Bhandunji bha gegano mobha gano bhanalombanga na lombwa, (aiōn g165) 35 Ikabheje bhene shibhayukanje nibhalanganishiwa nndamo ja gene mobhago, bhakalombanga wala bhakalombwanga. (aiōn g165) 36 Na shibhabhanganje mbuti ashimalaika bha a Nnunu na bhana bha a Nnunu bhakawanganga kabhili, pabha bhashiyuwanga. 37 Ikabheje, ga yuywa bhawilenje, nkali a Musha nneila peila bhakong'ondele Mmajandiko. Ga shitekete shakolelaga moto shila, bhanakwaashema Bhakulungwa kuti a Nnunu bha a Bhulaimu na bha a Ishaka na bha a Yakobho. 38 Bhai, bhenebho ngabha a Nnunu bha bhawilenje, ikabhe a Nnunu bha bhakotonji, pabha kwa bhenebho bhowe bhakotonji." 39 Bhaajiganya bhanani bha Shalia gubhashitenje, "Mmajiganya nshiangula ukoto kaje." 40 Na bhandunji bhala bhangalinganga kwaabhuya kabhili. 41 A Yesu gubhaabhalanjilenje, "Ni kwa bhuli bhanabheleketanga kuti a Kilishitu ni bha shipinga sha a Daudi? 42 Pabha bhayene a Daudi bhanabheleketa nshitabhu sha Mbeembela, 'BHAKULUNGWA bhashinkwaalugulila Bhakulungwa bhangu, Ntame kunkono gwangu gwa nnilo 43 Mpaka pushinaabhanjanje ashaamagongo ajenunji palibhatila makongono genu.'" 44 Ibhaga a Daudi bhakwaashema bhenebho, Bhakulungwa bhai, shibhabhe bhuli bhana bhahbo? 45 Akuno bhandu bhowe bhali kwapilikanishiyanje a Yesu gubhaalugulilenje bhaajiganya bhabho. 46 "Mwiiteiganje na bhaajiganya bha Shalia inakwaanonyelanga pita jimajima akuno bhali bhawalilenje majoo. Inakwaanonyelanga kukomaywa mumbala ya ushiya indu na tama mwiitengu ya mmujo mmashinagogi. 47 Kwa ugulumba, bhanakwaatolelanga bhanabhakongwe bha shitenga indu yabhonji, bhali kwiitebanganga kuti bhanguja,

bhalikwaajuganga a Nnugu kwa leupya. Bhene bhanganjabho shibhaukumulwanje kupunda bhananji.”

21 A Yesu bhatendaga kwalolesheyanga matajili bhalitaganga mbepei yabhonji nshibhiko sha ekalu, 2 gubhaaweni bhakongwe bhamo bhashitenga na bhaalaga bhalitumbushiya shenti ibhili. 3 Bhai, gubhashite, “Kweli ngunakummаланjilanga, bhene bhakongwe bha shitenga bhaalagabha bhashitaga yaigwinji kupunda bhowenji. 4 Pabha bhananji bhowe bhashishoyanga mbepei ya indu ipundile pa indu yabhonji ila, ikabheje abha na kulaga kwabho, bhashishoya yowe ibhakulupalilaga nkulamila.” 5 Bhaajiganywa bhabho bhatendaga kungulushilanga ga Liekalu shilishite kelengelelwa kwa maganga ga konja na indu ishoshiywe mbepei kwa a Nnugu. Ikabheje a Yesu gubhashite, 6 “Gene gowe gunkugabhonangaga shigaisha mobha nkali liganga limo likalepeka pantundu liganga lina, gwangali kubhomolwa.” 7 Bhai, gubhaabhusiyenje, “Mmajiganya, genego shigakoposhele shakani? Na ilangulo yashi shiikoposhele kulangula genego gali tome na koposhela?” 8 A Yesu gubhaajangwilenje, “Mwiiteganje nnatembwanga. Pabha bhabhagwinji shibhaikangane bhalikwitombanga kuti nne a Kilishitu Bhaatapula na malanga gala gabhandishile. Ikabheje mmanganya nnaakagulanje! 9 Bhai, pushimpilikananje ga ngondo na tendebhukana, nnajogopanje, pabha yeneyo inapinjikwa ikoposhele oti, ikabheje mpelo gwa gowe, ukanabhe.” 10 Bhai gubhapundile bheleketa. “Shilambo shimo shishikomane na shilambo shina, na upalume gumo shiukomane na upalume guna. 11 Kupinga koposhela kuungumila kwa litaka kwa punda, na limbukute lya shibhanga na ilwele ya jambushiya mmbali yaigwinji. Kupingabha na indu ya jogoya na ilangulo yaikuluikulu kunnungu.” 12 “Ikabheje yene yoweyo ikanabhe koposhela shibhankamulanje nikumpotekanga na shibhampelekanje Mmashinagogi na kuntabhanga mmagelesha na shimpelekanje kwa bhakulungwa na kubhalingwanji kwa ligongo lyangu, 13 yeneyo shiikoposhele nkupinga mwaakong’ondelanje ngani jangu. 14 Ikabheje nnakolanje lipamba mmitima jenunji kuti shimmeleketanje nndi sha kuitapula, 15 pabha shinimpanganje malobhe na lunda, gaatenda ashaamagongo ajenunji bhakakombolanga kunkananga wala kunkaukanga. 16 Bhankwetenje na ashapwenu na ashalongo ajenunji na ashambwiga ajenunji shibhankananje na mmananji shimmulagwanje. 17 Bhandu bhowe shibhampatanje, kwa ligongo lya lina lyangu. 18 Ikabheje, nkali luumbo lumo lwa mmitwe jwenunji lukaobha. 19 Kwa kwiikakatimila kwenunji shimwitapulanje.” 20 “Pushinshibhonanje shilambo sha Yelushalemu shitimbiilwe na makuga ga ashimanjola, bhai mmumanyanje kuti gabhandishile malanga ga shene shilambosho kuangabhanywa. 21 Penepo bhalinginji ku Yudea bhahutushilanje mwitumbi, bhalinginji kunnjini bhashokangane, na bhalinginji mmigunda bhanabhujangane kunnjini. 22 Pabha gene mobhago shigabhe ga mboteko ya a Nnugu kubhandu bhabho, nkupinga gowe gajandikwe Mmajandiko gamalile. 23 Ole gwabhonji bhakwetenje ndumbo na bhajonjeyanga gene mobhago! Pabha shipingapagwa shilaje shapunda nshilambo, na nnjimwa ya a Nnugu shiyajilanje bhene bhandunjibha. 24

Bhana shibhabhulagwanje kwa upanga, bhana shibhatolwe ubhanda mwilambo yowe na shilambo sha Yelushalemu shipinga libhatwa na bhandunji bha ilambo inape mpaka mobha gabhonji pushigatimilile. 25 “Kupingabha na ilangulo kulyubha, kumwei, na kundondwa. Ilambo ya pashilambolyo ni ipingabha nshilaje kwa ligongo lya lipamba ga nng’indo gwa mabhimbili ga bhaali. 26 Bhandunji shibhaondokanje kwa ligongo lya bhoga, bhalilolelanga indu ipinga koposhela nshilambolyo, pabha mashili ga kunnungu gapinga tikinywa. 27 Kungai, shibhammonanje Mwana juka Muntu aikiwiya mmaunde, ali na mashili na ukonjelo nkulu. 28 Malanga gushigatandubhe genego kukoposhela, nnjimangane, nnjinulanje meyo genunji kunani, pabha kugombolwa kwenunji kubhandishile.” 29 Kungai gubhaabhalanjilenje lutango, “Nnolanje ntini na mikongo jina jowe. 30 Pankubhonanga jilipuka maamba, nnakumumanyanga kuti shuku shibhandishile. 31 Nneyo peyo, pushimmonanje genego galikoposhela, shimmumanyanje kuti Upalume gwa a Nnugu ubhandishile.” 32 “Kweli ngunakummаланjilanga, alu lubheleko lwa nnainolu lukapita mpaka gene gowega gamalile. 33 Kunnungu na shilambolyo shiipite, ikabheje malobhe gangu gakapita.” 34 “Mwiiteganje, mitima jenunji jinakwiibhuka nkupoka na kolelwa na kuabhusiwa ya nndamo jino. Lyene lyubhalyo linakunn’imananga shiimushila mbuti kutanjila kwa nnukonji. 35 Nneyo ni shiipinga koposhela, kubhandu bhowe bhaatamangana pa shilambolyo. 36 Bhai nsheyenje, nkwaajuga a Nnugu mobha gowe, kupinga mpatanje mashili ga kwiitapula pushigakoposhele genego na jima mmujo jika Mwana juka Muntu.” 37 Kila mui a Yesu bhatendaga jiganya Nniekalu, ikabheje shilo bhatendaga tama kushitumbi sha Misheetuni. 38 Bhandu bhowe bhatendaga lbhanga lyamba, kwenda ku Liekalu kukwaaplikanishiya.

22 Shikukuu sha mikate jangatagwa ngedule, shishemwa pashaka, shatendaga bhandishila. 2 Ashikalongolele bha bhaabhisila na bhaajiganya bha shalia, bhatendaga loleyanga mwa kwabhalujila a Yesu, ikabhe bhatendaga kwaajogopanga bhandunji. 3 Bhai, Lishetani akwaajinjilaga a Yuda Ishikaliote, bhaliji munkumbi gwa mitume kumi na bhabhili bhala. 4 A Yuda gubhapite kunguluka na ashikalongolele bha bhaabhisila na bhakulungwanji bha manjola, shibhapinga kwaendebhuka a Yesu. 5 Nabhalabhonji guyaanonyelenje nigubhalegenenje kwaapa mmbiya. 6 A Yuda gubhakundile, gubhatemi nkuloleya malanga ga mmbone ga kwaatendebhuka a Yesu gwangali kumumanya bhandu bhabhagwinji. 7 Bhai, lyubha lya mikate jangatagwa ngedule guliishile. Lyubhalyo lya ingwa mwana jwa ngondolo jwa pashaka. 8 Kwa nneyo a Yesu gubhaatimilenje a Petili na a Yowana, kubhaalugulilenje, “Nnjendangane nkakolokoyanje shalya tulye pashaka.” 9 Gubhaabhusiyenje, “Punkupinga tukakolokoye kwei?” 10 Gubhaalugulilenje, “Mpilikananje! Pushinnjendangane kunnjini, shinng’imikananje na jwannume jumo ajigele lulo lwa mashi. Munkagulanje mpaka nnyumba jashaajinjile. 11 Mwaalugulilanje bhayene nyumba, ‘Bhaajiganya bhanakummuya, jili kwei kati jibhapinga lila pashaka na bhaajiganywa bhabho?’ 12 Na bhenebho shibhannanganje kati jikulungwa kugolopa jikonjeleywe, nnkolokoyanje mwenemo.” 13 Bhai, gubhapitengene, gubhaimenenje indu yowe malinga

shibhabhalanjilwenje na a Yesu, gubhakolokoyenje shalya sha pashaka. 14 Malanga gakatimileje, a Yesu gubhatemi pamo na mitume bhabho nkulya shalya. 15 Gubhaalugulilenje, "Njilokolila kaje kulya pashakaji pamo na mmanganya nganabhe potekwa. 16 Pabha ngajilya kabhili mpaka penepo pushijimalile mu Upalume gwa a Nnungu." 17 Kungai gubhatolile shikombe sha divai, gubhatendile eja, gubhashite, "Ntolanje nnepesheyane mmowe. 18 Pabha ngunakummalanjilanga, ngang'wa kabhili divai ja shabhibhu mpaka Upalume gwa a Nnungu pushuishe." 19 Kungai, gubhatolile nkathe, gubhatendile eja, gubhaugebhenye, gubhaapelenje bhalinkuti, "Sheshino shiilu shangu shipinga shoywa kwa ligongo lyenu. Ntendanje nnei kwa ngumbushila nne." 20 Nneyo peyo bhakalyanganjeje gubhatolile shikombe, gubhashite, "Ashino shikombe shino, sha malagano ga ambi gakong'ondelwa na minyai jangu jijitika kwa ligongo lyenu. 21 "Ikabheje, ntolanje! Andendebhuka jula pali na nne pamesha pepano. 22 Kweli Mwana juka Mundu anakwenda bhulagwa malinga shiipanjilwe, ikabheje ole, mundu andendebhuka." 23 Penepo gubhatandubhenje kubhuyana ashaayene, gani shatende yeneyo. 24 Na kabhili nikoposhela mitau munkumbi gwabonji, kuti gani shabhe nkulungwa kupunda bhananji. 25 A Yesu gubhaabhalanjilenje, "Bhupalume bha ilambo bhanakwaatagwalanga bhandu bhabhonji kwa mashili, ikabhe pubhaashemwanga 'Bhamituka.' 26 Ikabheje mmanganya, inabhe nneyo, ali nkulungwa jwenunji anapinjikwa abhe nshoko jwa howe, na ali kalongolele abhe malinga ntumishi. 27 Igala jwei ali nkulungwa, atama kulya shalya, eu akolokoya jula? Penepo nkulungwa ni atama kulya! Ikabheje nne munkumbi gwetu muno, ni malinga ntumishi." 28 "Mmanganya ntemingene na nne mobha ga lingwa kwangu, 29 na malinga atati shibhangamiye upalume, nneyo peyo numbe nne ngunakumamuyanga mmanganya. 30 Nkupinga niyanganje na papila pamesha jangu, muupalume gwangu, na shintamangane mwiitengu ya ukulungwa kugakumula makabhila kumi na gabhili ga Ishilaeli." 31 A Yesu gubhashite "A Shimoni, a Shimoni! Mpilikane! Lishetani anapinga ampembulanje mmanganya mbuti ngano. 32 Ikabheje nne ninjijule mmwe a Shimoni, nkupinga ngulupai jenu jinapungushe. Na mmwe pushimmujilepo mwaataganje ntima ashaapwenu." 33 Na a Petili gubhaajangwile, "Mmakulungwa, nne apano nili tayali kwenda tabhwa kumagelesha, nkali kuwa na mmwe." 34 A Yesu gubhaajangwile, "Ngunakummalanjila mmwe a Petili, lelo lipongo likanabhe kongobhela shinngane patatu." 35 Kungai a Yesu gubhaabhusiyenje bhaajiganywa bhabho, "Punantumilenje gwangali nng'uko gwa ela, wala nkobha gwa ilatu, mwatubhilwenje shoshowe?" Gubhajangwilenje, "Nng'oo twanngatubhilwa." 36 Gubhaalugulilenje, "Ikabheje mnaino, jwene akwete nng'uko gwa ela jula ajigale, na akwete nkobha, nneyo peyo. Na jowewe jwangali upanga, aushe likoti lyakwe aume gumo. 37 Ngunakummalanjilanga, ganapinjikwa gatimilile majandiko gaanugula nne kuti, 'Bhashinkubhikwa likundi limo na bhaalebhanga,' elo, gowe gajandikwe kunugula nne ganapinjikwa gamalile." 38 Na bhalabho gubhashitenje, "Mmakulungwa, nnole, apano jipali mipanga jibhili." Na bhalabho gubhashite, "Bhai shijipwae." 39 Na malinga shibhayobhelele, a Yesu gubhapite kushitumbi sha Misheituni, bhaajiganywa

bhabho gubhaakagwilenje. 40 Bhakaikanganeje kweneko gubhaalugulilenje, "Mwaajuganje a Nnungu nnajinjilanga mmalinjilo." 41 Kungai gubhaaleshilenje bhaajiganywa bhabho, gubhapite kwa taliya kashoko kwa leshela mundu liganga kuika, gubhatindibhele nkwaajuga a Nnungu 42 bhalinkuti, "Atati, ibhaga nkupinga, njosheye shikombe sha mbotekoshi, nkali nneyo, itendeshe malinga shinkupinga mmwe, na wala nngabha malinga shingupinga nne." 43 Malaika kukopoka kunnungu akwaakoposhelega kukwaataga ntima. 44 Bhali mmboteko ya kaje, gubhamindile kwaajuga a Nnungu, na matukuta gabho nibha mbuti mandondo ga minyai, galindolishila pai. 45 Bhakaajuganjeje a Nnungu, gubhabhujile kubhaajiganywa bhabho, gubhaaimenenje bhagonilenje lugono kwa totoresha nkuinjika. 46 Gubhaabhusiyenje, "Pakubha nnagonanga? Nnjumukanje maajuganje a Nnungu, nnajinjilanga mmalinjilo." 47 A Yesu bhakanabhe peya kubheleketa, likundi lya bhandunji guliishe lililongoywa na Yuda, bha munkumbi gwa kumi na bhabhili bhala. A Yuda gubhaabhandishile a Yesu nkupinga kwaalamba. 48 Ikabheje a Yesu gubhaabhalanjile, "A Yuda! Bhuli, nnakuntendebhuka Mwana juka Mundu kwa kunnamba?" 49 Bhaajiganywa bhabho bhakabhonanje nneila gubhashitenje, "Mmakulungwa, tutole mipanga jetu twaakapanje?" 50 Na jumo gwaleshele upanga mukantumishi jwa bhakulungwa bha bhaabhisila, gwankatile likutu lya kunnilo. 51 Penepo a Yesu gubhashite, "Bhai nnekanje!" Gubhalikwashiye likutu lila, gubhannamiye. 52 Kungai a Yesu gubhaabhalanjilenje ashikalongolele bha bhaabhisila, na ashikalongolele bha bhalinda bha liekalu, na bhanangulungwa bhajilengene kukwakamula, "Bhuli, nnshikwiyangana kungamula na mipanga na ndonga mbuti nne nankupokonyola? 53 Mobha gowe gunaliji na mmanganya nniekalu nkangamulanga nkangamulanga. Ikabheje gegano ni malanga genunji, malanga ga upalume gwa lubhundu." 54 Bhai, gubhaakamulenje, gubhaatolilenje kwendanabhonji kwa akalongolele bha bhaabhisila. A Petili gubhakagwile nnyuma kwa kwaataliya. 55 Moto gwashinkukumbanywa pakati lugwani, gwaatemingene penepo pamo, na a Petili pubhaaliji popo. 56 Ntumishi jumo jwankongwe gwabhabhwenje a Petili bhatemi tome pamoto, gwabhakolondosheye meyo, nigwashite, "Abha bhandubha nnepeila pubhaliji na a Yesu." 57 Ikabheje a Petili gubhakanile bhalinkuti, "Gwee! Nne ngakwaamanya." 58 Kashokope, mundu juna akwaabhonaga a Petili, nigwashite, "Numbe mmwe ni nkumbi gula." Ikabheje a Petili gubhajangwile "Ika mmwe, nngabha nne!" 59 Ikapeteje malanga ga shaa jimo, mundu juna gwakomelesheye, "Kweli abha bhandubha pubhaliji na a Yesu, pabha na bhalabho Bhagalilaya." 60 Ikabheje a Petili gubhashite, "Ika mmwe, ngakwiimanya inkubheketayo!" Na popo peyo, bhakanabhe maliya kubheleketa, lipongo gulikongobhele. 61 Bhakulungwa gubhatendebhwishe nikwaalola a Petili, na bhalabho a Petili gubhakumbushile gubhabhalanjilwe na Bhakulungwa, "Lipongo likanabhe kongobhela lelo, shinngane patatu." 62 Penepo gubhakopweshe palanga gubhagutile kwa kaje. 63 Bhandunji bhaabhikaangaga a Yesu muulinda, gubhaakomilenje na kwaalembula. 64 Gubhaatabhilenje shimbala kumeyo, nikwabhuwanga, "Nnondole! Ntulugulile gani

ankomile.” 65 Gubhaabheleketelenje malobhe gamagwinji ga matukano. 66 Kukasheje, bhanangulungwa gubhaimenenje yani, ashikalongolele bha bhaabhishila na bhaajiganya bha shalia. A Yeshu gubhapelekwe kulukumbilo. 67 Nigubhashitenje, “Ibhaga mmwe a Kilishitu ntubhalanjile?” A Yeshu gubhajangwile, “Nkali nimmalanjilangaga, nkakulupalilanga, 68 nkali nimmuyanje nkanyangulanga. 69 Ikabheje kutandubhila nnaino, Mwana juka Mundu shatame kunkono nnilo gwa Bhakulungwa a Nnungu Bhakwete Mashili.” 70 Penepo bhowenji nigubhashitenje “Igalatutende mmwe bhanabhabho a Nnungu?” Na bhalabho gubhashite, “Mmanganya ninkutinji Nne ni Jwenejo.” 71 Na bhalabhoji nigubhashitenje, “Bhuli, turinga ukong’ondelo guna? Twaashayene tupilikene bhalibheleketa pa kang’wa jabho bhayene.”

23 Bhai likundi lyowe, gubhajimingene, nikwaapeleka a Yeshu kwa a Pilato. 2 Gubhatandubhenje kwaashitakiya bhalinkutinji, “Bhene bhandubha bhatendaga kwaapuganyanga bhandunji bhethu, bhalikwalimbiyanga kulipa koli kwa a Kaishali na bhalikwiishema a Kilishitu na a mpalume.” 3 A Pilato gubhaabhushiye a Yeshu, “Mmwe a mpalume bha Bhayaudi?” A Yeshu gubhaajangwile “Mmwe ni nkubheleketa.” 4 A Pilato gubhaabhalanjilenje ashikalongolele bha bhaabhishila na lugwinjili lwa bhandu, “Ngakushibhona shibhalebhile abha bhandubha.” 5 Ikabheje na bhalabhoji gubhapundilenje kukwiya bhalinkutinji, “Bhanakwiya njasha kwa majiganyo gabho nshilambo showe sha ku Yudea, kundubhila ku Galilaya, mpaka apano.” 6 A Pilato bhakapilikaneje genego gubhabhushiye, “Bhuli, abha bhandubha bha ku Galilaya?” 7 Bhakamumanyenje kuti a Yeshu bhaliji mu Ukulungwa gwa a Elode, gubhaapeleshe kwa a Elode, pabha gene mobhago pubhaliji pa Yelushalemu pepala. 8 A Elode guyaanonyele bhakaabhoneje a Yeshu. Pabha bhapilikene ngani jabho, kwa nneyo kwa mobha gamagwinji bhatendaga loleya kwaabhona. Na kabhili bhatendaga pinga kwaabhona bhalitenda ilangulo. 9 Bhai, a Elode gubhakabhile nkubabhuya, ikabheje a Yeshu bhangaainganga shoshowe. 10 Ashikalongolele bha bhaabhishila na bhaajandika bha shalia, gubhajimingene nkukong’ondela mashitaka gabhonji kwa kakati. 11 Bhai, a Elode na ashimanjola bhobho, gubhaalembulenje a Yeshu nikwatendela mbenji, kungai gubhaawashiyenje lijoo lya Upalume, gubhabhujilenabhonji kwa a Pilato. 12 A Elode na a Pilato bhukala pubhalinginji bhamagongo, kutandubhila lyene lyubhalyo gubhalinginji bhambwiga. 13 Bhai, a Pilato gubhashemile shitamo sha ashikalongolele bha bhaabhishila na ashikalongolele bhana bha bhandunji, 14 gubhaabhalanjilenje, “Nshimbeleshelanga abha bhandubha kuti, bhanaapuganya bhandu. Ngakagulileje lyene liobheli pameyo genunji, nangashibhona shibhalebhile shilingana na mashitaka genunji. 15 Numbe nngabha nne jikape, ikabhe nkali a Elode bhangashibhona shoshowe shibhalebhile, nigubhamujishiye. Pabha abha bhandubha shakwapi shibhatendile shapinjikwa bhaukumulwe kubhulagwa. 16 Kwa nneyo shinajile bhakomwe ibhoko, kungai shinaaleshelele.” 17 Pabha bhashinkupinjikwa kwaagopolelanga nkatubhwa jumo lyubha lya shikukuu. 18 Ikabheje bhowe gwaajobhelenje gwanakamo, “Mwaabbulaje

abho, ntugopolele a Bhalabha!” 19 A Bhalabha bhashinkutubhwa kwa ligongo lya njasha yatendeshe pa shilambo na ligongo lya bhulaga bhandu. 20 A Pilato bhapinjile kwaaleshelela a Yeshu, bhai gubhakungulwishe kabhili na bhandunji, 21 ikabheje bhalabhoji gubhapundilenje jobhela, “Mwaakomele munshalabha, mwaakomele munshalabha!” 22 A Pilato gubhaabhalanjilenje gwatatu, “Bhalebhile nndi? Ngakushibhona shoshowe shibhalebhile shapinjikwa bhabhulagwe, kwa nneyo shindume bhakomwe ibhoko, naaleshelele.” 23 Ikabheje bhalabhoji gubhapundilenje kujobhela, kuti a Yeshu bhanapinjikwa bhakomwele munshalabha. Kungai, malobhe gabhonji gugapilikanishe. 24 Bhai a Pilato gubhaukumwile kuti, itendeshe malinga shibhapinjilenje. 25 Gubhaaleshelele a Bhalabha bhatabhilwe kwa ligongo lya njasha na bhulaga bhandu. Gubhaakamwiye a Yeshu kwa ashimanjola, bhaatendelenje malinga shibhapingangaga. 26 Bhalinginji nkwaapeleka, gubhaimikenenje naka mundu jumo ashemwaga Shimoni jwa ku Kilene, aikopoka kunngunda. Bhai, gubhankamwilenje, gubhantwishilenje nshalabha gula aujigale nnyuma ja a Yeshu. 27 Bhandunji, makundi kwa makundi gubhaakagulenje, munkumbimo bhapalinji bhanabhakongwe bhaagutilangaga ililo. 28 A Yeshu gubhaatendebhushilenje, gubhashite, “Mmanganya ashinabhiti bha pa Yelushalemu! Nnang’utilanje nne, ikabhe mwiigutilanje mwaashayene na ashibhona bhenu. 29 Pabha, shigaishe mobha pushimmeleketa, mbaya ashinannii na bhakanabhe kolanga wala kujonjeya! 30 Penepo, bhandunji shibhailugululanje itumbi, ‘Ntugwilanje! Na ijomboya, ‘Ntuunishilanje!’ 31 Ibhaga bhandunji bhakuutendelanga nnei nkongo gwa mmii, shiibhe bhuli kwa nkongo gwa njumu?” 32 Bhandunji bhana bhabhili bhaalebhanga, bhashinkupelekwa bhabhulagwanje pamo na a Yeshu. 33 Bhakaikanganeje pashemwaga, Shibhanga sha Ntwe, penepo gubhaakomelenje munshalabha a Yeshu na bhandunji bhabhili bhaalebhanga bhala, jumo kunkono nnilo, na juna kunkono nshinda. 34 A Yeshu gubhashite, “Atati mwaaleshelelanje, pabha bhakakwimanyanga ibhatendanga.” Gubhagebhenenje nngubho yabho kwa tendela shikoma. 35 Bhandunji gubhajimingene bhalilosheyanga. Na bhalabhoji ashikalongolele bha Shiyaudi gubhaatendelenje mbenji bhalinkutinji, “Bhashikwatapulanga bhanaanji, nnaino bhaitapule bhayene, monaga bhenebha bhali a Kilishitu bha a Nnungu!” 36 Ashimanjola nneyo peyo gubhaatendelenje mbenji a Yeshu, gubhaajendelenje nikwaapa divi ja shashama bhapapile, 37 bhalinkutinji, “Monaga mmwe nni A mpalume bha Bhayaudi, mwiitapule mmayene.” 38 Na pantundu nshalabha gwabho pashinkujandikwa mmbila “BHENEBA A MPALUME BHA BHAYAUDI.” 39 Na nkulebha jumo akomelwe munshalabha jula, gwabhatukene alinkuti, “Bhuli, igala mmwe nngati a Kilishitu? Bhai mwiitapule mmayene, ntutapule na uwe.” 40 Ikabheje nkulebha juna jula gwankalipile mwine alinkuti, “Ugwe ukakwaajogopa a Nnungu? Numbe uli na ukumu jojo. 41 Uwe tushiukumulwa kwa aki, kwa itendi yetu. Ikabheje abha bhandubha shakwapi shoshowe shibhalebhile.” 42 Kungai nigwashite, “Mmwe a Yeshu! Nngumbushile pushinnjinile mu Upalume gwenupo.” 43 A Yeshu gubhannjangwile, “Kweli ngunakuubhalanjila, lelope

shuubhe na nne kupaladisho.” 44 Puyaaliiji malanga ga shaa shita ja mui, lubhinda lukutabhaga shilambo showe mpaka shaa tisha, 45 na lukulungushi lwa Nniekalu lukupapukaga ipande ibhili. 46 A Yesu gubhagutile kwa utiya, “Atati, mmakono genu ngunabhika mbumu yangu.” Bhakamaliyeje kubheleketa genego gubhamalile. 47 Penepo, bhakulungwa bha ashimanjola bhala bhakagabhoneje gatendeshe gala, gubhaaniye a Nnungu bhalinkuti, “Kweli abha bhandubha pubhaliji bha aki.” 48 Bhandu bhowe bhakengene pepala kulolesheya genego, bhakagabhonaneje gene gatendeshe gala, gubhahujilengene kunngwabhonji, bhalikwikomanga pantima nkuinjika. 49 Ashambwiga ajabho a Yesu, na bhanabhakongwe bhakagulanga kukopoka ku Galilaya, gubhajimingene kwa talika bhalilolesheyanga genego. 50 Bhai bhashinkupagwa bhandu bhama lina lyabho a Yoshepu, bhaliji bhanguja na bha aki. Pubhaliji bha lukumbi lukulu lwa Bhayaudi, 51 ikabheje bhenebho bhanganonyelwa na ukumu na itendi ya ashikalongolele ajabho. Bhenebha pubhaliji bhashilambo bha ku Alimataya shilambo sha Bhayaudi. Na bhatendaga liindiila kuika kwa Upalume gwa a Nnungu kwa nnolelo nkulu. 52 A Yoshepu gubhaajendele a Pilato, gubhajujile bhapegwe shiilu sha a Yesu. 53 Kungai gubhatulwiye shiilu munshalabha, gubhailijile shanda ja kitani ja mmbone, gubhabhishile nnikabhuli lyaolilwe nnindandawe likulungwa, lyaliji likanabhe shikwa mundu. 54 Pulyaaliiji lyubha lya kolokoya indu ya Lyubha lya Pumulila, na pulyaaliiji tome na tandubha. 55 Bhanabhakongwe bhajilengene pamo na a Yesu kukopoka ku Galilaya, gubhaakagwilenje a Yoshepu, gubhaliweninji likabhuli na shibhashite kwaashika a Yesu. 56 Kungai, gubhabhujengene kumui, gubhahajenilenje mauta ga nunjila ga kwenda pakaya shiilu sha a Yesu. Lyubha lya Pumulila, gubhapumulilenje malinga shiyalajilwe na shalia.

24 Lyambape lyubha lya Jumapili, gubhapitengenene kulikabhuli bhali bhajigelenje mauta ga nunjila gubhahajenilenje gala. 2 Gubhaimenenje liganga lya ibhila palikabhuli pala linokolelwe kunyenje likabhuli. 3 Bhakajinjilanenje nkati, bhangashiimananga shiilu sha Bhakulungwa a Yesu. 4 Bhalinginji kukanganigwanga ga genego, shangupe bhandunji bhabhili bhawetenje nngubho ya ng'anyima mbuti kumeta kwa nnjai, bhajimingene pa tome. 5 Bhanabhakongwe bhala gubhajogopenje, gubhatindibhekelenje mpaka shenyi pantaka. Penepo bhandunji bhala gubhaalugulilenje, “Kwa nndi nkwaaloleyanga bhabhakoto munkumbi gwa bhawilenje? 6 Bhakwapi apano, bhayushile. Nkumbushilanje shibhamalanjilenje pubhaliji ku Galilaya kuti, 7 inapinjikwa Mwana juka Mundu akamuywe mmakono ga bhandunji bhakwetenje yambi, bhankomelanje munshalabha na lyubha lya tatu shayushe.” 8 Penepo bhanabhakongwe bhala, gubhakumbushilenje malobhe ga a Yesu. 9 Bhakabhujanganeje kukopoka kumakabhuli, gubhapite kwaalugulilanga ashimitume kumi na jumo bhala, na bhananji gene gowego. 10 Bhene bhapelekenje jene nganijo kwa ashimitume pubhalinginji, a Malia Magidalena, a Yowana na a Malia anyinabhabho a Yakobho, na bhanabhakongwe bhana bhubhalongenabhonji. 11 Ikabheje bhapiikenenje bhala, bhakangulupalilanga pabha malobhe gala

bhashinkubhoneka mbuti gangali mana. 12 Nkali nneyo, a Petili gubhajabhwise shibhutuka mpaka kulikabhuli. Bhakatepeje kuulumila nkati, gubhajibhwene shanda bhangashibhona shindu shina. Gubhajabhulile akuno bhalipita kanganigwa ga yowe ikoposhele. 13 Lyubha lyolyo, bhandunji bhabhili munkumbi gwa bhaajiganywa bha a Yesu, bhatendaga kwendangana kushijiji shimo shishemwa Emau, mwanja gwa maili shabha kukoposhele ku Yelushalemu. 14 Bhatendaga kungulushilanga gowe gakoposhele gala. 15 Bhalinginji nkukunguluka a Yesu bhayene gubhakoposhele, gubhailundile. 16 Ikabheje meyo gabhonji gashinkugubhikwa bhanaamanyanje. 17 Gubhaabhushiyenje, “Nkukungulushilanga nndi akuno nnikwendangana?” Gubhajimingene akuno bhainjikenje kumeyo. 18 Jumo ashemwa Kileopashi gwabhajangwile, “Bhuli, pa Yelushalemu mmwe jikape mmajeni nkagugamanya gakoposhele kweneke agano mobha gano?” 19 Na bhalabho gubhabhushiye, “Gei genego?” Bhalabhonji gubhaajangulenje, “Ngani ja a Yesu Bhanashaleti. Bhenebho pubhaliji ankulondola, bhakwete mashili gamakulungwa, kwa malobhe gabho na itendi yabho pa meyo ga a Nnungu na pabhandu bhowe. 20 Ashikalongolele bha bhaabhishila na ashikalongolele bhetu bhashinkwaakamulanga nikwaukumula bhabhulagwe, gubhaakomelelenje munshalabha 21 ikabheje twakulupalile kuti bhenebho shibhajigombole Ishilaeli. Kupunda gene gowego, lelo lyubha lya tatu tandubhila pugatendeshe. 22 Na kabhili bhanabhakongwe bhana bha munkumbi gwetu bhashikutuimuyanga. Bhashinkwendangana kulikabhuli lyambape, 23 bhangashiimananga shiilu shabho. Gubhabhujengene gubhashitenje kuti bhashinkukoposhelwanga na ashimalaika bha kunnungu bhalugulenje kuti a Yesu bhabhakoto. 24 A Shaajetunji bhapitengenene kulikabhuli gubhakong'ondelenje ibhalugulenje bhanabhakongwe 25 Kungai a Yesu lya, ikabheje bhangaabhonanga.” 25 Kungai a Yesu gubhaalugulilenje, “Pakubha mmanganya mmangumba nneyo na mitima jenunji jinatopa kukulupalila gowe galugwilwe na ashinkulondola bha a Nnungu! 26 Bhuli, a Kilishitu bhakapinjikweje kupotekwa, na kwa nneyo bhajinjile muukonjelo gwabho?” 27 Gubhaatalashiyenje gowe gaatayaga bhenebho, Mmajandiko kutandubhila a Musha mpaka ashinkulondola bhowe bha a Nnungu. 28 Bhakabhandishilanjene shijiji shibhajendanganaga shila, a Yesu gubhatendile mbuti bhanapunda kwenda mmujo. 29 Ikabheje bhanganja bhala gubhaashondelesheyenje bhalinkutinji, “Ntame pano na uwe, pabha kunapilila, na shilo shinabhandishila.” Bhai, gubhajinjile nnyumba, gubhateminabhonji. 30 Bhakatameje kulya nabhonji, gubhatolile nkate, gubhatendile eja kwa a Nnungu, gubhaugbehenye, gubhaapelenje. 31 Shangu meyo gabhonji gakatandanukaga, gubhaamanyinji, ikabheje bhenebho gubhaobhile pa meyo gabhonji. 32 Bhai, gubhabhalanjilenje, “Bhuli mitima jetu jikakolelaga nkwiinyela, pubhatutalashiyaga Majandiko mumpanda mula?” 33 Gubhajabhulengenene gene malanga pegala, gubhabhujengene ku Yelushalemu. Gubhaaimenenje bhaajiganywa kumi na jumo bhala, na bhandunji bhatemingene pamo 34 bhalibheketanga, “Kweli bhakulungwa bhayushile, bhaakoposhele a Shimoni.” 35 Bhai, bhene bhaajiganywa bhabhili bhala gubhaalugulilenje gowe

gaaimenenje mumpanda, na shibhashite kwaamanyanga a Yesu nkugabhanya nkate. **36** Bhalingnji nkutalashiya genego a Yesu bhayene gubhajimi pakati jabhonji, gubhaabhalanjilenje, "Ulele ubhe na mmanganya." **37** Gubhaimukenje na jogopa kujila bhakulibhonanga lioka. **38** Ikabheje a Yesu gubhaabhalanjilenje, "Kwa nndi nnajogopanga? Kwa nndi nnakolanga lipamba mmitima jenunji? **39** Nnolanje makono na makongono gangu, kuti ni nne namwene. Mmbapayanje mmonanje, pabha lioka lyangali shiilu na maupa malinga shinkumonanga shino." **40** Bhakabheleketeteje genego, Gubhaalangulenje makono na makongono gabho. **41** Bhangakulupalilanga kwa ligongo lya kwiinonyela na kanganigwa, a Yesu gubhaabhushiyenje, "Pepano nkwetenje shalya shoshowe?" **42** Gubhaapelenje shipande sha shamaki jwa joka. **43** Gubhatolile, nigubhatawine bhowe bhalikwaalolanga. **44** Kungai gubhaalugulilenje, "Gegano ni gunamalanjilenje punaliji pamo na mmanganya, kuti gowe gajandikwe ga nugula nne, Nshalia ja a Musha, na Ashinkulondola, na Shabhuli ganapinjikwa gatimilile." **45** Penepo, gubhaapelenje lunda lwa kugamanya Majandiko. **46** Gubhaalugulilenje, "Ishijandikwa, kuti a Kilishitu shibhapotekwe na lyubha lya tatu shibhayushe. **47** Na kuti, kwiiipeta na kuleshelelwa kwa yambi shikulunguwe kupitila lina lyabho, kuumila ku Yelushalemu. **48** Mmanganya ni mmaakong'ondela bha genega. **49** Nnolanje, shinimpeleshelanje miadi ja Atati, ikabheje ntamangane pano, mpaka pushinimpeleshelanje mashili ga kopoka kunnungu." **50** Kungai gubhalongoyenje mpaka ku Bhetania, gubhainwile makono gabho kunani, nigubhaajujilenje mboka. **51** Akuno bhalikwaajujilanga mboka, gubhaaleshilenje, gubhatolilwe kunani kunnungu. **52** Gubhaatindibhalilenje, nigubhabhujilengene ku Yelushalemu bhalikwinonyelanga kwa kaje. **53** Gubhatemingenenje mobha gowe Nniekalu bhalikwainiyanga a Nnungu.

Yowana

1 Kundandubhoko, ashinkupagwa Lilobhe, Lilobhejo paaliji pamo na a Nnungu, shibhaliji a Nnungu na jwalakwe Lilobhe paaliji nneyo peyo. **2** Lilobhejo paaliji pamo na a Nnungu kuuumila kundandubho. **3** Indu uye wuipengenywe kupitila Jwenejo, shakwa shindu shipengenywe gwangali jwenejo. **4** Jwenejo shiumilo sha gumi na pugwaliji shilangaya kubhandu. **5** Shilangayasho shinalangaya pa lubhindu, wala lubhindu lwangakombola kuima shilangaya. **6** Gwakoposhele mundu jumo atumilwe na a Nnungu, lina lyakwe a Yowana, **7** jwenejo ashinkuika kukong'ondela ga shilangayasho. Nkupinga kwa ntenga gwakwe bhandu bhowe bhakulupalilanje. **8** A Yowana bhayene nngabha shene shilangayasho, ikabhe bhashinkuika kukong'ondela ga jwene aliji shilangayasho. **9** Jwenejo ni shilangaya shiyene akwiya pa shilambolyo, kukwamulishilanga bhandu bhowe. **10** Shilangayajo paaliji pashilambolyo, kupitila jwenejo shilambolyo gushipengenywe, ikabheje bhandu bha pa shilambolyo bhangammanyanga. **11** Aishe kubhandu bhakwe, ikabheje bhandu bhakwe bhangamposhelanga. **12** Ikabheje bhowe bhamposhelenje nikunkulupalila, gwabhatendilenje kubha bhana bha a Nnungu, **13** bhabhelekenwenje nngabha kwa komboywa na mundu, wala mashili ga shiilu wala kwaapinga mundu, ikabhe kwaapinga a Nnungu. **14** Lilobhe gwatendeshe kubha mundu nigwatemi nnungwetu. Na uwe gutuubhweni ukunjelo gwakwe, ukunjelo guka Mwana jwa jika akoposhela kwa Atati, agumbele nema na kweli. **15** A Yowana bhabhatisha bhayene gubhaabhalanjilenje bhandu kwa lilobhe lya utiya bhalinkuti, "Jwenejo junantayaga kuti, 'Akwiya nnyuma jangu jwankulungwa kumbunda nne, pabha aapali nne nganabhe pagwa.'" **16** Kwa ligongo lya punda nema jabho, uwe tubhowe tupatile mboka ja punda. **17** Pabha Shalia pujiishe kupitila a Musha, nema na kweli puishe kupitila a Yesu Kilishitu. **18** Jwakwa mundu jojowe ababhweni a Nnungu, ikabhe Mwana jwa jikape jwa a Nnungu, ali pamo na Atati, jwenejo atulangwiye shibhali a Nnungu. **19** Gweguno ni ukong'ondelo gwa a Yowana ku bhakulungwanji bha Bhayaudi bha ku Yelushalemu, pubhaatumilenje bhakulungwanji bha bhishila na Bhalawi, bhakaabhuyanje a Yowana, "Mmwe agani?" **20** A Yowana bhangakana kwaajangulanga, gubhaabhalanjilenje gwangali nng'yo, "Nne nngabha a Kilishitu." **21** Penepo gubhaabhushiyenje, "Bhai, Mmwe agani? Bhuli, mmwe a Eliya?" A Yowana gubhajangwile, "Nng'oope, nne nngabha bhene." Gubhabhushiyenje, "Mmwe ankulondola bha a Nnungu bhala?" A Yowana gubhaajangwilenje, "Nng'oope." **22** Bhalabhonji gubhaabhushiyenje, "Bhai, mmwe agani? Nkwitaya bhuli mmayene? Ntubhalanjile, nkupinga tukaabhalanjilanje bhatutumilenje kukummuya bhala." **23** A Yowana gubhaajangwilenje, malinga ankulondola bha a Nnungu a Ishaya shibhalugwile. "Nne ni lilobhe lika mundu lipilikanika kuanga. Mwaalashiyenje Bhakulungwa mpanda gwabho, 'Nngoloyanje mushibhapite.'" **24** Bhene bhandunji bhatumilwenje na Mapalishayo bhala, **25** gubhaabhushiyenje a Yowana, "Monaga mmwe nngabha a Kilishitu na nngabha

a Eliya na wala nngabha ankulondola bha a Nnungu bhala, pakuti nngabhatisha?" **26** A Yowana gubhaajangwilenje, "Nne ngunabhatisha kwa mashi, ikabheje bhapali bhamo munkumbi gwenunji bhunkanabhe kwaamanyanga. **27** Bhene bhunalugwile bhanakwiya nnyuma jangu, nne nangatopela kubha ntumishi jwabho nkali jwa gopola mbundo ya ilatu yabho." **28** Genego kugatendeshe ku Bhetania, kung'ambo lushi lwa Yolodani kubhabhatishaga a Yowana. **29** Malabhi gakwe, a Yowana gubhaabhwani a Yesu bhalinkwajila, gubhashite, "Nnole, bhenebha Mwana Ngondolo jwa a Nnungu, bhaajigala yambi ya bhandu bha pashilambolyo! **30** Bhenebha bhunakungulushilaga niinkuti, 'Nnyuma jangu bhanakwiya bhandu bhamo bhali bhakulungwa kumbunda nne, pabha bhaapali nne nganabhe pagwa!' **31** Nne namwene ngaamanyiji, ikabheje njikwiya bhatisha kwa mashi nkupinga bhandu bha Ishilaeli bhaamanyanje." **32** A Yowana gubhakong'ondele bhalinkuti, "Nashinkumona Mbumu jwa a Nnungu alituluka mbuti nnjubha, kukoposhela kunnungu nikwaatula. **33** Nne nganaamanye, ikabheje bhene bhandumile kubhatisha kwa mashi bhala bhanugulile, 'Mundu jushimumhone alikuntula Mbumu jwa Ukunjelo, jwenejo shaabhatisha kwa Mbumu jwa Ukunjelo.' **34** Nne nigabhwani na ngunakong'ondela kuti bhenebha Bhanabhabho a Nnugu." **35** Malabhi gakwe, a Yowana pubhaaliji na bhaajiganywa bhahho bhabhili. **36** Bhakaabhoneje a Yesu bhalipita, gubhashite, "Nnolanje! Mwana Ngondolo jwa a Nnungu." **37** Bhaajiganywa bhahhili bha a Yowana bhala, bhakapiikananjeje gene malobhego, gubhaakagwilenje a Yesu. **38** Bhai, a Yesu gubhatendebhwishe gubhaabhwini bhaajiganywa bha a Yowana bhalikwakagulanga, gubhaabhushiyenje, "Nkuloleyanganda ndi?" Bhalabhonji gubhaajangwilenje, "Alabhi, kunkutama kwei?" A Labhi, malombolelo gakwe Bhaajiganywa. **39** A Yesu gubhabhaalanjilenje, "Nnjyangananje shimpabhonanje." Bhaajiganywa bhala gubhaakagwilenje gubhapabhwini bha pubhatamaga, puyaliji shaa kumi ja ligulo na gubhatemi nabhonji lyene lyubhalyo. **40** Jumo jwa bhene bhaajiganywa bhahhili bhaapilikenenje a Yowana bhalibheleketa niwakagula a Yesu, pubhashemwaga a Ndeleya, apwabho a Shimoni Petili. **41** A Ndeleya gubhatandwibhe kwaaloleya akulu bhahho a Shimoni, gubhaalugwile, "Twaabhwani a Mashiya" malombolelo gakwe a Kilishitu Bhaatapula. **42** Kungai gubhaapeleshe kwa a Yesu. Na bhalabho a Yesu gubhaalolile nigubhashite, "Mmwe a Shimoni bhana bhahho a Yowana. Nnaino shinshemwe a Kepa." Malombolelo gakwe Petili, yani, "Liganga." **43** Malabhi gakwe a Yesu gubhapinjile kwenda ku Galilaya. Bhai, gubhaabhwani a Pilipi gubhaabhalanjile, "Nngagule." **44** A Pilipi pubhaliji bhandu bha ku Bhetishaida shilambo shibhatamaga a Ndeleya na a Petili. **45** A Pilipi bhakaabhoneje a Natanaeli nigubhaabhalanjile, "Twaabhwani bhene bhajandikwe muitabhu ya shalia ya a Musha na ya ashinkulondola bha a Nnungu, a Yesu bhana bhahho a Yoshepu bha ku Nashaleti." **46** A Natanaeli gubhaabhushiye a Pilipi, "Bhuli, inakomboleka shindu shoshowe sha mmbone kukopoka ku Nashaleti?" A Pilipi gubhaabhalanjile, "Nnjyive kunno." **47** A Yesu bhakaabhoneje a Natanaeli bhalikwajila, gubhashite, "Nnolanje, bhenebha Bhaishilaeli bha kweli, bhangali ya nyata muntima gwabho." **48** A Natanaeli gubhaabhushiye,

"Mmwe pumpanyi nne shanabhuli?" A Yeshu gubhajangwile, "Nammweni nni paina nkongo pala, nkali nkanabhe shemwa na a Pilipi." 49 Penepo a Natanaeli gubhaalugulile, "Mmajiganya, mmwe Bhanabhabho a Nnungu. Mmwe a Mpalume bha Ishilaeli!" 50 A Yeshu gubhaabhalanjile, "Bhuli, nnakulupalila pabha njikummalanjila kuti namweni nni paina nkongo pala? Shinnagbhone gamakulungwa kupunda genega." 51 A Yeshu gubhapundile kubheleketa, "Kweli kweli ngunakummalanjilanga, shinkubhonanje kunnungu kuluguka na ashimalaika bha a Nnungu bhalikwelanga na tuluka kwangu nne Mwana juka Mundu."

2 Pantondo gwakwe jashinkupagwa ndowa kunjini ku Kana, shilambo sha Galilaya na anyinabhabho a Yeshu bhaapali, 2 a Yeshu na bhaajiganywa bhabho nabhalabhonji bhashinkushemwanga ku ndowajo. 3 Divai ja ndowa jikamaleje, anyinabhabho a Yeshu gubhaabhalanjile, "Bhangalinginji divai!" 4 A Yeshu gubhaajangwile, "Mama, uwe shetu ndi? Malanga gangu gakanabheika." 5 Anyinabhabho gubhaabhalanjilenje bhatumishi, "Lyolyowe lishibhannugulilanje, ntendanje." 6 Penepo gashinkupagwa matende shita ga maganga, litende limo lya gumbala lulo pabhili eu patatu. Gashinkubhikwa penepo kwa nkubho gwa Bhayaudi gwa tawasha. 7 A Yeshu gubhaalugulilenje, "Ngumbayanje mashi mmatendemo." Nabhalabhonji gubhagumbeyenje tetete. 8 Kungai gubhaalugulilenje bhatumishi, "Nnaino ntekanje nkaapanganje bhakulungwa bha kalamu." 9 Bhakulungwa bha kalamu bhakapayeje divai jaliji mashi jila, bhangakumanya kujakoposhele, ikabheje bhatumishi bhateshilenje mashi bhamumanyinji. Bhakulungwa bha kalamu bhala gubhanshemile nkulomba, 10 gubhannugulile, "Bhandu bhowe bhanatandubhanga kutekanya divai ja mmbone, bhapapilangaga kwa kaje nitekanyaga jangali jammbone. Ikabheje mmwe nshigoya divai jammbone mpaka nnaino!" 11 Sheneshi shilangulo sha ndandubho shibhatendile a Yeshu ku Kana ja Galilaya, gubhalangwiye ukunjelo gwapuya gwabho, bhaajiganywa bhabho gubhaalulupalilenje. 12 Gakapiteje genega, a Yeshu na anyinabhabho na ashaapwabho na bhaajiganywa bhabho, gubhaelelenje kwenda ku Kapalanaumu gubhatemingenenje kweneko mobha gashoko. 13 Shikukuu sha Bhayaudi sha Pashaka shikabhandishileje, na bhalabho a Yeshu gubhajombweshwe kwenda ku Yelushalemu. 14 v 14 Bhai, gubhaaimenenje bhandu ku Liekalu bhaliushanga ng'ombe na ngondolo na ngunda, bhananji bhatemingenenje na mesha yabhonji bhalitindiganyanga mmbiya. 15 Gubhaelele nshapilo, gubhaabhinjilenje bhandu bhowe bhakopokanje palanga ku Liekalu na ngondolo na ng'ombe yabhonji, akuno bhalipalaganya mmbiya na pindingula mesha ya bhatindiganya mmbiya, 16 gubhaabhalanjilenje bhaushangaga ngunda bhala, "Nshoyanje apano yene indui. Nnatendanje nyumba ja Atati pa ushiya indui!" 17 Bhaajiganywa bhabho gubhakumbushilenje kuti Majandiko ga Ukonjelo ganalugula, "Lilaka lya pinga nyumba jenu jitame ukoto, shilimboteshe." 18 Ashikalongolele bha Bhayaudi gubhaabhushiyenje a Yeshu, "Shintende shilangulo shashi kutulanguya kuti nnapinjikwa kutenda genega?" 19 A Yeshu

gubhaalugulilenje, "Mbomolanje Liekaluli, nne shiniishenje kwa mobha gatatu." 20 Bhai, Bhayaudi gubhaabhushiyenje, "Liekaluli pulyashenjilwe yaka makumi nsheshe na shita. Mmwe shanabhuli shinkombole kushenga kwa mobha gatatu?" 21 Ikabheje Liekalu libhakungulushilaga a Yeshu, ni shiilu shabho bhayene. 22 Bhai, a Yeshu bhakayuyweje, bhaajiganywa bhabho gubhakumbushilenje kuti bhatashiye gene malobhego, gubhagakulupalilenje Majandiko ga Ukonjelo na malobhe gubhatashiye a Yeshu gala. 23 A Yeshu pubhaaliji ku Yelushalemu kushikukuu sha Pashaka, bhandu bhabhagwinji bhakaibhonanjeje ilangulo ibhaitendile gubhaalulupalilenje. 24 Ikabheje a Yeshu bhagakulupalila, pabha bhajimanyi mitima jabhonji. 25 Na bhakapingaga mundu akomelesheye shindu shoshowe ga bhandunji, pabha bhajimanyi mitima jabhonji.

3 Bhashinkupagwa bhakulungwa bhamo bha ashikalongolele bha lukumbi lwa Bhayaudi, bha munkumbi gwa shikundi sha dini ja Bhayaudi shishemwa Mapalishayo, lina lyabho a Nikodemo. 2 Lyubha limo shilo bhashinkwaajendela a Yeshu, gubhaalugulile, "Mmaajiganya, tummanyi kuti mmwe mmaajiganya ntumilwe na a Nnungu, pabha jwakwa mundu akombola kutenda yene ilangulo inkutenda, a Nnungu bhakabhe pamo naka jwenejo." 3 A Yeshu gubhaajangwile, "Kweli ngunakummalanjila, mundu akabheleke gwabhili, akagubhona Upalume gwa a Nnungu." 4 A Nikodemo gubhaabhushiyenje, "Mundu jwa nkulungwa pa bhelekeke gwabhili shanabhuli? Shakombole bhuli kujinjila nnpitiya lya akwabhe nibhelekeke gwabhili!" 5 A Yeshu gubhaajangwile, "Kweli ngunakummalanjila, mundu akabhelekeke kwa mashi na kwa Mbumu jwa a Nnungu, akakombola kujinjila mu Upalume gwa a Nnungu. 6 Shibhelekeke kwa shiilu ni shiilu na shibhelekeke kwa Mbumu ni mbumu. 7 Nnaimonje pabha njibheleketa kuti, nnapinjikwanga mmelekwanje gwabhili. 8 Mbungo jinapuga niloya kujipinga, mpugo gwakwe gunapilikanika, ikabheje kukamanyika kuukoposhela wala kuukwenda. Nneyo peyo puili kuka mundu abhelekeke kwa Mbumu jwa a Nnungu." 9 A Nikodemo gubhaabhushiyenje, "Genega shigakomboshe shanabhuli?" 10 A Yeshu gubhaajangwile, "Mmwe mmaajiganya bha pa Ishilaeli, bhuli, nnagamanye genega? 11 Kweli ngunakummalanjila, uwe tunabheleketa itukwimanya nikong'ondela ituibhweni, ikabheje mmanganya nkaakundanga ntenga gwetu. 12 Monaga nkaakulupalipanga indu ya pa shilambolyo inimmalanjilenje, shinkulupalilanje bhuli nimalanjilangaga indu ya kunnungu? 13 Jwakwa jojowe apite kunnungu, ikabhe nne Mwana juka Mundu ngopweshe kunnungu. 14 "Malinga a Musha shibhanninjilwile kunani nuushi lijoka jwa alaywa na shabha kuanga kulin, nneyo peyo inapinjikwa nne Mwana juka Mundu nyinulwe kunani, 15 nkupinga jojowe shakulupalile akole gumi gwa pitipiti." (aiōnios g166) 16 Pabha a Nnungu bhashinkwaapinganga bhandu pa shilambolyo, mpaka gubhampeshe mwanagwabho jwa jika, nkupinga jojowe shankulupalile anaobhe, ikabhe akole gumi gwa pitipiti. (aiōnios g166) 17 Pabha a Nnungu bhangampeleka mwanagwabho kushilambolyo nkupinga aukumule bhandu, ikabhe kwabhatapulanje. 18 "Akunkulupalila Mwana jwa a Nnungu akaukululwa, ikabheje akakunkulupalila jwenejo

akumwilwe, pabha jwanganakupalila Mwana jwa jika jwa a Nnungu. **19** Bhashiukumulwanga pabha, shilangaya shishe pa shilambolyo, ikabheje bhandunji gubhapinjilenje lubhindu kupunda shilangaya, kwa ligongo lya itendi yabhonji yangali ya mmbone. **20** Mundu jojowe atenda yambi shinakunshima shilangaya, na akabhandishila ku shilangaya, pabha akaapinga itendi yakwe ya yambi imanyishe. **21** Ikabheje atenda itendi ya mmbone anakwiya ku shilangaya, nkupinga imanyishe kuti itendi yakwe ni yakomboywa na a Nnungu.” **22** Gakapiteje genego, a Yesu na bhaajiganywa bhabho gubhapitengeneneje mmbali ja ku Yudea, gubhatemi kweneko bhalibhatisha bhandu. **23** Na bhalabho a Yowana kubhaaliji ku Aironi, tome na ku Shalemu bhalibhatisha bhandu, pabha kweneko gashinkupagwa mashi gamagwinji. Bhandu gubhaajendelenje, na bhalabho gubhaabhatishenje. **24** Gene mobhago a Yowana pubhaliji bhakanabhe kamulwa nitabhwa. **25** Jishinkukoposhela mitau ja bhaajiganywa bha a Yowana na bhayaudi bhamo ga nkubho gwa Shiyaudi gwa tawasha. **26** Bhai bhaajiganywa bhala gubhaajendelenje a Yowana nkwaalugulila, “Mmaajiganya, mundu aaliji na mmwe kung'ambu lushi lwa Yolodani jumwakong'ondele ga ngani jakwe jula, na jwalakwe nnaino anabhatisha na bhandu bhabhagwinji bhanakunnjendelanga.” **27** A Yowana gubhajangwile, “Mundu nngakola shoshowe akapegwe na a Nnungu kukoposhela kunnungu. **28** Numbe mwaashayene nnikong'ondelanga kuti nantashiyenje kuti, 'Nne nngabha a Kilishitu Bhagombola, ikabhe njitumwa nkupinga naalongole!’” **29** Jwenejo malinga nkulomba, na nne malinga mmbwiga mwine nkulomba, ajima nkulindilila nkulomba aische, anakwiinonyela kwa kaje paapilikana lilobhe lika nkulomba alikwiya. Bhai, kwa nneyo kwiinonyela kwangu kutimilile kwa pilikana genego. **30** Inapinjikwa bhenebho bhapunde kukuywa, nne mujile nnyuma.” **31** “Jwene aische koposhela kunani, ni jwankulungwa kupunda yowe, ikabheje jwa pashilambolyo ni jwa pashilambolyope na gabheleketa ni ga indu ya pashilambolyo. Ikabheje akwiya kukoposhela kunnungu ni jwankulungwa kupunda yowe. **32** Jwenejo yataya yaibhweni na kwipilikana ila, ikabheje jwakwa mundu akunda ntenga gwakwe. **33** Ikabheje mundu jo jowe akunda ntenga guka jwenejo, anakong'ondela kuti a Nnungu ni bhakweli. **34** Jwene atumilwe na a Nnungu anabheleketa malobhe ga a Nnungu, pabha a Nnungu bhanakumpa mundu Mbumu jwabho gwangali shipimilo. **35** A Nnungu bhanakumpinga Mwana na bhashikunkamuya yowe mmakono gakwe. **36** Akunkulupalila mwana akwete gumi gwa pitipiti, akana kunkulupalila mwana, akakola gumi gwa pitipiti, ikabhe nnjimwa ja a Nnungu jintamile.”

(aiōnios g166)

4 Ashimapolishayo gubhapilikenenje kuti a Yesu bhanapata na bhatisha bhaajiganywa bhabhagwinji kupunda a Yowana. **2** Ikabheje a Yesu bhayene bhangabhatisha mundu ikabhe bhabhatishangaga bhaajiganywa bhabho. **3** Bhai, a Yesu bhakagamanyenje genego, gubhajabhwiile ku Yudea kubhuja ku Galilaya, **4** gwene mwanjago bhashinkupinjikwa bhapite ja ku Shamalia. **5** Bhai, gubhaishe ku Shikali shilambo shimo sha ku Shamalia, tome na nngunda gwa a Yoshepu gubhapegwilwe na ainabhabho a Yakobho bhukala. **6** Penepo lishinkupagwa liiko lya a Yakobho, puyaliji malanga ga shaa shita ja mui,

pabha a Yesu bhashinkutotoshela ga mwanja gula, gubhatemi panyenje liiko. **7** Bhai, gubhaishe bhakongwe bhamo bha Shishamalia kuuteka mashi. A Yesu gubhaalugulile, “None mashi gang'wa.” **8** Gene malangago bhaajiganywa bhabho kubhapitengeneneje kunjini kuuma shalya. **9** Bhakongwe bhala gubhaabhalanjile a Yesu, “Mmwe Mmayaudi na nne Bhakongwe Bhashamalia! Nkukombola bhuli kunyuga mashi gang'wa?” Bhashinkubheleketa nneyo pabha Bhayaudi na Bhashamalia bhakaanjanilana. **10** A Yesu gubhaajangwile, “Nkashimanyi shibhapinga kumpa a Nnungu, numbe gani akummalanjila, none mashi ga ng'wa, nkannijule jwenejo akampele mashi gataga gumi.” **11** Bhakongwe bhala gubhashite, “Mmakulungwa, mmwe mwangali nngabho na liikoli lishitaliya, kumpatile kwei mashi gataga gumigo? **12** Igala mmwe mmakulungwa kupunda ambuje a Yakobho? Bhenebho ni bhatupele uwe lyene liikoli, bhayene na ashibhana bhabho na bhannyama bhabho bhang'welenje mashi ga lyene liikoli.” **13** A Yesu gubhajangwile, “Jojowe shang'we mashi ga lyene liikoli shakole njota kabhili. **14** Ikabheje shang'we mashi gushinimpe nnego akakola njota kabhili. Mashi gushinimpe nnego shigaalaye nkati jakwe shinyenyei sha mashi gataga gumi gwa pitipiti.” (aiōn g165, aiōnios g166) **15** Bhakongwe bhala gubhaalugulile, “Mmakulungwa, none mashigo ngunakole njota kabhili, ngunaishe kabhili apano kuteka mashi.” **16** A Yesu gubhaalugulile, “Nnjende nkaasheme ambujebhenu, nng'ishe nabho apano.” **17** Bhakongwe bhala gubhajangwile, “Nangali ambujebhangu.” A Yesu gubhaalugulile, “Ntashiyenje ukoto, kuti mwangali ambujebhenu. **18** Pabha mwalmobilwe paano na bhunkutama nabho nnainobho nngabha ambuje bhenu bha alali. Penepo guntashiyega ga kweli.” **19** Bhakongwe bhala gubhaabhalanjile, “Mmakulungwa, nne pungubhona kuti mmwe ankulondola bha a Nnungu. **20** Bhanangulungwa bhetu bha Shishamaliya pubhaajijilangaga a Nnungu pa ashi shitumbishi, ikabheje Mmayaudi mmwe nkutinji ku Yelushalemu kula nikutupinjikwa kujijila Nnungu.” **21** A Yesu gubhaalugulile, “awile, nngulupalile nne, mobha ganakwiya nkaajuganga Atati pa shene shitumbishi, wala ku Yelushalemu kula. **22** Mmanganyanji Bhashamaliya nakwaamanyanga bhunkwaajuganga, ikabheje Tubhayaudi uwe taamanyi bhutukwaajuga, pabha natapulo gwa a Nnungu shuguishe kupitila ku Bhayaudi. **23** Ikabheje malanga shigaishe, numbe gaishe, gatenda bhakwaatindibhalilanga bha kweli, shibhaatindibhalilanje Atati kwa mashili gaka Mbumu na kwa kweli. Pabha Atati bhanakwaapinganga bhandunji bhaajuganga shana nneyo. **24** A Nnungu ni Mbumu, na bhandu bhakwajuganga bhenebho, bhanapinjikwanga bhaajuganje kwa komboywa naka Mbumu na kweli.” **25** Bhakongwe bhala gubhaalugulile, “Nimumanyi kuti bhanakwiya bhaagwilwe na a Nnungu bhaashemwa a Kilishitu Bhaatapula. Bhenebho bhakigwa, shibhatubhalanjile indu yowe.” **26** A Yesu gubhaabhalanjile, “Nne ngukunguluka na mmwe ni bhayene.” **27** Penepo bhaajiganywa bhabho gubhabhujilengeneneje, gubhakanganigwenje ga kwaakongana a Yesu bhalikunguluka na bhakongwe. Ikabheje jwakwa abhabhushiye, “Nkupinga nndi?” Eu, “Kwa nndi nnakunguluka na bhakongwe?” **28** Bhene bhakongwebho gubhaleshile lulo lwabho popo gubhapite kunjini nikwabhalanjilanga bhandunji, **29**

"Twendangane nkaalolanje bhandu bhamalanjile indu yangu yowe indendile! Bhuli, nngatendeka bhenebho kubha a Kilishitu Bhaagombola?" **30** Bhai bhandunji kukopoka kunjini kula gubhaajendelenje a Yeshu. **31** Gene malanga pego bhaajiganywa bhabho gubhaashondelesheyenje a Yeshu bhalinkutinji, "Shonde Mmaajiganya, nnye shalya." **32** Ikabheje a Yeshu gubhaalugulilenje, "Nne ngwete shalya shinkakushimanyanga." **33** Bhaajiganywa bhabho gubhabhuyenenje, "Apali mundu abhapele shalya?" **34** A Yeshu gubhaalugulilenje, "Shalya shangu ni kutenda ibhapinga bhandumile bhala na maliya liengo lyabho. **35** Mmanganyanji nkabheleketanga kuti, 'Jiigele miei nsheshepe, gaishe mobha ga neng'ena?' Ikabheje nne nguti, nnolanje bhandunjibha, ni malinga yalya mmigunda, iishile pa una. **36** Nkuuna analipwa, na analopoleta mauno pamo nkupinga gabhe na gumi gwa pitipiti, nkupinga nkupanda na nkuuna bhowe bhainonyelanje. (aiōnios g166) **37** Kwa nneyo ashi shibheleketi sha kuti, 'Jumo anapanda na juna anauna.' Ni sha kweli. **38** Nne njikumtumanga nkaunanje mauno gunkanakamulilanga liengo lya lima, bhakamwilenje liengo likulungwa bhananji, ikabheje inkwiipatanga mmanganyanji, ni kwa ligongo lya liengo lyabhonji." **39** Bhashamalia bhahagwinji bha shene shilambo shila gubhaakulupalilenje a Yeshu kwa ligongo lya malobhe gubhabheleketi bhakongwe bhala kuti, "Bhashinugulila indu yowe indendile." **40** Bhashamalia gubhaajendelenje a Yeshu nikwashondelesheya bhatame nabhonji, gubhatemi kweneke mobha gabhili. **41** Bhandu bhahagwinji kaje gubhaakulupalilenje a Yeshu kwa ligongo lya malobhe gabho. **42** Gubhaalugulilenje bhakongwe bhala, "Nnaino uwe tunakulupalila nngabha kwa ligongo lya malobhe genupe, ikabheje tupilikene twaashayene na tumamanyi kuti bhenebha bhapinga tapula shilambolyo." **43** Gakapiteje mobha gabhili a Yeshu gubhajabhwiwe kweneke, gubhapite ku Galilaya. **44** Pabha bhayene bhalugwile gwangali nng'iyi kuti, "Nkulondola jwa a Nnunu akaishimika pa shilambo shakwe." **45** Bhai bhakaisheje ku Galilaya, Bhagalilaya bhahagwinji gubhaaposhelenje. Pabha gubhapitengenjenje ku Yelushalemu kushikuu sha Pashaka, kweneke bhagabhweninji gowe gubhatendile a Yeshu. **46** A Yeshu gubhaishe kabhili kushilambo sha ku Kana kunkowa gwa ku Galilaya, kubhatendile mashi kubha divai. Ku Kapalanaumu bhashinkupagwa bhakulungwa bhama bha manjola bhakwete mwana nwele ku Kapelenaumu. **47** Bhai, bhakulungwa bha manjola bhala bhakapilikaneje a Yeshu bhashiika ku Galilaya kukoposhela ku Yudea, gubhaajendele nikwaajuga bhajende ku Kapalanaumu bhakannamye mwana gwabho aliji nwele jwa numbangu. **48** A Yeshu gubhaalugulile, "Nkaibhonanje ilangulo na ilapo nkakulupalilanga!" **49** Bhakulungwa bha manjola bhala a gubhaalugulile a Yeshu, "Mmakulungwa, shonde twende mwanangu akanabhewa." **50** A Yeshu gubhaalugulile, "Njende, mwana gwenu alamile." Bhandu bhala gubhakulupalile malobhe ga a Yeshu, gubhajabhwiwe. **51** Bhali mumpanda gwa kwenda kungwabho, gubhaimikene na bhatumishi bhabho, gubhaalugulilenje, "Mmakulungwa, mwanagwenu alamile". **52** Na bhalabho gubhabhushiyenje, "Malanga gani mwana palamile" Gubhaalugulilenje, "Liyo shaa shaba ja mui, shilwele pushinnesshile." **53** Ainamundu bhala gubhakumbushile kuti

pugaliji malanga gogo pego pubhalugulilwe na a Yeshu kuti, "Mwana gwenu alamile." Penepo bhenebho na ashaalongo ajabho bhowe gubhaakulupalilenje. **54** Sheneshi pushaliji shilangulo sha bhili shibhatendile a Yeshu bhalibhuja ku Yudea kwenda ku Galilaya.

5 Gakapiteje genego shashinkupagwa shikuu sha Bhayaudi, na bhalabho a Yeshu gubhapite ku Yelushalemu. **2** Kwene ku Yelushalemu, tome na nnango gushemwa, Nnango gwa Ngondolo, lyashinkupagwa litanda lya mashi liishemwa Bhetishata kwa Shiebbhulania, na lyashinkukola mmbuto nng'ano. **3** Nnyenje mmattimbwimo bhashinkupagwanga bhalwelenji bhahagwinji bhatemingenenje, ashinangalole na ashinangwabha na bhapolokanga ibhalo, bhalingini nkulindiila mashi gakologanywe. **4** Pabha malaiika jwa kunnungu atendaga tuluka nitimbulikanya mashi. Nnwele jojowe shalongoele tumbushila mmashi mula, shalame shilwele shoshowe shakwete. **5** Bhai, penepo ashinkupagwa nwele jumo alwalile yaka makumi gatatu na yaka nane. **6** Numb a Yeshu bhakammoneje jwenejo aii agonile penepo, gubhang'amwile kuti jwenejo patemi penepo mobha gamagwinji, gubhammushiye, "Bhuli ulipinga kulama?" **7** Na jwalakwe gwajangwile, "Mmakulungwa, nne nangali mundu jwandumbushiya mmashimu pugatimbulikanywa. Kila pungulinga tumbushila, mundu juna anakoposhela nimbitila." **8** A Yeshu gubhammalanjile, "Jinuka utole likai lyako ujende." **9** Shangupe mundu jula gwalamile, gwatolile likai lyakwe, gwajabhwiwe. Lyeneli pulyatendeshe Lyubha lya Pumulila. **10** Kwa nneyo Bhayaudi bhananji gubhannugulilenje mundu alamiywe jula, "Lelo Lyubha lya Pumulila, ikaapinjikwa kujigala likai." **11** Ikabheje jwenejo gwabhabhalanjilenje, "Bhene bhandu bhanamiyebho nibhanugulile, 'Jigala likai lyako, ujende.'" **12** Bhalabhonji gubhaammushiyenje, "Jwene mundu akulugulile, 'Jigala likai lyako, ujendejo, gani?'" **13** Ikabheje jwenejo jwangammanya annamiye, pabha a Yeshu bhajabhwiwe penepo, numbe pashinkugumbala lugwinjili lwa bhandu. **14** Bhai kungai a Yeshu gubhaimene naka mundu jubhannamiye jula ku Likanisha, gubhannugulile, "Nnaino ulamile, unatende yambi kabhili, linakuukoposhela lya punda jogoya." **15** Bhene bhandubho gubhapite gubhaalugulilenje bhakulungwa bha Bhayaudi kuti, bhanamiye bhala a Yeshu. **16** Pabha a Yeshu bhashinkutenda genego Lyubha lya Pumulila, Bhayaudi gubhatandwibhenje kwaashima. **17** Bhai a Yeshu gubhaalugulilenje, "Atati bhanakamula maengo mobha gowe, nkali nne ngunakamula maengo nneyo peyo." **18** Kwa gene malobhego, bhakulungwanji bha Bhayaudi gubhapundilenje kuloleya shanabhuli shibaabbulaganje a Yeshu, nngabha ga nngakunda shalia ja Lyubha lya Pumulilape, ikabhe ga bheleketi kuti a Nnunu Ainabhabho, kwa nneyo bhanakwiilinganya na a Nnunu. **19** A Yeshu gubhaalugulilenje, "Kweli kweli ngunakunnugulilanga, Nne namwana gwabho ngakombola tenda shindu sha jikape, ngunatenda shingushibhona Atati bhalitenda. Pabha shibhaatenda Atati, Nne shindende shosho pesho **20** Pabha Atati bhanakumpinga mwana gwabho na bhanakunnunguya kila shindu shibhatenda bhayene na kabhili shibhannanguye indu yaikulungwa kupunda yenei na mmanganya shinkanganigwanje. **21** Malinga Atati

shibhakwayuyanga bhawilenje nikwapanganga gumi, nneyo peyo na Nne Mwana gwabho ngunakwapanganga gumi bhungupinga kwaapanganga. 22 Atati bhakakunng'ukumula mundu jojowe, liengo lyowe lya ukumula bhambele Nne namwanagwabho, 23 nkupinga bhandu bhowe bhang'isimiyanje malinga shibhakwaisimiyanga Atati. Bhakang'ishimiyanga Nne bhakakwaisimiyanga Atati bhandumile. 24 "Kweli ngunakummalanjilanga, apiikana lilobhe lyangu na kwakulupalila bhandumile bhala, akwete gumi gwa pitipiti. Ngu akaukumulwa, ikabhe atapwilwe kushiwo na apegwilwe gumi. (aiōnios g166) 25 Kweli ngunakunnugulilanga, mobha ganakwiya, numbe gaishe, bhawilenje shibhapilikananje lilobhe lyangu, na shibhapilikananjebho, shibhalamanje. 26 Malinga Atati shibhali shiumilo sha gumi, nneyo peyo bhandendile nne Namwana gwabho kubha shiumilo sha gumi. 27 Kabhili bhashimba mashili ga ukumula pabha nne Mwana juka Mundu. 28 Nnakaniganigwanje kwa lyeneli, pabha mobha ganakwiya bhowe bhalinginji mmakabhuli shibhapilikananje lilobhe lyangu. 29 Na bhalabhonji shibhayukanje, bhatendilenje ya uguja shibhayukanje na lama na bhatendilenje yangali ya mmbone shibhayukanje na ukumulwa." 30 "Nne ngaatenda shindu kwa mashili gangu namwene. Nne ngunaukumula malinga shingupilikana kopoka kwa Atati, nne ukumu jangu ja aki. Nne ngaapinga tenda shingupinga namwene, ikabhe shibhaapinga bhandumile bhala. 31 "Niikong'ondelaga namwene, ukong'ondelogo jwakwa shakunde kuti gwa kweli. 32 Ikabheje bhapalinji bhananji bhaakong'ondelanga gangu nne, munkumbi gwabhonjimo bhapali a Yowana. Na nne nimumanyi kuti yowe ibhakong'ondele gangu nne, ni ya kweli. 33 Mmanganyanji nshikwaatumanga bhantenga kwa a Yowana, na bhalabho gubhakong'ondele ga kweli. 34 Nne ngalolela kukong'ondelwa na bhandunji, ikabheje ngunabheleketa genega nkupinga ntapulwanje. 35 A Yowana pubhaliji malinga shenje shikolela nilangaya, na mmanganya mwainonyelenje shilangayasho kwa mobha gashoko." 36 "Ikabheje nne ngwete ukong'ondelo gwangu namwene numbe gwankulungwa kupunda gwa a Yowana. Pabha maengo gungutenda, ni gubhambele Atati nigatende. Numbe genego ganangong'ondela kuti njitumwa na Atati. 37 Nabhalabho Atati bhandumile bhanangong'ondela. Mmanganya nkanabhe pilikananga lilobhe lyabho, wala kwaabhona kumeyo, 38 na ntenga gwabho gukatama mmitima jenunji, pabha mwangankulupalilanga jubhantumile jula. 39 Mmanganya nnaatonelanga Majandiko ga Ukonjelo nniganishiyanga kuti mwenemo, shimpatanje gumi gwa pitipiti, mbeni Majandiko gogo ganangong'ondela nne! (aiōnios g166) 40 Nkali nneyo, mmanganya nkapinganga kunyiila nne nkupinga mpatanje gumi. 41 "Nne ngaloleya kuiniywa na bhandunji. 42 Ikabheje nimumanyi kuti mmanganyanji, kwaapinga a Nnungu kwakwa mmitima jenunji. 43 Nne pung'ishe kwa mashili ga Atati, ikabheje nkamboshelanga. Ikabhe mundu juna aikaga kwa mashili gakwe nyene, shimumposhelanje. 44 Mmanganyanji nnapinganga kulumbiliwa na bhandu ajenunji, na nkaapinganga kulumbiliwa na Bhenebho bhali jikape a Nnungu, igala shinkulupalilanje bhuli? 45 Nnaganishiyanje kuti nne shininnugulanje kwa Atati. A Musha bhunkwaakulupalilangabho shibhannugulanje. 46

Monaga kweli mwaakulupalilanje a Musha, nkangulupalilanje na nne. Pabha a Musha bhashinkujandika gangu nne. 47 Ikabheje nkakulupalilanje gubhajandishe gala, shinkulupalilanje bhuli, malobhe gungubheleketa nne?"

6 Gakapiteje genego, a Yesu gubhajombweshe litanda lya Galilaya eu guna lishemwa litanda lya Tiheliya. 2 Lugwinjili lwa bhandu gulwaakagwile, pabha bhashikwiibhonanga ilangulo ibhatendaga ya kwaalamyanga bhalwelenji. 3 A Yesu gubhakwelile pa shitumbi, gubhatemi na bhaajiganywa bhahbo. 4 Na shikukuu sha Bhayaudi shishemwa Pashaka shashinkubhandishila. 5 Bhai, a Yesu bhakaloleje nikulubhona lugwinjili lwa bhandu lulikwajila, gubhaalugulile a Pilipi, "Tukaume kwei mikate bhandunjibha bhalyanganje?" 6 Bhashinkubheleketa genego nkwaalinga a Pilipi, pabha bhayene bhashimanyi shishibhatende. 7 A Pilipi gubhaajangwile, "Nkali mikate ja mmbiya yaigwinji, nngajenela kwa bhandunjibha nkali kila mundu apate shipande shishokope!" 8 Jumo munkumbi gwa bhaajiganywa bhahbo ashemwaga a Ndeleya, mpwabho a Shimoni guna pubhashemwaga a Petili, akwaalugulilaga, 9 "Apano apali mwana jumo akwete mikate nng'ano ja mbungalai na yamaki ibhili, ikabheje yenei shiipwae nndi na lugwinjili lwa bhandunjulu?" 10 A Yesu gubhashite, "Mwaatendanje bhandunji bhatamangane pai." Pashinkupagwa manyai gamagwinji penepo. Bhai, bhandu gubhatemingenenje. Bhanabhalume jika pubhalinginji elupu nng'ano. 11 A Yesu gubhatolile mikate jila, gubhatendile eja kwa a Nnungu, gujigebhenywe ku bhandunji bhatemingenenje bhala, nneyo peyo gubhatendile kwa yamaki ila, kila mundu gwapatile mwapingile. 12 Bhandu bhakajukutanjeje, a Yesu gubhaalugulilenje bhaajiganywa bhahbo, "Nkundikanyanje makombo galeshe gala ganaobhe." 13 Bhai, gubhakundikenyenje ipande ya mikate ibhalepenje bhandu bhalyangangaga bhala, gubhagumbeyenje ikapu likumi limo na ibhili. 14 Bhandu bhakashibhonanjeje shene shilangulo shibhatendile a Yesu, gubhashitenje, "Kweli bhenebha ankulondola bha a Nnungu bhakwiya kushilambolyo." 15 A Yesu gubhamumanyi kuti bhandunji bhanapinganga kwaakamula nkupinga bhaatendanje a mpalume bhahonji, gubhajabhwiwe kabhili, gubhapite jikape kushitumbi. 16 Likaisheje ligulo bhaajiganywa bhahbo gubhaelelenje mpaka kulitanda, 17 gubhakwelilenje mmashua, nigubhatandubhenje kujomboka kwenda ku Kapalanaumu. Gene malangago kuli lubhundu, na a Yesu bhali bhanabhe ika kulitanda. 18 Kwa ligongo lya mbungo japugaga, mabhimbili gugatandubhe nmitanda. 19 Bhaajiganywa bhala bhali bhaptengenjenje kwaataliya mbuti maili gatatu eu nsheshe, gubhaabhwinenji a Yesu bhali bhahandishile mashua bhaliowa pantundu mashi, gubhajogwepenje kwa kaje. 20 A Yesu gubhaalugulilenje, "Nnajogopanje, ni nne!" 21 Bhai gubhakundilenje kwaajigala mmashua mula, kashokope gubhaikengenjenje kung'ambu kubhajandanganaga kula. 22 Pa lyamba lyakwe lugwinjili lwa bhandu bhalepekenje kung'ambo jina ja litanda, gubhang'amwilenje kuti gupali ntumbwi gumope pepala na a Yesu bhangajinjila muntumbwi pamo na bhaajiganywa bhahbo, ikabhe bhaajiganywa bhala

pubhapatengenenje jikape. 23 Mitumbwi jina gujiishe kukopoka ku Tibheliya kubhalilenje bhandu mikate jila, a Yesu bhakatendeje eja kwa Bhakungwa a Nnungu. 24 Bhai, bhandunji bhala bhakang'amulanjeje kuti a Yesu na bhaajiganywa bhabho bhakwapinji pepala, gubhakwelilenje muntumbwi gubhapatengenenje ku Kapalanaumu kukwaaloleya. 25 Bhandunji bhala bhakaamananjeje a Yesu kung'ambo jabhili la litanda gubhaabhushiyenje, "Maaajiganya, nng'ishe shakani kwekuno?" 26 A Yesu gubhaajangwilenje, "Kweli ngunakummalanjilanga, nnanoleyanga nngabha kwa ligongo lya kugamanya malombolelo ga ilangulo, ikabhe pabha mwashinkulyanganga mikate nijukuta. 27 Nnaabhushilanje shalya shiangabhanika, nng'abhushilanje shalya shikaangabhanika shilonjeja nipeleshela gumi gwa pitipiti. Nne Mwana juka Mundu jubhankong'ondele Atati, shampanganje shene shalyasho." (aiōnios g166) 28 Bhalabhonji gubhaabhushiyenje, "Tutende bhuli nkupinga tukombole kutenda maengo ga a Nnungu?" 29 A Yesu gubhaajangwilenje, "Liengo libhaapinga a Nnungu ntendanje ni kuti, munkulupalilanje jubhantumile jula." 30 Penepo gubhabhaalanjilenje, "Shintende shilangulo shashi tushibhone nkupinga tunkulupalile? Shintende shindu shashi? 31 Bhanangulungwa bhetu bhalilenje mana nng'anga mula, malinga shigaalugula Majandiko ga Ukonjelo, 'Bhashinkwaaliyanga shalya sha kopoka kunnungu.'" 32 A Yesu gubhaalugulilenje, "Kweli ngunakunnugulilanga, a Musha bhangampanganga shalya kopoka kunnungu, ikabheje Atati nibhakumpanganga shalya sha kweli kopoka kunnungu. 33 Pabha shalya sha a Nnungu ni jwene atuluka kopoka kwa a Nnungu nikwapanganga gumi bhandu pashilambolyo." 34 Bhai, gubhaalugulilenje, "Mmakulungwa, ntupe uwe shene shalyasho mobha gowe." 35 A Yesu gubhaalugulilenje, "Nne ni shalya shipeleshela gumi. Anyiila nne wala akakola shibhanga, na angulupalila nne, wala akakola njota. 36 Ikabheje malinga shinammalanjilenje kuti mmweninjii ikabhe mwangangulupalilanga. 37 Bhowe bhungupegwa na Atati shibhang'ishilanje, jowowe shanyile nne, wala ngaminjila palanga. 38 Pabha njituluka kopoka kunnungu, nngabha kuutenda ingupinga nne, ikabhe kuutenda ibhapinga bhandumile bhala. 39 Na bhandumile bhala shibhapinga ni kuti, ngunanng'obhiye nkali jumo jwabhonji bhubhambela bhala, ikabhe naayuyanje bhowe lyubha lya mpelo. 40 Pabha shibhapinga Atati ni kuti, mundu jowowe akunnola Mwana nikunkulupalila, akole gumi gwa pitipiti, numbe nne shininyuye lyubha lya mpelo." (aiōnios g166) 41 Bhai, Bhayaudi gubhatandwibhenje kwaingishila, pabha bhashinkubheleketa kuti, "Nne shalya shitulwishe kopoka kunnungu." 42 Gubhashitenje, "Bhuli, aju nngabha Yesu mwana gwabho a Yoshepu? Twaamanyi ainagwe na akwabhe! Bhai abheleketa bhuli kuti ashituluka kopoka kunnungu?" 43 A Yesu gubhaalugulilenje, "Nnekanje kutaakangana mwaashayenenji. 44 Jwakwa mundu shang'ishile nne, akashemwe na Atati bhandumile, nne shininyuye jwene mundujo lyubha lya mpelo. 45 Ashinkulondola bha a Nnungu bhajandikenje Mmajandiko ga Ukonjelo kuti, 'Bhandu bhowe shibhaganywanje na a Nnungu.' Mundu jowowe akwaapilikana Atati nikwijiganya ga bhenebho, anyiila nne. 46 Penepo nngabha kuti apali mundu

abhabhweni Atati, ikabhe jwene akoposhele kwa a Nnungu, jwenejo ni abhabhweni Atati. 47 Kweli, ngunakunnugulilanga, akulupalila anapata gumi gwa pitipiti. (aiōnios g166) 48 Nne ni shalya shipeleshela gumi. 49 Bhanangulungwa bhenunji bhaililenje mana nng'anga, ikabheje bhawilenje. 50 Ikabheje sheshino ni shalya shituluka kopoka kunnungu, nkupinga jowowe shaalye anawe." 51 "Nne ni shalya sha gumi shitulwishe kopoka kunnungu. Mundu jowowe alyaga shene shalyashi shalame pitipiti. Na shalya shishinimpanganje ni shiilu shangu shingushishoya ligongo lya gumi gwa bhandu pashilambolyo." (aiōn g165) 52 Penepo Bhayaudi gubhatandwibhenje kupwatanga aashaayenenji bhalinkutinji, "Bhaakombola bhuli bhenebha kutupa shiilu shabho tulye?" 53 A Yesu gubhaalugulilenje, "Kweli ngunakummalanjilanga, nkalyanganje shiilu shangu nne Mwana juka Mundu, na papila minyai jangu, nkakolanga gumi nkati jenunji. 54 Alya shiilu shangu na papila minyai jangu, akwete gumi gwa pitipiti, na nne shininyuye lyubha lya mpelo. (aiōnios g166) 55 Pabha shiilu shangu ni shalya sha kweli, na minyai jangu, ni sha papila sha kweli. 56 Alya shiilu shangu na papila minyai jangu, analandana na nne, numbe nne ngunalandana naka jwenejo. 57 Atati bhakwete gumi bhashinkunduma, numbe nne ngunalama kwa ligongo lyabho, nneyo peyo apingalya shiilu shangu, shalame kwa ligongo lyangu. 58 Bhai, ashino ni shalya shitulwishe kopoka kunnungu, nngabha malinga mana jibhalilenje bhanangulungwa bhenunji nng'anga, ikabheje nkali nneyo bhawilenje. Ikabhe shaalye shene shalya shino, shakole gumi gwa pitipiti." (aiōn g165) 59 A Yesu pubhabhelekete genego bhalijiganya nshinagoci, ku Kapalanaumu. 60 Bhai, bhabhagwinji bha bhaajiganywa bhabho bhakapilikananjeje genego gubhashitenje, "Aga malobhe ga ukomu, gani shakombole kugapiikanishiya?" 61 A Yesu gubhamumanyi gwangali kubhalanjilwa naka mundu kuti bhaajiganywa bhabho bhanainginikanga ligongo lya gene malobhego, gubhaabhushiyenje, "Bhuli iyeneli linakumpanganga lipamba? 62 Bhai shiibhe bhuli, pushimummonanje Mwana juka Mundu aliikwela kubhujwa kwakoposhele? 63 Mbumu jwa a Nnungu ni apeleshela gumi, shiilu jikape nngakombola shindu. Malobhe gunimmalanjilenje ni Mbumu na gumi. 64 Nkali nneyo, bhapalinji bhananji bhakaakulupalilanga." A Yesu bhashinkubheleketa nneyo pabha bhamumanyi kuumila bhukala ashigani bhakaakulupalilanga na jwene apinga kwaatendebhuka. 65 Kungai gubhashite, "Kwa lyene ligongoli, nammalanjilenje kuti, jwakwapi akombola kung'ishila akajaliwe na Atati." 66 Ligongo lya genego, bhaakulupalila bhabho bhabhagwinji gubhaaleshilenje, ninngaakagulanga kabhili. 67 Bhai, a Yesu gubhaabhushiyenje likumi limo na bhahili bhala, "Bhuli, na mmanganyanji nkupinga jabhulangana?" 68 A Shimoni Petili gubhaajangwile, "Mmakulungwa, tujende kukeni? Mwme ni nkwete malobhe ga gumi gwa pitipiti. (aiōnios g166) 69 Uwe tukulupalile na tumumanyi kuti mmwe ni Mundu jwa ukonjelo jwa a Nnungu." 70 A Yesu gubhaalugulilenje, "Bhuli, nangang'agulanga mmanganya likumi limo na bhahili? Nkali nneyo, jumo munkumbi gwenunji ni Lishetani!" 71 A Yesu bhashinkubheleketa genego kwa ligongo lya a Yuda, bhana bhabho a Shimoni Ishikaliote, pabha bhenebho bhapinga

kwaatende bhuka, nkali na bhalabho bhaliji munkumbi gwa likumi limo na bhabhili bhala.

7 Gakapiteje genego, a Yesu bhatendaga owa mmbali ya ku Galilaya. Bhanginga kuwela nkowa gwa ku Yudea kwa ligongo lya ashikalongolele bha Bhayaudi bhapingangaga kwaabbulaganga. **2** Shikukuu sha Bhayaudi, shishemwa shikukuu sha ibhanda shishinkubhandishila. **3** Bhai ashaapwabho gubhaalugulilenje, “Nnjabhule apano njende ku Yudea bhaajiganywa bhenu bhagabnonanje maengo gunkutenda. **4** Mundu apinga manyika na bhandunji, akaatenda indu kwa nng’iyo. Ibhaga nkutenda genega, bhai, mwiilanguye ku shilambolyo.” **5** Nkali ashaapwabho bhangaakulupalilanga. **6** Bhai, a Yesu gubhaalugulilenje, “Malanga gangu gapwaa gakanabhe ika. Ikabheje kwenu mmanganya malanga gowe ganakumpwanga. **7** Bhandunji pa shilambolyo bhakakunshimanga mmanganya, ikabheje bhanashimwanga na nne pabha ngunakong’ondela kuti itendi yabhonji yangali ya mmbone. **8** Mmanganya njendangananje kushikukuuko. Nne ngajenda, pabha malanga gangu gapwaa gakanabheika.” **9** Bhakabheleketeje genego gubhaigele ku Galilaya. **10** Ashaapwabho bhakajendanganaje kushikukuu, nabhalabho a Yesu gubhapite, ikabheje bhanginga kwa bhonekana kulugwinjili ikabhe kwa nng’iyo. **11** Ashikalongolele bha Bhayaudi bhatingaga kwaaloleyanga kushikukuuko, gubhashitenje, “Kubhali kwei?” **12** Gashinkupagwa manong’ono gamagwinji nnugwinjili lwa bhandu ga bhenebho. Bhananji gubhashitenje, “Pubhalipa bhanguja.” Bhananji gubhashitenje, “Nng’oo! Bhanapuganya bhandu.” **13** Nkali nneyo, jwakwa mundu alinjile kubheleketa ngani jabho palugwinjili nkwaajogopanga ashikalongolele bha Bhayaudi. **14** Ikaishileje pakati shikukuu, a Yesu nabhalabho gubhapite ku likanisha gubhatandwibhe kujiganya. **15** Bhai, Bhayaudi gubhakanganigwenje nibheleketa, “Abha bhandubha bhapatile bhuli alu lundalu nabhalabho bhangashoma shule?” **16** Bhai a Yesu gubhaajangwilenje, “Majiganyo gungujiganya nngabha gangu, ikabhe gabho bhandumile bhala. **17** Mundu apinga kutenda gubhapinga a Nnungu, shamumanye monaga majiganyo gangu gano gakopoka kwa a Nnungu, eu ngunakwiibheleketa namwenepi. **18** Jwene akwiibheleketa nnyene, analoleya ukonjelo gwakwe nnyene, ikabheje aloleya ukonjelo gwabho bhandumile bhala, jwenejo jwa kulupalilwa na muntima gwakwe yakwapi yangali ya mmbone. **19** Bhuli, a Musha bhanginganganga shalia? Nkali nneyo, jwakwa nkali jumo munkumbi gwenunji akamula shalia. Kwa nndi mpinga mulaganga?” **20** Bhandunji bhala gubhaajangwilenje, “Mmwe nshikola maoka! Gani apinga kummulaga?” **21** A Yesu gubhaajangwilenje, “Shipali shindu shimo shindendile, shinkanganigwenje. **22** A Musha bhampelenje nkubho gwa jaluka. Nngabha kuti gwene nkubhogo kugwakopweshe kwa a Musha, ikabhe kwa ashambuje. Na nnaino mmanganyanji nkali Lyubha lya Pumulila, nnakuntaganga mundu unyago. **23** Bhai ibhaga, nkali Lyubha lya Pumulila mundu anajaluka nkupinga shalia ja a Musha jinaleshwe, pakuti nnandumbalilanga kwa ligongo lya kunnama mundu Lyubha lya Pumulila? **24** Nnaukumulanje indu kwa lola sha palangape, nshoyanje

ukumu ja aki.” **25** Bhandu bhananji bha ku Yelushalemu gubhashitenje, “Bhuli, bhenebha nngabha bhuhhaakwaloleyanga kwaabbulaganje bhala? **26** Nnolanje nnaino! Bhanabheleketa palugwinjili, na wala bhakakwaabhalanjilanga shindu. Bhuli ipingaga ashikalongolele bhangingamwilenje kuti kweli bhenebha a Kilishitu? **27** Ikabheje tukumanyi abha bhandubha kubhakoposhele, a Kilishitu pushibhaishe jwakwa mundu shakumanye kubhakoposhele!” **28** Bhai, a Yesu pubhaliji nkujiganya Nniekalu gubhaukiye liobhe, “Elo mmanganyinji nne, na kungoposhele nkumanyinji! Nkali nneyo, nangaika kwa mashili gangu namwene, ikabhe bhandumile bhala bha kweli, mmanganyanji nkakwaamanyanga. **29** Ikabheje nne naamanyi pabha kungoposhele kunngwabho, bhenebho ni bhandumile.” **30** Bhai, bhandunji gubhapingilenje kwaakamula, ikabheje jwakwapi mundu alinjile kwaakamula, pabha malanga gabho ga kamulwa galiji gakanabheika. **31** Bhandunji bhahagwinji nnugwinjili mula gubhaakulupalilenje, nigubhashitenje, “Igala, pushibhaishe a Kilishitu shibhatende ilangulo yaikulungwa kupunda ibhatendile bhenebhai?” **32** Ashimapalishayo gubhaapilikenenje bhandunji bhainong’onanga nkwainginika a Yesu. Bhai, Ashimapalishayo na bhakulungwanji bhaabhisila gubhaatumilenje bhalinda bhaakakamulanje. **33** A Yesu gubhashite, “Puni pamo na mmanganyanji mobha gashoko, kungai shinyende kubhandumile bhala. **34** Nkupinganoleyanga, ikabheje nkamonanga, pabha pene pushimbagwe nne pala, nkakombolanga kuika.” **35** Ashikalongolele bha Bhayaudi gubhabhuyenenje ashaayenenji, “Abha bhandubha kubhapinga kwenda kwei kwaatenda uwe tunaapate? Eti bhapinga kwaajendelanga Bhayaudi bhawilinganishilenje ku Bhagiliki bhakajiganyanje Bhagiliki? **36** Malombolelo gwakwe nndi malobhe gubhabheleketege. ‘Nkupinga noleyanga ikabheje nkamonanga, na pushimbagwe nne mmanganyanji nkakombolanga kuika?’” **37** Lyubha lya mpelo gwa shikukuusho pulyaaliji lyubha likulu. A Yesu gubhajimi, gubhashite kwa liobhe lya utiya, “Akwele nrijota ajiye kwangune apapile. **38** Malinga shigataya Majandiko ga Ukonjelo. ‘Angulupalila nne, nushi ya mashi ga gumi shibhutusha kopoka muntima gwakwe!’” **39** Bhashinkubheleketa genego kwa ligongo lya Mbumu jwa Ukonjelo jushibhamposhelane bhaakulupalilenjebho. Gene malangayo Mbumu jwa Ukonjelo paaliji akanabhe ika, pabha a Yesu bhaliji bhakanabhe kuywa. **40** Bhandu bhananji nnugwinjili mula gubhapiikenenje gene malobhego, gubhashitenje, “Kweli bhene bhandubha ankulondola bha a Nnungu bhakwiya bhala!” **41** Bhananji gubhashitenje, “Abha a Kilishitu!” Ikabheje bhananji gubhashitenje, “Bhuli, inakomboleka a Kilishitu kukopoka ku Galilaya? **42** Gakuti bhuli Majandiko ga Ukonjelo? Gakuti. ‘A Kilishitu shibhakoposhele nshipinga sha a Daudi, shibhabhelekw ku Bheteleemu, shinkambo sha a Daudi!’” **43** Bhai, gugakoposhele malekano munkumbi gwa bhandunji mula kwa ligongo lya a Yesu. **44** Bhandu bhananji gubhapingilenje kwaakamula ikabheje jwakwa alinjile kwaakamula. **45** Kungai bhalinda bhala gubhabhujilenje kubhakulungwanji bha bhakulungwanji bhaabhisila na Mapalishayo, nabhalabhonji gubhaabhusiyenje, “Kwa nndi mwangajia nabhonji?” **46** Bhalinda gubhaajangwilenje, “Wala jwakwa mundu akombwele bheleketa malinga

shibhaabheleketa bhene bhandu bhala!" 47 Ashimapolishayo gubhaabhushiyenje, "Bhuli, nkali mmanganyanji ntembilwenje? 48 Bhuli, mumweninji nkali jumo jwa ashikalongolele bha bhandu, eu jumo jwa Mapalishayo abhakulupalile? 49 Ikabheje alu lugwinjilulu bhakakujigamanya shalia ja a Musha, bhashiloshwanga na a Nnungu!" 50 Bhomo bha munkumbi gwa Mapalishayo, a Nikodemo, bhaajendele a Yesu mobha gapitile, gubhaalugulilenje, 51 "Bhuli, shalia jetu jinkunng'ukumula mundu gwangatandubha kumpilikanihiya nikugamanya gatendile?" 52 Bhalabhonji gubhaajangwilenje, "Bhuli na mmwe kunkopweshe ku Galilaya? Ayaga, nkalole Mmajandiko ga Ukonjelo, na mmwe shimumanye kuti ku Galilaya kukakopoka Nkulondola jwa a Nnungu!" 53 Bhai kila mundu gwapite kunngwakwe.

8 Ikabheje a Yesu gubhapite kushitumbi sha Misheituni. 2 Malabhi gakwe lyambape gubhapite kabhili ku likanisha. Bhandu bhowe gubhaajendelenje, nigubhatemi kwaajiganyanga. 3 Bhai, bhaajiganya bha shalia na Mapalishayo gubhaapeleshelenje bhakongwe bhomo bhaimanilwe nkulabhalabha. Gubhaajimikenje mmujo jabho. 4 Gubhaabhushiyenje a Yesu, "Mmajiganya! Bhene bhakongwebha bhashiimanilwa nkulabhalabha. 5 Kupitila shalia, a Musha bhatulajile kuti, bhakongwe malinga bhenebha bhakomwe maganga mpaka bhawe. Bhai, mmwe nkuti bhuli?" 6 Bhashinkubheleketa ganyo nneyo nkwaatejela, nkupinga bhapatanje shiumilo sha kwaalugula. Ikabheje a Yesu gubhakotime pai, nijandika na shikowe nnitaka. 7 Bhakapundanjeje kwaabhuya, a Yesu gubhajinwishe, gubhaalugulilenje, "Mundu jwangali shambi munkumbi gwenunji, abhe jwantai kuleshela liganga." 8 Kungai gubhakotime kabhili, bhaliandika nnitaka. 9 Bhakapilikananjeje nneyo, gubhatandwibhenje kujabhula jumojumo, kutandubhila bhanangulungwa. A Yesu gubhaigele jikape, na bhakongwe bhala bhajimi pala pepala. 10 A Yesu bhakajinushenje gubhaabhushiyenje bhakongwe bhala, "Kubhalinginji kwei bhakunshitikiyanga bhala? Bhuli, jwakwa nkali jumo akunng'ukumula?" 11 Bhakongwe bhala gubhajangwile, "Mmakulungwa, jwakwa nkali jumo!" A Yesu nabhalabho gubhaalugulile, "Nkali nne ngang'ukumula. Mwijendele, tandubhila nnaino nnatende yambi kabhili." 12 A Yesu gubhakungulwishe na bhandunji bhala kabhili, bhalinkuti, "Nne shilangaya sha shilambolyo. Angagula nne, wala akaowa nnuhindu, ikabheje shakole shilangaya sha gumi." 13 Bhai Ashimapolishayo gubhalugwilenje, "Mmwe nnakwikong'ondela mmayene, kwa nneyo ukong'ondelo gwenu nngabha gwa kweli." 14 A Yesu gubhaajangwilenje, "Nkali monaga ngunakwikong'ondela namwene, ukong'ondelo gwangu gwa kweli, pabha nne nikumanyi kungoposhele na kungwenda. Ikabheje mmanganyanji nakukumanyanga kungoposhele wala kungwenda. 15 Mmanganyanji nnakumulanga kwa ng'aniyo ya shigundu. Ikabheje nne ngakunng'ukumula mundu. 16 Nkali ng'ukumulaga, ukumu jangu ja kweli, pabha nne puni nngabha jikape, Atati bhandumile pubhali na nne. 17 Shalia jenunji jangajandika Mmajandiko ga Ukonjelo kuti, ukong'ondelo gwa bhandu bhabhili ni gwa kweli. 18 Nne ngunakwikong'ondela namwene, na bhalabho Atati bhandumile bhanangong'ondela

nneyo peyo." 19 Penepo gubhaabhushiyenje, "Ainabheni kubhali kwei?" A Yesu gubhajangwile, "Mmanganyanji nkaamanyanga nne, wala Atati nakakwaamanyanga. Kaliji nkamanyinji nne, nkali Atati nkaamanyinji." 20 A Yesu gubhaabhelekete genego bhaliiganya ku likanisha, tome na pushaaliji shibhiko. Jwakwa mundu abhakamwile, pabha malanga gabho galiji gakanabhe ika. Kungwenda Mmanganya Nkakombolanga Kuika. 21 A Yesu gubhaalugulilenje kabhili, "Nne ngunakwiijabuhilila na mmanganya shinnoleyanje, ikabheje shinng'wanganje na yambi yenunji. Kungwenda nne, mmanganyanji nakakombolanga kuika." 22 Bhai Bhayaudi gubhaabheleketejenje, "Bhuli bhapinga kwiibhulaga? Pabha bhakuti, 'Kungwenda mmanganyanji nakakombolanga kuika?'" 23 A Yesu gubhaalugulilenje, "Mmanganyanji mmapai pano, nne kungoposhele kunani, mmanganyanji mmashilambolyo pano, nne nngabha jwa pashilambolyo pano. 24 Lyeneli ni ligongo lya kummalanjilanga kuti shinng'wanganje na yambi yenunji monaga nakukulupalilanje kuti 'Nne ni Nne,' kweli shinng'wanganje na yambi yenunji." 25 Na bhalabhonji gubhaabhushiyenje, "Mmwe agani?" A Yesu gubhaajangwilenje, "Ninnugulilenje kuumila kundandubho! 26 Ngwete gamagwinji ga bheleketa na kung'ukumulaga, ikabheje bhandumile bhala bha kweli, nne ngunakwaabhalanjilanga bhandunji bha pa shilambolyo indu imbiikene kopoka kwa bhenebho." 27 Wala bhangang'amulanga kuti a Yesu bhahheleketa ga Atati bha kunnungu. 28 Bhai, a Yesu gubhaalugulilenje, "Pushimunnjinlanje Mwana juka Mundu kunani, penepo shimumanyanje kuti 'Nne ni Nne,' Na shoshowe shingutenda nngabha shangu namwene, ikabhe gungubheleketa gubhanyigenye Atatipe. 29 Bhandumile bhala pubhali pamo na nne, bhanganeka jikape, pabha mobha gowe ingutenda ikwaanonyela ila." 30 Pubhahheleketa genego, bhandu bhahagwinji gubhaakulupalilenje. 31 Bhai a Yesu gubhaabhalanjilenje Bhayaudi bhaakulupalilangaga bhala, "Monaga nkamulangaga majiganyo gangu shimanganje bhaajiganywa bhangu bha kweli. 32 Numbe shininjimanyanje kweli, na kwelijoo shijimmikanje muungwana." 33 Na bhalabhonji gubhaajangwilenje, "Uwe lubheleko lwa a Bhulaimu, wala tukanabhebha bhatumu bhaka mundu jowowe jula. Nkulombola nndi punkulugula, 'Shimanganje mmangwana?'" 34 A Yesu gubhaajangwilenje, "Kweli ngunakummalanjilanga, mundu jowowe atenda yambi, ntumwa jwa yambi. 35 Mobha gowe ntumwa akaabhalanganishiywa nnikaja, ikabheje mwana anatama nnikaja mobha gowe. (aiōn g165) 36 Ibhaga mwana shammpanganje ungwana, shimanganje bhangu bha kweli. 37 Nimumanyi kuti mmanganyanji lubheleko lwa a Bhulaimu. Nkali nneyo, nnatumbililanga kumulaga kwa ligongo lyangagapinga majiganyo gangu. 38 Nne ingubheleketa iniibhweni kwa Atati ila, ikabheje mmanganyanji inkutendanga immalanjilenje na anakulubhenunji." 39 Gubhajangwilenje, "Uwe lubheleko lwa a Bhulaimu!" A Yesu gubhaabhalanjilenje, "Kaliji mmanganyanji nkalinginji lubheleko lwa a Bhulaimu, nkatendilenje ibhatendaga a Bhulaimu. 40 Nne nimmalanjilenje ga kweli jimbiilikene kwa a Nnungu, nkali nneyo, mmanganya nnatumbililanga kumulaga. A Bhulaimu bhangatenda nneyo! 41 Mmanganya nnatendanga ibhaatenda ainabhenunji." Penepo gubhaalugulilenje, "Uwe

ngabha lubheleko lwa mmaukutu! Tukwete Atati bhamope, yani a Nnungu.” 42 A Yesu gubhaabhalanjilenje, “Kaliji a Nnungu bhakaliji Ainabhenunji nkambinijlenje nne, pabha kungoposhele kwa a Nnungu, na nnaino ng’ishe apano. Nangaika kwa mashili gangu namwene, ikabhe ga bhandumile bhala. 43 Kwa nndi nkaelewanga ingubheleketa ino? Pabha nkapinganga kupilikanishiya malobhe gangu. 44 Mmanganyanji bha lubheleko luka Lishetani na inkupinganga kutenda ya shilokoli shika nng’inagwenunji. Jwenejo paaliji nkubhulaga kuumila kundandubho, wala akapinganga ya kweli, pabha jwangali kweli muntima gwakwe. Yaabheleketa ya unami, gabheleketa gali muntima gwakwe, pabha jwenejo nmani na nng’inamundu jwa unami. 45 Nne kwa ligongo lya bheleketa ga kweli, mmanganyanji nkaangulupalilanga. 46 Gani munkumbi gwenunji akong’ondela kuti nne njikola yambi? Bhai ibhaga ingubheleketa ya kweli, kwa nndi nkangulupalilanga? 47 Jwene ali jwa a Nnungu alipilikana malobhe ga a Nnungu. Ikabheje mmanganyanji nkapilikananga pabha nngabha mmandunji bha a Nnungu.” 48 Bhayaudi gubhaajangwilenje, “Bhuli, twangabheleketa kweli kuti mmwe Mmashamalia, numbe nshikola maoka?” 49 A Yesu gubhajangwile, “Nne nangali maoka, ikabheje ngunakwaishimiya Atati na mmanganyanji nkang’ishimiya. 50 Nne ngaaloleya ukunjelo gwangu namwene, ikabheje bhapali bhamo bhakuuloleya, numbe bhaukumula. 51 Kweli ngunakummalanjilanga, akunda malobhe gangu akawa.” (aion g165) 52 Bhai, Bhayaudi gubhaajangwilenje, “Nnaino tung’amwile kuti mwe nkwele maoka! A Bhulaimu bhawile, nkali ashinkulondola bha a Nnungu bhawilenje, mmwe nkuti, ‘Akagulila malobhe gangu akawa!’ (aion g165) 53 Bhuli mmwe nkwiitenda mmakulungwa kupunda ambuje a Bhulaimu bhawile? Nkali ashinkulondola bha a Nnungu bhawilenje. Mmwe nkwiitenda agani?” 54 A Yesu gubhajangwile, “Niikuyaga namwene, ukunjelo gwangu nngabha shindu. Atati bhunkwaalugulanga mmanganyanji kuti ainabhenunji ni bhaanguya. 55 Mmanganyanji nakwaamanyanga, ikabheje nne naamanyi. Meleketaga kuti ngakwaamanya, shinabile malinga mmanganyanji. Nne naamanyi numbe ngunakumula lilobhe lyabho. 56 Ainabhenunji a Bhulaimu, bhashinkuangaila bhalibhone lyubha lyangu, numbe bhalibhweni, gubhainonyele.” 57 Bhai, Bhayaudi gubhaalugulilenje, “Mmwe nkanabhe ishila yaka makumi nng’ano, mmwe mwaabhwani a Bhulaimu?” 58 A Yesu gubhaalugulilenje, “Kweli ngunakummalanjilanga, nne naapali, a Bhulaimu bhakanabhe pagwa.” 59 Penepo gubhalokwetenje maganga nkupinga kwaakoma, ikabheje a Yesu gubhaijubhile, gubhashoshile ku likanisha.

9 A Yesu bhali nkupita gubhammweni mundu jumo, nangalole jwa shibhelekwa. 2 Bhai, bhaajiganywa bhabho gubhaabhushiyenje, “Mmaajiganya! Gani atendile yambi, jwene munduju eu bhankwetenje mpaka abhelekwe nangalole?” 3 A Yesu gubhajangwile, “Lyeneli lyangakoposhela kwa ligongo lya yambi yakwe, wala yambi ya bhankwetenje, ikabhe ashibhelekwa na unangalole nkupinga mashili ga a Nnungu gabhoneshe. 4 Pabha kukanabhe pilila, tunapinjikwa kutenda maengo ga bhandumile bhala, kupililaga mundu akakombola kutenda liengo. 5 Mobha guni pashilambolyo, nne shilangaya sha

shilambolyo.” 6 Bhakabheleketeje genego, gubhaunile mata pai, gubhaeleye litope na mata gala, gubhampashile mmeyo nangalole jula, 7 gubhannugulile, “Jenda ukanabhe kulitanda lya Shiloamu.” Malombolelo ga Shiloamu, “Atumilwe.” Bhai, nangalole jula gwapite kunabha, kungai gwabhujile alilola. 8 Bhai, ashaatami ajakwe na bhammanyangaga kuti pali gubhannugulile, gubhashitenje, “Bhuli, jwenejo nngabha nkulaga atamaga na juga jula?” 9 Bhananji gubhashitenje, “Ni juju.” Bhananji gubhashitenje, “Ng’oo! Ikabhe ashilandanape.” Ikabheje aliji nangalole jula nigwashite, “Ni nne!” 10 Bhai, gubhammushiyenje, “Shanabhuli meyo gako pugashite lola?” 11 Jwalakwe gwabhajangwilenje, “Bhandu bhaashemwa a Yesu bhala bhashinkualaya litope, gubhambashile mmeyo ninugulila. ‘Jenda ukanabhe kulitanda lya Shiloamu.’ Bhai, gumbite nabha, nigunolile.” 12 Gubhammushiyenje, “Bhenebho kubhali kwei?” Jwalakwe gwabhajangwilenje, “Nne ngakukumanya!” 13 Kungai mundu aliji nangalole jula gubhampelekenje kwa Ashimapalishayo. 14 Lyene lyubha libhaeleye litope a Yesu nikunnamiya mundu nangalole, pulyaaliji Lyubha lya Pumulila. 15 Bhai, Ashimapalishayo gubhammushiyenje jwene munduju, “Shanabhuli pukombwele kulola?” Jwalakwe gwabhalugulilenje, “Bhashinkumbaka litope mmeyo, gunabhile nnaino ngulilola.” 16 Ashimapalishayo bhananji gubhashitenje, “Bhene bhandubho bhngakoposhela kwa a Nnungu, pabha bhakaakagula shalia ja Lyubha lya Pumulila.” Ikabheje bhananji gubhashitenje, “Mundu akwete yambi akombola bhuli kutenda ilangulo ya nnei?” Gugakoposhele malekano munkumbi gwabhonji. 17 Gubhammushiyenje kabhili mundu aliji nangalole jula, “Pabha bhenebho bhashikulamya meyo, ukwaataya bhuli?” Jwalakwe gwabhalugulilenje, “Bhenebho ankulondola bha a Nnungu!” 18 Ashikalongolele bha Bhayaudi bhngakulupalilanga kuti jwene munduju bhukala pali nangalole na nnaino analola, mpaka pubhaashemilenje bhankwetenje. 19 Bhai, gubhaabhushiyenje, “Bhuli, jwenejo ni mwana jwenunji junkutinji pabhelekwe ali nangalole? Shanabhuli nnaino pakombwele kulola?” 20 Bhankwetenje gubhajangwilenje, “Uwe tummanyi aju mwana gwetu na pabhelekwe ali nangalole. 21 Ikabheje shanabhuli palolile, tukakumumanya na nkali annamiye meyojo, uwe tukakumumanya. Mummuyanji nnyene, jwenejo jwankulungwa, shataye.” 22 Bhankwetenje bhashinkubheleketa nneyo kwa ligongo lya kwaajogopanga ashikalongolele bha Bhayaudi, pabha ashikalongolelebho bhashinkulagananga kuti mundu jowewe shakunde kuti a Yesu ni a Kilishitu abhingwe nshinagogi. 23 Lyenelyo ni ligongo lya bhankwetenje kubheleta kuti, “Jwenejo jwankulungwa, mummuyanji nnyene.” 24 Bhai, gubhanshemilenje kabhili aliji nangalole jula, gubhannugulilenje, “Ubhelekete ya kweli gwaape ukunjelo a Nnungu! Uwe tumumanyi kuti abha bhandubha bhakwete yambi.” 25 Jwenejo gwajangwile, “Monaga bhakwete yambi, nne ngaamanya. Ikabheje nishimanyi shindu shimo kuti, naliji nangalole na nnaino ngunalola.” 26 Bhai, gubhammushiyenje, “Bhakutendele nndi? Bhakulamiye shanabhuli meyo gako?” 27 Jwene munduju gwabhajangwilenje, “Nimmalanjilenje, mmanganyanji mwangapilikanishiya, kwa nndi nnapinganga kupilikana kabhili? Bhuli na mmanganyanji

nnapinganga kubha bhaajiganya wabho?" 28 Bhai gubhantukeneje, bhalinkutini, "Ugwe ni nkujiganya jwabho, uwe tubhaajiganya bha a Musha. 29 Uwe tumumanyi kuti a Nnungu bhashinkubheleketa na a Musha, ikabheje bhene bhandubha tukakukumanya kubhakoposhele!" 30 Jwalakwe gwabhajangwilenje, "Sheneshi sha kanganiwga! Mmanganyanji kakukumanyanga kubhakoposhele, ikabheje bhashinamiya meyo gangu! 31 Tumumanyi kuti a Nnungu bhakakwapilikanihiyanga bhandunji bhakwetenje yambi, ikabhe jowwe akwaakunda na tenda gubhapinga. 32 Kuumila bhukala pa shilambolyo ikanabhe pilikanika kuti mundu ashilamiya meyo gaka nangalole jwa shibhelekwa. (aiōn g165) 33 Monaga bhene bhandubha bhakangakoposhele kwa a Nnungu, bhakanakombole kutenda shoshowe!" 34 Gubhajangwilenje, "Ugwe ushibhelekwa na lelelwa muyambi jika, utujiganye uwe?" Bhai, gubhankanilenje kushinagogi. 35 A Yeshu gubhapilikene kuti bhashikunkananga nshinagogi. Bhai, bhakammoneje gubhammushiye, "Bhuli, ugwe ulikunkulupalila Mwana juka Mundu?" 36 Jwene mundujo gwajangwile, "Mmakulungwa, nnguilile jwenejo ni gani, ninkulupalile." 37 A Yeshu gubhammalanjile, "Mumweni, akunguluka na mmwejo." 38 Bhai, jwene mundujo gwashite, "Mmakulungwa ngulikulupalila!" Gwabhatindibhalile. 39 A Yeshu gubhashite, "Nne njiika kushilambolyo kuukumula, nkupinga bhakaalolanga bhalolanje, na bhaalolanga bhabhanganje ashinangalole." 40 Ashimapolishayo bhananji bhalingini pamo na bhenebho gubhapilikenerenje gene malobhego, gubhaabhushiyenje, "Bhuli, nkali uwe ashinangalole?" 41 A Yeshu gubhaajangwilenje, "Monaga nkalingini ashinangalole, nkanakolanjeje yambi, ikabheje nnaino nkutini. 'Uwe tulilola,' bhai launo nkwetenje yambi.

10 "Kweli ngunakummalanjilanga, jowwe akajinjila nshitundu sha ngondolo kupitila pannango, ikabhe nipeleta panape, jwenejo nngwii na nkupokonyola. 2 Ikabheje apitila pa nnango, jwenejo nshunga jwa ngondolo. 3 Nkulinda nnango gwa shitundu, anakunng'uguilila nshunga na ngondolo inapilikana lilobhe iyakwe, na anakwiishema ngondolo yakwe kwa mena gabhonji, nikwilongoya palanga. 4 Aikopoyaga palanga anakwilongolela mmujo, numbe ngondolo ilikunkagula, pabha bhanakulimanyanga lilobhe iyakwe. 5 Ngondolo nngankagula nnjeni, ikabhe shiimmutushe, pabha ikakulimanya lilobhe iyakwe." 6 A Yeshu bhashinkwabhalanjilanga lwene lutangolu, ikabheje bhagashimanyanga shibhaluguilwenje. 7 Bhai a Yeshu, gubhashite kabhili, "Kweli ngunakummalanjilanga, nne nnango gwa ngondolo. 8 Bhowenji bhalongolelenje nganabheika nne, bhagwii na bhaapokonyola na yalakwe ngondolo yangaapilikanihanga. 9 Nne nnango. Ajinjila kupitila nne shatapulwe na shajinjile nikopoka na shaapate shalya. 10 Nngwii anakwiya nkupinga, kujibha, kubhulaga na kuangabhanya. Nne nijikwiya nkupinga nkolanje gumi, numbe gumi gwa punda. 11 "Nne nshunga jwa mmbone. Nshunga jwa mmbone akajogopa shoya gumi gwakwe kwa ligongo lya ngondolo yakwe. 12 Mundu jwa nshaala, wala nngabha nshunga, na wala ngondolo nngabha yakwe, ammonagape liogo alikwiya, anakwiileka ngondolo nibhutuka, penepo liogo anakwiikamula na ina inapwilinganya.

13 Anabhutuka pabha jwenejo mundu jwa nshaalape akajali ga ngondolo pabha nngabha yakwe. 14 Nne nshunga jwa mmbone. Bhalingini bhangu naamanyinji, na bhalabhonji bhalingini bhangu bhamanyinji, 15 malinga Atati shibhamanya nne, na nne shingwamanya Atati. Nne ngunakwishoya gumi gwangu kwa ligongo iyabhonji. 16 Ngwete ngondolo ina nngabha ya shishino shitundu shino. Ngunapinjikwa ng'ishenayo nkali yenejo, na yalakwe shiipilikane lilobhe iyangu, kungai shiibhe likundi limo na nshunga jumo. 17 "Kwa nneyo Atati bhanambinga, pabha ngunakuushoya gumi gwangu nkupinga umujile kabhili. 18 Jwakwa mundu jwa mbokonyola gumi gwangu, ngunakuushoya kwa engwa namwene. Ngwete mashili ga kuushoya na mashili ga kootola kabhili. Nneyo ni shibhang'amulise Atati ndende." 19 Gugakoposhele kabhili malekano munkumbi gwa Bhayaudi kwa ligongo lya gene malobhego. 20 Bhabhagwinji gubhashitenje, "Bhashikola maoka, numbe bhalwele shalubha! Kwa nndi kwaapilikanihiya?" 21 Bhananji gubhashitenje, "Aga nngabha malobhe gaka mundu akwete maoka. Bhuli, lioka linakombole kulama meyo gaka nangalole?" 22 Bhai ku Yelushalemu shashinkupagwa shikuuu sha kumbushila kulimbula likanisha. Gene mobhago pugaliji ga shipwepwe. 23 Na bhalabho a Yeshu bhatendaga owa ku likanisha nnukumbi lwa a Shelemani. 24 Bhai, Bhayaudi gubhaatimbiilenje, gubhaabhushiyenje, "Shinnjabhuye mitima mpaka shakani? Monaga mmwe a Kilishitu, bhai ntubhalanjile." 25 A Yeshu gubhaajangwilenje, "Nimmalanjilenje, ikabheje nkaakulupalilanga. Maengo gungukamula kwa lina lya Atati ganangong'ondela. 26 Ikabheje mmanganyanji nkaakulupalilanga, pabha mmanganyanji nngabha ngondolo yangu. 27 Ngondolo yangu inapilikana lilobhe iyangu, nne ngulikwimanya, na yalakwe inaangagula. 28 Numbe nne ngunakwaapanganga gumi gwa pitipiti, wala bhakaobhanga na wala jwakwa mundu shakombole kwapokonyolanga mmakono gangu. (aiōn g165, aiōnios g166) 29 Atati bhambete yene ngondoloyo ni bhakulungwa kupunda bhowe, wala jwakwa shakombole kwaashoyanga mmakono ga Atati. 30 Nne na Atati, tubhamope." 31 Bhai Bhayaudi gubhalokwetenje maganga nkupinga bhaakomanje. 32 A Yeshu gubhaabhugalulilenje, "Ninnangwiyenje maengo ga mmbone gamagwinji kopoka kwa Atati. Gei gwendendile gatenda nngomanje maganga?" 33 Bhayaudi gubhaajangwilenje, "Tukakomka maganga kwa ligongo lya maengo ga mmbone, ikabhe kwa ligongo lya kwatukana a Nnungu! Pabha mmwe nnakwiitenda a Nnungu mbena mmandupe." 34 A Yeshu gubhaajangwilenje, "Bhuli shalia jenunji jangajandika Mmajandiko ga Ukonjelo kuti a Nnungu bhaashite, 'Nne njite, mmanganyanji ashi nnungu?' 35 A Nnungu bhashinkwaashemanga ashinnonyo bhapegwilenje lilobhe lya a Nnungu, na uwe tumumanyi kuti Majandiko ga Ukonjelo ganabheleta kweli mobha gowe. 36 Jwene aagwilwe na Atati nikuntuma kushilambolyo, nkummalanjilanga kuti bhuli, 'Unatukana,' pabha njibheleketa, 'Nne Mwana jwa a Nnungu?' 37 Monaga ngakamula maengo ga Atati, nnangulupalilanje. 38 Ikabheje monaga ngunakamula genego, nkali ibhaga nkangulupalilanga, nkulupalilanje kapela maengo pego, mmumanyanje na kung'amula kuti Atati mubhali nkati jangu, na nne nkati jabho." 39 Gubhalinjilenje kwaakamula

kabhili, ikabheje gubhakolobhweshe mmakono gabhonji. 40 A Yeshu gubhapite kung'ambo lushi lwa Yolodani, kubhabhatishaga a Yowana bhukala, gubhatemi kweneko. 41 Bhandu bhahagwinji gubhaajendelenje gubhashitenje, "A Yowana bhangatenda ilangulo yoyowe. Ikabheje gowe gubhatashiye a Yowana ga bhene bhandubha, pugali ga kweli." 42 Penepo bhandu bhahagwinji gubhaakulupililenje a Yeshu.

11 Bhai bhandu bhamo bhashemwaga a Lashalo bhatendaga lwala, kubhatamaga ku Bhetania, shilambo shibhatamanganaga a Malia na a Malata, ashaalumbu bhabho. 2 A Malia ni bhene bhaapashile mauta Bhakulungwa nikwaunguta na umbo yabho, alumbu bhabho ni a Lashalo bhaaliji bhalwele. 3 Bhai, ashalumbu bhabho gubhaapeleshelenje ntenga a Yeshu bhalinkutinji, "Mmakulungwa, ambwiga ajenu bhalwele!" 4 A Yeshu bhakapilikaneje nneyo, gubhashite, "Shene shilweleshi nngabha sha bhulaga, ikabhe kwa ligongo lya kwaakuya a Nnungu, nkupinga Mwana jwa a Nnungu akuywe kwa shenesho." 5 A Yeshu bhashinkwaapinganga a Malata na akulu bhabho na alumbu bhabhonji a Lashalo. 6 Bhai a Yeshu bhakapilikaneje ntenga gwa kuti a Lashalo bhalwele, gubhapundile tama pala mobha gana gabhili. 7 Kungai gubhaalugulilenje bhaajiganywa bhabho, "Twendangananje kabhili ku Yudea!" 8 Bhaajiganywa gubhaalugulilenje, "Maaajiganya! Mobha gashokope gapitile Bhayaudi bhapingaga kunkomanga maganga, igala nkupinga kwenda koko kabhili?" 9 A Yeshu gubhajangwile, "Bhuli malanga ga mui nngabha pugali mashaa kumi na gabhili? Bhai, mundu aowaga mui akakubhala, pabha alikushibhona shilangaya sha shilambolyoshi. 10 Ikabheje mundu aowaga nnuhindu anakubhala pabha shakwa shilangaya." 11 A Yeshu bhakamaliyeje beheketa gene malobhego, gubhaalugulilenje, "Ambwiga ajetu a Lashalo bhashigona, ikabheje nne shingajumuye." 12 Bhai, bhaajiganywa shibho gubhaalugulilenje, "Mmakulungwa, ibhaga bhashigona, shibhalame." 13 Bhanganyanjibho pubhaganishiyangaga kuti bhanataya ga gona lugono, mbeni ibhatayaga kuwa kwa a Lashalo. 14 Bhai, a Yeshu gubhaabhalanjilenje gwangali nng'yo, "A Lashalo bhashiwa, 15 ikabheje nne ngunakwiinonyela kwa ligongo lyeununi, pabha ngapaaliji kweneko nkupinga nkulupililanje. Aya twendangananje kubhali." 16 A Tomashi bhashemwaga Bhammba gubhaalugulilenje bhaajiganywa ajabhonji, "Na uwe twendagane, tukawe pamo na bhenebho!" 17 A Yeshu bhakaisheje kweneko gubhaaimena a Lashali bhali nikabhuli mobha nsheshe. 18 Shilambo sha Bhetania pushaliji tome na a Yelushalemu, kutaliya kwa maili ibhili nnei. 19 Bhayaudi bhahagwinji bhashinkuikangana kwa a Malata na a Malia kukwaangalayanga ga wilwa na alumbu bhabhonji. 20 Bhai, a Malata bhakapilikaneje kuti a Yeshu bhanakwiya, gubhapite kukwaaposhela, ikabheje a Malia gubhaigele pamui. 21 A Malata gubhaabhalanjile a Yeshu, "Mmakulungwa, nkपालi apano, apwetu ngubhakawileje! 22 Ikabheje nimumanyi shoshowe shishimwaajuje a Nnungu, shibhampe." 23 A Yeshu gubhaalugulile, "Apwenu shibhayushe." 24 A Malata gubhaajangwile, "Nimumanyi shibhayushe lyubha lya mpelo." 25 A Yeshu gubhaabhalanjile, "Nne ni nguyuya na peleshela

gumi. Angulupalila nne nkali awe, shalame, 26 na jojowe ali gwankoto ningulupalila, wala akawa. Bhuli nnikulupalila gegano?" (aiōn g165) 27 A Malita gubhaalugulile, "Elo Mmakulungwa! Nne ngulupalile kuti mmwe a Kilishitu, Bhana bhabho a Nnungu, bhene bhakwiya pa shilambolyo." 28 Bhakamaliyeje kubheleketa genego, a Malata gubhapite kukwaashema a Malia, apwabho, gubhaabhalanjile kuntelela, "Bhaajiganya bhaishe bhanakunshema." 29 Bhenebho bhakapilikaneje nneyo, shangu gubhainwishe, gubhaajendele a Yeshu. 30 A Yeshu bhaaliji bhakanabhe jinjila nshijiji, ikabhe pubhali gubhaakongene a Malata kukwaaposhela pala. 31 Bhai, Bhayaudi bhalinginji pamui pamo na a Malia bhali kwaangalayanga bhakaabhonanje bhali jabhula shangu nikopoka palanga, gubhaakagwilenje. Pubhaganishiyenje bhanakwenda guta kulikabhuli. 32 Bhai, a Malia bhakaisheje pubhaaliji a Yeshu nikwaabhona, gubhatemi ulungulungo, gubhaabhalanjile, "Mmakulungwa kaliji nkपालi apano, nnumbwangu akanawe!" 33 A Yeshu bhakaabhoneje bhaniguta, na nkali Bhayaudi bhalinginji pamo na bhenebho bhaligutanga, guyaapoteshe muntima. 34 Kungai gubhaabhusiyenje, "Kumwaabhisilenje kwei?" Gubhabhaalanjilenje, "Mmakulungwa, nniye kunnole." 35 A Yeshu gubhagutile kwa minyoi. 36 Bhai, Bhayaudi gubhashitenje, "Nnolanje shibaashite kwaapinga!" 37 Ikabheje bhananji gubhashitenje, "Bhuli, bhenebha bhannamiye nangalole, bhakangombola kwaatenda a Lashalo bhanawe?" 38 Bhai, a Yeshu guyaapoteshe kabhili muntima, gubhaishe kulikabhuli. Likabhuli liyene pulyaaliji lishembo, na lyashinkuikhwa na liganga likulungwa. 39 A Yeshu gubhashite, "Nshoyanje ligangalyo!" A Malata, alumbubhabho bhawile bhala, gubhaalugulile, "Mmakulungwa, bhananunga, pabha bhatemi mobha nsheshe nnikabhuli!" 40 A Yeshu gubhaalugulile, "Bhuli, nangammalanjila kuti nkulupililangaga shinngubhone ukunjelo gwa a Nnungu?" 41 Bhai, gubhashoshiyenge liganga lila. A Yeshu gubhalolile kunani kunnungu, gubhashite, "Ngunatenda eja Atati, pabha nnambilikanishiya. 42 Nimumanyi kuti nnambilikanishiya mobha gowe. Ikabheje njibheleketa genego kwa ligongo lya bhandunji bhalinginji apanobha, nkupinga bhakulupililanje kuti mmwe ni ndumile." 43 Bhakamaliyeje beheketa genego, gubhashemile kwa lilibhe lya utiya, "A Lashalo! Nkoposhe palanga!" 44 Bhawile bhala gubhakopweshe palanga, akuno bhali bhatabhilwe shanda mmakongono na mmakono na kumeyo kuunishilwe. A Yeshu gubhaalugulilenje, "Mwaagopolanje, mwaalekanje bhajendele." 45 Bhai, Bhayaudi bhahagwinji bhakengenerenje kwa a Malia bhakashibhonanje shitendi shibhatendile a Yeshu, gubhaakulupililenje. 46 Ikabheje bhananji gubhapitengerenje kwa Ashimapolishayo kukwabhalanjilanga ga shene shibhatendile a Yeshu shila. 47 Kwa nneyo bhakulungwanji bhaabhisila na Ashimapolishayo gubhatemingenenje lukumbi, gubhashitenje, "Tutende nndi? Pabha abha bhandubha bhanatenda ilangulo yaigwinji. 48 Twaalekaga nnei pei, bhandu bhowe shibhaakulupililanje, na Bhaloma shibhajiye angabhanyanga liekalu lyetu na shilambo shetu!" 49 Penepo bhandu bhamo munkumbi gwabhonji bhashemwaga a Kayapa, bhali bhakulungwa bhaabhisila shene shakasho, gubhaalugulilenje, "Mmanganya nkakushimanyanga shindu

shoshowe! 50 Bhuli, nkaganishiyanga kuti mbaya awe mundu jumo kwa ligongo lya bhandunji, ngalingana angabhanywa shilambo showe?" 51 Bhenebho bhangaabheleketa nneyo kwaapinga bhayene, ikabhe bhenebho pubhaaliji bhakulungwa bhaabhisila shene shakasho, kwa nneyo bhashinkulondola kuti a Yesu shibhawe kwa ligongo lya shilambo shabhonji, 52 Wala nngabha kwa ligongo lyabhonji, ikabhe na kwaabhekanga pamo bhana bha a Nnangu bhapwilingenene, nkupinga bhahanganje pamo. 53 Bhai, kuumila lyene lyubhalyo ashikalongolele bha Bhayaudi gubhaloleyenje shanabhuli pushibhaabhulaganje a Yesu. 54 Kwa nneyo a Yesu bhangaawa kabhili kulugwinjili lwa Bhayaudi, ikabhe gubhashoshile penepo, gubhapite tome na kuanga, shilambo shishemwa Epulaimu. Kweneko gubhatemi pamo na bhaajiganywa bhabho. 55 Shikukuu sha Bhayaudi shishemwa Pashaka shashinkubhandishila, bhandunji bhahagwinji bhashinkwendangananga ku Yelushalemu kukwitakaya shikanabhe ika shikukuu. 56 Bhai, pubhalinginji nkwaaloleya a Yesu. Bhakaimanajeje pamo nnikanisha, gubhabhuyenenje, "Nkubhonanga bhuli? Igala bhakaika kushikukuu kuno?" 57 Bhakulungwanji bhaabhisila na Ashimapolishayo bhashinkuamulishanga kuti mundu akumanyaga kubhali a Yesu, abhabhalanjilanje nkupinga bhaakumulanje.

12 Mobha shita jikanabhe ika Pashaka, a Yesu gubhaishe ku Bhetania kubhatamaga a Lashalo bhayushiywe bhakaweje bhala. 2 Kweneko bhashinkushemelwa shalya, kwa nneyo a Malata bhatendaga kolokoya shalya. A Lashalo pubhaliji munkumbi gwa bhatemingenenje nkulya pamo na a Yesu. 3 Bhai, a Malia gubhatolile nushu lita ja mauta ga nunjila ga mmbiya yaigwinji, gubhaapekeye a Yesu mmakongono nikwaunguta na umbo yabho. Nyumba jowe jikununjilaga mauta. 4 Bhai, a Yuda Ishikaliote, bha munkumbi gwa bhaajiganywa bhabho, numbe ni bhapinga kwaatendebhuka a Yesu, gubhashite, 5 "Kwa nndi mautaga gangaushwa kwa mmbiya dinali mamiya gatatu, nipegwa bhaalaga?" 6 Bhashinkubheleketa nneyo, nngabha kuti bhatendaga kwaabhonelanga shiya bhaalaga, ikabhe pubhaliji bhaagoya mpatila gwa mmbiya, na pabha pubhaliji bhagwii, na bhatendaga jibha mmbiya mumpatila mula. 7 Ikabheje a Yesu gubhashite, "Mwaalekanje bhakongwebha, bhambashe kwa ligongo lya lyubha lya mashiko gangu. 8 Bhaalaga bhapalinji na mmanganya mobha gowe, ikabheje nkabhanganga na nne mobha gowe." 9 Bhayaudi bhahagwinji gubhapilikenenje kuti a Yesu kubhali ku Bhetania. Bhai gubhapitengenje kweneko, nngabha ga kwaabhona a Yesu ikabhe bhaabhonanje a Lashalo bhayushiywe na a Yesu. 10 Bhakulungwanji bhaabhisila gubhalegenenje kwaabhulaga a Lashalo nneyo peyo, 11 pabha kwa ligongo lya a Lashalo, Bhayaudi bhahagwinji bhashinkwaalekanga ashikalongolele bhahonji, nikwaakulupalila a Yesu. 12 Malabhi gakwe, likundi likulungwa lya bhandunji bhakengenenje kushikukuu, gubhapilikenenje kuti a Yesu mubhali mumpanda kwiya ku Yelushalemu. 13 Bhai, gubhatemilenje maagala ga mitende, gubhapite kwaaposhelanga bhalijobhelanga, bhalinkutinji, "Bhainiye wa Nnangu! Na bhene bhakwiya kwa lina lya

Bhakulungwa. Bhapegwe mboka bhakulungwa bha Ishilaeli." 14 A Yesu gubhatolile mwana jwa mbunda jumo gubhatemi pantundu jakwe, malinga shigataya Majandiko ga Ukonjelo, 15 "Unajogope shilambo sha Shayuni! Nnole, a Mpalume bhenu bhanakwiya, Bhashikwela mwana jwa mbunda!" 16 Gene malangago bhaajiganywa bhabho bhakagamanyangaga gatendekagago, ikabheje a Yesu bhakaweje na yuka, penepo gubhakumbushilenje kuti bhashinkujandishilwa genego, na bhandunji gubhaatendelenje nneyo peyo. 17 Likundi lya bhandunji bhapalinji pamo na a Yesu lyubha libhaayushiywe a Lashalo, gubhapundilenje kwaakong'ondola. 18 Kwa nneyo lugwinjili lwa bhandunji lula gubhaaposhelenje, pabha bhowe bhapilikenenje kuti a Yesu bhashitenda shene shilangulusho. 19 Bhai, Ashimapolishayo gubhabhalanjilenenje, "Nnilolanga? Tukakombola tenda shoshowe! Nnolanje bhandu bhowe bhanakwaakagulanga." 20 Munkumbi gwa bhandunji bhakengenjenje ku Yelushalemu kukwaatindibhalila a Nnangu kushikukuu, bhashinkupagwanga na Bhagiliki. 21 Bhaganyabho gubhaajendelenje a Piipi, bha ku Bhetishaida ja ku Galilaya, gubhashitenje, "Mmakulungwa, tunapinga kwaabhona a Yesu." 22 Bhai, a Piipi gubhapite kwabhalanjila a Ndeleya, kungai bhowe bhaanabhili gubhapite kwaabhalanjilanga a Yesu. 23 A Yesu gubhaajangwilenje, "Malanga ga kuywa Mwana juka Mundu gaishe! 24 Kweli ngunakummalanjilanga, mmbeju ja ngano jikakuliwe nnitaka niwa shijilepeshe nneyo peyo. Ikabheje jibholaga, bhai shijimele niogola iyepo yaigwinji. 25 Mundu aabhushila gumi gwakwe shaguobhye, ikabheje mundu akaabhushila gumi gwakwe pa shilambolyo pano, anakuugoya mpaka pata gumi gwa pitipiti. (aiōnios g166) 26 Mundu angamulila maengo, anapinjikwa angagule, popowe pushimme nne pala, ni pushaabhe ntumishi jwangu. Mundu jojowe angamulila maengo, Atati shibhanng'ishimiye. 27 "Nnaino ntima gwangu gunamboteka, kanga melekete nndi? 'Atati ndapule na gene malangaga?' Ikabheje genega ni gung'ishile nkupinga mbitle gene malanga gano. 28 Atati, nnikuye lina lyenu." Penepo lilobhe kukoposhela kunnungu gulipikanishe lilinkuti, "Nilikushiye na kabhili shinilikuye." 29 Lugwinjili lwa bhandunji bhajimingenenje penepo gubhapilikenenje lilobhelo, gubhashitenje kuti jishibhalila njai, ikabhe bhananji gubhashitenje kuti, "Bhashikunguluka naka Malaika jwa a Nnangu!" 30 Ikabheje a Yesu gubhaalugulilenje, "Lyene lilobhelo lyangakoposhela kwa ligongo lyangu nne, ikabhe kwa ligongo lyenu mmanganyanji. 31 Nnaino gaishe malanga ga ukumulwa shilambolyo, na nkulungwa jwa pashilambolyo pano apinga nokolelwa palanga. 32 Na nne pushinyinulwe kunani shilambo shinautilanje bhandu bhowe kwangu nne." 33 Kwa gene malobhego bhashinkulanguya shiwo shabho pushipingabha. 34 Bhai, lugwinjili lwa bhandunji bhala gubhaajangwilenje, "Uwe shalia jetu jinakutubhalanjila kuti a Kilishitu shibhatame pitipiti. Bhai nkubheleketa bhuli, kuti Mwana juka Mundu anapinjikwa kujinulwa? Mwana juka Mundu ni gani?" (aiōn g165) 35 A Yesu gubhaalugulilenje, "Shilangaya shatangu na mmanganyanji kwa mobha gashoko. Nndekoninji pabha nkwenenje shilangayasho nkupinga lubhundu lunanng'imananje, pabha aowa nnuhindu akakukumanya kwaaloya. 36 Bhai mobha gunkwetenje

shene shilangayasho, nshikulupalilanje nkupinga mmanganje mmandunji bha shilangaya." A Yesu bhakamaliyeje kubheleketa genege, gubhapite kwiya kwatalika bhanaabhonanje. **37** Nkali a Yesu bhatendile yene ilangulo yoweoyo pameyo gabhonji, bhangaakulupalilanga. **38** Nkupinga gatimilile malobhe ga ankulondola bha a Nnunu a Ishaya kuti, "Mmakulungwa, gani akulupalile ntenga gwetu? Na mashili ga Bhakulungwa kugamanyishe kuka gani?" **39** Pabha bhangaakulupalilanga, a Ishaya bhabelekete kabhili, Bhakulungwa bhakuti, **40** "Bhashikukupila meyo gabhonji, Bhashinonopya mitima jabhonji, Bhanalolanje kwa mmeyo gabhonji, Bhanamumanyanje mmitima jabhonji, wala bhanandendebhushilanje, Na nne ngaalamiyenje." **41** A Ishaya bhashinkubheleketa gene malobhega pabha bhashinkuubhona ukonjelo gwa a Yesu, gubhatashiye ngani jabho. **42** Nkali nneyo ashikalongolele bhahagwinji bha Bhayaudi gubhaakulupalilanje a Yesu. Ikabheje kwa ligongo lya Ashimapalishayo, bhangaibhoneyanga palugwinjili nkujogopa bhanaakanwanga nshinagogi. **43** Pabha kubhapingangaga kuiniywa na bhandunji kupunda kuiniywa na a Nnunu. **44** A Yesu gubhabhelekete kwa lilibhe lya utiya, "Mundu angulupalila nne, akaangulupalila nnepe, ikabhe anakwaakulupalila bhandumile bhala. **45** Aamona nne anakwaabhona bhandumile bhala. **46** Nne shilangaya, numbe njika pashilambolyo nkupinga bhowe bhaangulupalilanga bhanatamangane nnubhundu. **47** Mundu apilikana malobhe gangu na anagakamule, nne ngang'ukumula, pabha nangaika kuukumula shilambolyo ikabhe kukushitapula. **48** Akakamula malobhe gangu akwete jwa kunng'ukumula, lilibhe limeleketelyo, shiling'ukumule lyubha lya mpelo. **49** Nne nangabheleketa kwa mashili gangu namwene, ikabhe Atati bhandumile bhala, bhashinajila ya bheleketa na jiganya. **50** Numbe nne nimumanyi kuti amuli yabho inapeleshela gumi gwa pitipiti. Bhai nne gungubheleketa, gubhanajile Atati melekete." (aiōnios g166)

13 Bhai shikukuu sha Pashaka shikanabhe, a Yesu bhamumanyi kuti malanga gabho ga jabhula pa shilambolyo kwenda kwa Atati gaishe. Bhashinkwaapinganga bhandu bhabho pa shilambolyo, numbe, bhashikwaapinganga mpaka kumpelo! **2** Lishetani ali abhatajile a Yuda, bhana bhabho a Shimoni Ishikaliote, ntima gwa kwaatendebhuka a Yesu, gubhatemingenenje nkulalila a Yesu na bhaajiganywa bhabho. **3** A Yesu bhali bhamumanyi kuti bhashikamuywa indu yowe na Atati, numbe kubhakoposhele kwa a Nnunu na bhanabhujia kwenda kwa a Nnunu. **4** Bhai gubhashoshile pa shalya, gubhabhishile likoti lyabho panyenje, gubhatolile litaulo, nikwiitabha nshigunu. **5** Kungai gubhatajile mashi nshibhiga, gubhatandwibhe kwaanabhiyanga makongono bhaajiganywa bhabho nikwaungutanga na litaulo libhaitabhile nshigunu lila. **6** Bhai gubhaaishile a Shimoni Petili, bhenebho gubhaalugulile a Yesu, "Mmakulungwa, mmwe nnaanabhiya mmakongono nne?" **7** A Yesu gubhajangwile, "Mmwe nnaino nkakushimanya shingutenda ikabheje shinshimanye kungai." **8** A Petili gubhaabhalanjile, "Mmwe, wala nkanabhiya nne!" A Yesu gubhaajangwile, "Monaga ngannabhiye, mwangali shilongani na nne." (aiōn g165) **9** A Shimoni Petili gubhaajangwile,

"Mmakulungwa, nnabhiye nngabha makongono, ikabhe na makono gangu nneila peila na ntwe gwangu." **10** A Yesu gubhaabhalanjile, "Ajojile shiilu showe akapinjikwa kujoga kabhili, ikabhe kunabha makongono, pabha shiilu showe shikonjile. Mmanganyani nkonjilenje ikabhe nngabha mmowe." **11** A Yesu bhashinkubheleketa "Nngabha mmowe nkonjilenje." Pabha bhamanyi gani shabhatendebhushu. **12** A Yesu bhakamaliyeje kwaanabhiyanga makongono, gubhawete likoti lyabho gubhatemi kabhili, nikwaabhuyanga, "Bhuli, nngamanyinji guntendelenjeja? **13** Mmanganyanji punkunjemanga Mmaaiganya na Mmakulungwa, nnibheleketa ngako, pabha nne puni nneyo. **14** Bhai ibhaga nne nili Nankulungwa na Nkujiganya njikunnabhiyanga makongono, nneyo peyo na mmanganyanji nnapinjikwanga kunabhiyana makongono. **15** Kwa nneyo njikunnanguyanga ipinjikwa, nkupinga ntendelananje nneyo malinga shiintendelenje nne. **16** Kweli ngunakummalanjilanga, ntumwa nngabha jwankulungwa kupunda bhakulungwa bhakwe, na wala ntume nngabha nkulungwa kupunda bhandumile. **17** Nngamanyangaga genege, shiibhe shambone ntendangaga nneyo. **18** "Ngaataya ga mmowe mmwe, pabha naamanyinji bhunaagwilenje. Ikabheje nkupinga gatimilile Majandiko gataya. 'Aalile shalya shangu ashindundumalila.' **19** Ngunakummalanjilanga genega gakanabhe koposhela, nkupinga pushigakoposhele nkulupalilanje kuti 'Nne ni Nne.' **20** Kweli ngunakummalanjilanga. Akumposhela mundu jojowe junintumile, anaamboshela nne, na amboshela nne, anakwaaposhela bhandumile bhala." **21** A Yesu bhakamaliyeje bheleketa genege, gubhatengwishe muntima kwa kaje, gubhakong'ondele bhalinkuti, "Kweli ngunakummalanjilanga, jumo munkumbi gwenunji apinga ndendebhuka!" **22** Bhaajiganywa gubhalolenenje akuno bhalinginji na lipamba gani jubhakuntaya. **23** Jumo jwa bhaajiganywa, apingwaga kaje na a Yesu, ashinkutama tome na a Yesu. **24** Bhai, a Shimoni Petili gubhannangwile nkono bhalinkuti, "Mwaabhuye gani jubhakuntaya?" **25** Bhai jwenejo gwabhatendebhushile a Yesu nikwaabhuya, "Mmakulungwa, gani?" **26** A Yesu gubhajangwile, "Jwene, jushinimpambile ndonji nikumpajo." Gubhagabhile ndonji, nipamba, gubhaapele a Yuda, bhana bhabho a Shimoni Ishikaliote. **27** A Yuda bhakaposhelenge ndonji jila, Lishetani gwabhajinjile. Bhai a Yesu gubhaalugulile, "Shintumbilile tendasho, ntende shangu!" **28** Wala jwakwa mundu munkumbi gwa bhatemingenenje pa shalya pala amumanyi kwa nndi bhashikwaabhalanjila nneyo. **29** Pabha a Yuda pubhaaliji bhaagoya mpatila gwa mmbiya yabhonji, bhananji gubhaganishiyenje kuti a Yesu bhashikwabhaalanjila bhakaume ipinjikwa nshikukuu, eu kuti bhashikwaabhalanjila bhaakapananje bhaalaga indu. **30** Bhai, a Yuda bhakaposhelenge ndonji jila, shangu gubhakopweshe palanga. Na puyaliji shilo. **31** A Yuda bhakajabhuleje, a Yesu gubhashite, "Nnaino akuywe Mwana juka Mundu, numbe a Nnunu bhashikuywa nkati jakwe. **32** Na ibhaga a Nnunu bhakushiywe nkati ja Bhana bhabho, numbe a Nnunu shangupe, shibhankuye Mwana nkati jabho. **33** "Mmanganya ashibanangu, shindame na mmanganyanji kwa malanga gashokope. Shinnoyanje, ikabheje nnaino ngunakummalanjilanga malinga shinaabhalanjilenje

Bhayaudi kuti, 'Kungwenda mmanganyanji nkakombolanga kuika!' **34** Ngunakumpanganga amuli ja ambi, Mpingane, malinga shinimpinilenje mmanganyanji. **35** Mpinganaga, bhandu bhowe shibhamanyanje kuti mmanganya bhaajiganywa bhangu." **36** A Shimoni Petili gubhaabhushiye, "Mmakulungwa, kunkwenda kwei?" A Yeshu gubhajangwile, "Kungwenda nkakombola kungagula nnaino, ikabheje kungai shinnagule." **37** A Petili gubhaalugulile, "Mmakulungwa, kwa nndi ngunakombole kungagula nnaino? Nne shing'engwe nkali kuwa kwa ligongo lyenu mmwe." **38** A Yeshu gubhaajangwile, "Bhuli! Kweli mmwe shinn'engwe kuwa kwa ligongo lyangu nne? Kweli ngunakunnugulila, lipongo akanabhe kongobhela shinngane patatu!"

14 A Yeshu gubhaalugulilenje, "Nnatengukanje mmitima jenunji. Nnakwaakulupalilanga a Nnunu, ngulupalilanje na nne. **2** Kumui kwa Atati ipali ndamo yaigwinji, monaga nngabha nneyo, ngammalanjenje. Nnaino ngunakwenda kukunn'g'alashiyanga ndamo. **3** Nyendaga kung'alashiyanga ndamo, shimuje kukuntolanga, nkupinga pushimme nne, na mmanganyanji mmanganje popo. **4** Mmanganyanji ngumanyinji mpanda gwa kungwendako." **5** A Tomashi gubhabhushiye, "Mmakulungwa, tukakukumanya kunkwenda, bhai, tugumanye bhuli mpandago?" **6** A Yeshu gubhaajangwile, "Nne ni mpanda na kweli na gumi. Jwakwa akombola kwenda kwa Atati ikabhe kupitila nne. **7** Ibhaga nkamanyinji nne, nkaamanyinji Atati. Kuumila nnaino, mwaamanyinji, numbe mwaabhwini." **8** A Pilipi gubhaalugulile, "Mmakulungwa, shiitupwae, ntulanguye Atati." **9** A Yeshu gubhaalugulilenje, "Mobha gowega ndemi na mmanganyanji, igala mmwe a Pilipi nkanabhemanya? Amweni nne abhabhwini Atati. Nkubheleketa bhuli, 'Ntulanguye Atati?' **10** Bhuli nkaakulupalila kuti nne muni nkati ja Atati, nabhalabho Atati mubhali nkati jangu? Malobhe gungummalanjilanganga, ngaabheleketa kwa mashili gangu namwene, ikabhe Atati bhali nkati jangu, ni bhaatenda liengo lyabho. **11** Nngulupalilanje kuti nne muni nkati ja Atati, na Atati mubhali nkati jangu, ibhaga ng'oo, nkulupalilanje kwa ligongo lya maengo gungutendaga. **12** Kweli ngunakummalanjilanga, jwene angulupalila nne, na jwalakwe shaatende maengo gungukamula nne, nkali na gamakulungwa kupunda genega, pabha nne ngunakwenda kwa Atati. **13** Shoshowe shishinnjunganje kwa lina lyangu, shenesho shindende, nkupinga Atati bhakuywe nkati jika Mwana. **14** Nnyuganganga shoshowe kwa lina lyangu, shintendelanje." **15** "Mbinganganga, shinkamulanje amuli yangu. **16** Na nne shinaajuje Atati bhampanganje jwakunjagutuilanga juna, nkupinga atame na mmanganyanji pitipiti. (aiōn g165) **17** Jwenejo Mbumu jwa kweli. Shilambolyo nngakombola kumposhela, pabha shikakombola kummona wala kumanya. Ikabheje mmanganyanji mummanyinji pabha anaatama na mmanganyanji, na shaabhe nkati jenunji." **18** "Nngannekanga ushubha, shininjilanje. **19** Gaigele mobha gashoko, shilambolyo shikamona kabhili, ikabheje mmanganyanji shimmonanje, pabha nne najwankoto na nkali mmanganyanji shimmanjanje mmabhakotonji. **20** Pushiliishile lyene lyubhalyo, shimmanyanje kuti nne muni nkati ja Atati, na mmanganyanji munninjinji nkati jangu, na nne nkati jenunji." **21** "Akwiiposhela

amuli yangu nikwiikamula, jwenejo ni ambinga nne. Na jwalakwe ambinga nne, shaabhapije Atati, na nne shinimpinje na shinilanguye kuka jwene." **22** A Yuda, nngabha a Ishikaliote bhala, gubhaabhushiye, "Mmakulungwa, shiitendeshe bhuli mmwe kwiilanguya kwetu uwe na nngabha ku shilambolyo?" **23** A Yeshu gubhajangwile, "Mundu ambingaga shakamule malobhe gangu, Atati shibhampinje na uwe shituishe, nitama najo. **24** Mundu akaambinga nne akakamula malobhe gangu. Lilobhe limpilikenenje nngabha lyangu nne, ikabhe lya Atati bhandumile. **25** "Nimmalanjenje genego, shini launo na mmanganyanji shino, **26** ikabheje Nkujiangutula jula, Mbumu jwa Ukonjelo, shibhantume Atati kwa lina lyangu, shanjiganyanje indu yowe na kunkumbushiyanga gowe gunimmalanjenje." **27** "Ngunakunneshelanga ulele, ngunakumpanganga ulele gwangu. Ngakumpanganga malinga shilambolyo shishikuti tenda. Nnainginikanje mmitima jenunji wala nnatengukanje. **28** Mwapilikenenje punammalanjenje. 'Ngunakwijiendela, kungai shinimmujilanje kabhili.' Nkambinjenje, nkainonyelenje kwa ligongo ngunakwenda kwa Atati, pabha bhenebho bhakulungwa kumbunda nne. **29** Njikummalanjilanga genega nnaino gakanabhe koposhela, nkupinga pushigakoposholepo nkulupalilanje. **30** Ngabheleketa kabhili malobhe gamagwinji na mmanganyanji, pabha nkulungwa jwa shilambolyoshi anakwiya. Wala jwangali sha kombola kwangu nne, **31** ikabheje shilambolyo shinapinjikwa shimanye kuti nne ngunakwaapinga Atati, pabha ngunatenda indu yowe malinga shibhang'amulishe Atati. Nnjimangane, tujabhule apano!"

15 A Yeshu gubhapundile kubheleketa, "Nne nshabhibhu gwa kweli, bhaalima ni Atati. **2** Lujambi lolowe luli nkati jangu lukaogoye iyepo, lunashelwa nishoywa, na lolowe luogola, lunaunilwa ntonga lukonje lupunde ogola. **3** Mmanganyanji nkonjilenje kwa ligongo lya ntenga gunimmalanjenje gula. **4** Ntamangane nkati jangu, na nne nkati jenunji. Na malinga lujambi pulukaogoya iyepo jikape, lukabhe munshabhibhu, nneyo peyo na mmanganyanji nngakombola kuogoya iyepo nkatamangane nkati jangu." **5** "Nne nshabhibhu, mmanganyanji nyambi. Atama nkati jangu, na nne ndamaga nkati jakwe, jwenejo shaogoye iyepo yaigwinji, pabha gwangali nne nkakombolanga tenda shoshowe. **6** Mundu jojowe akatame nkati jangu, anaeshelwa palanga malinga lujambi pululeshelwa palanga ni jumula. Nilokotwa na bhandunji nileshelwa pamoto lutinishe. **7** Ntamanganaga nkati jangu, na malobhe gangu gatamaga nkati jenunji, bhai, nnjunganje shoshowe shinkupinganga na mmanganya shimpegwanje. **8** Shimmanganje bhaajiganywa bhangu, niogoya iepo yaigwinji na kwa nneyo Atati shibhakuywe. **9** Nne ngunakumpanganga mmanganyanji malinga Atati shibhambinga nne. Ntamangane nkupingana na nne. **10** Nkamulanganga amuli yangu, shintamangane nkupingana na nne, malinga nne shingamwile amuli ya Atati na tama nkupingana kwabho. **11** Njikummalanjilanga genego nkupinga angalala kwangu kutame nilonjeya nkati jenunji, na angalala kwenunji kutimilile. **12** Amuli jangu ni ajino, mpingane, malinga shinimpinjenje nne. **13** Kwakwa kupinga kupundile, kwa mundu kwiishoya gumi gwake kwa ligongo

lya ashaambwiga ajakwe. 14 Mmanganyanji ashaambwiga ajangu ntendangaga gungung'amulishanga. 15 Nganshemanga kabhili bhatumishi, pabha ntumishi akakushimanya shibhaatenda bhakulungwa bhakwe. Ikabheje mmanganyanji njikunshemanga ashaambwiga, pabha ninng'ibhulilenje gowe gumbilikene kwa Atati. 16 Nngabha mmanganyanji nng'agwilenje nne, ikabhe nne ning'agwilenje mmanganyanji nikuntumanga njendangane nkaogoyanje iepo na iepo yenunji ilonjeye, na bhalabho Atati bhampanganje shoshowe shinkwaajuganga kwa lina lyangu. 17 Bhai, amuli jangu jingumpanganga ni ajino, mpingane." 18 A Yesu gubhashite, "Ibhaga shilambolyo shinshimangaga mmanganyanji, nkumbushilanje kuti, shinjimile nne shikanabhe kunshimanga mmanganyanji. 19 Ibhaga nkalinginji bhandu bha shilambolyo, shilambolyo shikampinilenje pabha bhandunji bhakwe. Ikabheje pabha mmanganyanji nngabha bha pa shilambolyo, ikabhe nne njikunng'agulanga kopoka kushilambolyo, kwa lyene ligongolyo shilambolyo shinakunshimanga. 20 Nkumbushilanje gunimmalanilenje, ntumwa nngabha jwankulungwa kupunda bhakulungwa bhakwe. Ibhaga bhashimbotebanga nne, shibhampotekanje na mmanganyanji, monaga bhakamulenje lilobhe lyangu, nneila peila shibhakamulanje na lilobhe lyenunji. 21 Ikabheje genego gowe shibhantendelanjje kwa ligongo lya lina lyangu, pabha bhakakwamanyanga bhandumile bhala. 22 Monaga ngungaisheje nibheleketa nabhonji, bhakanakolanje yambi, ikabheje nnaino bhakakombolanga kwiembuya kuti bhanganjilingi yambi. 23 Anjima nne, anakwaashima na Atati. 24 Monaga ngalepele tenda indu ikanabhe tendwa naka mundu juna ngubhakakwetenenje yambi, ikabheje nnaino bhagabhweninji gundendile, na gubhanjimilenje nne na Atati. 25 Ikabheje gatimilile malobhe ga shalia yabhonji, 'Bhashinjimanga nne gwayoyo!' 26 "Ikabheje pashaishe nkujangutajo, jushinintume kungwenunji kopoka kwa Atati, Mbumu jwa kweli, jwenejo shangong'ondele nne. 27 Na mmanganyanji shinngong'ondelanjje, pabha nshibhanganga na nne kuumila kundandubho."

16 "Njikummаланjilanga genego nkupinga nnalekanje ngulupai jenunji. 2 Bhandunji shibhankananje nnyumba yabhonji ya jujila Nnungu. Numbe ganakwa mobha, kila mundu shammulaganje mmanganyanji, shaganishiye kuti anaashoya mbepei kwa a Nnungu. 3 Shibhantendelanjje genego kwa ligongo lya nngaamanya Atati, wala nne. 4 Ikabheje njikummalanjilanga genego, nkupinga pushigaishe malanga gakwe, nkumbushilanje kuti nammalanjilenje." "Nangammаланjilanga yene indui kuumila bhukala, pabha naliji pamo na mmanganyanji. 5 Ikabheje nnaino ngunakwenda ku bhandumile bhala, wala jwakwa nkali jumo munkumbi gwenunji amuya, 'Nkwenda kwei?' 6 Pabha njikummalanjilanga genego, nshinjikanga mmitima jenunji. 7 Ikabheje, kweli ngunakummаланjilanga, mbaya nne nyabhule, pabha ngajabhule Nkujanguta jula, akanjilanga. Ikabheje, nyendaga, bhai shinintume kungwenunji. 8 Jwenejo aikaga, shabhakong'ondelanjje bhandu pa shilambolyo, ga yambi na aki na ukumu ja a Nnungu. 9 Kwa ngani ja yambi yenunji shabhakong'ondelanjje, pabha bhanganjulupalilanga nne, 10 kwa ngani ja aki shabhakong'ondelanjje kuti nne ngwete

aki, pabha ngunakwiiwendela kwa Atati, wala nkamonanga kabhili, 11 na kwa ngani ja ukumu, shabhakong'ondelanjje kuti nkulungwa jwa pashilambolyo pano akumwilwe. 12 "Njikola gamagwinji ga kummаланjilanga, ikabheje nnaino shintopelwanje. 13 Ikabheje pushaishe Mbumu jwa kweli, jwenejo shannongoyanje nkwele jowe, pabha akabheleketa kwa mashili gakwe nyene, ikabhe shabhelekete gapilikene na kunnuguilanga gapinga koposhela. 14 Jwenejo shanguye nne pabha shantashiyanje gapatile kwangu nne gala. 15 Yowe ibhakwete Atati ni yangu, kwa nneyo nashinkubheleketa kuti, Mbumujo shantashiyanje gashaapate kwangu nne. 16 "Galepeshe mobha gashoko, mmanganyanji nkamonanga na gapitaga mobha gashoko, shimmonanje kabhili!" 17 Penepo bhaajiganywa bhahho bhananji gubhabhuyenenje, "Bhakwete malombolelo gashi pubhabheleketa, 'Galepeshe mobha gashoko mmanganyanji nkamonanga, na gapitaga mobha gashoko shimmonanje kabhili?' Kabhili bhakuti. 'Pabha ngunakwenda kwa Atati!'" 18 Bhai, gubhalinginji nkubhuyana, "Bhakwete malombolelo gashi kubheleketa, 'Galepeshe mobha gashoko?' Tukakushimanya shibhaabheleketa." 19 A Yesu gubhamumanyi kuti bhanapinganga kwaabhuya, bhai gubhaaluguilenje, "Bhuli, nnabhuyana gumelekete gakuti, 'Galepeshe mobha gashoko mmanganyanji nkamonanga, na gapitaga mobha gashoko shimmonanje kabhili?' 20 Kweli ngunakummаланjilanga, mmanganyanji shinngutanje shililo, ikabheje shilambolyo shishiionyele, shinng'injikanje, ikabheje kuinjika kwenunji shikutendebhushe kubha kwiionyela. 21 Bhakongwe bhalipinga kola, bhanapata mbotoko pabha malanga ga kola gaishile, ikabheje bhakolaga, bhakakumbushila kabhili mbotoko, kwa ligongo lya kwiionyela kubhelekwa kwa mundu pa shilambolyo. 22 Bhai, mmanganyanji nshinjikanga nnaino, ikabheje shininjilanje kabhili, numbe shimwinonyelanjje mmitima jenunji, na kwene kwinonyelako jwakwa shampokonyolanjje." 23 "Lyene lyubhalyo nkamuyanga shoshowe. Kweli ngunakummаланjilanga, shoshowe shishimwaajuganje Atati kwa lina lyangu, shibhampanganje. 24 Mpaka nnaino nkanabhejuganga shindu kwa lina lyangu. Njuganje shimpegwanje nkupinga kwiionyela kwenunji kutimilile. 25 "Njikummаланjilanga genega kwa ndango. Ikabheje malanga ganakwa nngamalanjilanga kabhili kwa ndango, ikabhe shinimmalanjilanjje ga Atati gwangali nng'iyoy. 26 Gene mobhago shinnjuganje kwa lina lyangu, wala ngakummаланjilanga kuti shininjilanjje kwa Atati, 27 pabha bhayene Atati bhanakumpinganga, kwa ligongo lya mbinganga nne nikulupalila kuti kungoposhele kwa a Nnungu. 28 Nne kungopweshe kwa Atati, gung'ishe kushilambolyo na nnaino ngunakushileka shilambolyo kubhuja kwa Atati." 29 Bhai bhaajiganywa bhahho gubhaaluguilenje, "Nnole! Nnaino nnabheleketa gwangali nng'iyoy wala nkabheleketa kwa ndango. 30 Nnaino tumumanyi kuti mmwe nnakwiimanya indu yowe, wala ikapinjikwa mundu jowowe kummuya, kwa nneyo tunaakulupalila kuti kunkoposhele kwa a Nnungu." 31 A Yesu gubhaajangwilenje, "Bhuli, nnaino nnikulupalilanga? 32 Malanga ganakwa, numbe gaishe, mmowenji shimpwilinganjanje kila mundu kunnwakwe, nne shinnekanje jikape. Mbena, nne nngabha puni jikape, pabha Atati pubhali pamo na nne. 33

Njikummalanjilanga genego nkupinga nkolanje ulele gwa lundana na nne. Pashilambolyo nkwetenje shilaje, ikabheje mwilumanje ntima, nne nishikombwele shilambolyo!"

17 A Yeshu bhakabheleketeje genego, gubhalolile kunani kunnungu, gubhashite, "Atati, malanga gaishe! Munkuye Mwanagwenu, nkupinga na jwalakwe Mwana ankuye. **2** Pabha mwashinkumpa Mwanagwenu mashili kubhandu bhowe nkupinga bhowe bhumwampele abhanganganje gumi gwa pitipiti. (aiōnios g166) **3** Na gumi gwa pitipiti ni aguno, kummanya mmwe nni jikape a Nnungu bha kweli, na kwaamanya a Yeshu Kilishitu bhumwaatumile. (aiōnios g166) **4** Nne njikunkuya mmwe pa shilambolyo pano, maliye liengo limwaambele ndende lila. **5** Atati, nnaino nnguye, kwa ukunjelo gunaakwete punaliji na mmwe shilambolyo shikanabhe panganywa gula. **6** "Njikulitenda lina lyenu limanyishe ku bhandu bha pa shilambolyo bhumbele bhala. Pubhalinginji bhenu, gumbele nne bhahanganje bhangu, nne bhakundilenje lilobhe lyenu. **7** Nnaino bhamumanyinji kuti yowe imbele, kuikopweshe kunnungu mmwe. **8** Nne naapelenje lilobhe limwaambele lila, nabhalabonji bhaliposhelenje, bhamumanyinji kuti kweli kungoposhele kunnungu mmwe, na bhakulupalilenje kuti mmwe ninndumile." **9** "Nne ngunakwaajijilanga bhenebho, ngakushijula shilambolyo, ikabhe ngunakwaajijilanga bhumbele bhala, pabha bhenu. **10** Yowe ingwete ni yenu mmwe, na yenu ni yangu na ukunjelo gwangu ubhoneshe ku bhene bhumbale bhala. **11** Na nnaino wala ngalonyeya pashilambolyo, ngunakwiya kunnungu, ikabheje bhanganjyabha launo pubhalinginji pashilambolyo. Atati bha ukunjelo! Kwa mashili ga lina lyenu limbele, shonde mwaapanganje ulinda nkupinga bhahanganje shindu shimo, malinga shituli uwe. **12** Punaliji pamo na bhanganjyabho, nne nashinkwaapanganje ulinda kwa mashili ga lina lyenu limbele. Nne naabhisilenje muulinda, wala jwakwa nkali jumo jwabonji apinga kuobha, ikabhe amanyishe kuti mwana jwa obha jula, nkupinga Majandiko ga Ukunjelo gamalile." **13** "Bhai, nnaino ngunakwiya kunnungu, gene malobhega njibheleketi nili pa shilambolyo pano, nkupinga bhainonyelanje mmitima jabhonji kwa ligongo lyangu. **14** Nne naapelenje lilobhe lyenu na shilambolyo gushaashimilenje, pabha bhanganjyabho nngabha bha pa shilambolyo, malinga shini nne nngabha jwa pa shilambolyo. **15** Ngaajuga kuti mwaashoyanje pa shilambolyo, ikabhe ngunaajuga mwaembuyanje na jwangali jwa mmbone jula. **16** Bhanganjyabho nngabha bha pa shilambolyo, malinga shini nne nngabha jwa pa shilambolyo. **17** Mwaatakayanje kwa kweli jila, lilobhe lyenu ni kweli. **18** Malinga shinndumile nne ku shilambolyo na nne nnepeyo njikwaatumanga ku shilambolyo, **19** na kwa ligongo lya bhanganjyabho ngunakwiishoya namwene nkupinga na bhalabonji bhaishoyanje na kweli jila. **20** "Bhungwaajijilanga nngabha bhanganjyabho pebho, ikabhe bhowe shibhakulupalilanje kwa ligongo lya lilobhe lyabhonji. **21** Ngunaajuga nkupinga bhowe bhahanganje shindu shimo. Atati! Ngunaajuga bhahanganje nkati jetu, malinga mmwe Atati shinni nkati jangu, na nne nkati jenu. Ngunaajuga bhahanganje shindu shimo nkupinga shilambolyo shikulupalile kuti mmwe ni ninndumile. **22** Nne

naapelenje ukunjelo malinga gumwaambele gula, nkupinga bhahanganje shindu shimo malinga shituli uwe. **23** Nne ndame nkati jabhonji, na mmwe nkati jangu nne, nkupinga bhamaalilanje kubha shindu shimope, nkupinga shilambolyo shimanye kuti mmwe ni ninndumile, mmwe nnakwaapinganga bhanganjyabho malinga shinkumbinga nne." **24** "Atati! Shingupinga bhumbele bhala bhahanganje pamo na nne popowe pushindame, nkupinga bhagubhonanje Ukunjelo gwangu gumbele, pabha nshinkumbinga shilambolyo shikanabhe panganywa. **25** Atati mmambone! Shilambolyo shikakummanya, ikabhe nne ninmanyi, bhanganjyabha bhamumanyinji kuti mmwe ni ninndumile. **26** Njitenda lina lyenu limanyishe ku bhanganjyabho, na shimbunde kutenda nneyo, nkupinga kumbinga kwenu, kubhe mmitima jabhonji, na nne namwene mme mmunda jabhonji."

18 A Yeshu bhakabheleketeje genego, gubhajabhwile na bhaajiganywa bhahho gubhapite kung'ambu lushi lwa Kedoloni. Kweneko jashinkupagwa bhushitani, a Yeshu gubhajinjile mwenemo na bhaajiganywa bhahho. **2** A Yuda bhaatendebhushe a Yeshu bhapananyi penepo, pabha a Yeshu bhatendaga kwenda kweneko papagwinji na bhaajiganywa bhahho. **3** Bhai, a Yuda gubhaishe kubhushitani kula bhali bhalongene na likundi likulungwa lya manjola na bhalinda kukoposhela kwa bhakulungwanji bhaabhisila na Ashimapaishayo, bhajigelenje yenje na ikomanilo. **4** Bhai a Yeshu bhainkugamanya gowe gapinga kwaakoposhela, gubhakoposhele nikwaabhuhyanga, "Junkunoleyanga gani?" **5** Nabhalabonji gubhaajangwilenje, "A Yeshu Bhanashaleti!" A Yeshu gubhaalugulilenje, "Nne ni nne." A Yuda bhaatendebhushishe bhala, na bhalabho pubhaliji bhajimi nabhonji. **6** Bhai, a Yeshu bhakaalugulilanje kuti, "Nne ni nne" gubhanokolenenje kubhuja nnyuma gubhaagwilenje pai. **7** A Yeshu gubhaabhushiyenje kabhili, "Junkunoleyanga gani?" Gubhaajangwilenje, "A Yeshu Bhanashaleti!" **8** A Yeshu gubhaalugulilenje, "Nimmalanjilenje kuti, Nne ni nne. Bhai monaga nkunoleyanga nne, mwaalekanje bhanganjyabha bhajendanganile." **9** Bhashinkubheleketi genego nkupinga gatimilile malobhe gubhabhelekete kuti, "Bhumbele bhala nangaang'obhiya nkali jumo." **10** Bhai, a Shimoni Petili bhashinkukola upanga, gubhaguolomwele nikunkata lishikio lya kunkono nnilo, lika ntumishi jwa bhakulungwa bhaabhisila. Jwene ntumishijo pashemwaga Malikushi. **11** Bhai, a Yeshu gubhaabhalanjile a Petili, "Mmujenago upanga gwenu nngonelo lyakwe. Bhuli, ngunapapile shikombe sha mboteko shibhambele Atati?" **12** Bhai likundi lya manjola lila na nkulungwa jwabhonji jula na bhalinda bha Bhayaudi bhala gubhaakamwilenje a Yeshu, gubhaatabhilenje. **13** Gubhatandubhenje kwapeleka kwa a Anashi, akwebhabho a Kayapa, bhaliji Bhakulungwa Bhabhisila shene shakasho. **14** A Kayapa ni bhebhala bhaalugulilenje Bhayaudi kuti mbaya mundu jumo awe kwa ligongo lya bhandunji. **15** A Shimoni Petili na nkujiganywa juna gubhaakagwilenje a Yeshu. Jwene nkujiganywajo atendaga manyika na Bhakulungwa Bhabhisila, kwa nneyo gwajinjile palukumbi lwa Bhakulungwa Bhabhisila lubhajinjile a Yeshu. **16** Ikabheje a Petili pubhajimi palanga, tome na nnango. Bhai,

bhaajiganywa bhana bhamanyishe na Bhakulungwa Bhabhishila bhala gubhakopweshe palanga nikunguluka na jwankongwe nninda jwa pannango, akwaajinjyaga a Petili nkati. 17 Bhai bhakongwe bhalinda bha nnango bhala gubhaabhushiye a Petili, "Bhuli, mmwe nkumbi gumo gwa bhaajiganywa bha bhene bhandubha?" A Petili gubhashite, "Nngabha nne!" 18 Bhatumwa na bhalinda bhala bhashinkukumbanyanga moto gwa jota pabha jshinkupagwa mmbepo, gubhatemingene nkujota moto. Na bhalabho a Petili gubhajimi pamo nabhonji nkujota moto. 19 Bhai Bhakulungwa Bhabhishila gubhaabhushiye a Yesu ga bhaajiganywa bhahbo na ga majiganyo gabho. 20 A Yesu gubhaajangwile, "Nne mobha gowe natendaga bheleketa pa lugwinjili lwa bhandu gwangali nng'yo na papagwinji natendaga jiganya nshinagogi na ku likanisha, pubhaimanangaga Bhayaudi bhowe, wala nangabheleketa shoshowe kwa nng'yo. 21 Pakuti nnaamuya nne? Mwaabhuyanje bhapilikenenje bhala nndi inaalugulilenje. Bhanganyabho bhagamanyinji gunaalugulilenje." 22 Bhai bhakamaliyeje bheleketa nneyo, bhalinda bhama bhaajimi tome gubhaakomile lipapa a Yesu bhalinkuti, "Mmwe nnakwaajangula bhuli nneyo, bhakulungwa bhaabhishila?" 23 A Yesu gubhaajangwile, "Monaga njibheleketa gangali ga mmbone, mmalanjile gwangali gwa mmbone gwakwe, monaga gumelekete ga mmbone, shinkungomela nndi?" 24 Bhai, a Anashi gubhaapeleshe a Yesu kwa a Kayapa bhakulungwa bhaabhishila, bhali bhatabhwilwe. 25 A Shimoni Petili gubhajimi penepo, nkujota moto. Bhai, gubhaabhushiye, "Bhuli, nkali mmwe nngabha nkumbi gumo gwa bhaajiganywa bhahbo?" Nabhalabho gubhakanile bhalinkuti, "Nngabha nne!" 26 Ntumishi jumo jwa bhakulungwa bhaabhishila, nnongo nnjakwe akatilwe lishikio na a Petili jula, akwaabhuyaga, "Bhuli, nne nangammona mmwe kubhushitani nni pamo na bhenebho?" 27 A Petili gubhakanile kabhili, na shangu lipongo gwakongobhele. 28 Kungai gubhaashoshiyenje a Yesu kwa a Kayapa, gubhaapelekenje kwa a mpalume bha Shilumi bhashemwaga a Pilato. Puyaliji tome kumashelo, ikabheje ashaayeneni bhangajinjilanga nnukumbi mula, nkupinga bhanakolanje yambi nikwaibhiliilanga kulya Pashaka. 29 Bhai, a Pilato a Mpalume bha Shilumi bhala, nigubhakopweshe palanga gubhaabhushiyenje, "Bhalebhile nndi bhene bhandubha?" 30 Gubhaajangwilenje, "Kaliji bhangalebha, ngutukaapelesheje kunngwenu mmwe." 31 A Pilato gubhaalugulilenje, "Ayaga mwaatolanje mwashaayeneni nkaakumulanje malinga shalia jenunji." Bhai Bhayaudi gubhaajangwilenje, "Uwe tukapinjikwa kunng'ukumula mundu jojowe kuwa." 32 Ishinkutendeka nneyo nkupinga gatimilile malobhe gubhabhelekete a Yesu bhalilanguya shiwo shashi shishibhawe. 33 Bhai, a Pilato gubhajinjile kabhili nnukumbi lukulu lushemwa Pulaitolio, gubhaashemile a Yesu nikwaabhuya, "Bhuli! Mmwe Mmakulungwa bha Bhayaudi?" 34 A Yesu gubhaajangwile, "Bhuli! Genego malobhe genu mmayene, eu nshibhalanjilwa na bhandunji, gangu nne?" 35 A Pilato gubhaajangwile, "Ama! Bhuli nne Nnyaudi? Bhashilambo ajenunji na bhakulungwa bhaabhishila bhenu bhanjenabhonji kwangu nne. Nntendile nndi?" 36 A Yesu gubhajangwile, "Upalume gwangu nngabha gwa pa shilambolyo. Monaga upalume gwangu ukaliji gwa pa shilambolyo pano, ashimanjola bhangu

bhakangomanilenje nkupinga ngunakumulwe na Bhayaudi. Ikabheje upalume gwangu nngabha gwa pepano." 37 Penepo a Pilato gubhaabhushiye, "Bhai, Mmwe mpalume?" A Yesu gubhajangwile, "Mmwe mmelekete kuti, nne mpalume. Nne njibhelekwa kwa ligongo lya genego na genego ni gung'ishile pa shilambolyo, nkupinga ngong'ondele kweli kubhandunji. Jojowe akwete kweli anambilikaniishiya nne." 38 A Pilato bhakwaabhuyaga, "Kweli ni nndi?" A Pilato bhakabheleketeje genego gubhaajendelenje Bhayaudi kabhili, gubhaalugulilenje "Nne ngakushibhona shoshowe shibhalebhile bhenebha. 39 Ikabheje nkwenenje nnkubho gwa kuti nne ning'ugulilanje nkutabhwa jumo mobha ga Pashaka. Bhuli, nnapinganga ning'ugulilanje A mpalume bha Bhayaudi?" 40 Penepo gubhajobhelenje, "Ng'oo! Nngabha bhenebha ikabhe a Bhalabha!" A Bhalabha bhashinkutabhwa kwa ligongo lya ujambashi.

19 Bhai, a Pilato gubhaatolile a Yesu gubhaakomile mishapilo. 2 Na bhalabhonji ashimanjola nkwaalembula, gubhaeleyenje ulemba gwa mibha, gubhaawashiyenje a Yesu muntwe mbuti ulemba gwa shipalume, gubhaawashiyenje na nngubho ja langi ja shambalau. 3 Gubhaajendelenje, bhalinkutinji "Tunakunkomaya a mpalume bha Bhayaudi!" Gubhaakomilenje mapapa mmatakwa. 4 Kungai a Pilato gubhakopweshe kabhili palanga, gubhaalugulilenje, "Nnolanje, ngunakwiya nabho kabhili kwenu mmangananya mmumanyanje kuti nne, nangashibhona shoshowe shibhalebhile." 5 Bhai, a Yesu gubhakopweshe palanga bhawete ulemba gwa mibha na nngubho ja langi ja shambalau. A Pilato gubhaalugulilenje bhandunji bhala, "Nnolanje! Abha apano." 6 Bhai, Bhakulungwa bhaabhishila na bhalinda bhakaabhonanjeje a Yesu gubhautyenje liobhe bhalinkutinji, "Mwaabhambe munshalabha! Mwaabhambe munshalabha!" A Pilato gubhaalugulilenje, "Bhai, mwaatolanje mwaashayeneni nkaabhambanje munshalabha, pabha nne ngakushibhona shibhalebhile." 7 Bhayaudi gubhaajangwilenje, "Uwe tukwete shalia ja kwaukumula, pabha bhashinkwiitenda kuti Mwana jwa a Nnungu." 8 Bhai a Pilato bhakapilikaneje gene malobhego gubhapundile jogopa. 9 Bhai, gubhajinjile kabhili nnukumbi lukulu lushemwa Pulaitolio, gubhaabhushiye a Yesu, "Mmwe kunkoposhele kwai?" Ikabheje a Yesu bhangaaajangula shindu shoshowe. 10 Bhai a Pilato gubhaalugulile "Nkaapinga kubheleketa na nne? Bhuli nkaakumulunya kuti nne njikola ukulungwa gwa kunngopola na gwa kummamba munshalabha?" 11 A Yesu gubhaajangwile, "Mmwe ngunkakweteje upalume gogowe kwangu nne gwangali pegwa na a Nnungu. Kwa nneyo jwene angamwiye kwenu mmwejo, ashikola shambi shikulungwa." 12 Tandubhila penepo a Pilato gubhaloleye shanabhuli shibhaagopole, ikabheje Bhayaudi gubhajobhelenje bhalinkutinji, "Mwaagopolaga bhenebha, mmwe mwangali shilongani na a Kaishali a mpalume bhakulu bha Loma, kila mundu akwiitenda mpalume anakwaatendebhuka a Kaishali!" 13 Bhai a Pilato, bhakapilikaneje gene malobhego, gubhakopweshe nabho a Yesu palanga, gubhatemi pashitengu sha ukumu, pashemwaga "lupenu lwa maganga" eu kwa Shiebhulania, "Gabhasha." 14 Puyaliji mui malanga ga shaa shita nnei, lyubha lya kolokoya Pashaka. A Pilato gubhaalugulilenje

Bhayaudi, "Mwaalolanje! A mpalume bhenunji!" 15 Bhai, bhanganayabho gubhahjohbelenje, "Mwaashoye! Mwashoye! Bhabhambwe munshalabha!" A Pilato gubhaabhushiyenje, "Bhuli naabhambe munshalabha a mpalume bhenunji?" Bhakulungwanji bhaabhishila gubhajangwilenje, "Uwe twangali a mpalume ikabhe a Kaishali!" 16 Penepo a Pilato gubhaakamwiyenje a Yesu nkupinga bhaabhambe munshalabha, na bhalabhonji gubhaaposhelenje. Bhai, gubhaatolilenje a Yesu. 17 Na bhalabho gubhakopweshe palanga akuno bhajigele nshalabha gwabho, kuloya mmbali pashemwaga "Shibhanga sha Ntwe" kwa Shiebhulania Goligota. 18 Penepo nipubhaabhambilenje munshalabha a Yesu na bhandu bhananji bhabhili, jumo nkono gwabho gwa nnilo, na juna nkono nshinda gwabho na a Yesu pakati pakati. 19 Na bhalabho a Pilato gubhajandishe mmbila panani nshalabha, ijandikwe nnei, "A YESHU BHANASHALETI, A MPALUME BHA BHAYAUDI." 20 Bhai Bhayaudi bhahagwinji gubhashomilenje jene mmbilajo, pabha pubhaabhambilenje munshalabha a Yesu, pupaaliji tome na shilambo. Na jene mmbilajo pujajandikwe kwa Shiebhulania na Shilatini na Shigiliki. 21 Bhai, bhakulungwanji bha bhaabhishila na Bhayaudi gubhaalugulilenje a Pilato, "Nnjajandishe. 'A mpalume bha Bhayaudi,' ikabhe bhashinkubheleketa bhayene kuti, 'Nne mpalume jwa Bhayaudi.'" 22 A Pilato gubhajangwile, "Gunyandishe, nigajandishe!" 23 Ashimanjola bhala bhakaabhambanjenje a Yesu munshalabha, gubhatolilenje nngubho yabho, gubhagebhenyenje maungu nsheshe, malinga shibhalinginji. Gubhatolilenje na kanshu jabho, jenejo pujaliji ja lukwa. 24 Bhai, gubhalugulilenje, "Tunajipapule, ikabhe tutende shikoma jibhe jika gani." Genego gashinkutendeka nkupinga gatimilile Majandiko ga Ukonjelo ga taya, "Bhashinkugabhananga nngubho yangu, Na nngubho jangu gubhaagulenje kwa shikoma." Bhai nneyo, ni shibhatendilenje ashimanjola bhala. 25 Tome na nshalabha gwa a Yesu bhashinkujimangana anyinabhabho, na a Malia akulu bhabho anyinabhabho akongobhabho a Kileopashi, na a Malia Magidalena. 26 Bhai, a Yesu bhakaabhoneje anyinabhabho na nkujiganywa jubhampinjile jula ajimi patome, gubhaalugulile anyinabhabho, "A Mama! Munnole, mwanagwenu." 27 Kungai gubhaannugulile nkujiganywa jula. "Mwaalole, anyina bhenu." Kutandubhila penepo, bhaajiganywa bhala gubhaatolile anyina bhabho a Yesu bhakatame kunngwabho. 28 Kungai, a Yesu akuno bhalikumumanya kuti gowe gamalile, nkupinga Majandiko ga Ukonjelo gatimilile, gubhashite, "Njikola njota." 29 Penepo jashinkupagwa bhakuli jigumbeywe divai ja shashama. Bhai, gubhashubhikenje shiponji mmakuli ja divai ja shashama jila, gubhatabhilenje nsubhalabhala lwa nkongo ushemwa ishopo, gubhaabhishilenje pa kang'wa. 30 Bhai a Yesu bhakapapileje divai ja shashama jila, gubhashite, "Gamalile!" Kungai gubhakotime nntwe, gubhamalile. 31 Bhai pabha pulyaaliji lyubha lya kolokoya kwa Lyubha lya Pumulila. Kwa nneyo ikapinjikwaga iilu ilepeshe munshalabha Lyubha lya Pumulila, pabha lyene lyubhalyo pulyaaliji likulungwa. Bhayaudi gubhaajujilenje a Pilato bhakaatemanje makongono bhakomelenjwe munshalabha bhala nkupinga bhawanganje shangu, na iilu yabhonji ishooye mmishalabha. 32 Bhai,

ashimanjola gubhapite kunte manga makongono mundu jwa nntai na jwa bhili, bhakomelwenje munshalabha pamo na a Yesu bhala. 33 Ikabheje bhakaishilanjenje a Yesu, gubhaaimerje bhali bhawile, kwa nneyo bhangaatemanga makongono. 34 Ikabheje linjola jumo gwabhaomile lipanga lya mmbalati, bhai gujikopweshe minyai na mashi. 35 Kwa nneyo, jwene agabhweni genego ni akong'ondela, nkupinga na mmanganyanji nkulupalilanje. Na gene gabheleketeo ni ga kweli, numbe amumanyi kuti anabheleketa ga kweli. 36 Pabha genega gashinkutendeka nkupinga Majandiko ga Ukonjelo gatimilile ga taya kuti, "Lyakwa nkali liupa lyabho limo shilitemanywe." 37 Na majandiko gana gakuti, "Shibhannolanje jubhann'omilenje lipanga jula." 38 Gakapiteje genego, a Yoshepu bha ku Aimataya, gubhaajujile a Pilato bhatole shiilu sha a Yesu. A Yoshepu pubhaliji bhaajiganywa bha a Yesu, ikabheje kwa nng'iyoy, pabha bhatendaga kwaajogopanga ashikalongolele bha Shiyaudi. Bhai, a Pilato gubhajitishiye. Kwa nneyo a Yoshepu gubhapite shoya shiilu sha a Yesu. 39 Na bhalabho a Nikodemo bhene bhaajendele a Yesu shilo gwa nntai bhala, gubhapite na a Yoshepu bhali bhajigele mauta ga nunjila, gaengeriywe na manemane na lubhani kilo makumi gatatu. 40 Bhai, gubhatolilenje shiilu sha a Yesu shila, gubhaijililenje shanda shambone sha katani bhali bhatajilenje mauta malinga pugwaliji nkubho gwa Bhayaudi nkushika. 41 Pubhabhambilwe munshalabha a Yesu pala, jashinkupagwa bhushitani na nkati jakwe lyashinkupagwa likabhuli lya ambi likanabhe shikwa mundu jojowe. 42 Pabha Bhayaudi pubhalinginji nkukolokoya ga Lyubha lya Pumulila, na likabhuliyoy pulyaaliji pa tome, bhai gubhaabhishilenje a Yesu mwenemo.

20 Lyambape Jumapili kuli na lubhinda a Malia Magidalena gubhapite kulikabhuli, gubhaiibhweni liganga lila lishoshiywe pannango gwa likabhuli. 2 Bhai, gubhabhujile lubhilo kubhaaliji a Shimoni Petili na bhaajiganywa bhaanonyelaga a Yesu bhala, nikwaabhalanjilanga, "Bhashikwaashoyanga Bhakulungwa nnikabhuli mula, wala tukakukumanya kubhaabhishilenje." 3 Bhai a Petili na nkujiganywa juna jula, gubhapitengene kulikabhuli. 4 Gubhapitengene lubhilo bhowe bhanabhili, ikabheje nkujiganywa juna jula ashinkubhutuka kwaapunda a Petili, gwalongolele kuika kulikabhuli. 5 Gwakotime kulumila nnikabhuli, gwajibhweni shanda, ikabheje jwangajinjila nkati. 6 Bhai gubhaishe na a Shimoni Petili, gubhajinjile nnikabhuli, mwenemo gubhajibhweni shanda, 7 na shitaamba shibhaijiliwe a Yesu kuntwe. Shene shitaambaasho shikaliji pamo na shanda jila, ikabhe shashinkuligwa kunyenje pa jikape. 8 Kungai bhaajiganywa bhalongolele kuika kulikabhuli bhala, na bhalabho gubhajinjile nkati, gubhalolile nigubhakulupalile. 9 Pabha bhakagamanyanjinji Majandiko ga Ukonjelo gatayaga kuti, yashinkupinjikwa a Yesu bhawaga, bhayushe. 10 Bhai, bhaajiganywa bhala gubhabhujengeneneje kwenda kunngwabhonji. 11 Ikabheje a Malia Magidalena pubhajimi palanga likabhuli, bhaliiguta. Akuno bhali nkuguta gubhakotime kulumila nnikabhuli, 12 gubhaabhweninji ashimalaika bhabhili bhawetenje nngubho yanawe, bhali bhatemingenene pubhagoneshwe a Yesu pala, jumo kugwaloshiye nntwe na juna kugaliji makongono. 13 Ashimalaika bhala,

bhakwaabhuyangaga, “Mama, pakuti nnguta?” Bhalabho gubhaajangwilenje, “Pabha bhashikwaashoyanga Bhakulungwa bhangu na wala ngakukumanya kubhaabhishilenje!” 14 Bhakabheleketeteje genego gubhatendebhwishe nnyuma, gubhaabhweni a Yesu bhajimi, ikabheje bhangaamanya kuti ni a Yesu. 15 A Yesu bhakwaabhuyaga, “A Mama, kwa ndi nnguta? Junkunoleya gani?” A Malia bhaliganishiya kuti pana bhaalima bhushitani, gubhaalugulile, “Mmakulungwa, monaga mmwe mwaatolile, mmalanjile kumwaabhishile, ngaatole.” 16 A Yesu gubhaalugulile, “A Malia Magidalena!” Nabalabho a Yesu gubhatendebhwishe, gubhaalugulile kwa Shiebulania, “Labhoni!” Malombolelo gakwe, “Mmaaiganyu.” 17 A Yesu gubhaalugulile, “Nngamule, pabha nganabhekweni kwa Atati. Ikabheje nngende kwa ashaalongo ajangu nkaabhalanjilanje, ngunakwenda kwa Atati bhali Ainabhenunji na mmanganyanji, na a Nnungu bhangu bhali na mmanganyanji a Nnungu bhenuji.” 18 Kwa nneyo a Malia Magidalena, gubhapite kwaabhalanjilanga bhaajiganyu bhala ngani ja kuti, naabhweni Bhakulungwa na kuti bhashilugulile gene gowege. 19 Bhai puyaliji ligulo lya Jumapili, bhaajiganyu bha a Yesu pubhalinginji pamo nnyumba, akuno bhagelenje milango nkwaajogopanga Bhayaudi. Bhai, gubhakoposhele a Yesu gubhajimi pakati jabhoni, gubhaalugulilenje, “Ulele ubhe na mmanganyanji!” 20 Bhakabheleketeteje genego, gubhaalangwiyenje makono gabho na lubhalati lwabho. Bhai, bhaajiganyu bhala gubhainonyelenje ga kwaabhona Bhakulungwa. 21 Bhai a Yesu gubhaabhanjilenje kabhili, “Ulele ubhe na mmanganyanji! Malinga nne shibhandumile Atati, na nne ngunakuntumanga mmanganyanji.” 22 Bhakabheleketeteje genego, gubhaapepetelenje bhalinkuti, “Mposhelanje Mbumu jwa Ukonjelo. 23 Mwaaleshelelangaga bhandunji yambi yabhoni, shibhaleshelelwanje, nkaaleshelelanje bhakaleshelelwanga.” 24 Ikabheje a Tomashi bhama munkumbi gwa bhaajiganyu likumi limo na bhabhili bhala, bhashemwaga bhammba, bhakapaliji malanga gubhaishe a Yesu. 25 Bhai bhaajiganyu bhananji bhala gubhaalugulilenje, “Twaabhweni Bhakulungwa.” A Tomashi gubhashite, “Nne ngakulupalila kuti bhayushile, ngagabhona mabhabhule ga mishumali jibhakomelwe mmakono gabho na nyinjnye ngowe yangu mmbalati mubhaomilwe lipanga.” 26 Bhai, lyubha lya nane, bhaajiganyu bhala pubhalinginji pamo kabhili nnyumba mula, na bhalabho a Tomashi bhaapali. Milango jili jigelwe, ikabheje a Yesu gubhaishe, gubhajimi pakati pakati jabhoni, gubhashite, “Ulele ubhe na mmanganyanji!” 27 Kungai gubhaalugulile a Tomashi, “Nnjenasho shikowe shenu ntomaye mmakono gangu, nnjenago na nkono gwenu mmishe mmbalati yangu. Nnabhe mundu jwangakulupalila, ikabhe nkulupalile!” 28 A Tomashi gubhaajangwile, “Mmakulungwa bhangu na a Nnungu bhangu!” 29 A Yesu gubhaabhalanjile, “Nkulupalile kuti nyushile, pabha mmweni. Mbaya bhaakulupalilanga gwangali kwiibhona.” 30 Bhai ipali ilangulo yaigwinji ibhatendile a Yesu pubhaliji na bhaajiganyu bhabho yangajandikwa nshitabhumuno. 31 Ikabheje yenei ishijandikwa Mmajandiko ga Ukonjelo kuti, nkupinga nkulupalilanje kuti a Yesu ni a Kilishitu, Mwana jwa a Nnungu, na nkulupalilangaga nkolanje gumi kwa mashili ga lina lyabho.

21 Gakapiteje genego, a Yesu gubhaakoposhelenje kabhili bhaajiganyu bhabho kunyenje litanda lya Tibheliya, puyaliji nnei. 2 A Shimoni Petili na a Tomashi bhashemwaga Bhammba na a Natanaeli bha ku Kana ja Galilaya na bhana bhabhili bha a Shebhedayo na bhaajiganyu bhabho bhananji bhabhili, bhowe pubhalinginji pamo. 3 A Shimoni Petili gubhaalugulilenje ajabhoni, “Ngunakwenda kutanda yamaki.” Nabhalabhoni gubhaajangwilenje, “Na uwe shitunkagule.” Bhai, gubhajabhweni, gubhakwelilenje muntumbwi, ikabheje shene shiloshi bhanganpatanga shindu. 4 Lyambape, a Yesu gubhajimi nnyenje litanda, ikabheje bhaajiganyu bhangaamanyanga kuti bhenabho a Yesu. 5 Bhai, a Yesu gubhaabhushiyenje, “Ashibhanangu, mpatilenje shamaki jojowe?” Gubhaajangwilenje, “Nng’oo.” 6 A Yesu gubhaalugulilenje, “Ntejelanje lyau lyenunji nkono nnilo gwa ntumbwi gwenunji shimpatanje yamaki.” Bhai gubhatejelenje lyau lyabhoni, ikabheje gubhalepelenje kuuta kabhili kwa ligongo lya shuluka yamaki. 7 Bhai nkujiganyu apingwaga na a Yesu jula, gwabhabhalanjile a Petili, “Bhenebha Bhakulungwa!” A Shimoni Petili bhakapilikaneje kuti Bhakulungwa, gubhaitabhile nngubho jabho pabha bhakaweteje ukoto, gubhaitumbushiye mmashi. 8 Ikabheje bhaajiganyu bhananji bhala gubhabhujilengene kunyenje litanda na ntumbwi gula, akuno bhaliutanga lyau ligumbele yamaki, pabha yaliji tome kulitaka, pubhalinginji malinga meta makumi kumi kukoposhela kunyenje litanda. 9 Bhai bhakaikanjeje kulitaka, gubhagubhweninji moto gwa makala na pantundu jakwe ilijokwa yamaki na nkate. 10 A Yesu gubhaalugulilenje, “Nnianayonji yamaki ishoko intandilenje.” 11 Bhai, a Shimoni Petili gubhakweile muntumbwi mula, gubhautile lyau lila mpaka kulitaka, ligumbele yamaki yaikulungwa makumi kumi na nng’ano na itatu. Nkali yashulwishe nneyoyo, lyau lila lyangapapuka. 12 A Yesu gubhaabhalanjilenje, “Nnnyangane kunnabhukanje.” Jwakwa nkali jumo alinjile kwaabhuya, “Mmwe agani?” Pabha bhaamanyinji kuti Bhakulungwa. 13 A Yesu gubhaishe, gubhatolile nkate, gubhaapelenje, gubhatendile nneyo peyo na yamaki ila. 14 Gwenu pugwaliji gwatatu a Yesu kwilanguya ku bhaajiganyu bhabho bhakayusheje. 15 Kungai bhakalyanganjeje, a Yesu bhakwaabhuyaga a Shimoni Petili, “A Shimoni, bhanabhabho a Yowana! Bhuli, nnimbinga nne kupunda bhanganyanjibha?” Nabhalabho gubhaajangwile, “Elo, Mmakulungwa, mmumanyi kuti nne ngulikumpinga.” A Yesu gubhaabhalanjile, “Nniye ngondolo yangu.” 16 A Yesu gubhaabhalanjile gwabhili, “A Shimoni, bhanabhabho a Yowana! Bhuli, nnimbinga?” A Petili gubhaajangwile, “Elo, Mmakulungwa, mmumanyi kuti nne ngulikumpinga.” A Yesu gubhaabhalanjile, “Nshunje ngondolo yangu.” 17 A Yesu bhakwaabhuyaga a Petili gwatatu, “A Shimoni, bhanabhabho a Yowana! Bhuli nnimbinga?” Penepo a Petili gubhainjise pabha bhashinkubhuywa gwatatu kuti, “Nnimbinga?” Gubhaajangwile, “Mmakulungwa, mmwe nngamanyi gowe, mmumanyi kuti nne ngulikumpinga.” A Yesu gubhaabhalanjile, “Nniye ngondolo yangu!” 18 Gubhashite, “Kweli ngunakummalanjila, pumwaliji mmashanda mwayobhelele kwitabha nshipi gwenu nikwenda kokowe kunkupinga. Ikabheje pushinkongopale shinngoloye makono genu, na mundu juna shantabhe nikumpeleka kunkaapinga

kwenda.” 19 Kwa bheleketa nneyo, bhashinkulanguya shanabhuli a Petili pushibhawe nikwaakuya a Nnungu. Kungai gubhabhaalanjile, “Nngagule.” 20 A Petili gubhatendebhwishe, gubhaabhweni bhaajiganywa bhapinjilwe na a Yesu bhala bhalikagula. Bhene bhaajiganywabha nibhaatemi tome na a Yesu bhalilyanganga shalya, nikwaabhuya, “Mmakulungwa gani apinga kuntendebhuka?” 21 Bhai, a Petili bhakaabhoneje bhaajiganywabho, bhakwaabhuyaga a Yesu, “Mmakulungwa na abha bhuli?” 22 A Yesu gubhaajangwile, “Monaga nne ngunapinga bhenebha bhanawe mpaka pushimuje, mmwe nkupinjila ndi? Mmwe nngagule nne.” 23 Bhai, jene nganijo gujishumile munkumbi gwabhonji mula, kuti bhene bhaajiganywabho bhakawa. Ikabheje a Yesu bhaangalugulila kuti bhaajiganywabho bhakawa, ikabhe, “Mbingaga bhenebha bhanawe, mmwe nkupinjila ndi?” 24 Bhenebha ni bhaajiganywa bhakong'ondele yenei nikwijandika. Na uwe tumumanyi kuti gubhabhelekete gala ga kweli. 25 Ipali indu ina yaigwinji ibhatendile a Yesu, monaga ikajandikwe yowe shimo shimo, punguganishiya kuti, nkali shilambolyo shikanatoshe kwa itabhu yowe ikajandikwe.

Itendi

1 Apwanga a Teopili, nshitabhu shangu sha ntai najandishe indu yowe ibhatendile a Yeshu na jiganya kuumila kundandubho ja liengo lyabho, 2 mpaka lyene lyubha libhatoliwe kwenda kunani kunnungu lila. Bhakanabhe tolwa kwenda kunnungu bhashinkwaalajiyanga mitume bhubhaagwilenje bhala kwa mashili gaka Mbumu jwa Ukonjelo. 3 Kwa mobha makumi nsheshe bhakaweje, bhashinkwilangula papagwinji kubhaajiganywa bhabho. Bhatendaga kwaabhonanga a Yeshu na bhalabho bhatendaga kungulushila ga Ukulungwa gwa a Nnungu. 4 A Yeshu bhakaimaneje na bhaajiganywa bhabho gubhaamulishenje nnei, “Nnajabhulangane pa Yelushalemu, ikabhe nindililanjje miadi a Atati, gunammalanjilenje gala. 5 A Yowana pubhabhatisheshe kwa masihi, ikabheje mmanganya shimmatishwanje kwa Mbumu jwa Ukonjelo mobha gashoko gakwiyago.” 6 Bhai, mitume bhakaimananeje pamo na a Yeshu gubhaabhushiyenje, “Bhuli Mmakulungwa, nnaino punkupinga kwaabhujishiyanga upalume bha Ishilaeli?” 7 Ikabheje a Yeshu gubhaabhalanjilenje, “Mobha na miongwe ja genego mugali mmakono ga Atati, na wala nngabha liengo lyenunji kumumanya kuti shiibhe shakani. 8 Ikabheje Mbumu jwa Ukonjelo pashantulushilanjepo shimpatanje mashili na shimmanganje mmakong'ondela bhangu nshilambo sha Yelushalemu na ku Yudea na ku Shamalia, mpaka kumpelo gwa shilambolyo.” 9 Bhakabheleketeteje genego, a Yeshu gubhatoliwe kwenda kunnungu akuno bhalikwaalolesheyanga, liunde likwaunishilaga bhangaabhonanga kabhili. 10 Bhalinginji nkulolesheya kunani, bhalabho bhalikwijendela, shangupe bhandunji bhabhili bhawetenje nngubho yanawe gubhajimnngene patome jabhorji, 11 gubhashitenje, “Mmganganya mmandunji mma ku Galilaya, pakuti nshijimanganana akuno nnilolanga kunani? A Yeshu bhatoliwe kungwenunji kwenda kunnungu, shibhajiye kabhili nneyo peyo malinga shimwabheninji bhalikwenda kunnungu.” 12 Kungai bhantenga gubhabhujilenje ku Yelushalemu kukopoka kushitumbi shishemwa Shitumbi sha Misheituni, kutalika kwakwe mbuti mwanja gwa kilomita jimo. 13 Bhakaikanganeje kunnjini gubhakwelilenje ku golopa kukati jibhaimanangaga, pubhalinginji a Petili na a Yowana na a Yakobho na a Ndeleya na a Pilipi na a Tomashi na a Bhatolomeyo na a Matei na a Yakobho bhanabhabho a Alupayo na a Shimoni Shelote na a Yuda bhanabhabho a Yakobho. 14 Bhowe bhatendaga imananga kwa ntima gumo mobha gowe nkujaga Nnungu, bhashinkupagwanga bhanabhakongwe na a Malia anyinabhabho a Yeshu na ashaapwabho. 15 Lyubha limo a Petili bhashinkujima pa lugwinjili lwa bhaakulupailanga bha a Yeshu, pubhalinginji bhandunji ishila makumi kumi na gabhili, 16 gubhashite, “Ashaapwanga, ishinkupinjikwa gene Majandiko ga Ukonjelo gamalile, gabheleketete Mbumu jwa Ukonjelo, kwa kang'wa ja a Daudi, ashinkulondola ga a Yuda bhaalongolelenje bhandu kukwaakamula a Yeshu. 17 Pabha a Yuda bhashinkuagulwa kubha bhantenga pamo na uwe, kwa nneyo pubhaliji munkumbi gwetu.” 18 Nng'itu gwaumilwe kwa mmbiya yapatikene kwa shitendi shabho shangali sha mmbone, gubhagwile pai,

nitumbuka lipitiu na matumbo nikushuka pala. 19 Bhandu bhowe pa Yelushalemu gubhapilikenenje ga nshibha gwa a Yuda, kwa nneyo gwene nng'itu gula kwa luga jabhorji pubhashemilenje Akelidama, malombolelo gakwe, “Nng'itu gwa Minyai.” 20 “Pabha, ishijandikwa nshitabhu sha Shabhuli, ‘Jaliji ndamo jabho jiyushe liame, mundu jojowe anatame penepo.’ Na kabhili ishijandikwa. ‘Mundu juna atole shitengu shabho sha liengo.’ 21 Bhai, mundu jumo munkumbi gwa bhalonganangaga na uwe mobha gowe gutwaowaga na a Yeshu tunng'agule ailunde nnikundi lyetu. 22 Puipinjikwa jwenejo abhe alonganaga na uwe kutandubhila mobha gubhabhatishaga a Yowana, mpaka lyubha libhatoliwe a Yeshu kwenda kunnungu. Jwenejo shakamule liengo na uwe lyapita kong'ondela kuyuka kwa a Yeshu.” 23 Penepo, gubhalugulenje mena ga bhandu bhabhili, jwantai kulugulwa Yoshepu ashemwaga Bhalishabha eu Yushitushi, na jwabhili Matiasi. 24 Kungai gubhajujilenje Nnungu bhalinkutinji, “Mmakulungwa, mmwe njimanyi mitima ja bhandu bhowe. Kwa nneyo ntulanguye katika bhene bhabhilibha jwei jumunng'agwile, 25 akamule liengo libhalepele a Yuda nikwenda kubhapijile bhayene.” 26 Gubhatendilenje shikoma, gushaagwile a Matiasi, gubhabhishilwe munkumbi gwa mitume likumi limo na jumo bhala.

2 Likaishileje lyubha lya Shikukuu sha Mauno shishemwa Pentekoshite, bhaakulupailanga bhowe bha a Yeshu bhashinkuimananga pamo. 2 Shangupe mpugo kukopoka kunani kunnungu, gwa mbuti shitutu shikugumbalaga nnyumba mubhalinginji mula. 3 Kungai, gwikoposhele indu mbuti malamba ga moto, gakugabhanyikaga nikuntulila kila mundu. 4 Gubhagumbeywenjwe Mbumu jwa Ukonjelo, gubhatandwibhenje kubheleketanga kwa luga inape malinga Mbumu shabhalongoyangaga kubheleketanga. 5 Ku Yelushalemu bhashinkupagwanga Bhayaudi, bhaakulupailanga malajilo ga a Nnungu, kukoposhela mmbali yowe ya shilambolyo. 6 Bhandunji bhala bhakapilikananje gwene mpugogo gubhaloposhelenje. Bhowe gubhaimukenje pabha kila mundu ashinkwaapilikanganaga bhalibheleketanga kwa luga jakwe nnyene. 7 Gubhakanganigwenje na kuimonga bhalinkutinji, “Abha bhowe bhutukwaapilikanganaga bhalibheleketanga nnei bha, nngabha bhashilambo bha ku Galilaya? 8 Igala itendile bhuli, pakuti tunakwaapilikanganaga bhalibheleketanga kwa luga yetu twaashaayene? 9 Tubhana tu Bhapati, na Bhamede, na Bhaelamia, na bhananji bhashilambo bha ku Meshopotamia, na ku Yudea, na ku Kapadokia, na ku Ponto, na ku Ashia. 10 Ku Piligia, na ku Pampilia, na ku Mishili, na mmbali ja ku Libhiya tome na ku Kilene, ashaajetunji bhananji Bhaloma. 11 Bhaalabhu na bhandunji bhajinjilengene dini ja Shiyaudi, bhana bhakoposhelenje ku Kilete na ku Alabha. Tubhowe tunaapilikana bhalibheleketanga kwa luga yetu indu ikulungwa ya a Nnungu.” 12 Bhowe gubhakanganigwenje na tenguka akuno bhalibhuyananga, “Yenei malombolelo gakwe nndi?” 13 Ikabheje bhananji gubhatendilenje mbenji bhalinkutinji, “Bhashikolelwanga!” 14 Ikabheje a Petili gubhajimi pamo na likumi limo na jumo bhala, gubhatandwibhe kwaalugulilanga bhandunji kwa lilibhe lya utiya bhalinkuti, “Ashaapwanga, bha

ku Yudea na mmowe nkutamangananga pa Yelushalemu pano, mpilikanishayanje ukoto malobhe gangu. **15** Abha bhandunji bha bhangakolelwanga malinga shinkuganishiyanga, pabha nnaino shaa tatu ja lyamba. **16** Ikabheje genega ni gubhabheleketete ankulondola bha a Nnungu a Yoweli gala, **17** 'Shiibhe ku mobha ga kumpelo, a Nnungu bhakuti, ngupinga kwaagumbayanga bhandu bhowe Mbumu jwangu. Ashibhana bhenunji bhanabhalume na bhanabhakongwe shibhalondolanje, bhangwendo bhenunji shibhalanguyanje ilangulo, na bhanangulungwa bhenunji shibhaagamilanje. **18** Elo, gene mobhago bhatumishi bhangu bhanabhalume na bhanabhakongwe, shinaagumbayanje Mbumu jwangu, nabhalabhonji shibhalondolanje. **19** Shindende ilapo kunani kunnungu, na ilangulo pa shilambolyo, shikubhe na minyai na moto na lyoi, **20** Lyubha shilitendebhushe nibha lubhindu, na mwei upinga shejela mbuti minyai, likanabhe ishila lyubha likulu lya ukonjelo lya Bhakulungwa. **21** Penepo, shaajuje kwa lina lya Bhakulungwa, shaatapulwe.' **22** "Mmashilambo bha pa Ishilaeli, mpilikananje agano malobhe gano! A Yeshu Bhanashaleti bhashinkukong'ondelwa kunnungwenunji kwa itendi ya ilapo, na ilangulo ibhatendaga a Nnungu kwa nkono gwabho, malinga shimumanyinji. **23** Kutolelela na shibhapanji bhayene a Nnungu na bhamumanyi kuti, mmanganya shimwaakamulanje na kwaabbulaga kwa kwaaleshelanga bhandunji bhagali bha mmbone bhaakomelanje munshalabha. **24** Ikabheje a Nnungu gubhaayushiye, gubhatapulwe kumboteko ya shiwo pabha ikanatendeshe shiwo shaakamule. **25** Pabha a Daudi bhahheleketete ga ngani jabho kuti, 'Naabhonaga Bhakulungwa mmujo jangu mobha gowe, pabha kubhali kunkono gwangu gwa nnilo, bhai ngatenganyika. **26** Kwa nneyo, ntima gwangu gwashinkwiinonyela, na kabhili nashinkululuta nkwiinonyela. Namwene shindame nngulupai, **27** Pabha nkaileka mbumu yangu ijende kundamo ja bhawilenje, wala nkaneka jwa Ukonjelo jwenu abhole. (Hadēs g86) **28** Nshinangula mipanda ja gumi, bhai shiniinonyele pabha mpali.' **29** "Ashaalongo ajangu, ngunapinga nimmalarjilanje gwangali nng'yo gaapatile anakulubhetu a Daudi. Bhalabho bhawile na gubhashishilwe, na kabhili likabhuli lyabho launo pulili panngwetu pepano. **30** Ikabheje, a Daudi pubhaliji ankulondola bha a Nnungu, bhamumanyi kuti a Nnungu bhaabhalanjile kwa lumbila kuti shibhannjimise jumo nnuhheleko lwabho kubha nkulungwa pandamo jabho. **31** A Daudi bhagabhweni gubhapinga tenda a Nnungu, kwa nneyo gubhabheleketete ga yuka kwa a Kilishitu bhalinkuti, 'Bhangalekwa kundamo ja bhawilenje na wala maiti gabho gangabhola.' (Hadēs g86) **32** A Nnungu bhashinkwayuya a Yeshu na uwe ni tubhakong'ondela bha genego. **33** A Yeshu bhakakweyewe na bhikwa kunkono nnilo gwa a Nnungu, gubhagewilwe Mbumu jwa Ukonjelo jubhalajile jula, na nnaino bhatugumbeye shene shinkushibhonanga na kushipiilikana shino. **34** Pabha a Daudi bhayene bhangakwela kwenda kunani kunnungu, nigubhashite nnei, 'Bhakulungwa bhaaluguliile Bhakulungwa bhangu, Ntame kunkono nnilo gwangu, **35** Mpaka pushinaabhikanje ashaamagongo ajenu pa libhatila makongono genu.' **36** "Kwa nneyo, bhandu bhowe bha pa Ishilaeli bhanapinjikwanga bhamumanyanje kuti a Yeshu bhumwaakomelanje munshalabha bhala, a Nnungu

bhashikwaatenda kubha Bhakulungwa na a Kilishitu." **37** Bhandu bhakapilinanjeje genego, guypotekenje mmitima jabhonji, gubhaabhushiyenje a Petili na mitume bhananji bhala. "Ashaalongo ajetu, igala tutende bhuli?" **38** A Petili gubhajangwile, "Kila mundu aipete na abhatishwe kwa lina lya a Yeshu Kilishitu, malombolelo gakwe mundu aagwilwe na a Nnungu, nkupinga nneshelelwanje ilebho yenunji na shimposhelanje upo Mbumu jwa Ukonjelo alajilwe jula. **39** Pabha malagano gala pugaaliji kwa ligongo lyenu mmanganya na ashibhana bhenu, na bhowe bhaatamangana katalishe na kwa kila mundu shashemwa na Bhakulungwa a Nnungu bhetu." **40** Na kwa malobhe gana gamagwinji, a Petili bhakwaaleyangaga na kwaashondelesheyanga bhandunji bhalinkuti, "Mwiitapanje na lubheleko lwangali lwambonelu." **41** Bhabhagwinji gubhakulupailenje malobhe gabho, nigubhabhatishwenje. Na lyene lyubhalyo bhandunji kuishila elupu tatu gubhagenjesheshenje nnikundi mula. **42** Bhene bhowebho gubhapundilenje kujiganywa na mitume, akuno bhalitamangana shiulongo na lyanganga shalya pamo na juga Nnungu. **43** Mitume bhashinkutendaga ilapo na ilangulo yaigwinji, mpaka kila mundu shijogopele. **44** Bhaakulupalila bhowe gubhapundilenje kubha shindu shimo, akuno bhalikundikanilananga indu yabhonji. **45** Bhatendaga ushanga indu yabhonji nigabhana ela kila mundu nipegwa malinga shiyapinjikwaga. **46** Gubhapundilenje kuimana kila lyubha Nliekalu. Bhatendaga imana mmajumba gabhonji niyanganga shalya nyumba na nyumba kwa mitima ja kwiitimalika. **47** Bhatendaga kwaakuyanga a Nnungu na pingwanga na bhandu bhowe. Kila lyubha Bhakulungwa bhatendaga jenesheya bhandu bhatapulwangaga.

3 Lyubha limo, shaa tisha ja ligulo, malanga ga juga Nnungu, a Petili na a Yowana bhatendaga kwendangana ku Likanisha. **2** Gene mobhago bhandunji bhatendaga kunnigalanga mundu jumo aaliji nangwabha shibhelekwete. Kila lyubha bhatendaga kummikanga nangwabha jula pa nnango gwa Likanisha ushemwa "Nnango Gwakonja," nkupinga ajiye shoshowe kubhandu bhajinjilangaga Nliekalu. **3** Akaabhonanje a Petili na a Yowana bhalijinjilanga Nliekalu, gwabhajujilenje bhannjanguutilanje shindu shoshowe. **4** A Petili na a Yowana gubhannolilenje ku meyo, a Petili gubhashite, "Tulole oti uwe." **5** Na jwalakwe gwabhalolilenje alilolela kujanguutilwa shindu. **6** Ikabheje a Petili gubhammalanjile, "Nangali ela wala shaabhu, ikabheje shingwete nne, shinukupe. Kwa mashili ga lina lya a Yeshu Kilishitu Bhanashaleti, jima ujendende!" **7** Gubhankamwile nkono gwa kunnilo, gubhannjijwile. Popo pepo makongono na iukuuku ikukolaga mashili. **8** Shangupe gwajimi, gwatandwibhe kujendajenda. Gwalongene nabhonji kujinjila ku Likanisha aliumbaumba na kwaakuya a Nnungu. **9** Bhandunji bhowe bhapalinji pepala gubhammweninji alijimajima alikwaakuya a Nnungu. **10** Bhakammanyanjeje kuti jweneju atamaga na juga pa Nnango Gwakonja, gwa Likanisha, gubhakanganigwenje kwa kaje, bhanagamanyanje gampatile. **11** Bhandunji bhowe, bhali bhakanganigwenje, gubhatandubhenje kubhutushila kulukumbi lwashemwaga, "Lukumbi Iwa a Shelemani," pabha kweneko

ni kwaliji mundu aliji nangwabha jula ali alongene na a Petili na a Yowana. 12 Bhai, a Petili bhakaabhonanjenje bhandunji bhala gubhaalugulilenje, "Mmanganya mma Ishilaeli, kwa nndi nnakanganigwanga na genega? Pakuti nnakutukolondosheyanga meyo mbuti kwa mashili getu eu kwa uguja gwetu tuntendile akombole kujendajenda? 13 A Nnungu bha ashainabhetu a Bhulaimu na a Ishaka na a Yakobho, bhashikwaakuya bhatumishi bhahho a Yeshu. Bhene bhumwaakanilenje na kwaakamuya kwa a Pilato bhahulagwe, nkali a Pilato bhaamulishe kuti bhaleshelelwe. 14 Ikabheje mmanganyanji mwashinkwaakanga bhaaliji bha Ukonjelo na bhanguja, nipinga agopolwe mundu juna aaliji mmulaga bhandu. 15 Bhai, gumwaabhulegenje bhene bhali shiumilo sha gumi bhala. Ikabheje a Nnungu bhakwayuyaga, na uwe ni tubhakong'ondela bha genega pugatendeshe. 16 Ngulupai jetu na mashili ga lina Iya a Yeshu gashinkumpa mashili na kunnamyia aju mundu junkummonanga na kumanya, malinga mmowe shinkuti kummonangashi. 17 "Lelo ashaalongo ajangu, mmumanyinji kuti mmanganya na bhanangulungwa bhenuji mwashinkutendanga nneyo pabha nkamumanyangaga. 18 Ikabheje genega gamalile, gubhalunguyaga a Nnungu kwa malobhe ga ashinkulondola bhahho bhowe, kuti inapinjikwa a Kilishitu bhahho bhapotekwe. 19 Bhai, mwipetanje, mwabhujilanje a Nnungu bhanneshelelanje ilebho yenuji, 20 ntendanje nneyo, Bhakulungwa bhampanganje kuangalala mmitima jenuji na bhampeleshelanje a Kilishitu bhuhhaagwile bhayene yani a Yeshu. 21 Ishipinjikwa bhenebho bhaigale kunnungu peko mpaka gaishile mobha ga alaya ukoto indu yowe, malinga shibhashite lugula a Nnungu kwa malobhe ga ashinkulondola bhahho bha Ukonjelo kuumila bhukala. (aiōn g165) 22 Pabha a Musha bhaashite, 'Bhakulungwa a Nnungu bhenuji shibhampeshelelanje nkulondola jwabho jwa malinga nne kukoposhela munkumbi gwenunji, mumpilikanishyanje jwenejo kwa yowe yashammalanjilanje. 23 Na jowowe shakane kumpilikanishiya jwene nkulondola jwa a Nnungujo, shabhingwe na bhandunji bha a Nnungu na bhulagwa.' 24 "Ashinkulondola bha a Nnungu bhowe, tandubhila a Shamweli na bhowe bhaakagulenje, bhatendaga lunguyanga ngani ja indu itendeka nnainoi. 25 Gene malagano gubhatendile a Nnungu kwa malobhe ga ashinkulondola bhahho gala ni genunji mmanganya, nninginji mmalagano gubhatendile a Nnungu na ashi nakulubhenuji, malinga shibhaabhalanjile a Bhulaimu, 'Nnubheleko lwenu, bhandunji bhowe bha pashilambolyo shibhapokanje.' 26 Bhai, a Nnungu bhashikwaakuya bhatumishi bhahho a Yeshu, nkupinga mmanganya ntandubhanje kupwaika, pabha bhashinkwatuma kwenu mmanganya oti, bhampeleshelanje mboka kwa kuntenda ali jowe munkumbi gwenunji aleshe ilebho."

4 A Petili na a Yowana bhalinginji nkwaalungushiyanga bhandunji, gubhaikengenene bhakulungwanji bha bhaabhisila na bhakulungwanji bha ulinda gwa liekalu na ashi Mashadukayo. 2 Ashi Mashadukayo na bha kulungwanji bha ulinda gubhaatumbalilenje kwa kaje a Petili na a Yowana, pabha bhatendanga kwajiganyanga na kwaalungushiyanga bhandunji ga yuka kwa a Yeshu ngani jitaya kuti kupali kuyuka kwa bhawilenje. 3 Bhai, gubhaakamulenje na pabha yaliji tome na

pilila, gubhaabhisilenje muulinda mpaka pa malabhi gakwe. 4 Ikabheje bhahagwinji bhapiikenenje jene nganijo gubhakulupalienje, bhaakulupalila bhanabhalume gubhaishilenje tome na ishila elupu nng'ano. 5 Pa malabhi gakwe, ashikalongolele bha Shiyaudi, na bhanangulungwa na bhaajiganya bha malajilo ga a Musha gubhapegwilwe na a Nnungu, gubhaimenenje ku Yelushalemu. 6 Gubhaimenenje pamo na bhakulungwa bha bhaabhisila a Anashi, na a Kayapa, na a Yowana, na a Alekishanda, na bhananji bhalinginji bha ulongo bha bhakulungwa bha bhaabhisila. 7 Bhakaajimikanenje bhantenga bhala mmujo jabhonji, gubhaabhushiyenje, "Mmanganya nshitendanga yenei kwa mashili gakeni na antumilenje gani?" 8 Penepo, a Petili bhali bhagumbelwe na Mbumu jwa Ukonjelo, gubhaalugulilenje, "Mmanganya ashikalongolele na bhanangulungwa bha pa Ishilaeli! 9 Ibhaga lelo tubhuywanga ga shitendi sha mmbone shatendelwe mundu aaliji nangwabha jula shashite lamiywa, 10 bhai, mmanganya na bhandu bhowe bha pa Ishilaeli nnapinjikwanga mmumanyanji kuti, aju munduju akunnjimilanga lelo ali alamile kwa mashili ga lina Iya a Yeshu Kilishitu Bhanashaleti bhumwaakomelenje munshalabha bhala, ikabheje a Nnungu gubhaayushiye. 11 Bhenebha ni bhatashiywe Mmajandiko ga Ukonjelo kuti. 'Liganga limwalikanilenje mmanganya mmashenganga, nnaino lishibha liganga likulu Iya pandumba.' 12 Ntapulo ukaapatikana kuka mundu juna jowowe, pabha pashilambolyo, twangapegwa lina lika mundu juna Iya kututapula." 13 Bhanangulungwa bha lukumbi bhala, akuno bhali bhamumanyinji kuti a Petili na a Yowana bhandupe bhangashomanga, gubhakanganigwenje ga kwaabhonanga bhalibheleketanga gwangali bhoga. Gubhamumanyinji kuti pubhalinginji pamo na a Yeshu. 14 Ikabheje bhakammonanjenje mundu alamiywe jula ajimi nabhonji, bhagabheleketanga shindu. 15 Kwa nneyo, gubhaamulishenje bhakopokanje nnukumbi mula, gubhalepekenje ashaayenenji bhalkungulukanga. 16 Gubhabhuyenenje, "Twaatendanje nndi bhene bhandunjibha? Pabha kila mundu atama pa Yelushalemu pano amumanyi kuti shishitendeka shilapo na uwe tukakombola kutauka shenesho. 17 Ikabheje nkupinga kuibhila shene shindushi shinapunde kushama kubhandu, twaaleyanje bhakungulukanga na mundu jowowe ga lina Iya a Yeshu." 18 Kwa nneyo gubhaashemilenje kabhili nkati, gubhaalimbiyenje bhakungulukanga pa lugwinji na wala bhanaajiganyanji bhandu ga mashili ga a Yeshu. 19 Ikabheje a Petili na a Yowana gubhaajangwilenje. "Nng'ukumulanje mwaashayenenji, shammbone shei, kumpilikanishiyanje mmanganya eu kwaapilikanishiya a Nnungu? 20 Pabha uwe tukaleka bheleketa ga ituibhweni na ituiplikene." 21 Bhai bhanangulungwa bha lukumbi bhala gubhaakalipilenje kwa kaje, kungai gubhaaleshelelenje. Bhangaakumulanga pabha bhandunji bhowe bhatendaga kwaakuyanga a Nnungu kwa ligongo Iya gakoposhele gala. 22 Mundu alamiywe jula paaliji jwa yaka ya punda makumi nsheshe. 23 A Petili na a Yowana shangupe bhakaleshelelwanjenje, gubhapitengenene kwa bhaakulupalila ajabhonji, gubhaatalashiyenje yowe ibhabhalanjilwenje na bhakulungwanji bha bhaabhisila na bhanangulungwa. 24 Bhalabhonji bhakapiikananjenje genego, gubhatemingenene

pamo nikwaajuga a Nnugu bhalinkutinj, "Mmakulungwa, mmwe mpengeny shilambolyo na bhaali na yowe ili nkati jakwe! 25 Mmwe mwaatendile bhatumishi bhenu, ainabhetu a Daudi, bhabheleketu kwa mashili gaka Mbumu jwa Ukonjelo kuti, 'Kwa nndi bhailambo ina bhashishimwanga? Pakuti bhandunji bhanaatendanga lukumbi? 26 Bhapalume bha shilambolyo bhashikwishimikanga, na bhatawala bhashimana pamo nkwaakana Bhakulungwa na a Kilishitu bhabho.' 27 "Pabha, kweli a Elode na a Pontio Pilato na bhandunji bha pa Ishilaeli na bhandunji bha ilambo ina bhaimenenje pannjini pano, nkwaakana a Yesu Bhatumishi bhenu bha Ukonjelo bhumwaagwile. 28 Elo, bhashinkuimananga nkupinga bhatendanje gene gumwatumbilile na panga bhukalago kwa mashili genu mmayene malinga shimwapinjile. 29 Ikabheje nnaino, Mmakulungwa nnole shibhakuti kutujogoyanga. Ntushimilishu tulunguye lilibhe lyenu gwangali jogopa. 30 Nngoloye nkono gwenu mwaalamyanje bhandu. Ntende ilangulo na ilapo kwa mashili ga lina Iya a Yesu Bhatumishi bhenu bha Ukonjelo." 31 Bhakamaliyanjeje kujuga Nnugu, pene pubhaimenenje pala pakutenganywaga, na bhowenji gubhagumbelwenje na Mbumu jwa Ukonjelo. Bhowe gubhapundilenje kulunguya lilibhe Iya a Nnugu gwangali jogopa. 32 Nkumbi gowe gwa bhaakulupalila pugwaaliji na ntima gumo na ng'aniyo yabhonji imope. Jwakwapi akwetele shindu shakwe, ikabheje bhatendaga gabhana indu yowe ibhakwetenje. 33 Mitume bhatendaga kong'ondelanga kwa mashili kuyuka kwa Bhakulungwa a Yesu, na a Nnugu gubhaapelenje mboka yaigwinji. 34 Akapagwaga wala mundu jumo atubhilwaga na shindu, pabha bhakwetenje migunda eu nyumba bhatendaga ushanga 35 nikwaakamuyanga mitume ela ilya, nigabhanya kwa kila mundu malinga shapingaga. 36 Bhashinkupagwa Bhalawi bhamo, bha ku Kipulo, lina lyabho a Yoshepu, mitume pubhaashemangaga a Bhanabha, malombolelo gakwe "Mundu ataga ntima". 37 Na bhalabho bhashinkukola nngunda, gubhaushiye, gubhatolile ela ilya gubhapite kamuya kwa ashimitume.

5 Ikabheje bhandu bhamo bhashemwaga a Anania na akongobhabho a Shapila nnepeila gubhaushilenje nngunda gwabhonji. 2 Ikabheje, akuno bhaakongwe bhali bhamumanyi, Anania gubhaushiye ela ina na ina gubhapite kamuya kwa ashimitume. 3 Bhai, a Petili gubhaabhushiye, "A Anania kwa nndi nshikunda Lishetani apuganyu ntima gwenu, kumuntembe Mbumu jwa Ukonjelo kwa iya ela ina impatile kwa usha nngunda gula? 4 Nkanabhe usha nngunda gula pugwaaliji gwenu, na nkausheje elayo puyaaliji yenu ya tendela shinkupinga. Igala kwa nndi mwashinkuganishiya muntima gwenu kutenda nnei? Bhai mwangantemba mundu, ikabhe bhumwatembile a Nnugu!" 5 A Anania bhakapilikaneje genego, gubhagwile pai gubhawile. Bhandunji bhowe bhakapilikananjeje ga jene nganijo gubhajogopenje kwa kaje. 6 Bhashanda gubhaikengenene, niunishila maiti gala na gubhakopoyenje palanga, gubhapite kwaashikanga. 7 Gakapiteje malanga ga mashaa gatatu, bhaakongwe akuno bhakakugamanya gakoposhele, gubhajinjile nnyumba mbuhalinginji asha Petili

mula. 8 A Petili gubhaabhalanjile, "Mmalanjile! Bhuli, aino ela ino ni yowe impatilenje kwa usha nngunda gula?" A Shapila gubhaajangwile, "Elo, ni yenei." 9 A Petili gubhaabhalanjile, "Igala nndi mmanganya kulagana kunninga Mbumu jwa Bhakulungwa? Nnole! Bhandunji bhapite kwashikanga ambuje bhenu, nnaino pubhalinginji pannangopo, shibhankopoyanje na mmwe palanga." 10 Shangupe a Shapila gubhagwile pa makongono ga a Petili, gubhawile. Bhashanda bhala bhakajinjilanjeje gubhaaimenenje a Shapila bhawile, kwa nneyo gubhaakopoyenje palanga, gubhapite kwashikanga tome na ambuje bhabho. 11 Gubhakwetenje lipamba bhandunji bhowe bha a Nnugu na bhowe bhapilikenenje jene nganijo. 12 Mitume bhatendaga tendanga ilapo yaigwinji kubhandu. Bhakwaakulupalilanga a Yesu bhatendaga imananga pa lukumbi Iya a Shelemani. 13 Mundu jojowe akaliji munkumbi gwabhonji akalingaga kwiilunda. Nkali nneyo, bhandunji bhana bhatendaga kwaalumbililanga. 14 Nkali nneyo bhandunji bhaakulupalilanga Bhakulungwa gubhapundilenje kujenesheka bhanabhalume na bhanabhakongwe. 15 Numbi bhandunji bhatendaga kwaapelekanga bhalwelenji mumpanda njindo bhaagonekenje muinanda bhana mmakai, nkupinga pushibhapitangane asha Petili kapela shiwillisho shaishilanje. 16 Bhandunji bhahagwinji gubhaikengeneneje kukopoka ilambo ipikene na ku Yelushalemu, bhalikwaajanabhonji bhalwelenji na bhaashikilwanga maoka na bhowe gubhalamiywenje. 17 Kungai, bhakulungwa bha bhaabhishila na bhandu bhabho bhalinginji munkumbi gwa Mashadukayo, gubhaabhonelenje lupimililo ashimitume bhala. 18 Bhai, gubhaakamwilenje mitume bhala, gubhaugaililenje nniagelesha. 19 Ikabheje shilo malaika jwa kunnungu gwaugwile milango ja ligelesha, akwaakopoyangaga palanga gwabhabhalanjilenje, 20 "Nnjendangane ku Likanisha nkaalugulilanje bhandunji malobhe gowe ga gumi gwa ambigu." 21 Mitume gubhakundilenje, lyambape gubhapitengene ku Likanisha, gubhatandubhenje kujiganya. Bhakulungwa bha bhaabhishila na ajabhonji bhakaikanganeneje, gubhashemilenje shitamo sha lukumbi lukulu na nkumbi gowe gwa bhanangulungwa bha Shiyaudi, gubhatumilenje bhandunji kuligelesha bhakaatolanje bhantenga bhala. 22 Ikabheje bhalinda bhakaikaneneje kwekula bhangaaimananga nniagelesha mula. Gubhabhujilenje, kulugula kulukumbi kula kuti, 23 "Putuliimene ligelesha liugelwe ukoto na bhalinda bhajimingeneneje mmilango. Ikabheje tukauguleje twangang'imana mundu jojowe nkati mula." 24 Bhakulungwa bha bhalinda bha Likanisha na bhakulungwanji bha bhaabhishila bhakapilikananjeje genego gubhakwetenje lipamba, gangashimanya shaapatilenje. 25 Gwaishe mundu jumo, gwabhalugulilanje, "Bhandunji bhumwaugaililenje nniagelesha bhala, nnaino mbuhalinginji Niekalu bhanakwajiganyanga bhandunji." 26 Penepo bhakulungwa bha bhalinda bha Liekalu na bhalinda bhabho gubhapitengeneneje ku Liekalu, gubhaatolilenje. Ikabheje bhangaakumulanga kwa mashili, pabha bhashinkwaajogopanga bhandunji bhanakomwanga maganga. 27 Bhai, gubhapelekenje ku lukumbi, bhakulungwa bha bhaabhishila gubhaabhushiyenje, 28 "Twangannimbiyanga kujiganya kwa lina Iya bhene bhandubha? Nnaino mmanganya nshishumiyanga majiganyo genunji pa Yelushalemu powe

na nnatumbililanga kutupa mmbasho ga shiwo sha bhene bhandubha.” 29 Penepo a Petili bhali na mitume bhananji bhala, gubhajangwile, “Tunapinjikwa kwaakunda a Nnungu kupunda bhandunji. 30 A Nnungu bha ashainabhetu bhashikwayuya a Yeshu bhumwabhulegenje mmanganyanji kwa kwaakomela munshalabha. 31 Bhenebha ni bhakweshiye na a Nnungu mpaka kunkono nnilo gwabho, nibha Akalongolele na Bhaatapula, bhaakomboyanje Bhaishilaeli kwiipeta, nkupinga bhaleshelelwanje ilebho yabhonji. 32 Uwe tubhaakong'ondela bha geneho, pamo naka Mbumu jwa Ukonjelo jubhapegwilwenje na a Nnungu bhowe bhakwaakundanga.” 33 Bhandunji bhowe bha lukumbi lula bhakapilikananje geneho, guyaashimilenje, gubhatumbililenje kwaabhulaganga. 34 Ikabheje a Palishayo bhama bhashemwaga a Gamalieli bhali bhaajiganya bha malajilo na bhatendaga jogopeka na bhandu bhowe, gubhajimi pa lukumbi pala, gubhajujile bhantenga bhala bhakopoywanje kashoko palanga. 35 Kungai gubhaalugululilenje bhalukumbi bhala, “Mmashilambo ajangunji mma pa Ishilaeli, mwhiteiganje nkanabhe tendanga shitendi shinkupinganga kwaatendanga abha bhandunjabha! 36 Bhashinkukoposhela bhandu bhama bhukala, lina lyabho a Teuda, bhaitembile ukulungwa, na bhandunji tome na ishila mia pasheshe gubhailundilenje na bhenebho. Ikabheje gubhabhulegwe, na bhene bhaakulupalilangaga bhala gubhapiilingenenje na shikundi shila shikuwaga. 37 Na kabhili, mobha ga bhalanganya bhandu gala, bhakoposhele a Yuda bha ku Galilaya. Bhashinkukola nshemyo na bhandu gubhaakagwilenje, ikabheje na bhalabho nnepeila gubhabhulegwe na bhaakulupalila bhabho gubhapiilingenenje.” 38 “Bhai nnaino ngunakummalanjilanga, bhanganayabha mwaalekenje nnaatendanje shindu shoshowe! Pabha jene nganiji ibhaga jikumbwiye na bhandunjipe, shijwe jiyenepe. 39 Ikabheje, ibhaga kujikopweshe kwa a Nnungu, nkaakombolanga, pabha shiibhe mbuti nkwaataukanga a Nnungu.” 40 Bhai gubhaapilikanishiyenje malobhe gabho, gubhaashemilenje mitume bhala, gubhaakomilenje ibhoko na kwaalimbiyanga kujiganya kabhili kwa lina Iya a Yeshu, nigubhaaleshilenje bhajabhulagane. 41 Bhai, bhantenga gubhakupokenje palanga lukumbi, akuno ili yanonyelenje kwa kaje pabha bhashipinjikwanga tokomaywa kwa ligongo Iya a Yeshu. 42 Gubhapiundilenje kujiganya na lunguya mobha gowe ku Likanisha na mmajumba ga bhandunji Ngani ja Mmbone ja a Yeshu kuti ni a Kilishitu.

6 Nkali bhaajiganywa pubhajeshekangaga, gugakoposhele mainginiko ga bhaajiganywa bhabheleketanga Shigiliki na bhaajiganywa Bhaebhulania. Pabha Bhayaudi bhabheleketanga Shigiliki bhashitenga bhabhonji, bhashinkulibhalilwanga kugabhilwa indu ya mobha gowe. 2 Kwa nneyo, bhantenga likumi limo na bhabhili bhala, gubhaashemilenje bha nkumbi gwa bhaajiganywa bhowe, gubhashitenje, “Nngabha mwammbone uwe tuleshe kulunguya lilobhe Iya a Nnungu ga liengo Iya gabhanya indu. 3 Bhai, ashalongo ajetu, nng'agulanje bhandu shabha munkumbi gwenunji, bhandunji bhanguja, bhagumbeywenje na Mbumu jwa Ukonjelo na bhakwetenje lunda, twaakamuyanje lyene liengolyo. 4 Ikabheje uwe, shitulonjeye nkujuga Nnungu na liengo Iya lunguya Lilobhe

Iya a Nnungu.” 5 Gene malobheho gugaanonyelenje bhowe. Guabhaagwilenje a Shitepano bhandu bhakwete ngulupai na gumbalwa na Mbumu jwa Ukonjelo na a Pilipi na a Polokashi na a Nikanoli na a Timona na a Palumenashi na a Nikola bha ku Antiyokiya bhailundile na dini ja Shiyaudi. 6 Gubhaabhishilenje mmujo ja mitume, nabhalabhonji gubhaabhishilenje makono nikwaajujilanga Nnungu. 7 Lilobhe Iya a Nnungu gulipundile jenela, na ku Yelushalemu bhaakulupalila bha a Yeshu gubhapundilenje kujenesheka na likundi likulungwa Iya bhaabhishila gubhakundilenje gene ngulupaijo. 8 A Nnungu gubhaapele a Shitepano mituka jajigwinji na mashili ga tenda ilapo yaigwinji kubhandu. 9 Ikabheje gubhakuposhelenje bandu bhananji nkupinga taukangana na a Shitepano. Bhandunji bha shinagogi jashemwaga, “Shinagogi ja bhangwana”, bhakoposhelenje ku Kilene na ku Alekishandilia, bhananji ku Kilikia na ku Ashia. 10 Ikabheje gubhalepelenje kwatauka, kwa ligongo Iya lunda lwabho na kwa ligongo lika Mbumu jwa Ukonjelo abhalongoyaga kubheleketa. 11 Kwa nneyo gubhaajigenyenje bhandunji bhakong'ondelanje kuti, “Tushikwaapilikana a Shitepano bhailikwaapetekuya a Musha na a Nnungu.” 12 Kwa nneyo niikwiyanga nrijimwa kubhandunji na kubhanangulungwa na kubhaajiganya bha Malajilo ga a Musha. Bhai gubhaakamulenje a Shitepano nigubhaapelekenje ku lukumbi. 13 Gubhaajimikenje bhaakong'ondela bha unami bhabheleketanje kuti “Bhene bhandubha bhanapundape kupatukana pa Ukonjelo pano na Shalia ja a Musha. 14 Pabha, twaapilikene bhalibheleketa kuti, a Yeshu Bhanashaleti bhapinga kupaangabhanya pepano na bhapinga tindiganya ikubho ituposhele kwa a Musha.” 15 Bhowenji bhatemingenenje pa lukumbi pala gubhaakolondolesheyenje meyo a Shitepano, gubhaabhwinenji kumeyo bhali mbuti malaika jwa kunnungu.

7 Bhai, bhakulungwa bha bhaabhishila gubhaabhushiye a Shitepano, “Genege ga kweli?” 2 Na bhalabho a Shitepano gubhajangwile, “Ashaapwanga na ashaatati, ngunajuga mmbilikanishiyenje! Bhakulungwa a Nnungu bhashinkwaakoposhela atati a Bhulaimu pubhaaliji ku Meshopotamia bhakanabhe kwenda tama ku Alani. 3 A Nnungu gubhaabhanjile a Bhulaimu, ‘Njabhule pa shilambo shenu, mwaalekanje ashaalongo ajenunji, nnjende mmbali jishininanguye.’ 4 Kwa nneyo, a Bhulaimu gubhaamile shilambo sha Kalidayo, gubhapite tama ku Alani. Ainabhabho bhakamaleje a Nnungu gubhaashoshiye kabhili gubhaishe tama mmbali jinkutamangana jino.” 5 “A Nnungu wala bhangaapa a Bhulaimu nkali shilambo shimo kubha ulishi gwabho, ikabheje bhashinkwaalajila kuti, shibhaape shene shilambo shino shibhe shabho na ashibhana bhabho, ikabhe gene mobhago a Bhulaimu bhakakweteje mwana. 6 A Nnungu gubhaabhalanjile nnei, ‘Ashibhana bhenu shibhapelekwanje kushilambo shangali shabhonji bhakabhanganje bhatumwa na bhonelwa kwa yaka mia pa sheshe. 7 Ikabheje nne shinishiukumule shene shilambo shishaatolanje ubhandasho. Kungai shinaashoyanje shene shilambosho bhajiyangane apano kubhandindibhalanje.’ 8 Kungai gubhaapele malagano ga jaluka kubha shilangulo shabho. Kwa nneyo a Bhulaimu gubhantajile

unyago mwanagwabho Ishaka lyubha lya nane lya bhelekwa kwakwe. Na a Ishaka nneila peila gubhantajile mwanagwabho Yakobho. Na a Yakobho nabhalabho gubhaatendilenje nneyo peyo ashinakulubhetu likumi limo na bhahili bhala.” 9 “Bhanyikala bhetu gubhammonelenje lupimililo mpwabhonji Yoshepu, kwa nneyo gubhang’ushiyenje kuubhanda ku Mishili. Ikabheje a Nnungu pubhaliji pamo naka Yoshepu, 10 a Nnungu gubhantapwile mmboteko yakwe yowe, gubhampele kubha mundu jwa mituka na lunda kwa a Palao bhakulungwa bha ku Mishili, mpaka a Palao gubhammishile kubha nkulungwa jwa Mishili na nyumba jabho.” 11 “Kungai gushikoposhele shibhanga shilambo showe sha Mishili na ku Kanani nibha shilaje shikulungwa. Ashinakulubhetu bhakakwetenjeje shalya. 12 Bhai, a Yakobho bhakapilikaneje kuti ku Mishili shishipagwa shalya, gubhaatumilenje ashinakulubhetu ku Mishili 13 Mwanja gwa bhili, a Yoshepu bhakwitaguilaga kwa ashaakulu bhahho na a Palao gubhaamanyinji ashaakulu bhahho a Yoshepu. 14 A Yoshepu gubhatumile ntenga kwa ainabhabho a Yakobho na ashalongo ajabho bhowe, bhajiyangane ku Mishili, pubhalinginji bhandu makumi shabha na nng’ano. 15 Kwa nneyo, a Yakobho gubhapite ku Mishili na ashinakulubhetu bhananji gubhawililenje kweneko. 16 Bhai, iilu yabhonji ikujigalwaga mpaka ku Shekemu, gwiishishilwe nnikabhuli libhaumile a Bhulaimu kubhandunji bha likabhila lya Bhaamoli. 17 “Jikaishileje miongwe ja malila malagano ga a Nnungu gubhalegene na a Bhulaimu, bhandunji bhetu ku Mishili kula gubhapundilenje kujenjeshaka nibha likundi likulungwa. 18 Kungai, bhakulungwa bhamo bhakaamanyinji a Yoshepu gubhatemi muupalume ku Mishili. 19 Bhene bhakulungwabho bhashinkwaatendelanga yangali ya mmbone na kwaapotekeka ashinakulubhetu, bhalikwaumulishanga bhaalekanje palanga ashinambombe nkupinga bhawanganje. 20 A Musha pubhabhelekwe gene mobhago, Musha pabhelekwe ashinkukonja. Kwa myei jitatu gwalelilwe nnyumba ja ainagwe. 21 Bhakalepelanije kung’iya nnyumba gubhammishilenje palanga, abhiti Palao gubhannokwete, gubhannelile mbuti mwanagwabho. 22 A Musha gubhajigenywe indu yowe ya lunda lwa Bhamishili, nibha bhandu bha manyika nkubheleketa na mmitendi. 23 “Bhakaishileje yaka makumi nsheshe gubhatumbilile kwenda kwaalolanga ashaalongo ajabhonji bha Ishilaeli shibhakuti tendelwanga. 24 Kweneko gubhammweni Mwishilaeli jumo alibhonelwa naka Mmishili, gubhapite kunnjangutula Mwishilaeli jula nkumpindikulila yatendelwe ila, gubhammuleje Mmishili jula. 25 Bhaliganishiya kuti Bhaishilaeli ajabhonji shibhamumanyanje kuti a Nnungu bhanakwaatama kubhaagombolanje, ikabheje bhagamumanyanga. 26 Malabhi gakwe, gubhaabweninji Bhaishilaeli bhahili bhalikomananga, gubhalinijile kwaatapulanyanga bhalikuti, ‘Mmanganya mmaalongo, kwa ndi nabhanelana?’ 27 Ammonelaga mwine jula gwabhanokolele a Musha kunyenje alinkuti, ‘Gani ammishile mmwe kubha bhaukumula bhetu?’ 28 Bhuli, nkupinga mulaga malinga shimummuleje liyo Mmishili jula?’ 29 “A Musha bhakapilikaneje gene malobhego gubhabhutwishe, gubhapite tama ujeni kushilambo sha Midiani, kweneko gubhakwete bhana bhahili bhanabhalume. 30 “Ikapiteje yaka makumi nsheshe, malaika jwa Bhakulungwa gwabhakoposhele a

Musha pashitekete shakolelaga moto kuanga tome na Shitumbi sha Shinai. 31 A Musha gubhakaniganigwe kwa kaje bhakagabhoneje genego, bhakaagejeleje nkupinga bhalolesheye, gubhapilikene liilobhe lya Bhakulungwa. 32 ‘Nne a Nnungu bha ashinakulubhenu, a Nnungu bha a Bhulaimu na a Ishaka na a Yakobho!’ A Musha gubhajogwepe niungumila na wala bhanginga kulesheya kabhili. 33 Bhakulungwa gubhaabhalanijile. ‘Nng’ule ilatu yenu pabha punnjimi pano pa ukunjelo. 34 Gubhaalugulile, nikubhweni kubhonelwa kwa bhandu bhangu ku Mishili kula. Nbilikene shililo shabhonji, njituluka kukwaatapulanga. Bhai lelo, ngunakutoma njende ku Mishili.’ 35 “A Musha pebho bhakanilwe na Bhaishilaeli bhalinkutinji, ‘Gani ammishile mmwe kubha mmakulungwa bhetu bha kutuukumula?’ Ni bhobho abhakoposhele malaika jwa kunnungu pashitekete shakolelaga moto, a Nnungu gubhaatumile a Musha kubha akalongolele na bhaukumula. 36 “Bhenebho ni bhaashoshiyenje bhandunji ku Mishili kula kwa ilapo nshilambo sha Mishili na pa bhaali ja Shamu na nng’anga, kwa yaka makumi nsheshe. 37 A Musha ni bhaalugulilenje Bhaishilaeli. ‘Bhakulungwa a Nnungu bhenunji, shibhanng’aguilanije nkulondola jwabho jwa malinga nne kukopoka munkumbi gwa ashaalongo ajenunji, mumpilikanishiyanje jwenejo.’ 38 A Musha pubhaaliji na bhandu bha a Nnungu kuanga naka malaika jwa kunnungu abhelekete nabho kushitumbi sha Shinai jula na ashainabhetu. Bhalabho ni bhapegwilwe malobhe ga taga gumi bhatulungushiye uwe. 39 “Ikabheje ashinakulubhetu gubhakanilenje kwaapilikana, nikwanokolelaga kunyenje mmitima jabhonji bhalilokolilanga kubhuja ku Mishili. 40 Gubhaabhalanijenje a Aluni. ‘Ntualashiye ashinnungu bha yanamu bhatulongoleyanje mumpanda, pabha a Musha bhatulongolele kukopoka ku Mishili tukakwiimanya yaakoposhele!’ 41 “Penepo gubhaialashiyenje shanamu sha litumbwe lya ng’ombe, gubhatandubhenje kushibhishila mbepei akuno bhalikushiangalilanga shindu shaalaya ashaayene kwa makono gabhonji. 42 Ikabheje a Nnungu gubhaaleshilenje, nkupinga bhatindibhalilanje indu ya kunani kuliuunde, malinga shiyajandikwe nshitabhu sha ashinkulondola bha a Nnungu, ‘Mmanganya mmandu bha pa Ishilaeli! Mwambelenje indu na mbepei, kwa yaka makumi nsheshe kuanga kula?’ 43 Mmanganya gunnjigelenje liema lika nnungu Moleki, na shanamu sha lutondwa luka nnungu jwenunji Lepani. Igobhi imwaeleyenje nkupinga mwiitindibhalilanje. Kwa nneyo, shinimpelekanje kuubhanda kwaataliya kupunda ku Bhabhuloni!’ 44 “Kuanga kula ashinakulubhetu bhakwetenje liema lya kong’ondela ndamo ja a Nnungu. Lyashinkualaywa na a Musha malinga shibhalugulilwe na languywa na a Nnungu. 45 Kungai ashinakulubhetu bhatendaga poshelananga liema lila mpaka mobha ga a Yoshua, pubhatolilenje shilambo, ashaayene shilambo bhakabhingwanje na a Nnungu. Penepo gulitemi mpaka mobha ga a Daudi. 46 A Daudi gubhatendelwe mituka na a Nnungu, gubhaajujile bhenebho bhaashenjele ndamo a Nnungu bha a Yakobho. 47 Ikabheje a Shelemani ni bhaashenjele nyumba a Nnungu. 48 “Nkali nneyo Bhakulungwa a Nnungu bhakaatama nnyumba ja shenga mundu, malinga shibhaabheleketa ankulondola bha a Nnungu, 49 Bhakulungwa bhakuti, ‘Kunnungu ni shitengu shangu sha upalume, na pa

shilambolyo ni pa bhishila makongongo gangu. Shinnjenjelanje nyumba ja shanabhuli? Kushindame pumulila kwei? 50 Indu yowe ng'eleye nne." 51 "Mmanganya bha mbwinya! Mitima na makutu genunji gakakwakunda a Nnungu! Punninginji malinga ashinakulubhenunji. Mobha gowe nnakuntaukanga Mbumu jwa Ukonjelo. 52 Bhuli, apali nkulondola jojowe jwa a Nnungu ashinakulubhenunji jubhanga mpotekenga? Bhashinkwaabbulaganga bhalondolenje kwiya kwa Bhakwete Unguja, mmanganya gumwaakanilenje nikwaabbulaga. 53 Mmanganya mwaposhelenje shalia jimwapegwilwenje naka malaika jwa kunnungu, ikabheje mwangakundanga." 54 Bhanangulungwa bha lukumbi bhakapilikananjeje genega, gujaapotekenje mitima, bhalikwiulumanga meno kwa shimwa. 55 Ikabheje a Shitepano akuno bhali bhagumbelwe naka Mbumu jwa Ukonjelo, gubhalolile kunani, gubhagubhweni Ukonjelo Gwa puya gwa a Nnungu na a Yesu bhajimi kunkono nnilo gwa a Nnungu. 56 Gubhashite, "Nnolanje! Ngunakukubhona kunnungu kushiunukulwa na Mwana juka Mundu ashijima kunnilo kwa a Nnungu." 57 Penepo, bhandunji bhowe pa lukumbi pala gubhajobhelenje akuno bhaliibhanga makutu gabhonji na makono. Kungai gubhaaumbilenje kwapamo, 58 gubhaakopoyenje palanga shilambo, gubhaakomilenje maganga. Bhakong'ondelenje bhala gubhabhishilenje nngubho yabhonji muulinda guka nshanda jumo ashemwaga Shauli. 59 Gubhapundilenje kwaakoma maganga akuno a Shitepano bhaliyuga Nnungu bhalinkuti, "Mmakulungwa a Yesu mposhele mbumu yangu!" 60 Gubhatindibhele, nigubhagutile kwa ilobhe likulungwa bhalinkuti. "Mmakulungwa nnaalombolanje kwa shene shilebhoshi." Bhakabheleketete genego gubhamalile. Na bhalabho a Shauli gubhashihweni shitendi sha kwabbulaga a Shitepanosho, kuti sha mmbone.

8 Na bhalabho a shauli bhaapali ilikwaanonyela ga bhulagwa kwa a Shitepano. Lyene lyubhalyo bhandunji bha a Nnungu bha pa Yelushalemu gubhatandubhenje kupotekwa kwa kaje. Bhaakagula bhowe gubhapwilingenenje kwenda mwilambo ya ku Shamalia na ku Yudea, ikabhe ashimitume. 2 Bhandunji bhakwapinganga a Nnungu gubhaashishilenje a Shitepano na gubhaatendelenje malilo gamakulungwa. 3 Gene mobhapego, a Shauli gubhatumbilile kwaabbulaganga bhandu bhakwaakulupalilanga a Yesu. Bhatendaga jinjila kila nyumba, nikwaakopoyanga palanga bhaakulupalila bhanabhalume na bhanabhakongwe nikwaagalilanga nniagelesha. 4 Bhaakagula bhapwilingenenje bhala gubhapitenje ako na koko bhalipita lunguyanga ilobhe lila. 5 Na a Pilipi gubhainjile nshilambo sha Shamalia bhalipita kwalunguya a Kilishitu ku bhashilambo bha kweneko. 6 Bhandunji bhakaibhonganjeje ilapo ibhaitendaga a Pilipi, gubhapilikanishiyenje ntenga kwa ntima ndende. 7 Pabha maoka gatendaga kwaashokangana bhandunji bhahagwinji akuno galijobhela. Nneila peila bhandunji bhahagwinji bhapolokenje ibhalo na bhaalemalinga bhatendaga lamiywangwa. 8 Bhandunji bha shene shilambo shila gubhainonyelenje kwa kaje. 9 Bhai, bhashinkupagwa bhandu bhamo bhashemwaga a Shimoni bhatenda kwiinyiwa kwa ikubho yabho ya shiabhi na bhandu bha ku Shamalia bhatendaga kwaakanganigwangwa. 10 Bhandunji

bhowe, bhana na bhakungulungwanji gubhaapilikanishiyenje ukoto, gubhashitenje, "A Shimonibha bhashikola mashili ga a Nnungu gashemwaga, Mashili Makulu." 11 Gubhaakulupalilenje kwa kaje, pabha kwa mobha gamagwinji bhatendaga tenda ilapo kwa uabhi gwabho. 12 Ikabheje bhakakulupalilanjeje ntenga gwa a Pilipi gwa Ngani ja Mmbone ja Ukulungwa gwa a Nnungu na lina Iya a Yesu Kilishitu, gubhabhatishwenje, bhanabhakongwe na bhanabhalume. 13 Nkali a Shimoni gubhakulupalile, bhakabhatishweje gubhatendile shilongani na a Pilipi, gubhakanganigwe ga ilapo yaatendekaga. 14 Mitume bhalingini ku Yelushalemu bhakapilikananjeje kuti Bhashamalia na bhalabhonji bhaliposhelenje ilobhe Iya a Nnungu, gubhaatumilenje kweneko a Petili na a Yowana. 15 Bhakaikanganjeje gubhaajujilenje a Nnungu nkupinga bhaakulupalila bhamposhelenje Mbumu jwa Ukonjelo, 16 pabha gene mobhago Mbumu jwa Ukonjelo paaliji akanabhe kuntulushila mundu jojowe munkumbi gwabhonji, ikabheje bhashinkubhatishwangape kwa lina Iya Bhakulungwa a Yesu. 17 Bhai, a Petili na a Yowana gubhaabshishilenje makono bhaakulupalila bhala, gubhamposhelenje Mbumu jwa Ukonjelo. 18 Bhai, a Shimoni bhakabhoneje kuti mundu abhishilwaga makono na mitume bhala, anaposhela Mbumu jwa Ukonjelo, gubhainjile kwaapanganga ela a Petili na a Yowana bhalinkuti, 19 "Mmbanganje na nne gene mashiligo, nkupinga nimmishilaga mundu makono, amposhele Mbumu jwa Ukonjelo." 20 Ikabheje a Petili gubhaajangwile, "Nkaobhele ako na ela yenyuo, punkuganishaya mashili ga a Nnungu gaumwa na ela! 21 Mmwe mwangali shakamula kwa ali liengoli, pabha ntima gwenu gwangali gwa mmbone kwa a Nnungu. 22 Kwa nneyo mwiipete yangali ya mmbone yenui na mwaajuje Bhakulungwa ipingaga, bhalabho shibhanneshetele ng'aniyo yenyuo. 23 Pabha ngunakummona lushikungumbala lupimilo Iwa kaje na punnipa mmabhandu bha ilebho." 24 A Shimoni gubhajangwile, "Shonde, nnyujilanje ku Bhakulungwa linambate lyolyowe Iya gene gunnugwilenje." 25 A Petili na a Yowana bhakakong'ondelanjeje na lunguya ga Ngani ja Bhakulungwa, gubhabhujilenje ku Yelushalemu. Gwa mmabhaja gubhalunguyenje Ngani ja Mmbone mwijiji yaigwinji ya ku Shamalia. 26 Malaika jwa Bhakulungwa gwabhalugulile a Pilipi, "Mpanganishe nnjende mmbali ja kwibhanda kupitila mpanda gwa anga ukopoka ku Yelushalemu kwenda ku Gasha." 27 Bhai a Pilipi gubhatandwibhe mwanja. Gubhamweni mundu jumo jwa ku Eshiope, nkulungwa jwa shibhiko sha a Kandate malikia bha ku Eshiope. Bhashinkwenda ku Yelushalemu kukwatindibhalila a Nnungu na penepo bhatendaga bhaja bhali bhakwelile mutuka ja kwakwatwa. 28 Bhali mwanja bhatendaga kwishomela shitabhu sha a Ishaya ankulondola bha a Nnungu. 29 Bhai, Mbumu jwa Ukonjelo gwabhabhalanjile a Pilipi, "Nnjende tome na mutuka jila nkalongane najo." 30 A Pilipi gubhabhutushile tome na mutuka jila, gubhampilikene mundu jula alishoma shitabhu sha a Ishaya ankulondola bha a Nnungu. A Pilipi gubhaabhusiye, "Bhuli, nnikwimanya inkushomayo?" 31 Bhandu bhala gubhajangwile, "Ngombole kwapi kwimanya gwangali mundu jwa ndalashiya?" Penepo gubhaashemile a Pilipi bhakwele mmutuka mula bhatame

nahbo. 32 Na Majandiko ga Ukonjelo gubhashomaga pugaliji nnei, "Paliji mbuti ngondolo apelekwa kuingwa, eu mbuti mwana ngondolo atama ilili alimogwa mang'omba, jwangakopoya ilobhe lyakwe wala kashoko. 33 Ashinkutokomaywa na bhonelwa. Jwakwa shakombole kutagulila ga lubheleko lwakwe, pabha gumi gwakwe ushishoywa pashilambolyo." 34 Bhaeshiopia bhala bhakwaalugulilaga a Pilipi, "Nnugulite, jwene nkulondola jwa a Nnunguju abheleketa ngani jikeni? Gene gabheleketaga gakwe nnyene eu gaka munda juna?" 35 Bhai, a Pilipi gubhatandwibhe na gene Majandiko ga Ukonjelo, gubhaatalashiye Ngani ja Mmbone ja a Yesu. 36 Bhalingini mwanja, gubhaikenenje palitanda, munda jula gwashite. "Apano gapali masi, bhuli shipali shoshowe shang'ibhiliila ngunabhatishwe?" 37 A Pilipi gubhashite, "Ibhaga nkulupalilaga kwa ntima gwenu gowe inatendeka kubhatishwa." Nabhalabho gubhajangwile, "Elo ngunakulupalila kuti a Yesu Kilishitu ni bhanabhabho a Nnungu." 38 Bhai gubhaamulishite mutuka jila jijime. Bhaeshiopia bhala na a Pilipi gubhapitengenene mmashi mula, a Pilipi gubhaabhatishite. 39 Bhakakopokanganeje mmashi mula Mbumu jwa Bhakulungwa akwaanyakulaga a Pilipi. Bhaeshiopia bhala bhangaabhona kabhili a Pilipi, ikabheje gubhapite na mwanja gwabho bhalikwinonyela. 40 A Pilipi gubhaimushile bhali ku Ashoto, gubhapitile mwilambo yowe bhalilunguya Ngani ja Mmbone mpaka ku Kaishalia.

9 Gene mobhago a Shauli bhatendaga punda kujogoya bhalikwabhulaganga bhaajiganywa bha Bhakulungwa. Gubhapite ku Bhakulungwa Bhaabshihila, 2 gubhajujile bhapegwe bhaluwa ja lumanyio nnyumba ya jujila Nnungu ya shiyaudi kwene ku Dameshiki, nkupinga bhaaimanangaga bhanabhalume eu bhanabhakongwe bhakagulanga Mpanda gwa a Yesu, bhaakamulanje bhajienabhonji ku Yelushalemu. 3 Ikabheje bhali mumpanda tome na ika ku Dameshiki, shangupe shilangaya kopoka kunnungu shikwamulishilaga mmbali yowe. 4 Gubhagwile pai gubhapilikene ilobhe liliikwabhalanjila, "Shauli! Shauli! Pakuti unamboteka?" 5 A Shauli gubhabhushiyite, "Mmakulungwa, mmwe agani?" Gubhajangwile, "Nne a Yesu nkumbotekajo. 6 Ikabheje nnaino ujime, ujende kunnjini kweneko shiubhalanjilwe shiupinjikwa kutenda." 7 Bhandunji bhalongeneneje na a Shauli bhala, gubhajimingeneneje ilili, bhakakwetenenje shabheleketa, ilobhe lila bhalipilikenenje ikabheje bhangammonaga abheleketaga. 8 A Shauli gubhajimi, bhakabhalakuleje meyo bhangashibhona shindu shoshowe, kwa nneyo bhandunji bhala gubhaakamwilenje nkono nikwalongoya mpaka kunjini ku Dameshiki. 9 A Shauli gubhatemi mobha gatatu gwangali lola, gene mobhago bhangalya wala kung'wa shoshowe. 10 Bhai, ku Dameshiki kula ashinkupagwa nkujiganywa jumo ashemwaga a Anania. Bhakulungwa gubhammalanjile nng'agamii "a Anania!" A Ananiya gubhajitishite, "Nne apano, Mmakulungwa." 11 Bhakulungwa gubhaabhalanjile, "Nnjabhule njende kumpanda ushemwa Mpanda gwa Goloka mpaka kunyumba ja a Yuda nkaabhushishiyite bhandu bha ku Tasho bhaashemwa a Shauli, nnaino bhanajuga Nnungu, 12 na bhalabho a Shauli ng'agamii bhashinkwaabhona bhandu bhashemwa a Anania bhalinjijila nnyumba nikwaabshihila makono nkupinga bhalole kabhili." 13

Ikabheje a Anania gubhajangwile, "Mmakulungwa, njipilikana kubhandu bhabhagwinji ngani jangali jambone ja bhene bhandubho, ga ibhaatendangaga bhandu bha Ukonjelo bhenu ku Yelushalemu. 14 Na bhashikiwiya apano bhabhapegwe amuli kukopoka kubhakulungwanji bha bhaabshihila ja kwaakamulanga bhakunkulupalilaga mmwe a Yesu." 15 Ikabheje Bhakulungwa gubhaabhalanjile, "Nnjendepe, pabha njikwaagula bhabhe bhatumishi bhangu, bhapite lunguya lina lyangu kubhandunji bha ilambo ina na kubhanangulungwa bhabhonji na ku bha Ishilaeli. 16 Nne namwene shinaalanguye shibhapinga potekwa kwa ligongo lya lina lyangu." 17 Bhai, a Anania gubhapitejinjila nnyumbamo. Kungai gubhaabshihile makono a Shauli, gubhashite, "Apwanga a Shauli, Bhakulungwa a Yesu bhankoposhele mumpanda nnikwiya apano, bhashinduma nimmishile makono nkupinga nnole kabhili na nngumbaywe naka Mbumu jwa Ukonjelo." 18 Shangupe indu mbuti ipande ikugwaga kukopoka mmeyo ga a Shauli, gubhalolile kabhili, gubhajimi gubhabhatishwe. 19 Bhakalyeje shalya gubhakwete mashili kabhili. A Shauli gubhatemi ku Dameshiki mobha gashoko na bhaajiganywa bhalinjijile pepala. 20 Shangupe gubhatandwibhe kulunguya nnyumba ya jujila Nnungu kuti, a Yesu Bhanabhabho a Nnungu. 21 Bhandu bhowe bhaapilikenenje gubhakanganigwenje, gubhashitenje, "Bhuli, bhenebha nngabha bhaabhulegenje bhakwaakulupalilanga a Yesu ku Yelushalemu? Bhashinkwiya apano bhatumbilile kukwakamulanga bhene bhandunji bho nkupinga bhaapelekanje ku bhakulungwanji bha bhaabshihila!" 22 A Shauli gubhapundile kukola mashili na bhalikong'ondela kuti a Yesu ni a Kilishitu, Bhayaudi bha ku Dameshiki gubhakanganigwenje kwa kaje. 23 Gakapiteje mobha gamagwinji, Bhayaudi gubhaimenenje nkuloleya mwa kwabhalujila a Shauli. 24 Ikabheje a Shauli gubhapilikene malobhe gala. Bhandu bhatendaga kwaajubhililanga shilo na mui mmilango ja jinijila nshilambomo, nkupinga bhaabbulaganje. 25 Ikabheje malanga ga shilo bhaajiganywa bhaho gubhaatolilenje, gubhaatuluyenje pai nshikapu shashikulungwa kupitila likumba lya lugwani. 26 A Shauli bhakaisheje ku Yelushalemu gubhalinjile kwilunda munkumbi gwa bhaajiganywa bhala ikabheje, bhowe gubhaajogopenje na jwakwa akulupalile kuti nabhalabho bhashibha bhaajiganywa. 27 Penepo a Bhanabha gubhaishe kukwaatola a Shauli, gubhaapeleshe kwa ashimitume na gubhatalashiye, a Shauli shibhashite kwaabhona Bhakulungwa nikunguluka nahbo. Na kabhili gubhalugwile ga a Shauli kulunguya ku Dameshiki gwangali bhoga kwa lina lya a Yesu. 28 Bhai, a Shauli gubhatemi nabhonji, bhaliowa pa Yelushalemu powe pita lunguya ilobhe lya a Nnungu gwangali lipamba kwa lina lya a Yesu. 29 Na kabhili bhatendaga taunganga na Bhayaudi bhabheleketangaga Shigiliki, na gubhalinjilenje kwaabbulaga. 30 Bhaajiganywa bhala bhakapilikananjeje genego, gubhaatolilenje a Shauli, gubhaapelekenje ku Kaishalia, gubhaaleshilenje bhajende ku Tasho. 31 Gene mobhago bhandunji bha a Nnungu gubhatemingeneneje kwa ulele, kutandubhila ku Yudea na ku Galilaya na ku Shamalia. Bhandunji bha a Nnungu gubhapundilenje kujenjeshaka akuno bhalishimilikwanga na bhalikwaajogopanga a Nnungu

bhalitagwanga ntima naka Mbumu jwa Ukonjelo. **32** A Petili bhali nkujima jima kila mmbali gubhaishe kubhandunji bha ukonjelo bhatamanganaga ku Lida. **33** Kweneko gubhanng'imene mundu jumo ashemwaga a Ainea, jwenejo kwa yaka nng'ano na itatu akakombolaga kushoka pashinanda kwa ligongo lya poloka. **34** Bhai, a Petili gubhaabhalanjile, "A Ainea, a Yesu Kilishitu bhanakunnanya. Njumushe, ntandishe shinanda shenu." Shangupe, a Ainea gubhajimi. **35** Bhashilambo bhowe bha ku Lida na ku Shaloni bhakaabnonanjeje a Ainea, gubhaatendebhushilenje Bhakulungwa. **36** Bhashinkupagwa bhaajiganywa bhamo bhakongwe ku Yapa bhashemwaga a Tabhita, kwa Shigiliki a Dolikashi, malombolelo gakwe, mbala. Bhene bhakongwebho bhatendaga tenda ya uguja na mobha gowe bhatendaga kwaajangutilanga bhaalaga. **37** Gene mobhago bhakulwalaga, gubhawile. Bhandunji gubhakundilenje maiti gabho, gubhagagonekenje kukati jaliji kugolopa. **38** Na pabha ku Yapa kwangatalikangana kaje na ku Lida, kwa nneyo bhaajiganywa bhakapilikananjeje kuti a Petili kubhali ku Lida, gubhaatumilenje bhantenga bhahili bhakulugulanje kuti, "Shangu nriye kunngwetu." **39** Bhai, a Petili gubhajabhile gubhalongene nabhonji. Bhakaishenje gubhapelekw kugolopa mpaka kukati kula. Kweneko bhanabhakongwe bhahagwinji bhashitenga gubhaatimbillenje a Petili bhaligutanga akuno bhalikwaalanguyanga magauni na nngubho ibhaalayaga a Dolikashi pubhaliji bhakoto. **40** A Petili gubhaakopoyenje palanga bhandu bhowe, gubhatindibhele, gubhajujile Nnungu. Kungai gubhagatendebhushile maiti gala gubhashite, "A Tabhita, njumushe." Nabhalambo gubhabhalakwile meyo na bhakaabhoneje a Petili gubhajinwishe nitama. **41** A Petili gubhaakamwile nkononikwaajinula, kungai gubhaashemilenje bhandunji bha ukonjelo na bhashitenga bhala, gubhaakamuyenje bhali bhahakoto. **42** Jene nganijo gujishumile mmbali yowe ya ku Yapa na bhandunji bhahagwinji bhakwaakulupalilangaga Bhakulungwa. **43** A Petili gubhatemi mobha gashoko ku Yapa, ku bhandu bhamo bhahamba mapende lina lyabho a Shimoni.

10 Ku Kaishalia bhashinkupagwa bhandu bhamo bhashemwaga a Koloneli, bhakulungwa bha manjola bha shikundi shimo shashemwaga, "Shikundi sha Shiitalia." **2** Pubhaaliji bhandu bhanguja, bhenebho na likaja lyabho bhatendaga kwaajogopanga a Nnungu, bhatendaga kwaajangutilanga bhalaga bha Shiyaudi na bhatendaga juga Nnungu mobha gowe. **3** Lyubha limo malanga ga ligulo bhashinkummona malaika nng'agamii alikwajijila nikwaalugulila, "A Koloneli!" **4** A Koloneli gubhankolondolesheye meyo akuno bhaliogopa, gubhammalanjile, "Shipali nndi Mmakulungwa?" Malaika jwa a Nnungu jula akwaabhalanjilaga, "A Nnungu bhapilikene kujuga kwenu na mbepei yenu kubhalaga wala bhakailibhala. **5** Bhai nnaino, mwaatumanje bhandu ku Yapa bhakaashemanje bhandu bhamo bhaashemwa a Shimoni, kwa lina lina, a Petili. **6** Bhenebho mubhali nnyumba ja a Shimoni bhahamba mapende, nyumba jabho pujili tome na bhaali." **7** Malaika jwa a Nnungu abhelekete nabho akajabhuleje, a Koloneli gubhaashemilenje bhatumishi bhahili bha nnyumba jabho naka linjola jumo aaliji mundu jwa

kwaajogopa a Nnungu, **8** gubhaalugulilenje gowe gakoposhele, gubhaatumilenje ku Yapa. **9** Malabhi gakwe, bhandunji bhatatu bhala bhalinginji mmwanja, tome naika ku Yapa, a Petili gubhakwelile kunani kushipagala sha nyumba mui kujuga Nnungu. **10** Gushaapoteshe shibhanga, nilokolila kulya. Akuno shalya shilitelekwa gubhaondweshe niagamila. **11** Gubhabhakubhweni kunnungu kuugwishe na shindu mbuti nkamba gwa nkulungwa ulituluywa ukamwilwe mmapepe gakwe ganansheshe. **12** Munkwambamo bhashinkupagwanga bhannyama bha mikumbi jowe, bhannyama bha makongono nsheshe na bhannyama bhaatambalanga pai na ijuni ya kunani. **13** Gubhapilikene lilobhe lilikwalugulila, "A Petili nnjinushe nng'inje, ntaune!" **14** A Petili gubhajangwile, "Ntape, Mmakulungwa, nne nganabhe paya shindu shoshowe sha nyata eu shangali sha mmbone." **15** Lilobhe lila likupilikanikaga kabhili lilikwaabhalanjila, "Nnaisheme ya nyata indu ibhaikonjeleye a Nnungu!" **16** Gene malobhego gakubhujilaga patatu, kungai nkamba gula guukweshiywe kubhuja kunani kunnungu. **17** A Petili bhalikanganigwa ga malombolelo ga yene agamii ibhaibhwenye ila, bhandunji bhatumilwenje na a Koloneli bhala, bhakajibhonanjeje nyumba ja a Shimoni, gubhapite jimangana pa nnango, **18** gubhabhushiyenje kwa utiya, "Bhuli, mwenemo bhapali bhajeni bhaashemwa a Shimoni Petili?" **19** A Petili bhalinkuganishiya ga agamii ila, Mbumu akwaalugulilaga, "Mpilikane! Bhashipagwanga bhandunji bhatatu bhanakunnoleyanga. **20** Shangu ntulushe na wala nnakole nriishi kulongana nabhonji pabha naatumilenje nne." **21** Bhai a Petili gubhaatulusshilenje bhandunji bhala gubhaabhalanjilenje, "Junkunnoleyangajo ni nne. Nng'ikenje kutenda nndi?" **22** Gubhaajangwilenje, "Bhakulungwa bha manjola a Koloneli, bhandu bha ukonjelo, bhakwaajogopa a Nnungu na bhaakulupalika na bhayaudi bhowe bhashikutulajila. Bhashibhalanjilwa naka malaika kuti bhansheme nnjende kunngwabho bhapilikane malobhe gushimwaabhalanjile." **23** A Petili bhakwaashemelangaga nnyumba, nibha ujeni gwabho shene shiloshho. Malabhi gakwe, a Petili na bhandunji bhala gubhatandwibhenje mwanja na bhandunji bhana bha ku Yapa gubhalongene nabhonji. **24** Lyubha lya bhili lyakwe gubhaikengenene ku Kaishalia na kweneko a Koloneli bhali na ashaalongo ajabhonji na ashaambwiga ajabho bhubhaashemilenje bhatendaga kwaalindililanga. **25** A Petili pubhajinjilaga nnyumba, a Koloneli gubhapite kwaposhela, nigubhaatindibhalile mpaka pai. **26** Ikabheje a Petili gubhaajinwile, bhalikwalugulila, "Nnjime, pabha nne namundu nnjenu." **27** A Petili gubhapundile bheleketa na a Koloneli, bhakajinjileje nnyumba gubhaimenenje bhandunji bhahagwinji. **28** A Petili gubhaabhalanjilenje, "Mmanganya mmumanyinji kuti Nnyaudi jowuje jula ashilimbiywa na malajilo ga dini jakwe kukundikana eu kwaowelanga bhandunji bha ilambo ina. Ikabheje a Nnungu bhashineya ngunansheme jwa nyata. **29** Kwa lyene ligongolyo nkanjemanjeje nangabhika nnjishi kwiya. Bhai, ngunakummuyanga, shinjemelenje nndi?" **30** A Koloneli gubhashite, "Mobha gatatu gapitilego gene malanga pegano, shaa tisha ja ligulo, natendagajuga Nnungu kukati jangu. Shangupe, gunimmweni mundu anyimile mmujo jangu awete

nngubho yamelemeta, 31 gwashite, 'A Koloneli! Kujuga kwenu na mbepe inkwapangana bhalaga iposhelwe kwa a Nnungu. 32 Muntume mundu ku Yapa akaasheme bhandu bhomo bhashemwa Shimoni, kwa lina lina, a Petili, mubhali nnyumba ja a Shimoni bhabhamba mapende tome na bhaali.' 33 Shangupe nashinkutumila ntenga, na mwe nshitenda shambone kwiya. Nnaino putuli pano mmujo ja a Nnungu, tupilikanishiye shoshowe shibhantumile Bhakulungwa ntubhalanjilesho." 34 Penepo a Petili gubhatandwibhe kubheleketa, "Nnaino nimumanyi kuti a Nnungu bhanganji luagu. 35 Ikabhe mundu jojowe jwa kila shilambo akwaajogopa a Nnungu nitenda ya mmbone, bhanakumposhela. 36 Gweguno ni ntenga gubhapeshe a Nnungu kubhandu bha ku Ishilaeli, bhalilunguya ngani ja mmbone ja ulele ja a Yesu Kilishitu bhali Bhakulungwa bha bhowe. 37 Mmanganyanji nshimanyinji shikoposhele nshilambo sha Yudea, kutandubhila ku Galilaya ukapiteje ubhatisho gubhalungwiye a Yowana. 38 Kabhili mmumanyinji ga a Nnungu shibhashite kwaagula a Yesu bha ku Nashaleti kwa kwaapa Mbumu jwa Ukonjelo na mashili. Na a Yesu bhatendaga mbone mbali yowe bhalitenda ya mmbone na lanya bhowe bhahonelwanganga naka Lishetani, pabha a Nnungu pubhaaliji pamo na bhenebho." 39 "Uwe ni tubhaakong'ondela bha gowe gubhatendile nshilambo sha Bhayaudi na ku Yelushalemu. Gubhaabhulegenje kwa kwaakomela munshalabha. 40 Ikabheje lyubha lya tatu a Nnungu gubhaayushiye na gubhailangwiye, 41 nngabha kubhandu bhowe, ikabhe kubhene bhaagwilwenje na a Nnungu bhabhanganje bhaakong'ondela bhahho, yani uwe twaalile na nng'wa nabho bhakayusheje kukopoka kubhawilenje. 42 Bhashikutulajila kulunguya Ngani ja Mmbone kubhandu bhowe na kukong'ondela kuti bhalabho ni bhaagwilwe na a Nnungu kubha bhaukumula bha bhakotonji na bhawilenje. 43 Ashinkulondola bhowe bha a Nnungu bhatashiyenje ga bhenebho kuti, kila mundu shabhakulupalile shaleshelwe yambi yakwe yowe kwa lina lyabho." 44 A Petili bhakanabhe pumula kubheleketa, Mbumu jwa Ukonjelo gwabhatulushilenje bhowe bhapilikanishiyanganga gene malobhego. 45 Bhaakulupalilanga bha Shiyaudi bhalongenenge na a Petili kukopoka ku Yapa gubhakanganigwenje, pabha a Nnungu bhashikwaagumbayanga upo ya Mbumu jwa Ukonjelo bhandunji bhangabha Bhayaudi. 46 Pabha bhashinkwaapilikananga bhalibheleketa luga inape bhalikwaakuyanga a Nnungu. Penepo a Petili gubhashite, 47 "Abha bhandunji bha bhamposhelenje Mbumu jwa Ukonjelo malinga shitumposhele uwe. Bhuli, apali jojowe shakombole kwaibhililanga bhanabhatishwanje mmashi?" 48 Bhai, gubhaamulise bhahatishwanje kwa lina lya a Yesu Kilishitu. Gubhaajujilenje a Petili bhatame nabhonji mobha gashoko.

11 Bhai, mitume na bhakwaakulupalilanga a Yesu bha ku Yudea kula, gubhapilikanenge kuti bhandunji bhangabha Bhayaudi bhaliposhelenje Lilobhe lya a Nnungu. 2 Bhai, a Petili bhakabhujenje ku Yelushalemu bhaakulupalila bha Shiyaudi bhaapinganganga bhandunji bhangabha Bhayaudi bhajalukanje, gubhaagambilenje bhalinkutinji, 3 "Mmwe nshikwenda tama na nalya nabhonji bhandunji bhangajalukanga." 4 Penepo a Petili gubhaatalashiyenje kwa ntima ndende

shiihite tandubhila bhalinkuti. 5 "Lyubha limo ngulijuga Nnungu ku Yapa, nashinkuagamila, gunishibhweni shindu mbuti nkwamba gwankulungwa ulituluwya kukopoka kunani kunnungu gukamwilwe mmapepe gakwe ganansheshe, nibhikwa tome na nne. 6 Gunolile nkati mula gunaabhweninji bhannyama bha makongono nsheshe bha mukonde na bhannyama bhatambala pai na ijuni. 7 Kungai gumbilikene lilobhe lilimalanjila, 'A Petili, nnjinushe nng'inje na ntaune.'" 8 "Ikabheje nne gunjite, 'Nngabha nneyo Mmakulungwa, pabha shoshowe sha nyata shikanabhe pita nkang'wa jangu.' 9 Lilobhe lila kukopoka kunnungu likumalanjilaga gwa bhili lilinkuti, 'Indu ikonjoleywe na a Nnungu nnaisheme ya nyata.'" 10 Lyenelyo gultendeshe patatu, kungai yowe gwiikweshiywe kubhuja kunani kunnungu. 11 "Shangupe bhandunji bhatatu kukopoka ku Kaishalia bhatumilwenje kunjema nne gubhajimingene mmujo ja nyumba jinatamaga jila. 12 Mbumu gwamalanjile ngunakole nnjishi, kulongana nabhonji. Bhandu shita bhananji gubhalongenenge na nne kwenda ku Kaishalia, kweneko gutujinile nnyumba ja a Koloneli. 13 A Koloneli gubhatubhalanjile shibhashite kummona malaika nnyumba jabho nikwaabhalanjila kuti, 'Muntume mundu ajende ku Yapa akaasheme bhandu bhomo bhashemwa a Shimoni kwa lina, lina a Petili. 14 Bhenebho shibhannugulile malobhe ga kuntapula mmwe na ashaalongo ajenunji bhowe.'" 15 "Ngatandubheje kubheleketa, Mbumu jwa Ukonjelo gwabhatulushilenje malinga shatutulushile uwe kundandubho kula. 16 Penepo gungumbushile malobhe gubhabhelekete Bhakulungwa gala kuti, 'A Yowana bhashinkubhatisha kwa mashi, ikabheje mmanganyanji shimbhatishwanje kwa Mbumu jwa Ukonjelo.' 17 Bhai, ibhaga a Nnungu bhaapelenje bhandunji bhangabha Bhayaudi upo malinga shibhatupele uwe, tukaakulupalileje Bhakulungwa a Yesu Kilishitu, bhuli, nne gani ngombole kutaukangana na a Nnungu?" 18 Bhakapilikananjeje genego, gubhaleshilenje mitau jabhonji, gubhaakushiyenje a Nnungu bhalinkutinji, "Kwa nneyo a Nnungu bhashikwaapanganga bhandunji bhangabha Bhayaudi shikono sha kwiipeta bhapatanje gumi." 19 Kwa ligongo lya mboteko ibhapatile a Shitepano, bhaakulupalila gubhapwilingenenge. Bhananji gubhapitengenenge ku Poinike na ku Kipulo na ku Antiokia ja ku Shilia akuno bhalipita lunguya ntenga gula ku Bhayaudi. 20 Ikabheje bhaakulupalila bhananji bhakopokenje ku Kipulo na ku Kilene, bhashinkwendangana ku Antiokia gubhakungulokenje na bhandunji bhaabheleketa Shigiliki bhaliikwaalungushiyanga Ngani ja Mmbone ja Bhakulungwa a Yesu. 21 Mashili ga Bhakulungwa pugaaliji pamo na bhanganyabho na bhandunji bhahagwinji gubhaakulupalilenje nikwaatendebhushila Bhakulungwa. 22 Jene nganijo jikipilikanika gubhandu bhakagalanga mpana gwa a Yesu bha ku Yelushalemu. Kwa nneyo gubhaatumilenje a Bhanabha bhajende ku Antiokia. 23 Bhakaisheje kweneko na kuubhona ntuka gwa a Nnungu shushite poshelwa kubhandunji bhala guyaanonyele, gubhaashondelesheyenje bhapundanje kwakulupalila Bhakulungwa. 24 A Bhanabha pubhaaliji bhandu bhanguja bhagumbelwe na Mbumu Jwa Ukonjelo na bhashinkukola ngulupai, kwa nneyo bhandu bhahagwinji gubhajeshekenje ku Bhakulungwa. 25 Kungai

a Bhanabha gubhapite ku Tasho kukwaloleya a Shauli. 26 Bhaakabhoneje, gubhajianabho ku Antiokia. Na bhanaabhili gubhatemingenenje na bhaakulupalilanga mpanda gwa a Yeshu, kwa shaka shimo bhalikwaajiganyanga bhandunji bhahagwinji. Na bhaakulupalila gubhatandwibhenje kushemwa Bhakilishitu ku Antiokiako. 27 Gene mobhapego, ashinkulondola bha a Nnungu gubhaikengeneneje ku Antiokia kopoka ku Yelushalemu. 28 Bhai, bhamo bha munkumbi gwabhonji lina lyabho a Agabhushi gubhajimi na kwaakomboywa naka Mbumu gubhalondwele kuti, shipinga koshela shibhanga sha punda nshilambolyo. Shene shibhangasho shakoposhele mobha ga upalume gwa a Kilaudio. 29 Bhaajiganywa bhala gubhatumbililenje kuti kila mundu mushakombolele apeleshe shoshowe sha kwajangutilanga Bhakilishitu bhaatamangananga ku Yudea. 30 Bhai, gubhatendilenje nneyo, gubhaakamwiyenje a Bhanabha na a Shauli bhaapelekanje ku bhanangulungwa bha bhandunji bha a Nnungu.

12 Tome na gene mobhapego, a Elode gubhatandwibhe kwaabhonelanga bhandunji bhana bha a Nnungu. 2 A Elode gubhaabhuleje kwa upanga a Yakobho, apwabho a Yowana. 3 Bhakabhoneje kuti Bhayaudi ishikwanonyelanga kwa shene shitendisho, gubhaakamwile na a Petili. Genego pugatendeshe mobha ga shikukuu sha mikate jangataga ngedule. 4 Bhaakaamuleje a Petili, gubhaaugalile nnyelesha, gubhaabhishile muulinda gwa ikundi nsheshe ya ashimanjola nsheshensheshe. A Elode pubhatumbilile bhaakopoye pa lugwinjili lwa bhandu shipitaga shikukuu sha Bhayaudi shashemwaga Pashaka. 5 Bhai, a Petili bhali nnyelesha, bhandunji bha a Nnungu gubhatumbililenje kwaajuga a Nnungu. 6 Shene shiloshu a Elode bhakanabhe kwaakopoya a Petili kulugwinjili, a Petili gubhagonile pakatipakati ja ashimanjola bhahili, bhalibhatabilwe mindondolo jibhili na bhalinda bhalingini muulinda pa nnango gwa ligelesha. 7 Shangupe malaika jwa Bhakulungwa gwajimi tome na bhenebho, shilangaya shikulangayaga nnyelesha mula. Malaika jwa a Nnungu akwaapalamulaga a Petili mmbalati alinkuti, "Nnjabhule shangu!" Pala pepala mindondolo jibhatabilwe mmakono jila jikukutukaga na shigwilile pai. 8 Malaika jwa a Nnungu gwabhabhalanjile, "Mwitabhe nshipi gwenu, nng'wale ilatu yenu. Gubhatendile nnepeila. Malaika gwabhabhalanjile nng'wale likoti lyenu nngagule." 9 A Petili gubhankagwile palanga, ikabheje bhakamumanyaga yatendwaga naka malaika jula kuti puyaliji ya kweli, pubhaganishiyaga bhanaagamilia. 10 Bhakapitanjeje shikundi sha ndandubho na sha bhili sha ulinda, gubhaikengeneneje kunnango gwa itale gwa jinjilila kunjnini. Nnango gula ukwiugulaga guylene gubhakopokenje palanga. Gubhalongeneneje mumpanda gumo, kashokope malaika jula akwaalekega a Petili jikape. 11 Penepo a Petili gubhang'amwile itendeshe ila gubhashite, "Nnaino nimumanyi kweli kuti Bhakulungwa bhashikuntuma malaika jwabho kwiya njoya mmakono ga a Elode na gowe gubhalolelangaga Bhayaudi." 12 Bhakagamanyeje genego gubhapite mpaka kwa a Malia anyinabhabho a Yowana bhashemwaga a Maliko. Na mwenemo bhandunji bhahagwinji bhashinkuimananga nkujuga Nnungu.

13 A Petili gubhaolishiyeye pannango, ntumishi jumo jwankongwe lina lyakwe Loda gwapite pilikanishiya. 14 Mwali jula akamanyeje kuti lilobhe lila lya a Petili gwainonyeye kwa kaje. Jwanguagula nnango gula, ikabhe gwabhutwishe kukwalugulilanga kuti a Petili pubhali pannango. 15 Gubhammalanjilenje mwali jula, "Ushikola shalubha!" Ikabheje jwalakwe gwapundile kukong'ondela kuti kweli. Gubhammalanjilenje bhalinkutinji, "Jwenejo malaika jwabho." 16 A Petili gubhapundile kuolishiya. Kungai gubhaaugulilenje nnango, bhaakaabhonaneje gubhakanganigwenje. 17 A Petili gubhaagoloshenyeje makono nkupinga bhapumulanje, gubhatalashiye Bhakulungwa shibhashite kwashoya nnyelesha. Kungai gubhaaugulilenje bhapelekanje ntenga kwa a Yakobho na ashaapwabho bhananji, gubhajabhwiye kwenda mmbali jina. 18 Kukasheje, ashimanjola gubhakwetenje lipamba lya kaje nndi yaapatile a Petili? 19 A Elode gubhaamulishye bhaloleye, ikabheje bhangaapatanga. Kwa nneyo gubhaamulishye ashimanjola bhala bhabhuywanje na bhahulagwanje. Kungai a Elode gubhajabhwiye ku Yudea, gubhapite tama ku Kaishalia. 20 A Elode bhashinkwatumbalilanga bhandu bha ku Tilo na ku Shidoni, ikabheje bhalabhonji gubhaatumilenje bhantenga. Gubhapanjilenje mbwiga na a Bhulashito bhali bhalukungwa bha nyumba ja bhakulungwa. Kungai gubhaajendele a Elode kukwajuga kubhe na ulele. Pabha shilambo shabhonji kubhakulupalilangaga kupata shalya kushilambo sha bhakulungwa a Elode. 21 Lyubha libhatumbilile, a Elode bhali bhawaliye ngubho yabho ya upalume, gubhatemi pa shitengu shabho sha upalume gubhatandwibhe kwaalungushiyanaga bhandunji. 22 Bhandunji bhala gubhajobhelenje nkwalumbilila bhalinkutinji, "Lyeneli lilobhe lya a nnungu, nngabha lika mundu." 23 Shangupe malaika jwa Bhakulungwa akwaagwiyaga pai a Elode kwa ligongo lyangapinga kwaapa a Nnungu Ukulungwa gwabho. Gubhaligwilwe na mbiu, gubhawile. 24 Lilobhe lya a Nnungu gulipundile kushuma. 25 A Bhanabha na a Shauli bhakamalyanaje liengo lyabhonji, gubhabhujilenje kukopoka ku Yelushalemu, gubhaatolilenje a Yowana bhashemwaga a Maliko gubhalongene nabhonji.

13 Likanisha lya ku Antiokia bhashinkupagwanga bhandunji bhananji bhalingini ashinkulondola bha a Nnungu na bhananji bhaajiganya. Munkumbimo bhaapali a Bhanabha na a Shimoni bhashemwa Bhanapi na a Lukio bha ku Kilene na a Manaeni bhalililwe pamo na bhakulungwa a Elode, pubhalinginji na a Shauli. 2 Bhai, bhalinginji nkujuga Nnungu na tabha, Mbumu jwa Ukonjelo gwashite, "Nng'agulilanje a Bhanabha na a Shauli kwa liengo linaashemelenje." 3 Bhai, bhakajuganaje Nnungu na kupunda tabha, gubhaabhishilenje makono, gubhaaleshilenje bhajendangane. 4 Bhai, a Bhanabha na a Shauli bhakatumwanjeje naka Mbumu jwa Ukonjelo, gubhaelelenje mpaka ku Sheleukia na gwajabhula penepo gubhakwelilenje meli mpaka ku shilambo shitimbililwe na mashi sha ku Shilia. 5 Bhakaikanganaje ku Shalamishi, gubhalunguyenje lilobhe lya a Nnungu nnyumba ya jujila Nnungu ya Shiyaudi. A Yowana pubhaaliji bhajangutila bhahonji. 6 Bhakapitanganenje pakati shilambo shitimbililwe na mashi mpaka ku Papo, kweneko gubhann'imenenje nng'abhi jumo

jwa Shiyaudi lina lyakwe a Bhaa Yesu paitembaga nkulondola jwa a Nnungu. 7 Jwene mundujo pali na a Shegiashi Pauli, bhakulungwa bha shilambo shitimbiliwe na masihi, bhandu bha lunda. A Shegiashi Pauli gubhaashemilenje a Bhanabha na a Shauli nkupinga bhapilikane ilobhe lya a Nnungu. 8 Ikabheje a Elimo bhaabhi bhala, malinga shibhaashemangaga kwa Shigiliki, gwabhataukenje nkupinga kuibhila bhakulungwa bha shilambo shitimbiliwe na masihi bhala bhanapunda kukulupalila ukilishitu. 9 Bhai, a Shauli bhashemwaga guna a Pauli, bhali bhagumbelwe na Mbomu jwa Ukonjelo, gubhaakolondolosheye meyo bhaabhi bha, 10 gubhashite, "Mmwe mmanami nkwatembaga bhandu! Mwana jwa Lijoka Lishetani. Amagongo nkutaoka shindu shoshowe shili sha mmbone na sha kweli, nkupinga leka kupuganya mipanda ja mmbone ja Bhakulungwa. 11 Nnaino mashili ga Bhakulungwa shigankome. Shimme nangalole na nkashibhona shilangaya sha lyubha kwa gene malangago." Shangupe indu yowe ikubhaga mbuti ndambwe na lubhindu pameyo gabho, gubhatandwibhe kwenda ako na koko bhailoleya mundu jwa kwaakamula nkono abhalongoye. 12 Bhakulungwa bha shilambo shitimbiliwe na masihi bhala bhakagabhoneje genego, gubhajinjile ukilishitu, gubhakanganigwe kwa kaje bhakapilikaneje majiganyo ga Bhakulungwa. 13 Gwajabhula ku Papo, a Pauli na ajabhonji gubhakweilenje meli gubhapitengenenge mpaka ku Pega ku Pampilia. Ikabheje a Yowana Maliko gubhaaleshilenje nibhuya ku Yelushalemu. 14 Ikabheje bhalabhonji gubhajabhulengene ku Pega gubhapitilenje pakati shilambo, gubhaikengenenge ku Antiokia shilambo sha Pishidia. Lyubha lya Pumulila gubhajinjilenje nshinagogi, gubhatemingenenge. 15 Bhakashomanenje shitabhu sha Shalia ja a Musha na majandiko ga Ashinkulondola bha a Nnungu, bhakulungwanji bha shinagogi gubhantumilenje mundu akaabhalanjilanje kuti. "Ashaapwetu, ibhaga nkwenje malobhe ga kwataganga ntima bhandunijibha, mmeleketanje," 16 Bhai a Pauli gubhajimi gubhagolweye nkono, nkupinga bhapumulanje gubhashite, "Bhashilambo bha pa Ishilaeli na mmowe nkwaajogopanga a Nnungu mpilikananje! 17 A Nnungu bha bhandunji bha pa Ishilaeli bhashinkwaagulanga ashinakulubhetu, nikwakuyanga kubha likabhila likulungwa pubhatamanganaga kujeni ku shilambo sha Mishili. A Nnungu gubhaashoshiyenje kweneko kwa mashili gabho gamakulungwa. 18 Kwa yaka makumi nsheshe nng'anga gubhaipilile itendi yabhonji. 19 Bhakaabbulaganenje bhandunji bha makabhila shabha ku Kanaani, nigubhaapelenje bhandunji bhabho yene ilamboyo kubha ulishi gwabhonji. 20 Yaka mia nsheshe na makumi nng'ano guipitile." "Kungai gubhaapelenje bhaukumulanga bhaalongoyanje mpaka mobha ga a Shamweli ankulondola bha a Nnungu. 21 Bhai gubhajujilenje bhapegwanje mpalume, a Nnungu gubhaapelenje a Shauli bhanabhabho a Kishi, bha kabhila ja a Bhenjamini, bhabhe a mpalume bhabhonji kwa yaka makumi nsheshe. 22 Bhakaashoyeje a Shauli, a Nnungu gubhaagwile a Daudi kubha bhakulungwa bhabhonji. A Nnungu gubhalangwile shibhashite engwa bhalinkuti. 'Nimmweni Daudi mwana gwabho a Yeshe, anonyela muntima gwangu, mumdu apinga tenda yowe ingupinga nne.' 23 Kukoposhela nnubheleko luka jwene mundujo, a Nnungu malinga shibhashite lajila,

bhandu bha pa Ishilaeli bhashikumpeleshelanga nkugombola, yani a Yesu. 24 A Yesu bhakanabhe tandubha liengo lyabho, a Yowana bhashinkwaalongolela bhailunguya kuti bhandunji bhowe bha pa Ishilaeli bhanaapinjikwanga bhaipetanje na bhatishwa. 25 A Yowana bhalmaliya liengo lyabho bhahheleketete nnei. 'Punkuganishiyanga kuti nne gani? Nne nngabha bhunkwaalolelagabho. Bhenebho bhanakwiya nnyuma jangu na nne ngapinjikwa nkali kugopola mbundo ya ilatu yabho.'" 26 "Ashaapwanga, mmanganyanji nninginji bha shipinga sha a Bhulaimu na bhandunji bhangabha Bhayaudi bhakwaajogopanga a Nnungu! Malobhe ga ntapulo gatuishile. 27 Pabha bhashilambo bha ku Yelushalemu na ashikalongolele bhabhonji bhakaamanyinjiji a Yesu, wala malobhe ga ashinkulondola bha a Nnungu gashomwaga Mobha ga Pumulila gowe. Nkali nneyo, bhashinkugatendanga malobhe ga ashinkulondola bha a Nnungu gamalile kwa kwaukumula a Yesu bhabhulagwe. 28 Nkali bhalepelenje kushibhona shibhalebhile sha kwaatenda bhabhulagwe, Bhayaudi bhashinkwajuganga a Pilato bhaakumule kubhulagwa." 29 "Na bhakamaliyeje kutenda gowe gubhajandishilwe a Yesu, gubhaatuluyenje munkongo mula gubhaabhashilenje nnikabhuli. 30 Ikabheje a Nnungu gubhaayushiye. 31 Na kwa mobha gamagwinji gubhabhoneshe na bhandunji bhalongene nabhonji kukopoka ku Galilaya mpaka ku Yelushalemu bhanganyabho nnaino ni bhakong'ondela bhabho kubhandu bha pa Ishilaeli. 32 "Na uwe tunakunnungushiyanga Ngani ja Mmbone ja malagano ga a Nnungu jibhapegwilwenje ashinakulubhetu, 33 a Nnungu bhashinkugatenda gamalile nnaino kwetu uwe uukulu gwabhonji, kwa kwaayuya a Yesu, malinga shiijandikwe nshitabhu sha Shabhuli ja bhili, 'Ugwe Mwanangu, Nne lelo Nanng'inago.' 34 Na ga kwayuya kukopoka kubhawilenje, bhanawe kabhili, a Nnungu pubhashite nnei. 'Shinikupe mboka ya Ukonjelo na ya kweli inaalajile a Daudi.' 35 Na muna gubhashite kabhili, 'Nkanneka jwa Ukonjelo jwenu abhole.' 36 Pabha, a Daudi bhayene bhakamaliyeje kutenda gubhapinjile a Nnungu nnubheleko lwabho, kungai gubhawile gubhabhishilwe nnikabhuli tome na ashainabhabho na shiilu shabho shikubholaga. 37 Ikabheje bhayushiywe na a Nnungubha, shiilu shabho shangabhola." 38 "Kwa nneyo, ashaapwanga mmumanyanje kuti, kupitila a Yeshubho nnaalungushiyanga ngani ja leshelelwa yambi na kila akwaakulupalila bhenebho anaaleshelelwa yambi yakwe. 39 Na kuti jojowe akwaakulupalila a Yesu anaaleshelelwa ilebho yowe, genego gakanatendeshe kwa Malajilo ga a Musha. 40 Bhai, mwiteiganje ganakumpatanga gajandikwe na ashinkulondola bha a Nnungu. 41 'Mpiikananje mmanganyanji mmanyegaya, nkanganigwanje nng'obhanje! Pabha shindu shingutenda nnaino, mmobha genunji gano, nkashikulupalilanga nkali mundu antalashiyanga.'" 42 A Pauli na a Bhanabha pubhakopokanganaga nshinagogi mula, bhandunji bhala bhakwaajugangaga bhajiyangananje Lyubha lina lya Pumulila, kubhaatalashiyanje kabhili gene malobhego. 43 Shitamo shila shikamaleje, Bhayaudi bhabhagwinji na bhandunji bhangabha Bhayaudi bhailundilenje na dini ja Shiyaudi gubhaakagulenje a Pauli na a Bhanabha. Mitume bhala gubhakungulwishe nabhonji nkwataganga ntima bhapundanje kukulupalila ntuka

gwa a Nnungu. **44** Lyubha Iya Pumulila Iyakagwile, tome bhandunji bhowe bha pashilambo pala gubhaikengenene kupilikanishiya lilobhe Iya Bhakulungwa. **45** Ikabheje Bhayaudi bhakalubhonanje lugwinjili Iwa bhandu gubhaabhonelenje lupimililo, gubhataukenje malobhe gubhabheleketaga a Pauli akuno bhalikwaatukananga. **46** Nkali nneyo, a Pauli na a Bhanabha gubhabheleketenje gwangali bhoga bhalinkutinji, "Ishinkupinjikwa lilobhe Iya a Nnungu litandubhe kunnng'ishilanga, ikabheje pabha nshikulikananga nikwiibhona nkapinjikwanga kuupata gumi gwa pitipiti, bhai tunakunnekanga twaajendelanj bhandunji bhangabha Bhayaudi. (aiōnios g166) **47** Pabha tushilajilwa na Bhakulungwa kuti, "Njikuubhika ugwe ubhe shilangaya sha bhandunji bhangabha Bhayaudi, nkupinga ubhe ntapulo gwa pa shilambolyo." **48** Bhandunji bhangabha Bhayaudi bhakapilikananjeje genego guyaanonyelenje, gubhalikushiyenje lilobhe Iya Bhakulungwa na bhatumbililwenje kuupata gumi gwa pitipiti bhala, gubhaakulupalilenje a Yesu. (aiōnios g166) **49** Lilobhe Iya Bhakulungwa gulishumile shilambo showe shila. **50** Ikabheje Bhayaudi gubhaakwishiyenje bhanabhakongwe bha manyika bhakwaajogopanga a Nnungu na ashikalongolele bha shene shilambo shila, gubhatandubhenje kwaapoteka a Pauli na a Bhanabha, nigubhaabhinjilenje nshilambo shabhonji. **51** Bhai, bhantenga gubhakung'undenje ndutuli ja mmakongono gabhonji mbuti shileyo, gubhapitengenene ku Ikonio. **52** Na bhaajiganywa bha ku Antiokia bhala gubhainonyelenje na gubhagumbelenjwe naka Mbumu jwa Ukonjelo.

14 Ku Ikonio, a Pauli na a Bhanabha gubhainjilenje nshinagogi ja Bhayaudi. Na bhakabheleketanjeje gwangali bhoga, likundi likulungwa Iya Bhayaudi na Bhagiliki gubhakulupalilenje. **2** Ikabheje Bhayaudi bhananji bhakanilenje kukulupalila gubhaakwishiyenje na kwaataganga njimwa mmitima jabhonji bhandunji bhangabha Bhayaudi, nkupinga bhaataukanje ashaapwetubho. **3** A Pauli na a Bhanabha gubhalonjeyenje kweneko. Gubhabheleketenje kwa mashili, ngani ja Bhakulungwa na bhalabho gubhakong'ondele ntenga gubhalunguyangaga ga mboka yabho, kwa kwaakomboyanga kutenda ilangulo na ilapo. **4** Ikabheje bhandunji bha shene shilambo shila gubhalekenenje, bhananji gubhailundilenje na Bhayaudi, bhananji na mitume. **5** Kungai, bhandunji bhananji bhangabha Bhayaudi na Bhayaudi, pamo na ashikalongolele bhahonji, gubhatandubhenje kwaapotekanga bhantenga kwa kwaakomanga maganga. **6** Mitume bhakang'amulanjeje genego, gubhabhutushilenje ku Lishitila na ku Debhe, ilambo ya ku Likaonia na ilambo ya tome na kweneko, **7** gubhatemingenenje kweneko bhalipundanga lunguya Ngani ja Mmbone. **8** Ku Lishitilako ashinkupagwa mundu jumo aliji nangwabha shibhelekele, jwangalinga kujendajenda. **9** Jwene mundujo atendaga kwaapilikanishiya a Pauli pubhabheleketaga. A Pauli gubhannolesheye ukoto nikummona akwete ngulupai japinga kulamiywa, **10** kwa lilobhe Iya utiya gubhashite, "Jima kwa makongono gako!" Shangupe mundujula gwajimi, nigwatandwibhe kujimajima. **11** Lugwinjili Iwa bhandu lukashibhoneje shibhatendile a Pauli, gubhatandubhenje kujobhela kwa lugha ja Shilikaonia bhalinkutinji, "Ashi Nnungu bhashikututulushilanga mbuti bhandunji!" **12** A Bhanabha

gubhashemilwe a Sheu, a Pauli pabha bhalabho bhajili bhaabheleketaga, gubhashemilwe a Eme. **13** Bhakulungwa bha bhaabhisila bha nyumba jika nnungu Sheu jaliji palanga shilambo, gubhajile najo ng'ombe nannume na malubha pa nnango nkulu gwa shilambo, bhalabho na bhandunji bhala bhalipinganga shoya mbepei kwa a Pauli na a Bhanabha. **14** Ikabheje mitume a Bhanabha na a Pauli bhakapilikananjeje, gubhapapulenje nngubho yabhonji na gubhabhutushilenje kulikundi Iya bhandunji kula, kwa lilobhe Iya utiya bhalinkutinji, **15** "Ashaapwetu, kwa nndi nkututendanga nnei? Numbe uwe tubhandupe malinga mmanganyanji. Tunakunungushiyanga Ngani ja Mmbone nnekanje yangali ya mmbonei, mwaatendebhushilanje a Nnungu bhakwete gumi, bhapengenye kunnungu na shilambolyo na bhaali na indu yowe ili nkati jakwe. **16** Bhukala a Nnungu bhashinkwaalekenga bhandu bhowe bhatendanje mwaakupinjilanga. **17** Nkali nneyo, a Nnungu bhangaleka kwiilangula kwa itendi ya mmbone ibhakuntendelangaga, bhanakumpanganga ula kukopoka kunnungu, bhanakumpanganga mauno kwa miongwe jakwe, bhanakumpanganga shalya na kuangalala mmitima." **18** Nkali bhabheleketenje nneyo, yashinkukola ukomu kwaalimbiyanga bhanaashosheyanje mbepei. **19** Ikabheje Bhayaudi bhananji gubhaikengenene kukopoka ku Antiokia na ku Ikonio, gubhaatendilenje bhandunji bhailundanje na bhene bhanyabho, gubhaakomilenje na maganga a Pauli, gubhaakweketenje mpaka palanga shilambo bhaliganishiya ngani kuti bhawile. **20** Ikabheje bhaajiganywa bhakaimananjeje nikwaatimbiila, gubhajumwisha, gubhabhujile kunnjini. Malabhi gakwe, gubhapite na a Bhanabha mpaka ku Debhe. **21** A Pauli na a Bhanabha bhakalunguyanjenje Ngani ja Mmbone ku Debhe na kwapatanga bhaajiganywa bhabhagwinji, gubhatandubhenje mwanja kubhuja ku Antiokia kupitila ku Shila na ku Ikonio. **22** Gubhaashimilikenje bhaajiganywa bha yene ilamboyo na kwaataganga nima bhatamangananje ngulupai. Gubhaalugulilenje, "Inapinjikwa uwe tubhowe tupitile nshilaje sha punda, nkupinga tujinjile mu Ukulungwa gwa a Nnungu." **23** A Pauli na a Bhanabha bhakaaguilanjenje bhanangulungwa kwa kila likundi Iya bhandunji bha a Nnungu, kungai gubhajulilenje Nnungu na tabha, gubhaabhisilenje muulinda gwa Bhakulungwa bhubhaakulupalilanga. **24** Bhakapitilanjeje ku shilambo sha ku Pishidia, gubhaikengenene ku Pampilia. **25** Bhakalunguyanjenje lilobhe lila ku Pega, gubhapitengenene ku Atalia. **26** Gwakopoka kweneko gubhakwelilenje meli kubhuja ku Antiokia na kweneko gubhajulilwenje mboka ja a Nnungu kwa ligongo Iya liengo libhakamulenje nimaliya lila. **27** Bhakaikangananjeje ku Antiokiako gubhatemingenenje shitamo sha bhandunji bha a Nnungu bha penepo, gubhaatashiyenje yowe ibhatendile a Nnungu pamo na bhene bhanyabho na a Nnungu shibhashite kwaaguilanga nngano bhandunji bhangabha Bhayaudi kujinjila ngulupai. **28** Gubhalonjeyenje kweneko pamo na bhaakulupalilangaga a Yesu bhala.

15 Bhai, gubhaikengenene bhandunji ku Antiokia kopokanga ku Yudea gubhatandubhenje kwaajiganyanga bhakilishitu kuti, "Ibhaga nkajalukanje malinga shiilugwilwe Mmalajilo ga a

Musha nkatapulwanga.” 2 Lyene lilobhelo lyashinkukumbuya ntau gwankulungwa. A Pauli na a Bhanabha bhakataukanganje na bhandunji bhala, gwamulishwe kuti, a Pauli na a Bhanabha na bhandunji bhananji bha a Nnungu bha ku Antiokia bhajendanganje ku Yelushalemu bhakabhoneganenje na mitume na bhanangulungwa ga jene nganijo. 3 Bhai, bhakatumwanjeje na bhandunji bha a Nnungu, gubhapitilenje pakati shilambo sha Poinike na ku Shamalia, akuno bhalilunguyanga ngani bha bhandunji bhangabha Bhayaudi shibhashite kwaatendebhushilanga a Nnungu, jene nganijo gujaanonyelenje kwa kaje bhakilishitu howe. 4 Bhakaikanganenje ku Yelushalemu gubhaposhelwenje na bhandunji bha a Nnungu na mitume na bhanangulungwa, na bhalabhonji gubhaatalashiyenje yowe ibhatendile a Nnungu pamo na bhanganyabho. 5 Ikabheje bhakilishitu bhananji bha nkumbi gwa Mapalishayo gubhajimingenenje bhalinkutinji, “Inapinjikwa bhandunji bhangabha Bhayaudi bhajalukanje nkukaguya Shalia ja a Musha.” 6 Bhai, mitume na bhanangulungwa gubhatemingenenje lukumbi bhaliganishiyenje lilobhelo. 7 Nkungulu ukalonjeyeje, a Petili gubhajimi, nigubhashite, “Ashaapwetu, mmanganyanji mmumanyinji kuti kuumila ndandubho a Nnungu bhashinkupinga kung’agula nne kukopoka munkumbi gwenunji nunguye Ngani ja Mmbone kubhandunji bhangabha Bhayaudi, nkupinga bhapilikanenje na kulupalila. 8 Na bhalabho a Nnungu bhanakujimanya mitima ja bhandunji, gubhakong’ondele kuti bhaapinjilenje, kwa kwaapanganga Mbumu jwa Ukonjelo malinga shibhatupele uwe. 9 Wala bhangaagula uwe na bhanganyabho, bhashikujitakaya mitima jabhonji kwa ngulupai. 10 Bhai nnaino, kwa nndi nnakwaalinganga a Nnungu kwa kwaatikwanga bhandunji mitenga jibhalepelenje kujigala ashainabhetu, nkali uwe twashinkupelela jigala. 11 Ikabhe putukulupalila kuti shitutapulwe kwa ntuka gwa Bhakulungwa a Yesu malinga bhanganyabho.” 12 Bhai, bhandunji howe pa lukumbi pala, gubhatemingenenje ilili, nkwaapilikanishiyanga a Bhanabha na a Pauli bhalitalashiyanga ga ilangulo na ilapo ibhatendile a Nnungu kwa makono gabhonji kubhandunji bhangabha Bhayaudi. 13 A Bhanabha na Pauli bhakapumulanjeje kotalashiya, a Yakobho gubhatandwibhe kubheleleka bhalinkuti, “Ashaapwanga mmilikanishiyenje! 14 A Shimoni guna bhashemwaga a Petili bhatutalashiye, bhukalago a Nnungu shibhaashite languya kwaapinganga bhandunji bhangabha Bhayaudi, gubhaagwilenje bhananji munkumbi gwabhonjimo bhahanganje bhandu bhahho. 15 Na malobhe ga ashinkulondola bha a Nnungu ganatolana na jene nganiji, malinga shijandikwe Mmajandiko ga Ukonjelo, 16 ‘Gapitaga genega shimuje, na shinjenje kabhili ku nyumba jibhomweshe ja a Daudi, shing’alaye maame gakwe nishenga kabhili. 17 Nkupinga bhandunji bhaigelenje, na bha ilambo ina bhashemwanga kwa lina lyangu, bhaaloleyanje Bhakulungwa. 18 Bhakulungwa bhashite, bhatendile genega gamanyishe kuumila bhukala.” (aiōn g165) 19 “Kwa nneyo, nne ngumatenda nnei, tunaabhyanje bhandunji bhangabha Bhayaudi bhakwaatendebhushilanga a Nnungu. 20 Ikabhe twaajandishilanje bhaluwa kuti bhanalyanganje yalya yanyata ya mbepei ya ashinnungu bha yanamu, bhaiepuyanje na labhalabha, bhanataunanje nnyama yawa

shibhudu na bhanalyanganje minyai. 21 Pabha kuumila bhukala bhapalinji bhandu bhalunguyanga Malajilo ga a Musha na ganashomwa nnyumba ya jujila Nnungu kila lyubha lya pumulila.” 22 Bhai, mitume na bhandunji howe bha a Nnungu na bhanangulungwa bhahonji gubhaagwilenje bhandunji kukopoka munkumbi gwabhonji bhaatumanje kwenda ku Antiokia na a Pauli na a Bhanabha. Bhai, gubhaagwilenje a Yuda guna pubhashemwaga a Bhalishabha na a Shila bhowenji bhandunji bha manyika munkumbi gwa bhakilishitu. 23 Gubhaakamuyenje bhaluwa jajandikwe nnei, “Uwe twaashapwenunji, mitume na bhanangulungwa, shalamu yenunji mwashaapwetu bha ilambo ina nninginji ku Antiokia na ku Shilia na ku Kilikia. 24 Tupilikene kuti bhandunji bhananji bha kopoka kunngwetu kuno bhashikumpuganyanga kwa malobhe gabhonji, nikumpanganga lipamba mmitima jenunji. Ikabheje akuno jwakwa abhatumilenje. 25 Kwa nneyo tushitama pamo nilagana twaagulanje bhandu twaatumenje bhajiyanganenje kweneke na ashaambwiga ajetunji a Bhanabha na a Pauli, 26 bhandunji bhaikakatiimilenje gumi gwabhonji kwa ligongo lya liengo lya a Yesu Kilishitu. 27 Bhai, twaatumilenje a Yuda na a Shila shibhamalanjilanje kwa kang’wa yabhonji gutjandishe geno. 28 Pabha Mbumu jwa Ukonjelo na uwe tushibhona sha mmbone tunantwikanje mishigo ikabhe gene gapinjikwa gala. 29 Yani, nnalyanganje nnyama ibhishilwe mbepei kuyanamu, nnapapilanje minyai na nnalyanganje nnyama yawa shibhudu, mwiepuyanje na labhalabha. Shintendanje mwammbone mwiepuyangaga na yeneyo. Mwanjanganai!” 30 Mitume bhala bhakalajilwanjeje, gubhaelelenje kuloya ku Antiokia. Kweneke gubhashemilenje lugwinjili lwa bhakilishitu gubhaapelenje bhaluwa jila. 31 Bhakashomanjeje bhaluwa jila, malobhe gakwe gakaataganga ntima niguyaanonyelenje kwa kaje. 32 Bhai a Yuda na a Shila, pabha na bhalabhonji pubhalinginji ashinkulondola bha a Nnungu, gubhakungulunkenje nabhonji kwa malobhe gamagwinji bhalikwaataganga ntima na kwaashimilikanga. 33 Na bhakatamanganenje kweneke kwa mobha gashoko, bhakilishitu bha ku Antiokia bhakwalajilangaga akuno bhalikwajujilanga ulele, kungai gubhabhujilengene kubhandunji bhaatumilenje. 34 Ikabheje a Shila gubhabhweni shammbone bhatame koko. 35 A Pauli na a Bhanabha gubhatemingenenje ku Antiokia kwa mobha, bhalijiganyanga na lunguya lilobhe lya Bhakulungwa pamo na bhandunji bhana bhahagwinji. 36 Gakapiteje mobha gashoko, a Pauli gubhaabhalanjile a Bhanabha, “Tubhuje tukaowelanje ashaapwetu kila shilambo shitulungwiye lilobhe lya Bhakulungwa, tukaalolanje bhalinginji bhuli.” 37 A Bhanabha gubhapinjile bhalongane nabhonji a Yowana bhaashemwa a Maliko. 38 Ikabheje a Pauli bhanganjira kulongana na a Maliko, pabha ku Pampilia bhashinkwaalekenga nikana kulongana nabhonji kuliengo lyabhonji. 39 Bhai, gubhataukengenenge kwa punda, mpaka gubhalekenenje. A Bhanabha gubhaatolile a Maliko, gubhakwelilenje meli kwenda ku Shilia. 40 Ikabheje a Pauli gubhaagwile a Shila, bhakilishitu bha penepo bhakaajujilanje mboka ja Bhakulungwa, gubhajabhwiye. 41 Gwene mwanjago gubhapitile ku Shilia na ku Kilikia, bhalipita shimilika bhandunji bha a Nnungu.

16 A Pauli gubhaishe ku shilambo sha Debhe na ku Lishitila, kweneko bhatendaga tama bhaajiganywa bhamo bhashemwa a Timoteo. Anyinabhabho nabhalabho pubhaaliji bhaakulupalila na pubahaaliji Bhayaudi, ikabheje ainabhabho pubhaaliji Bhagiliki. 2 A Timoteo bhatendaga shuma uguja ku bhakilishitu bhatamanganaga ku Lishitila na ku Ikonio. 3 A Pauli gubhapijile bhalongane na a Timoteo, kwa nneyo gubhaatijile unyago. Bhashinkutenda nneyo kwa ligongo lya Bhayaudi bhatamanganaga jene mmbali jila bhashinkumanyanga kuti a Timoteo ainabhabho pubhaaliji Bhagiliki. 4 Pubhapitanganaga muilambo mula, a Pauli na a Timoteo bhashinkwapanganga bhandunji malajilo gakopweshe ku Yelushalemu kwa ashimitume bha a Yesu na bhanangulungwa, gubhaakomelesheyenje bhagatolelelanje. 5 Kwa nneyo bhandunji bha yene nyumba ya jujila Nnugu ila gubhapundilenje kwiishimilika nngulupai na bhandunji bha kwilunda bhakujenjeshakangaga. 6 A Pauli na ashajabhonji gubhapitilenje mmbali ya ku Piligia na ku Galatia, pabha Mbumu jwa Ukonjelo ashinkwaibhililanga bhanalunguyanje gwene ntengago muilambo ya ku Ashiya. 7 Bhakaikangananje mu mpika gwa shilambo sha Mishia, gubhalinjilenje kujinjila kushilambo sha ku Bhisinia, ikabheje Mbumu jwa a Yesu gwabhalimbiyenje. 8 Bhai, gubhapitilenje ku Mishia, gubhaelelenje mpaka ku Toloa. 9 Shilo, a Pauli gubhaagamile, gubhamweni mundu jumo jwa ku Makedonia ajimi alikwaajuga “Nnjomboshe nniye ku bhandunji bha ku Makedonia kuntujangute.” 10 Shangupe a Pauli bhakaagamileje nneyo, twangakabha gutupanganishe kwenda ku Makedonia, tulikumumanya kuti a Nnugu bhashikutushema tukaalungushiyenje Ngani ja Mmbone. 11 Tukajabhuleje ku Toloa, gutukwelle meli kwenda ku Shamotalake na malabhi gakwe gutuishe ku Neapoli. 12 Tukajabhuleje penepo, gutuishe mpaka ku Pilipi shilambo sha ku Makedonia, shilambo shikulungwa sha Bhaloma jene mmbali jila. Gutulonjeye shene shilambosho mobha gowepe. 13 Lyubha lya Pumulila gutukopweshe palanga shilambo, gutupite nnyenje lushi nkuloleya pa jujila Nnugu, gututemi nkukunguluka na bhanabhakongwe bhaimenenje penepo. 14 Munkumbi gwa bhatupilikanihiyangaga bhala, bhashinkupagwa bhakongwe bhamo bhaajogopaga a Nnugu bhashemwaga a Lidia, bha shilambo sha ku Tiatila bhaaliji na upindi gwa nngubho ya galama. Bhakulungwa bhashinkwaugulila ntima, bhagaposehe malobhe gubhabheleketaga a Pauli. 15 Bhakabhatishweje bhenebho na bhandunji bha nnyumba jabho, gubhatushemile kungwabho bhalinkuti, “Ibhaga kweli nnjibhweninji ngulupai jangu ku Bhakulungwa, nnjangananje kumui kuntamangananje.” Gubhatushondelesheye kwa kaje. 16 Lyubha limo tulikwenda pa kwaajujila a Nnugu, gutuimene naka mwali jumo akwete lioka lya londola. Jwene mwalijo atendaga kwaapatilanga mmbiya yaigwinji ashinangologwe kwa liengo lyakwe lya londola. 17 Bhai, mwali jula gwabhakagwile a Pauli na uwe, alijobhela alinkuti, “Abha bhandunji bha nibhaakamula maengo bha a Nnugu bha kunnugu. Bhanakungulushilanga mpanda gwa patila ntapulo!” 18 Gwatendile nneyo kwa mobha gamagwinji mpaka lyubha limo a Pauli guyaashimile, gubhatendebhwishe gubhammalanjile lioka jula, “Ngunakuumulisha kwa lina lya a Yesu Kilishitu

gunshoshe ajul!” Shangupe lioka jula gwanshoshile mwali jula. 19 Ashinangologwe mwali jula bhakabnonanje ngulupai jabhonji jaapatilangaga mmbiya jiohbhile, gubhaakamwilenje a Pauli na a Shila, nikwaakwakwatilanga mpaka kubhauhiyanga indu kubhakulungwanji bha shilambo. 20 Gubhaalugwilenje ku bhaakumulanga bhalinkutiniji, “Abha bhandunji bha Bhayaudi, na bhananyatyanga shilambo shetu. 21 Bhanalunguyanga ngani ja ikubho ikaapinjikwa kuiposhela uwe wala kuikagula, pabha uwe tu Bhaloma.” 22 Lugwinjili lowe lwa bhandu gulwaajendelenje kukwakomanga a Pauli na a Shila, nabhalabhonji bhaakumulanga gubhauhilenje ngubho yabhonji kwa mashili, gubhaamulishenje bhakomwanje ibhoko. 23 Bhakakomwanjeje kwa kaje gubhaugalilwenje nnyelesha, gubhannajilenje linjola jwa ligelesha kubhika ulinda gwa kajekaje. 24 Linjolajo akapateje gene malajilogo, gwabhaugalilenje a Pauli na a Shila kati ja nkati ligelesha lila bhali bhaatabhilenje makongono na makono nniipoto. 25 Tome na pakati shilo a Pauli na a Shila bhatendaga juganga Nnugu akuno bhalijimbanga nyimbo ya kwainiya, bhaatabhwanga bhananji bhalikwaapilikanihiyangaga. 26 Shangupe, litaka likutetemelaga kwa jogoya na mubhaolelenje makumba ga lujumba lya ligeleshalila mukutenganyikaga, shangupe milango jowe ja ligelesha lila jikuugukaga na mindondolo jibhatabhilwenje jila jikugopokaga. 27 Linjola jwa ulinda jula akajumusheje nikujibhona milango ja ligelesha jugwishe, gwaganishiye kuti bhaatabhwanga bhowe bhabhutekenje, kwa nneyo gwaalomwele upanga gwakwe nkupinga aibhulaje. 28 Ikabheje a Pauli gubhauhiye lilibhe bhalinkuti, “Unaipoteshe, pabha uwe tubhowe tupali pano.” 29 Gwashemiye kandili, jikaisheje linjola jula gwabhatushile nkati, gwaigwishiyeye pamakongono ga a Pauli na a Shila akuno alitetemela kwa jogopa. 30 Kungai gwabhakopoyenje palanga, nigwashite, “Ndende bhuli niitapule?” 31 Gubhannjangwilenje, “Gwaakulupalila a Yesu shiutapulwe ugwe na likaja lyako.” 32 Bhai, gubhannungushiyenje lilibhe lya Bhakulungwa jwenejo na bhandunji bhowe bha likaja lyakwe. 33 Linjola jula gwabhatolilenje malanga ga shilo pegala gwabhakungenje ilonda yabhonji, kungai jwenejo na bhandunji bha nnyumba jakwe bhowe gubhabhatishwenje gwanakamope. 34 Gwabhapelenje a Pauli na a Shila nngwakwe, gwabhapelenje shalya. Jwalakwe na bhandunji bha nnyumba jakwe gubhainonyelenje, pabha nnaino bhaakulupalilenje a Nnugu. 35 Kukasheje lyamba, bhakumulanga gubhaatumilenje bhakulungwanji bha manjola bhalinkutiniji, “Nkaagopolanji bhandunji bhala bhajendangane.” 36 Linjola jula akwaalugulilaga a Pauli jene nganijo alinkuti. “Bhaakumulanga bhashitumanga ntenga nkupinga nngopolwanje. Bhai, nnaino nkopokangane nnjendangane kwa ulele.” 37 Ikabheje a Pauli gubhannjangwile, “Bhashikutukomanga ibhoko palugwinjili gwangali kutuukumula na uwe Tubhaloma. Na kabhili bhashikutuugalilanga nnyelesha na nnaino bhanapinganga kutugopolanga kwa nng’yo! Nngabha nneyo, ikabheje bhajiyangananje ashaayene kubhatukopoyanje.” 38 Bhakulungwanji bha manjola gubhapitenje kwaalugulilanga bhakumulanga jene nganijo, bhakapilikananjeje kuti a Pauli na a Shila ni Bhaloma, gubhajogopenje. 39 Kwa nneyo, gubhapite kwaagwilanga pa makongono, bhakaakopoyanjeje palanga

gubhaajujilenje bhashokangananje pa shilambo pala. 40 A Pauli na a Shila gubhakopokenje nniagelesha, gubhapitengenene kumui kwa a Lidia. Kweneko gubhaimenenje na bhakilishitu na bhakaataganjeje ntima gubhajabhulenenje.

17 Bhakapitalanjenje ku Ampipoli na ku Apolonia, gubhapitengenene mpaka ku Teshalonike, kweneko jashinkupagwa shinagogi ja Bhayaudi. 2 A Pauli malinga nkubho gwabho gubhailundile, gubhakungulwishe nabhojji ga Majandiko ga Ukonjelo kwa Mobha ga Pumulila gatatu gwangali pumulila. 3 Bhalilunguya na talashiya kuti yashinkupinjikwa a Yeshu bhapotekwe na bhayushe kukopoka kubhawilenje. Na kuti, "A Yeshu bhungunnungushiyangabho ni a Kilishitu." 4 Bhananji munkumbi gwabhojji gubhakulupalilenje nigubhailundilenje na a Pauli na a Shila. Na Bhagiliki bhabhagwinji bhaajogopangaga a Nnungu na bhanabhakongwe bhakulungwanji, gubhailundilenje. 5 Ikabheje Bhayaudi gubhakwetenje lupimililo, gubhapolekenje bhandunji bhanginginji bha mmbone, gubhatendilenje ulendo nigubhakumbuyenje nrjasha pa shilambo powe. Gubhapitengenene ku nyumba ja a Yashoni bhaliganishiyanga kuti kweneko shibhaapatanje a Pauli na a Shila nkupinga bhaapelekanje ku lugwinjili lwa bhandu. 6 Ikabheje bhangaapatanga, kwa nneyo gubhaakwewetenje a Yashoni na bhakilishitu bhananji mpaka ku bhakulungwanji bha shilambo, bhalijobhelanga bhalinkutinji, "Bhene bhandunji bha bhanapuganyanga shilambolyo na nnaino bhakengenene na kukuno. 7 A Yashoni bhashikwaposhelanga kungugwabho. Bhowe bhanakananga Malajilo ga a Kaishali, bhakutinji. 'Bhapali bhakulungwa bhana bhashemwa a Yeshu.'" 8 Kwa gene malobhego, bhakulungwanji bha shilambo na lugwinjili lwa bhandunji gubhatengukenje. 9 Gubhaatendilenje a Yashoni na ashaajabhojji bhowe bhashoyanje mmbiya, kungai gubhaaleshilenje bhajabhulanganene. 10 Ikaishileje shilo, bhakilishitu bhala gubhaapelekenje a Pauli na a Shila mpaka ku Bheloya. Bhakaitanganenje kweneko gubhajinjilenje nshinagogi ja Bhayaudi. 11 Bhene bhandunji bho pughalinginji bhanguja kupunda bha ku Teshalonike bhala. Gubhaliposhelenje liobhe lila kwa ntima gwa mmbone, gubhakaguyenje Majandiko ga Ukonjelo kila lyubha, nkupinga bhalolanje ibhaga ibheleketwa na a Pauli na a Shila ili ya kweli. 12 Bhabhagwinji munkumbi gwabhojji mula bhakukulupalilangaga na bhanabhakongwe Bhagiliki bhakwetenje itengu na bhanabhalume bhabhagwinji. 13 Ikabheje Bhayaudi bha ku Teshalonike bhakapilikananjeje kuti a Pauli bhanalunguya liobhe lya a Nnungu ku Bheloya, gubhapitengenene kweneko, gubhatandubhenje kutenda nrjasha na kukwiya lugwinjili lwa bhandu. 14 Shangu bhakilishitu bhala gubhaapelesheyenje a Pauli mpaka kunyenje litanda, ikabheje a Shila na a Timoteo gubhalepekenje ku Bheloya. 15 Ikabheje bhaapelesheyenje a Pauli bhala, gubhaapelekenje mpaka ku Atene. Kungai, gubhabhujilenje na ntenga kukopoka kwa a Pauli gwa kuti, a Shila na a Timoteo bhanakabhanje kwaakagula ku Atene. 16 A Pauli bhali nkwaalindililanga a Shila na a Timoteo ku Ateneko, yashinkwaashima muntima gwabho bhakabhoneje yanamu ya ashinnungu igumbele shene shilambo shila. 17 Bhai, nshinagogi a Pauli bhatendaga

kunguluka na Bhayaudi na bhandunji bhana bhaajogopangaga a Nnungu na kila lyubha bhatendaga tenda nkungulu gwa palugwinjili na bhandunji bhobhowe bhaibhoneyangaga penepo. 18 Na bhananji bhakagulangaga majiganyo ga a Epikulo na a Ashitoiki gubhataukenje. Bhananji bhalinkutinji, "Bhapinga bheleketa nndi bhangumbabha?" Bhananji gubhashiteanje, "Paabhoneka mbuti bhanalunguya ga ashi nnungu bha shijeni." Pabha a Pauli bhatendaga lunguya ga a Yeshu na ga yuka. 19 Kwa nneyo gubhaatolilenje a Pauli gubhaapelekenje ku lukumbi lwa ashikalongolele bha shilambo lwashekwaga Aleopago, gubhashitenje, "Tunapinga tugamanye malombolelo ga majiganyo genu ga shijeni gunkulunguyaga. 20 Indu ina itupilikene mmakutu getu inabhoneka ya shijeni kungwetu. Tunapinga tumumanye yene indu malombolelo gakwe nndi." 21 Pabha bhandunji bha ku Atene na bhandunji bhananji bhatamanganaga kweneko bhatendaga pinganga kutaguiliana na pilikanishiya ngani ja indu ya shijeni. 22 Bhai, a Pauli gubhajimi pa lukumbi lwa Aleopago, gubhashite, "Mmashilambo bha pa Atene! Pungubhona kuti mmanganyanji nmatolelelana kwa kaje ngani ja dini, 23 pabha punapitaga ako na koko nikwibhona indu yenunji munkujijilanga Nnungu, njikushibhona shitala shimo shijandishwe. 'Kwa a Nnungu bhutukakwamanya.' Bhai, nne ngunakunnungushiyanga, ga bhene a Nnungu bhunkwaatindibhalilanga gwangali kwaamanyabho. 24 "A Nnungu, bhapengenyene shilambolyo na indu yowe ili nkati jakwe, bhashibha Bhakulungwa bha kunnungu na pa shilambolyo, bhalabho bhakatama mmajumba ga julila Nnungu gashenjilwe na bhandunji. 25 Na wala shakwa shibhaapinga mundu abhatendele mbuti shipali shibhaaloleya, pabha bhenebho ni bhakwaapanganga bhandu bhowe gumi na kwaapanganga kila shindu. 26 Na kukoposhela kuka mundu jumo a Nnungu gubhapengenyene bhandunji bha ilambo yowe nikwaatendanga bhajenelanje pa shilambolyo. Bhali bhajibhishile miongwe na mipika ja mmbali ya ilambo ya tama bhene bhandunji bho. 27 "Bhashinkutenda nneyo, nkupinga bhandunji bha ilambo yowe bhaaloleyanje nkali kwaapapaya papaya, iishile pakwabhona. Nkali nneyo, a Nnungu bhagataliya pubhali tome na uwe. 28 Malinga shabheleketete mundu jumo, 'Pabha mututama nkati jabho, tunajima jima, nikola gumi!' Na malinga bhaajimba bhenunji bhana shibhashite lugulanga. 'Uwe twaashibhana bhabho' 29 Bhai ibhaga, uwe tuli twaashibhana bhabho a Nnungu, tukaapinjikwa kuganishiya kuti Unnungu ulandana na shaabhu, eu ela eu liganga, indu ibheywa kwa lunda lwa bhandunji. 30 Bhai, bhukala gwa ubhelu gwa bhandunji gula a Nnungu bhashinkutenda mbuti bhakakuubhona. Ikabheje nnaino, a Nnungu bhanalajila bhandunji bhowe bha kila mmbali bhaipetanje. 31 Pabha bhabhishile lyubha limo lya ukumula bhandunji bha pa shilambolyo gwangali kummonela mundu, kupitila mundu jumo jubhann'agwile. A Nnungu bhashikong'ondela genego kwa kunnyuya jwene mundu kukopoka kubhawilenje!" 32 Bhai, bhakaapiikananjeje a Pauli bhalibheleketa ngani ja yuywa bhawilenje, bhananji gubhatendilenje mbenji, ikabheje bhananji gubhashitenje, "Tunapinga tupilikanishiyene kabhili jene nganiji." 33 A Pauli gubhajabhwile, gubhaaleshilenje pa lukumbi pala. 34 Ikabheje

bhandunji bhana gubhaakagwilenje na gubhakulupalilenje. Munkumbimo bhaapali a Dionishi bhaaliji bha munkumbi gwa Aleopago na bhakongwe bhama lina lyabho a Damali na bhananji.

18 Gakapiteje genego, a Pauli gubhajabhwiile ku Atene gubhapite ku Kolinto. 2 Kweneko gubhaimenenje na Bhayaudi bhama lina lyabho a Akula, bhashilambo bha ku Ponto. A Akila na akongobhabho a Pilishika, bhashinkuiakangana mobha gogo kukopoka ku Italia, pabha a Kaishali Kilaudio bhashinkuamulisha Bhayaudi bhowe bhajabhulangane ku Lumi, a Pauli gubhapite kwaalolanga, 3 pabha nabhalabhonji pubhalinginji mapundi bha totanga maema malinga bhalabho, a Pauli gubhatemi nabhonji nikamula liengo pamo. 4 Kila Lyubha lya Pumuilila bhatendaga tenda nkungulu nshinagogi, bhalilinga kwaajuganga Bhayaudi na Bhagiliki. 5 A Shila na a Timoteo bhakaikanganye kukopoka ku Makedonia, a Pauli gubhapundile kulunguya lilobhe lya a Nnungu, bhalikong'ondela ku Bhayaudi kuti a Yesu ni a Kilishitu. 6 Bhakaataukanjeje na kwaatukananga, gubhakung'winde nngubho yabho bhalinkuti, "Nng'obhangaga mwigambanje mwashaayene, nne nangali sha gambwa ga jene nganiji. Na kutandubhila nnaino shinyende kubhandunji bhangabha Bhayaudi." 7 Bhai, gubhajabhwiile gubhapite tama pamui pakamumdu jumo Mgiliki abhajogopaga a Nnungu lina lyakwe Tito Yushitushi, nyumba jakwe pujaliji mpika na shinagogi. 8 Na a Kilishipashi pubhaaliji bhakulungwa bha shinagogi gubhaakulupalile a Nnungu bhenebho na bhandunji bhowe bha likaja lyabho. Bhakolinto bhabhagwinji bhakapilikananjeje gwene ntengago, gubhakulupalilenje na gubhabhatishwenje. 9 Lyubha limo shilo, Bhakulungwa gubhaaluguilile a Pauli nng'agamii. "Unajogope, upunde kulunguya unapumule, 10 pabha nne namwene puni na ugwe. Jwakwa mundu shakupoteshe pabha pashilambo pano njikola bhandunji bhabhagwinji." 11 Bhai, a Pauli gubhatemi kweneko shaka shimo na mayei shita bhalijiganya lilobhe lya a Nnungu. 12 Ikabheje a Galio bhakabheje bhakulungwa bha shilambo sha Akaya, Bhayaudi gubhaakamwilenje a Pauli gubhaapelekenje ku bhaukumula. 13 Gubhashitenje, "Tunakunnugula aju munduju ligongo lya kwakwiwanga bhandu bhaatindibhalilanje a Nnungu shamunape kuleka Shalia jetu." 14 A Pauli bhakanabhe tandubha kubheleketa, a Galio gubhaaluguililenje Bhayaudi, "Mpilikananje Mmayaudi mmwe! Jene nganiji jikaaliji ja shilebho eu ja indu yangali ya mmbone ngampilikanishiyenje. 15 Ibhaga ngani ja taukangana ga malobhe na mena na shalia jenunji, genego nnonanje mwaashayenenji. Nne ngapinga kubha nankuumula jwa genego!" 16 Bhai, gubhaabhinjilenje pa lukumbi pala. 17 Na bhowenji gubhaakamwilenje a Shoshiteneshi bhaliji bhakulungwa bha shinagogi, gubhaakomilenje pa lukumbi lwa ukumulila pala. Ikabheje a Galio bhangaimuka genego wala kashoko. 18 A Pauli gubhatemi ku Kolinto na bhakilishitu bhala kwa mobha gamagwinji. Kungai gubhaalajilenje gubhakwelile meli kwenda ku Shilia gubhalongene na a Pilishika na a Akula. Ku Kenkelea, a Pauli gubhamojile umbo yabho pabha bhashinkutabha nalili. 19 Gubhaikengenjenje ku Epesho na penepo a Pauli gubhaaleshilenje penepo a Pilishika na a Akila, gubhapite

nshinagogi, gubhakungulwishe na Bhayaudi. 20 Bhayaudi gubhaajujilenje a Pauli bhatame mobha gamagwinji, ikabheje bhangakunda. 21 Ikabhe gubhaalajilenje, bhalinkuti, "A Nnungu bhapingaga shinyiye kabhili." Gubhakwelile meli kwenda ku Epesho. 22 Meli jikajimeje ku Kaishalia, a Pauli gubhajomboshele ku Yelushalemu kukwaalamushilanga bhandunji bha a Nnungu, kungai gubhapite ku Antiochia. 23 Gubhatemi kweneko mobha gashoko gubhajabhwiile, gubhapitile pakati shilambo sha ku Galatia na ku Piligia bhalipita kwaashimilikanga bhakilishitu. 24 Gene mobha pego ashinkupagwa Nnyaudi jumo lina lyakwe Apolo, jwa bhelekwa ku Alekshandilia, gwaisho ku Epesho. Paaliji mundu jwa manya kubheleketa na ashinkukola lunda lwa kugamanya Majandiko ga Ukonjelo. 25 Ashinkujiganywa ga mpanda gwa Bhakulungwa na ashinkukola lilaka muntima gwakwe, gwatandwibhe kutalashiya na kujiganya ukoto ngani ja a Yesu, akuno alikumumanya ga ubhatisho gwa a Yowanape. 26 A Pilishika na a Akula bhakampilikananjeje alibheleketa gwangali bhoga nshinagogi, gubhantolilenje kunngwabhonji nigubhannjigenyenje ukoto ga mpanda gwa a Nnungu. 27 Apolo akatumbiileje kwenda ku Akaya, bhakilishitu gubhantajilenje ntima kwa kwaajandishilanga bhakilishitu bha ku Akaya kula bhamposhelenje. Akaisheje kweneko, kwa mboka ja a Nnungu gwakombwele kwaajangutilanga bhakulupalilenje bhala, 28 pabha ashinkupunda kubheleketa kwa manyilila mpaka Bhayaudi nilepela kuntauka pa lugwinjili alikong'ondela kwa Majandiko ga Ukonjelo kuti a Yesu ni a Kilishitu.

19 Apolo pubhaliji ku Kolinto, a Pauli gubhapite mwilambo ya kuntundu, gubhaishe ku Epesho gubhaimenenje bhaajiganywa bhowepe. 2 Gubhaabhushiyenje, "Nkakulupalilanjeje mwaposhelenje Mbumu jwa Ukonjelo?" Bhalabhonji gubhajangwilenje, "Ntape! Numbe tukanabhepilikana kuti apali Mbumu jwa Ukonjelo." 3 Kwa nneyo a Pauli gubhaabhushiyenje, "Igalu mwabhatishwenje ubhatisho gwashit?" Gubhaajangwilenje, "Ubhatisho gwa a Yowana." 4 A Pauli gubhashite, "Ubhatisho gwa a Yowana pugwaaliji gwa langula kuti bhandunji bhapitenjenje. A Yowana bhatendaga kwaabhalanjilanga bhandunji kuti bhankulupalilanje akwiwajo, yani a Yesu." 5 Bhakapilikananjeje genego, gubhabhatishwenje kwa lina lya Bhakulungwa a Yesu. 6 Bhai, a Pauli gubhaabhishilenje makono, Mbumu jwa Ukonjelo akwaatulusuilanganga, gubhatandwibhenje kubheleketa luga inape na londola. 7 Pubhalinginji bhandunji bhanabhalume kuishila likumi limo na bhabhili. 8 Kwa mayei jitatu a Pauli bhatendaga jinjila nshinagogi, bhalibheleketa gwangali bhoga, bhalibhuyana na bhandunji na bhalikwaakwiwanga ga Ukulungwa gwa a Nnungu. 9 Ikabheje bhananji gubhataukenje, gubhakanilenje kukulupalila, gubhatandwibhenje kubheleketa yangali ya mmbone ga mpanda gwa Bhakulungwa pa lugwinjili. Penepo a Pauli gubhajabhwiile nikwalekanga, gubhaatolilenje kunyenje bhaajiganywa bhabho gubhakungulwishe nabhonji na bhuyana na bhandunji kila lyubha nnyumba jimo ja shelemala jika mundu jumo, lina lyakwe Tilanushi. 10 Gubhapundile kutenda nneyo kwa yaka ibhili mpaka bhashilambo bhowe bha ku Ashia na Bhayaudi na Bhagiliki, gubhapilikenenje lilobhe lya Bhakulungwa. 11 A Nnungu gubhatendile ilapo yapunda kupitila a Pauli. 12

Bhandunji bhatendaga tolanga itambaa ya kwiungutula matukuta na nngubho ya a Pauli, nipeleka kubhalwelenji, nilamiywangana ilwele yabhonji na bhakwetenje maoka nipata kuleshelelwa. **13** Bhayaudi bhananji bhatendaga pitangana ako na koko pita kwaashoyanga bhandunji maoka, gubhalinjilenje kulugula lina Iya Bhakulungwa a Yesu kubhandunji bha shikilwangana maoka, bhalinkutinji, "Ngunakung'amulishanga kwa lina Iya a Yesu bhaalunguywa na a Pauli." **14** Bhashinkupagwanga bhana shabha bha a Shekewa bhakulungwa bha bhaabhisila bha Shiyaudi, mbhalinginji munkumbi gwa bhatendangaga nneyo. **15** Ikabheje lioka jula gwabhajangwilenje, "A Yesu naamanyi na a Pauli naamanyi, ikabheje mmanganyanji ashi gani?" **16** Na mundu jwa shikilwa jula akwaambilangaga bhowe, gwabhapundilenje mashili. Na bhana bha a Shekewa bhala gubhakopokengene lubhilo pa nyumba pala bhauleywenje na bhalinginji makonope. **17** Jene nganijo jikushumaga kubhandu bhowe bhatamanganaga ku Epesho, ku Bhayaudi na Bhagiliki. Bhowe gubhajogopenje. Nigubhalikushiyenje lina Iya Bhakulungwa a Yesu **18** Bhakilishitu bhahagwinji gubhaikopoyenje pa lugwinjili kukwipeta ga yangali ya mmbone ibhaitendangaga. **19** Na bhananji bhatendangaga ya uabhi, gubhapelekenje itabhu yabhonji, guijoshilwe moto palugwinjili. Bhakabhalanganyanjeje galama ja itabhu ila, guishile mamilioni ga mmbiya. **20** Kwa nneyo lilobhe Iya Bhakulungwa gulipundile kushima na kukola mashili. **21** Gakapiteje genego, a Pauli gubhatumbilile muntima gwabho kwenda ku Yelushalemu kupitila ku Makedonia na ku Akaya. Gubhashite, "Nng'ikaga kweneko ngunapanga ngakubhone ku Loma." **22** Kwa nneyo, gubhaatumilenje bhaajanguta bhabho bhahili, a Timoteo na a Elashito, bhaalongolelanje kwenda ku Makedonia, bhalabho gubhatemi kashoko ku Ashia. **23** Gene malangago gukoposhele njasha jikulungwa ku Epesho kwa ligongo Iya Mpanda gwa Bhakulungwa gula. **24** Ashinkupagwa mundu jumo nshipala lina Iyakwe Demetulusi, liengo Iyakwe pulyaaliji kualaya kwa madini ga hela nyumba yaishoko ika nnungu jwankongwe ashemwaga Atemi. Lyene liengolyo lyatendaga kwapanganga pwaida bhatumishi bhakwe. **25** Demetulusi gwabhashemilenje bhakumulangaga gene maengogo na bhandunji bhananji bhakumulangaga liengo lyolyo, gwabhalugulilenje, "Ashalume ajangu, mmumanyinji kuti mwenemu mutupatila mmbiya. **26** Na nnaino nnpilikananga na kwiibhonela mwaashayene ibhatenda a Pauli, nngabha pa Epesho pepano, ikabhe ku Ashia kowe. Bhalabho bhanakwiya na kwaatendebhuyanga bhandunji bhahagwinji bhakundanje kuti ialaywa kwa makono ga bhandunji nngabha ashinnungu. **27** Kwa nneyo kujogoya kwakwe nngabha ga petekuywa liengo lyetupe, ikabhe nkali nyumba jika nnungu Atemi jipinga petekuywa. Kungai upalume gwa bhene bhaatindibhalilwa pa shilambo sha Ashia na shilambolyo shiupele." **28** Bhakaplikanjanje genego, guyaashimilenje, gubhatandwibhenje kujobhela bhalinkutinji. "Bhakulungwa ni Atemi bha ku Epesho!" **29** Shilambo showe shikugumbalaga njasha. Gubhaakamulenje a Gayo na a Alishitako, bhandunji bha ku Makedonia, bhalinginji mwanja gumo na a Pauli, gubhaapelekenje lubhilo mpaka ku lubhala Iwa ing'ando. **30** Na a Pauli bhapingaga jinjila pakati lugwinjili, ikabheje bhaajiganywa

bhabho bhakwaalimbiyangaga. **31** Ashikalongolele bhananji bha shene shilambo sha Ashia shila, bhalinginji ashaambwiga ajabho, gubhatumilnje ntenga gwa kwaashondelesheya bhanajende kwiilanguya kulubhala Iwa ing'ando. **32** Penepo bhananji bhalijobhelenga shana nnei na bhananji shana nneyo, mpaka lugwinjili lula lukupuganikaga. Bhabhagwinji bhagashimanyanga shiumilo shibhaimanilenje pepala. **33** Bhandunji bhananji gubhaganishiyenje kuti shiumilo a Alekishanda, pabha Bhayaudi bhashinkwaatendaga bhajende mmujo. Bhai, a Alekishanda gubhainwile nkono nkupinga bhandunji bhapumulanje bhalinga bhajeketa nkwiitapula pa lugwinjili Iwa bhandu lula. **34** Ikabheje bhakamumanyanje kuti bhalabho Bhayaudi, bhowenji gubhajobhelenje gwanakamo bhalinkutinji, "Atemi bha pa Epesho ni bhakulungwa!" Gubhajobhelenje nneyo kwa mashaa gabhili. **35** Kungai bhaajandika bha shilambo gubhakombwele kwaapumuyanga, gubhaalugulilenje, "Mmashilambo bha pa Epesho, kila mundu amumanyi kuti shilambo sha Epesho shino ni nkugoya jwa nyumba jika nnungu Atemi na nkugoya jwa shindu shigwile kukopoka kunnungu. **36** Jwakwapi mundu jwa tauka gegano. Kwa nneyo, mwiitmalikanje, nnatendanje shindu showe gwamba. **37** Nshikwashemanga abha bhandunjibha apano nkali shakwa shibhajibhilenje nnyumba jika nnungu wala kuntukana nnungu jwetu jwankongwe." **38** "Bhai, ibhaga Demetulusi na bhatumishi ajakwe bhakwetenje shalugula sha bhene bhangananyijibha, lupali lukumbi na bhanangulungwa bha shilambo bhapalinji, bhakalugulane kweneko. **39** Na ibhaga nkuloleyangana gana, shigagumbwe pa lukumbi Iwa manyika na bhashilambo. **40** Pabha gakoposhele leloga yapinjikwe tulugulwe kua kumbuya njasha. Ai njashai yangali shiumilo na shitulepele kutaya shiumilo shammbone sha yene njashai." **41** Bhakabheleketanjeje genego, gubhapwilingenye lukumbi.

20 Nnjasha ya ku Epesho Ila ikapumuleje a Pauli gubhaashemilenje bhakilishitu, gubhaatajilenje ntima. Kungai gubhaalajilenje, gubhajabhilwe kwenda ku Makedonia. **2** Gubhapitile mmbali ya yene ilambo Ila bhalikwaataganga ntima bhandunji kwa malobhe gamagwinji. Kungai gubhaishe ku Giliki, **3** Kweneke gubhatemi myei jitatu. Bhalipanganika kwenda ku Shilia, gubhang'amwile kuti Bhayaudi bhatendaga kwaatamilanga itamo ya pinga kwaapoteka, kwa nneyo gubhabhujile kupitila ku Makedonia. **4** Gubhalongene na a Shopato bha ku Bhelea, bhana bhabho a Pailashi na a Lishitilako na a Shekundo bhandunji bha ku Teshalonike na a Gayo bhandu bha ku Debhe na a Timoteo na a Tikiko na a Tolopimo bhandunji bha ku Ashia. **5** Bhene bhangananyabho bhashinkutulongolelanga nikwenda kutulinda ku Toloa. **6** Jikapiteje shikukuu ja mikate jangataga ngedule, gutukwelile meli kujabhula ku Pilipi na Iyubha Iya nng'ano gutwaishilenje ku Toloa kula. Kweneke gututemi juma jimo. **7** Iyubha Iya ndandubho Iya juma gutuimene nkupinga kugabhana nkate. Pabha a Pauli bhashinkutumbilila kujabhula pa malabhi gakwe, gubhapundile kwaalungushiyanga na kukunguluka mpaka pakati shilo. **8** Yashinkupagwa kandili yaigwinji ilikolela mwene nkati gologoma mutwaimene mula. **9** Nshanda jumo lina Iyakwe Yutikashi ashinkutama pa lidilisha akuno a Pauli bhalipunda lunguya, Yutiko gwatandwibhe kugweela kashoko na

kungai lugono lukuntopelaga, gwagwile pai kukopoka golopa ja tatu. Gubhannokotenje ali awile. **10** A Pauli gubhatulwishe pai, nikunnjapata gubhashite, "Nnakolaranje lipamba pabha gumi gwakwe gwatangu." **11** Gubhakwelile kabhili kugolopa, gubhagabhile nkate, gubhalile. Gubhapundile kukunguluka nabhonji mpaka kumashelo, gubhajabhwile. **12** Bhandunji bhala gubhampelekenje nshanda jula kumui ali jwankoto, guyaanonyelenje kwa kaje. **13** Gutukwelile meli gutulungolele kwenda ku Asho kweneko ni kutwatumbilile kwapashila a Pauli. Pabha bhashinkupinga kupitila kweneko kwa mpanda gwa pai. **14** Bhai, gubhatuimene ku Asho, gutwaapashole mmeli, gutupite ku Mitulene. **15** Tukajabhuleje penepo pa malabhi gakwe gutuishe ku Kio. Lyubha lya bhili gutujimise meli ku Shamo na malabhi gakwe gutuishe ku Mileto. **16** A Pauli bhashinkutumbilila kupelenganya na mwanja gwangali kupitila ku Epesho, nkupinga bhanakabhiye ku Ashiako. Pabha bhashinkukola shanguya sha ika ku Yelushalemu itendekaga bhakashiimane shikukuu sha Pentekoshite. **17** A Pauli bhali ku Mileto, gubhatumile ntenga ku bhanangulungwa bha likanisha ku Epesho nkupinga bhaimane nabhonji. **18** Bhakaikanganeje kunngwabho, gubhaabhalanjilenje, "Mmangananyi mmumanyinji shinjite tama mobha gowe kutandubhila lyubha linaishe ku Ashia. **19** Ngulikwaakumulila maengo Bhakulungwa kwa kwiitimalika kowe na kwa minyoi na malinjilo gambataga kwa itamo ya Bhayaudi ya pinga mboteka. **20** Mmumanyinji kuti ngakweteje njiishi kunnungushiyanga palugwinjili na nnyumba yenunji na kunnjiganyanga indu ya kunnjangutilanga. **21** Natendaga kwaaleyinga bhowenji Bhayaudi na Bhagiliki bhaipetanje kwa a Nnungu na bhaakulupalilanje Bhakulungwa bheta a Yeshu." **22** "Bhai, nnaino mpilikananje! Kwa kunkunda Mbumu jwa Ukonjelo, nne ngunakwenda ku Yelushalemu akuno ngakumumanya gapinga mbata kweneko. **23** Ikabheje Mbumu jwa Ukonjelo anangong'ondela kuti mwilambo yowe itabho na mboteko inaninda. **24** Ikabheje, gumi gwangu ngakuubhona kubha shindu sha mmbone, ikabhe maliye mwanja na liengo libhambele Bhakulungwa a Yeshu nilitende, yani kukong'ondela Ngani ja Mmbone ja ntuka gwa a Nnungu. **25** "Na lelo, nnolanje, namwene nimumanyi kuti mmanganyanji mmowe ninnungushiyenje upalume gwa a Nnungu, ngulikwenda ako na koko, nkamonanga kabhili. **26** Kwa nneyo, lyubha lya lelo lino ngunakungong'ondelanga kuti, jojowe shaobhejo nne nangali shoshowe sha gambwa. **27** Pabha nangaleka wala kashoko kunnungushiyanga yowe ibhatumbilile a Nnungu." **28** "Mwiteganje mwashaayene, nnishunganje likundilyo Mbumu jwa Ukonjelo ashikummikanga mmanganyanji mmanganje mmaelalanga. Nnishunganje likundi lya bhandunji bha a Nnungu libhaliumile kwa minyai jika mwana gwabho. **29** Nimumanyi kuti nyabhulaga ashimaogo ga jogoya shibhannjilangilanjanje na bhakalibhanelanga shiya likundilyo. **30** Nkali kukopoka munkumbi gwenunji shibhakoposhelanje bhandunji shibhajiye bheleketanga ya puganya nkupinga bhabhanganje bhaajiganywa na bhaakulupalilanje bhene bhanganjabho. **31** Kwa nneyo ntamangananje shikupi lola nkumbushilanje kuti kwa yaka itatu, shilo na mui, ngatotoshelaga kunneya kila mundu kwa kunnngutanjila. **32** "Bhai, nnaino

ngunakummikanga muulinda gwa a Nnungu na kwa ilobhe lya ntuka gwabho, ukunshimilikanga ngunakumpanganga mboka pamo na bhandunji bhabho bhakonjeleywenje. **33** Nne nangalokilila mmbiya wala shaabhu, wala nngubho ika mundu jojowe. **34** Mwaashayenenji mmumanyinji kuti njikamula maengo kwa makono gangu, nkupinga mbate indu ipinjikwa, yangu na yashaajanganji. **35** Kwa indu yowe natendaga kunnangulanga kuti kwa kamula maengo nneyo tunaapinjikwa kwaajangutilanga bhakakwiikombolanga, akuno tulikumbushila malobhe ga Bhakulungwa a Yeshu bhayene shibhashite bheleketa, "Mbaya kulaguya, nngalingana na poshela." **36** Bhakamaliyeje kubheleketa genego, gubhatindibhelenje gubhajujilenje Nnungu. **37** Bhowenji bhatendaga gutanga, bhalikwaalajilanga na kwaajambatila a Pauli nnukoi. **38** Bhashinkuinjikanje kwa kaje kwa ilobhe libhabhelekete a Pauli kuti bhakaabhonanga kabhili. Bhai, gubhaapelesheyenje mpaka kumeli.

21 Tukaalajilanje, gutukwelile meli gutupite mpaka ku Koshi. Malabhi gakwe gutuishe ku Lode na gwajabhula penepo gutupite ku Patala. **2** Kweneko gutujimene meli jajendaga ku Poinike, gutukwelile, gutujabhwile. **3** Tukaishileje pa kushibhona shilambo sha Kupulo, gutupitile kunkono nshinda gutuloshiye ku Shilia. Gutujimi kushilambo sha Tilo penepo mishigo ja mmeli mula jatendaga pinjikwa jituluywe. **4** Gutwaimenenje bhaajiganywa bha a Yeshu kweneko, gututemi nabhonji kwa juma jimo. Bhalibheleketanga kwa mashili gaka Mbumu, gubhaalimbiyenje a Pauli bhanajende ku Yelushalemu. **5** Ikabheje mobha getu gakamalileje gutujabhwile. Na bhandunji bhowe na ashakongo bhabhonji na ashibhana bhabhonji gubhatupelesheyenje mpaka palanga shilambo. Tukaishenje nnyenje bhaali, tubhowe gututindibhele kujuga Nnungu. **6** Kungai gutulegene nabhonji, uwe gutukwelile meli, nabhalabhonji gubhabhujilenje kunngwabhonji. **7** Gutupite na mwanja gwetu gwajabhula ku Tilo gutuishe ku Tolemaishi, kweneko gutwaalamushilenje ashaapwetu, gututemi nabhonji lyubha limo. **8** Malabhi gakwe gutujabhwile gutuishe ku Kaishalia. Kweneko gutupite kunngwabho a Pilipi Bhaalunguya Ngani ja Mmbone. Bhenebho ni munkumbi gwa nng'ano na bhabhili bhaagwilwenje ku Yelushalemu kula. **9** Bhashinkukola bhali nsheshe bhakanabhe lombwanga bhatendaga londolanga. **10** Tukatameje kweneko mobha gowepe, gwaishie nkulondola jumo kukopoka ku Yudea lina lyakwe Agabhushi. **11** Akatuishileje gwatolile nshipi gwa a Pauli, gwaitabhile makono na makongono, gwashite, "Mbumu jwa Ukonjelo akuti, "Nnyene gwene nshipi guono apinga tabhwa shana nneino na Bhayaudi ku Yelushalemu na bhapinga kunkamuyanga ku bhandunji bha ilambo ina." **12** Bhai, tukapilikaneje genego uwe na bhandunji bhananji bha pepala gutwaashondelesheye a Pauli bhanajende ku Yelushalemu. **13** Ikabheje a Pauli gubhajangwile, "Nkupinga tendanga nndi? Nnagutanga mmulaganje ntima? Nne ng'engwilwe nngabha ga tabhwape ku Yelushalemu, ikabheje nkali kubhulagwa kwa ligongo lya a Yeshu." **14** Tukalepeleje kwaashondelesheya, bhai gutushite, "Libhapinga Bhakulungwa litendeshe!" **15** Gakapiteje gene mobha gala, gututabhile mishigo

jetu, gutujabhwile kwenda ku Yelushalemu. **16** Bhaajiganywa bhananji kopoka ku Kaishalia gubhalongeneri na uwe, gubhatupelekenje ku nyumba ja a Mnashoni kutwajendaga ishila. A Mnashoni pubhaliji bhashilambo bha ku Kipulo na pubhaliji bhaajiganywa tandubhila bhukala. **17** Tukaisheje ku Yelushalemu, bhakilishitu ajetunji gubhatuposhelenje kwa kwinyonyela. **18** Malabhi gakwe a Pauli gubhapite na uwe na bhakulungwanji bhowe bha liekalu bhapalinji kukwaabhona a Yakobho. **19** Bhakaalamushilanje, a Pauli gubhaatalashiyenje yowe ibhatendile a Nnungu kubhandunji bha ilambo ina nniengo iyabho. **20** Bhakapilikananjeje genego gubhaakushiyenje a Nnungu. Kungai gubhaalugulilenje a Pauli, "Apwetu, nnilola kuti maelupu ga Bhayaudi nnaino bhashibhanganga bhakilishitu na bhowenji bhashitumbililanga kukumulila shalia ja a Musha. **21** Bhabhalanjilwenje ngani jenu kuti nnakwajiganyanga Bhayaudi bhatamanga mwilambo ina kuti bhanakagulanje Malajilo ga a Musha wala bhanaataganje unyago ashibhana bhabhonji na bhanakaguyanje ikubho ya Shiyaudi. **22** Igala, pushiibhe bhuli? Pabha shibhapilikananje kuti nng'ishe." **23** "Bhai, ntende malinga gutupinga kummalanjila gano. Bhashipagwanga apano bhanabhalume nsheshe bhashitabhanga nalili. **24** Mwiilunde na bhene bhanganyabho, nkaiikonjeleye nabhonji kwa a Nnungu. Nkaalipilanje, nkupinga bhamogwanje umbo yabhonji. Penepo bhandunji bhowe shibhamumanyanje kuti ngani jenu jibhapilikenenjeje nngabha ja kweli, ikabheje mmwe mmayene nritama ukoto na nnikaguya Shalia ja a Musha. **25** Ikabheje kwa ngani ja bhandunji bha ilambo ina bhalinginji bhakilishitu, twaajandishilanje bhaluwa kwatalashiyanga shitushite lajila, bhanalyanganje yalya ya mbepei ya ashinnungu bha yanamu na bhanataunanje nnyama yangainga na bhaiepyanje na labhalabha." **26** Bhai, pa malabhi gakwe a Pauli gubhaatolilenje bhandunji bhatabhilenje nalili bhala gubhajujile nabhonji Nnungu nkwiikonjeleya. Kungai nigubhajinjile nliekalu, kuulugula ga mpelo gwa mobha ga kwiikonjeleya kwa a Nnungu na ga mbepei ipinga shoywa kwa kila mundu. **27** Bhai, gene mobha nng'ano na gabhili gala gali tome na malila, Bhayaudi bhakopokengene ku Ashia gubhaabhwinenji a Pauli nniekalu. Bhai, gubhakwiyenje njimwa likundi lyowe Iya bhandunji, nigubhaakamwilenje. **28** Gubhajobhelenje, bhalinkutinji, "Mmashileunji bha pa Ishilaeli, ntujangutanje! Jweneju ni mundu ajiganya bhandunji mmbali yowe indu ikapinjikwa na bhandunji bha shilambo sha Ishilaeli, ya kana Shalia ja a Musha na pa ukonjelo pano. Na kabhili anakwajinjiyanga Bhagiliki nniekalu nikupanyatiya pa ukonjelo pano." **29** Bhashinkubheleketanga nneyo, ligongo Iya kummona Tolopimo mundu jwa ku Epesho alongene na a Pauli kunnjini, gubhaganishiyenje kuti a Pauli bhashikunnjinjiya nniekalu. **30** Shilambo showe gushijinjele njasha, gubhaikengeneri bhandunji kukopoka mmbali yowe, gubhaakamwilenje a Pauli, gubhaakwekwetenje kwakopoya nniekalu, shangupe milango ja liekalu jikuugalwaga. **31** Bhalinginji nkuloleya mwa kwabhalujila, bhakulungwa bha bhakomana ngondo bha Loma, gubhapatile ntenga kuti ku Yelushalemu kowe kushinyata. **32** Shangupe gubhaatolilenje ashimanjola na bhakulungwanji bha manjola, gubhapite lubhilo kulugwinjili Iwa bhandunji kula. Na bhalabhonji bhakaabhananjeje bhakulungwa bha bhakomana

ngondo na ashimanjola bhala, gubhapumwilenje kwaakoma a Pauli. **33** Bhakulungwa bha bhakomana ngondo bhala gubhapite kwaakamula a Pauli, gubhaamulishe bhatabhwe mindondolo jibhili. Gubhabhushiye, "Jweneju gani na atendile nndi?" **34** Nnugwinjili mula bhandunji bhatendaga jobhelanga bhananji bhalinkutinji nnei na bhananji sha munape. Kwa ligongo Iya yene njobhelayo, bhakulungwa bha bhakomana ngondo bhala bhangagamanya malombolelo ga jene ngani jila. Kwa nneyo gubhaamulishenje bhandu bhabho bhaapelekanje a Pauli nnugwani. **35** A Pauli bhakaisheje pa ngashi, penepo guipinjikwe ashimanjola bhaajigalenge a Pauli kwa ligongo Iya njasha ya bhandunji. **36** Pabha lugwinjili Iwa bhandu lwatendaga kwaakagula bhalijobhelanga, bhalinkutinji, "Mwaabhaluje!" **37** Na bhalabho a Pauli bhaliinjijya nnugwani, gubhaajujile bhakulungwa bha bhakomana ngondo bhala bhalinkuti, "Ngunajuga nimmalanjile shindu." Bhakulungwa bhala gubhashite, "Bhuli ulikombola Shigiliki?" **38** Ugwe nngabha Mmishili agano mobha pegano apitinishe bhandu elupu nsheshe bhaashemwanga mabhulanga bhandu, alikwaalongoyanga kuanga?" **39** A Pauli gubhajangwile, "Nne Nannyaudi, kumelekw ku Tasho nshilambo sha Kilikia, nne mundu jwa shilambo nngabha sha nyegala. Shonde nneshe melekete na bhashilambobha." **40** Bhakulungwa bhala gubhakundile. Kwa nneyo a Pauli gubhajimi pangashi, gubhaajinulilenje nkono bhandunji bhapumulanje, bhakapumulanjeje, a Pauli gubhatandwibhe kubheleketa nabhonji kwa Shiebhulania.

22 "Ashaapwanga na asha awawa, nnaino mmbilikananje shinguti bheleketa nkwapula!" **2** Bhakapilikananjeje bhalibheleketa Shiebhulania gubhapundilenje kupumula. Na bhalabho a Pauli gubhapundile kubheleketa. **3** "Nne Nannyaudi, kumelekw ku Tasho shilambo sha Kilikia. Ikabheje punelelwe pa Yelushalemu pepano na bhaajiganya bhangwa a Gamalieli. Nashinkujiganywa ukoto Shalia ja ashinakulu bhetu. Nashinkwishoya kwa nima gwangu gowe kwa a Nnungu malinga lelo shinninginji mmanganyanjishi. **4** Nashinkwaapotekanga mpaka kwaabbulaganga bhandunji bhakaagulanga a Yeshu. Natendaga kwaakumulanga bhanabhalume na bhanabhakongwe nikwaatabhanga, nikwaugalilanga nnegelesha. **5** Bhakulungwa bha bhaabhisshila na bhanangulungwa bhowe bha lukumbi shibhakong'ondelanje gegano. Gumboshele bhaluwa kukopoka kunngwabhonji jibhajandishilwenje ashaapwetu Bhayaudi bhalinginji ku Dameshiki. Gumbite ku Dameshiki nkupinga ngaakumulanje bhene bhandunjibho na kwyanabhonji ku Yelushalemu bhali bhatabhilwenje nkupinga bhaukumulwanje. **6** "Bhai, punaaliji mumpanda malanga ga shaa shita ja mui tome naika ku Dameshiki, shangupe shikuposhelaga shilangaya sha punda kukopoka ku nnungu gushinangashiye mmbali yowe. **7** Penepo gung'wile pai, gumbilikene liobhe lilimalanjila, 'Shauli, Shauli! Kwa nndi unamboteka?' **8** Nne gumushiye, 'Mmwe Mmakulungwa agani?' Nabhalabho gubhamalanjile, 'Nne a Yeshu Bhanashaleti bhunkwaapoteka.' **9** Na bhene bhalinginji pamo na nne bhala, bhashibhweninji shilangaya shila ikabheje bhangalilikana liobhe lika jwene abheleketa ga na nne. **10** Bhai, gumushiye, 'Ndende bhuli Mmakulungwa?' Bhakulungwa bhala gubhamalanjile, 'Jima, ujende ku Dameshiki

na kweneko shiubhalanjilwe yupinjikwa utende.’ 11 Kwa ligongo lyapunda langaya shilangaya shila nangakombola kulola kwa nneyo gubhangamwilenje nkono ni nongoya mpaka ku Dameshiki. 12 “Kweneko ashinkupagwa mundu jumo lina lyakwe a Anania, mundu abhajogopaga a Nnungu na kunda Shalia jetu na manyika na eshimika na Bhayaudi bhatamanganaga ku Dameshiki. 13 Gubhashite mmona, gubhajimi tome na nne, gubhashite, ‘Apwanga a Shauli! Nnole kabhili.’ Popo pepo gunnoli, gunaabhwini. 14 Kungai Anania gubhashite, ‘Nnungu jwa ashainabhetu ashikunng’agula mmwe nkupinga mwiimanye ibhapinga na mwaamanye Bhakamula Maengo bhabho bhanguja na pilikana lilibhe likopoka nkang’wa jabho. 15 Pabha shimwaakong’ondele kubhandu bhowe ga imwibhwini na imwipilikene. 16 Bhai, igala nkulinda nndi? Nnjime, nkabhatishwe nneshelelwe iiebho yenu kwa tenda nneyo shinnisheme lina lya Bhakulungwa.’ 17 “Bhai, ngabhujeye ku Yelushalemu, nilinkujuga Nnungu nniekalu guniibhwini agamii. 18 Gunaabhwini Bhakulungwa bhalimalanjila, ‘Shangu! Ujabhule pa Yelushalemu pabha bhandunji bha pepano bhakakukundanga pushiungong’ondele nne.’ 19 Gunaajangwile, ‘Mmakulungwa, bhalabhonji bhamumanyinji kuti nne natendaga pita mmashinagogi kwaakumulanga na kwaakomanga bhankulupalilangaga mmwe bhala. 20 Na kabhili pubhabhulegwe bhaakong’ondela bhenu a Shitepano, nne namwene naapali popo nguliengwa na yatendekaga ila akuno nilingamwile nngubho yabhonji bhaabbulagagaga bhala.’ 21 Na Bhakulungwa gubhamalanjile, ‘Jenda, shinikutume kwaatalika kubhandunji bha ilambo ina.’” 22 Bhandunji bhala gubhaapilikenishiyenje a Pauli mpaka penepo, ikabheje bhakabheleketeye genego, gubhatandwibhenje kujobhela bhalinkutinji, “Mwabhulaje! Mundu jwa nnei kubhulagwape.” 23 Gubhapundilenje kujobhela akuno bhalileshelanga kunani nngubho yabhonji na litutuli. 24 Bhakulungwa bha bhakomana ngondo gubhaamulise bhaapelekanje a Pauli nkati lugwani lwa manjola, gubhaabhalanjilenje bhaakomanje ibhoko nkupinga bhamumanye shiumilo shajamiiilwa nneila na Bhayaudi. 25 Ikabheje bhakaatabhanjeje nkupinga bhaakomanje ibhoko, a Pauli gubhaabhushiye bhakulungwa bha manjola bhajimi tome, “Bhuli, mwa mbone mmanganya kunkoma mundu jwa ku Loma akanabhe ukumulwa?” 26 Bhakulungwa bha manjola bhala bhakapilikaneje nneyo, gubhaalugulile bhakulungwa bha bhakoma ngondo bhala bhalinkuti, “Nkupinga tenda nndi? Jwene munduju nshilambo jwa ku Loma!” 27 Bhai, bhakulungwa bha bhakomana ngondo bhala gubhaajendele a Pauli gubhaabhushiye, “Mmalanjile, mmwe mmashilambo sha ku Loma?” A Pauli gubhaajangwile, “Elo.” 28 Bhakulungwa bha bhakomana ngondo gubhashite, “Nne nijipata ushilambo gwa ku Loma kwalipila mmbiyayaigwinji.” A Pauli gubhashite, “Ikabheje nne nanshilambo jwa ku Loma kwa bhelekwa.” 29 Bhai, bhandunji bhapingangaga kwaabhuya a Pauli bhala shangupe gubhajabhulenje. Nkali bhakulungwa bha bhakomana ngondo bhala gubhajogwepe bhakamumanyeje kuti a Pauli pubhaliji bha shilambo sha Loma na pabha bhashinkwaatabha mindondolo. 30 Malabhi gakwe, bhakulungwa bha manjola gubhapinje bhamumanye kuti Bhayaudi bhakwaalugulanga

bhuli a Pauli. Kwa nneyo gubhaagopwele mindondolo a Pauli, gubhaamulishenje bhakulungwanji bha bhaabhisila na bha lukumbi bhowe bhatamangane shitamo. Kungai gubhaajimishe a Pauli pakatipakati lukumbi.

23 A Pauli gubhaakolondolesheyenje meyo bhalukumbi bhala, kungai gubhashite, “Ashaapwanga, mpaka lelo juno njikwakagula a Nnungu kwa tumbilila na ng’aniyo ya muntima.” 2 Penepo Bhakulungwa bha Bhaabhisila a Anania gubhaamulishenje bhalinginji tome na a Pauli bhala bhaakomanje lipapa pakang’wa. 3 Bhai, a Pauli gubhaabhalanjile, “Na mmwe a Nnungu shibhankome, mmwe nni mbuti langalanga likuju nkati mbamba jika! Mmwe ntemi nkung’ukumula nne kwa kaguya shalia akuno nkakagula malajilo kwa amulisha bhandunji bhanganje?” 4 Bhandunji bhajimingenenje tome na a Pauli bhala gubhaabhalanjilenje, “Bhuli, mmwe nnakwatukana Bhakulungwa Bhaabhisila bha a Nnungu!” 5 A Pauli gubhajangwile, “Ashaapwanga nangamunya kuti bhenebho ni Bhakulungwa Bhaabhisila, pabha ishijandikwa kuti, ‘Nnaabheleketeye yangali ya mbone bhakulungwa bha bhandunji bhenu.’” 6 A Pauli bhakamumanyeje kuti nkumbi gumo gwa bhalukumbi bhala pugwaaliji gwa ashi Mashadukayo na guna gwa a Shimapalishayo. Bhai, gubhautiye lilibhe lyabho pa lukumbi pala bhalinkuti, “Ashaapwanga nne Nampalishayo, mwana juka Mpalishayo, ngunaukumula kwa ligongo lya ngulupai ja yuka bhawilenje.” 7 Bhakabheleketeye genego, ashi Mapalishayo na ashi Mashadukayo gubhataukengenene na shitamo gushigabhanishe ikundi ibhili. 8 Pabha ashi Mashadukayo bhakutinji kwakwa kuyuka kwa bhandunji bhawilenje, wala bhakwapinji ashimalaika bha a Nnungu wala ashimaoka, ikabheje ashi Mapalishayo bhanakulupalilanga yoweyo. 9 Nyenye guipundile na bhaajiganya bhananji bha Malajilo ga a Musha munkumbi gwa Mapalishayo, gubhajimingenenje kubheleketa kwa utiya bhalinkutinji, “Tukashishihona shoshowe shibhalebhile abha bhandubha, pana mbumu eu malaika jwa a Nnungu ashikunguluka nabho.” 10 Mpowi gukapundeje, bhakulungwa bha ashimanjola gubhajogwepe a Pauli bhanapopotolwa na bhandunji bhala, kwa nneyo gubhaamulishenje ashimanjola bhakaashoyanje a Pauli kwa mashili pa lugwinjili pala, nikwajinjijya nnugwani lwa ashimanjola. 11 Pa shilo shakwe Bhakulungwa gubhaikopweye gubhajimi tome na a Pauli, gubhaabhalanjile, “Mwilume ntima pabha malinga shinshite ngong’ondela pa Yelushalemu pano, nneyo peyo nnapinjikwa kungong’ondela ku Loma.” 12 Kukasheje, Bhayaudi gubhatabhilenje shitabho kuti bhakalyanganga wala bhakapapilanga mpaka bhaabbulanganje a Pauli. 13 Bhene bhandunji bhatabhilenje shene shitabhosho, pubhalinginji kupunda makumi nsheshe. 14 Bhai gubhapitengenene kubhakulungwanji bha bhaabhisila na bhanangulungwa, gubhashitenje, “Uwe tushitabha shitabho kuti tunalye shoshowe mpaka twabhulaje a Pauli. 15 Kwa nneyo bhai, mmanganyanji na bhalukumbi mwaabhalanjilanje bhakulungwa bha bhakomana ngondo bhampeleshelanjene a Pauli kwitembanga kuti nnapinganga kujimanya ngani jabho ukoto. Na uwe shitwabhulaje bhakanabhe bhandishila.” 16 Ikabheje mwipwagwabho a Pauli gwapiilikene

jene nganijo, gwapite jinjala nngwani lwa ashimanjola mula gwabhalugulile a Pauli jene nganijo. 17 Penepo a Pauli gubhaashemile bhakulungwa bhamo bha ashimanjola gubhaabhalanjile, "Muntole aju nshandaju mumpeshe ku bhakulungwa bha bhakomana ngondo shipali shindu shapinga kwaalugulila." 18 Bhai, linjola jula ankutolaga nshanda jula gwampeshe ku bhakulungwa bha bhaakomana ngondo, gwashite, "A Pauli bhatabhwilwe bhala bhashinkunnjema ninyuga nimpeshe aju nshandaju kwenu mmwe pabha ashikola lilobhe lyapinga kunnugulila." 19 Bhakulungwa bha bhakomana ngondo bhala gubhankamwile nkono nshanda jula, gubhapite najo kujika, gubhammushiye, "Upinga malanjila nndi?" 20 Jwalakwe gwashite, "Bhayaudi bhashilagana, malabhi bhannjunganje mmwe mwaapeleshe a Pauli ku lukumbi bhaitembanje kuti bhalukumbi bhanapinganga bhajimanyanje ukoto ngani jabho. 21 Ikabheje mmwe nnakunde pabha bhandunji bha punda makumi nsheshe bhanakwajubhililanga. Bhashilumbilanga kuti bhakalyanganga wala papila mpaka bhaabhalunganje a Pauli. Na nnaino bhalinginji tayali piilikana nkubheleketa bhuli." 22 Bhakulungwa bha bhakomana ngondo gubhanneshile nshanda jula aijendele gubhannajile, anammalanjile mundu jowwe kuti ashikwaabhalanjila genego. 23 Bhai, bhakulungwa bha bhakomana ngondo bhala gubhaashemilenje bhakulungwanji bha manjola bhahili gubhaabhalanjilenje, "Mwaabhikanje tayali ashimanjola mmia pabhili, bhaakwelanga palashi makumi shabha na ashimanjola mmia pabhili bha mapanga, bhajendanganje ku Kaishalia ikanabhe ishila shaa tatu ja shilo. 24 Gubhaabhalanjilenje bhahikanje bhannyama tayali bha kwakweya a Pauli na bhaapelekanje kwa ulele kwa a Pelikishi, bhakulungwa bha ku Yudea." 25 Bhakulungwa bha bhakomana ngondo bhala gubhajandishe bhaluwa nnei. 26 "Mmakulungwa a Pelikishi, shalamu! Nne a Kilaudiashi Lishiashi ngunakunjandishila. 27 "Bhayaudi bhashikunkamulanga jwene munduju na pubhalinginji tome na kummulaganga, ngapilikaneje kuti nshilambo jwa ku Loma gumbite na ashimanjola gunintapwile. 28 Nikumpeleka kulukumbi lwabhonji nkupinga nishimanye shumilo shibhakunnugulanga jweneju. 29 Guniimanyi kuti ibhakunnugulanga ni ya mitau ja shalia jabhonji gubhagegwilwenje na a Musha, ikabheje nangashibhona shoshowe shakuntenda abhulagwe eu atabhwe. 30 Ngabhalanjilweje kuti Bhayaudi bhashilagananga kummulaga jwene munduju, shangupe ngunakumpeleshela mmwe, njikwaalajilanga bhakunnugulangabho, bhannugulanje kwenu mmwe." 31 Bhai, ashimanjola gubhaatolilenje a Pauli malinga shibhalajilwenje, gubhaapelekenje shilo mpaka ku Antipatili. 32 Malabhi gakwe ashimanjola mia pabhili bhakwendangan na makongono bhala, gubhabhujilenje nikwalekanga bhakwendangan na palashi bhajendangananje na a Pauli. 33 Bhakaikanjeje ku Kaishalia, gubhaapelekenje bhaluwa jila a Pelikishi bhakulungwa bha shilambo nikwabhika a Pauli mmakono gabho. 34 Bhakashomeje bhaluwa jila, gubhaabhusiyenje a Pauli bhakopweshe shilambo gani. Bhakabhalanjilweje kuti kubhakoposhele ku Kilikia, 35 gubhashite, "Shinimpilikane pushibhaikanje bhannugwilenjebho."

Kungai gubhalajile a Pauli bhahishwe muulinda nnyumba ja uliwal ja a Elode.

24 Gakapiteje mobha nng'ano, Bhakulungwa Bhaabhisila a Anania gubhaelelenje kukopoka ku Kaishalia na bhanangulungwa bhananji na nkubheleketa jumo lina lyakwe Tetulo. Gubhaajendelenje bhakulungwa bha shilambo bhala gubhaalugulenje ga a Pauli. 2 A Pauli gubhashemilwe na bhakulungwa a Pelikishi, a Tetulo gubhatandwibhe kwaalugula bhalinkuti. "Mmakulungwa a Pelikishi, kwa longoya kwenu ukoto, ulele unalonjeja na nnapanganya ya mmbone kubhandu bhetu. 3 Bhai, tunakuliposhela lyene lilobheli kila mmbali na kwa mobha gowe kwa kwiinonyela akuno tulipunda kuntendela eja. 4 Ikabheje, ngunantotoye kwa kubheleketeja, tunakunnjuga ntupilikaniishiye kwa uguja gwenu malobhe getu. 5 Tushing'amula kuti aju munduju jwa jogoya kwa kaje. Jwalakwe anakumbuya njasha munkumbi gwa Bhayaudi kila mmbali pa shilambolyo na kabhili ni kalongolele nkulu jwa shikundi sha dini sha Bhanashaleti. 6 Na kabhili ashinkulinga kulitukana liekalu, gutunkamwile." 7 Ikabheje a Lushiani bhakulungwa bha manjola gubhaishe kutupokonyola kwa mashili ga punda mmakono getu. 8 Kungai gubhaalajilenje bhakunnugulanga jwene munduju bhajiyangane kungwenu mmwe. Monaga mpingaga mummwe mmayene shimumanye kuti yowe itukunnugulai ya kweli. 9 Na bhalabhonji Bhayaudi gubhatajilenje shionde kuti malobhe gowe ga kweli. 10 Bhai, bhakulungwa bha shilambo bhakaalangleje nkono nkupinga bhahhelekete, a Pauli gubhashite, "Pabha nimumanyi kuti mmwe nshibha mmaukumula bha sheshino shilambo shino kwa yaka yaigwinji inanonyela melekete namwene nkwitapula. 11 Mmayene mmumanyi kuti gakanabhepita mobha likumi na gabhili tandubhila punyombweshe ku Yelushalemu kukwatindibhalila a Nnungu. 12 Abha bhandunjibha bhangamonanga nne nniekalu ngulitaukangana naka mundu jowwe. Bhangang'imananga niliikwiya bhandu kutenda njasha nniekalu, wala mmashinagogi, wala popowe pala nshilambomo. 13 Na wala bhakaakombolanga kong'ondela ibhanugulanga. 14 Ikabhe shingukunda kungwenu mmwe ashino. Nne ngunakwaatindibhalila a Nnungu bha ashinakulubhetu kwa kulupalila mpanda gubhakuushemanga bhanganyanjibha kuti shikundi sha dini ja unami. Ngunakulupalila yowe ijandikwe mwiitabhu ya shalia ja a Musha na itabhu ya ashinkulondola bha a Nnungu. 15 Nne ngunakwaakulupalila a Nnungu, na malinga bhanganyibha bhakwetenje ngulupai jojo, ja kuti bhanguja na bhaalebhanga, shibhayanje. 16 Kwa nneyo mobha gowe ngunakwiobhelesheya kutenda kila shingukumbola sha uguja kwa a Nnungu na ku bhandunji. 17 "Ngatameje kwataliya kwa yaka yaigwinji, gumbite ku Yelushalemu ngaajangutilanje bhashilambo ajangunji na ngashoye mbepei. 18 Gubhang'imenenje nniekalu ngulitenda genego, nguli niikonjeleye kwa a Nnungu. Lukapaaliji lugwinjili lwa bhandu wala ya njasha. 19 Ikabheje bhapalinji Bhayaudi bhananji bhakopokengene ku Ashia, bhanganyabho ni bhapinjikwanganga kubha apano bhanugulanje monaga shipali shoshowe sha nugula kwenu mmwe. 20 Eu, ashaayene pebha bhalugulanje shinebhile nne shibhashibhweninji punajimi pa

lukumbi lwabhonji, 21 ikabhe ngajimeje pakati jabhonji ga bheleketa shindu shimo, "Nnang'ukumulanga lelo juno ga ligongo lya kulupalila kuti bhawilenje shibhayuywanje!" 22 Penepo a Pelikishi pabha bhajimanyi ukoto ngani ja gwene mpanda gula, gubhaunishile malobhe gala bhalinkuti, "Shimaliye malobhe genunji pushibhaishe bhakulungwa bha bhakomana ngondo a Lishashi." 23 Kungai gubhannajile nkulungwa jwa manjola abhabhishe a Pauli muulinda, ikabheje guna bhanaaibhiile kukopoka palanga na ashaabhwiga ajabhonji wala bhanalimbiywanje kwaapa ibhapinga. 24 Gakapiteje mobha gashoko, a Pelikishi gubhaishe na akongobhabho a Dulushila bhajiji Bhayaudi. Gubhalajile a Pauli bhashemwe, gubhaapilikanishiye bhalibheleketa ngani ja kwaakulupalila a Yesu Kilishitu. 25 Ikabheje a Pauli bhakatandubheje kubheleketa ga uguja na gangakwebhela indu na kuti shiliyiye ika lyubha lya ukumu, a Pelikishi gubhajogwepe, gubhashite, "Nnaino njende, mbataga malanga shininshe." 26 Na kabhili pubhaganishiyaga kuti shibhapegwe ela na a Pauli. Kwa nneyo gubhapundile kwashemashema a Pauli kuukunguluka nabho. 27 Ikapiteje yaka ibhili, a Poshiasi Peshito gubhatolile shitungu sha upalume gwa shilambo. Na nkupinga kuikonjeleya ku Bhayaudi, gubhaaleshile a Pauli bhali bhatabhilwepe.

25 Gakapiteje mobha gatatu ga uliwali gwabho, a Peshito gubhajabhwile ku Kaishalia gubhapite ku Yelushalemu. 2 Bhakulungwanji bhaabhishe na ashikalongolele bha Bhayaudi gubhaabhalanjilenje a Peshito ngani ja a Pauli. Gubhaashondelesheyenje a Peshito 3 na kwaajuga bhaatendelanjie ntuka gwa kuti, bhaamulise a Pauli bhapelekwe ku Yelushalemu, pabha bhashinkulagananga bhaajubhilanjie mumpanda nkupinga bhaabbulaganje. 4 Ikabheje a Peshito gubhajangwile, "A Pauli mubhali mmakono ga ulinda ku Kaishalia na namwene nguli tome na kwenda. 5 Mwaalekanje ashikalongolele bhenunji bhaelelanje na nne bhakaalugulanje a Pauli monaga shipali shibhalebhile." 6 A Peshito bhakatameje na bhandunji bhala kwa mobha nane ewe likumi limo, gubhabhujile ku Kaishalia. Pa malabhi gakwe gubhapite tama pa shitungu sha ukumu, gubhaamulise bhaajiyenabhonji a Pauli. 7 A Pauli bhakaisheje, Bhayaudi bhakopokengene ku Yelushalemu gubhaatimbiilenje gubhatandubhenje kwaalugula ga indu yaikululuku yatenda nkali ashaayene nngakombola kong'ondele. 8 A Pauli kwiitapula gubhashite, "Nne shakwapi shinebhile kwa shalia ja Bhayaudi, wala kwa liekalu wala kwa a Kaishali." 9 Ikabheje a Peshito nkupinga kwiikonjeleya ku Bhayaudi gubhaabhusiye a Pauli, "Bhuli, nniyinga kwenda ku Yelushalemu nkaukumulwe kwa malobhe gubhakunnugulangana na nne niili popo?" 10 A Pauli gubhajangwile, "Punyimi pano pa lukumbi lwa a Kaishali, pepano ni pa ukumulwa nne. Malinga mmwe shimmumanyi ukoto, nne shakwapi shinaalebhilenje Bhayaudi. 11 Bhai, monaga shipali shinebhile sha pinjikwa mulagwe, nne ngakana kuwa. Ikabheje monaga ibhanugulangai nngabha ya kweli, jwakwapi jwangamuya nne kubhanganyabha. Pungupinga malobhe ganguga gakamaliywe na a Kaishali." 12 Bhai, a Peshito bhakakungulusheje na bhandunji bhabho bha lukumbi, gubhaabhalanjile a Pauli, "Nshipinga malobhe

genu gajende kwa a Kaishali! Bhai, shinnjende kwa a Kaishali." 13 Gakapiteje mobha gashoko, bhakulungwa bhana bhashemwaga Agilipa, bhajiji bhakulungwa bha shilambo shina nngabha ku Yudea na a Bhenike, gubhaikenje ku Kaishalia kukwalamushila a Peshito. 14 Gubhatemingenenje kweneko mobha gamagwinji na a Peshito gubhaabhalanjile bhakulungwa Agilipa malobhe ga a Pauli, bhalinkuti. "Ashipagwa mundu jumo pepano jubhanneshile a Pelikishi ali atabhilwe. 15 Ngajendeje ku Yelushalemu bhakulungwanji bha bhaabhishe na bhanangulungwa bha Bhayaudi gubhanugulilenje gaka jwene mundujo bhalinyuganda ning'ukumule apotekwe. 16 Ikabheje gunaajangwilenje kuti Bhaloma bhakakunshoyanga mundu akwete malobhe ga lugulwa, akanabhe bhongana naka mundu annugwile jula, nkupinga najwalakwe abhelekete malobhe ga kwiitapula kwa gubhannugulenje." 17 "Bhai, bhakaikanganeje nne nangakabhiya, ikabhe pa malabhi gakwe nne gumishile shitamo kulukumbi, gunajile mundujula bhannjiye nabhonji. 18 Bhaalugulanga bhala bhakajimanganeje kubheleketa, shakwa shilebho shibhalugwilenje sha malinga shinalolelaga. 19 Ikabhe bhatandaga taukangana ga dini jabhonji na gaka mundu jumo lina lyakwe Yesu numbe amalile, ikabheje a Pauli bhakuti jwankoto. 20 Nne nangashimanya shatenda kwa gene malobhego. Bhai, gunaabhusiye a Pauli monaga shibhapanje kwenda ku Yelushalemu bhakaikumulwe kwa gene malobhego. 21 Ikabheje a Pauli gubhajujile malobhe gapeleshwe kubhakulungwa bha ku Loma, gubhataushile bhatame muulinda mpaka malobhe gabho gamaliywe na bhakulungwa bha ku Loma. Kwa nneyo gunajile bhatame muulinda mpaka pushinaapeleshe ku bhakulungwa bha ku Loma a Kaishali." 22 Bhai Agilipa gubhaabhalanjile a Peshito, "Nne namwene natendaga pinga nimpilikanishiye jwene mundujo," A Peshito gubhashite, "Shumumpilikane malabhi." 23 Kwa nneyo, malabhi gakwe, bhakulungwa bhana Agilipa bhajiji bhakulungwa bha shilambo shina nngabha ku Yudea na a Bhenike gubhaikenje kulukumbi kwa angalila na bhakulungwanji bha bhakomana ngondo na ashikalongolele bha shilambo. A Peshito gubhalajile a Pauli bhakatolwe bhajinjiiywe nnukumbi. 24 A Peshito gubha shite, "Mmakulungwa Agilipa na mmowe nninginji na uwe apano! Nnikummonanga aju mundujo, nkumbi gowe gwa Bhayaudi bha pepano na bha ku Yelushalemu bhashimbinganga nne naajangutilanje, bhajijobhelanga kuti akapinjikwa alame. 25 Ikabheje nne nangashibhona shilebho shaatendile shaapinjikwa bhabhulagwe. Pabha a Pauli bhayene bhashipinga malobhe gabho gajende ku bhakulungwa bha ku Loma a Kaishali, gungundile kwaapeleka kwa bhenebho." 26 "Na nne kwa malobhe gabhoga nangali malobhe gammbone ga kwaajandishila bhakulungwa bha ku Loma a Kaishali. Kwa nneyo njikwashema apano kwenu mmanganyanji na mmakulungwa Agilipa, nkupinga mwabhuyanje, mbate shakwajandishila. 27 Pabha ngunabhona ikakonja kumpeleka mundu atabhilwe gwangali taya malobhe galugwilwe jwene mundujo."

26 Bhai, Agilipa gubhaabhalanjile a Pauli, "Nnaino mmelekete malobhe genu." Penepo a Pauli gubhainjwile nkono gwabho gubhatandubhe kubheleketa nkwiitapula bhalinkuti. 2 "Mmakulungwa Agilipa, lelo ngunakwiibhona njikola shikono sha jima na mmwe nibheleketa malobhe ga kwiitapula, kwa

ngani ja malobhe gowe gubhanugwilenje Bhayaudi. 3 Kwa nneyo mmwe mmayene muimanyi ukoto ikubho ya Bhayaudi na shibhakuti taukangana, bhai ngunakunnjuga mwipilile kumbilikanishiya.” 4 “Bhayaudi bhowe bhamanyinji nne shinjite tama kutandubhila gwana gwangu, shinjite tama pa shilambo shangu na ku Yelushalemu. 5 Gwaumila bhukala Bhayaudi bhamanyinji nne, numbe bhapingangaga kungong'ondela bhanaakombolanga, pabha kuumila bhukala munaaliji munkumbi gwa Ashimapalishayo, nilikagulila ukoto malajilo ga dini jetu. 6 Na nnaino nyimi apano kuukumulwa ligongo lya kulupalila malajilo gubhapegwilenje bhanangulungwa bhetu na a Nnungu. 7 Gene malaganogo ni gaakulupalilwa na makabhila likumi limo na gabhili ga bhandunji bhetu, akuno bhalitumbilanga kwaatindibhalila a Nnungu shilo na mui. Mmakulungwa, gubhanugulanga nne Bhayaudi, ni ga jene ngulupaijo! 8 Kwa nndi kwenu mmanganyanji nnakulibhonanga lilobhe lya a Nnungu lya kwaayuyanga bhawilenje linaganishiywa nngabha lya kulupalika?” 9 “Nkali nne namwene naganishiyaga kuti ngunapinjikwa ndende itendi ya kulikana lina lya a Yeshu Bhanashaleti. 10 Genego nigundendile ku Yelushalemu. Punapegwile malajilo na bhakulungwa bha bhaabhisilanga, njinkwaatabhanga mmagelesha bhandunji bha ukonjelo. Na pubhabhulagwangaga nne natendaga kunda. 11 Na papagwinji mmashinagogi gowe nashinkwaapoteke nnilikwashishilishiyanga bhajikananje ngulupai jabhonji. Nnjimwa yangu ishinkupunda mbuti akwete shalubha, gumbite kwaapoteke nkali muilambo ya taliya.” 12 “Bhai kwa ligongo lyolyo pelyo, gumbite ku Dameshiki nilimbegwile mashili na malajilo na bhakulungwanji bhaabhisilila. 13 Mmakulungwa, puyaliji mui nili mumpanda, gunishibhweni shilangaya shapunda shilangaya sha lyubha shilikopoka kunani kunnungu, nimulishila nne na ashaamwanja ajangunji. 14 Gutugwile pai tubhowe, gumbilikene lilobhe lilimalanjila kwa Shiebhulania, 'A Shauli, a Shauli! Pakuti nnaanijima? Nkakombola mmwe kulikoma lionga na lukongono.” 15 “Nne gumushiye, 'Mmakulungwa mwe agani?' Bhakulungwa gubhajangwile, 'Nne a Yeshu, bhunkwapoteke. 16 Ikabheje nnjinushe njime kwa makongono genu, pabha njikunkoposhela nkupinga nintende ntumishi jwangu na nkukong'ondela jwa indu imwibhweni na indu ishinananguye. 17 Shinintapule kubhandunji bhenu Bhaishilaeli na kubhandunji bha ilambo ina bhunguntuma kwaajendelanga. 18 Mwaunukulanje meyo gabhonji nkupinga bhashokangane nnubhundu bhajinjilangane nshilangaya, bhalekanje kuntumishila Lishetani bhaatendebhushilanje a Nnungu, nkupinga bhaleshelelwanje yambi yabhonji na bhabhanganje munkumbi gwa bhandunji bhaagulwenje na a Nnungu kwa ligongo lya ngulupalila nne.’ 19 “Kwa nneyo, mmwe a mpalume Agilipa, nne nangagakana gene gunigabhweni gakopweshe kunnungugo. 20 Ikabhe gundandwibhe kulunguya kubhandunji bha ku Dameshiki na kubhandunji bha ku Yelushalemu na nshilambo showe sha ku Yudea na kubhandunji bha ilambo ina. Nilikwaakwiyanga bhaatendebhushilanje a Nnungu na bhalangulanje kwa itendi kuti bhaipetilenje. 21 Kwa lyene ligongolyo Bhayaudi gubhangawilenje nili nniekalu gubhalinjilenje kumulaga. 22 Ikabheje a Nnungu gubhanyangutile, kwa nneyo mpaka lelo juno ngunaajima

nilikong'ondela kubhandunji bhakulungwanji na bhashoko. Ingutaya nne nngabha ina, ikabhe ibhatashiyenje ashinkulondola bha a Nnungu na a Musha kuti shikoposhele, 23 kuti a Kilishitu bhashinkupinjikwa bhapoteke na kubha bha ndandubho kuyuka kukopoka kubhawilenje, nkupinga bhalunguye kuti nnaino shilangaya shaagombolwa bhandunji, shinakwaalangashiyanga bhandu bhowe, Bhayaudi na bhandunji bha ilambo ina.” 24 A Pauli bhakaishileje penepo nkuibheleketela, a Peshito gubhabhashite kwa utiya, “A Pauli! Nshikola shalubha! Kushoma kwenu kwa punda, kunakumpuganya lunda!” 25 Ikabheje a Pauli gubhajangwile, “Mmakulungwa a Peshito nne nangali shalubha. Ingubheleketela ino ni ya kweli na ya lunda. 26 Agano malobhe gano mwe mmakulungwa nngamanyi, kwa nneyo nangali bhoga kummalanjila. Pabha genega gamanyishe kwenu mmwe, gangali ng'iyu. 27 Mmakulungwa Agilipa, bhuli nnikulupalila ga ashinkulondola bha a Nnungu bha bhukala? Nnumanyi kuti nnikwaakulupalilanga.” 28 Agilipa gubhaajangwile a Pauli, “Punkuganishiya kashokope nnei shindende nne kubha Nkilishitu?” 29 A Pauli gubhaajangwile, “Ngunakwaajuga a Nnungu kuti ibhe kwa malobhe gashokope eye gamagwinji, nngabha mmwe jikape, ikabhe na bhandunji bhowe bhaambilikananga nne lelo, ibhe nnaino eu pakaabhe, bhabhanganje malinga nne, ikabheje nngabha na mindondolo jino.” 30 Penepo bhakulungwa Agilipa na liwali na a Bhenike na bhowenji bhatemingenenje pepala bhala, gubhajiminji. 31 Bhakajabhulanganeje, gubhabhalanjilenje, “Aju munduju shakwapi shatendile shaapinjikwa kubhulagwa wala kutabha.” 32 Na bhalabho Agilipa gubhaabhalanjile a Peshito, “Aju munduju gwangali pinga malobhe gakwe gakamaliywe kwa a Kaishali, akagopwelwe.”

27 Bhai ikaamulishweje kuti tujende ku Italia na meli, a Pauli na bhaatabhwanga bhananji gubhabhishilwenje muulinda gwa a Juliashi bhaaliji bhakulungwa bha bhaakomana ngondo bha shikundi shishemwa “Shikundi sha a Kaishali Augushito.” 2 Gutukwelile meli ja ku Adilamito jaliji tayali kujabhula mwanja pitila mbwani ya shilambo sha ku Ashia, gututandwibhe mwanja. A Alishitako kopoka ku bhandunji bha ku Makedonia kukopoka ku Teshalonike paliji na uwe. 3 Pa malabhi gakwe gutuishe ku Shidoni na meli. A Juliashi gubhaatendele a Pauli mituka kwa kwaaleshelela bhajende kwa ashaambwiga ajabho bhakapegwe indu ibhapingaga. 4 Kujabhula penepo gutupite na mwanja, pabha mbungo jatendaga puga koposhela mmujo jetu, gutubhambalile mmbali ja ku Shilia. 5 Tukapiteje litanda likulu lya ku Kilikia ja ku Pampilia, gutuishe ku Mila, shilambo sha Likia. 6 Kweneko bhakulungwa bha bhakomana ngondo bhala gubhajiimene meli jimo ja ku Alekishandilia jilipinga jabhula kwenda ku Italia, kwa nneyo gubhatukweshiye mwenemo. 7 Gutupite na mwanja gwetu mbolebole kwa mobha gamagwinji, kwa lajilila gutuishe tome na ku Nido. Pabha mbungo jatendaga kutuibhilila, gutupitile mmbali ja ku Kilete tome na ku Shalimone. 8 Gutupitile nnyenje jakwe kwa lajilila gutuishe mmbali jimo jishemwa “Bhandali ja Mmbone”, tome na shilambo sha Lashea. 9 Gakapiteje mobha gamagwinji, mpaka lyubha lya tabha gulipitile. Na

mbwanja gwa mmashi pugwaliiji gwa jogoya. Bhai, a Pauli gubhaaleshiyenje bhalinkuti, **10** "Mmashileunji, ngunakuubhona aguno mwanja guno, upingabha gwa atali na shonanga, nngabha kwa mishigo na melipe, ikabhe nkali na gumi gwetu." **11** Ikabheje bhakulungwa bha manjola bhala gubhapiikanishiye kaje malobhe ga bhaalongoya meli na bhayene meli nileka pilikanishiya malobhe ga a Pauli. **12** Pabha jene bhandalijo jikatemiji pammbone pa tama mobha ga shipwepwe, bhandunji bhahagwinji mmwanja mula gubhapijilenje tujende na mwanja tukaishe ku Poenike monaga shiitendeshe, nitama kweneko mobha ga shipwepwe. Poenike ni bhandali ja ku Kilete jiloya kwibhanda kuliwila lyubha na kuntundu kuliwila lyubha. **13** Bhai, mbungo jammbone ja kopoka nnyuma jetu jikupudaga kupuga, gubhaganishiyenje kuti gubhatumbililenje gala shigatendeshe, gubhashoshiyenje nanga, gubhapitengenene na mbwani tome na mbwani ja ku Kilete. **14** Ikabheje pangakabhika, mbungo japunda ja mbuti shimbunga jishemwa "Mbungo ja kashikashi," kukopoka ku Kilete shilambo shitimbiilwe na mashi. **15** Mbungo jikukomaga mmeli na pabha jikakombweleje kutaukangana najo gutujijeshile jinokolwe na mbungo jila. **16** Gutupitile shangu shilambo shimo shitimbiilwe na mashi shishemwa Kauda gutwikombolele kukweya ntumbwi, ikabheje kwa lailila. **17** Bhakakweyanjeje gubhajitabhilenje meli jila kwa pishiya nngoji pai jakwe. Bhatendaga jogopanga kutitimila munng'anji nnyenje bhaali kumbwani ja ku Shiliti. Kwa nneyo gubhatuluyenje indu yaigwinji na ligubho lya tejela mbungo nikujileka meli jinokolwe na mbungo. **18** Shimbunga shikupudaga kupugakwa mashili na pa malabhi gawe tukujailaga mmashi mishigo ja mmeli jila. **19** Lyubha lya tatu, gubhajailenje indu yaigwinji na ya kamulila maengo ya mmeli mula kya makono gabhonji ashaayene. **20** Kwa mobha gamagwinji twangalibhona lyubha wala ndondwa, shimbunga gushipundile kupuga, mpaka gutuwile ntima ga tapulwa. **21** Na bhakatamanjeje mobha gamagwinji gwangali kulya shalya, a Pauli gubhajimi pakati jabhonji, gubhashite, "Mmakulungwanji, kaliji nkambilikaniishiye ninngajabhula ku Kilete kula. Tukanalaje nneino na tukanapate ashi shonangashi. **22** Ikabheje nnaino ngunakunnjuganga, nkolanje ntima, pabha jakwa nkali mundu jumo munkumbi gwenunji shawe, ikabhe melipe shijiangabhanishe. **23** Pabha shilo sha lelo malaika jwa a Nnungu, a Nnnungu bhandendile nne kubha najwabho na bhungwatindibhalila ashinkujima tome na nne, **24** gwamalanjile. 'Pauli unajogope! Unapinjikwa ujime kwa a Kaishali na kabhili a Nnungu kwa uguja gwabho bhashikupa bhandunji bhowe bhalongenene na ugwe jwakwapi shawe.' **25** Kwa nneyo mmashileunji nng'angalanje! Pabha ngunakwaakulupalila a Nungu kuti ibhamalanjile ila shiibhe nneyo peyo. **26** Ikabheje mbungo shijitunokole nnyenje shilambo shitimbiilwe na mashi shino." **27** Shilo sha lyubha lya likumi limo na nsheshe jikapujeje mbungo, tulinokolelwa akuno na kukuno nnitanda likulu lya Adilia. Tome na pakati shilo bhatumishi bha mmeli mula gubhabhweninji mbuti tunabhandishila litaka. **28** Kwa nneyo gubhatolilenje nngoji nitabhila shindu shatopa, nilinga mashi mugapelle, nibhona kutaliya kwa makono makumi nsheshe. Bhakajendangananjeje kashoko gubhalinjilenje kabhili gubhapatilenje shindu sha makono makumi gatatu. **29** Kwa

jogopa kutitimila mmaganga gamakulungwa, gubhatuluyenje nanga nsheshe ya kunyuma ja meli, gubhajujilenje kushe shangu. **30** Bhatumishi bha mmeli mula gubhapijilenje kutoloka, bhalituluyanga ntumbwi gwa kwitapulila mmashi, kwitembanga mbuti bhakwenda tuluyanga nanga ja mmujo. **31** Ikabheje a Pauli gubhaabhalanjile bhakulungwa bha manjola na ashimanjola bhabho, "Bhanganyanjibha bhakatamanje nkati meli nkatapulwanga." **32** Bhai ashimanjola bhala gubhaikitenje migoji jatabhilwe muntumbwi jila, gubhauleshilenje utolwe na mashi. **33** Tome na kumashelo, a Pauli gubhaashondelesheyenje bhoweni bhalyanganje shalya, bhalinkuti, "Lelo lyubha lya likumi limo na nsheshe nninginji nkulolela gwangali kulya shoshowe. **34** Bhai, ngunakunshondelesheyanga nnianganje shalya shishintapulanje. Pabha nkali luumbo lwa mu ntwе ukamundu jojowe lukaobha." **35** A Pauli bhakamaliyeje kubheleketa genego gubhatolile nkate, gubhatendile eja kwa a Nnungu bhowe bhaikwaabhonanga, gubhagabhile gubhatandwibhe kulya. **36** Penepo gubhatagwilwenje ntima na bhowenji gubhalilenje shalya ashaayene. **37** Na mmeli mula putwaaliji tubhandu mmia pa bhili na makumi shabha na shita. **38** Bhakalyanganjeje nijukuta, gubhapunguyenje nshigo gwa meli kwa jaa ngano mmashi. **39** Kukasheje, bhatumishi bha mmeli mula bhangashimanyanga shilambo shila, ikabhe gubhalibhweninji litingo limo nnyenje bhaali, gubhabhalanjilenene bhajimikanje meli kweneko, monaga shiikomboleshe. **40** Kwa nneyo gubhakutulenje nanga nikwiileka nnitanda likulu na kabhili gubhagopolenje migoji ja tabhila nkongo gwa longosheya meli, gubhatabhilenje ligubho lina lya tejela mbungo nkupinga meli jijende shammujo, gubhaloshiyenje kunyenje bhaali. **41** Ikabheje gubhaikengenene pugaimana mabhutuka gabhili ga bhaali, meli gujitimile. Mmujo ja meli mukutitimilaga nnitaka gujitemi gwangali kutenganyika. Kunyuma meli kukutandubhaga kutemeka ipande ligongo lya komwa na mabhimbili. **42** Ashimanjola gubhapijilenje kwaabbulaganga bhatabhwa bhowe, nkujogopa bhanajojelelaga mpaka kunyenje bhaali nitokanga. **43** Ikabheje bhakulungwa bha manjola bhala bhashinkutumbiilila kwaatapula a Pauli, gubhaalimbiyenje bhanatendanje gubhatumbilenje gala. Gubhatumile bhaakombolanga kujojelela, bhatandubhanje kutumbushila mmashi bhajojelelanje mpaka kulitaka, **44** bhananji bhakagulanje bhaikamililanje mmbao e muwipande ina ya meli. Shana nneyo tubhowe gutuishe kulitaka tubhabhakoto.

28 Tukaisheje ulele kulitaka, gutumumanyi kuti shilambo shitimbiilwe mashi shila pushashemwaga Melita. **2** Bhashilambo bha kweneko gubhatutendelenje mituka ja kaje. Pabha ula jatendeganya na twashinkukola mmbepo, gubhakumbenyenje moto gubhatushemelenje tubhowe. **3** A Pauli gubhalokwete neng'ene nshigo gumo gubhakwiile pamoto. Bhai, penepo kwa ligongo lya lyoto lya moto gula gwakopweshe lijoka jwa luma nneng'ene mula akwaanymbelaga a Pauli munkono. **4** Bhashilambo bha pepala bhakabhonanjeje lijoka alikwaakwela a Pauli, gubhabhalanjilenene, "Ipingagaaju munduju ashibhulaga mundu nkali alamile gwangali kuwa mmashi, nnungu jwetu jwankongwe ashemwa Aki akanneka alame!" **5** Ikabheje a Pauli gubhampukunyiishiye pamoto lijoka

jwa luma jula na wala jwangaaluma nkali kashoko. 6 Bhandunji bhala gubhalinginji nkulolela kuti nkono gula shiguimbe eu a Pauli shibhagwe niwa popo. Bhakalolelanje paakabha nibhona wala shakwapi shikwakoposhela a Pauli, gubhatindigenyenje ng'aniyo yabhonji gubhashitenje kuti, jweneju nnungu. 7 Tome na pepala jashinkupagwa migunda ja bhakulungwa bha shene shilambo shatimbililwe na mashisho lina lyabho pubhashemwaga a Pabhuliashi. Gubhatushemile kunngwabho kwa ntima gwa umbwiga, gututemi ujeni mobha gatatu. 8 Ainabhabho a Pabhuliashi bhashinkusheluka na kuluma, bhali bhagonile pa shinanda. A Pauli gubhapite kwalola na gubhajujile Nnungu, gubhaabhishile makono gubhaalamiye. 9 Gakatendesheje genego, bhalwelenji bhowe nnepeila pa shilambo pala gubhaaishilenje a Pauli na gubhalamiywenje. 10 Nabhalabhonji gubhatujogopenje kwa kaje, tukapanganisheje kujabhula, gubhapashilenje indu yaigwinji itwaipinjile. 11 Jikapiteje myei jitatu gututandwibhe mwanja gwetu na meli jimo ja ku Alekishandilia jishemwa, "Ashinnungu bha Mmba." Pujaliji kweneko miongwe jowe ja shipwepwe. 12 Gutuishe shilambo sha ku Shilakusha gututemi mobha gatatu. 13 Tukajabhuleje penepo gututimbilile gutuishe ku Legio. Likapiteje lyubha limo, mbungo ja kushi jikutandubhaga kupuga na gakapiteje mobha gatatu gutuishe kubhandali ja Potioli. 14 Kweneko gutwaimenenje bhakilishitu ajetunji gubhatujijilenje tutame nabhonji juma jimo. Gutuishe ku Loma shana nneyo. 15 Bhakilishitu ajetunji bha ku Loma bhakapilikananje kuti tushiika, gubhaikengenjenje kukutuposhela kumbwani ja Apio na Kunyumba Itatu ya Bhajeninji. A Pauli bhakaabhonanjeje gubhatendile eja kwa a Nnungu, gubhatagwilwe ntima. 16 Tukaisheje ku Loma a Pauli gubhaleshelelwe kutama kujika muulinda uka linjola jumo. 17 Gakapiteje mobha gatatu a Pauli gubhaashemilenje ashikalongolele bha Shiyaudi bha shene shilambosho. Bhakaimananjeje gubhaabhalanjilenje, "Ashapwanga, shakwa shindendile na wala tauka ikubho ya ashinakulubhetu, nashinkukamulwa ku Yelushalemu kula na kamuywa mmakono ga Bhaloma. 18 Bhakamuyanaje nibhona kuti shakwa shinebhile, gubhapinjilenje kung'opola bhanekanje. 19 Ikabheje Bhayaudi bhananji gubhakanilenje, gunyujile malobhe gangu gakamaliywe na bhakulungwa bha ku Loma a Kaishali, nkali ngakweteje malobhe gogowe ga kwaalugulanga bhashilambo ajangunji. 20 Bhai, kwa ligongo lya genego, njikunshemanga kunnolanje na tukungulushe, pabha njitabhwa ajino mindololo jino ligongo lya malagano ga a Nnungu ku bha Ishilaeli gala." 21 Bhalabhonji gubhaalugulilenje, "Uwe tukanabhe poshela ntenga eu bhaluwa ja ngani jenu kopoka ku Yudea, wala jwakwa nkilishitu jojowe aise apano kutubhalanjila lilobhe lyolyowe linnebhile mmwe. 22 Ikabheje tunapinga tupilikane shinkuganishiya mmwe, pabha uwe tumumanyi kuti mmbali yowe gwene nkumbigo unalugulwa mwangali mwambone." 23 Bhakalagananjeje lyubha lya imana, gubhaikengenjenje bhandunji bhahagwinji nnyumba jibhatamaga. Tandubhila lyamba mpaka ligulo a Pauli gubhaatalashiyenje ga Ukulungwa gwa a Nnungu, bhalilinga kwaanendanga bhakundanje ngani ja a Yesu kwa talashiya shalia ja a Musha na ashinkulondola bha a Nnungu. 24 Bhananji gubhakundilenje malobhe gala, ikabheje

bhananji bhagakulupalilanga. 25 Bhai, gubhajabhulengene akuno bhali bhalekenenje ng'aniyo ga malobhe ga a Pauli ga kuti, mbeni Mbumu jwa Ukonjelo abhelekete mwa mmbone na ashinakulubhenunji kwa kang'wa ja ankulondola bha a Nnungu a Ishaya, 26 bhalinkuti, "Jenda kubhandunji bha ukaabhalanjilenje. Kupilikana shimpilikananje, ikabheje nkamumanyanga, Kulola shinolanje, ikabheje nkaibhonanga. 27 Pabha mitima ja bhene bhandunji bha jishitopa, bhashiibhanga makutu gabhonji meyo gabhonji bhashikupilanga. Gwangali nneyo, bhakalolilenje na meyo gabhonji, bhakapilikenenje na makutu gabhonji. Bhakalewenje mmitima jabhonji, bhakaandendebhushilenje, bhashite Bhakulungwa, ngaalamiyenje." 28 Kungai a Pauli gubhashite, "Bhai, mmumanyanje kuti ntenga gwa a Nnungu gwa ngani ja ntapulo upelekwe ku bhandu bha ilambo ina. Bhalabhonji shibhapilikananje!" 29 Bhakabheleketeje genego, Bhayaudi gubhajabhulenenje, bhalipita taugangana ashaayenenji. 30 A Pauli gubhatemi ku Loma yaka ibhili nnyumba jibhapoleshe bhayene kwalipila mbiya, bhatendaga kwaposhelelanga bhowe bhaowelangaga. 31 Bhatenda lunguya ga Ukulungwa gwa a Nnungu na jiganya ngani ja Bhakulungwa a Yesu Kiliishitu gwangali bhoga na jwakwa muntu abhalimbiyaga.

Bhaloma

1 Nne Pauli ntumwa jwa a Yesu Kilishitu, njemilwe na a Nnungu kubha ntume jwa lunguya Ngani ja Mmbone. **2** Jene Ngani ja Mmboneji, jishinkulajilwa na a Nnungu bhukala, kupitila ashinkulondola bhabho Mmajandiko ga Ukonjelo. **3** Ngani ja Bhana bhabho, Bhakulungwa bhetu a Yesu Kilishitu, bhahbelekewe shigundu nnukolo lwa a Daudi, **4** na Mmbumu ya ukonjelo gwabho bhashinkuagulwa kubha Mwana jwa a Nnungu, kwa kuyuka kwabho bhakaweje, yani a Yesu Kilishitu Bhakulungwa bhetu. **5** Kupitila kwa bhenebho, uwe tushipegwa nema na utume, nkupinga bhandu bha ilambo yowe twaalongoyanje nkukulupalila na nkukunda lina iyabho kwa ligongo lya ukonjelo gwabho. **6** Na mmanganyanji nneila peila, nninginji munkumbi gwa bhashemilwenje na a Yesu Kilishitu, kubha bhandunji bhabho. **7** Ngunakunjandishilanga mmowe nninginji ku Loma, nkupingwangwa na a Nnungu na nshemilwenje mmanganje bha ukonjelo. Ngunakunjijilanga nema na ulele, kwa Atati a Nnungu na Bhakulungwa bhetu a Yesu Kilishitu. **8** Ngunatandubha kwa kwaatendela eja a Nnungu bhangu, kupitila a Yesu Kilishitu kwa ligongo lyenunji mmowe, pabha ngulupai yenunji inalunguywa nshilambolyo. **9** A Nnungu bhungwatumishila kwa ntima gwangu gowe, nkulunguya Ngani ja Mmbone ja Bhana bhabho, ni bhakong'ondela bhangu shinguti kunkumbushilanga mobha gowe. **10** Ngunatenda nneyo mobha gowe, nkujuga Nnungu kwangu kuti, a Nnungu bhapingaga bhambe malanga, nyiye kunngwenunji agano mobha gano. **11** Pabha ngunalokolila kwa kaje kummonanga, nimpanganje shiukilo sha mmbumu, nkupinga nshimilikwanje. **12** Kwa nneyo shitutagane ntima, kila mundu kwa ngulupai jika mwine, ngulupai jenu mmanganyanji, na ngulupai jangu nne. **13** Ashaalongo ajangunji ngunapinga mmumanyanji kuti, papagwinji nashinkutumbilila kunng'owelanga, ikabheje mpaka nnaino a Nnungu bhashing'ibhilila. Pungupinga na kweneko naapatanje bhandunji bhakwaakulupalilanga a Yesu Kilishitu, malinga shinaapatilenje mwiilambo ili nngabha ya Bhayaudi. **14** Njikola ligambo muntima kwa ligongo lya Bhayunani na bhanganlinji Bhayunani. Njikola ligambo ku bhakwetenje lunda na bhanganlinji lunda. **15** Kwa nneyo nne njiengwa kulunguya Ngani ja Mmbone, nkali kungwenunji nninginji ku Loma. **16** Nne ngakujibhonela oni Ngani ja Mmbone, pabha jenejo, ni mashili ga a Nnungu gapeleshela ntapulo kubhandu bhowe bhaakulupalilanga, kutandubhila ku Bhayaudi na mpaka ku Bhagiliki. **17** Pabha Ngani ja Mmbone jinalanguya a Nnungu shibhakuti kwaapanganga bhandunji aki. Lyeneli linatendeka kaje kwa ngulupai, malinga shiishite jandikwa, "Akwete aki shaatame kwa ngulupai." **18** Kukoposhela kunnungu, a Nnungu bhashilangula nnjimwa jabho ku bhandunji bhakakwaakagulanga a Nnungu, bhaakananga ya kweli kwa itendi yabhonji yangali ya mmbone. **19** Pabha indu yowe imanyika kuti ya a Nnungu bhaimanyinji, pabha bhayene a Nnungu bhalangwiye indu yabho. **20** Indu yaishiywe kuumila bhukala gwa panganywa shilambolyo, nnaino inabhoneka nimanyika, yani liengo iyabho na mashili gabho ga pitipiti na Unnungu

gwabho, kupinga bhanakolanje sha bheleketela! (aidios g126) **21** Nkali bhakaamanyanje a Nnungu, bhangaakuyanga na wala kwaatendela eja, malinga shiipinjikwa, ikabheje ng'aniyo yabhonji ishipeganyika, na mitima jabhonji jangali lunda jishikwaabhikanga nnuhindu. **22** Bhanakwitombanga kuti bhashikolanga lunda, mbeni bhangu. **23** Bhaleshilenje kwaatindibhalila a Nnungu bha ukonjelo na bha pitipiti, nikuatindibhalila yanamu ili malinga bhandu bhaawanganga, eu mbuti ijuni, eu bhannyama, na bhaatambalanga pai. **24** Kwa lyene ligongolyo, a Nnungu gubhaaleshilenje bhakagulanje ilokoli ya nyata ya mmitima jabhonji, na tendelana indu ya nyata nukulabhalbha, nikwitokomaya iilu yabhonji. **25** Bhanatindiganyanga indu ya kweli ya a Nnungu nkupinga bhakagulanje ya namu. Bhalitindibhalilanga shiumbe, kuleka kwaatindibhalila bhayene Ashipanganya, bhapinjikwa lumbililwa pitipiti! Amina. (aiōn g165) **26** Kwa nneyo, a Nnungu bhashikwalekanga bhanaishimiyanganje nikagulila ilokoli ya nyata. Nkali bhanabhakongwe, bhashilekanga itendi ya shibhelekewe ya shiilu shabhonji, nitenda sha munape. **27** Nneyo peyo, na bhanabhalume gubhaleshilenje kwaalokolilanga ashaakongo bhahonji, nilokolilana ashaayenenji. Bhanabhalume gubhatendilenje indu ya nyata, gubhaishemelenje ukumu ashaayenenji, kwa ligongo lya itendi yabhonji yangali ya mmbone. **28** Malinga shibhakaniyenje kubha na a Nnungu nng'aniyo yabhonji yangali ya mmbone, a Nnungu gubhaaleshilenje bhaikagulanje ng'aniyo yabhonji, bhatendarje yangali ya mmbone. **29** Bhashigumbalilwanga na kila gwangali gwa mmbone, kukwetela, na joloka, na lupimililo, na bhulaga, na mipwai, na namu, na ng'aniyo yangali ya mmbone, na bha lung'wenyi. **30** Kabhili, bhaalambililanga na bhakwaashimanga a Nnungu, na bhakwetenje nngomo, na bhakwetenje mbwinya na kwiipuna, bhaakumbuyanga itendi ya ambi ya nyata, na bhakakwaapilikanishiyanga bhaakwetenje. **31** Na bhene bhanganlinji lunda, na bhakaajalinji malagano, na bhakakwaapinganga ashaalongo ajabhonji, wala bhanganlinji shiya. **32** Bhalikumumanyanga kuti shalia ja a Nnungu jinaataya kuti, bhandunji bhatendanga nneyo bhanapinjikwanga kuwa. Nkali nneyo, nngabha bhanatendanga genego ashaayenenji, ikabheje bhene bhatendanga yenyoye bhala bhanakwaalumbililanga.

2 Kwa nneyo, monaga nkwiitemba kwaukumula bhananji, nkakola sha kwiibheleketela. Nnakiwukumula mmayene, pabha numbe mmwe inkutenda yoyo peyo. **2** Na uwe tumumanyi kuti ukumu ja a Nnungu ni ja kweli, kwa bhatendanga indu malinga yenyoye. **3** Ikabheje mmwe anamundupe, nkwaukumulanga bhaatendanga indu malinga yenyoye, akuno mmayene nitenda yoyo. Bhuli, punkuganishiya kuti shimwiembuye na ukumu ja a Nnungu? **4** Eu nnakuunyegaya uguja gwa a Nnungu, na kwiitimalika na kwiipiilila kwabho, gwangali kumumanya kuti uguja gwabho unakunnongoya mwiipete? **5** Ikabheje kwa ligongo lya mitau na nonopa kwa ntima gwenu, nnakwiigosheya nnjimwa, lyubha lya nnjimwa ja a Nnungu, na ukumu jabho ja aki. **6** Pabha lyene lyubhalyo, a Nnungu bhapinga kwiya kwaalipanga bhandunji bhowe malinga ibhatendanga. **7** Bhene bhaatendanga ya uguja gwangali kutotoshela, bhanaloleyanga

kukopoka kwa a Nnungu, ukonjelo na ishimika na gumi gwangali angabhanika, na shibhapegwanje gumi gwa pitipiti. (aiōnios g166)

8 Ikabheje bhananji bhaakwetelanga na bhaakananga indu ya aki bhala, nikaguila yangali ya mmbone, shibhajibhohanje nrijimwa ja a Nnungu. **9** Mboteko na shilaje shiimpate mundu jojowe atenda yangali ya mmbone, kutandubhila Bhayaudi na Bhagiliki. **10** Ikabheje, ukonjelo na ishima na ulele, shibhapegwanje bhandunji bhaatendanga indu ya aki bhala, kutandubhila Bhayaudi na Bhagiliki. **11** Pabha a Nnungu bhanganali luagu. **12** Bhowe bhatendilenje yambi gwangali kujimanya shalia ja a Musha, shibhapotekwanje nngabha kwa ligongo lya shalia, na bhowe bhatendilenje yambi akuno bhalikujimanyanga shalia ja a Musha, shibhaukumulwanje kwa tolelela shalia ja a Musha pejo. **13** Na nngabha bhakujipilikananga shalia ni bhakwete aki kwa a Nnungu, ikabheje bhaakundanga shalia bhala, nibhaakolanga aki. **14** Bhandunji bha ilambo ina bhanginginji shalia, pubhaatendanga indu ya shalia kwa ng'aniyo ya muntima gwabhonji bhanabhanganga bhandunji bha shalia, nkali bhanakanalenge shalia. **15** Bhanalanguyanga malajilo ga shalia jiidandishwe mmitima jabhonji, ng'aniyo yabhonji ilikwakong'ondelanga na ilikwalonganga na guna ilikwaabheleketelanga ashaayenenji. **16** Yeneyo ni ipinga koposhela, lyubha lya ukumu ja a Nnungu, pushibhaukumule indu ya nng'yo kupitila a Yesu Kilishitu, malinga shijikuti taya Ngani ja Mmbone jingulunguyaji. **17** Pabha mmwe nkwiishema mmayene Mmayaudi, nnakulupalila shalia, na nnakwiiniya kuti bha a Nnungu. **18** Mmwe nnikuijanya ibhapinga a Nnungu, na kunda indu ya mmbone, pabha nshijiganywa na shalia. **19** Mmwe punkwiiganishiya kuti mmayene akalongolele bha ashinangalole, na kabhili mmwe shilangaya sha bhandu bhalinginji nnuhindu, **20** mmajiganya bha mabhelu na bhana bhashoko, pabha kwa shalia, mwiimanyi ukoto indu ya lumanyio na kweli. **21** Bhai mmwe nkwaajiganyanga bhananji, kwa nndi nakakwiiganya mmayene? Mmwe nkwaalimbiyanga bhananji bhanajibhanje, akuno mmayene nrjijiba. **22** Mmwe nkulunguya kuti, "Mundu analabhelabhe" akuno mmayene nnilabhalabha. Inakunshima yanamu ya ashinnungu, mbena nrjijiba indu ya mmajumba gabhonji. **23** Nnikwiiniya kuti nkwele shalia ja a Nnungu, nkakumunyanga kuti kuleka kamula shalia, nnakwanyegaya a Nnungu? **24** Malinga Majandiko ga Ukonjelo shigalugula, "Bhandunji bha ilambo ina, bhashikulitukananga lina lya a Nnungu, kwa ligongo lyenunji." **25** Pabha kujaluka kunapwaa punkukamulila shalia ja a Musha, ikabheje nkakumulile shalia ja a Musha, shimme mbuti mmalenje. **26** Bhai monaga mundu jwangajaluka anakumulila shalia ja a Musha, bhuli na ulenje gwakwe akaganishiywa kuti ajalwishe? **27** Na jwene jwa nngabha munkubho gwa jaluka, ikabheje anakumulila shalia ja a Musha, bhuli akann'ukumula mmwe nni munkubho gwa jaluka, na akuno nkakumulila shalia ja a Musha? **28** Pabha jwenejo, nngabha Nnyaudi kwa bhoneka palanga, na kujaluka nngabha kwa nshilupe. **29** Ikabheje jwenejo ni Nnyaudi, ali Nnyaudi jwa nkati, na kujaluka kwakwe kwa muntima kwa Mbumu jwa Ukonjelo, nngabha kwa mmajandiko ga shalia. Mundu jwa nneyo, kuiniywa kwakwe nngabha kubhandunji ikabheje kwa a Nnungu.

3 Bhai, Nnyaudi akwete nndi sha kwaupundanga bhananji? Na kujaluka kupwaa nndi? **2** Elo! Kulipwaa kwa kila shindu. Pabha Bhayaudi ni bhatainji kupegwa ntenga gwa a Nnungu. **3** Bhai igala shiibhe bhuli monaga bhananji munkumbi gwabhonji bhanganalupalilanga? Bhuli ungakulupalila gwabhonji shigupuganye kukulupalika kwa a Nnungu? **4** Ng'oo, wala kashoko! A Nnungu ni bhakulupalika, na kila mundu nmani, malinga shigalugula Majandiko ga Ukonjelo kuti, "Mmwe a Nnungu, kila punkubheleketela, malobhe genu gabhoneshe kubha ga aki, na nkuukumula, mmwe ukumu jenu, jibhoneshe kuti ga kweli." **5** Ikabheje, monaga yambi yetu inalunguya kuti a Nnungu bhanatenda kwa aki, bhai tulugule nndi? Bhuli, tujile a Nnungu bhakaatenda aki pubhaalangula nrjimwa jabho kwetu uwe? (Penepo ngunabheleketela shigundu). **6** Ng'oo, wala kashoko! Pabha ikaliji nneyo, a Nnungu bhakashiukumwile bhuli shilambolyo? **7** Pana shinnugule kuti, "Ibhaga unami gwangu, ni ulanguya kuti a Nnungu ni bhaakulupalika na ni bha ukonjelo, bhai pakuti ngunaukumulwa kuti njikola yambi?" **8** Bhananji bhanakutulambililanga, bhalinkutinji, eti uwe tunakupulu kuti, tutende yambi nkupinga ga mmbone gaishe. Tumumanyi kuti, bhakutulambililangabho shibhapatanje ukumu ja aki. **9** Igala tujile bhuli? Bhuli, uwe Bhayaudi tubha mmbone kupunda bhananji? Ng'oo! Wala kashoko. Pabha tulangiye kuti Bhayaudi na Bhagiliki, bhowe ni bhatumwa bha yambi. **10** Malinga shigalugula Majandiko ga Ukonjelo, "Jwakwapi nkali jumo akwete aki! **11** Jwakwapi mundu akwete lumanyio, Wala akwaaloleya a Nnungu. **12** Bhowe bhashiobhanga, Bhowe bhashilebhanga, Jwakwa atenda ya mmbone, Jwakwapi nkali jumo. **13** Malobhe kopoka nkang'wa yabhonji ga nyata, mbuti makabhuli gangakulilwa, Ilimi yabhonji ishigumbala unami, Kang'wa yabhonji inakopoka malobhe ga ushingu mbuti gwa lijoka. **14** Kang'wa yabhonji ishigumbala malobhe na malobhe ga poteka. **15** Bhanabhutushilanga kuubhulaga. **16** Popowe pubhakwendangana, bhanabhanganga shiumilo sha angabhanya na mboteko. **17** Wala mpanda gwa ulele bhakakuumanyanga. **18** Pameyo gabhonji kwakwa kwaajogopa a Nnungu." **19** Bhai tumumanyi kuti shalia ja a Musha, ni kwa ligongo lya bhandunji bhaakulupalilanga shalia, nkupinga bhanakolenge shindu shoshowe sha bheleketela, na shilambolyo showe pushili pai ja ukumu ja a Nnungu. **20** Pabha jwakwa mundu jojowe shaapate aki kwa a Nnungu, kwa ligongo lya kamula shalia ja a Musha, pabha liengo lya shalia, ni kulanguyape kuti, mundu ashitenda shambi. **21** Ikabheje nnaino, aki ja a Nnungu jimanyishe, nngabha kwa kagulila shalia, malinga shiyalajilwe mmajandiko ga a Musha na ga ashinkulondola bha a Nnungu. **22** Jene aki ja a Nnungu pujiukiya kwa kwaakulupalila a Yesu Kilishitu. A Nnungu bhanatenda nneyo ku bhowe bhaakulupalilanga, pabha lwakwa luagu. **23** Pabha bhandunji bhowe bhashitendanga yambi, nitubhilwa na ukonjelo gwa a Nnungu. **24** Ikabheje bhanabhalanganishiywanga aki gwayoyo kwa nema ja a Nnungu, nkulundana a Yesu Kilishitu bhakwaagombolanga. **25** A Nnungu bhashinkwaashoya a Kilishitu bhabhe mbepei ja gombola yambi ya bhandunji. Kupitila ngulupai ja mminyai jabho. A Nnungu bhashinkutenda nneyo nkupinga bhalanguye aki jabho, pabha bhashinkuleshelela

yambi ya bhukala gwangali kwiikumula. 26 Bhalanguye aki jabho agano mobha gano, nkupinga bhabhe bhakwete aki na kummalanganishiya aki akwaakulupalila a Yeshu. 27 Bhai, kuli kwei kwiiniya? Kwakwa! Kwa nndi? Bhuli kwa kamula shalia? Ng'oo! Ikabhe kwa ligongo tunakulupalila. 28 Bhai penepo tunabhona kuti mundu anabhalanganishiya aki kwa ngulupai yakwe, wala nngabha kwa itendi ya shalia ja a Musha. 29 Eu bhuli, a Nnungu ni a Nnungu bha Bhayauaide? Nngabha a Nnungu bha ilambo ina? Elo, nneila peila ni a Nnungu bha ilambo ina. 30 A Nnungu ni bhamo, bhapinga kwabhalanganishiya aki Bhayaudi, kwa ngulupai jabhonji, na bhandunji bhangajalukanga, kwa ngulupai jabhonji. 31 Bhai bhuli? Tunakujijaa shalia ja a Musha kwa ngulupaijo? Ng'oo wala kashoko! Ikabhe kupunda nneyo tunaakagula shalia ja a Mushajo.

4 Igala tujile bhuli ga ainabhetu a Bhulaimu? 2 Pabha monaga a Bhulaimu bhashinkupegwa aki kwa ligongo lya itendi yabho, bhai, bhakwete shindu sha kwiiniya, ikabheje nngabha kwa a Nnungu. 3 Pabha Majandiko ga Ukonjelo gakuti "A Bhulaimu bhashinkwaakulupalila a Nnungu, kwa nneyo a Nnungu gubhaapele aki." 4 Ikabheje ntumishi anapegwa nshaala, nshaala gula ukabha nema, ikabhe mbuti ligambo kwa liengo lyakamwile. 5 Ikabheje mundu akawiikulupalila itendi yakwe nnyene, ikabhe anakwaakulupalila a Nnungu, bhakwaaleshelelanga bhalehilenje, bhai a Nnungu bhanajali ngulupai jika jwene mundujo, nikumpa aki. 6 Malinga a Daudi shibhataya, mbaya jwene mundu apegwa aki kwa a Nnungu, gwangali kutolelela itendi yakwe. 7 "Mbaya bhaleshelelwenje yambi yabhonji Na bhaunishilwenje yambi yabhonji. 8 Mbaya jwene mundujo, Bhakulungwa bhakakwiitolelela yambi yakwe." 9 Bhai, bhuli yene mbayayo, ku bhajalukenjepe eu nkali bhangajalukanga? Pabha tukuti, a Bhulaimu bhashinkupegwa aki kwa ligongo lya ngulupai yabho. 10 Bhuli, a Bhulaimu pubhapegwilwe aki bhali bhajalwishe eu bhakanabhe jaluka? Nngabha bhali bhajalwishe, ikabhe bhakanabhe jaluka. 11 A Bhulaimu pubhajalwishe kungai, na kwene jalukako, pukwaliji shilangulo na lulembo lwa kundwa kwabho na a Nnungu kuti, bhakwete aki kwa ligongo lya ngulupai jabho, jibhakwete bhakanabhe jaluka. Kwa nneyo, a Bhulaimu bhashibha ainamundu bha bhandu bhowe bhakwaakulupalilanga a Nnungu, nkali bhangajalukanga, gubhapegwilwenje aki. 12 Nneyo peyo bhenebho ni ainamundu bha bhandunji bhajalukenje, ikabheje nngabha kwa jaluka, ila kwa ligongo lya kagula ngulupai ja ainabhetu a Bhulaimu, jibhaakwete bhakanabhe jaluka. 13 Pabha a Nnungu bhashinkwaalajila a Bhulaimu na lubheleko lwabho kuti, shibhapegwanje shilambolyo. Bhashinkutenda nneyo nngabha kwa shalia ja a Musha, ikabhe kwa ligongo lya kulupalila kwabho, gubhapegwilwe aki. 14 Monaga bhapinga pegwanga ibhalugwile a Nnungu, ni bhaakumulilanga shalia ja a Musha bhala, bhai, ngulupai yetu yangali shindu na malagano ga a Nnungu nngabha shindu. 15 Pabha shalia ja a Musha jinapeleshela nnjimwa ja a Nnungu, ikabheje jikapagwe shalia, bhai kwakwa kulebha. 16 Kwa nneyo, malagano ga a Nnungu pugapatikana kwa ngulupai, shigaishe kwa nema ja a Nnungu, nkupinga gabhe ku bhandunji bhowe, nngabha ku

bhaakulupalilanga shalia ja a Mushape, ikabhe ku bhakwetenje ngulupai malinga a Bhulaimu. Bhenebho ni atati bhetu, uwe tubhowe. 17 Malinga shigalugula Majandiko ga Ukonjelo kuti, "Njikummika mme atati bha ilambo yaigwinji." Gene malaganogo ni ga kweli, kwa a Nnungu bhakulupalilwe na a Bhulaimu, a Nnungu bhakwaayuyanga bhawilenje, na kwa lilobhe lyabho, indu ikapaliji inapagwa. 18 A Bhulaimu bhatendaga lolela indu yangakulupalika, kwa nneyo nibha atati bha ilambo yaigwinji, malinga shigalugula Majandiko ga Ukonjelo kuti, "Lubheleko lwenu shilushulushe mbuti ndondwa." 19 Pubhaliji bhakongopa bha yaka makumi kumi, ikabheje ngulupai jabho jangapuganyika, bhafinkumumanya kuti shiitu shabho shikongopele numbe shiwiilile na akongobhabho a Shala, lipitiu lyaho liwiilile. 20 Ikabheje a Bhulaimu bhakakweteje lipamba na malagano ga a Nnungu gala, ikabhe bhashinkukola mashili kwa ngulupai yabho, nikwaakuya a Nnungu. 21 Gubhamumanyi kuti a Nnungu bhanakombola tenda gene gubhalajiyego. 22 Kwa nneyo a Nnungu gubhaapele aki. 23 Malobhe gakuti, "Bhashipegwa aki" nngabha kwa ligongo lyabhope, 24 ikabhe nkali kwetu uwe, tukwaakulupalila a Nnungu, bhaayushiye a Yeshu Bhakulungwa bhetu, bhakaweje. 25 Bhabhulegwe kwa ligongo lya yambi yetu, gubhayushile nkupinga tupate aki.

5 Bhai, pabha tupegwilwe aki kwa ngulupai, tukole ulele kwa a Nnungu, gutuposhele ku Bhakulungwa bhetu a Yeshu Kilishitu. 2 Kwa ngulupai jetu, bhenebho bhashikutupa nema ja a Nnungu jitutama najo nnaino jino. Bhai, tunakwiipunila kulolela kwetu ukonjelo gwa a Nnungu. 3 Wala nngabha genegope, ikabhe tunaangalala nkali nshilaje, tulikumumanya kuti liengo lya shilaje, inapeleshela kwiipililila. 4 Na liengo lya kwiipililila, kunapeleshela kulolela, na kwalakwe kunapeleshela kukulupalila. 5 Kwa nneyo kulolelako kukatutokomaya, pabha kupinga kwa a Nnungu kushibhikwa nigumbala mmitima jetu na Mbumu jwa Ukonjelo jutupegwilwe. 6 Pabha putwaliji twangali mashili, malanga gayene gakaishileje, a Kilishitu gubhawile kwa ligongo lya bhakwetenje yambi. 7 Pabha inakomala mundu kuwa, kwa ligongo lika mundu akwete aki, ikabheje ilikomboleka mundu kulinga kuwa kwa ligongo lika mundu jwa mmbone. 8 Ikabheje a Nnungu bhayene bhanakutulunguya shibhakuti kutupinga uwe, pabha a Kilishitu bhashinkuwa kwa ligongo lyetu, putwaliji na yambi. 9 Bhai nnaino pabha tubhishilwe munkumbi gwa bhandu bhakwete aki kwa kuwa kwabho a Kilishitu, shibhatutapule mu nnjimwa ja a Nnungu. 10 Putwaliji mmagongo na a Nnungu, gubhatupatanishe kwa shiwo shika Mwana gwabho. Na punda penepo, nnaino tshipatanishta na bhenebho, shibhatutapule kwa gumi gwabho. 11 Na nngabha genegope, ikabhe tunakwiionyela nkulundana na a Nnungu, kupitila Bhakulungwa bhetu a Yeshu Kilishitu, bhatupatanishe na a Nnugungu. 12 Monaga kwa ligongo lika mundu jumo shambi shashinkukoposhela nshilambolyo na shambisho nikumbuya shiwo, na shiwo gushaishilenje bhandu bhowe, pabha bhowe bhashilebhangana. 13 Pabha jikanabhe ika shalia ja a Musha, yambi yaapali pa shilambolyo, ikabheje yambi ikaatolelelwa, jikapagwe shalia. 14 Ikabheje tandubhila mobha ga a Adamu mpaka a Musha, shiwo shishitagwala nkali ku bhangalebhangana

malinga shibhalebhile a Adamu. A Adamu bhaliji shilanda sha bhene bhapinga kwiyaabo. 15 Ikabheje shilebho sha a Adamu shikalandanywa na nema ja a Nnungu. Pabha nkali yambi ika mundu jumo shanshikubha shiumilo shawa bhandu bhahagwinjinji, bhai kwa nema jika mundu jumo, yani a Yesu Kilishitu a Nnungu bhashipunda kwaapanganga bhandunji bhowe, nema na upo yabho. 16 Gushipagwa ungalandana gwa upo ya a Nnungu, na shambi shika mundu jumo jula. Pabha akalebheje mundu jumo jula, a Nnungu gubhaukwile mboteko. Ikabheje bhakalebhanjeje bhandunji bhahagwinji, a Nnungu gubhaapelenje upo yabho nikwaapanganga aki. 17 Kweli, kwa shambi shika mundu jumo, kuwa kushitagwala kwa ligongo lika mundu jumojo, ikabheje imanyishe ukoto kuti shatendile mundu juna, yani a Yesu Kilishitu, shishipunda kaje. Bhowe bhaaposhelanga nema na upo ja tendwa bhakwete aki, shibhatagwalanje mugumi kupitila mundu jumo a Yesu Kilishitu. 18 Bhai, malinga kwa shambi shika mundu jumo bhandu bhowe bhashiukumulwanga, nneyo peyo kwa shitendi sha aki shika mundu juna yani a Yesu Kilishitu, shishikwapanganga bhandu bhowe aki na gumi. 19 Na ibhaga kulebha kuka mundu jumo, bhandu bhahagwinjinji bhashihonekanga na yambi, nneyo peyo kukunda kuka mundu juna, yani a Yesu Kilishitu, bhandu bhahagwinjinji kushikwaatendanga bhapatanje aki. 20 Ikabheje shalia ja a Musha jikaisheje na shambi shikupundaga, na shambi shikapundeje, na nema guipundile kujenjesheka. 21 Malinga yambi puitegwele kwa shiwo, nnepeyo na nema jinatagwala kwa aki, nipeleshela gumi gwa pitipiti, kupitila a Yesu Kilishitu Bhakulungwa bhету. (aiōnios g166)

6 Bhai tujile bhuli? Tupunde kutenda yambi, nkupinga nema ja a Nnungu jipunde jenjesheka? 2 Ng'oo, wala kashoko! Uwe ga yambi ilu yetu iiwile, shitupunde bhuli kabhili kutama na yambi? 3 Eu, nkakumumanyanga kuti uwe tubhatishwe na lundana na a Yesu Kilishitu, nneila peila tushilundanywa nshiuo shabho? 4 Bhai putwabhatishwe twashinkulundana nabho, gutushishiwe pamo na bhenebho, nkupinga malinga a Kilishitu pubhayushiywe kwa ukunjelo gwa Atati, nneyo peyo na uwe tutame nndamo ja ambi. 5 Pabha, malinga shitulundene nabho nkuwa malinga bhenebho, nneyo peyo shitulundane nabho kwa yuka, malinga bhenebho. 6 Tumumanyi kuti nkubho gwetu gwa bhukala gwa tenda yambi, gwashinkukomelwa munshalabha pamo na bhenebho, nkupinga tunapunde kubha bhatumwa bha yambi, nkupinga maisha getu ga bhukala ga shambu gapele. 7 Pabha aiwilele ga yambi, ashitendwa nngwana niembuywa na yambi. 8 Bhai monaga tuiwe pamo na a Kilishitu, tunakulupalila kuti, shitutame pamo na bhenebho. 9 Pabha tumumanyi kuti a Kilishitu bhakayusheje, bhakawa kabhili. 10 Pabha kuwa kwabho kula, bhashinkuwila yambi kamope, na nnaino tama kwabho, bhanatama pamo na a Nnungu. 11 Nneyo peyo na mmanganyanji mwiibhikanje mbuti bhawililenje bhakaatendanga yambi, ikabheje bhahakotonji kwa lundana na a Nnungu kupitila a Yesu Kilishitu. 12 Bhai yambi inatagwale ilu yenunji ya wai, mpaka nikagula ilokoli yakwe. 13 Wala nnaekanje ilu yenunji kutenda yambi, ikabheje mwiishoyanje kwa a Nnungu malinga bhandu bhayushilenje, mwiishoyanje kwa a

Nnungu kwa itendi ya aki. 14 Numbe yambi ikantagwalanga kabhili, pabha munninginji nngabha nkulungoywa na shalia ja a Musha, ikabheje kwa nema ja a Nnungu. 15 Bhai, tujile bhuli? Tutende yambi pabha tukaukumulwa na shalia ja a Musha, ikabheje kwa nema? Ng'oo! 16 Bhuli nkakumumanyanga kuti, punkwiiibhikanga malinga utumwa kuka mundu nikunkunda, mmangangaga bhatumwa bha yambi mpelo gwake ni kuwa, mmangangaga bhatumwa bha kwaakunda a Nnungu, mpelo gwakwe aki. 17 Ikabheje bhatendelwe eja a Nnungu, nkali mwalinginji bhatumwa bha yambi, nshikundanga kwa mitima jenunji jowe majiganyo gumwajigenyenje. 18 Gungumbolwenje kopoka kuutumwa gwa yambi, niibhanganga bhatumwa bha aki. 19 Ngunabheleketa shigundu kwa ligongo lya ungashimilika gwenunji. Malinga shimwaishoshienye ibhalo yenunji muitendi ya utumwa na ya nyata na yambi gumwinyatienye, nneyo peyo, nnaino mwiishoyanje ibhalo yenunji muutumwa gwa tenda aki muukunjelo. 20 Pumwalinginji bhatumwa bha yambi, aki jikantagwalangaga. 21 Mwapatilenje nndi, kwa itendi yenunji ya bhukala inkwiiibhonelanga oni nnaino? Pabha mpelo gwa yeneyo kuwa. 22 Ikabheje nnaino, nngombolwenje kopoka kuutumwa gwa yambi, nitendwa bhatumwa bha a Nnungu, nkwetenje pwaida ja ukunjelo, na mpelo gwakwe gumi gwa pitipiti. (aiōnios g166) 23 Pabha nshaala gwa yambi kuwa, ikabheje upo ibhashoya a Nnungu, gumi gwa pitipiti nkulundana na a Yesu Kilishitu, Bhakulungwa bhету. (aiōnios g166)

7 Ashaapwanga, ngunabheleketa na mmanganyanji nkujimanyanga shalia ja a Musha, nkakumumanyanga kuti shalia jinakuntagwala mundu ali jwankoto? 2 Tujile malinga bhakongwe bhalombilwe, bhanatabhwa na shalia mobha gowe ga gumi gwa ambuje bhahho, ikabheje ambuje mundu bhala bhawaga, shalia jikakwaatabha kabhili bhakongwebho. 3 Bhai monaga ambuje mundu bhali bhahakoto, niilombwa na bhalume bhana, gwenego utwai, ikabheje bhalumbho bhawaga, bhakaatabhwa na shalia. Nkali bhalombwaga na bhalume bhana pangali utwai. 4 Na malinga mmanganyanji ashaapwanga, nkali mmanganyanji nshikujwilanga shalia, kwa shiilu sha a Kilishitu nkupinga mmanganje bha bhene bhayushile bhala, nkupinga twaatendele a Nnungu indu ya mmbone. 5 Pabha, putwaliji nndamo ja kagulila indu ya nshiiilu, ilokoli ya yambi guipundile kwa ligongo lya shalia, ilitenda liengo mwiilu yetu nikutupeleshela ku shiwo. 6 Ikabheje nnaino tugopwelwe nshalia, tuiwilele yatutabhaga ila, nkupinga tukombole ndamo ja ambi ja tumishila ya Mbumu, nngabha malinga bhukala putwamishilaga shalia jijandishwe. 7 Bhai, tujile bhuli? Shalaji ni yambi? Ng'oo! Pabha gwangali shalia nganaimanye yambi shili bhuli, nganakumanye kulokolila kaliji shalia jikanalugule, "Nnalokolile yangali ya mmbone." 8 Ikabheje yambi guikwete mashili ligongo lya amuli, gushitendile kila ilokoli nkati jangu. Pabha yambi gwangali shalia, iwile. 9 Numbe nne punaliji najwankoto gwangali shalia, ikabheje jikaishejepe shalia jila, yambi guiyushile na nne gung'wile. 10 Nne gumweni kuti, shalia jatumbiile kupeleshela gumi jila, jishiipeleshela shiwo. 11 Pabha yambi shikakoleje mashili kwa ligongo lya shalia jila, gushindembile niimulaga. 12 Bhai shalia ja a Musha ni ja

ukonjelo, na amuli jila, ni ja ukonjelo, na ja mmbone, na ja aki. 13 Bhai bhuli! Gene gali ga mmbone gala, nne nigabhone ga shiwo? Ng'oo! Ikabheje nkupinga shambi shibhoneshe ukoto kuti ni yambi, shialaya shiwo nkati jangu, kwa pitila lya mmbone lila, nkupinga kwa amuli jila, yambi ipunde nyata kaje. 14 Pabha tumumanyi kuti shalia ja a Musha shiumilo shakwe ni indu ikopoka Mbumu jwa a Nnungu, ikabheje nne namundu jwa kagulila indu ya nshiilu, njiushwa muutumwa gwa yambi. 15 Pabha ngakushimanya shingutenda, shingupinga tenda shila, ngaatenda, ikabheje shingaapinga shila ni shingutenda. 16 Bhai monaga ngunakunda kuti shingutenda nngabha sha mmbone malinga shinatumbilile tenda, nepeno ngunakunda kuti, shalia jila ni jammbone. 17 Bhai, nngabha nne namwene ngutenda shenesho, ikabheje yambi itama nkati jangu. 18 Pabha nimumanyi kuti, nkati jangu yani nshiilu shangu, shikaatama shindu sha mmbone. Numbe kupinga kutenda indu ya mmbone ngulipinga, ikabheje kutenda ngunalepela. 19 Pabha shene sha mmbone shingushipinga, ngaatenda, ikabheje shene shangali sha mmbone shingakushipinga ni shingutenda. 20 Bhai monaga shingakushipinga shila ni shingutenda, nngabha nne namwene ngutenda, ikabheje ni yambi itemi nkati jangu ila. 21 Bhai nijimanyi jene kwelijji, pungupinga tenda shindu sha mmbone, shipali sha nyata shinguagula tenda. 22 Pabha ngunakwiinyela shalia ja a Nnungu muntima gwangu. 23 Ikabheje nshiilu shangu ngunakujibhona shalia jina jinakomana na shalia ja lunda lwangu, nindenda ntumwa jwa shalia ja yambi, jitemi nshiilu shangu jila. 24 Nankulaga nangali malanga nne! Gani shandapule na shiilu sha shiwoshi? 25 Ngunakwaatendela eja a Nnungu, pabha ngunatapulwa na a Yesu Kilishitu bhakulungwa bhetu! Bhai kwa nneyo nne namwene kwa lunda lwangu ngunatumishila shalia ja a Nnungu, ikabheje kwa shiilu shangu ngunatumishila shalia ja yambi.

8 Bhai nnaino kwakwa kuukumulwa mboteko kwa bhandu bhalundenenje na a Yesu Kilishitu. 2 Pabha kweli jika Mbumu jwa gumi guli nkati ja a Yesu Kilishitu jishing'embuya na mashili ga yambi na shiwo. 3 Annungu bhashitenda ikomboleshe, ikakombolekaga kwa shalia ila, kwa ligongo lya ungakola mashili gwa shiilu. Bhai a Nnungu gubhantumile Mwana gwabho bhayene, ali na shiilu malinga sha bhaatendanga yambi. Kwa nneyo gubhaiukumwile mboteko yambi nshiilu shakwe. 4 A Nnungu gubhatendile nnei nkupinga indu yowe ya mmbone ipinjikwa na shalia itimilile nkati jetu, uwe tukaakagulila ilokoli yangali ya mmbone ya nshiilu, ikabheje ya Mbumu. 5 Pabha bhandunji bhaakagulilanga ilokoli yangali ya mmbone ipinjikwa na shiilu, ibhaganishiyanga ilokoli yangali ya mmbone ipinjikwa na shiilu, ikabheje bhaakagulilanga indu ipinjikwa naka Mbumu jwa Ukonjelo, ibhaganishiyanga indu ipinjikwa naka Mbumujo. 6 Pabha ndumbililo ya shiilu inapeleshela shiwo, ikabheje ndumbililo ika Mbumu jwa Ukonjelo, inapeleshela gumi na ulele. 7 Na ndumbililo ya shiilu ni kubhika magongo na a Nnungu, pabha shikapanga kukunda shalia ja a Nnungu, na wala shikakombola kukunda shaliaja. 8 Bhene bhaakagulilanga ilokoli ya nshiilu, nngakombola kwaanonyeya a Nnungu. 9 Monaga Mbumu jwa a Nnungu anatama nkati jenunji, mmanganya nkaakagulilanga ilokoli yangali ya mmbone ipinjikwa na shiilu,

ikabheje shinkagulilanje ya mmbone ipinjikwa naka Mbumu. Ikabheje mundu jwangali Mbumu jwa a Kilishitu, jwenejo nngabha jwabho. 10 Ikabheje a Kilishitu bhabhaga nkati jenunji, shiilu shenunji shinawa kwa ligongo lya yambi, ikabheje mbumu jwenunji jwankoto kwa ligongo lya aki. 11 Na monaga Mbumu jwa a Nnungu abhayushiye a Kilishitu bhakaweje, shaiyuye na ilu yenunji ili yawa, kwa mashili gaka Mbumu jwabho atama nkati jenunji. 12 Bhai monaga ni nneyo, ashaalongo ajangu tukwete ligambo, ikabheje nngabha lya tenda indu ya nshiilu. 13 Ibhaga, ntamangananga nkukagulila indu yangali ya mmbone ya nshiilu, kweli shinng'wanganje, ikabheje muibhulaganga indu yangali ya mmbone ya nshiilu kwa Mbumu jwa Ukonjelo, shinnamanje. 14 Pabha bhowe bhaalongoywanga naka Mbumu jwa a Nnungu, bhenebho ni bhana bha a Nnungu. 15 Pabha mwangaposhelanga mbumu jwa utumwa akuntendanga nkolanje bhoga, ikabheje mposhelenje Mbumu akuntendanga mmanganje bhana bha a Nnungu, na kwa mashili gaka jwenejo, uwe tunakwaashema a Nnungu, "Atati." 16 Numbe Mbumu jwa a Nnungu nnyene anakong'ondela pamo na mitima jetu, kuti uwe ni bhana bha a Nnungu. 17 Ibhaga uwe ni bhana bha a Nnungu, ibhai uwe ni tubhalishi bha a Nnungu bhaalishinji pamo na a Kilishitu. Tunabha tubhalishi putupata mboteko pamo na bhenebho, nkupinga nneila peila, tukuywe pamo na bhenebho. 18 Shingubhona nne, mboteko yetu ya nnaino nngabha shindu, kupunda ukonjelo upinga bhoneka kwetu uwe. 19 Na nkali indu yowe ipengenywe, inalinda kwa lilaka lya kaje, kumanyika kwa bhana bha a Nnungu. 20 Indu yowe ipengenywe gwijionaishe, nngabha kwa pinga iyene, ikabheje kwa pinga kwabho bhayene bhaibhishile kwa ngulupai, 21 mbena indu ipengenywe na yalakwe shiitapulwe, nishoywa muutumwa gwa angabhanika, ijinjile muungwana uli na ukonjelo gwa bhana bha a Nnungu. 22 Pabha tumumanyi kuti mpaka nnaino, indu yowe ipengenywe inabhubhulila pamo malinga mboteko ya nkukola mwana. 23 Numbe nngabha indu ipengenywe peyo, ikabheje nkali uwe tupatile Mbumu jwa Ukonjelo, ali nnimbu jwa upo ibhapinga kutupa a Nnungu, numbe tunabhubhulila mmunda jetu, tulilolela kutendwa bhana bha a Nnungu, yani na kugombolwa kwa iilu yetu. 24 Pabha tushitapulwa nkupinga tutame nkukulupalila, ikabheje shutwashilolelaga shila shibhonekaga, nepeno kwakwapi kulolela kabhili. Pabha gani akushilolela shindu sha kushibhona? 25 Ikabheje putukushilolela shindu shitukakushibhona, tunakushilinda kwa kwiipililila. 26 Nneyo peyo na Mbumu jwa Ukonjelo anakutujangutula muungakombola gwetu, pabha tukaamanya kujuga malinga shiikupinjikwa, ikabheje Mbumu jwa Ukonjelo nnyene anakutujujila kwa bhuhbula kwa ngakomboleka kutaya. 27 Na bhene bhaalumila mmitima, bhaimanyi ng'aniyo ika Mbumu, pabha anakwaajujilanga bhandunji bha ukonjelo, malinga shibhapinga a Nnungu. 28 Na uwe tumumanyi kuti, indu yowe inatenda liengo pamo kwa pwaida ja bhakwaapinganga a Nnungu, yani bhashemilwenje kwa tumbilila kwabho, nkwaapinganga ya mmbone. 29 Pabha bhene bhanyabho bhamanyikenje na a Nnungu kuumila ndandubho, bhashinkwaagulanga bhalandanywanje naka Mwana gwabho, nkupinga abhe lielo munkumbi gwa bhana bhabhagwinji. 30 Na bhene bhubhaagwilenje kuumila

kundandubho, gubhaashemilenje, na bhene bhashemilwenjebho, gubhabhalanganishwenje aki, na bhahbalanganishwenje akibho, nigubhaakushiyenje. **31** Igala tubhelekete nndi? Monaga a Nnungu bhahbaga na uwe, gani shaakombole kututauka? **32** Ibhaga a Nnungu bhaganneshelera nkali Mwana gwabho bhayene, ikabhe gubhanshoshiye kwa ligongo lya tubhowe uwe, bhai shibhalepele bhuli nkali kutupa shoshowe shina pamo naka jwenejo? **33** Gani shabhashitakiyanje bhaagwilwenje na a Nnungu? A Nnungu bhayene bhaabhalanganishiyenje aki. **34** Gani shabhakumulanje mboteko? Jwakwa, a Yeshu Kilishitu ni bhawile, na bhayushile, numbe kubhali kunkono nnilo gwa a Nnungu, numbe bhanakutujujila. **35** Gani shatulekanye na pingana kwetu na a Kilishitu? Nndi, shilaje eu mboteko eu shibhanga eu ukunu eu ya jogoya eu upanga? **36** Malinga shigalugula Majandiko ga Ukonjelo kuti, "Kwa ligongo lyenu tunabhalagwa na shiwo, mobha gowe. Tunaatendwa mbuti ngondolo ya ingwa." **37** Ikabheje na yene indu yoweyo uwe tunakombola kwa kaje, kwa mashili ga bhene bhatupinjile bhala. **38** Pabha nimumanyi kaje kuti, wala shiwo, na wala gumi, na wala ashimalaika eu ashimaoka, na wala indu ipali, na wala indu shiipagwe, na wala mashili gogowe, **39** gali kunani, na wala gali pai, na wala shindu shipengenywe shoshowe, shishikombole kutushoya nkupingwa na a Nnungu, kupitila kwa a Yeshu Kilishitu Bhakulungwa bhetu.

9 Ngunabheleketa kweli nkulundana na a Kilishitu na wala nngabha unami, ng'aniyo yangu ya muntima nkulongoywa naka Mbumu jwa Ukonjelo inangong'ondela, **2** kuti njiinjika kaje na mboteko yangali mpelo muntima gwangu. **3** Ikaliji mbaya nne kuloshwa na lekanywa na a Kilishitu, monaga shiyaapwaanje ashaalongo ajangu bha shipinga shangu. **4** Ni Bhaishilaeli bhaagwilwenje na a Nnungu kubha bhana bhabho, gubhapegwilwenje ukonjelo, na miadi, na shalia, na lilanga lya tindibhalila, na malagano ga a Nnungu. **5** Bhanganyabho ni uukulu gwa ashaambuje, ni kubhabelekwe a Kilishitu shigundu. A Nnungu bhaatagwala indu yowe, bhakuywe pitipiti. Amina. (aiōn g165) **6** Nngabha kuti miadi ja a Nnungu jangamalila. Pabha nngabha Bhaishilaeli bhowe bhaagwilwenje na a Nnungu. **7** Wala nngabha bhowe bhabelekwenje kwa a Bhulaimu kuti ni bhana bhabho, ikabhe malinga Majandiko ga Ukonjelo shigalugula, "Bhana bhenu shibhakoposhelanje kwa a Ishaka." **8** Yani nngabha bhabelekwenjepe ni bhalinginji bhana bha a Nnungu, ikabhe bhabelekwenje kwa ligongo lya miadi ja a Nnungu, ni bhalinginji bhana bhabho. **9** Pabha miadi jiyene jikuti nnei, "Malinga malanga gano shimuje, na a Shala shibhakole mwana jwannume." **10** Na nngabha nneyo pe, ikabhe nkali na bhalabho a Lebheka, gubhakwete bhamba kubhashileu bhama, a Ishaka anakulu bhetu. **11** Ikabheje bhana bhala bhakanabhe bhelekwanaga na wala bhakanabhe kombolanga kushimanya sha mmbone eu shanyata, bhai nkupinga luagu lwa bhayene a Nnungu lubhoneshe, **12** nngabha kwa ligongo lya itendi, ikabhe kwa tumbiila kwabho bhayene, a Lebheka gubhabhalanjilwe kuti, jwa nkulu shantumishile jwa nnung'una. **13** Malinga Majandiko ga Ukonjelo shigalugula, "Njikumpinga Yakobho, ikabhe Eshau njikunkana." **14** Bhai tubhelekete nndi? A Nnungu bhakaakagula aki? Ng'oo! **15** Pabha kungai a Nnungu

bhaabhalanjile a Musha, "Shinimonele shiya jungumpinga kummonela shiya, na shininnjangutile jungupinga kunnjangutila." **16** Bhai monaga nneyo, nngabha kwa pinga wala kwa tumbila kuka mundu, ikabhe kwa shiya sha a Nnungu. **17** Pabha Majandiko ga Ukonjelo kwa ngani ja a Palao gakuti, "Njikumpa upalume nkupinga kwenu mmwe, nanguye mashili gangu na lina lyangu lishume nshilambolyo." **18** Bhai monaga nneyo, jubhapinga kummonela shiya, bhanakummonela shiya na jubhapinga kunnonopya ntima, bhanakunnonopya. **19** Pana shimmuye, "Pakuti bhanakutugamba tubhandu? Gani akombola kuibhiila ibhapinga a Nnungu." **20** Ikabheje mmwe anamundu, mmwe agani nkwaatauka a Nnungu? Bhuli shindu shipengenywe kukombola kummalanjila jwene ashipengenywe, "Kwa nndi kumbanganya nnei?" **21** Eu bhuli, nkugumba akaengwa kwa lilongo lyakwe kugumba shoshowe, kugumba shindu shimo sha ishima na shina sha kawaida? **22** Bhai shipali nndi? A Nnungu bhashinkupinga kulangula kutumbala kwabho na mashili gabho, kwa nneyo bhashinkwaapililanga kaje bhalinginji ndumbililo ya tumbala kwabho, bhapingikwenje kuangabhanywa. **23** Numbe bhashinkupinga kulanguya ukonjelo gwabho gwangwinji kwetu uwe, tuli ndumbililo ya shiya shabho, bhatubhishile kuumila bhukala tuposhele ukonjelo gwabho. **24** Ni uwe bhatushemile, nngabha bha munkumbi gwa Bhayaudipe, ikabhe nkali bhandunji bha ilambo ina. **25** Malinga shibhaalugula nshitabhu sha a Osheya kuti, "Bhene bhalinginji nngabha bhandu bhangu Shinaashemanje, 'Bhandu bhangu!' Na aliji jwangapingwa na nne Shaashemwe, 'Apingwa na nne!' **26** Na shiibhe pene pubhabhalanjilwenje, 'Mmanganyanji nngabha bhandu bhangu' Penepo shibhashemwanje, 'Bhana bha a Nnungu bhakwete gumi'" **27** Numbe a Ishaya ga bha Ishilaeli bhanakweya lilibhe bhalinkuti, "Nkali bhana bha bha Ishilaeli bhashulukanje malinga nng'anji gwa ku bhaali, bhapinga tapulwanga ni bhashokope. **28** Pabha Bhakulungwa shibhatende ukumu jabho pashilambolyo jitimilile kwa kaje shangupe." **29** Numbe malinga a Ishaya shibhalongolele bheleketa kuti, "Kaliji Bhakulungwa bha bhandu bhowe pa shilambolyo bhakanatuleshele bhana, tukaliji malinga bhandunji bha shilambo sha Shodoma tukalingenywe na bhandunji bha shilambo sha Gomola." **30** Bhai tubhelekete nndi? Kutu bhandunji bha ilambo ina bhanganoleyanga kukola aki, bhatpatilenje aki kwa ngulupai. **31** Ikabheje bha Ishilaeli bhaloleyangaga aki kwa shalia, bhangaipatanga. **32** Kwa nndi? Pabha bhakangalulilanga kwa ngulupai, ikabhe kwa kamulila shalia ja a Musha, kwa nneyo gubhaikubhelenje nnganga lya kubhala lila. **33** Malinga shigalugula Majandiko ga Ukonjelo kuti, "Nnole ngunabhika ku Shayuni liganga lya kwiikubhala, Liganga likulu lya gwiya bhandu. Ikabheje jowewe shaabhakulupalile akatokomala."

10 Ashaalongo ajangu, shingupinga nne muntima gwangu na kujuga kwangu kwa a Nnungu Bhaishilaeli, bhatapulwanje. **2** Pabha ngunakong'ondela kuti bhanatumbilanga nkwaatumishila a Nnungu, ikabhe gwangali lunda. **3** Pabha bhakakumumanyanga a Nnungu shibhakuti kwaapanganga bhandunji aki, bhalinginganga kwiitolela aki jabhonji malinga shibhaapinganga ashaayenenji, akuno bhalikananga kukagula aki ja a Nnungu. **4** Pabha a Kilishitu

ni kutimilila kwa shalia, nkupinga jojowe shaabhakulupalile akole aki. 5 Pabha a Musha bhashinkujandika ga aki jipatikana kwa shalia "Mundu akunda shalia, shaatame kwa genego." 6 Ikabheje ga aki jipatikana kwa ngulupai jinataya kuti, "Nnabheleketete muntima gwenu kuti, 'Gani shakwele mpaka kunnungu kupinga kwaatuluya a Kilishitu pai kubhatutapule?' 7 Wala nnaibhuye, gani shaajende pai kukwaatola a Kilishitu kukopoka ku Jeanamu nikwiya nabho kunani kubhatutapule?" (Abysos g12) 8 Ikabheje Majandiko gakuti bhuli? "Lilobhe lya a Nnungu lila pulili tome na mmwe. Mulili nkang'wa jenu na muntima gwenu." Lyene lilobhelo, ni lilobhe lya ngulupai litulunguya lila. 9 Pabha nkundaga kwa kang'wa jenu kuti a Yesu ni Bhakulungwa, na kulupalila muntima gwenu kuti a Nnungu bhashinkwaayuya, shintapulwe. 10 Pabha mundu anakulupalila muntima, nipata aki, na kwa kang'wa jakwe mundu anakunda nitapulwa. 11 Pabha Majandiko ga Ukonjelo ganataya kuti, "Jojowe akwaakulupalila akatokomaywa." 12 Pabha kwakwapi kupembula kuti, a Bhayaudi eu Bhagiliiki, pabha a Yesu ni Bhakulungwa bha bhowe, bhashikola ntuka ku bhowe bhakwaajuganga. 13 Pabha jojowe shaajuje kujanগুলিত্বা na Bhakulungwa, shaatapulwe. 14 Bhai shibhaajuganje bhuli bhene bhakakwaakulupalilanga? Numbe shibhaakulupalilanje bhuli bhuhangaapiikananga? Na kabhili shibhapiliikananje bhuli gwangali nkulunguya? 15 Numbe bhalunguyanje bhuli gwangali pelekwa? Malinga shigalugula Majandiko ga Ukonjelo kuti, "Nnole shiikuti konja kwiya kwabhonji bhaalunguyanga Ngani ja Mbone." 16 Ikabheje nngabha bhowe bhakundilenje. Pabha nkali a Ishaya bhakuti, "Mmwe Mmakulungwa, gani akundile ngani jetu?" 17 Bhai ngulupai shumilo shakwe ni kupilikana, kwa ngani ja lilobhe lya a Kilishitu. 18 Ikabheje ngunabhuya, bhuli, bhangaapiikananga? Elo, bhapiliikenenje, "Lilobhe lyabhonji lipiliikanishe ku shilambolyo, Na malobhe gabhonji gaishe mpaka ku mpelo gwa shilambolyo." 19 Kabhili ngunabhuya, bhuli bha Ishilaeli bhagamanyanga? Gwa ntai a Musha bhashite, "Shinintendanje nkolanje lupimilo ku bhandunji bhalingnji nngabha bhashilambo. Shinintendanje nkolanje njimwa ku bhashilambo bhagumba." 20 Numbe a Ishaya gwangali bhoga bhahheleketete, "Nabhoneshe ku bhandunji bhanganoleyanga, Nailangwiye ku bhandunji bhagamanyanga." 21 Ikabheje ga Ishilaeli bhanabheleketete, "Mui gowe naagoloshayenje makono gangu bhandunji bhagakundanga na bha mitau."

11 Bhai ngunabhuya, bhuli a Nnungu bhashikwaakananga bhandunji bhahho? Nng'oo! Pabha nkali nne namwene na Ng'ishilaeli, jwa lukolo lwa a Bhulaimu, kabhila ja a Bhenjamini. 2 A Nnungu bhangaakananga bhandunji bhahho bhuhhaagulenje kuumila bhukala. Eu nkakugamanyanga Majandiko shigabheleketete ga a Eliya? Shibhashite kwaalugulanga Ishilaeli kwa a Nnungu kuti, 3 "Mmakulungwa, bhashikwaabhaluganga ashinkulondola bhenu nibhomola itala yenu. Nepeshe nne jikape, numbe bhapinga mulaganga!" 4 Bhuli a Nnungu bhaajangwileje nndi? "Njikwilepesheya bhandunji elupu shabha bhangatindihalilanga shanamu sha nnungu ashemwa Bhaali." 5 Bhai nneyo peyo nkali agano mobha gano, bhapalinji bhalepekenje bhaagwilwenje kwa nema. 6 Bhai ibhaga

bhaagwilwenje kwa nema, nngabha bhaagwilwenje kwa itendi, na ibhaga bhaagwilwenje kwa itendi, nngabha bhaagwilwenje kwa nema. 7 Igala nndi? Shindu shibhaloleyangaga Ishilaeli shila bhagashipatanga. Bhashipatilenje ni bhaagwilwenje bhala, ikabheje bhananji ninonopeywa mitima. 8 Malinga Majandiko shigalugula, "A Nnungu bhashikwaanonopeyanga mitima jabhonji, Na meyo gabhonji ganalole Na wala makutu gabhonji ganapilikane mpaka lelo." 9 Na a Daudi gubhashite, "Kalamu yabhonji ibhe lukonji lwa kwaatanjiyanga muyanyata, Na shindu sha kwiikubhala, bhagwanganje ni ukumulwa mboteko. 10 Meyo gabhonji gatagwe lubhundu Bhanalolanje. Migongo jabhonji jipinde mobha gowe!" 11 Bhai ngunabhuya kabhili, bhuli, Bhayaudi bhashinkwiikubhalanga nigwanganga kaje? Nng'oo! Ikabheje kwa lebha kwabhonji, ntapulo uishe ku bhandu bha ilambo ina, nkupinga ashaayene bhakolanje lupimilo. 12 Bhai monaga kulebha kwa Bhayaudi kushibha utajili kushilambolyo na kulebha kwabhonji kushibha utajili ku bhandu bhananji bha ilambo ina, bhuli aki jabhonji nngabha shijibhe utajili gwa punda? 13 Bhai, ngunabheleketete na mmanganyanji nninginji nngabha Bhayaudi. Pabha nne ntume jwa bhandunji bha ilambo ina, numbe nne ngunakwiniya ga liengo lyangu, 14 nkupinga naatendanje ashaalongo ajangu bhammonelanje lupimililo mmanganyanji naatapulanje bhananji munkumbi gwabhonji. 15 Bhai monaga kukanwa kwabhonji kushilundanya bhandunji na a Nnungu, bhuli kuposhelwa kwabhonji shikubhe nndi, ikabhe gumi ku bhawilenje? 16 Monaga nimbu ubhaga gwa ukonjelo, bhai, gagakulago shigabhe ga ukonjelo na litemo libhaga lya ukonjelo na nyambi shiibhe nneyo peyo. 17 Nyambi ina ya misheituni isheililwe, nipandishila nyambi ya nsheituni nng'itu. Bhai, mmanganyanji nninginji nngabha Bhayaudi, ni lujambi lwa nsheituni nng'itu. Nnaini nnakwiikonjanga utwenje gwa litemo lya nsheituni gwa nshitalu. 18 Nnainyegayanje nyambi isheililwe ila, eu monaga nkuipuna, bhai nkumbushile kuti nngabha mmwe nkujigala litemo, ikabheje litemo ni likunnigala mmwe. 19 Pana shimmeleketete kuti, "Nyambi ila yashinkushelwa nkupinga mbandishilwe nne." 20 Elo! Yashinkushelwa kwa ligongo lya ungakulupalila, ikabheje mmwe nshipandishilwa kwa ligongo lya ngulupai yenu, nnailumbilile ikabhe njogope. 21 Pabha monaga a Nnungu bhangaaleshelanga Bhayaudi bhalingnji malinga nyambi iyene, bhuli punkuganishiya shibhammonene shiya mmwe? 22 Nnole uguja gwa a Nnungu na shibhakuti kalipa kwa bhaagwanganga, ikabheje bhanguja kwenu mmwe, monaga shinnonjeye muuguja gwabho. Bhai ikabhe nneyo, numbe mmwe shinshelwe. 23 Nabhalabhonji Bhayaudi bhalekangaga ungakulupalila gwabhonji, shibhapandishilwanje kabhili. Pabha a Nnungu bhanakombola kwapandishilanga kabhili. 24 Monaga mmanganyanji mwashinkushelwanga kopoka munshaituni nng'itu, gumpandishilwenje munshaituni gwa nshitalu, bhai pangali ukomu ashaayenenji bhashelilwenje, nipandishilwa kabhili munkongo gwabhonji. 25 Ashaalongo ajangu, nne ngunapanga nshimanyanje ashino shinjubhi shino, nkupinga nnaibhonanje kuti nshikolanga nngomo. Kunonopa kwa mitima ja Ishilaeli pukwaaliji nngabha kwa lonjeya, mpaka bhandunji bha ilambo ina pushibaamanyanje a Nnungu. 26 Penepo Ishilaeli bhowe shibhatapulwanje, malinga Majandiko ga Ukonjelo

shigataya kuti, “Nkugombola shaishe kopoka ku Shayuni, Shaalushoye lubheleko lwa a Yakobho muilebho yabho. 27 Gegano ni malagano gangu na bhene bhanganyabho pushinaaleshelelanje yambi yabhonji.” 28 Bhai kwa ligongo lya Ngani ja Mmbone bhashibhanganga bhamagongo ajenunji, ikabheje ga agulwa kwabhonji bhaapingwanga na a Nnungu kwa ligongo lya asha nakulu bhabhonji bha bhukala. 29 Pabha a Nnungu bhakatende bhuka kwa upo yabho wala nshemo gwabho. 30 Pabha malinga mmanganyanji bhukala shumwaaleshilenje a Nnungu, ikabheje nnaino bhashikumlonelanga shiya kwa ligongo lya lebha kwa Bhaishilaeli. 31 Nneyo peyo na Bhaishilaeli bhashilebhanga nkupinga kubhanelwa shiya kwenunji, na bhalabhonji bhabhanelwanje shiya. 32 Pabha a Nnungu bhashikwaatabhanga bhandu bhowe muilebho yabhonji, nkupinga bhaabhonelanje shiya bhowe. (eleēsē g1653) 33 Nnole, shiushite punda upalume gwa lunda na lumanyio lwa a Nnungu! Ukumu yabho jwakwa jwa kombola kwiimanya, wala mipango jabho jwakwa akujimanya! 34 Pabha gani aimanyi ng’aniyo ya Bhakulungwa? Eu gani abhapele lunda? 35 Eu gani shakombole kwaapa shindu bhenebho, Nkupinga abhujishiywe kabhili shenesho? 36 Pabha indu yowe kuikopweshe kwa Bhenebho, puili na Bhenebho, na kwa ligongo lya Bhenebho. Kuiniywa kubhe na bhenebho pitipiti. Amina. (aiōn g165)

12 Kwa nneyo, ashaalongo ajangunji, ngunakunshondelesheyanga kwa ligongo lya shiya sha a Nnungu, ntamangananje mbuti mbepei ya a Nnungu, ikwete ukonjelo na ikwaanonyela a Nnungu, kweneko ni kutindibhalila kwenunji kukwete mana. 2 Wala nnakagulilanje ikubho ya pashilambolyo, ikabhe ntende bhuywanje ndumbillilo yenunji ibhe ya ambi, nkupinga mmanyanye ukoto indu ibhapinga a Nnungu, indu ya mmbone ya kwaanonyeya na ya kamilika. (aiōn g165) 3 Kwa nema jimbegwilwe na a Nnungu, ngunakummalanjilanga mmowe kuti, anapagwe munda akwiiganishiya nkulungwa kupunda shaapinjikwa, ikabhe akole ng’aniyo ya kweli ilundana na shipimilo sha ngulupai kila munda shawo shapegwilwe na a Nnungu. 4 Pabha, malinga nshiilu ishipagwa ibhalo yaigwinji, na yowe ikatenda liengo limo, 5 nneyo peyo na uwe nkali tuli tubhabhagwinji, tushibha shiilu shimo nkulundana na a Kilishitu na shibhalo sha kila mundu shishilundana na shibhalo shika njakwe. 6 Bhai, tushipegwa kila mundu na shipaji shakwe kwa nema. Apegwilwe shipaji sha londola, alondole malinga shijili ngulupai jakwe. 7 Apegwilwe shipaji sha utumishi, atumishe. Apegwilwe kujiganya, ajiganya. 8 Apegwilwe kutaga ntima ataje ntima. Apegwilwe ntuka alagaywe kwa ntima gowe. Nkulongoya na alongoye ukoto. Na akwete shipaji sha bhonela shiya, atende nneyo kwa angalala. 9 Kupingana kunabhe na ugulumba. Muishimanje yangali ya mmbone, nkamulilanje ya mmbone. 10 Nng’ishimiyananje mwaashayenenji malinga bha ulongo shibhakuti ishimiyana. 11 Ntumbilanje, nnakolanje ukata mmitima jenuji, nkwaatendela liengo Bhakulungwa. 12 Nng’angalalanje nnikulupalilanga, na nshilaje mwiipilililanje, na nnilonjeyanga nkujiga Nnungu. 13 Mwaajanguitilanje bhandunji bha ukonjelo bhalingnji nshilaje. Nnikwaposhelanga bhajenunji kwa ntuka. 14 Mwaajujilanje mboka kwa a Nnungu bhowe

bhakunshimanga, mwaajujilanje mboka na wala nnaaloshanje. 15 Nng’angalalanje pamo na bhaangalalanga, na nngutanje pamo na bhaagutanga. 16 Ntamanganane pamo kwa ulele. Nnaipunanje, ikabheje mwaapinganje nkali bhandu bha nyegala. Nnaipunilanje lunda lwenunji. 17 Nnampindikulilanje mundu yangali ya mmbone kwa ligongo lya yangali ya mmbone yantendilanje. Ntendaanje ya mmbone ku bhandu bhowe. 18 Kila puikomboleka, ntamangananje kwa ulele na bhandunji bhowe. 19 Ashaalongo ajangu, nnapindikulilanje, ikabheje nnekanje bhajipatanje njimwa ja a Nnungu, pabha Mmajandiko ga Ukonjelo, Bhakulungwa bhakuti, “Kupindikulila ni kwangu nne, nne shimbindikuliile.” 20 Punda penepo Majandiko gakuti, “Mpwai nnjenu akolaga shibhanga, mumpo shalya, na akolaga nnjota, mumpo mashi, pabha punkutenda nneyo nnakumpalila makala ga moto pa ntwe gwakwe.” 21 Yangali ya mmbone inankombole, ikabheje mwiikombole kwa tenda ya mmbone.

13 Kila mundu aukunde upalume utagwala gula, pabha gwakwa upalume gogowe ukabhikwa na a Nnungu, na ukulungwa gogowe upali gula ushibhikwa na a Nnungu. 2 Kwa nneyo akuntauka kalongolele anatauka ya kupinga a Nnungu, numbe bhaatendanga nneyo shibhaukumulwanje. 3 Pabha bhakwetenje ukulungwa bhakakwaajogoyanga bhatendanga ya mmbone, ikabhe bhatendanga itendi yangali ya mmbone. Bhai bhuli nripinga nnaajogope bhakwete ukulungwa? Ntende ya mmbone, penepo shibhannumbilile. 4 Pabha bhenebho ni bhatumishi bha a Nnungu kwa ligongo lya kuntendela mmwe ya mmbone. Ikabheje, ntendaga yangali ya mmbone, penepo shumwaajogope, pabha bhashikola mashili ga ukumula. Bhenebho bhanakwatumishila a Nnungu kwa kwaakumulanga mboteko bhatendanga yangali ya mmbone. 5 Kwa nneyo inapinjikwa kwaakundanga bhakwetenje ukulungwa gogowe, nngabha kwa ligongo lya jogopa ukumu ja mboteko, ikabhe kwa ligongo lya ng’aniyo ya muntima. 6 Kwa ligongo lyolyo nnalipanga koli, pabha bhanganyabho ni bhakamula liengo bha a Nnungu na mubhalonjeyanga nniengo lyolyo. 7 Mumpanganje kila mundu malinga shiikupinjikwa. Nkamula koli, apegwe koli. Nkulonga upambi, apegwe upambi. Apinjikwa kuishimiwa, aishimiwe. Apinjikwa kukuuya, akuywe. 8 Nnakolanje ligambo kuka mundu jojowe, ikabhe ligambo lya pinganape, pabha akumpinga njakwe anakamula shalia ja Musha. 9 Pabha yene amulii, “Unalabelabhe eu Unabhulaje eu Unalokolilie,” na amuli ina yowe, inamalila kwa kamula amuli jimo, “Gumpinje ntami njjako malinga shukwiipinga gwanwene.” 10 Pabha gumpingaga ntami njjako, ukantendela yangali ya mmbone. Bhai, kupingana ni kutimilila kwa shalia. 11 Mmumanyanje kuti malanga ga jumuka gaishe, na nnaino malanga ga ntapulo gwetu gabhandishile kwa kaje, kupunda mobha gutwatandwibhe kulupalila. 12 Shilo shikakabha mala, na mui unabhandishila, bhai tuileshe itendi ya nnuhindu, niwala ikomanilo ya nshilangaya. 13 Malinga shiikupinjikwa tenda mui, tutame kwa tungamana, nngabha kwa doka, kolewala, kwetela, labhalabha, mipwai na lupimililo. 14 Ikabhe nnundananje na Bhakulungwa a Yeshu Kilishitu mbuti shiwalo shenunji, wala nnaganishiyanje ga ilokoli ya nshiilu ikumpinganga ntendanje yambi.

14 Mumposhelanje Nkilishitu akaakulupalila ukoto, nnaibhukanje nkutaukangana ga ng'aniyo yakwe. 2 Mundu juna kwa ngulupai jakwe, analya indu yowe, na juna kwa ngulupai jakwe jikanabhe komala, analya lipondape. 3 Mundu alya indu yowe anannyegaye mundu akalya indu yowe, wala jwene akaapinga kulya shindu shina, ananng'ukumule alya indu yowe, pabha a Nnungu bhannjitihiye. 4 Ugwe gani ukunng'ukumula ntumishi juka mundu juna? Ajimaga eu agwaga, genego ga Bhakulungwa bhakwe. Numbe shajime, pabha Bhakulungwa shibhannjimishe. 5 Mundu juna paganishiya kuti, lipali lyubha lya mmbone lya tindibhalila punda mobha gana, na juna paganishiya kuti, mobha gowe ganalingana. Bhai kila mundu akagule lunda lwakwe. 6 Aganishiya kuti lyubha lina lya mmbone kaje, anatenda nneyo kwa ligongo lya kwaakuya Bhakulungwa, na jwene alya kila shalya, analya kwa kwaakuya Bhakulungwa, pabha anakwaatendela eja a Nnungu. Na jwalakwe akalya shalya shina anatenda nneyo kwa ligongo lya kwaakuya Bhakulungwa, na jwalakwe anakwaatendela eja a Nnungu. 7 Pabha jwakwa mundu munkumbi gwetu alama kwa pinga nnyene, wala jwakwa awa kwapinga nnyene. 8 Monaga tunalama, tulama kwa ligongo lya Bhakulungwa, eu tuwaga, tunawa kwa ligongo lya Bhakulungwa. Bhai, monaga tulamaga eu tuwaga, uwe tubhabho Bhakulungwa. 9 Kwa lyene ligongoli, a Kilishitu bhashinkuwa na yuka, nkupinga bhabhe Bhakulungwa bha bhakotonji na bha bhawilenje. 10 Kwa nndi mmwe nnakwaukumula apwenu? Eu numbe mmwe kwa nndi nnakwanyegaya apwenu? Pabha uwe tubhowe shitujime mmujo ja shitengu sha ukumu sha a Nnungu. 11 Pabha Mmajandiko Bhakulungwa bhakuti, "Malinga shingulama shino, bhakuti Bhakulungwa, kila mundu shandindibhalile ulungolungo, na kila mundu shakunde kuti nne ni a Nnungu." 12 Kwa nneyo, kila mundu munkumbi gwetu, shailugule nnyene kwa a Nnungu. 13 Bhai tunaukumulane, ikabhe tutumbilile kuleka indu ya kunnebya mmpwetu. 14 Kwa lundana kwangu na Bhakulungwa a Yesu, kunandenda nimumanye kuti, shakwa shalya shili sha nyata tandubhilepe, ikabheje mundu ashibhonaga shalya shina kuti sha nyata, bhai, kuka jweneje shene shalyasho sha nyata. 15 Monaga shimumulaye mmpwenu kuinjika kwa ligongo lya shalya shinkulya, bhai, nshileka kupingana. Shalya shenu shinabhe shiumilo sha kunng'obhya mundu, jubhann'wilile a Kilishitu. 16 Bhai nnakundanje shindu shinkushibhonanga sha mmbone shinyegaywe. 17 Kulya na papila nngabha shindu Muupalume gwa a Nnungu, ikabhe ga aki na ulele na angalala kutupegwa naka Mbumu jwa Ukonjelo ni shipinjikwa muupalume gwa a Nnungu. 18 Pabha akwaatumishila a Kilishitu shana nneyo, anakwaanonnyeya a Nnungu na anakundwa na bhandunji. 19 Bhai ibhaga nneyo, tukagulile indu ipeshela ulele na ya tagana ntima. 20 Bhai nnaangabhanye ngulupai jibhabhishile a Nnungu kuka mundu ga shalya. Ikabheje nngabha ya mmbone, mundu jojowe kulya shalya shikuntenda mundu nnjakwe alebhe alyaga shene shalyasho. 21 Mbaya leka kulya nnyama wala ng'wa divai eu tenda shindu shoshowe, sha kunnebya mpwenu. 22 Bhai, shoshowe shinkukulupalila kwa a Nnungu bhenu, nntende shenesho. Mbaya jwene mundu

akakwiukumula nnyene, kwa shindu shakushibhona kuti sha aki. 23 Ikabheje mundu akola lipamba, alyaga shalya akuno aliganishiya kuti shangali sha mmbone, anatenda shambi pabha jwangalya kwa kulupalila ngulupai jakwe. Na shindu shoshowe shitendeka gwangali ngulupai, ni yambi.

15 Uwe twiishimilise nngulupai, tunapinjikwa kwaajangutilanga bhangelingini mashili ngulupai, na wala tunaikonjeleye twaashayene. 2 Kila mundu munkumbi gwetu anapinjikwa antendele uguja ntami nnjakwe, nkupinga ashimilise nngulupai. 3 Pabha, a Kilishitu bhangaikonjeleya bhayene, ikabhe malinga shigataya Majandiko, "Matukano gowe gubhantukenenje mmwe gashinkumbata na nne." 4 Pabha gowe gajandikwe bhukala, gashinkujandikwa nkupinga kutujiganya uwe. Genego gashinkujandikwa na Mmajandiko ga Ukonjelo nkupinga tupate sha kulupalila na kututaga ntima putukwiipilila nkulindilila miadi ja a Nnungu jitimilile. 5 A Nnungu bhakutupa kwiipilila na tagwa ntima bhampanganje shikono, nkolanje ntima gumo nkwaakagula a Kilishitu Yesu, 6 nkupinga mmowe kwa ntima gumo na kwa liobhe limo, mwaakuyanje a Nnungu. Atati bha Bhakulungwa bhetu a Yesu Kilishitu. 7 Bhai, mposhelanaje mwaashayenenji, malinga a Kilishitu shibhamposhelenje mmanganyanji, nkupinga a Nnungu bhakuywe. 8 Pabha ngunakummalanjilanga kuti, a Kilishitu bhashinkwaatumishilanga bhajalulanje, nkupinga bhalanguye ukweli gwa a Nnungu, na timiliya miadi jibhaapelenje ashaambuje bhukala, 9 nkupinga na bhandu bha ilambo ina bhaakuyanje a Nnungu kwa shiya shabho. Malinga Majandiko ga Ukonjelo shigalugula, "Kwa nneyo shininnng'iniye munkumbi gwa bhandu bhagabha Bhayaudi. Shinyimbe nkuiniya lina lyenu." 10 Kabhili Majandiko gakuti, "Mwiinonyelanje mmandunji bha ilambo ina, mwiinonyelanje pamo na bhandu bhabho." 11 Kabhili gakuti, "Bhandu bhowe bhagabha Bhayaudi, mwaainyanje Bhakulungwa, mmanganya mmandunji bhowe, mwaainyanje." 12 Kabhili a Ishaya bhakuti, "Shakoposhele mwana nshipinga sha a Yeshe jwalakwe shabhatagwalanje bhandunji bhagabha Bhayaudi, na bhalabhonji shibhankulupalilanje." 13 Bhai, a Nnungu bhali shiumilo sha ngulupai bhampanganje kuangalala na ulele nkukulupalila kwenu. Mpundanje kola ngulupai kwa mashili gaka Mbumu jwa Ukonjelo. 14 Ashaapwanga, nne namwene nimumanyi kuti mmanganya nshikolanga uguja kaje, na lumanyio lowe, na nnakombolanga kuleyana mwaashayenenji. 15 Ikabheje ngunakunjandishilanga kwa makangala indu ina mmaluwa muno, ninkumbushianje kabhili, kwa ligongo lya nema jibhambele a Nnungu, 16 nkupinga mme ntumishi jwa a Kilishitu Yesu ku bhandu bhagabha Bhayaudi. Liengo lyangu lya ukubhishila nkulunguya Ngani ja Mmbone, nkupinga bhandu bhagabha Bhayaudi bhahanganje mbuti indu ya mbepei iposhelwa na a Nnungu, itakaywa naka Mbumu jwa Ukonjelo. 17 Bhai kwa lundana kwangu na a Kilishitu, ngunakwiipuniila liengo lyangu kwa a Nnungu. 18 Pabha ngalinga bheleketa shindu shina shoshowe, ikabhe shibhatendile a Kilishitu Yesu nniengo lyangu, nkupinga bhandu bhagabha Bhayaudi bhaakundanje a Nnungu. Kwa imelekete na indendile, 19 kwa mashili ga ilangulo na ilapo, na kwa mashili gaka Mbumu jwa a Nnungu.

Kutandubhila ku Yelushalemu na mmbali ya tome na kweneko, mpaka ku Ililiko, njilunguya Ngani ja Mmbone ja a Kilishitu. 20 Kutumbilila kwangu mobha gowe, nunguye Ngani ja Mmbone popowe pakanabhe lunguywa lina lya a Kilishitu, nkupinga ngunalunguye mwalungwiye mundu juna. 21 Malinga Majandiko ga Ukonjelo shigalugula, "Bhandu bhakanabhe lungushiya ngani jabho, shibhabhonanje, na bhakanabhe pilikananga bhala, shibhamanyanje." 22 Kwa lyene ligongolyo nashinkuibililwa papagwinji ngunaishe kungwenunji. 23 Ikabheje nnaino pabha maliye liengo aino mmbali ino, na kwa yaka yaigwinji njikola lilaka lya ika kungwenunji, 24 ngunaganishiya tenda nneyo nnaino, pushimbite gwa kwenda ku Ishipania. Shimbite kunnolanga na ndamaga pamo na mmanganya kwa mobha gashoko nnyangutilanje kwa mwanja gwangu. 25 Ikabheje nnaino ngunakwenda ku Yelushalemu kukwatumishilanga bhandunji bha ukonjelo. 26 Pabha ishikwaanonyelanga makanisha ga ku Makedonia na ku Akaya, kwaajangutilanga bhaalaga bha ukonjelo bhalinginji ku Yelushalemuko. 27 Ashaayenenji bhashiengwanga tenda nneyo, ikabheje lyene liengolyo kweli lyabhonji, pabha bhanalongwanga. Ibhaga, bhandu bhanga bha Bhayaudi bhashikundikanywanga mmboka ya Bhayaudi, bhanapinjikwanga nabhalabhonji kwaatumishilanga Bhayaudi kwa indu yabhonji. 28 Bhai maliyaga lyene liengolyo, nikwaakamuyanga nyangutilo imbatile kwa ligongo lyabhonji, shinimpitilanje pushinyende ku Ishipania. 29 Na nne nimumanyi kuti pushing'ishe kungwenunji, shing'ishe na mboka yaigwinji ya a Kilishitu. 30 Bhai, ashaapwanga, ngunakunshondelesheyanga kwa lina lya Bhakulungwa bhetu a Yesu Kilishitu na kupinga kutupegwa naka Mbumu, nundananje na nne nkunyujiila kwa a Nnungu, 31 kuti ndapulwe okmmakono ga bhakaakulupalilanga bhalinginji ku Yudea, na liengo lyangu ku Yelushalemuko liposhelwe na bhandunji bha ukonjelo bhalinginji kweneko, 32 nkupinga a Nnungu bhapingaga ng'ishe kungwenunji kwa angalala, numbe nne mbumulile pamo na mmanganyanji. 33 A Nnungu bha ulele, bhabhe pamo na mmanganyanji mmowe! Amina!

16 Ngunapinga mwaamanyanje alumbu bhetu a Poebha, bhatumishi bha likanisha lya ku Kenkelea. 2 Mwaaposhelanje kwa ligongo lya Bhakulungwa malinga shiikupinjikwa kubhandunji bha ukonjelo. Mwaajangutilanje kwa shoshowe shibhapinga kunnjuganga, pabha na bhalabho bhashikwaajangutilanga bhandu bhahagwinji pamo na nne. 3 Mwaashalimianje a Pilishika na a Akula, bhatumishi ajangunji bha a Kilishitu Yesu. 4 Bhene bhanganayabho bhapingaga bhulagwanga kwa ligongo lyangu nne. Ngunakwaatendelanga eja, nngabha nne jikape, ikabhe na makanisha gowe ga bhandu bha ilambo ina. 5 Na kabhili, shalamu ku bhandunji bha likanisha bhaimananga nnyumba jabhonji. Shalamu ambwiga ajangu a Epainito, bhali bha ndandubho kwaakulupalila a Kilishitu, nshilambo sha Ashia. 6 Shalamu shabho a Malia bhatumbile kamula liengo kwa ligongo lyenu mmanganya. 7 Shalamu kwa a Ndoloniko na a Yonashi, ashaalongo ajangunji bhatabhilwenje pamo na nne, bhandunji bha manyika munkumbi gwa ashimitume bha a Yesu, bhalinginji Bhakilishitu nne

nganabhe kubha Nankilishitu. 8 Shalamu kwa a Ampiliato, ambwiga ajangu nkulundana na Bhakulungwa. 9 Shalamu kwa a Alubhanushi, bhatumishi ajangu bha a Kilishitu, shalamu ambwiga ajangu a Shitaku. 10 Shalamu kwa a Apelishi, kulupalika kwabho kwa a Yesu kumanyishe. Shalamu bhowenji bhalinginji nnyumba ja Alishitobhula. 11 Shalamu alongo ajangu a Elodiana, shalamu bhandunji bhowe bha nnyumba ja a Nakishiushi, bhakwaakulupalilanga Bhakulungwa. 12 Shalamu shabhonji a Tulupina na a Tuluposha bhanabhakongwe bhaakumulanga liengo lya Bhakulungwa. Shalamu jabho ambwiga ajangu a Pelishishi, na bhalabho bhakongwe bhakamwile liengo kwa tumbila kwa ligongo lya Bhakulungwa. 13 Shalamu shabho a Lupo, bhakamula liengo kwa tumbila na anyinabhabho numbe nne bhungwaashema mama. 14 Shalamu shabhonji Ashinkilito na a Pilegoni na a Eme na a Patulobhashi na a Ema na ashaapwetu bhalinginji pamo na bhene bhanganayabho. 15 Shalamu yabhonji a Pilologo na a Julia na a Nelishi na alumbu bhabho, na a Olimpa na bhandunji bha ukonjelo bhalinginji pamo na bhene bhanganayabho. 16 Nshalimiananji kwa ukonjelo. Shalamu shenunji kukopoka ku bhandu bha makanisha gowe ga a Kilishitu. 17 Ashaalongo ajangunji, ngunakunshondelesheyanga mwiiteiganje na bhene bhakumbuyanga ya malekano nikwaabbulayanga bhananji kulebha, nileka majiganyo gunnjigenyenye. Mwiepuyanje na bhene bhandunjabho, 18 pabha bhandunji bha nneyo bhakakwatumishilanga Bhakulungwa bhetu a Kilishitu, ikabhe mapitu gabhonji ashaayene. Kwa malobhe gabhonji ga nong'aya na kwiikonjeleya bhanapuganyanga mitima a bhandunji bhakakushimanyanga shindu. 19 Bhandu bhowe bhapiikenenje ga kunda kwenunji, kwa nneyo nnanonyelanga. Ikabheje pungupinga nkolanje lunda kwa indu ya mmbone na nnaputukanje kwa indu yangali ya mmbone. 20 Na a Nnungu bha ulele shangupe shibhamponde Lishetani pamakongono genunji. Nema ja Bhakulungwa bhetu a Yesu Kilishitu jibhe na mmanganya. 21 A Timoteo bhatumishi ajangu bhanakunnamushilanga. Na a Lukio na a Yashoni na a Shoshipateli ashaalongo ajangunji, bhanakunnamushilanga. 22 Na nne a Tetio, ngujandika jene bhaluwa jino, ngunakunnamushilanga kwa lina lya Bhakulungwa. 23 A Gayo, bhayene mui bhamboshele na bhandu bhowe bha likanisha bhaimananga nnyumba jabho, bhanakunnamushilanga. A Elashito, bhaagoya mmbiya bha shilambo na a Kwatushi bhanakunshalimianga. 24 Nema ja Bhakulungwa bhetu a Yesu Kilishitu jibhe na mmowenji. Amina. 25 Bhai, nnaino bhakuywe a Nnungu! Bhalabho bhanakombola kunshimilikanga Nngani ja Mmbone ja a Yesu Kilishitu jinungwiye jila, malinga shiishite manyika indu ya nng'yo, ikamanyikaga pitipiti, (aiōnios g166) 26 ikabheje nnaino imanyishe kwa majandiko ga ashinkulondola bha a Nnungu, kwa amuli ja a Nnungu bha pitipiti, nkupinga bhandu bha ilambo yowe bhakulupalilanje na kunda. (aiōnios g166) 27 Bhai, a Nnungu bhakwete lunda jikape, bhakuywe pitipiti kupitila a Yesu Kilishitu. Amina. (aiōn g165)

1 Bhakolinto

1 Nne a Pauli njemilwe kubha ntume jwa a Yesu Kilishitu kwa pinga kwabho a Nnungu, na Bhakilishitu ajangu a Shoshiteneshi ngunakunnjandishilanga, 2 mmanganya likanisha lya a Nnungu nninginji ku Kolinto. Nninginji bha ukonjelo nkulundana na a Kilishitu Yesu, nshemilwenje mmanganje bhandu bha a Nnungu pamo na bhandu bhowe bhakwaajuganga Bhakulungwa bhetu a Yesu Kilishitu bhali bhakulungwa bhabhonji na bhetu. **3** Tunakupinjilanga nema na ulele kopoka kwa Atati a Nnungu, na Bhakulungwa bhetu a Yesu Kilishitu. **4** Ngunakwaatendela eja a Nnungu mobha gowe kwa ligongo lyenunji, pabha bhashikumpanganga nema jabho pitila a Yesu Kilishitu. **5** Pabha, kwa lundana na a Yesu Kilishitu nshishulushilwanga kwa kila shindu. Nshikolanga shikono sha lumanyio lowe na kombola kubheleketa. **6** Malinga ukong'ondelo gwa a Kilishitu shiushite malila mmitima jenunji, **7** wala nkatubhilwanga shipaji shoshowe, nnilolelanga kubhonekana kwabho Bhakulungwa bhetu a Yesu Kilishitu. **8** Bhenebho shibhanshimilikanje mmanganya mpaka kumpelo, nnabhonekanje nshilebhanga lyubha lya kwiya Bhakulungwa bhetu a Yesu Kilishitu lila. **9** A Nnungu bha kulupalika, bhashinkunshemanga mmanganya mmanganje shindu shimo na bhana bhabho a Yesu Kilishitu Bhakulungwa bhetu. **10** Ashaalongo, ngunakunshondelesheyanga kwa lina lya Bhakulungwa bhetu a Yesu Kilishitu kuti, gunkubheleketa gabahe gamo, kunapagwe kugabhanyika munkumbi gwenunji, ikabhe nkolanje ng'anyiyo imo na ndumbililo imo. **11** Pabha ashaalongo ajangu, njilugulilwa ga ngani jenunji na bhandunji bha ulongo gwa a Koloe kuti, gushipagwa mpwai munkumbi gwenunji. **12** Bhai, shingupinga bheleketa ni sheshino, kila mundu anabheleketa mwakwe. Juna akuti, "Nne jwa a Pauli," na juna kuti, "Nne jwa a Apolo," na juna kuti, "Nne jwa a Kepa," na juna akuti, "Nne jwa a Kilishitu." **13** Bhuli, a Kilishitu bhashigabhanyika? Bhuli, a Pauli ni bhakomelwe munshalabha kwa ligongo lyenunji? Eu bhuli, mwashinkubhatishwanga kwa lina lya a Pauli? **14** Ngunakwaatendela eja a Nnungu, pabha nangammatisha mundu jojowe munkumbi gwenunji ikabhe a Kilishipashi na a Gayo pe. **15** Kwa nneyo jwakwa shaabhelekete kuti ashibhatishwa kwa lina lyangu. **16** Elo, naabhatishenje a Shitepana na bha likaja lyabho, punda bhanganyabho, kwali monaga nammatisho mundu juna. **17** A Kilishitu bhanganduma kubhatisha, ikabhe nunguye Ngani ja Mmbone. Na kwene lunguyako kunakulupalile lunda lwa shigundu, nkupinga kuwa kwa a Kilishitu munshalabha kunapetekuywe. **18** Pabha ntenga gwa kuwa kwa a Yesu munshalabha kwa bhaobhanga ni ungumba, ikabheje kwetu uwe tuli muntapulo gwa gwene ntenga go, ni mashili ga a Nnungu. **19** Pabha ishijandikwa, "Shing'angabhanye lunda lwabhonji, na lumanyio lwa bhaashomanga shinilikane." **20** Bhai, luli kwei lunda lwa bhakwetenje lunda? Bhalinginji kwei bhaajiganya bha shalia ja a Musha? Ali kwei jwa mitau jwa gene mobha gano? A Nnungu bhashikulutenda lunda lwa bhandu bha pashilambolyo ubhelu. (aiōn g165) **21** Pabha kwa lunda lwa a Nnungu, bhandu bhakwetenje lunda

bhakakombolanga kwaamanya a Nnungu. Pabha a Nnungu bhashinkupinga kwaatapulanga bhakwaakulupalilanga, kwa shene shibhakushibhonanga bhakwetenje lunda kuti ungumba, yani ntenga gutulunguya **22** Pabha Bhayaudi bhanapinganga ilangulo na Bhagiliki bhanaloleyanga lunda. **23** Ikabheje uwe tunakwaalunguya a Kilishitu bhapotekwe munshalabha. Ku Bhayaudi ndabhila na kubhandu bha ilambo ina ungumba, **24** ikabheje kwa bhaagwilwenje na a Nnungu Bhayaudi na Bhagiliki, a Kilishitu ni mashili na lunda lwa a Nnungu. **25** Pabha ubhonekana ungumba gwa a Nnungu ushikola lunda kupunda lwa bhandu, kubhoneka kunyegala kwa a Nnungu, kushikola mashili kupunda mashili ga bhandu. **26** Ashaapwanga, nkumbushilanje mobha gumwashemilwenje na a Nnungu, bhakwetenje lunda bhakashulukenje nkali kwa lunda lwa shigundu, bhabhagwinji bhakamanyikenjeje na wala bhakakwetenjeje indu. **27** Ikabheje a Nnungu bhashinkuiagula indu ya shibhelu, nkupinga bhaapetekuyanje bhakwetenje lunda, na bhashinkuiagula indu ya nyegaywa nkupinga kwaapetekuyanga bhandu bhakwetenje mashili. **28** A Nnungu bhashinkuagula indu ya nyegala yangali mashili ya pashilambolyo, numbe indu ya nyegala yabhonekaga mbuti ikapaliji, nkupinga bhaipetekuye indu ibhoneka ya mmbone ku bhandunji. **29** Bhai, jwakwa mundu shaipunile shoshowe kwa a Nnungu. **30** A Nnungu bhayene bhashikunnundanyanga na a Kilishitu Yesu. A Nnungu bhashikwaatenda a Kilishitu bhabhe lunda lwetu na aki jetu, na pitila bhenebho uwe tungalundana na a Nnungu kubha bhandu bhabho bha ukonjelo, na bhawetenje aki na bhagombolwenje. **31** Bhai, malinga shijandikwe, "Apinga kwiipuna, bhai, aipunile liengo lya Bhakulungwa."

2 Bhakilishitu ajangunji, nne punaishe kunngwenunji kukunnungushiyanga, nangannungushayanga ya nng'iyu gwa ntenga gwa a Nnungu, kwa talashiya ukoto wala kwa lunda lwa shigundu. **2** Punaliji kunngwenunji nashinkutumbilila ngunalunguye shindu shoshowe, ikabhe mwaamanyanje a Yesu Kilishitu, bhakomelwe munshalabha. **3** Punaliji kunngwenunji ngakweteje mashili, nguliungumila na lipamba lya kaje. **4** Malobhe gangu na kulunguya kwangu kukaliji kwa lunda na tekeya, ikabhe kwa ilangulo na mashili gaka Mbumu jwa Ukonjelo. **5** Nashinkutenda genego nkupinga ngulupai jenunji jinatamile ga lunda luka mundu, ikabhe mmashili ga a Nnungu. **6** Nkali nneyo, tunabheleketa kwa lunda kwa bhene bhaishimilikanje ngulupai bhala, ikabheje lwene lundalo nngabha lwa pa shilambolyo pano, wala nngabha lwa bhakulunhwanji bha pa shilambolyo bhalinginji munkumbi gwa bhaobhanga. (aiōn g165) **7** Lunda lutubheleketa lwa shinjubhi sha a Nnungu, ni lunda lwaishwiwe, kuumila kupanganywa shilambolyo, kwa ligongo lya ukujelo gewtu. (aiōn g165) **8** Lwene lundalo bhatagwala bha pashilambolyo bhakakulumanyanga, pabha kaliji bhakalumanjini, ngubhakaakomelenjeje munshalabha, Bhakulungwa bha Ukonjelo. (aiōn g165) **9** Ikabheje malinga shijandikwe, "Indu ikanabhe bhoneka na mundu wala kwiipilikana, indu ikanabhe ganishiywa na mundu, genego a Nnungu ni gubhaabhisilenje bhandu bhakwaapinganga bhala." **10** Genego gubhatulangiye a Nnungu kwa Mbumu jwabho. Pabha Mbumu analoleya indu yowe nkali indu ya injubhi ya

a Nnungu. **11** Gani akwiimanya indu ili mbumu juka mundu ikabhe mbumu juka mundu nnyene? Nneyo peyo indu ya a Nnungu jwakwa akwiimanya ikabhe Mbumu jwa a Nnungu. **12** Ikabheje uwe twangaposhela mbumu jwa pashilambolyo, ikabhe Mbumu akopoka kwa a Nnungu nkupinga atukomboye kugamanya gowe gubhatulagushiye a Nnungu. **13** Bhai, uwe tunajiganya, nngabha kwa malobhe gutujigenywe na lunda lwa bhandunji, ikabhe kwa malobhe gutujigenywe naka Mbumu, tulijiganya indu ya mumtima kwa bhakwetenje jwene Mbumujo. **14** Mundu jwa lunda lwa shibheleke, akakwiiposhela indu ika Mbumu jwa a Nnungu. Kuka jwenejo inabhoneka mbuti ungumba wala akakwiimanya, pabha pugamanyika kwa jangutilwa naka Mbumu jwa Ukonjelo. **15** Ikabheje mundu akwete jwene Mbumujo anakombola kuukumula gowe, na nnyene akaukumulwa naka mundu juna. **16** Majandiko gakuti, "Gani akombola kulumanya lunda lwa Bhakulungwa? Gani shaabheleketete nabho?" Ikabheje uwe tushikola lunda lwa a Kilishitu.

3 Bhakilishitu ajangunji, nne punaliji na mmanganya nangammeleketelanga mbuti bhandu bha mbumu. Ikabheje mbuti bhandu bha pashilambolyo, malinga ashinambombe nndamo ja shi Kilishitu. **2** Nashinkumpanganga mabhele, nngabha shalya shanonopa, pabha nkashilepelenje. Nkali nnaino nkashikombolanga. **3** Numbe mmanganyanji launo nnakaguilanga indu ya pa shilambolyo. Pabha kungwenunji lushipagwa lupimililo na mpwai, bhuli mmanganya nngabha malinga bhandunji bha pa shilambolyo? Nnatamangana kwa kagutila nkubho gwa bhandunji bha pashilambolyo. **4** Mundu jumo munkumbi gwenunji pabheleketete kute nne jwa a Pauli na juna kute nne jwa a Apolo, bhuli, yenyoye ikalangula kute nnatamangana malinga bhandu bha pa shilambolyo? **5** A Apolo ni agani? Na a Pauli ni agani? Uwe bhatumishiye twampeleshelenje mmanganya ngulupai. Kila mundu munkumbi gwetu anatenda malinga shapegwilwe na Bhakulungwa. **6** Nne nashinkupanda mmbeju, a Apolo gubhajitilile mashi, ikabheje bhameshiye mmbeju a Nnungu. **7** Kwa nneyo, jwa mmbone nngabha apandile mmbeju jula eu ajitilile mashi, ikabhe bha mmbone a Nnungu bhameshiye mmbeju. **8** Apandile jula eu ajitilile mashi bhowe bhanalingananga, ikabheje kila mundu shaposhele upo yakwe kwa liengo lyatendile. **9** Pabha uwe na mmanganyanji, tubhowe tubhakamula liengo lya a Nnungu pamo, na mmanganya ni malinga nngunda gwabho na nyumba jabho. **10** Kwa jangutilwa na nema jimbegwilwe na a Nnungu, malinga nkushenga akwete lunda, aolile nshingi gwa nyumba na mundu juna gwaishye shenga pa ntundu jakwe. Ikabheje kila mundu alolesheyey shakuti shenga panani jakwe. **11** Jwakwa mundu juna shaolele maimbo ga shenga, paolelwe pala, yani a Yesu Kilishitu. **12** Ibhaga mundu shaashenje panani jakwe, kwa shaabhu eu maganga ga ela eu maganga ga bhei jikuklungwa, na juna shaashenjele nkali mikongo eu maamba eu manyai. **13** Ikabheje, lyubha lya ukumu liengo lya kila mundu shilibhoneshe mobha gushibhaishe a Kilishitu. Pabha, lyene lyubhalyo a Nnungu shibhapime kushimilika kwa kila liengo. **14** Monaga shashenjele mundu shibhonekaga kulonjeya, bhai shaposhele upo. **15** Ikabheje shashenjele mundu

shitinikaga, bhai, akapegwa upo, ikabheje nnyene shatapulwe mbuti akolobhweshe pa moto. **16** Bhuli, nkakwiimanyanga kute mmanganya ni likanisha, na kute Mbumu jwa a Nnungu anatama mmunda jenunji? **17** Bhai, mundu aangabhanyaga likanisha lya a Nnungulyo, a Nnungu shibhann'angabhanyeye jwene mundujo, pabha likanisha lya a Nnungu, ni lya Ukonjelo na lyene likanisha lya a Nnungulyo, ni mmanganyanji. **18** Nnaitembanje! Mundu jojowe munkumbi gwenunji aiganishiyaga kute ashikola lunda malinga lwa pa shilambolyo, mbaya aiputuye nkupinga akole lunda lwa kweli. (*aiōn g165*) **19** Pabha lunda lwa pa shilambolyo pano ni ungumba kwa a Nnungu. Na Majandiko ga Ukonjelo gakuti, "A Nnungu bhanakwaakumulanga bhakwetenje lunda, nkupenya kwabhonji." **20** Kabhili Majandiko gakuti, "Bhakulungwa bhamumanyi ng'anyiyo ya bhakwetenje lunda kute ikapwaa." **21** Bhai mundu anaipunile bhandu. Pabha indu yowe yenunji. **22** Ibhaga a Pauli, eu a Apolo, eu a Kepa, eu shilambolyo, eu gumi na kuwa, eu indu ipali, nnaino na ikiwya, yowe ni yenunji, **23** ikabheje mmanganya ni bha a Kilishitu na bhalabho a Kilishitu ni bha a Nnungu.

4 Bhandunji bhatubhonanje uwe kute bhatumishi bha a Kilishitu tukamwiye injubhi ya a Nnungu. **2** Shipingwa penepo ntumishi akamwiye jula akulupalilwe. **3** Kwangu nne kumaliya kwa malobhe gangu na mmwe eu na bhandu bhana nngabha shindu. Kwangu nne nngabha shindu kuukumulwa na mmanganya eu na maakama jojowe ja bhandunji, na wala namwene ngakwiikumula. **4** Nntima gwangu ukakushibhona shindu shoshowe sha jangula, ikabheje shenesho shikandenda nne ngunakole sha gambwa, ikabhe bhamaliya malobhe gangu nne Bhakulungwa. **5** Bhai, nnamaliyanje malobhe malanga gakwe gakanabhe ika, nnekanje mpaka pushibhaishe Bhakulungwa. Bhenebho bhapinga unukula indu yowe itendwa kwa shinjubhi, na languya ili mmitima ja bhandunji. Penepo kila mundu shalumbililwe na a Nnungu. **6** Bhakilishitu ajangunji, gene gundashiyeyo njilandanya ga a Apolo na nne kwenu mmanganyanji, nkupinga mwijiganyanje kugamanya malobolelo ga shibheleketete sha kute, "Nnapundanje gajandikewo." Anapagwe mundu akwiipunila mundu jumo na kunnyegaya juna. **7** Gani ampele mmwe ukulungwa kupunda bhananji? Shindu shashi shinkwete, gwangali kupegwa na a Nnungu? Monaga nshipegwa shinkwiipuna nndi mbuti mwaangapegwa? **8** Ayaga! Nkwetenje indu ya togolele! Igala nkwenje shipato shikulungwa! Mpatilenje upalume gwangali uwe! Elo, mbaya nkalinginji bhapalume, nkupinga na uwe tutagwale pamo na mmanganyanji. **9** Pungubhona a Nnungu bhashikutubhika uwe mitume tubhe tubhanndu bha kumpelo, pabha tushibhikwa tubhe mbuti bhandu bha bhulagwa pa lugwinjili, tulolwe na bhandu bha shilambolyo na ashimalaika. **10** Uwe tubhangumba kwa ligongo lya a Kilishitu, ikabheje mmanganya nshikolanga lunda nkulundana na a Kilishitu! Uwe twangali mashili, mmanganya nshikolanga. Mmanganya nnaishimiwanga, ikabheje uwe tukaishimiwa. **11** Mpaka agano malanga gano, uwe tushikola nnjota na shibhanga twangali nngubho, tunapotekwa na twangali ndamo. **12** Tunaabhuka mmaengo twaashayene. Pututukanwa, tunakwajuilanga mboka,

tupotekwaga tunakwiipililila, 13 tulambililwaga, tunajangula kwa ishima. Mpaka nnaino putuli mbuti indu ya nunga na ya nyata pashilambolyo. 14 Ngaajandika gegano nkupinga nintokomayanje, ikabhe kwa ligongo lya kunneyanga mbuti ashibhanangu bhungumpinganga. 15 Pabha nkali nkwenenje bhaajiganya bhabhagwinji nndamo ja Shikilishitu, ikabheje ainabhenunji bhamope, pabha nne ninkwenenje nkulundana na a Kilishitu kwa lunguya Ngani ja Mmbone. 16 Kwa nneyo, ngunakunshondelesheyanga nngagulanje nne shinguti tenda. 17 Kwa nneyo njikwaatama a Timoteo kunngwenunji, bhanangu bhungwaapinga, bhaakulupalika nkulundana na Bhakulungwa. Shibhankumbushiyanje shingutama nne nkulundana na a Kilishitu, na majiganyo gangu mmakanisha gowe. 18 Bhananji munkumbi gwenunji bhatandwibhenje kwiipunanga bhaliganishiyanga kuti ngaika kabhili kweneko. 19 Ikabheje, Bhakulungwa bhapingaga shing'ishe kunngwenunji, penepo shinole namwene, nngabha kwa pilikanape malobhe gabhonji, ikabhe na kugamanya mashili gabhonji. 20 Pabha upalume gwa a Nnungu nngabha ga malobhepe, ikabhe mashili. 21 Nkupinganga nndi? Ng'ishe na imbo eu ng'ishe na ntima gwa pingana na kwiitimalika?

5 Jipali ngani jishumile kuti munkumbi gwenunji kushipagwa labhalabha, kabhili kwene labhalabhako kukanabhe pagwa nkali kubhandu bhakakwaamanyanga a Nnungu. Njilugulilwa kuti mundu ashikwaatola bhakongwe bha ainagwe! 2 Na mmanganya nnakwiipunanga, mbaya nkainjikenje niikumminga munkumbi gwenunji atendile yenyoyo. 3 Nkali nili kwataliya na mmanganya, ntima gwangu puguli pamo na mmanganya, mbuti namwene nili popo, bhai ninng'ukumwile kwa mashili ga lina a Yesu atendile yangali ya mmbonejo. 4 Malanga gunkuimananga pamo kwa lina lya Bhakulungwa a Yesu, na ntima gwangu puukubha na mmanganyanji, bhai, kwa mashili ga Bhakulungwa bhetu a Yesu, 5 munshoyanje kwene mundu na munkamuyanji kuka Lishetani, nkupinga shiilu shakwe sha liebho shiangabhanywe na nnyene atapulwe lyubha lishibhaishe Bhakulungwa. 6 Kwiipuna kwenunji kukapwaa! Bhuli, nkakwiimanyanga kuti ngedule jishoko jinaumuya lidonji lyowe lya utandi? Na yalakwe yambi pwikujenela nneyo peyo. 7 Mwitakayanje, nkajaanje ngedule yani yambi ya bhukala ila, nkupinga mmanganje mwangalinginji yambi, pabha a Kilishitu bhali Pashaka jetu bhashishoywa kubha mbepei. 8 Bhai, tulye Pashaka jetu jangali ngedule ja bhukala yani indu yangali ya mmbone na ya nyata, ikabhe kwa nkate gwangataga ngedule, yani kwa indu ya mmbone na ya kweli. 9 Nannjandishilenje mmaluwa jangu kuti nnakundikananje na bhandunji bha labhalabha. 10 Ngabheleketi kuti nnakundikananje na bha labhalabha na bha shienga na bha unami na bha kulupalilanga yanamu. Pabha nkupinga kwaabhutukanga bhowebho, nkapinjikwenje kushoka pa shilambolyo pano. 11 Shinannjandishilenje ni kuti, nnakundikananje naka mundu akwiishema Nkilishitu, alabhalabha na akwete shienga, na akwiitindibhalila yanamu, na atukana bhandu, na akolelwa ukana na apokonyola indu. Na kupunda penepo, nnakundanje nkali kutama nilyanajo shalya mundu jwa nneyo. 12 Bhai, nngabha gangu nne kumaliya malobhe ga bhandu bhalinginji nngabha Bhakilishitu. Pabha

a Nnungu shibhamaliye. Nnube mmanganya nkapinjikwanga kumaliya malobhe ga bhalinginji munkumbi gwenunji? 13 Ikabheje bhalinginji nngabha Bhakilishitubho a Nnungu shibhaukumule, mmanganya mummanganje munkumbi gwenunji, jwangali jwa mmbonejo!

6 Akombola bhuli mundu munkumbi gwenunji kunngula Nkilishitu nnjakwe kubhaukumula bhakakwaamanyanga a Nnungu, nileka kwenda kubhandunji bha ukonjelo? 2 Bhuli, nkakumumanyanga kuti bhandunji bha ukonjelo shibhaukumulanje malobhe pa shilambolyo? Bhai, ibhaga malobhe ga pa shilambolyo shigaukumulwe na mmanganya, pakuti nkaukumulanga nkali malobhe gamashoko? 3 Bhuli, nkakumumanyanga kuti tupinga kwaukumulanga ashimalaika na nngabha ga ukumula malobhe ga pa shilambolyo? 4 Pukupwatanga ga indu ya mobha gowe, bhuli, nnakwaashemanga bhandu bhakakwaamanyanga a Nnungu kubhammalishiyanje malobhe? 5 Mmanganya nkolanje oni! Nkupinga lugulanga kuti jwakwa munkumbi gwenunji akwete lunda lwa maliya malobhe genunji? 6 Ikabhe nnapelekananga mwaashayenenji, ku bhalmaliya malobhe bhakakwaakulupalilanga a Nnungu. 7 Kwa kweli kwene lugulanangako, kunalanguya kuti mmitima jenunji nnepelenje! Nngabha mbaya kwiipililila kutendelwa yangali ya mmbone? Nngabha mbaya kupokonyolwa indu yenunji yowe? 8 Ikabheje mmanganya ni nkupokonyolanga, na mbera genego nigunkwaatendelanga nkali ashaalongo ajenunji! 9 Eu bhuli, nkakumumanyanga kuti bhandu bhagalinginji bha mmbone bhakalishinji Upalume gwa a Nnungu? Nnaitembanje! Bhandu bhaalabhalabhanga na bhaatindibhalilanga yanamu na bhanabhalume mashoga na bhaagonana ashaayenenji kwa ashaayenenji, yani bhanabhalume kwa bhanabhalume, na bhanabhakongwe kwa bhanabhakongwe, 10 bhagwii na bha shienga na bha kolelwanga na bha lung'wenyi na bha pokonyolanga indu, bhene bhowebho bhakajinjilanga mu Upalume gwa a Nnungu. 11 Bhananji pumwalinginji nneyo peyo, ikabheje nnaino nshitakaywanga nikola aki kwa Nnungu, nkulundana na Bhakulungwa a Yesu Kilishitu naka Mbumu jwa a Nnungu bhetu. 12 Mundu munkumbi gwenunji shaabheleketi, "Kwangu nne indu yowe alali." Elo, ikabheje nngabha yowe ipwaa. Indu yowe inapwaa ikabheje ngapinga shindu shoshowe shindagwale. 13 Buna akuti, "Shalya kwa lipitiu na lipitiu kwa shalya." Elo, ikabheje a Nnungu shibhaiangabhanye yowe inabhili. Shiilu shika mundu nngabha sha tendela ya labhalabha, ikabhe sha kwaakumulila maengo Bhakulungwa, na Bhakulungwa ni bhayene shene shiilusho. 14 Bhai, a Nnungu bhaayushiye Bhakulungwa bhakaweje, shibhatuyuye na uwe kwa mashili gabho. 15 Bhuli, nkakumumanyanga kuti, iilu yenunji ni ibhalo ya shiilu sha a Kilishitu? Bhuli, punkuganishiyanga ngunakombola tola ibhalo ya shiilu sha a Kilishitu, nilundanya na shiilu shika lijajana? Ng'oo! 16 Pabha, malinga shinkumumanyanga, kuti alundana naka lijajana anabha shiilu shimo naka jwenejo? Pabha ishijandikwa, "Bhowe bhanaabhili shibhabhanganje shiilu shimo." 17 Ikabheje alundene na Bhakulungwa anabha ntima gumo na bhenebho. 18 Mwiepuyanje na labhalabha. Yambi ina yowe mundu anatenda

palanga shiilu, ikabheje alabhalabha jula anatenda shambi nshiilu shakwe nnyene **19** Bhuli, nkakwimanyanga kuti ilu yenunji liekalu lika Mbumu jwa Ukonjelo atama mmunda jenunji, jumpegwilwenje na a Nnungu? Bhai, iiluyo nngabha yenunji. **20** Pabha nshiumwanga kwa bhei jikulungwa, kwa nneyo iilu yenunji yaakuye a Nnungu.

7 Bhai, nnaino kwa gene gunnyandishilenje gala, mbaya mundu anaganishiye ga gona na jwankongwe. **2** Ikabheje kwa ligongo lya kwiepuya na labhalabha, bhai, kila jwannume akole nkagwe, na kila jwankongwe akole mmbujegwe. **3** Jwannume antendele nkagwe malinga shiikupinjikwa, naka jwankongwe nneyo peyo, antendele mmbujegwe malinga shiikupinjikwa. **4** Jwankongwe jwangali lilibhe kwa shiilu shakwe, ikabhe ambujegwe, nneyo peyo jwannume jwangali lilibhe kwa shiilu shakwe, ikabhe akagwe. **5** Nnannjime nnjenu shili shakwe, ikabhe ntendanje nneyo kwa patana kwa malanga gashoko, nkupinga mpatanje malanga ga kwaajuga a Nnungu. Kungai nkatamangananje pamo kabhili, nkupinga Lishetani ananninganje kwa ligongo lya ungakola mashili gwenunji. **6** Ngunabheleketa gegano nng'agulanje mwaashayene, nngabha amuli. **7** Punapingaga bhandu bhowe bhahanganje malinga nne, ikabheje kila mundu ashikola shapegwilwe kopoka kwa a Nnungu, juna ashi na juna ashila. **8** Bhai, bhakanabhe lombanga bhala na bhashitenga, mbaya bhatamangananje gwangali kulomba malinga nne. **9** Nkali nneyo, ibhaga mundu akakombole kwiipililila, bhai alombe, pabha mbaya lombaa nngabha ga lokolila kwa punda. **10** Bhalombilenje bhala ngunakwaapanganja amuli, ikabheje nngabha nne, ikabhe Bhakulungwa, jwankongwe analekane naka mbujegwe, **11** ikabheje alekanaga, bhai, analombwe eu aelewane na ambujegwe. Na jwannume anampe talaka nkagwe. **12** Kubhananji bhala, nne, nngabha Bhakulungwa, nguti nnei, ibhaga apali jwannume nkilishitu, akwete jwankongwe akanabhe kulupalila, na jwalakwe jwankongwejo akundile tama nabho, anaaleshe. **13** Na jwankongwe Nkilishitu akwete jwannume akanabhe kulupalila, na jwannumejo akundile tama nabho, anaaleshe ambujegwe. **14** Pabha jwannume jwangakulupalila jula anaposhelwa na a Nnungu kwa lundana kwakwe naka nkagwe, nneyo peyo kuka jwankongwe. Ikanabhe nneyo, ashibhana bhenunji bhakanatakwanje, ikabheje nnaino paalinginji bha ukonjelo. **15** Nkali nneyo, ibhaga akaakulupalila jula anapinga kunneka nnjakwe ali Nkilishitu, bhai anneshe. Penepo Nkilishitu jwannume eu jwankongwe akatabhwa. Pabha a Nnungu bhashikunshemanga mmanganya ntamangananje kwa ulele. **16** Igala nkumunya bhuli, mmwe mmandonya Mmakilishitu ibhaga shumwaatapule ambuje bhenu kwa punda kutama nabho? Eu mmwe mmashileu, nkumunya bhuli, ibhaga shumwaatapule akongo bhenu kwa punda kutama nabho? **17** Ikabheje kila mundu atame malinga shapanjilwe na Bhakulungwa na shashemilwe na a Nnungu. Ngunalajila gegano ku makanisha gowe. **18** Ibhaga mundu ashemilwe ali ajalwishe, bhai, anaitembe kuti jwangajaluka, ibhaga ashemilwe jwangajaluka, bhai, anajalushe. **19** Pabha, kujaluka na gwangajaluka nngabha shindu, ikabhe shili sha mmbone kukunda amuli ya a Nnungu. **20** Bhai, kila mundu atame malinga shaaliji akanabhe shemwa

na a Nnungu. **21** Bhuli, mmwe pumwashemilwe nni bhatumwa? Elo, inampoteshe, ikabheje mpataga shikono sha pata ungwana, nnakane. **22** Pabha jwene ashemilwe na Bhakulungwa ali ntumwa, jwenejo anabha nngwana ku Bhakulungwa. Nneyo peyo ashemilwe ali nngwana, anabha ntumwa jwa a Kilishitu. **23** Mmowe nshiumwanga kwa bhei jikulungwa, kwa nneyo nnabhanganje bhatumwa bhaka mundu. **24** Ashaalongo ajangu, kila mundu atame na a Nnungu malinga shaaliji malanga gashemilwe. **25** Ga bhanabhakongwe bhangelombwanga, nangali amuli ja kopoka ku Bhakulungwa, ikabheje nne shinjeye miungu kwa nema ja kulupalikwa jibhambele Bhakulungwa. **26** Shingushibhona nne, kwa shilaje shitemi nnaino, mbaya mundu atame malinga shali. **27** Ibhaga nnombile, bhai, nnapinje lekana na akongo bhenu. Ibhaga mwangalomba, bhai, nnapinje lombaa. **28** Ikabheje nnombaga nkatenda shambi, najwalakwe jwankongwe nneyo peyo, alombwaga akaatenda shambi. Bhalombene shibhapanje shilaje pa shilambolyo pano, ikabheje nne pungupinga, mmanganyanji ganampatanje genego. **29** Bhakilishitu ajangunji, shingupinga bheleketa ni kuti, mobha galepeshe gashokope. Kwa nneyo, kutandubhila nnaino bhalombilenje bhala, bhanaibhushilanje ga ilombani yabhonji. **30** Bhaagutanga bhala, bhahanganje mbuti bhakagutanga, na bhaangalalanga bhala, bhahanganje mbuti bhakaangalalanga, na bhaumanga bhala, bhahanganje mbuti bhagalanginji shindu, **31** na bhakwetenje indu ya tenda ya pashilambolyo bhala, bhahanganje mbuti bhagalanginji sha tenda. Pabha shilambolyo shino, shinapita. **32** Pungupinga mmanganyanji nnakolanje lipamba. Mundu jwangalomba anakamula liengo lya Bhakulungwa, nkwaanonyeya Bhakulungwa. **33** Ikabheje alombile jula, anakamula liengo aliabhushila ya pa shilambolyo, nkupinga abhanonyeye akagwe, **34** jwalakwe anaabhushila indu ibhili. Jwankongwe nshitenga eu mwali, anakamula indu ya Bhakulungwa nkupinga abhe jwa ukonjelo. Ikabheje alombilwe jula, anaabhushila ya pa shilambolyo nkupinga kwaanonyeya ambujegwe. **35** Ngunabheleketa gegano gampwaanje mmanganyanji, wala nngabha kung'ibhililanga. Pungupinga ntamangananje ukoto, nkwaakamulila maengo Bhakulungwa, kwa ntima gumo na ng'anyiyo imo. **36** Ibhaga mundu jwa shileu abhonja kuti akakutendela ukoto mumtemela mwine, na shilokoli shimpundaga, atende malinga shaapinga bhatolane, penepo akaatenda shambi. **37** Ikabheje jwannume aengwaga muntima gwakwe nngalomba, na akombolaga kwiipililila ilokoli yakwe, bhai, akannombe mwaliyo shambonepe. **38** Kwa nneyo akunnomba mwaliyo anatenda ukoto, na jwalakwe akana lombaa anapunda tenda ukoto. **39** Jwankongwe alombilwe, ashitabhwa na shalia kwa mobha gowe ambujegwe bhali bhakoto. Ikabheje ambujegwe bhawaga, akatabhwa na shalia, apingaga kulombwa kabhili, alombwe naka jojowe jwakumpinga, ikabheje ibhe Shikilishitu. **40** Ikabheje pungubhona nne, mbaya atame malinga shaaliji. Genego malobhe gangu, na nne punguganishiya kuti, ngwete Mbumu jwa a Nnungu.

8 Kwa nneyo, ga yalya ishoshiywe mbepei ku yanamu, tumumanyi kuti uwe tubhowe tushikola lumanyio, ikabheje lumanyio lunatenda bhandu bhapunanje, ikabhe kupingana

kunakwaatanga bhandu ntima. 2 Aganishiya kuti anakushimanya shindu, kwa kweli akakushimanya shoshowe malinga shaapinjikwa kumanya. 3 Ikabheje mundu akwaapinga a Nnungu, a Nnungu bhammanyi jwene mundujo. 4 Kwa nneyo ga yalya ishoshiywe mbepei ku yanamu, tumumanyi kuti shanamu nngabha a Nnungu bha kweli, ikabheje a Nnungu bha kweli ni bhamope. 5 Nkali monaga ipali ishemwa ashinnungu, pa shilambolyo eu kunnungu, na malinga shibhalinginji ashinnungu na bhakulungwanji bhahagwinji, 6 ikabheje kwetu uwe, bhapali a Nnungu bhamope, Atati, bhapengenyende indu yowe na kwa mashili ga bhenebho uwe tunalama. Tunakulupalila kuti bhapali Bhakulungwa bhamope a Yesu Kilishitu pitila bhenebho a nnungu gubhapengenyende indu yowe, ni bhakutupa gumi. 7 Ikabheje nngabha kila mundu anakwimanya yenei. Pabha bhapalinji bhananji bhayobhelelenje yanamu, mpaka nnaino pubhalyanganga yene yalyayo pubhaganishiyanga kuti ishishoywa mbepei ku yanamu. Pabha bhangashimilikanga mmitima jabhonji, pubhakwibhonanga bhanalebhanga. 8 Ikabheje shalya shikakutubhika tome na a Nnungu. Tukalye shakwa shityutubhila, na tulyaga shakwa shityujenjeshewa. 9 Ikabheje mwiteiganje, aki jenunji jinaatendanje bhangashimilikanga nngulupai bhatendanje yambi. 10 Pabha, mundu akanabhe shimilika nngulupai, ammonaga mmwe nkwele lumanyio nniya yene yalyayo nniekalu lya yanamu, bhuli, akatagwa ntima gwa lya indu ishoshiywe mbepei ku yanamu? 11 Kwa nneyo, nnongo njenu jwangashimilika nngulupaijo jubhannng'wilile a Kilishitu, shaabhe kwa ligongo lya lumanyio lwenu. 12 Mwaaalebhelangaga ashaalongo ajenunji nikwaulayanganga mmitima jabhonji, penepo nnakwaaalebhelanga a Kilishitu. 13 Kwa nneyo, ibhaga shalya shinabha shiumilo sha kuntenda nnongo njangu atende shambi, bhai ngalya nnyama kabhili, nkupinga ngunannebhiye nnongo njangu. (aiōn 9:165)

9 Bhuli, nne nngabha nanngwana? Bhuli, nne nngabha ntume? Bhuli, nne nangaabhona a Yesu Bhakulungwa bhetu? Bhuli, mmanganya kulundana kwenunji na Bhakulungwa nngabha kwa ligongo lya liengo lyangu? 2 Ibhaga nne nngabha ntume kubhandunji bhana, ikabheje kwenu mmanganya nne ntume. Mmanganya ni ukong'ondelo gwa utume gwangu nkulundana kwenunji na a Kilishitu. 3 Kwa bhene bhannugulanga bhala shingwiibheleketela ni nnei. 4 Bhuli, twangali aki ja pegwa shalya na ya papila kwa liengo lyetu? 5 Bhuli, twangali aki ja longana naka jwankongwe Nkilishitu, malinga shibhatendanga mitume bhana, ashaalongo ajabhonji Bhakulungwa na nkali a Kepa? 6 Eu bhuli, nne na a Bhanabha ni tupingwa kamula liengo nkwiilolesheya indu yetu? 7 Bhuli, linjola gani akwiilipila nnyene nniengo lyakwe? Gani apanda mishabhihu analye iepo yakwe? Gani ashunga likundi anapapile mabhele ga likundi lyakwe? 8 Bhuli, ngunabheleketeta genega shigundupe? Bhuli, najalakwe shalia jikalugula nneyo peyo? 9 Ishijandikwa nshalia ja a Musha, "Nnantabhe kang'wa ng'ombe alikubhata yalya." Bhuli, penepo a Nnungu gubhabheleketeta ga ng'ombe? 10 Bhuli, a Nnungu bhakatuganishiyaga uwe pubhabeleketete nneyo? Elo, genega gashinkujandikwa kwa ligongo lyetu, pabha alima, na auna jula, bhowe bhakwetenje aki ja pata upambi gwa mauno. 11 Monaga uwe tupandile mmeju ja muntima

munkumbi gwenunji, bhuli, ikabha sha mmbone uwe tupataga indu ya pashilambolyo kopoka kwenu mmanganyanji? 12 Ibhaga ashimitume bhananji bhakwetenje aki ja jangutilwa na mmanganyanji, bhuli, uwe twangali aki kupunda bhanganyabho? Ikabheje uwe tushinkujileka jene akijo, ikabhe twashinkwiipiliila nkupinga tunajibhishile shigwegwe shoshowe Ngani ja Mmbone ja a Kilishitu. 13 Mmanganya mmumanyinji kuti, bhaakumulanga liengo nniekalu bhanapatanga yalya nniekalu, na bhatendanga liengo lya bhishila mbepei pa shitala, bhanapatanga lipungu lya mbepeiyo. 14 Nneyo peyo Bhakulungwa bhashiamulisha kuti, bhaalunguanga Ngani ja Mmbone bhapatanje ya lamila Ngani ja Mmbonemo. 15 Ikabheje, nne nangalona yene akiyo wala jimo. Na wala ngajandika gegano nkupinga mbate yene akiyo, pabha kwangu nne, mbaya niwile ikabheje nngabha mundu amone kuti ngunakwiiniya payoyo. 16 Ibhaga ngulunguya Ngani ja Mmbone, lyenelyo nngabha lya kwiipunila, pabha njipegwa amuli. Numbe ole gwangu, monaga ngalunguye Ngani ja Mmbone! 17 Ibhaga ngakamwile lyene liengoli kwa engwa kwangu, bhai ngalolele kulipwa, ikabheje ngaakamula kwa engwa kwangu, ikabhe ngunapinjikwa kukamula lyene liengoli. 18 Bhai nshaala gwangu nndi? Nshaala gwangu ni nema ja lunguya Ngani ja Mmbone, gwangali kulonga aki yangu ya nkulunguya. 19 Kwa nneyo, nkali nne niili nngabha nantumwa juka mundu jojowe, njikwiitenda nantumwa juka kila mundu, nkupinga naapatanje bhandu bhahagwinji. 20 Ku Bhayaudi nashinkutama mbuti Nanyaudi, nkupinga naapatanje Bhayaudi. Nguti, ku bhandu bha shalia, nashinkwiitenda mbuti mundu jwa shalia, nkali niili nngabha mundu jwa shalia, nkupinga naapatanje bhandu bha shalia. 21 Kubhalinginji na shalia, nashinkutama mbuti nangali shalia, nkupinga naapatanje bhangalinginji na shalia. Nngabha kuti nangali shalia ja a Nnungu, ikabhe ngwete shalia ja a Kilishitu. 22 Ku bhangalinginji mashili nngulupai, nashinkwiitenda mbuti nangali mashili, nkupinga naapatanje bhangalinginji mashilibho. Nashinkwiitenda kila shindu kubhowe, nkupinga kila mushiibhele, naatapulanje bhananji, munkumbi gwabhonji. 23 Ngunatenda yowe ga ligongo lya Ngani ja Mmbone, nkupinga mbate mboka yakwe. 24 Bhuli, nkakumumanyanga kuti pa lubhanja lwa ing'ando, bhowe bhanabhutukanga lubhilo, ikabheje apata upo jumope? Mmutukanje nneyo nkupinga mpatanje upo. 25 Na kila abhutuka lubhilo, anakwiobhelesheya nileka yowe, bhanatendanga nneyo nkupinga bhapatanje shilemba shiangabhanika, ikabhe uwe tupate shilemba shangaangabhanika. 26 Nneyo peyo numbe nne ngunabhutuka lubhilo, nkupinga ngombole, ngunakoma ubha nngabha mbuti akoma ubha pangali shindu. 27 Ikabhe ngunakushiohbelesheya shiilu shangu ya ukomu, inabhe naalungushiyanganga bhananji, namwene nikanwa.

10 Bhakilishitu ajangunji, ngunapinga mmumanyanje kuti, ashaambuje bhashinkuunishilwanga na liunde, bhowe gubhajokwenje bhaali Janashe jila mwamujumu. 2 Bhowe gubhabhatishwenje bhahanganje bha a Musha nniunde na mmashi mula 3 Bhowenji gubhalilenje shalya sha mmbumu, 4 nneyo peyo gubhang'welenje mashi gubhagegwilwenje na a Nnungu, kopoka nniganga likulu lyaakagwilenje lila,

na lyene liganga likulu lila, ni a Kilishitu bhayene. 5 Nkali nneyo, bhahagwinji bhangaanonyeyanga a Nnungu, nigubhawilenje nng'anga mula. 6 Bhai, gene gowego pugaliji mbuti shilanda kwetu uwe, nkutuleya tunalokolile ya nyata malinga shibhalokolilenje bhangananyabho. 7 Nnaitindibhalilanje yanamu malinga shibhatendilenje bhananji, malinga shigalugula Majandiko, "Bhandunji gubhatemingenenje nkulya na ng'wa, kungai gubhajimingenenje niina." 8 Wala tunalabhalabhe malinga shibhatendilenje bhananjibho, gubhawilenje lyubha limo bhandunji elupu ishilini na itatu. 9 Wala tunaalinje Kilishitu malinga shibhaalinjilenje bhananji, gubhabhulegwenje na majoka. 10 Wala nnainginikanje malinga shibhatendilenje bhananji, gubhabhulegwenje naka malaika jwa shonanga! 11 Bhai, gene gaakoposhelenje bhangananyabho ni shilanda ku bhananji, na yashinkujandikwa nkupinga kutuleya uwe tuli kumpelo gwa mobha. (aiōn q165) 12 Kwa nneyo, akwiiganishiya kuti ashijima ukoto, aiteije anagwe. 13 Yowe inkulingwanga ni ibhalingwangaga bhandu mobha gowe. A Nnungu ni bhaakulupaika, na bhalabho bhakannekanga nningwanje punda mashili genunji, ikabhe pamo na lingwako, shibhampanganje mashili ga kwipililila na nngango gwa koposhela. 14 Kwa nneyo, ashaalongo ajangunji, mwiepuyanje na kutindibhalila yanamu. 15 Ngunabheleketa na mmanganya, mmandunji nkwetenje lunda, nnolanje mwaashayene ingubheleketa ino. 16 Bhuli, putukwaatendela eja a Nnungu ga shikombe sha mboka, tukalundanywa na minyai ja a Kilishitu? Na putugabhana nkate gula tukalundanywa na shiilu sha a Kilishitu? 17 Pabha nkatego ni gumo, nkali uwe tushulwisheyo ni shiilu shimo, pabha tubhowe tunagabhana nkate gumo. 18 Mwaaganishiyanje Ishilaeli bhaalyanganga pa shitala bhala, bhanalundana na a Nnungu kwa shitala shila. 19 Bhai, melekete nndi? Kuti shalya shishoshiwe mbepei ku yanamu, ni shammbone kupunda shalya shina? Na yanamuyo bhuli, ni shindu shammbone? 20 Ng'oo, ikabheje indu ibhashoyanga mbepei bhanakwishoyanga kwa maoka, nngabha kwa a Nnungu. Numbe nne ngapinga mmanganya nnkundikanywanje na mashetani. 21 Nkang'welanga shikombe sha Bhakulungwa na popo pepo ning'wela shikombe sha maoka, na nkalyanganga shalya sha Bhakulungwa popo pepo nilya shalya sha maoka. 22 Eu bhuli, tukakwaatenda Bhakulungwa bhahbe na lupimililo? Punkuganishiyanga tushikola mashili kwaapunda bhenebho? 23 Indu yowe alali, ikabheje nngabha yowe ya mmbone. Indu yowe alali, ikabheje nngabha yowe ipwaa. 24 Mundu analoleye pwaida jakwe nnyene, ikabhe ja ashaajakwenji. 25 Nnianganje yowe iushwa kumbwani gwangali bhuya, kwa ligongo lya ng'aniyo, 26 pabha Majandiko gakuti, "Shilambolyo na yowe ipali, ni yabho a Nnungu." 27 Monaga anshemalangaga shalya mundu akaakulupaika na mmanganya nkshidilenje kwenda, nnianganje indu yowe ishibhampanganje gwangali bhuya, kwa ligongo lya ng'aniyo. 28 Ikabheje mundu annugulilangaga, "Shene shalyashi shishishoywa mbepei ku yanamu," nnalyanganje, kwa ligongo lya bhene bhannugulilenje na kwa ligongo lya ng'aniyo. 29 Ngunabheleketa ga ng'aniyo ya muntima, nngabha yenunji, ikabhe kwa ligongo lya bhannugulilenje bhala. Kwa nndi ng'aniyo yangu ya muntima iukumulwe kwa ng'aniyo ya muntima ika mundu juna? 30 lbhaga

nne ngunalya shalyasho akuno nilikwaatendela eja a Nnungu, kwa nndi mundu ang'ambe kwa ligongo lya shalya shinaatendele eja a Nnungu? 31 Bhai, shoshowe shinkulyanganga, eu kung'wa, eu shoshowe shinkutendanga, ntendanje kwa ukonjelo gwa a Nnungu. 32 Nnaalebhyanje Bhayaudi eu Bhagiliki wala likanisha lya a Nnungu. 33 Malinga nne shinguti kwaanonyeyanga bhandu bhowe nng'indu yowe, gwangali loleya pwaida jangu namwene, ikabhe nkupinga bhananji bhatapulwanje.

11 Nngaguyanje, malinga shingwaakaguya nne a Kilishitu. 2 Ngunakung'iniyanga pabha nngangumbushilanga nng'indu yowe, na nnakumulanga majiganyo gunimpelenje gala. 3 Ikabheje ngunapinga mmumanyanje kuti, a Kilishitu bhashikola mashili kwa kila jwannume, na jwannume ashikola mashili kuka jwankongwe, na a Nnungu bhashikola mashili kwa a Kilishitu 4 Bhai, kila jwannume pa juga Nnungu, eu pa lunguya ntenga gwa a Nnungu, akuno aunishile ntwe gwakwe, anakwaanyegaya a Kilishitu. 5 Ikabhe kila jwankongwe pa juga Nnungu eu pa lunguya ntenga gwa a Nnungu gwangali unishila ntwe gwakwe, anakwaanyegaya ambujegwe, anabha malinga jwankongwe amojile umbo yakwe. 6 Jwankongwe akaunishile ntwe gwakwe, mbaya amoje umbo yakwe. Ikabheje oni kuka jwankongwe kumoga umbo yakwe, bhai, mbaya aunishile ntwe gwakwe. 7 Ikapwaa jwannume kuunishila ntwe gwakwe pa juga Nnungu, pabha jwannume ashibha shilangulo na ukonjelo gwa a Nnungu, ikabheje jwankongwe ashibha shilangulo sha ukonjelo guka mmbujegwe. 8 Pabha jwannume jwangapanganywa kopoka kuka jwankongwe, ikabhe jwankongwe apengenywe, kopoka kuka jwannume. 9 Jwannume jwangapanganywa kwa ligongo lika jwankongwe, ikabhe jwankongwe ashipanganywa kwa ligongo lika jwannume. 10 Kwa lyene ligongolyo jwankongwe anapinjikwa aunishile ntwe gwakwe, ibhe shilangulo sha mashili ga ambujegwe na ashimalaika. 11 Nkali nneyo, kwa a Nnungu jwankongwe gwangali jwa shileu nngabha shindu, nneyo peyo jwannume gwangali jwankongwe nngabha shindu. 12 Pabha malinga jwankongwe shapengenywe kopoka kuka jwannume shila, nneyo peyo jwannume anabhelekwa naka jwankongwe, ikabheje indu yowe kuikopoka kwa a Nnungu. 13 Nng'ukumulanje mwaashayenenji. Bhuli, ilikonja jwankongwe kwaajuga a Nnungu gwangali unishila ntwe gwakwe? 14 Bhuli shashite bhelekwa jwannume, ikalanguya kuti jwannume alangaga umbo anakwiitokomaya? 15 Ikabheje jwankongwe akolaga umbo yaigwinji inakumya uknjejo. Pabha ashipegwa umbo yaigwinji inng'unishile. 16 Ikabheje monaga apali mundu apinga kola mitau ga lyeneli, bhai amumanye kuti uwe twangali nkubho guna, wala makanisha ga a Nnungu gangali nkubho guna. 17 Pungunnajilanga gene malajilo gano, ngakunnumbililanga wala kashoko, pabha maimano genunji gangali pwaida. 18 Pabha ngunapilikana kuti punkuimananga nnikanisha ganapagwa malekano, numbe nne genego pungubhona pana ni ga kweli, 19 pabha inapinjikwa gapagwe malekano munkumbi gwenunji, nkupinga bhamanyikanje bhalinginji bha a Nnungu. 20 Kweli nnaimananga, ikabheje nngabha kwa ligongo lya shalya sha Bhakulungwa! 21 Pabha punkulyanganga kila mundu anapinga alongolele kulya shalya shakwe, kwa nneyo juna ali na shibhanga, juna akolelwe. 22 Bhuli, mwangalinginji

nyumba yenunji ya lila na ng'wela? Eu nnakulinyegayanga likanisha Iya a Nnungu na kwaatokomayanga bhanganjini na shindubho? Ninnugulilanje nndi? Ninnumbililanje? Ng'oo! Ngannumbililanga kwa genego. 23 Pabha nne nashinkuposhela kopoka ku Bhakulungwa malajilo gunammalanjenje kuti, shilo shibhatendebehwishwe bhakulungwa a Yesu, bhashinkutola nkate, 24 bhakatendeje eja kwa a Nnungu gubhagabhile, nigubhashite, "Sheshino shiilu shangu shishoywa kwa ligongo lyenunji ntendanje nnei nkungumbushila nne." 25 Nneyo peyo bhakalyeje gubhatolile shikombe gubhashite, "Shene shikombe shino ni malagano ga ambi na a Nnungu gakong'ondelwa kwa minyai jangu, nntendanje nnei kila pushimpapilanje, nkungumbushila nne." 26 Pabha kila punkulyanganga gwene nkate guno, na ng'wa shene shikombe shino, nnalunguyanga kuwa kwa Bhakulungwa mpaka pushibhaishe. 27 Kwa nneyo kila alya shalya eu papila shikombe sha Bhakulungwa mwiikaapinjikwa nikwaatokomaya, shaalebhe kwa ligongo Iya shiilu na minyai ja Bhakulungwa. 28 Ikabheje kila mundu atandubhe kwiibhuya nnyene, kungai alyeje nkate na apapile shikombesho. 29 Pabha, alya na papila gwangali kugamanya malombolelo ga shiilu sha Bhakulungwa, anakwiukumula nnyene kwa Iya na papila. 30 Kwa Iyene ligongolyo, bhahagwinji munkumbi gwenunji bhakaang'andanga, na bhalwelenji, na bhana bhawilenje. 31 Monaga tukaiganishiye twaashayene, tukanaukumulwe. 32 Ikabhe putuukumulwa na Bhakulungwa, tunajiganywa kwiitimalika, nkupinga tunaukumulwe mboteko pamo na bhandu bha pa shilambolyo. 33 Kwa nneyo, ashaalongo ajangu, punkuimananga nkupinga kulya shalya sha Bhakulungwa, nnindananje. 34 Mundu akolaga shibhanga alye kunngwakwe, kuimana kwenunji kunaukumulwe. Gana galepeshego, shinyie kummalanjilanga pushing'ishe.

12 Ashaalongo ajangu, ga kalama kopoka kuka Mbumu jwa Ukonjelo, ngunapinga mmumanyanje ukoto. 2 Mmumanyinji kuti, nkanabhe tapulwanga mwashinkupuganywanga, nikwiikaguya yanamu ikabheleketa. 3 Bhai ngunakummalanjilanga kuti, mundu jowowe alongoywa naka Mbumu jwa Ukonjelo akakombola bheleketa, "A Yesu bhashiloshwa," nkali bheleketa "A Yesu ni Bhakulungwa," ikabhe kwa Mbumu jwa Ukonjelo. 4 Bhai ishikipagwa kalama ya namuna yaigwinji, ikabheje ashoya ni Mbumu jumope jula. 5 Na kabhili gapali maengo gamagwinji ga tenda, ikabheje Bhakulungwa bhamope bhala. 6 Numbe ishikipagwa namuna yaigwinji ya kamula maengo, ikabheje a Nnungu ni bhamope, bhaatenda maengo gowe ku bhandu bhowe. 7 Ikabheje kila mundu anapegwa nng'ibhulu naka Mbumu kwa pwaida ja bhowe. 8 Pabha mundu jumo anapegwa lilobhe Iya lunda, na juna lumanyio, malinga shaapinga Mbumujo. 9 Mbumu jojo anakumpa juna ngulupai, na juna kalama ya lamy. 10 Juna anapegwa mashili ga itendi ya ilapo, na juna kalama ja londola, na juna anakombola kuapulanya kalama ika Mbumu na ili nngabha Ika Mbumu, na juna bheleketa ibheleketo ya ambi, na juna kulombola ibheleketo ya ambiyo. 11 Gowego maengo gaka Mbumu jumo pejo, akumpa kila mundu kalama ilekanila malinga shaapinga nnyene. 12 Malinga pushili shiilu shimo

shishikola ibhalo yaigwinji, nkali ibhalo ishulwisheyo shiilu ni shimo, nneyo peyo shibhali a Kilishitu. 13 Pabha uwe tubhaga Bhayaudi eu Bhagiliki eu bhatumwa eu bhanguwana, tubhowe tushibhatishwa naka Mbumu jumo pejo, nkupinga tubhe shiilu shimo, na tubhowe tushipegwa Mbumu jumo pejo. 14 Bhai, shiilu shangali shibhalo shimo, ikabhe ibhalo yaigwinji. 15 Monaga lukongono lubheleketa, "Pabha nne nngabha nkono, bhai nne nngabha jwa shiilu," Bhuli! Kwa Iyene ligongolyo ngulukanabhe Iwa shiilu? Ng'oo! 16 Monaga likutu likabhelekete, "Pabha nne nngabha Iyo, nne nngabha jwa shiilu," bhuli, kwa bheleketa nneyo, ngulukanabhe Iya shiilu? Ng'oo! 17 Monaga shiilu showe shikaliji Iyo, kukapali kupilikana? Monaga shiilu showe shikaliji likutu, tukanushiye shanabhuli? 18 Ikabheje, a Nnungu bhashikwiibhika nshiilu ibhalo ya lekanila malinga shibhapanjile. 19 Monaga yowe ikaliji shibhalo shimo, shiilu shikapali kwai? 20 Bhai nnaino shiilu ni shimo, ikabheje ibhalo yaigwinji. 21 Bhai, Iyo likaulugulila nkono "Ngakuupinga ugwe," wala ntwewe ukagugalugulila makongono "Ngakumpinganga mmanganya." 22 Nkali nneyo, inabhoneka kuti, ibhalo ya shiilu iganishiya yangali ya mmbone, mbena ni ya mmbone kaje. 23 Na ibhalo ya shiilu ituganishiya yangali ishima Ila, ni itukwigoya kwa kaje, ibhalo ya shiilu ikabhonekana kuti ya mmbone, inagoywa kwa kaje, 24 pabha ibhalo yetu ina Ili ya mmbone ikagoywa kwa kaje. A Nnungu bhayene, bhashikushilundanya shiilu ukoto na kushikuya shibhalo shangali sha mmbone shila, 25 nkupinga ganapagwe malekano nshiilu, ikabhe ibhalo yowe ikulupalilane. 26 Monaga shibhalo shimo shiulalaga, ibhalo yowe shiipotekwe. Shihalo shimo shikuywaga ibhalo yowe shianganalale. 27 Bhai, mmanganya mmowe shiilu shimo sha a Kilishitu, kila jumo jwenunji ni shibhalo sha shiilusho. 28 A Nnungu bhashibhika nnikanisha, bhantai mitume, bhabhili, ashinkulondola bha a Nnungu, bhatatu, bhaajiganya na bhananji, bha tenda ilapo na bha bhalamyanga bhalwelenji na bhana bhajangutilanga, na bhana ashikalongolele na bhana bha bheleketa shibheleketo shijeni. 29 Bhuli bhowe ashimitume? Bhowe ashinkulondola bha a Nnungu? Bhowe bhaajiganya? Bhowe bhaatendanga ilapo? 30 Bhuli bhowe bhaalamyanga? Bhuli, bhowe bhahleketa shibheleketo shijeni? Bhuli, bhowe bhalombolanga shibheleketo shijeni? 31 Bhai nkolanje shilokoli sha kola kalama ya punda. Numbe nne shininnanguyanje mpanda gwa mmbone, kupunda jowe.

13 Nkali meleketaga ibheleketo yowe ya bhandunji na ya ashimalaika, monaga nepelaga kupingana na bhandu, nne njibha mbuti lidebhe Iyangali shindu eu kengele. 2 Kabhili, ngolaga kalama ja londola na lunguya ntenga gwa a Nnungu, na kwiimanya Iyene na nng'io na ya lunda na kola ngulupai ja malila, nkali kombola kuamiya itumbi, ikabheje nepelaga pingana na bhandunji, nne nngabha shindu. 3 Ndolaga Iyene yangu yowe nikwaapanganga bhaalaga, nkali niishoyaga shiilu shangu shijokwe moto, nepelaga pingana na bhandu, shakwa sha mbwaila. 4 Apingana na bhandu, anakwiipilila, na anakola uguja, na jwangali lupimililo, na akakwiipuna na wala jwangali miinjili. 5 Apingana na bhandu, anakwiitimalika na akaloleya pwaida jakwe nnyene, wala akatumbala na akakwiibhika muntima yangali ya

mmbone, 6 akaangalila yangali ya mmbone, ikabhe anaangalila ili ya kweli. 7 Apingana na bhandu akaatotoshela, akaaleka kulupalila na anakwiipilila yowe. 8 Kupingana na bhandu, kwangali mpelo. Monaga kupagwaga kulunguya ntenga gwa a Nnugu, shikupele, kupagwaga kubheleketa shibheleketo sha ambi, shikupele, nkali lupagwaga lumanyio, shikupite. 9 Pabha indu itukwiimanya na londola ishokope. 10 Ikabheje malanga gushigaishe gatimilile gala, gowe gangatimilila shigapele. 11 Punaliji mwana jwanshoko nashinkubheleketa malinga mwana, nashinkumanya malinga mwana, natendaga ganishiya malinga mwana. Ikabheje ngakuleje, indu yowe ya shigwana njileka. 12 Pabha itukwiibhona nnaino, ni mbuti shiwili nshioo tukawibhona ukoto, ikabheje gene malangago shitwiibhona ukoto. Nnaino ingwiimanya ishokope, ikabheje kungai shiniimanye yowe ukoto, malinga a Nnugu shibhaamanya nne. 13 Bhai nnaino ilonjeya itatu, ngulupai na kukulupalila na pingana, ikabheje shikulungwa kaje ni kupingana.

14 Ntumbililanje kwiipata iloi ya pingana, na nnokolilanje kwiipata iloi ika Mbumu, ikabheje shipundile, shiloi sha ukulondola gwa a Nnugu. 2 Pabha mundu abheleketa shibheleketo shijeni, akabheleketa na bhandu, ikabhe anabheleketa na a Nnugu. Pabha anabheleketa indu ya nng'yo, kwa mashili gaka Mbumu. 3 Ikabheje akwete shiloi sha ukulondola gwa a Nnugu, anabheleketa na bhandu nkwaashimilikanga na nkwaataganga ntima na kwaatondobhyanga. 4 Abheleketa shibheleketo shijeni, anakwiishimilika nnyene. Ikabheje alondola anashimilika likanisha. 5 Bhai, ngunapinga mmanganya mmowe mmeleketanje shibheleketo shijeni, ikabheje shipundile kaje mmanganje ashinkulondola bha a Nnugu, pabha mundu alondola, anakumpunda abheleketa shibheleketo shijeni jula, ikabhe ataye malombolelo gakwe nkupinga alishimilisha likanisha. 6 Ashaapwanga ng'ikaga kunngwenunji nibheleketa shibheleketo shijeni, shiimpwailanje indi? Gwangali kuntashiyanga nng'ibhulo gubhambele a Nnugu eu lumanyio, eu ntenga gwa a Nnugu, eu majiganyo? 7 Nkali indu yangali gumi iona, malinga lipenga eu shingwaya, bhuli, mundu shaamumanye bhuli, shigombwa monaga ikaone kwa tindana? 8 Pabha, lipenga ligombwaga gwangali manyika ukoto, gani shaajende kungondo? 9 Na nneyo peyo na mmanganya, monaga mmeleketangaga malobhe gangamanyika, gani shagamanye gunkubheleketanga? Malobhe genunji shigaobhe payoyo. 10 Ipali ibhelekete yaigwinji pashilambolyo, na shakwa shibhelekete shangali malombolelo. 11 Ikabheje nne, ngagamanye malombolelo ga bheleketa mundu jwa shibhelekete shijeni, nne shimme nannjeni kuka jwenejo, na jwalakwe shaabhe njeni kwangu nne. 12 Na mmanganya nneyo peyo, pabha nshikolanga lilaka lya kola iloi ika Mbumu, ntumbililanje kwiipata nkupinga nnishimilikanje likanisha. 13 Kwa nneyo, jojowe akombola bheleketa shibhelekete shijeni, ajuje kukombola kugamanya malombolelo gakwe. 14 Pabha nyugaga kwa shibhelekete shijeni, kujuga kwangu kunabha kwa mmunda, ikabheje lunda lwangu lukaaposhela shindu. 15 Bhai, ndende bhuli? Shinyuje mmbumu na kwa lunda lwangu, kabhili shinyimbe kwa mmbumu na kwa lunda. 16

Mwainiyaga a Nnugu sha mmbumpe, mundu ali munkumbi gwenu shajitishiye bhuli "Amina", kwaatenda kwenu eja, monaga akashimanye shinkubheleketa? 17 Pabha kutenda kwenu eja, kweli shikubhe kwa mmbone, ikabheje junajo ikampwaa. 18 Nne ngunaatenda eja kwa a Nnugu pabha ngunakombola bheleketa shibhelekete shijeni, kupunda mmanganya mmowe. 19 Ikabheje nnikanisha ngunapinga bheleketa malobhe nng'ano ga manyika, nkupinga naajiganyanje bhananji, kupunda malobhe elupu ga shibhelekete shijeni. 20 Ashaapwanga nnakolanje na ng'aniyo ya shigwana, ikabheje kwa yangali ya mmbone mmanganje mbuti bhana, ikabhe nkuganishiya kwenunji nkulanje. 21 Ishijandikwa nshalia ja a Musha, "Bhakulungwa bhakuti. 'Shimelekete na bhene bhandunjibha, kupitila bhaabheleketanga shibhelekete shijeni, na kwa kang'wa ya bhajeninjii'" nkali nneyo bhakambilikananga. 22 Bhai kwa nneyo, kalama ja bheleketa shibhelekete shijeni ni shilangulo, nngabha kwa bhandu bhakwetenje ngulupai, ikabhe kwa bhagakulupalilanga bhala, ikabheje shiloi shja ukulondola gwa a Nnugu, ni kwa ligongo lya bhandu bhakulupalilenje, na nngabha kwa bhagakulupalilanga. 23 Bhai, ibhaga likanisha lyowe bhaimanangaga pamo, na bhowe bhabheleketanje kwa shibhelekete shijeni, monaga bhaikanganaga bhandu bhakaelewanga eu bhakanabhe kulupalilanga, bhuli, bhakabheleketanga kuti nshikolanga shalubha? 24 Ikabheje, bhowe bhalondolagaga, na aikaga mundu akaelewa eu jwangakulupalila, yowe yashaipilikane shiinkong'ondele gwangali gwa mmbone gwakwe na shiinn'ukumule. 25 Injubhi ya muntima gwakwe shiimanyishe, na jwalakwe shaabhatindibhalile a Nnugu alinkuti, "Kweli a Nnugu bhali na mmanganya." 26 Bhai, ashaalongo ajangu, tubhelekete nndi? Bhai punkuimananga pamo, jumo ajimbe lwimbo, na juna ajiganye, na juna akole nng'ibhulo, na juna akwete kalama ja bheleketa shibhelekete shijeni, abhelekete, na juna atalashiye malombolelo gakwe. Nkupinga yowe itendeshe kwa ligongo lya kulishimilika likanisha. 27 Bhapagwangaga bhandu bhakombolanga bheleketa kwa shibhelekete shijeni, bhabheleketanje bhandu bhabhili eu bhatatu, numbe jumojumo, na apagwe mundu shatalashiye malombolelo gakwe. 28 Ikabheje akapagwe nkutalashiya malombolelo gakwe, bhai, abheleketa kwa shibhelekete shijenijo apumule nkanishamo, abhelekete sha muntima na a Nnugu bhakwe. 29 Ga bhakwetenje kalama ja londola, bhabheleketanje bhabhili eu bhatatu, bhana bhatalashyanje gabheleketwego. 30 Ibhaga mundu munkumbi gwa bhatemingenye bhala, apataga nng'ibhulo na a Nnugu, bhai abheleketaga jula apumule. 31 Pabha mmowe nnakombolanga kulunguya nntenga gwa a Nnugu jumo jumo, nkupinga mwijiganyanje na tagwa ntima. 32 Kalama ja londola, jijimililwe naka nkulondola. 33 Pabha a Nnugu nngabha a Nnugu bha mpwai, ikabhe bha ulele malinga shiili kubhandunji bha ukonjelo. 34 Malinga shiili nkubho, mmakanisha gowe ga bhandu bha a Nnugu, bhanabhakongwe bhanabheleketanje, ikabhe bhakundanje, malinga shijilugula Shalia ja a Musha. 35 Ibhaga bhapingangaga kubhuya, bhakaabhuyanje ashaambuje bhahonji kumui. Pabha anatokomala jwankongwe abheleketa nnikanisha. 36 Bhuli, punkuganishiyanga llobhe lya a Nnugu kulikopweshe kunngwenunji? Eu kuti ling'ishilenje

mmanganyanjipe? 37 Mundu aibhonaga kuti nkulondola jwa a Nnungu, eu ashikola shilo shika Mbumu, bhai amumanye kuti gene gungunnjandishilanga gano ni amuli ja Bhakulungwa. 38 Ikabheje apagwaga mundu akaapinga pilikana, bhai, jwenejo nnampilikanijanje. 39 Bhai, ashaalongo ajangu, nkolanje lilaka lya londola, ikabhe nnaibhilijanje mundu kubheleketa shibheleketo shijeni. 40 Ikabheje indu yowe itendeshe ukoto na kupanjilila.

15 Ashaalongo ajanguni, nnaino ngunapinga ninkumbushiyanje ga Ngani ja Mmbone jinannungushiyanje jila, na mmanganya gunnijposhelenje nikwiishimilika najo. 2 Kwa pitila jenejo nnatapulwanga, ibhaga nngabhikangaga mmitima guninnungushiyanje, na ibhaga kulupalila kwenunji kukabhe kwayoyo. 3 Nne nashinkumpanganga ntenga gwa mana gunaposhele gula, kuti a Kilishitu bhashinkuwa kwa ligongo lya yambi yetu, malinga shigalugula Majandiko ga Ukonjelo. 4 Na kabhili bhashinkushikwa, na lyubha lya tatu gubhayushiye, malinga Majandiko ga Ukonjelo shigalugula. 5 Na kabhili nammalanjilenje kuti, gubhaakoposhele a Kepa, na kungai likumi limo na bhahili bhala. 6 Gakapiteje genego gubhaakoposhelenje bhandu mma nng'ano gwanakamo, mpaka pungujandika pano bhananji bhabhakotonji, ikabheje bhananji bhawilenje. 7 Kungai gubhaakoposhele a Yakobho na ashimitume bhowe. 8 Bhakaakoposhelanjeje bhowe, gubhangoposhele na nne, naliji malinga mwana abhelekwe mobha gakanabhe malila. 9 Pabha nne najwakumpelo munkumbi gwa ashimitume, na wala ngapinjikwa kushemwa ntume, pabha nashinkulishima likanisha lya a Nnungu. 10 Ikabheje kwa nema ja a Nnungu, nijbha ntume malinga shini shino, nema jabho kwangu nne jangabha jayoyo. Nne njitenda liengo kupunda bhowe, nngabha nne, ikabhe nema ja a Nnungu jitenda liengo na nne. 11 Ikabheje nkali nneyo, ibhe bhanganyabho, eu nne, jejino ni ngani jitulunguya na ni jinkukulupalilanga. 12 Pabha, nnaino inalunguywa kuti a Kilishitu bhashiyuka bhakaweje, ashaajenunji bhana bhaakombolanga bhuli kubheleketa kuti bhawilenje bhakayukanga? 13 Bhai, monaga bhawilenje bhakayukanga, nabhalabho a Kilishitu bhangayuka, 14 na monaga a Kilishitu bhangayuka, bhai kulunguya kwetu kwayoyo na ngulupai jenunji jayoyo. 15 Punda gowego, uwe tunabhona tubhakong'ondela bha unami kwa a Nnungu, pabha tushikong'ondela kuti, a Nnungu bhashinkwaayuya a Kilishitu, ibhaga kweli bhawilenje bhakayukanga, bhai bhangayuya. 16 Pabha ibhaga kweli bhawilenje bhakayukanga, bhai nabhalabho a Kilishitu bhangayuka. 17 Monaga a Kilishitu bhangayuka, bhai ngulupai jenunji jayoyo, launo nninginji na yambi yenunji. 18 Punda genego bhowe bhawilenje bhali bhalundenenje na a Kilishitu, bhaobhilenje. 19 Ibhaga twaakulupalile a Kilishitu kwa jene ndamo jinope, bhai uwe tubhandu bha bhonelwa shiya, kupunda bhandu bhowe pa shilambolyo. 20 Ikabheje ni kweli kuti, a Kilishitu bhayushile bhakaweje, ni bha ntai kuyuka kwa bhawilenje. 21 Pabha, malinga shiwo shishiika pashilambolyo kupitila mundu, nneyo peyo na ga yuka bhawilenje, gashiika kupitila mundu juna. 22 Malinga bhandu shibhawanganga

nilundana na a Adamu, nneyo peyo bhowe shibhayuywanje nilundana na a Kilishitu. 23 Ikabheje kila mundu shaayuywe namuna jakwe, bha ntai kuyuywa ni a Kilishitu, nikwiya bhowe bhalinginji bha a Kilishitu, mobha gushibhaishe. 24 Penepo shiguishe mpelo, a Kilishitu pushibhaakumuye Atati a Nnungu upalume gwabho, bhapeyaga kila upalume na ukulungwa na kila mashili. 25 Pabha a Kilishitu bhanapinjikwa bhatagwale, mpaka a Nnungu pushibhaabhikanje ashaamagongo ajabho pa makongono gabho. 26 Mmagongo njjabho shaapeywe kumpelo, shaabhe shiwo. 27 Pabha Majandiko ganalugula, "A Nnungu bhashikwiibhika indu yowe pamakongono gabho." Ikabheje Majandiko pugaalugula kuti, "Indu yowe shibhalibhatile nkwiitagwala," penepo a Nnungu bhakwa muindumo, pabha bhenebho ni bhakwiibhika indu yowe pai jabho a Kilishitu. 28 Ikabheje indu yowe ibhikwaga pai ja ukulungwa gwa a Kilishitu, penepo Mwana nyene shaabhikwe pai ja ukulungwa gwa a Nnungu, nkupinga a Nnungu bhatagwale indu yowe. 29 Bhai, ibhaga kuyuka kwakwa, bhuli, bhandunji bhaabhatishwanga kwa ligongo lya bhawilenje bhala, shibhatendanje nndi? Ibhaga bhawilenje bhakayukanga, kwa nndi kubhatishwa kwa ligongo lya bhawilenje? 30 Uwe kwa nndi tunakwiibhika mwaajogoya mobha gowe? 31 Ashaalongo ajangu, nne mobhaga nguti, ngunakwiibhika nshiwo! Shingwiipunila kwenu mmanganyanji, ni lundana kwenunji na a Kilishitu Yesu Bhakulungwa bhetu, inandenda nunguye gegano. 32 Ibhaga tumbilila kwangu kukaliji kwa shigundupe, bhai, kukomana kwangu na makoko ga munng'itu, yani bhandunji bha ku Epesho bhala, kumbwaile nndi? Monaga bhawilenje bhakayukanga, bhai, "Tulye na papila, pabha malabhi shituwe." 33 Nnatembwanje, mikungulu jangali ja mmbone jinakumpuganya mundu. 34 Nkolanje lunda kabhili malinga shinkupinjikwanga, nnatendanje yambi. Pabha bhananji bhakakwaamanyanga a Nnungu ukoto. Ngunabheleketa gegano, nkolanje oni! 35 Ikabheje mundu shaabhuye, "Bhaayukanga bhuli bhawilenje? Shibhayukanje na shiilu shashi?" 36 Mwewe libhelu! Shinkupanda shikamela shikatandubhe kuwa. 37 Inkupanda mmbeju, pana mmbeju ja mpunga, eu jina na nngabha litepo lyowe. 38 A Nnungu bhanakuipa litepo, malinga shibhaapinga bhayene, kila mmbeju na litepo lyakwe. 39 Iilu ikalingana. Bhandunji bhashikolanga iilu yabhonji, na bhanniyama yabhonji, na ijuni nneyo peyo iilu yabhonji, na yamaki nneyo peyo. 40 Ipalii iilu ya kunnungu, na iilu ya pa shilambolyo, kukonja kwa iilu ya kunnungu ni kuna, na kukonja kwa iilu ya pa shilambolyo kuna. 41 Kupali kukonja kwa lyubha, na kukonja kwa mwei, na kukonja kwa ndondwa, nkali ndondwa inalekanila kwa konja. 42 Nneyo peyo, pushiibhe ga yuka bhawilenje, malinga mmbeju, shiilu shinashikwa pai niangabhanika, ikabheje shinayuywa nibha shiilu sha ngaangabhanika. 43 Shiilu sha gundo pushishikwa shinanyegala, pushiyuywa shili na ukonjelo, na pushishikwa shangali mashili, ikabheje pushiyuywa shili na mashili. 44 Pushishikwa ni shiilu sha shibhelekwe, ikabheje pushiyuywa ni shiilu sha mbumu. Shipali shiilu sha shibhelekwe, na nneila pela shipali shiilu sha mbumu. 45 Pabha Majandiko ganataya, "Mundu jwa ntai a Adamu, apengenywe nipegwa gumi", ikabheje Adamu jwa kumpelo, ni Mbumu akwaapanganga

bhandu gumi. 46 Ikabheje shilongolela nngabha shiilu sha Mbumu, ikabhe shiilu sha shibheleke, kungai nikwiya shiilu sha mbumu shila. 47 Adamu jwa ntai papengenywe kwa lilongo, paaliji jwa pa litaka, Adamu jwa bhili kwakopweshe kunnungu. 48 Bhandunji bha pa shilambolyo, bhanalandana na mundu apengenywe na lilongo jula, na bhalinginji bha kunnungu bhala, bhanalandana na akopweshe kunnungu jula. 49 Malinga shitulendene naka jwene apengenywe na lilongo jula, nneyo peyo shitulandane naka jwene akopweshe kunnungu jula. 50 Bhai, ashaalongo ajangunji, nne nguti nnei, iilu yetu ipengenywe kwa nnyama na minyai ikaulishi Upalume gwa a Nnungu, wala shiangabhanika, shikalishi shangaangabhanika. 51 Mpilikananje, ngunakummаланангиланга shinjubhi, nngabha kuti tubhowe tupingawa, ikabhe tubhowe shitutindiganywe, 52 shangupe, malanga ga mmbila ja kumpelo, mbuti kukapila kwa meyo. Pabha mbalalapa shijione, bhawilenje shibhayukanje na bhanaangabhanyikanje kabhili, na uwe shitutindiganywe. 53 Pabha inapinjikwa kila shiangabhanyika shinaangabhanyishe, yani shiilu shawa, shinawe. 54 Bhai, shiilu sha angabhanyika shino shibhaga sha ngaangabhanyika, yani shiilu shawa shila, shibhaga nngabha shawa, penepo shigatimilile Majandiko ga Ukonjelo ga kuti, "Shiwo shilepele na shipeshiywe." 55 "Shiwo, mashili gako gali kwei?" "Kupoteka kwako kuli kwei?" (Hadēs 986) 56 Shiwo shinakola mashili ga bhulaga, kwa ligongo lya yambi, na yambi inakola mashili kwa ligongo lya Shalia ja a Musha. 57 Ikabheje tunatenda eja kwa a Nnungu bhakututenda tukombole, kupitila ku Bhakulungwa bhetu a Yesu Kilishitu. 58 Bhai, ashaalongo ajangunji nkupingwanga, nnjimangananje nninginji mwiishimilikanje ukoto. Mpundanje kamula liengo lya Bhakulungwa, nnikumumanyanga kuti, liengo lyenunji ku Bhakulungwa nngabha lya yoyo.

16 Nnaino, ga mishango ku bhandunji bha ukonjelo bha ku Yelushalemu, ntendanje malinga shinajiye ku makanisha ga Shilambo sha ku Galatia. 2 Lyubha lya Jumapili kila mundu munkumbi gwenunji, agoye mmbiya malinga shapatile, nkupinga pushing'ishepo nnaishumbyanje kushoya mishango kabhili. 3 Mobha gushing'ishe kungwenunji, shinaatumanje bhushimwaagulanje munkumbi gwenunji bhala, bhapelekanje bhaluwa na mishango jenunji ku Yelushalemu. 4 Ipingwaga na nne nyende, bhai shinyende na bhanganyabho. 5 Shing'ishe kungwenunji mbitilaga ku Shalambo sha Makedonia, pabha mbinga pitila kweneko. 6 Pana shindame kungwenunji kashoko, eu shindame na mmanganya mobha gowe ga shipwepwe, nkupinga nnyangutilanje mmwanja gwangu kokowe kushinyende. 7 Ngapinga pita kungwenunji shangu, nipelenganya na mwanja. Pabha ngunaganishiya kulonjeya na mmanganya, Bhakulungwa bhapingaga. 8 Ikabheje shindame ku Epesho mpaka lyubha lya shikukuu ja Pentekoshite. 9 Pabha nijipata lilanga lya kamula liengo lyangu, ikabhe bhandaukanga ni bhabhagwinji. 10 lbhaga a Timoteo shibhaishe kungwenunji, mwaaposhelanje ukoto, bhanakole lipamba mobha gushibhatame kungwenunji, pabha bhanaatenda liengo lya Bhakulungwa malinga nne. 11 Kwa nneyo mundu jojowe anaanyegaye, ikabhe mwaajangutilanje bhajende mwanja gwabho kwa ulele, nkupinga bhakabhuje,

pabha nne na Bhakilishitu ajangunji tunakwaalinda. 12 Ga a Apolo apwetu, nijikwaashondelesheya kaje, bhaishhe kungwenunji na ashaapwetu, ikabheje bhakaapinga kuika nnaino, ikabhe shibhaishe pushibhapate malangapo. 13 Nnainobhukanje, nnjimangananje mwiishimilikanje nngulupai na nkolanje makangala na mashili. 14 Kila shindu shinkutendanga ntendanje kwa pingana. 15 Ashaalongo ajangunji, mwaamanyinji ashaalongo ajabho a Shitepana kuti, bhangananyabho ni bhantai poshela ngulupai ja Shikilishitu ku Akaya, na bhashinkuengwanga kwaakumulilanga liengo bhandunji bha ukonjelo. Ngunakunshondelesheyanga ashaalongo ajangu, 16 mwaakundanje na nkaguyanje ukulongoya gwa bhandunji malinga bhangananyabho, na kila akamula liengo na bhangananyabho. 17 Numbe nne ngunaangalala ga ika kwabhonji a Shitepana na a Potonatushi na a Kaiko, pabha bhashimbanganga indu yatubhile kopoka kungwenunji ila. 18 Pabha bhashinkuungalayanga ntima gwangu na mitima jenunji. Kwa nneyo inapwaa kwaakumbushilanga bhandunji malinga bhangananyabho. 19 Makanisha gowe ga ku Ashia ganakunnamushilanga. A Akula na a Pilishika pamo na bhandu bhowe bha a Nnungu bhalinginji nnyumba jabhonji, bhanakunnamushilanga nkulundana kwenunji na Bhakulungwa. 20 Bhakilishitu ajetunji bhowe bhanakunnamushilanga. Na mmowe nnamushilananje nkupingana kwa ukonjelo. 21 Nne a Pauli ngunakunnamushilanga, nilijandika kwa nkono gwangu namwene. 22 Jojowe akakwaapinga Bhakulungwa aloshwe, Nnjiye Mmakulungwa! 23 Nema ja Bhakulungwa a Yesu jibhe na mmanganya. 24 Kupinga kwangu nne kubhe na mmanganya nkulundana na a Kilishitu Yesu.

2 Bhakolinto

1 Ajino bhaluwa jino kujikopoka kwangu nne, a Pauli ntume jwa a Yesu a Kilishitu na apwanga a Timoteo, kwa engwa kwabho a Nnungu. Ngunakunjandishilanga mmanganya mmandunji bha a Nnungu nninginji ku Kolinto na bhandu bhowe bha ukonjelo mmwali yowe ya ku Akaya. **2** Nema na ulele kopoka kwa a Nnungu ainabhetu na Bhakulungwa a Yesu Kilishitu ibhe na mmanganya. **3** Bhakuywe a Nnungu ainabhabho Bhakulungwa bhetu a Yesu Kilishitu, Atati bhakwete shiya na a Nnungu bhakutupa kuangalala. **4** A Nnungu bhakutupalilanga nkulaga mwetu, nkupinga na uwe twaangalayanje bhananji nkulaga kwabhonji kwa nng'angalo gogo gutuposhela kopoka kwa bhenebho. **5** Elo, malinga shitupunda kupata mboteko nkwaakamulila liengo a Kilishitu, a Nnungu shibhapunda kutangalaya kupitila a Kilishitu. **6** Ibhaga tunalaga, ni kwa ligongo lya nng'angalo na ntapulo gwenunji. Putuagalala nkupinga kunng'angalayanga mmanganyanji na kuntaganga ntima kwa mboteko yenunji, mwiipiililanje malinga uwe. **7** Na ngulupai itukwete kwa ligongo lyenunji ishimiilise, pabha tumumanyi kuti nnalaganga malinga uwe, nneyo peyo shinng'angalalanje malinga uwe. **8** Ashaalongo, tunapinga kummalanjilanga shishinte laga ku nkowa gwa ku Ashia kula, shilajesho shitushikutopela kwa kaje mpaka gutuwile mitima kuti tukalama. **9** Elo, mmitima jetu putwaliji mbuti bhandu bhaukumwilwenje kubhulagwa, nkupinga tunaikulupalile twaashayene, ikabhe twaakupalile a Nnungu bhakwaayuyanga bhandu bhawilenje. **10** Bhenebho bhatutapwile nshilaje shikulungwa shapingaga kutubhulaga shila, na bhanapunda kututapula. Tunakwakulupalila kuti shibhatutapule kabhili. **11** Mmanganya nnakutujangutilanga kwa kutujujila. Nkupinga bhandu bhahagwinji bhatendanje eja kwa a Nnungu ga ligongo lya mboka itupata kwa jujiwa na bhandu bhahagwinji. **12** Shitukwiiniya shindu shimo, mitima jetu jinakutukong'ondelala kuti tunatama pa shilambolyo pano na kajakaje munkumbi gwenunji, kwa kwiitimalika kutupegwilwe na a Nnungu. Twangalongoywa na lunda lwetu ikabhe kwa nema ja a Nnungu. **13** Tunakunjandishilanga indu ishinkombolanje shoma na kwiimanya. Ngunakulupalila kuti shimwimanyanji ukoto, **14** pabha nnaino mmumanyinji kashoko. Bhai, tumumanyi kuti lyubha lya kwiya a Yesu shumwiinyanje kwa ligongo lyetu malinga shitukwiiniya uwe kwa ligongo lyenunji. **15** Ngulikupalila kumanya na kulupalila kwenunji, gundumbiile ndandubhe kuika kunngwenunji nkupinga mpwakanje pabhili. **16** Natumbiile mbitile kungwenunji gwa kwenda na gwa nkubhujia kunkoa gwa Makedonia, nkupinga nnyangutilanje ga mwanja gwangu gwa kwenda ku Yudea. **17** Bhuli, punkuganishiyanga kuti naliji mundu jwa pindikupindikuka? Eu, punkuganishiyanga njitumbiila kwa lunda lwangupe? Kutu ngunabheleketa "Elo" na "Nngabha" gwanakamo? **18** A Nnungu bha kweli jika, bhai, shitummalanjenje shila nngabha shindu sha "Elo" na "Nngabha" **19** Pabha a Kilishitu bhahabhabho a Nnungu, bhutunnungushiyenje nne na a Shilibhanushi na a Timoteo, bhakaliji bha "Elo" na "Nngabha." Ikabhe mobha gowe bhenebho ni "Elo" ja a Nnungu. **20** Pabha malagano gowe ga a

Nnungu gali mwa a Kilishitu ni ga "Elo" kwa lyene ligongolyo, "Amina" jetu pujilugulwa kwa lina lya a Yesu nkwaakuya a Nnungu. **21** Bhai a Nnungu bhayene bhanakutushimilika uwe pamo na mmanganya nkulundana na a Kilishitu. Na kutuagula, **22** bhenebho gubhatupele Mbumu jwabho mmitima jetu abhe lulembo kuti uwe tubhabho na abhe ngamulo ja indu yowe ibhatubhishile. **23** A Nnungu ni bhakong'ondela bhangu ngaabheleketa unami, gundumbiile ngunaishe kabhili ku Kolinto ngunakummulayanganga kuinjika kwa malobhe ga kalipa. **24** Tukaapinga kunshishilishiyanga ga indu inkukulupalilanga, pabha mwiishimilikenje ngulupai jenunji. Ikabhe uwe tubhaajangutila bha angalala kwenunji.

2 Bhai, njitumbiila ngunanng'owelanje kabhili ngunakummulayanganga kuinjika. **2** Pabha nimmulayanganga kuinjika, bhai, gani shaang'angalaye? Ikabhe mmanganya bhunimuleyanje kuinjika. **3** Nannjandishilenje nneyo, nkupinga pushing'ishapo ngunainjisha ga bhene bhapinjikwanganga kung'angalaya. Nne nimumanyi kuti inonyelaga na mmanganya shiinnonyelanje. **4** Punannjandishilenje pala munaliji nshilaje shikulungwa muntima na minyoi jilitunguka, nngabha kuti nng'injikanje, ikabhe mmumanyanji shinguti kumpinijiyanga. **5** Na nnaino apali mundu ammuleye nriakwe kuinjika, jwangamulaya kuinjika nnepe, ikabheje mmowenji mmwe, numbe ngunapunde bheleketa. **6** Ukumu jimumpelenje mmandu bhahagwinji jinakumpwaa. **7** Bhai mbaya munneshelelanje jwene mundujo, na muntaganje ntima nkupinga ananjisha niwa ntima. **8** Kwa nneyo ngunakunshondelesheyanga, munnanguyanji kuti nnakumpinganga kwa kaje. **9** Shinatumbiile kunnjandishilanga mbhaluwa mula, nkupinga nole monaga shinkundanji indu yowe. **10** Munneshelelanganga mundu shindu shoshowe, numbe nne ninneshelele, monaga shipali kweli shindu shoshowe sha leshelela, ngunakunneshelela pa meyo ga a Kilishitu kwa ligongo lyenunji, **11** nkupinga Lishetani anapupunde, pabha tumumanyi ugulumba gwakwe. **12** Ngaisheje kushilambo sha ku Toloa kuulunguya Ngani ja Mbone ja a Kilishitu, Bhakulungwa bhashinkutenda ngombole kukamula liengo ukoto. **13** Ikabheje nashinkutenguka pabha nangaabhona ajetu a Tito. Gunaalajilenje bhandunji bha penepo nigumbite ku Makedonia. **14** Ikabheje, bhatendelwe eja a Nnungu bhakututenda mobha gowe tukombole kutama nkulundana na a Kilishitu. Numbe nibhakututenda tujeneye Ngani ja a Kilishitu mbuti indu ya nunjila mmwali yowe. **15** Pabha uwe mbuti nunjila kwa lubhani lwa a Kilishitu kwa a Nnungu, munkumbi gwa bhowe bhaatapulwanga na bhaobhanga. **16** Kwa bhaobhanga bhala kwene kunnunjilako kwa shiwo, ikabheje kubhaatapulwanga kwene kunnunjilako kunataga gumi. Bhai, gani shapwae kwa lyene liengolyo? **17** Uwe nngabha malinga bhatendelanga upindi ntenga gwa a Nnungu, ikabhe tunalunguya kwa ntima gwa uguja pa meyo ga a Nnungu, malinga bhandu tutumilwe na a Nnungu, tulundene na a Kilishitu.

3 Bhuli, tunatandubha kwiiniya kabhili twaashayene? Bhuli, tunapinga bhaluwa ja lumanyio malinga shiikupinjikwa ku bhandu bhananji pubhakwiyangananga kunngwenunji eu kopoka

kunngwenunji? 2 Mmwe mwaashayene ni bhaluwa jetu, bhaluwa jiidandishwe mmitima jetu, na jinamanyika na shomwa na bhandu bhowe. 3 Mmanyikenje kuti mmanganya bhaluwa ja a Kilishitu kukopoka mmakono getu. Bhaluwa jiidandishwe nngabha na wino, ikabhe kwa Mbumu jwa a Nnungu bhali bhakwete gumi, nngabha jiidandishwe nshipande sha liganga, ikabhe mmitima ja bhandu. 4 Tunakombola bheleketa genego gwangali bhoga pa meyo ga a Nnungu, ligongo lya ngulupai itukwete kwa a Nnungu kwa gene gubhatendile a Yesu Kilishitu gala. 5 Nngabha tunakombola tenda shindu shoshowe kwa mashili getu, ikabhe mashili getu ugakopoka kwa a Nnungu. 6 Pabha bhenebho bhatutendile uwe kulunguya malagano ga ambi, nngabha malagano ga Shalia jiidandikwe, ikabhe malagano gaka Mbumu jwa a Nnungu. Pabha Shalia jinabhulaga, ikabhe Mbumu anataga gumi. 7 Shalia jashinkujandikwa mwiipande ya maganga. Ikabhe mpelo gwakwe shiwo, ukonjelo gwabho gwashinkupunda mpaka bha Ishilaeli bhashinkulepelanga kwaalola a Musha kumeyo, ligongo lya ng'anyima kwabho. Kung'anyima kwabho kwangalonjeya. Bhai, ibhaga Shalia jipeleshela kuwa jatendeshe kwa ukonjelo gwa nneyo, 8 bhuli, liengo lika Mbumu jwa a Nnungu likapunda kukola ukonjelo? 9 Bhai, ibhaga gwashinkupagwa ukonjelo nniengo lya ukumula ukoto, penepo liengo lipeleshela uguja shilibhe na ukonjelo gwa puya. 10 Ukonjelo gwalongolele gula ushipela, pabha nnaino shikwete ukonjelo gwa puya, shiishe. 11 Ibhaga shene shaliji sha pitape shashinkukola ukonjelo, lyakwa lipamba kuti sha pitipiti shila shipinga kola ukonjelo gwa puya. 12 Na pabha shitukulupalila ni sheneshi, uwe tunabheleketa kwa mashili. 13 Uwe tukatenda malinga a Musha bhaiunishile nngubho kumeyo, nkupinga bha Ishilaeli bhanakubhonanje kung'anyima kwabho kulipela. 14 Ikabhe lunda lwabhonji lwashinkupuganyika. Mpaka lelo Bhaishilaeli pubhaashomanga itabhu ya Malagano ga Bhukala, shitabhoso shikanabhe shoka. Pushishoka mundu alundanaga na a Kilishitu. 15 Elo, mpaka lelo kila pubhaashomanga itabhu ya a Musha, lunda lwabhonji lunapuganyika. 16 Ikabheje, malanga gogowe mundu pakwatendebhushila Bhakulungwa a Yesu, shitabhoso shinashoywa. 17 Bhai, "Bhakulungwa" ni Mbumu na popowe pali Mbumu jwa Bhakulungwa penepo pa ungwana. 18 Bhai, uwe tubhowe twanganishilwa kumeyo, tunalagala ukonjelo gwa Bhakulungwa mbuti kung'anyima kwa shiwo, shitutindiganywe tulandane na Bhakulungwa, tulishoka ukonjelo kwenda ukonjelo guna, numbe gwa puya. Lyene liengolyo lika Mbumu jwa Bhakulungwa.

4 Bhai, a Nnungu kwa shiya shabho, bhashikutupa liengo lino, kwa nneyo tukawa ntima. 2 Tushileka indu yowe ya tokomaya na ya nng'iyoy. Tukatama kabhili muunani, eu nkulipuganya lilobhe lya a Nnungu, ikabhe kwa lunguya ya kweli gwangali nng'iyoy, tunakwaalanguyanga bhandunji bhamumanyanje mmitima jabhonji kuti tunatenda ibhapinga a Nnungu. 3 Pabha, monaga Ngani ja Mmbone jitulunguyaji jishikwiya, bhai jishikwiya ku bhaobhanga. 4 Bhalabhonji bhakaakulupalilanga pabha Lishetani, nnungu jwa shilambolyo ashikwaapuganyanga lunda lwabhonji bhanashibhonanje shilangaya sha Ngani ja Mmbone ja Ukonjelo gwa a Kilishitu, bhali malinga shibhali a

Nnungu. (aiōn g165) 5 Pabha tukakwilunguya twaashayene, ikabhe bhutukwalunguya a Kilishitu kuti Bhakulungwa na uwe tubhatumishi bhenunji kwa ligongo lya a Kilishitu. 6 Pabha a Nnungu bhabeheleke, "Shilangaya shilangaye nnubhundu," bhai bhenebho shibhalangaye mitima jetu, na kutupa shilangaya sha kumanya ukonjelo gwa a Nnungu gulangaya kumeyo kwa a Kilishitu. 7 Ikabheje, uwe tuli na shene shibhikoshu, putuli mbuti indu ya lilongo ibhishilwe indu ya muntima, nkupinga imanyishe kuti mashili gamakulungwa ni ga a Nnungu na nngabha getu. 8 Mobha gowe tunalaga, ikabheje tukaamaliywa. Tunakola lipamba, ikabheje tukawa ntima, 9 tunalaga, ikabheje tukalekwa gwangali jangutilwa. Nkali bhatugalabhuyanje pai tukaabhulagwa. 10 Mobha gowe tunaowa na shiwo sha a Yesu mwiilu yetu, nkupinga gumi gwabho gubhoneshe mwiilu yetu. 11 Elo, pututama pano shiwo shinakutukagula ligongo lya kwaakamulila liengo a Kilishitu, nkupinga gumi gwabho gubhoneshe mwiilu yetu yawa ino. 12 Malombolelo gakwe ni kuti, uwe tukaajogopa nkali kuwa, nkupinga mmanganyanji mpatanje gumi gwa pitipiti. 13 Ishijandikwa Mmajandiko ga Ukonjelo, "Nne ngulupalile, kwa nneyo ngunabheleketa." Numbe uwe nneyo peyo, tubhaga na ntima gogo pego gwa ngulupai, tunakulupalila na kwa lyene ligongolyo tunabheleketa. 14 Tumumanyi kuti a Nnungu bhaayushiye Bhakulungwa a Yesu bhala, shibhatuyuye na uwe pamo na a Yesu na kutubhika pa makongono gabho, pamo na mmanganya. 15 Gowego ni kwa ligongo lyenunji, nkupinga nema ja a Nnungu pushijipunde ku bhandu bhahagwinji, kutenda eja kupunde na a Nnungu bhakuywe. 16 Kwa lyene ligongolyo tukawa ntima, nkali iilu yetu itutikaga, ikabhe mmitima jetu munabha mwaambi mobha gowe. 17 Pabha shilaje shetu nngabha sha punda, numbe sha malanga gashokope, ikabheje shinakutupa ukonjelo gwa puya kaje gwa pitipiti guli gwa mmbone kupunda shilaje shino. (aiōnios g166) 18 Kwa nneyo tunalolele indu ibhoneka, ikabhe ikabhoneka. Pabha ibhoneka ikalonjeya, ikabheje ikabhoneka ila, ni ya pitipiti. (aiōnios g166)

5 Pabha tumumanyi kuti iilu yetu ya pashilambolyo ino malinga liema, liangabhanywaga jipali nyumba jina jikopoka kwa a Nnungu jangashengwa na makono gaka mundu, shijibhe ja pitipiti. (aiōnios g166) 2 Pabha mwiilu muno tunabhuhula, tulilokolila kupegwa iilu yetu ya ambi ili kunnungu. 3 Pabha tuwashwaga iilu ya kunnungu, tukabhoneka mbuti mbumu gwangali shiilu. 4 Tuli nshiilu sha pashilambolyo shino, tunabhuhula kwa topelwa, nngabha kuti tunapinga kuleka shiilu shawa shino, ikabheje tupegwe shiilu shikawa, nkupinga gumi gwa pitipiti utindiganywe shiilu shetu shikawa shila. 5 A Nnungu bhayene bhashikututendela shene mbindikuloi, gubhatupele Mbumu jwabho abhe ngamulo ja indu yowe ibhatubhishile. 6 Bhai, mobha gowe tunakulupalila, numbe tumumanyi kuti tutamaga na yene iilu ino mobha gowe, tunatalikangana na Bhakulungwa. 7 Pabha tunatama kwa ngulupai na nngabha kwa lola. 8 Elo, uwe twiishimilishe numbe tunabhona mbaya kushileka shiilu shino, nitama na Bhakulungwa. 9 Kwa nneyo shindu sha mmbone kupunda yowe, ni kutenda ibhapinga a Nnungu, tubhaga nshiilu sha pa shilambolyo, eu tubhaga nshiilu

sha kweneke. 10 Tubhowe tunapinjikwa kujima pa shitengu sha ukumu sha a Kilishitu, nkupinga kila mundu aposhele malinga shatendaga mobha ga gumi gwakwe, gabhe ga uguja eu gangali ga mmbone. 11 Bhai, tumumanyi kuti inapinjikwa kwaajogopa Bhakulungwa, penepo tunakwaakwiyanga bhandunji, ikabheje a Nnangu bhajimanyi mitima jetu na nne ngunakulupalila kuti na mmanganyanji ntumanyinji ukoto. 12 Pabha tukakwiiniya kungwenunji, ikabhe tunakumpanganga ligongo lya kwiiniya, nkupinga nkolanje sha kwajangulanga bhakwiiniyanga ga ibhakwibhonanga, kupunda ili mmitima jabhonji. 13 Ibhaga tubhoneka tukwete shalubha, genego ni kwa ligongo lya kwaanonyeya a Nnangu, eu ibhaga tukwete lunda genego ni kwa ligongo lyenunji. 14 Pabha kupinga kwabho a Kilishitu kunakutulongoya uwe tukulupalile kuti, mundu jumo ashinkuwa kwa ligongo lya bhowe, bhai bhowe bhawilenje pamo na jwenejo. 15 Bhashinkuwa kwa ligongo lya bhowe, nkupinga bhahakotonji bhanaikulupalilanje ashaayenerji, ikabheje kwa bhene bhawile na yuywa kwa ligongo lyabhonji. 16 Bhai, tandubhila nnaino, tukakunnola mundu kwa lunda lwa shigundu. Nkali uwe twaabhwani a Kilishitu shigundu, ikabheje nnaino tukakwaabhona shana nneyo. 17 Bhai ibhaga mundu alundanaga na a Kilishitu anabha mundu jwa ambi, ga bhukala gapitile nnaino gaishe ga ambi. 18 Yowe kuikopoka kwa a Nnangu, bhatupatanishe uwe na bhenebho kwa shiwo sha a Kilishitu, gubhatupele liengo lya kwaapatanshanga bhananji na a Nnangu. 19 Ntenga gwetu ni kuti, a Nnangu bhashinkwiipatanisha na bhandunji bha shilambolyo kwa shiwo sha a Yeshu, gwangali kuitolelela ilebho ya bhandunji, gubhatupele liengo lya kwaapatanshanga bhandunji na bhenebho. 20 Kwa nneyo, uwe tubhantenga bha a Kilishitu. Na a Nnangu bhayene bhanakunshemanga mmanganyanji kupitila uwe. Kwa nneyo, tunakunjuganga kwa lina lya a Yeshu mpatanaje na a Nnangu. 21 A Kilishitu bhakaweteje ilebho, ikabheje a Nnangu gubhaatendile bhajigale ilebho yetu, nkupinga uwe nkulundana na a Kilishitu tukole aki kwa a Nnangu.

6 Bhai uwe tubhaga tubhakamula liengo pamo na a Nnangu, tunakunshondelesheyanga nnaposhelanje nema ja a Nnangu pa yoyo. 2 Pabha a Nnangu Mmajandiko ga Ukonjelo bhakuti, "Malanga ga pwaa nampilikanishiye, malanga ga ntapulo nannjangutile." Bhai nnole, nnaino ni malanga ga pwaa, na lyubha lya ntapulo ni lelo. 3 Tukaapinga kubha shigwegwe kuka mundu jojowe, wala kwaatendanga bhandunji bhatugambanje nniengo lyetu. 4 Ikabheje, kwa kila shindu tulanguye kuti tubhatumishi bha a Nnangu, tulikwiipililila mmbobha ga laga na mmboteko na nshilaje. 5 Nkukomwa na Nkutabwaha na nkutendelwa pujo, na tokoteka maengo, tushisheya na laga shibhanga. 6 Tuilanguye kuti tubhatumishi bha a Nnangu kwa mitima ja takata, na kwa lumanyio na kwa kwipiililila na kwa uguja, kwa Mbumu jwa Ukonjelo, na nkupingana kwa kweli, 7 na nkulunguya ntenga gwa kweli, na kwa mashili ga a Nnangu. Ikomanilo yetu ya komanilana na ya kwiitapulila ni itendi ya aki. 8 Nkuishimiwa eu kwa nyegaywa, kwa gambwa eu kwa lumbiilwa. Tuliganishiwa mbuti tubhanami, mbena itubheleketa ya kweli. 9 Tunabhoneka mbuti tukamanyika mbena tunamanyika na

bhowe, tulibhoneka mbuti bhawilenje, mbena tubhabhakoto, tulikomwa ikabheje tukaabbulagwa. 10 Mbuti tushinjika ikabheje tunaangalala mobha gowe. Mbuti twangali indu, mbena tunakwapanganga bhandu bhahagwinji indu, tunabhoneka mbuti twangali shindu shoshowe, mbena tukwete indu yowe. 11 Mmanganya Bhakolinto, tunabheleketa na mmanganyanji kopoka mmitima jetu. 12 Uwe twangaleka kumpanganga mmanganyanji, ikabheje mmanganyanji nshikananga kutupinga uwe. 13 Bhai, nnaino ngunabheleketa na mmanganyanji mbuti ashibhanangu, bhai ntupinganje malinga shitukumpanganga. 14 Nnapangananje mbwiga na bhandunji bhakawakulupalilanga a Kilishitu. Bhuli, aki na yangali ya mmbone inapatana? Shilangaya na lubhindu inatama pamo? 15 Bhuli a Kilishitu bhanapatana naka Lishetani? Eu akulupalila anapatana na akaakulupalila? 16 Likanisha jipatana bhuli na kuitindibhalila yanamu? Pabha uwe likanisha bhali bhakoto. Malinga shibhashite bheleketa a Nnangu bhayene, "Shindame mmitima jabhonji, na tama munkumbi gwabhonji. Shime Nnangu jwabhonji, na bhalabhonji shibhabhanganje bhandunji bhangu." 17 Kwa nneyo Bhakulungwa bhakuti, "Nshokangananje munkumbi gwabhonji nnabhandikane nabhonji. Nnakwayanje shindu sha nyata, na nne shinimposhelanje. 18 Nne shime na ng'inagwenunji, na mmanganya shimmanganje ashibhanangu bhanabhalume na bhanabhakongwe, bhanabheleketa Bhakulungwa Bhakwete Mashili."

7 Bhai, ashaambwiga ajangunji, ibhaga tupegwilwe jene miadi joweji, twitakaye na yowe inyatiya shiilu na mbumu, tubhe na ukonjelo na tutame kwa kwaishimiya a Nnangu. 2 Tunakunjuganga ntuposhelanje mmitima jenunji! Tukanabhe kunnebhele mundu jojowe, wala tukanabhe kumpokonyola mundu wala kumpuganya mundu jojowe. 3 Ngaabheleketa gegano nkupinga ninng'ukumulanje mmanganya. Malinga shinjite bheleketa, mmanganya munninginji mmitima jetu, nkali kwa wa eu kwa lama pamo na mmanganya. 4 Ngunakulupalilanga mmanganya, nshilaje shetu nmandaganga ntima na ngang'alagalaya kwa kaje. 5 Nkali tukaisheje ku Makedonia twangapumulila. Ikabhe twashinkulaga mmbali yowe, palanga mipwai na mmitima lipamba. 6 Ikabheje a Nnangu, bhakwaataganga ntima bhawilenje ntima, bhashinkututaga ntima kwa kwiya kwabho a Tito. 7 Nngabha kwa ika kwabhope a Tito, ikabheje shinshite kwaataganga ntima. Bhatubhalanjile shinkuti lokolilanga kumona, na shinshite injikanga na shinkutumbililanga kunyanguta. Lyenelyo linandenda ng'angalale kaje. 8 Bhai, ibhaga mwainjikenje ga bhaluwa jangu, ngakwigamba. Nkali nneyo naigambile kashoko pabha namumanyi kuti mwashinkuinjika kashoko ga bhaluwa jila. 9 Ikabheje nnaino ngunakwinonyela, nngabha pabha nshiinjikanga, ikabhe mwashinkuinjika mpaka nikwiipeta. Pabha mwashinkuinjika malinga shibhapinjile a Nnangu na kwa lyene ligongolyo twangampotekanga kwa shoshowe. 10 Pabha kuinjika kubhaapinga a Nnangu kunakuntendebhuya mundu ntima nikumpa ntapulo, kwa nneyo lyakwa ligongo lya kwiigamba. Ikabheje kuinjika malinga kwa bhandunji bha pa shilambolyo, kunabbulaga. 11 Nnolanje shikoposhele nkuijika

kwenunji malinga shibhapijile a Nnungu, nshibhanganga bhandu bha tumbila, na kulanguya kuti mwangalebhanganga, na bha kunda. Nnaimukanga, na kupotekwa mitima, na nnalokolilanga kumona, na nnapingana, na nnapinganga kuukumula kwa aki. Kwa gene gowego nnangwiyenje kuti shakwa shinnehilenje. 12 Bhai, ibhaga najandishe, nngabha kwa ligongo lika jwene alebhilejo eu alebhelwejo. Ikabhe nashinkutumbilila jandika imanyishe kwa a Nnungu shinkuti kwiishoyanga kwa ligongo lyetu uwe. 13 Kwa gene gowega tushitagwa ntima. Kupunda kutagwa ntima kwetu, twashinkuangalala kwa ligongo lya angalala kwa a Tito kwa shimwashite kwaangalayanga ntima mmowenji. 14 Nne njikunumbililanga kubhenebho, kwa lyenelyo mwangandokomayanga. Tushikunnugulilanga kweli mobha gowe na kwene kunumbililanga kwa ligongo lya a Tito ishikha ya kweli jika. 15 Kumpinganga kwabho kunapunda pubhakumbushila kukunda kwenunji mmowe shimwashite kwaaposhelanga kwa ishima ja kaje. 16 Ngunakwinonyela pabha inatendeka kunkulupalilanga mmanganya kwa indu yowe.

8 Ashaalongo ajetu, tunapinga mmumanyanje ga nema ja a Nnungu jibhaapelenje makanisha ga ku Makedonia. 2 Nkali bhashinkulingwanga kwa mboteko yaigwinji, ikabheje kuangalala kwabhonji kwashinkupunda, nipeleshela kukola ntuka nankali nkulaga kwabhonji. 3 Ngunakong'ondela kuti bhashinkukolanga ntuka kupunda ibhakwetenje nkali bhakakwetenjeje indu yaigwinji, kwa engwa bhashinkushoyanga indu yabhonji malinga shibhakombwelenje. 4 Bhashinkutujuganga bhahanganje bhatumishi na uwe ga kwaajangutanga bhandunji bha ukonjelo bha ku Yudea. 5 Bhashinkutendanga kupunda shitwaganishiye! Bhashinkutandubhanganga kwiishoya ku Bhakulumgwa, kungai bhashinkwiishoyanga kwetu uwe malinga shibhapijile bhayene a Nnungu. 6 Kwa nneyo, twashinkwashondelesheya a Tito pabha ni bhakumbwiye, bhannjangutilanje nkolanje ntima gwa ntuka, nkumalishiya lyene liengolyo. 7 Ikabheje mmanganya malinga shinkwetenje indu yaigwinji, nkwetenje ngulupai na kombola bheleketa na lumanyio na tumbila kowe kwa tenda ya mmbone na kutupinga kwenunji. Kwa nneyo, tunalolela mmanganje na uguja nkwiishoya kwenunji. 8 Ngakunn'gulushanga, ikabhe ngunapinga nimumanye kupingana kwenunji monaga kuli kwa kweli, kwa linganya na kupingana kwa bhananji. 9 Pabha mmanganya njimanyinji nema ja Bhakulungwa bhetu a Yesu Kilishitu, shibhaitendile bhaalaga kwa ligongo lyenunji, ikabhe bhakwete indu, nkupinga mmanganya nkolanje indu kwa laga kwabho. 10 Bhai kwa lyeneli, ngunakunnugulilanga, inapwaa nnaino ntendanje gumwatandwibhenje kutenda masheyo gala. Mmanganyanji pumwalinginji bhantai kushoya, na kola lilaka lya tenda nneyo. 11 Bhai, mmaliyanje liengolyo, malinga shimwatumbililenje. Na kwa lilaka lila pelila mmaliyanje liengolyo kwa shoya malinga munkukombolelanga kushoya. 12 Pabha mundu akolaga ntima gwa shoya, a Nnungu bhanaposhela shoshowe shakwete mundu, na nngabha shatubhilwe. 13 Tukaatumbilila kuti mmanganya mpundanje kulaga, nkupinga bhananji bhapokanje, ikabheje ilingane. 14 Ikabhe nnaino, gwinji gwa indu inkwetenje, ujangutile bhaalaga, nkupinga na bhalabhonji pushibhakolanje ya punda, kubhannjangutilanje mmanganyanji, nkupinga nningane. 15 Malinga shiijandikwe

Mmajandiko ga Ukonjelo, "Alopwele yaigwinji jwangali sha punda, na alopwele ishoko jwangatubhilwa." 16 Ikabheje ngunatenda eja kwa a Nnungu, bhaapele a Tito shilokoli muntima gwabho sha kunnjangutilanga mmanganyanji, malinga nne. 17 Nngabha kuti bhashinkukundape kujuga kwetu, ikabhe bhashinkukola lilaka likulungwa lya jangutula mpaka gubhajahbwile kwiya kweneko kwa engwa bhayene. 18 Pamo na bhenebho, tunakuntuma mpwetu jumo ainiywa na makanisha gowe nniengo lya kwiya Ngani ja Mmbone jilunguywe. 19 Nngabha nneyope, ikabhe bhashiagulwa na makanisha bhalongane na uwe mmwanja gwa kamilisha liengo lya shoya kwa ntima gwa ntuka, litutenda kwa ukonjelo gwa Bhakulungwa. 20 Tunapinga kwiembuya tunagambwe na bhandunji, ga indu yaigwinji itugoyai. 21 Pabha tunatumbilila tenda ya aki, nngabha pa meyo ga Bhakulungwape, ikabheje nkali kubhandunji. 22 Bhai, pamo na ashaapwangabho, tunakuntuma mpwetu juna jutuninji papagwinji na ashilangula kuti ashikola lilaka lya tumika, numbe anakunkulupalilanga kwa kaje. 23 Numbe a Tito ni ajangu nne, tunatenda liengo kwa ligongo lyenunji, na ga ashaapwetu bhananji bhakwiyananga na a Tito, ni bhantanga bha makanisha, bhanatendanga liengo kwa ukonjelo gwa a Kilishitu. 24 Bhai, nnanguyanje kumakanisha kuti nnakwaapinganga gwangali ugulumba, nkupinga makanisha gabhonji gabhone kuti kunkulupalilanga kwetu kutukwiiniya, ni kwa kweli.

9 Ga liengo lyenunji lya kwaapeleshelanga indu bhandunji bha ukonjelo bha ku Yudea ngakulibhona ligongo lya kunnjandishilanga kabhili. 2 Nimumanyi shinshite kolanga ntima gwa jangutula, na naitapile ga lyenelyo ku bhandunji bha ku Makedonia nilinkuti, "Ashaalongo ajetu bha ku Akaya bhatandubhenje kushoya kuumila masheyo." Kwa nneyo, kutenda kwenunji kushikwaakwiyanje bhandu bhahagwinji bhapundanje kushoya. 3 Bhai, njikwatumanga ashaalongo ajetubho, nkupinga kuitapa kwetu kunabhe malobhe jika, ikabhe kubhoneshe kutumbilila kwenunji nkujangutula malinga shinjite bheleketa. 4 Inabhe kuti bhandunji bha ku Makedonia pushibhaikangananje na nne nikunn'imananga nkanabhe bhanganja tayali, shitujiye kola oni kupunda oni jishinkolanje mwaashayene, pabha twankulupalilenje kwa kaje. 5 Kwa nneyo, njibhona inapinjikwa twaajuganje ashaalongo ajetubha, bhalongolelanje kwiya kunnngwenunji, nkupinga bhahikanje tayali indu ya jangutula, inkupinga shoyanga kwa engwa kwenunji. Yene ibhaga tayali, shiilanguye kuti nshishoyanga kwa engwa na nngabha kwa shishilishiya. 6 Nkumbushilanje kuti, apanda ishoko ashaune ishoko, apanda yaigwinji ashaune yaigwinji. 7 Bhai, kila mundu ashoye malinga shaengwilwe muntima na nngabha kwa injika eu kwa shishilishiya, pabha a Nnungu bhanakumpinga mundu ashoya kwa angalala. 8 Na a Nnungu bhanakombola kumpinganga indu ya punda inkupinganga, nkupinga mobha gowe nkolanje indu inkwiipinganga, mpundanje kujangutula maengo gowe ga mmbone. 9 Malinga shigalugula Majandiko ga Ukonjelo, "Bhenebho bhashilaguya kwa punda, bhashikwaapinganga bhaalaga. Aki jabho jinalonjeya pitipiti." (aiōn g165) 10 A Nnungu ni bhakumpa mmebeju nkupanda na nkate kubha shalya, shibhampanganje mmebeju inkupinganga na kwiitenda imele nikumpinganga mauno gamagwinji nkupinga

ntima gwenunji gwa ntuka upunde. **11** Kwa nneyo shimmanganje matajili kwa indu yowe, nkupinga mobha gowe bhandunji bhaatendelanje eja a Nnungu, kwa ligongo lya ntuka gwenunji. **12** Pabha liengo lya shoya linkutendangali nngabha kwa jangutilape bhandunji bha ukonjelo, ikabheje bhandunji bhahagwinji shibhapundanje kutenda eja kwa a Nnungu. **13** Kwa ligongo lya ukong'ondelo gwa lyene liengoli, bhandu shibhaakuyanje a Nnungu kwa ligongo lya kunda kwenunji, na kong'ondela ga Ngani ja Mmbone ja a Kilishitu, na ntuka gunkwaatendelanga bhanganjabho na bhandu bhowe. **14** Kwa nneyo shibhannjullanje kwa a Nnungu, kwa ntima gwa kumpinganga, kwa ligongo lya nema jimpegwilwelerje na a Nnungu. **15** Tutende eja kwa a Nnungu kwa ligongo lya upo yabho yangali sha landanya!

10 Bhai, nne a Pauli namwene ngunakunshondelesheyanga kwa tungamana na uguja malinga gwa a Kilishitu, nne nili jwa kwiitimalika pungubha na mmanganya, ikabheje na jwa makangala ga bheleketa, pungubha kwa talika na mmanganya **2** Ngunakunnjuganga nnamulayanje meleketi kwa makangala pushing'ishopo, pabha nimumanyi kuti shindende nneyo ku bhandunji bhakutuganishiyanga kuti tunaakaguya ikubho ya pa shilambolyo. **3** Nankali tutama pa shilambolyo, ikabheje tukaakomana ngondo malinga shibhakomananga bhandunji bha pa shilambolyo. **4** Pabha, ikomanilo ya ngondo jetu nngabha malinga ikomanilo ya pa shilambolyo, ikabhe ishikola mashili ga a Nnungu ga kombola kuangabhanya mashili ga bhamagongo. Tunaangabhanya ng'aniyo ya unami, **5** na angabhanya ng'aniyo yowe ya kwiiniya, ibhishilwe nkupinga kutauka lumanyiyo lwa a Nnungu, tulikiwitenda ng'aniyo yowe yaakunde a Kilishitu. **6** Na shitubhe tayali kuukumula shitendi shoshowe sha tauka, kukunda kwenunji kukamilikaga. **7** Mmanganyanji nnalolanga indu kwa palangape. Bhuli, apali mundu jojowe aganishiya kuti jwenejo jwa a Kilishitu? Bhai, atuganishiyi na uwe kuti tubha a Kilishitu malinga shali jwenejo. **8** Bhai, nkali niitapaga kashoko kwa ligongo lya mashili gutupegwilwe na Bhakulungwa, ga kunshimilikanga ngulupai na nngabha ga kunn'angabhanyanga, kwa nneyo ngakola oni. **9** Ngapinga nnganishiyanje kuti ngunapinga kunn'ogoyanga kwa bhaluwa yangu. **10** Pabha bhananji bhakutinji, "Bhaluwa ya a Pauli inakalipa na ishikola malobhe ga topa, ikabhe bhayene bhahaga na uwe bhakakola makangala, nkali malobhe gabho gakakola mashili." **11** Mundu jwa nneyo amumanye kuti, itujandika mmaluwa tubhaga kwatalika, yoyo peyo ititenda putuika kunn'gwenunji. **12** Kwa kweli tukalinga kwiibhika eu kwiilinganya na bhandunji bhakwiiniyanga ashayenenji. Ikabheje bhakwiipimanga na kwiilinganya ashayenenji kwa ashayenenji ni bhangumba. **13** Nkali nneyo, uwe tukakwiiniya kwa punda, ikabhe kwiiniya kwetu shikubhe nniengo libhatupele a Nnungu, kwa liengo litutenda mpaka kunn'ishilanga mmanganyanji. **14** Twangainiya kwa punda, pabha putwaishe kungwenunji kulunguya Ngani ja Mmbone ja a Kilishitu, twangapunda mipika. **15** Bhai, tukakwiiniya kwa liengo libhatendilanje bhananji, ikabhe tunaakulupalila kuti ngulupai jenunji shijipunde, na liengo lyetu shilipunde kujenjeshaka munkumbi gwenunji,

gwangali pelenganya mipika jitubhishilwe na a Nnungu. **16** Penepo shitulunguye Ngani ja Mmbone mwilambo ina, kwa nneyo shitwiiniye kwa ligongo lya liengo lyetu na nngabha libhatendilanje bhananji. **17** Ikabheje, malinga shigakuti lugula Majandiko ga Ukonjelo, "Jwene apinga kwiiniya, aiiniye kwa ligongo lya Bhakulungwa." **18** Pabha mundu apingwa, nngabha akwiilumbilila nnyene, ikabhe alumbililwa na Bhakulungwa.

11 Na mbaya mwiipiililanje kashoko ga ungumba gwangu! Elo, mwiipiililanje. **2** Njikola lupimiilo genu mmanganyanji, malinga lwa a Nnungu, pabha mmanganya punninginji mbuti mwali akanabhe kummanya jwannume, junintomele kuka jwannume jumo, ni a Kilishitu. **3** Ikabheje ngunajogopa, inabha malinga lijoka jula, kwa unami gwakwe ashinkwaatema a Awa kwa lunda lwakwe, ng'aniyo yenunji inapuganywe nileka kulupalika na kwiishoya kwenunji kwa a Kilishitu. **4** Pabha aikaga mundu juna nilunguya ngani ja a Yesu bhanape, bhutukanakwaalunguya uwe, mmanganyanji nnakumposhelanga, na punda genego, nnakunkudanga mbumu juna eu Ngani ja Mmbone jina jikalandana na jimposhelenje kopoka kwetu uwe! **5** Ikabheje ngaganishiya kuti nne najwanshoko punda bhene bhashemwanga kwali, "Mitume bhakulu." **6** Nkali ngaakombola bheleketa ukotoyo, ikabheje ngwete lumanyio, lyeneli tulangwiye kunn'gwenunji gwangali nng'iyi mmbali yowe na mobha gowe. **7** Nne nashinkunnungushiyanga Ngani ja Mmbone ja a Nnungu gwangali kulipwa, nashinkwiituluya nkupinga ninkweyanje mmanganyanji. Bhuli nashinkulebha? **8** Punatendaga liengo kungwenunji, natendaga pegwa indu na bhandunji bhana, eu meleketi kuti, nashinkupokonyola indu yabhonji ninn'angutilanje mmanganyanji. **9** Punaliji na mmanganya nangannolela mundu jojowe ga shindu shoshowe, pabha Bhakilishitu ajetunji bhakopokenje ku Makedonia bhambelenje kila shindu shinapinjile. Nashinkwiteiga ngunannolele mundu kwa shoshowe na ngunapunda tenda nneyo. **10** Malinga shijili kweli ja a Kilishitu mumtima gwangu, jwakwapi mundu shang'ibhiliile mmbali yowe ya ku Akaya, ga kwiiniya kwangu. **11** Kwa nndi ngunabheleketa nneyo? Kutu kwa ligongo ngakumpinganga? Nngabha, a Nnungu bhamumanyi kuti ngulikumpinganga! **12** Na shimbunde kutenda malinga shingutenda nnaino shino, nkupinga naibhiliilanje bhene bhaaloleyanga kwiiniya, kuti bhanatendanga liengo malinga uwe. **13** Pabha, bhanganjabho ashimitume bha unami, bhakamula liengo bhanami, bhalikiwitombanga mbuti ashimitume bha kweli bha a Kilishitu. **14** Wala nngabha ga lapa, pabha nkali Lishetani nnyene anakwitamba mbuti malaika jwa shilangaya! **15** Kwa nneyo nngabha ga lapa, ibhaga bhatumishi bhakwe bhanakwitendanga mbuti bhatumishi bhanguja pa meyo ga a Nnungu. Kumpelo shibhaukulwanje kwa itendi yabhonji. **16** Kabhili nguti, mundu anang'anishiyi kuti nanngumba. Ikabheje ntendangaga nneyo, bhai, nndolelelanje mbuti nanngumba nkupinga ngole sha kwiiniya kapela kashoko. **17** Shingubheleketa nnainoshi nngabha shibhapinga Bhakulungwa, ikabheje ga kwiiniyaga ngunabheleketa mbuti nngumba. **18** Pabha bhahagwinjinji bhanakwitamba kwa gene gubhatendilanje pa shilambolyo, numbe nne shiiniyiye. **19**

Mmanganya nakakwaapatanga bhangu, paha nshikolanga lunda! 20 Nnakuipililanga nkali mundu ammikanje utumwa, eu akunnjibhanga, eu akunn'g'amulishanga, eu akunn'yegayanga eu akunkomanga mapapa kumeyo! 21 Ngunakola oni kubheleketa kuti kwa genego twashinkwiinyegaya. Ikaheje malinga bhandunji bhana shibhalinganga kwiiniya ga shindu shoshowe, ngunabheleketa mbuti ngumba, numbe nne shiniiniye. 22 Bhuli, bhanyabho Bhaebhulania? Nkali nne Muebhulania. Bhuli, bhanyabho Bhaishilaeli? Nkali nne Mwishilaeli. Bhanyabho lubheleko lwa a Bhulaimu? Nkali nne Lubheleko lwa a Bhulaimu. 23 Bhalabhojni bhatumishi bha a Kilishitu? Shimelekete mbuti ngwete shalubha. Nkali nne nantumishi jwa a Kilishitu numbe kupunda bhanyabho, nne njitenda liengo likulungwa, njitabhwa papagwinji, na njikomwa papagwinji, na papagwinji punaliji tome nawa. 24 Ku Bhayaudi nashinkukomwa paano, ndomondo makumi gatatu na tisha shaleshepe shimope iishile makumi nsheshe. 25 Nashinkukomwa imbo patatu na Bhaloma, na kamo nashinkukomwa maganga. Patatu meli jashinkudemeshela mbhaali, kamo natemi mmashi ga bhaali shilo na mui. 26 Papagwinji mmwanja gwangu njimikana na ya jogoya, ya ndanje ya mashi, na ya jogoya ya bhaapokonyola, na ya jogoya kopoka ku bhashilambo ajangunji, na ya kopoka ku bhandunji bha ilambo ina, na ya jogoya ya mwiilambo, na ya mukonde, na ya mbhaali, na ya a Bhakilishitu ajetunji bha unami. 27 Nashinkulaga mmaengo ga topa, njisheya papagwinji. Njilaga shibhanga na njjota, papagwinji natendaga tama gwangali kulya, njilaga mmbepo gwangali ngubho. 28 Na kupunda genego, mobha gowe ngunatopelwa na ng'aniyo ya liengo lya mmakanisha gowe. 29 Apagwaga mundu jwangali mashili na nne ngakola mashili, nneyo peyo mundu alebhaga, nne inamboteka. 30 Mbinjkwaga kwiiniya, bhai, shiniiniye kwa ungakola mashili gwangu. 31 A Nnungu, Ainabhabho Bhakulungwa bhetu a Yesu, lina lyabho likuywe pitipiti, bhenebho bhamumanyi ngaabheleketa unami. (aiōn g165) 32 Punaliji ku Dameshiki, bhakulungwa bhamo bha a mpalume Aleta, bhashinkubhika ulinda pa shilambo nkupinga ngamulwe. 33 Ikaheje, nashinkutuluywa palanga nshikapu shikulungwa, kupitila pa lilanga lya nnikumba gunaatolweshe.

12 Bhai ngunapinga kwiiniya, nkali ikapwae! Ikaheje nnaino ngunapinga bheleketa ga mabhono na maibhulo gumbatile kopoka ku Bhakulungwa. 2 Nimmanyi mundu jumo abhakulupalile a Yesu, yaka likumi limo na nsheshe ipitile, ashinkutolwa mpaka kunnungu kwataliya kaje. Ibhaga kweneke apiteje kwa shiilu eu kwa mbume nne ngakumumanya, a Nnungu bhamumanyi. 3 Numbe nne ngunabhujila kubheleketa kuti, jwene mundu monaga apite kwa shiilu eu kwa mbume, nne ngakumumanya, ikaheje a Nnungu bhamumanyi. 4 Ashinkutolwa mpaka kupaladisho, kweneke ashinkupilikana indu ya nng'iyoy ikapinjikwa mundu kutagulila. 5 Bhai, mbinga kwiiniya gaka mundu malinga jwenejo, ikaheje ngaiiniya gangu namwene, ikaheje kwa ungakola mashili gwangu. 6 Nkali ngapinjile kwiiniya nganabhe nangumba, paha ngabhelekete ya kweli jika. Ikaheje ngaiiniya, nkupinga mundu anang'anishiye punda shinguti tenda na bheleketa. 7 Ikaheje nkupinga ngunaiiniye kwa gwene

ng'ibhulo nkulugo, nashinkupegwa shindu sha poteka mbuti mbiba nshiilu shangu kubha mbuti muntenga juka Lishetani amboteshe, nkupinga ngunapunde kwiiniya. 8 Kwa ligongo lya shene shindusho, nashinkwashondelesheya Bhakulungwa patatu nkupinga bhanjosheye shene shindusho. 9 Ikaheje gubhanugulile, "Nema jangu shijimpwae, paha mashili gangu ganamalila muungakola mashili." Bhai, ngunaengwa kwiiniya ga ungakola mashili gwangu, nkupinga mashili ga a Kilishitu gatame na nne. 10 Kwa nneyo ngunaengwa na ungakola mashili gwangu, na matukano, na shilaje na mboteko kwa ligongo lya a Kilishitu, paha pungakola mashili, nepene ni pungubha na mashili. 11 Njibha mbuti nangumba, ikaheje mmanganyanji nshindendanga mme nneyo. Mmanganyanji mwapinjikwenje kung'iniya nne. Paha, ningabhe shindu shoshowe, nne nngabha najwanshoko punda bhene bhakwishemanga "Mitume bhakulu." 12 Itendi ya ilangulo na ilapo yashinkutendeka munkumbi gwenunji, ilanguya kuti nne ntume kwa kwiikakatimila kwa punda. 13 Bhuli, shindu shashi shintubhilwenje kupunda makanisha gana, ikaheje nne nangantotoyanga nkupinga nnyangutulanje? Shonde nneshelelanje kwa shinebhiesho! 14 Nnaino pui tayali kunn'owelanga gwatatu na ngantopelanga. Paha shingupinga nngabha indu yenunji, ikaheje ngumpunganga mmanganyanji. Paha, bhana bhakakwaabshilanga shibhiko bhaakwetenje, ikaheje bhaakwetenje ni bhakwaabshilanga shibhiko ashibhana bhahonji. 15 Nne njingwa kushoya yowe ingwete nkali kwishoya namwene, nkupinga kunnjangutitanga mmanganyanji. Nkali ngumpinjijangayo, mmanganya nnambinganga kashokope. 16 Bhai, nkundanje kuti nangantopelanga. Ikaheje bhandunji bhana shibhaganishiyange kuti, paha njikola lunda nimpatilenje kwa kuntekeyanga. 17 Bhuli, nne nantekeyenje indu yenunji kubhantanga bhunaatumilenje kunnngwenunji? 18 Nne nashinkwaashondelesheya a Tito, gunaatumile kungwenunji naka mpwetu juna. Bhuli, a Tito bhantekeyenje? Bhuli, nkakumumanyanga kuti uwe tunalongoywa na ng'aniyo imo na itendi yetu imo? 19 Pana nnaganishiyanga kuti tunabheleketa nkwiitapula kungwenunji! Ikaheje, tunabheleketa genego pa meyo ga a Nnungu, tuli tuludene na a Kilishitu. Gene gowe gututendaga ashaapwetu, nkupinga kunshimilikanga. 20 Paha ngunajogopa, pana pushing'ishe kunnngwenunji ngang'imananga malinga shingupinga, na mmanganya nkamona malinga shinkupinganga. Ngunajogopa ngunakunn'imananga nninginji na mpwai, na lupimililo, na nnjimwa na kulambililana, na lung'wenyi na matukano, na kuipuna na nnjasha munkumbi gwenunji. 21 Ngunajogopa pushing'ishe mwanja gunago, a Nnungu bhangu shibhandende niitimalishe, shiniigutanjile kwa ligongo lya bhahagwinji bhalebhilenje, ikaheje bhangaipetanga kwa ya nyata yabhonji na labhalabha kwabhonji na ilokoli yabhonji yangali ya mmbone ibhatendilenje.

13 Gweguno mwanja gwangu gwa tatu gushing'ishe kungwenunji Malinga Majandiko ga Ukonjelo shigaabheleketa. "Ngani jojowe pujimala kwa ukong'ondelo gwa bhandu bhahili eu bhatatu." 2 Nannugulilenje, malinga mwanja gwangu gwa bhili, ngunakunnugulilanga kabhili nili kwataliya, bhatendilenje ilebho bhukala na bhananji bhowe,

pushing'ishepo ngaabhonelanga shiya. 3 Shindende nneyo pabha mmanganyanji nnapinganga ukong'ondelo, kuti a Yesu bhanabheleketa na mmanganyanji kupitila nne. Kwenu mmanganya a Kilishitu nngabha kuti bhngali mashili, ikabhe shibhalanguye mashili gabho munkumbi gwenunji. 4 Pabha pubhakomelwe munshalabha bhakakweteje mashili, ikabheje nnaino bhanaatama kwa mashili ga a Nnungu. Numbe na uwe twangali mashili nkulundana na bhenebho, ikabheje tunatama nabho kwa mashili ga a Nnungu, nkupinga tutende liengo munkumbi gwenunji. 5 Mwiibhuyanje mwaashayenenji monaga mwiishimilikanje ngulupai. Mwiibhuyanje mwaashayenenji. Bhuli, nkakumumanyanga kuti a Yesu Kilishitu mubhali mmitima jenunji? Monaga nngabha, bhai nnepelenje. 6 Ikabheje ngunakulupalila kuti mmanganya mmumanyinji kuti uwe twangalepela. 7 Tunakwaajuga a Nnungu nnatendanje shangali sha mmbone shoshowe, nngabha tubhoneshe kuti tushikombola, ikabhe mmanganya ntendanje ya mmbone nkali tubhoneshe mbuti tushilepela. 8 Pabha tukatenda shoshowe sha tauka ya kweli, ikabhe tunapunda shumiya ya kweli. 9 Tunakwiinonyela mmanganya punkukolanga mashili nkali uwe tukakole mashili, kwa nneyo tunakunjujilanga nkamilikanje. 10 Ligongo lya kunnjandishilanga jene bhaluwa jino nili kwatalika, ni nkupinga pushing'ishe kungwenunji nnandendanje ngalipe kwa mashili gubhambale Bhakulungwa, elo, mashili ga kuntaganga ntima na nngabha ga kummulaganga ntima. 11 Kwa nneyo, ashaalongo ajangunji, nne mwanja! Nkamulanje malajilo gangu, na ntumbililanje kwiishimilika, na ntagane ntima, nkolanje ng'aniyo imo, na ntamangane kwa ulele, na a Nnungu bhakumpinganga na bha ulele, bhabhe na mmanganyanji. 12 Nnamushilananje kwa shalamu ja ukonjelo. 13 Bhandunji bhowe bha a Nnungu bhanakunnamushilanga kwa nema ja a Yesu Kilishitu. 14 Nema ja Bhakulungwa a Yesu Kilishitu, na kupinga kwa a Nnungu na kulundana naka Mbumu jwa Ukonjelo, ibhe na mmanganyanji mmowe.

Bhagalatia

1 Nne a Pauli ntume, nangatumwa na bhandunji, ikabhe na a Yesu Kilishitu na Atati a Nnungu, bhaayushiye a Yesu bhakaweje, 2 na ashaalongo bhowe bhalinginji pamo na nne tunakunjumushilanga mmanganyani bha makanisha ga ku Galatia. **3** Tunakunjujilanga nema na ulele kwa Atati a Nnungu na ku Bhakulungwa bhetu a Yesu Kilishitu. **4** A Yesu bhashinkwiishoya bhayene, kwa ligongo lya ilebho yetu nkupinga bhatutapule na ya nyata ya nshilambolyo mututama muno, malinga shibhapijile Ainabhetu bhetu a Nnungu. (**aiōn g165**) **5** Ukonjelo gowe ubhe na bhenebho pitipiti, nneyo peyo. (**aiōn g165**) **6** Ngunakunkanganigwanga, pabha shangupe nnakwalekanga bhene bhanshemilenje kwa mboka ya a Kilishitu, nitendebrushila ngani ja mmbone jina pe. **7** Numbwe nngabha jipali ngani ja mmbone jina, ikabhe bhapali bhandunji bhakumpuganyanga nkupinga bhajipuganyanje Ngani ja Mmbone ja a Kilishitu. **8** Ikabheje, nkali ibhaga jwa munkumbi gwetu eu malaika jwa kunnungu, shannungushiyanje ngani jojowe jikalandana na jene jitunnungushiyanje uwe, aloshe na a Nnungu. **9** Malinga shitwammalanjilenje, tunabhujila kabhili nnaino, mundu jojowe akunnungushiyanje ngani jina jojowe jikalandana na jene jintupilikenenje uwe, aloshe! **10** Bhai nnaino nguloleya kupingwa na bhandunji eu na a Nnungu? Eu ngupinga kwaikonjeleya ku bhandunji? Kaliji nneyo, nne nganabhe ntumishi jwa a Kilishitu. **11** Ashaalongo ajangunji pungupinga mmanyanje kuti, ngani jininnungushiyanje jangakopoka kubhandunji. **12** Pabha nangaposhela wala kujiganywa naka mundu, ikabhe a Yesu Kilishitu bhayene ni bhang'ibhulile. **13** Na mwapiikenenje ngani jangu ga punaliji bhukala mundu jwa dini ja Shiyaudi, kuti natendaga shimwa na likanisha lya a Nnungu kwa kaje, kuishila pa pinga kwaamaliyanga. **14** Kwa nneyo njinkwiishimiika na dini ja Shiyaudi kwa kaje, kupunda ashaambwana ajangunji bhowe, nikagulila malajilo ga ashaambuje kwa kaje. **15** Ikabheje nne nganabhe bhelekwa, a Nnungu bhashinkung'agula kwa nema jabho kwa pinga kwabho. **16** Bhakatumbilileje kung'ibhulila ga Bhanabhabho, nkupinga naalungushiyanje bhandu bhagalinginji Bhayaudi ga ngani jabho. Kwa nneyo nangabhuya kuka mundu jojowe, **17** wala nangajomboka kwenda ku Yelushalemu kubhalinginji mitume bha nta bhaagwilwenje nne nganabhe agulwa, ikabhe gunijendele ku Alabha, kungai gumujile kabhili ku Dameshiki. **18** Ikapiteje yaka itatu, gunyombweshe kwenda ku Yelushalemu kuamanyigana na a Kepa, gundemi kunngwabho mobha likumi limo na nng'ano. **19** Ikabheje nangammona ntume juna, ikabhe a Yakobho, apwabho Bhakulungwa bhetu. **20** Gene gungunjandishilanga gano a Nnungu bhagamanyi kuti nngabha ga unami. **21** Kungai gumbite ilambo ya ku Shilia na ku Kilikia. **22** Ikabheje gene mobhago nne ngamanyikanaga munkumbi gwa bhakilishitu bha ku Yudea. **23** Ikabhe, pabha bhapiikenenje kuti, "Bhene bhandu bhatupotekaga bhukala, nnaino bhanalunguya ngulupai jila jibhalingaga kujibhulaga bhukala jila." **24** Gubhaalumbililenje a Nnungu, ga ligongo lyangu nne.

2 Ikapiteje yaka likumi limo na nsheshe, gunyombweshe kabhili kwenda ku Yelushalemu gunongene na a Bhanabha na a Tito. **2** Bhai njinkwenda kweneke pabha njinkupegwa nng'ibhulo na a Nnungu. Njinkupinjikwa kutandubha kwaabhalanjilanga ashikalongolele bha likanisha lya a Nnungu pa jika. Gunaatendilenje bhaimanyanje inalunguyaga kubhandu bha ilambo ina, nashinkutenda nneyo nkupinga liengo lyangu linatendile na lingutenda nnaino linabhe lya yoyo. **3** Na a Tito Bhagiliki bhalongene na nne bhagashishilihiwa kujaluka nkali bhaliji Bhagiliki. **4** Ikabheje bhapalinji ashaapwetu bha kwiitambanga, bhailundilenje na uwe kwa nng'yo, bhatumbililenje kwaataga unyago. Bhene bhandunjibho bhashinkwiinjinyanga nkupinga kunushishiya bhamumanyanje shitukuti tama kwa ungwana tukulundaneje na a Yesu Kilishitu, kupinga bhatubhikanje muutumwa. **5** Uwe twangapinga kulundana na bhene bhandunjibho wala kashoko, nkupinga Ngani ja Mmbone ja kweli jinkulupalilenje, jitame mmitima jenunji mobha gowe. **6** Bhai nkali bhebhalala bhalugwilwenje kuti bhakulungwanji, nne ngwibhonela kuti bhagalinginji shindu, pabha ukumu ja a Nnungu jikalola gundu gwa palanga, kwa nneyo nne nguti nei, bhaalumbililwangabho bhakanyenjesheya shindu. **7** Ikabhe gubhamumanyinji kuti njipegwa Ngani ja Mmbone kubhandunji bhagajalukanga, malinga a Petili shibhapegwilwe Ngani ja Mmbone Kubhayaudi. **8** Pabha bhene bhaakombweye a Petili kwaalungushiyanje Bhayaudi, ni bhagombweye nkali nne kulunguya kubhandunji bha ilambo ina. **9** Bhai a Yakobho na a Kepa na a Yowana ashikalongolele bhakulu, bhakamumanyanjeje kuti a Nnungu bhashimba nema, gubhatupelenje nkono nne na a Bhanabha kulunguya kuti bhanakutupinjilanga liengo lya mmbone, nkupinga uwe tukulunguye kubhandunji bha ilambo ina na bhaganyabho ku Bhayaudi. **10** Ikabheje gubhatushondelesheyenje shindu shimo, kuti, tunaalibhalanje bhaalaga. Bhai shene shindusho nne nashinkutumbilila kushikamula kwa kaje. **11** Ikabheje a Kepa bhakaisheje ku Antiochia ja Kushilia nashinkwatauka palugwinjili pabha bhashinkuobha kaje. **12** Pabha bhakanabhe ikangananga bhandunji bhalajilwenje na a Yakobho, a Petili bhatendaga lya na bhandunji bhalinginji ngabha Bhayaudi. Ikabheje bhakaikangananje, a Petili gubhaleshile kulya nabhonji nkujogopa Bhayaudi bhakoposhelenje kwa a Yakobho. **13** Bhai nkali Bhayaudi bhananji bhala gubhailundilenje na a Petili, na nkali a Bhanabha na bhalabho gubhaijiniye muugulumba gwabhonji. **14** Nne ngabhoneje itendi yabhonji nngabha ya malinga shiikupinjikwa nkweni na Ngani ja Mmbone, gunaabhalanjile a Kepa pa bhandu bhowe kuti, "Monaga mwe Mmayaudi nkutama mwiikubho ya bhandunji bhagajalukanga, na mbuti nngabha Nnyaudi, pakuti nnakwakwikwilishiyanga bhalinginji nngabha Bhayaudi kukagulila ikubho ya Shiyaudi?" **15** Uwe tuli Bhayaudi kwa bhelekwa, nngabha bhandu bha ilambo ina bhalebhilenje! **16** Akuno tulikumumanya kuti mundu akabhoneka akwete aki kwa a Nnungu, kwa itendi ya shalia ja a Musha, ikabhe kwa ligongo lya kwaakulupalila a Yesu Kilishitu. Uwe tushikwakulupalila a Yesu Kilishitu, nkupinga tukole aki kwa ligongo lya ngulupai ya a Kilishitu, na nngabha kwa itendi ya shalia ja a Musha, pabha kwa itendi ya shalia ja a Musha

jwakwa mundu shakole aki. 17 Monaga uwe twaashayene tunaloleya kupegwa aki kwa lundana na a Yesu, inabhoneka tushilebha malinga bhandu bhananji bhatendanga yambi, bhuli, lyeneli linalangula kuti a Kilishitu bhashibha shiumilo sha yambi? Nng'oope! 18 Pabha mujilaga kabhili gene gunagaengebhenye gala, bhai penepo ngunakwilanguya kuti namwene nankulebha. 19 Pabha nne ibhaga kwa kagulila shalia ja a Musha, najiwilile nkupinga ndame kwa ligongo lya a Nnungu, njiwa pamo na a Kilishitu. 20 Njikomelwa munshalabha pamo na a Yesu Kilishitu, ikabheje najwankoto. Wala nngabha nne kabhili, ikabhe a Yesu bhali mmunda jangu ni bhabhakoto na gumi gungwete nnaino guno, mumbatile nkwaakulupalila Bhanabhabho a Nnungu, bhambinjile, nikwiishoya mbepei kwa ligongo lyangu nne. 21 Ngapetekuya nema ja a Nnungu, ibhaga aki jinapatikana kwa Shalia ja a Musha, bhai kuwa kwa a Yesu Kilishitu kwa yoyo.

3 Mmanganyanji Bhagalatia mmangumba! Gani ampugenyenje? Mmanganyanji mwabhalanjilwenje indu yowe gwangali nng'yo, itaya kuti a Yesu Kilishitu bhashinkukomelwa munshalabha. 2 Ngunapinga mmalanjilanje shindu shimo. Bhuli, Mbumu jwa a Nnungu mwashinkumposhelanga kwa kagulila Shalia ja a Musha? Eu kwa ngulupai ya nkupilikana Ngani ja Mmbone? 3 Bhuli mmanganyanji mwangalinginji lunda nnei? Pumwatandubhenje mwashinkulongoywanga naka Mbumu jwa a Nnungu, nnaino nnapinganga maliya kwa mashili genunji? 4 Bhuli, indu yowe yankoposhelenje ila ibhe yayoyope? Nnganong'a! 5 Igala a Nnungu bhakumpanganga Mbumu jwabho na ilangulo ibhoneka punkukamulanga liengo, bhuli bhanatenda nneyo kwa itendi ya Shalia ja a Musha? Eu kwa ngulupai ya nkupilikana Ngani ja Mmbone? 6 Bhai malinga a Bhulaimu shibhabhoneshe kuti bhakwete aki kwa ligongo lya kwaakulupalila a Nnungu. 7 Bhai nnaino, mmumanyanje kuti, "Bhakwetenje aki, ni bhalinginji bhana bha a Bhulaimu." 8 Numb Majandiko ga a Nnungu galugwile koposhela bhukala kuti, "Bhalinginji nngabha Bhayaudi, shibhagegwanje aki na a Nnungu kwa ligongo lya ngulupai yabhoriji." Pabha a Nnungu bhukala bhaabhalanjile a Bhulaimu Ngani ja Mmbone kuti, "Kwa ligongo lyenu mmwe a Nnungu shibhaapanganje mboka bhandu bhailambolyo yowe." 9 Kwa nneyo bhowe bhalinginji na ngulupai bhanapegwanja mboka pamo na a Bhulaimu bhandu bhakwete ngulupai. 10 Pabha bhowe bhaakulupalilanga kukagulila Shalia ja a Musha mbhalinginji mmaloshi. Pabha ishijandikwa kuti, "Ashiloshwa mundu jojowe akakagulila Shalia yowe ya a Musha ijandikwe nshitabhu sha Shalia." 11 Ilimanyikana kuti mundu akapegwa aki na a Nnungu kwa Shalia ja a Musha. Pabha Majandiko gakuti, "Akwete ngulupai shaatame kwa ngulupai." 12 Ikabheje Shalia ja a Musha jikakuntenda mundu akole ngulupai, ikabhe Majandiko gakuti, "Akugakagulila genego shaatame kwa genego." 13 A Kilishitu bhashikututapula nkuloshwa na Shalia ja a Musha, bhashinkuloshwa kwa ligongo lyetu uwe, pabha ishijandikwa, "Jojowe akomelwa munkongo ashiloshwa." 14 Lyeneli lishinkutendeka nkupinga mboka ibhagegwilwe a Bhulaimu yaishilanje bhandu bhananji bhalinginji nngabha Bhayaudi kwa kwakulupalila a Yesu Kilishitu, nkupinga

tuposhele malagano ga a Nnungu ga Mbumu jwa Mmbone kwa ngulupai. 15 Ashaalongo ajangunji Mmakilishitu, shinintashyanje lutango lwangali ukomu. Malinga mundu abhika malagano nikong'ondela, jwakwa mundu jwa tauka eu kujenesheya shindu. 16 Bhai a Nnungu bhashinkwapa miadi jabho a Bhulaimu na lubheleko lwabho. Majandiko gakataya, "Na bha ibheleko yabho," nkupinga kulanguya kuti yaigwinji, ikabhe ganataya ga "lubheleko," yani "Jumo" malombolelo gakwe a Kilishitu. 17 Shingulugula ni ashino, a Nnungu bhashinkubhika Shalia ja Musha nikong'ondela. Shalia ja a Musha jikakombola kulekanya Malagano ga a Nnungu na a Bhulaimu, ikapiteje yaka miya pasheshe na makumi gatatu. 18 Pabha upo ya a Nnungu ibhaga kwa Shalia, bhai nngabha kabhili kwa miadi. Ikabheje a Nnungu bhashinkwapa upo a Bhulaimu kwa miadi. 19 Bhai shalia ni nndi? Jashinkubhikwa nkupinga kulanguya ilebho, mpaka pushaishe jwa lubheleko lwa a Bhulaimu jubhammishile miadi jila. Shalia pujaishe na malaika kupitila kuka mundu mbuti muntenga. 20 Bhai kwa nneyo nkupatanisha akapinjikwa, monaga shindu shiyene sha upande gumo, na a Nnungu ni bhamo. 21 "Bhai, bhuli shalia ja a Musha jinataukangana na miadi ja a Nnungu? Nng'oope! Monaga jikapali Shalia ja kombola kwaapanganga bhandunji gumi, bhai tukakwete aki kwa Shalia ja a Musha. 22 Ikabheje majandiko ga a Nnungu ganalugula kuti, shilambolyo showe mushili mmashili ga yambi, nkupinga bhowe shibhaakulupalilanje a Yesu Kilishitu, bhapegwanje miadi jibhabhishile a Nnungu." 23 "Ikabheje tukanabhepegwa ngulupai, mutwaliwi mmashili ga Shalia ja a Musha, tutabhilwe nkulindilila pushijishe jene ngulupaijo. 24 Kwa nneyo Shalia ja a Musha jatendaga kutulela mpaka pushibhaishe a Yesu Kilishitu, nkupinga tupegwe aki kupitila ngulupai yetu. 25 Kwa nneyo pakubha ngulupai jjishe, uwe twanngabha kabhili nkulelwa na Shalia." 26 "Pabha mmowenji nshibhanganga bhana bha a Nnungu kwa ngulupai, kwa lundana na a Yesu Kilishitu. 27 Pabha mmowenji mmatiswenje na lundana na a Kilishitu mbuti nshikwawalanga a Kilishitu. 28 Kwa nneyo shakwa shakuti nne na Nnyaudi eu Ngiliiki eu ntumwa eu nngabha ntumwa wala jwanume eu jwankongwe, pabha mmowenji mmamo kwa a Yesu Kilishitu. 29 Bhai monaga mmanganyanji mmandunji bha a Kilishitu, nshibhanganga mmalubheleko lwa a Bhulaimu, kwa nneyo shimposhelanje malinga miadi jibhalugwile a Nnungu."

4 Ikabheje nne nguti nnei, alishi abhaga akanabhe kula, pakwibhela malinga ntumwa, nkali ali nnyene indu yowe. 2 Ikabhe bhaagoyanga indu ika mwana na kunnela, mpaka pushigaishile mobha gabhishilwe na ainagwe. 3 Na uwe puyaliji nneyo peyo, putwaliwi malinga bhana, nibha bhatumwa mmashili ga ikubho ya bhandunji bha pa shilambolyo. 4 Ikabheje gakaishileje mobha gubhapanjile a Nnungu, gubhantumile Mwana gwabho, abhelekwene na jwankongwe, gwatemi kwa Shalia ja a Musha, 5 nkupinga abhagombolanje bhene bhalinginji mmashili ga Shalia ja a Musha na uwe tubhe tubhana bha a Nnungu. 6 Kwa nneyo mmanganyanji nnaino pabha nshibhanganga bhana bha a Nnungu, bhai a Nnungu bhashikuntuma Mbumu juka Mwana gwabho mmitima

jetu, Mbumu ashema alinkuti, "Abha" Malombolelo gakwe, "Atati". 7 Bhai monaga nneyo, mmwe nngabha mmatumwa kabhili, ikabhe mmana. Bhai ibhaga mmana, shimposhele yowe a Nnungu ibhaabshilenje ashibhana bhabho. 8 Pabha bhukalago nkaamanyangaga a Nnungu, kwa nneyo mwashinkwaakumulilanga liengo ashimaoka bhalingini nngabha a Nnungu bha kweli. 9 Bhai pabha nnaino mwamanyinji a Nnungu, eu tujile nnimanyikanga na a Nnungu, igala nkukombolanga bhuli kugabhujila kabhili majiganyo gangali ga mmbone nkupinga mmanganje bhatumwa kabhili? 10 Nnakugulilanga mobha na miei na malanga na yaka. 11 Nguna kwijogopela kuti liengo lininkamulilenje linabha lyayoyo! 12 Ashaalongo ajangunji nguna kunshondelesheyanga mmanganje malinga nne gwangali kamulila shalia ya Shiyaudi kabhili, pabha na nne puni malinga mmanganyanji kwa nngatama nshalia ya Shiyaudi. Mwangandendelanga shindu shoshowe sha nyata. 13 Ikabhe mmumanyinji kuti gwantai nannungushiyenje Ngani ja Mmbone akuno niilwala. 14 Mwashinkulingwanga kwa ligongo lya lwala kwangu, nkali nneyo mwanganyegayanga wala kungana, ikabhe nshinkumboshelanga malinga malaika jwa a Nnungu, eu malinga a Yesu Kilishitu bhayene. 15 Shikoposhele nndi shantendilenje nnekanje nkali kuangalala kwenunnji? Pabha nne nguti nnei, gegala mobha gala kaliji nkaiashoshiyenje nitenda indu kwa ligongo lyangu nne, nakombolenje nkali kumba meyo genunji. 16 Bhuli, nnaino njibha nampwai njnenunji ga bheleketa ya kweli? 17 Bhene bhananji bhanakwiitemba kumpinganga, nngabha kwa kumpinjilanga ya mmbone. Ikabhe bhanaapinganga kunnekanyanga na nne, nkupinga mwaatendelanje liengo bhene bhanganyabho. 18 Ni shammbone mobha gowe kutenda ya mmbone, wala nngabha mobha gungubha na mmanganyanji. 19 Ashibhanangu, inamboteka malinga bhakongwe bhakwete shitumbo, nneyo peyo shingupotekwa kwa ligongo lyenunji mpaka pushinnandanjanje na a Kilishitu mmitima jenunji. 20 Kaliji nnaino ngaaliji na mmanganyanji, nkamweninji shinguti bheleketa! Pabha ngunakola lipamba kwa ligongo lyenunji! 21 Nnugulilanje mmanganyanji Mmagalatia, nkupinganga kagulila Shalia ja a Musha, bhuli, nkapiilikananga shijilugula Shaliajo? 22 Pabha ishijandikwa kuti, a Bhulaimu bhashinkukola bhana bhabhili, jumo abhelekwe na bhakongwe bhali bhatumwa bhabho, na jwabhili abhelekwe na akongobhabho. 23 Mwana abhelekwe na bhakongwe bhali bhatumwa bhala, pabhelekwe nngabha kwa miadi jojowe ja a Nnungu, ikabhe mwana abhelekwe na akongobhabho, pabhelekwe kwa miadi na a Nnungu. 24 Genega gashibha nnandanyo, pabha bhene bhanabhakongwe bhabhili bha bhashibhanganga malinga malagano gabhili, limo kukoposhela kushitumbi sha Shinai, litepo lya a Ajili libhelekwele muutumwa. 25 Pabha a Ajili pughali malinga shitumbi sha ku Shinai sha ku Alabhia, gushilandana na ku Yelushalemu ja nnaino, pabha Shinai muuli muutumwa pamo na ashibhanagwe. 26 Kwa nneyo Yelushalemu ja kunani ja ungwana, numbe ni anyina bhetu. 27 Pabha ishijandikwa, "Mwinonyele mwe ananii, nkaabheleka bhana, nng'utiye lilobhe mwe nkanabhe kola shitumbo, pabha bhana bha bhakongwe bhaleshilwe, bhabhagwinjinji, kupunda bhakwete bhalume." 28 Bhai ashaalongo ajangunji, na uwe ni bhana a Nnungu kwa

ligongo ja miadi malinga ja a Ishaka. 29 Ikabheje ni malinga gene mobha gala, mwana abhelekwe na bhatumwa shanshimile jwene abhelekwe kwa Mbumu jwa a Nnungu, nneyo peyo shiili nnaino. 30 Bhai majandiko gakuti bhuli? Gakuti "Mwaabhanganje bhakongwe bhatumwa naka mwana gwabho, pabha mwana jwa bhatumwa akaapata ulishi pamo naka mwana abhelekwe na bhakongwe bhangwana." 31 Kwa nneyo ashaalongo ajangu, uwe nngabha bhana bha bhakongwe bhatumwa, ikabheje bhana bha bhakongwe bhangwana.

5 A Kilishitu bhashikutugombola kopoka muutumwa nkupinga tubhe tubhangwana kaje. Bhai nnjimanganje ukoto nnaibhikanje kabhili muutumwa. 2 Mpilikananje, nne a Pauli ngunakunnugulilanga kuti, nkali njalukangaga nngabha kuti a Kilishitu shibhannjanguutilanje shindu. 3 Kabhili nguti nnei, mundu jojowe apingaga kujaluka papinjika kukagulila Shalia jowe ja a Musha. 4 Bhai monaga nnapinganga mmonekanje mmambonenji nkukagulila Shalia ja a Musha, bhai penepo nshikwiembuyanga na a Kilishitu, numbe gwangali nema ja a Nnungu. 5 Pabha uwe tunakulupalila kupegwa aki jetu kwa ngulupai ya Mbumu jwa a Nnungu. 6 Pabha kujaluka na ngajaluka nkulundana na a Yesu Kilishitu, kukajenjesheya shindu, ikabhe shindu sha mmbone ni kukola ngulupai jikamula liengo nkupingana. 7 Pakuti mwatendaga kagulilanga ukoto! Bhai gani ang'ibhilenje nnakundanje ya kweli. 8 Bhandendilenje nneyo, nngabha a Nnungu bhanshemilenje. 9 Gene majiganyo ga unamiga ni malinga ngedule shishoko shikombola kushashamiya utandi gwanngwinji! 10 Nne ngunakulupalila kuti nkulundana na Bhakulungwa bhetu, nkailundanga na ng'aniyo ina ikalandana na yangu. Ikabhe jwene akunshumbuyangajo, shaukumulwe nkali abhe gani. 11 Kwa nneyo ashaalongo ajangunji, ibhaga ntenga gungunnungushiyanga gunataya indu ya jaluka, bhai, kwa nndi ngunashumbuywa? Monaga nneyo, ntenga gungulunguya ga ligongo lya nshalabha gwa a Yesu ukanakole shigwegwe. 12 Bhakunshumbuyangabho mbaya bhakaiunilenje ntonga ashayenenji. 13 Mmanganyanji ashaalongo ajangunji, kunshermwilwenje kuungwana. Ikabheje gwene unganango unabhe shiumilo sha mundu kukagulila indu yapinga nyene, ikabhe nnjangutane kwa pingana. 14 Pabha shalia yowe ya a Musha ishikumulilwa na lilobhe limo, numbe alino. "Mumpinje nnongo njenu malinga shinkwiipinga mmayene." 15 Ikabheje nnumanangaga na taunana malinga bhannyama, mwiteiganje nnabhulagananga mwashaayenenji! 16 Bhai nguti nnei, itendi yenunji ilongoywe naka Mbumu jwa a Nnungu, penepo nkakagulilanga ilokoli ya shiilu. 17 Pabha ilokoli ya shiilu inakanana naka Mbumu jwa a Nnungu, najwalakwe Mbumu anakanana na ilokoli ya shiilu, pabha yenei inakanana, nikuntendanga nnakombolanje tenda inkupingana. 18 Ikabheje nnongoywangaga naka Mbumu jwa a Nnungu, bhai nkalongoywanga kabhili na Shalia ja a Musha. 19 Bhai itendi ya shiilu ilimanyika numbe ni aino, kulabhalabha na jajaatika na kwetela, 20 kutindibhalia yanamu na uwabhi na lupimililo na mpwai na shilokoli na nnjimwa na shienga na mitau na lekana 21 shipepo na nnjimwa na kushumiya indu ya unami na kukolelwa na kudoka na itendi ina ilandana na

yeneyo. Kwa yeneyo ngunakummalanjilanga shangupe, malinga shinammalanjilenje kuti, bhandu bhatendanga itendi ya nneyo, bhakajinjilanga muupalume gwa a Nnungu. 22 Ikabheje shiepo shika Mbumu jwa a Nnungu ni, kupingana na kuangalala na ulele na kwiiluma ntima na uguja na ntuka na kulupalika, 23 kwiitimalika na kwiiluma ntima. Kupunda genega, jakwa Shalia ja a Musha jikanana na genega. 24 Na bhalinginji na a Yesu Kilishitu bhashilimbiyanga iilu yabhonji inakunde ng'aniyo yangali ya mmbone na ilokoli ya nyata. 25 Tutamaga nkulongoywa na Mbumu jwa a Nnungu, na tukamule genego gutulongoywa naka Mbumu jwa a Nnungu. 26 Bhai tunaipune akuno tulitandubhana na bhonelana.

6 Ashaalongo ajangu, nnjenunji alebhaga, mmanganya nkulongoywanga naka Mbumu munnjangutilanje analebhe kabhili, ikabheje ntendanje nneyo kwa kwiitimalika akuno nnikwiiteiganga, nngakabha na mmanganyanji nnalingwanga. 2 Nnjangutananje nshilaje shenunji, pabha kwa tenda nneyo shinkamulanje shalia ja a Kilishitu. 3 Pabha mundu aibhonaga kuti jwa mmbone, mbena nngabha jwa mmbone, anakwiitemba muntima gwakwe nnyene. 4 Ikabheje mundu ailole ndamo yakwe nnyene. Kwa nneyo. Abhaga jwa mmbone, bhai, penepo ainiye muntima gwakwe nnyene, na nngabha kwa kwiilinganya na ashaajakwenji. 5 Pabha kila mundu shakaitagulile nnyene kwa a Nnungu. 6 Bhai ajiganywa malobhe ga a Nnungu, anapinjikwa kwaagabhila mboka yashaipate, bhaajiganya bhakwe. 7 Nnatembwanje, a Nnungu bhakatendelwa mbenji, pabha shoshowe sha panda mundu, shaneng'ene shosho. 8 Pabha jojowe apanda indu ilokolilwa na shiilu, shaneng'ene kuangabhanika, ikabhe jwene shapande ili Mbumu jwa a Nnungu, shaneng'ene gumi gwa pitipiti. (aiōnios g166) 9 Bhai, tunatotoshele kutenda indu ya mmbone, pabha tukawe ntima shituneng'ene mobha gakwe gaishilaga. 10 Kwa nneyo, mobha gowe putukola shindu twaajangutilanje bhandu bhowe, na kaje ashaalogo ajetunji bha ngulupai imo na uwe. 11 Nnolanje shinjite jandika kwa kuya majandiko kwa makono gangu namwene. 12 Bhowe bhapinganga bhabhonekanje bhammbone, kwa indu ya nshiilu ni bhakunshishilishiyanga nnjalukanje. Bhanatendanga nneyo nkupinga bhanashimwanje kwa ligongo lya nshalabha gwa a Kilishitu. 13 Pabha nkali ashaayeneni bhajalukenjebho, bhakakagulilanga Shalia ja a Musha, ikabhe bhanapinganga mmanganyanji nnjalukanje, nkupinga bhaishumiyanje ga jaluka kwenunji. 14 Ikabheje nne, ngakwiiniya kwa shoshowe, ikabhe ga nshalabha gwa Bhakulungwa bheta a Yesu Kilishitu, pabha kwa ligongo lya gwene nshalabhago, shilambolyo shishiwa kwa ligongo lyangu, na nne njiwa kwa ligongo lya shilambolyo. 15 Pabha kujaluka eu ungajaluka nngabha shindu shammbone, shili shammbone, ni mundu kubha jwa ambi. 16 Nguna kwaapinjilanga ulele bhowe bhaakagulilanga genego, ulele na shiya sha a Nnungu bhapatanje Bhaishilaeli bha a Nnungu. 17 Bhai, tandubhila nnaino mundu jojowe anang'abhuye, pabha nshiilu shangu nijandika lulembo lwa a Yesu. 18 Ashalongo ajangunji, nema ja Bhakulungwa bheta a Yesu Kilishitu jitame mmitima jenunji. Amina.

Bhaepheso

1 Nne a Pauli ntume jwa a Yesu Kilishitu, kwa pinga kwabho a Nnungu, ngunakunnjandishilanga mmandunji bha ukonjelo nninginji ku Epesho, nkwaakulupalilanga a Yesu Kilishitu. 2 Ngunakumpinjilanga nema na ulele gwa Atati a Nnungu na ku Bhakulungwa a Yesu Kilishitu. 3 Bhalumbilwe a Nnungu, Atati bha Bhakulungwa bhetu a Yesu Kilishitu! Pabha nkulundana na a Kilishitu, bhashikutupa mboka ya kila namuna ya muntima ikopoka kunnungu. 4 Malinga shibhatuagwile tubandu bha ukonjelo kwa lundana kwetu na a Kilishitu, shilambolyo shikanabhe panganywa, nkupinga tubhe tubhaukonjelo, na tunakole sha gambwa pa meyo gabho kwa nonyelwa na pinga kwabho bhayene. 5 A Nnungu bhashinkutandubha kutuagula, nkupinga tubhe ashibhana bhabho kupitila a Yesu Kilishitu, malinga shibhapijile na kuengwa kwabho bhayene. 6 Bhai twainiye a Nnungu kwa ligongo lya ukonjelo gwa nema jabho, jibhatupele kupitila kuka mwanagwabho jubhampinjile! 7 Pabha kupitila shiwo sha a Kilishitu uwe tushigombolwa, yani yambi yetu ishileshelwa. Malinga shigushitebha ukulungwa gwa nema jabho. 8 Bhashinkutushulushiya yeneyo kwa lumanyio lowe na lunda lwabho. 9 A Nnungu gubhatendile tuimanye ya nng'yo kwa pinga kwabho, malinga shibhatumbiile bhayene kutenda, kupitila kwa a Kilishitu. 10 Yani kubhika ukulungwa pushigamalle mobha gakwe, na kuibhika indu yowe pamo, ya kunnungu na ya pashilambolyo pa mashili ga a Kilishitu. 11 A Nnungu bhashipinga kila shindu shibhapijile shitendeshe, bhenebho bhashikutuagula nkulundana kwetu na a Kilishitu nkupinga tubhe tubhandu bhabho. 12 Bhai uwe Tubhayaudi, tulongolele kwaakulupalila a Kilishitu, tunapinjikwa kwainiye a Nnungu kwa ukonjelo gwabho! 13 Na mmanganyanji mmandunji bha ilambo ina, mwapiikenenje ntenga gwa kweli gwa Ngani ja Mbone, malobhe ga mmbone ga ntapulo gwenunji, gumwaakulupalilenge a Kilishitu na bhalabho a Nnungu nkupinga languya kuti mmanganyanji ni bhabho, gubhampelenje Mbumu jwa a Ukonjelo jwa miadi. 14 Jwene Mbumujo ni ngamulo ya poshela gowe gubhalajile a Nnungu kubhandu bhabho, nkupinga kwagombolanga bhowe bhalinginji bhabho. Tuguiniye ukonjelo gwabho! 15 Kwa nneyo ngapilikaneje ga ngulupai jenunji ku Bhakulungwa a Yesu na kwaapinganga kwenunji bhandunji bha ukonjelo, 16 bhai, na nne ngalibhala kwaatendela eja a Nnungu kwa ligongo lyenunji, ngunakunkumbushilanga nkujuga kwangu, 17 nkupinga a Nnungu bha Bhakulungwa bhetu a Yesu Kilishitu, Atati bha ukonjelo, bhampanganje ntima gwa lumanyio na munng'ibhulo gwa kwaamanya bhenebho. 18 Ng'aniyo ya mmitima jenunji ibhe na shilangaya, nkumanyanje ukoto kushemwa kwenunji nkwaakulupalila bhenebho, shikushitebha na gwinji gwa ulishi gwa ukonjelo gwa bhandu bha a Nnungu, 19 numbe nngumanyanje ukulu gwa ukonjelo na mashili shigushitebha kwa ligongo lyetu tu kwaakulupalila, malinga shiili itendi itendeka kwa mashili gabho, 20 gubhatendile kwa a Yesu Kilishitu pubhaayushiye nikwaabhika ku nkono gwabho gwa nnilo kunnungu. 21 A Yesu bhanatagwala numbe ni bhakulungwa kupunda bhapalme bhowe bhatagwalinga kunani na mashili

gowe na mena gowe, nngabha ga pa shilambolyo pepano na nkali ku shilambolyo shikwiya. (aiōn g165) 22 A Nnungu gubhabhishile indu yowe kwa mashili gabho, nikwaabhika bhabhe bhakulungwa bha indu yowe kwa ligongo lya bhandu bha a Nnungu. 23 Likanisha ni shiilu sha a Kilishitu na lyenelyo ni kutimilila kwa a Kilishitu bhaatenda indu yowe itimilile.

2 Mmanganyanji mwashinkuwanganga kwa ligongo lya yambi yenunji. 2 Yeneyo imwatendangaga bhukala nkukagulila ikubho ya pa shilambolyo pano, nnikunkagulilanga nkulungwa jwa mashili ga maoka ga kumaunde, lioka atagwala bhandunji bhakakwaakundanga a Nnungu. (aiōn g165) 3 Numbe nkali tubhowe uwe, bhukalago putwaaliji malinga bhanyabho, tulitenda indu ilokolilwa na shiilu, tulikagulila ilokoli ya lunda na shiilu, nibha bhana bha nrimwa ja a Nnungu malinga bhananji. 4 Ikabheje a Nnungu bhashikola shiya sha kaje na bhanakutupinga kwa punda, 5 nkali putwaliji tuwile muilebho yetu, gubhatuyushiye pamo na a Yesu Kilishitu, yani, tushitapulwa kwa nema ja a Nnungu. 6 Nkulundana kwetu na a Yesu Kilishitu tushiyuywa pamo na bhenebho, nkupinga tukatagwale na bhenebho muupalume gwabho. 7 Nkupinga kwa mobha gakwiyo, bhalanguye nema jabho gwangali mpelo kwa uguja gwabho gubhakutupa uwe nkulundana na a Yesu Kilishitu. (aiōn g165) 8 Pabha tushigombolwa kwa nema ja a Nnungu kwa ngulupai. Genega gangatendeka kwa tumbilila kwenunji, ikabhe kwa nema ja a Nnungu. 9 Numbe nngabha kwa itendi yenunji mwashayenenji, mundu anakole shakwiinya. 10 Pabha uwe iumbe ya a Nnungu, kwa lundana kwetu na a Yesu Kilishitu, bhashinkutupanganya nkupinga tutende ya mmbone, ibhatubhishile a Nnungu kumila bhukala tuitende. 11 Kwa ligongo lya genego, nkumbushilanje kuti mmanganyanji bhukalago, pumwalinginji bhandu bha ilambo ina, pumwashemwangaga bhalenje, na Bhayaudi pubhashemwangaga bhajalukenje, yani kujaluka kwa nshiilu kutendeshe kwa makono ga bhandunji. 12 Gene mobha gala nkalinginjiji tome na a Kilishitu, pumwalinginji kwataliya na nkumbi gwa Ishilaeli, bhajeninji bhalinginji malagano ga malajilo gala. Mwaibhelenje bhandu bhalinginji sha kulupalila shoshowe, bhandu bhakakwaamanyanga a Nnungu. 13 Mmanganyanji mwatalikengenenge na a Nnungu, nnaino nshilundanyanga kwa minyai jabho a Kilishitu. 14 Pabha a Kilishitu bhayene bhashikutupeleshela ulele, ni kututenda tubhe shindu shimo Bhayaudi na bhanga bha Bhayaudi. Kwa shiilu shabho gubhabhomwele likumba lyatugebhenye nibhoneka mbuti bhamaongo. 15 Gubhashoshiye shalia ja a Musha na amuli yakwe na ibhagu yakwe, nkupinga bhaatamikanje pamo bhene bhalinginji makundi gabhili kwa nneyo gubhatendile ulele. 16 Kwa shiwo shabho munshalabha, a Kilishitu gubhaatamikenje pamo, makabhila gabhili nibha shindu shimo nikwaabhujanabhonji kwa a Nnungu. 17 Bhai, a Kilishitu gubhaishe kuulunguya Ngani ja Mbone ja ulele kwenu mmanganyanji mwalinginji bhandu bha ilambo ina nkaabhandishilenje a Nnungu, ulele gubhe na Bhayaudi bhalinginji tome na a Nnungu. 18 Pabha kwa ligongo lya bhenebho, uwe tubhowe Bhayaudi na bhanga bha Bhayaudi tunakombola kwaabhandishila Atati,

Mmbumu jumo. **19** Bhai, kuumila nnaino, mmanganyanji nngabha mmajeninja eu bhapitanga mpanda, ikabhe mmashilambo pamo na bhandunji bha ukonjelo, bhandu bha likaja Iya a Nnungu. **20** Punninginji malinga nyumba jishenjilwe ukoto na mitume na ashinkulondola bha a Nnungu na a Yesu Kilishitu bhayene ni liganga likulu Iya pandumba. **21** Nkulundana na Bhenebho nyumba jowe jinakumulana nibha mbuti liekalu Iya ukonjelo Iya Bhakulungwa. **22** Nkulundana na a Yesu Kilishitu, na mmanganyanji nnashimilikwanga pamo na bhananji, mmanganje ndamo ja a Nnungu kupitila Mbumu jwabho.

3 Kwa ligongo Iya genego, nne a Pauli, nankutabhwa jwa a Yesu Kilishitu kwa ligongo Iyenu mmanganyanji nninginji bhandu bha ilambo ina. **2** Nimumanyi kuti mpilikenenje kuti a Nnungu, kwa nema jabho bhashinkungamuya Iyene liengoli ndende kwa ligongo Iyenu, **3** kuti njikuibhulilwa yene ya nng'iyoyo, malinga shinogolele jandika kwa malobhe gashoko. **4** Na nshomangaga genego, shimmumanyanje shinguti kwiimanya indu ya nng'iyoyo ya a Yesu Kilishitu. **5** Gwene nng'iyoyo bhantalugulilwanga bhandunji bha ibheleko ina, ikabhe nnaino bhashiibhulwanga mitume na bhaalondolanga bha ukonjelo bha a Nnungu kwa Mbumu jwabho, **6** kuti bhandu bha ilambo ina ni bhalishi pamo na uwe, bha ulishi gumo na shiilu shimo na bha ulongo gumo na uwe kwa malagano gabho kupitila a Yesu Kilishitu kwa Ngani a Mmbone. **7** Njitendwa ntumishi jwa Ngani ja Mmbone, kwa ntuka gubhambele a Nnungu kwa mashili gabho. **8** Nne ni jwanshoko kupunda bhandunji bhowe bha ukonjelo, ikabheje njipegwa ntuka gwabho, nkupinga kwaalungushiyanga bhandunji bha ilambo ina, gwinji gwa indu yabho a Kilishitu shigushitepunda. **9** Naatendanje bhandunji bhowe bhajimanyanje ngani ja nng'iyoyo ja gwene ukulungwa. A Nnungu bhapengenyu indu yowe bhashinkuiya kuumila bhukala, (aiōn g165) **10** nkupinga nnaino, kupitila likanisha, lunda lowe Iwa a Nnungu, lumanyishe kubhowe bhakwetenye mashili bha pa shilambolyo bha kunnungu. **11** Malinga shibhapanjile bhayene, nng'aniyo yabho kuumila bhukala na ya pitipiti kupitila a Yesu Kilishitu Bhakulungwa bhetu. (aiōn g165) **12** Kwa lundana kwetu na a Kilishitu na nkwaakulupalila, tunakombola kwaajendela a Nnungu kwa makangala na ungwana. **13** Bhai nnawanganje ntima ga mboteko yangu ingupata kwa ligongo Iyenu, pabha yenei ni kwa ukonjelo gwenunji. **14** Kwa ligongo Iya genego ngunakwaatindibhalila kwa malungo Atati, **15** pabha bhenebho kwa Iina Iyabho, ulongo gowe gwa pa shilambolyo na gwa kunnungu unalugulwa, **16** Ngunakwaajuga a Nnungu kwa gwinji gwa ukonjelo gwabho, bhampanganje mashili ga kwiishimilika mmunda kwa Mbumu jwabho. **17** A Kilishitu bhatame mmitima jenunji kwa ngulupai. Ngunakwaajuga nkolanje nnjiga nkupingana, **18** nkupinga mmanganyanji na bhandu bhowe bha ukonjelo nkumanyanje kupinga kwabho a Kilishitu, shiukujenela kwa uleu na uupi, shanga na kujendeya, nngumbaywanje kwa kaje utimililo gowe gwa a Nnungu. **19** Na nkumanyanje kupinga kwabho a Kilishitu kupunda lunda lowe shikushitebha, nngumbaywajwe kwa kaje kutimilila kowe kwa a Nnungu. **20** Bhai, bhalumbiliwe bhenebho bhaakombola tenda indu yowe ya kanganigwa, ipunda indu yowe itujuga eu

itukwiganishiya, shigali mashili ga kamula maengo nkati jetu, **21** numbe bhalumbiliwe nnikanisha na kwa a Yesu Kilishitu, ibheleko yowe pitipiti na pitipiti! Amina. (aiōn g165)

4 Kwa nneyo, nne nankutabhwa kwa ligongo Iya kwaatumishila Bhakulungwa, ngunakunshondelesheyanga, itendi yenunji ilingane na nshemo gunshemelwenje. **2** Mobha gowe mwiitimalikanje, nnakolanje nnjimwa na mwiilumanje ntima na pingana. **3** Nntumbilanje kugoya shilongani shika Mbumu na lundana kwa ulele. **4** Shipali shiilu shimo na Mbumu jwa a Nnungu jumo, malinga kulupalila kunshemelwenje na a Nnugu shikuli kumo. **5** Bhakulungwa bhamo, ngulupai imo, na ubhatisho gumo. **6** Bhapali a Nnungu bhamo ni Atati bha bhowenji, bhali bhakulungwa bha yowe na bhaatenda gowe na kwa kila shindu. **7** Ikabheje kila mundu munkumbi gwetu ashipegwa nema malinga shashite pimilwa na a Kilishitu. **8** Malinga Majandiko ga Ukonjelo shigalugula, "Pubhanyakwilwe kunani kunnungu, bhashinkutola bhaatabhwa bhahagwinji, nikwapanganga bhandunji ipaji." **9** Bhai, gene malobhe gakuti, "Bhashinkuyakulwa kunani," Malombolelo gakwe nndi? Ibhaga nngabha kuti, bhashinkutandubha kutuluka pai pa shilambolyo? **10** Bhai, bhene bhatulwishe pa shilambolyo, ni bhobho bhanyakwilwe kwenda kunnungu kunani kaje, nkupinga bhashigumbaye shilambolyo. **11** Kwa nneyo gubhaatendilenje bhananji bhahanganje, mitume na bhananji bhaalondola bha a Nnungu na bhananji bhaalunguya na bhananji bhaashunga na bhaajiganya. **12** Bhashinkutenda nneyo ligongo Iya kwashimilikanga bhandunji bha ukonjelo, nkupinga liengo litendeshe, nkupinga shiilu sha a Kilishitu shikule, **13** nkali uwe tubhowe pushituishile shilongani shimo sha ngulupai na kumanya kaje Mwana jwa a Nnungu, nkali kuishimilika na ishila timilika malinga a Yesu Kilishitu bhayene. **14** Nkupinga tunabhe kabhili mbuti bhana bhashoko, tulipelekwa na pepeluywa akuno na kukuno na mbungo ja majiganyo ga bhandunji bha unami nkupinga kwaapuganyanga bhananji kwa unami. **15** Ikabheje tulugulilanaga ya kweli kwa ntima gwa pingana, shitukule kwa kila shindu malinga shiili kwa a Kilishitu bhali kalongolele, **16** tulundana na bhenebho shiilu showe shinakumulana shilitagwa mashili nkujangutilwa na ibhalo ina. Bhai, kila shibhalo shikumulaga liengo Iyakwe, shiilu showe shinakula nkupingana. **17** Bhai, kwa Iina Iya Bhakulungwa, ngunakunneyanga nnatamangane malinga bhandunji bha ilambo ina, bhaatamangana nng'aniyo yangali ya mmbone, **18** na lunda Iwabhonji lushigumbala lubhindu, kwa nneyo bhashitalikangananga na gumi gwa a Nnungu, kwa ligongo Iya unumba guli mmitima jabhonji na mitau jabhonji. **19** Bhashipuganikanga mimita jabhonji na wala oni, bhalipunda kwiibhikanga nnukwetela na bhatendanje indu ya nyata. **20** Ikabheje mmanganyanji mwangaijiganyanga nneyo ga a Kilishitu. **21** Ibhaga mwapilikenenje ukoto ngani jabho, na jiganywa ga kweli ga a Yesu, **22** bhai nnekanje itendi yenunji ya bhukala, yani gundu gwa bhukala guangabhanyika kwa kwiikagulila ilokoli itemba. **23** Kwa nneyo ntendwanje mmaambi nng'aniyo ya mmitima jenunji. **24** Nng'walanje gundu gwaambi, upengenywe shi Nnungu kwa aki na ukonjelo gwa kweli. **25** Bhai nnekanje

unami, mmeleketanje ya kweli kila mundu naka mundu mwine, pabha kila mundu anakunkulupalila mwine. 26 Nnalebhanje kwa ligongo lya nnjmw, lyubha linatitimile nnjmw ikanabhe kunshokanga. 27 Wala nnanng'ugulilanje Lishetani nnango. 28 Nngwii anajibhe kabhili, ikabhe, akamule liengo lyambone kwa mashili gakwe nnyene, nkupinga akole shindu sha kunngabhila nkulaga. 29 Lilobhe lyolyowe lyangali lya mmbone linakoposhe nkang'wa yenunji, ikabhe lilobhe lyambone lya kumpwaa nkulaga, nkupinga lyaapanganje nema bhakulipilikananga. 30 Wala nnammulayanje kuinjika Mbumu jwa Ukonjelo, pabha jwenejo ni lulemu lwa a Nnungu lunnembwilwenje lubhe shilangulo shenunji mpaka lyubha lya gombolwa. 31 Bhai, nnekanje magongo na nnjmw na tumbala na njobhela na matukano, nkali yangali ya mmbone inapilikanishe kwenu mmanganya. 32 Nkolanje ntima gwa mmbone na gwa bhonelana shiya, nneshelelananje mmashayenenji, kila mundu anneshelele nnjakwe malinga a Nnungu shibhanneshelenje mmanganyanji kupitila a Kilishitu.

5 Kwa nneyo, mwalandanje a Nnungu pabha mmanganyanji nshibhanganga bhana bhapingwanga na bhenebho, 2 Nntamangane kwa pingana malinga shibhampinjenje a Kilishitu, kwa ligongo lyetu bhashinkwishoya bhayene mbuti mbepei inunjila ikwanonyela a Nnungu. 3 Pabha mmanganyanji nshibhanganga bhandu bha ukonjelo, bhai ya labhalabha na ya nyata eu ya shienga inapilikanishe munkumbi gwenunji. 4 Na kabhili malobhe ga oni eu ibheleketi ya shingumba na mitau, yeneyo ikampwaa, ikabhe malobhe ga kwatendela eja a Nnungu genego shigampwaa. 5 Mmumanyanje kuti jwakwa alabhalabha eu atenda ya nyata, eu akwetela, mundu jwa kwetela indu analandana naka mundu akwiitindibhalila yanamu, akakola ulishi mu muupalume gwa a Yesu Kilishitu na a Nnungu. 6 Nnakundanje tembwa naka mundu kwa malobhe gangali mana, pabha kwa yene ilebhoyo, nnjmw ja Nnungu jnakwajilanga bhandu bhowe bhakakwaaakundanga a Nnungu. 7 Bhai, nnatendanje shilongani na bhanganjabho. 8 Pabha bhukala mmanganyanji pumwalinginji nnuhbundu lwa yambi, ikabhe nnaino nshibhsnganga nshilangaya sha lumanyio nkulundana na Bhakulungwa. Ntamangananje mbuti bhana bha shilangaya, 9 pabha ikoposhela nshilangaya ni ntima gwa mmbone na aki na kweli, 10 nkagulilanje yeneyo ni ikwanonyela Bhakulungwa. 11 Wala nnatendanje shilongani na itendi ikapwaa ya nnuhbundu, ikabhe nnaayanje, 12 Pabha itendekwa kwa nng'iyu nkali kuitaya inabha oni. 13 Ikabheje yowe itendwa pa shilangaya, inabhoneka, 14 pabha shilangaya ni shitenda indu ibhoneshe. Kwa nneyo tukuti, "Nnjumushe mwe muubhelu gwa yambi, nkole lumanyio lwa kwaamanya a Nnungu, na bhalabho a Kilishitu shibhannangashiye." 15 Bhai mwilolesheyanje shinkuti tamangananga. Nnatamangananje mbuti mabhelu, ikabhe malinga bhakwetenje lunda, 16 Ntendelanje ukoto malanga, pabha mobha ga nnaino gano ga ya nyata. 17 Kwa nneyo, nnabhanganye mabhelu, ikabhe mwimanyanje indu ikwanonyela Bhakulungwa. 18 Kabhili nnakolelwanje ukwa ikwanonyela Bhakulungwa. 19 Nnabhanganye mbumu jwa a Nnungu, 19 mmeleketanje malobhe ga shabhuli na nyimbo ya muntima, akuno nnijimbanga na kwaangalila

Bhakulungwa mmitima jenunji; 20 Nnikwatendelanga eja a Nnungu Atati, mobha gowe kwa ligongo lya indu yowe, kwa lina lya Bhakulungwa bhetu a Yesu Kilishitu. 21 Kila mundu ankunde nnjakwe kwa ligongo lya a Yesu Kilishitu. 22 Bhanabhakongwe, bhaakundanje ashimbuje bhahonji malinga shitukwaaakunda Bhakulungwa bhetu a Yesu. 23 Pabha jwannume ni kalongolele juka nkagwe, malinga a Kilishitu nabhalabho shibhali a kalongolele bha likanisha, nabhalabho a Kilishitu ni Bhaatapula bha likanisha lili shiilu shabho. 24 Ikabheje malinga likanisha shiilikwaaakunda a Kilishitu, nneyo peyo na bhanabhakongwe bhaakundanje ashimbuje bhahonji kwa indu yowe. 25 Numbe mmanganyanji mmanabhalume, mwaapinganje ashaakongo bhenunji, malinga na bhalabho a Kilishitu shibhalipinje likanisha, nikwishoya mbepei kwa ligongo lyakwe. 26 Bhashinkutenda nneyo nkupinga kwa lilobhe lyabho, bhalikonjeleye likanisha kwa ligongo lya a Nnungu kwa mashi na lilobhe, 27 nkupinga bhalipate likanisha likwete ukonjelo, lyangali lilembwani, wala ngwinyai yoyowe, ikabhe libhe lya ukonjelo. 28 Bhai, bhanabhalume bhanaapinjikwanga kwaapinganga ashaakongo bhahonji malinga ilu yabhonji ashayenenji. Pabha akumpinga nkagwe, anakwipinga nnyene. 29 Jwakwapi mundu akushishima shiilu shakwe, ikabhe anakushiliya na kushigoya na kushiwasha. Mbuti nabhalabho a Kilishitu shibhakuti kulitendela likanisha, 30 pabha uwe ni ibhalo ya shiilu shabho. 31 Kwa lyene ligongolyo, jwannume shabhalekanje ainagwe na akwabhe, nilundana naka nkagwe na bhene bhahililibo shibhabhanganje shiilu shimo. 32 Upali nng'iyu kwa gene malobhego, ikabhe nne ngunabheleketi ga ngani ja a Kilishitu na likanisha. 33 Kwa nneyo kila jwannume ampinje nkagwe malinga shiikupinjikwa na wala jwankongwe analashe kunkunda mmbujegwe kwa indu yowe.

6 Mmanganyanji mmana, malinga Bhakilishitu nnapinjikwanga mwaakundanje bhankwetenje, pabha yeneyo ni ya mmbone. 2 Gwaishimiye ainago na akwenu, pabha jenenji ni amuli jilongolela kubha na malagano gakuti, 3 "Mbate mboka na tama mobha gamagwinji pa shilambolyo." 4 Na mmanganyanji ashainamundu, nnataandubhanganje ashibhana bhenu, ikabhe mwalelanje kwa ishima na mmajiganyo ga shi Kilishitu. 5 Na mmanganyanji mmatumwa, mwaakundanje bhakulungwa bhenunji bha pa shilambolyo pano, kwa kwaajogopanga na ungumila, ntendanje nneyo kwa ntima gwa uguja, mbuti nnakwakumulilanga liengo a Kilishitu. 6 Wala nngabha malinga utumwa gwa kwilanguya mmonekanje mbuti bhandu bhakwikonjeleyanga ku bhandunji, ikabhe malinga bhatumwa bha a Kilishitu nnikamulanga maengo ga kwaanonyela a Nnungu kwa ntima gowe. 7 Kwa ntima gwa mmbone malinga kwaakumulila liengo Bhakulungwa a Yesu na nngabha bhandunji. 8 Mmumanyanje kuti kila mundu atenda ya mmbone abhe ntumwa eu ngwana, shapate upo na Bhakulungwa. 9 Na mmanganyanji mmakulungwanji, mwaatendelanje bhatumwa bhenunji gogo pego, nnekanje kwaajogoyanga. Mmumanyanje kuti na mmanganyanji malinga bhangananyanjibho, mmowe Bhakulungwa bhenunji kubhali kunnungu, na bhenebho bhanganali laugu. 10 Kungai, ngunakumpinganga mpundanje kwiishimilika

nkulundana na Bhakulungwa na kwa jangutilwa na mashili gabho makulu. **11** Nng'walanje ikomanilo yowe ya a Nnungu, nkupinga mwiukananje ila ika Lishetani. **12** Pabha komana kwetu nngabha na bhandunji bha pa shilambolyo, ikabhe na ashimaoka bhaatamangana kunnungu pamo na bhakulungwanji na ukulungwa gwa pa shilambolyo sha lubhindu shino. **(aiōn g165)** **13** Kwa lyene ligongolyo nng'walanje ikomanilo yowe ya a Nnungu malinga linjola akwenda ku ngondo, nkupinga liishilaga lyubha lya yangali ya mmbone, nkomananje naka mmagongo nnijenunji, genego gamalilaga, mwiishimilikanje. **14** Bhai, nnjimangananje tayali, akuno nninginji mwithabilenje nshipi gwa kweli mwigunu yenunji, na pa ntima nng'walanje nkogo gwa aki, **15** na lilaka lya lunguya Ngani ja Mmbone ja ulele, libhe mbuti ilatu mmakongono genunji, **16** pamo na gene gowego, ngulupai ibhe shindu sha kwiibhila pugaika maonga gowe ga moto gaka Lishetani jula. **17** Numbe mposhelanje ntapulo malinga kopiya muntwe na lilobhe lya a Nnungu mbuti upanga gunkupegwanga naka Mbumu jwa Ukonjelo. **18** Nnjuganje Nnungu mobha gowe, nnijangutilwanga naka Mbumu. Nshyanje gwangali totothela nkujuga kwa ligongo lya bhandunji bhowe bha ukonjelo. **19** Nnyujilanje na nne, nkupinga pungubheleketa ga a Nnungu, mbate shindu sha bheleketa, naalungushiyanje bhandunji kwa mashili, ya nng'iyō ya Ngani ja Mmbone. **20** Nne ntume, kwa ligongo lya jene Ngani ja Mbonejo nkali ndabhwile ino. Bhai nnjuganje nkupinga ngole mashili nkulunguya malinga shingupinjikwa. **21** Bhai, nkupinga na mmanganyanji mmumanyanje puni bhuli, a Tikiko, apwanga bhaapingwa bhakamula liengo bhaakulupalika nkulundana na Bhakulungwa, shibhammalanjilanje indu yangu yowe nkupinga mmumanyanje ingutenda. **22** Ngunakwatuma kungwenunji nkupinga bhammalanjilanje getu uwe na bhantaganje ntima. **23** Ashaalongo ajangu Mmakilishitu, ngunakumpinijilanga ulele na pingana na ngulupai ikopoka kwa a Nnungu Atati na ku Bhakulungwa a Yesu Kilishitu. **24** Ngunakwapinijilanga nema bhowe bhakwaapinganga Bhakulungwa bhetu a Yesu Kilishitu kwa pinga kwangali mpelo.

Bhapilipi

1 Nne a Pauli na a Timoteo, bhatumishi bha a Yesu Kilishitu, tunakunanjandishilanga mmanganya bhandu bha ukonjelo bha ku Pilipi nnunderenje na a Kilishitu, pamo na ashikalongolele na bhatumishi bha likanisha. **2** Nema na ulele ikopoka kwa Atati a Nnungu na ku Bhakulungwa bhetu a Yesu Kilishitu ibhe na mmanganyanji. **3** Ngunakwaatendela eja a Nnungu bhangu kila pungunkumbushilanga. **4** Kila pungunjujilanga mmowe, ngunajuga kwa angalala, **5** kwa ligongo lya nyangutila kwenunji nkulunguya Ngani ja Mmbone, kuumila lyubha lya tandubha lila, mpaka lelo. **6** Na nne ngunakulupalila kuti a Nnungu bhatandwibhe liengo lya mmbone mmitima jenunji, shibhapunde tenda na maliya mpaka lyubha lya bhuja a Yesu Kilishitu. **7** Nneyo peyo, ngunaapinjikwa kunnganishiyanga mmanganyanji mmowe, pabha munninginji muntima gwangu. Numbe nshinyangutilanga na nkali nnaino ndabilwe ino, na ata punaaliji nganabhe tabhwa, nnema jibhambele a Nnungu jila, ja bheleketela na kong'ondela Ngani ja Mmbone. **8** A Nnungu ni bhaakong'ondela bhangu, shinguti lokolila kummonanga malinga a Yesu Kilishitu shibhampinjilerje kwa kaje. **9** Kujuga kwangu ni akuno, kuti, kupinga kwenunji kupunde jenesheka kwa kaje nnunda na nnumanyio lowe, **10** nkupinga nng'agulanje indu ya mmbone. Penepo shimmanganje na mitima ya mmbone, gwangali gambwa shoshowe mpaka lyubha lya bhuja a Kilishitu. **11** Akuno nngumbeywenje indu ya mmbone, ishibhampanganje a Yesu Kilishitu bhayene, kwa ligongo lya ukonjelo na iniywa kwa a Nnungu. **12** Bhai ashaalongo ajangunji, ngunapinga mmumanyanje kuti, gowe gambatile gala gashinkunyangutila nkujenya Ngani ja Mmbone. **13** Kwa lyene ligongolyo, bhalinda bhowe na bhandunji bhana bhowe apano bhamumanyinji kuti, kutabhwa kwangu ni kwa ligongo lya kwaatumishila a Kilishitu. **14** Bhai, kwa ligongo lya tabhwa kwangu, kushikwaatendanga ashaalongo ajangunji bhahagwinji bhaakulupalilanje Bhakulungwa, mpaka nitumbiilanga kulunguya ntenga gwa a Nnungu gwangali bhoga. **15** Kweli, bhananji bhanalunguyanga ngani ja a Kilishitu kwa ligongo lya lupimililo na nngomo, ikabheje bhananji kwa ndumbililo ya mmbone. **16** Bhakwetenje ndumbililo ya mmbone, bhanatendanga nneyo kwa ntima gwa pinga, numbe bhamumanyinji kuti njitabhwa, pabha a Nnungu bhashimba liengo lya bheleketela Ngani ja Mmbone. **17** Ikabhe bhananji bhanakwalunguyanga a Kilishitu kwa ngomo na wala nngabha kwa ntima gwa uguja, bhaliganishiyanga kuti, shibhanyenjesheyenje mboteko nkutabhwa kwangu. **18** Igala nndi! Nne ngunaangalala ibhaga bhandu bhanakwalunguyanga a Kilishitu momowe mula, ibhe kwa ndumbililo ya mmbone eu yangali ya mmbone. Kwa lyene ligongo lyo nne shing'angalale, na shimbunde kuangalala, **19** pabha nimumanyi kuti kwa juga kwenunji na kwa janutilwa naka Mbumu jwa a Yesu Kilishitu, gambatile gala shigapindikusha nibha ntapulo gwangu. **20** Punguganishiya na kulupalila kwangu kuti, ngatokamala nkutenda liengo lyangu, ikabhe shingole makangala mobha gowe, na kaje agano mobha gano, nkupinga kwa nkulama kwangu eu nkuwa kwangu naape a Kilishitu kuishimika. **21** Pabha kwangu

nne, kulama ni a Kilishitu na kuwa ni pwaida. **22** Bhai monaga kwa lama kwangu shingombole tenda liengo likwete pwaida, bhai ng'agule nndi? Nne ngakushimanya! **23** Ngunalongwa indu ibhili, ngunalokolila nijileshe ajino ndamo jino nijendele ngatame na a Kilishitu, pabha lyeneli ni lya mmbone kaje, **24** ikabheje nonjeyaga kulama, ni sha mmbone kwenu mmanganyanji. **25** Kwa kugamanya genega, nimumanyi kuti shimbunde kulama, nonjeje na mmanganyanji, nkupinga mpundanje kwiishimilika na angalala nngulupai. **26** Bhai shimwipunilanje nne, nkulundana na a Kilishitu Yesu, pushimme na mmanganyanji kabhili. **27** Bhai shindu shikulungwa, ndamo jenunji jibhe malinga shiipinjikwa na Ngani ja Mmbone ja a Kilishitu, nkupinga ng'ikaga eu ngaishe, mbilikane kuti nnakwiishimilikanga ukoto kwa ntima gumo, na lundana nkukomana ngondo pamo, kwa ligongo lya ngulupai ga Ngani ja Mmbone. **28** Nnaajogopanje ashaamagongo ajenunji, nkolanje makangala, yeneye shiibhe shilangulo ukoto, kuti bhanganjanjibho shibhalepelanje na mmanganyanji shinkombolanje, pabha a Nnungu bhayene shibhankomboyanje. **29** Pabha mmanganyanji nshipegwanga nema ja kwaakumulila liengo a Kilishitu, nngabha kwa kwaakulupalilape, ikabhe na potekwa kwa ligongo lyabho. **30** Kwa nneyo nnonanganje na nne nkukomana ngondo. Ngondo jinjibhweninji nilikomana, na launo ngunakomana, malinga shinkupilikanganaga.

2 Ibhaga, ndamo jenunji mwa a Kilishitu jilikumpanganaga mashili, ibhaga kupali kuangalala kokowe nkupingana na Bhenebho, ibhaga kupali kulundana kokowe naka Mbumu jwa Ukonjelo, na ibhaga gupali uguja gogowe na bhonelana shiya. **2** Bhai, nkamilishanje kuangalala kwangu kwa kola ng'aniyo imo, kupingana kumo, na ntima gumo, na tumbilila kumo. **3** Nnatendanje shindu shoshowe kwa taukungana eu kwa kwiipuna, ikabhe mwiitimalikanje mwaashayenenji, kila mundu annganishiye nnjakwe kuti jwa mmbone kupunda nnyene. **4** Mundu analoleye pwaida jakwe nnyene, ikabhe na pwaida ja ashaajakwenji. **5** Nkolanje ng'aniyo mmitima jenunji malinga ibhaakwete a Yesu Kilishitu. **6** Bhenebho kuumila kundandubho pubhaliji malinga a Nnungu, ikabheje kubha malinga a Nnungu, bhangatolelela kuti shindu shangakomboleka kuleka. **7** Ikabhe, kwa engwa kwabho bhayene, gubhaleshile yowe ibhakwete, gubhaitendile mbuti ntumwa, nibha malinga mundu. **8** Bhakabhonesheje malinga mundu, nikwiinyegaya na kunda mpaka kuwa, elo, kuwa munshalabha. **9** Kwa nneyo, na Bhalabho a Nnungu gubhaakweshiye kunani kaje, gubhaapele lina likulungwa kupunda mena gowe. **10** Nkupinga kwa lina lya ambi libhapegwilwe a Yesu, indu yowe ya kunnungu, na ya pa shilambolyo, na ya pai litaka, yaatindibhalile, **11** na kila mundu alumbe kuti, bhene bhaashemwa a Yesu Kilishitu ni Bhakulungwa, kwa ukonjelo gwa Atati a Nnungu. **12** Bhai ashaambwiga ajangunji, malinga shimwambilikaniilangaga mobha gowe punaliji na mmanganyanji, bhai nkali nnaino shini kwataliya shino, mpundanje kumbilikaniila. Ntendanje liengo kwa ligongo lya kamilisha ntapulo gwenunji, kwa jogopa na ungumila. **13** Pabha a Nnungu ni bhaatenda liengo mmitima jenunji, nkunkomboyanga nkupinga ntendanje indu ibhapinga Bhayene. **14** Ntendanje indu yowe gwangali

inginika na wala mitau, 15 nkupinga nnakolanje shilebho na mmanganje bha ndamo ja mmbone. Nkupinga mmanganje bhana bha mmbone bha a Nnungu bhanginginji ila munkumbi gwa bhandu bhanginginji bha mmbone na bhaobhilenje bha pa shilambolyo pano. Mmanganje shilangaya malinga shiikulangaya ndondwa kuliunde, 16 nnikwaalungushiyanga malobhe ga gumi. Na penepo nne shingole ligongo lya kwiipuna lyubha lya kwiya a Kilishitu, shiimanyishe kuti liengo lyangu na tumbila kwangu nngabha kwayoyo. 17 Nkali gumi gwangu ushoywaga nibha mbepei, pamo na ngulupai jenunji jili mbepei kwa a Nnungu, bhai, ngunakuinonyela na angalila na mmanganyanji mmowe. 18 Nneyo peyo, na mmanganyanji nnapinjikwanga kwinyonyela na angalila pamo na nne. 19 Nkwaakulupalila Bhakulungwa a Yesu, shinaatume a Timoteo bhajiye kunngwenunji agano mobha pegano, nkupinga nndaganje ntima pushimbilikane genu mmanganyanji. 20 Pabha nangali mundu juna akwete ntima gumo na nne malinga bhenebho, shibhajiye kunnolanga na kunnjangutilanga. 21 Bhananji bhowe ibhaloleyanga ibhapinganga ashaayenenji, wala nngabha ya a Yesu Kilishitu. 22 Ikabheje mmanganyanji mwaamanyinji a Timoteo shibhashite bhoneka, kuti bhashikamula liengo lya lunguya Ngani ja Mmbone na nne, mbuti mwana naka nng'inagwe. 23 Bhai ngunakulupalila kwaatuma bhenebho kunngwenunji, pene pushiniimanye ishindendelweyo. 24 Numbe namwene nkwaakulupalila Bhakulungwa shinyiye kunngwenunjiko nngabha pa kabha. 25 Bhai ngunaganishiya kwaatuma kabhili apwanga a Epapulodito kunngwenunji, bhakamula liengo na nne, bhakomana ngondo ajangu, numbe ni bhantenga bhenuji na bhanyangutile nne kwa indu inapinjile. 26 Pabha bhashikola lilaka lya kwiya kunnolanga mmowe, ikabheje bhashiinjika malinga shimpilikenenje kuti bhatendaga lwala. 27 Kweli bhashinkulwala kwa tome na kuwa, ikabheje a Nnungu gubhaabhonele shiya, na nngabha bhenebho, ikabheje na nne gubhamonele shiya nkupinga ngunapunde injika, nkuiinjika. 28 Kwa nneyo, ngunatumbilila kwa kaje kwaatuma kunngwenunji, nkupinga pushimwaabhananji kabhili nng'angalalanje, na nne lipamba lyangu linjoshe. 29 Bhai, mwaaposhelanje kwa angalala nkulundana na Bhakulungwa, na bhandunji bha nneyo mwaashimiyane, 30 pabha kwa ligongo lya liengo lya a Kilishitu pubhaliji tome na kuwa ni jogoya ndamo jabho, nkupinga bhanyangutile nne pumwalepelenje mmanganyanji, pabha mwalinginjiji kwa taliya.

3 Bhai ashaalongo ajangunji, nng'angalalanje nkulundana na Bhakulungwa. Nne ikandotoya kunjandishilanga indu ila pe ila, pabha shiimpwaanje mmanganyanji. 2 Mwiiteiganje na bhandunji bhaatendanga yangali ya mmbone, bhandunji bha malinga mbwa, bhaakomelesheyanga ga kwaapotekanga bhandunji, gwangali ligongo. 3 Pabha tujalwishe ukoto ni uwe, tukwaatindibhalila a Nnungu kwa Mbumu jwabho na kwiipuna ga lundana na a Yesu Kilishitu. Wala tukaakulupalila ga nshiilu. 4 Nkali nne mbingaga, ngunakombola kukulupalila ya nshiilu. Monaga apali mundu akwete ligongo lya kulupalila ya nshiilu, nne njipunda. 5 Nne punajalwishe lyubha lya nane ngabhelekeje, nne ni jwa a Ishilaeli kabhila ja a Bhenjamini, Nanng'ebhulania jwa Bhaebhulania, ga kagulila shalia ja a

Musha, nne Nampalishayo, 6 natendaga tumbila kwa kaje mpaka nikulipoteka likanisha, na kwa ngani ja uguja gwa kagulila shalia ja a Musha, ngakweteje shilebho. 7 Ikabheje kwa indu inaganishiyaga ya mbwaa nne, njikwibhona nngabha shindu kupunda kwaapinga a Kilishitu. 8 Elo, nngabha genegope, ikabhe indu yowe ngunakwibhona nngabha shindu, kwa ligongo lya mmbone lya kwaamanyia a Kilishitu Yesu, Bhakulungwa bhangu. Kwa ligongo lya Bhenebho njileka kila shindu, nikwibhona mbuti mai, nkupinga naapate a Kilishitu, 9 niilundana nabho kaje. Nne ngunakole aki jipatikana kwa kunda shalia. Ikabheje nnaino njikola aki pungwaakulupalila a Kilishitu, aki jikopoka kwa a Nnungu kwa ligongo lya ngulupai. 10 Shingupinga naamanye a Kilishitu na kugabhona mashili ga yuka kwabho, na kundikanywa mmboteko yabho niilandanywa nshiwo shabho, 11 numbe nne ngulikulupalila kuti ng'waga shinyuywe. 12 Nngabha kuti njimaliya eu njitimilila, ng'oo! Ikabhe ngunatumbila ga mwanja nkupinga mbate shene shiindenda ngamulwe na a Yesu Kilishitu. 13 Mwashaalongo ajangunji, ngaganishiya kuti mbatile shenesho, ikabheje shingutenda shimo, ngunalibhala gapitile gala, nitumbilila gali mmujo. 14 Bhai, ngunatumbila na mwanja kuloya kundumbilile, nkupinga mbate upo injemelwe na a Nnungu kopoka ku nnungu, kupitila a Yesu Kilishitu. 15 Bhai, uwe tubhowe tukomele mmitima, uwe tunganishiye genego, na ibhaga nnganishiyangaga muna, bhai a Nnungu shibhannanguyanje genego. 16 Bhai apano putuishile pano tunalesshelele, ikabheje tupunde kwenda mmujo. 17 Ashaalongo ajangunji, nngaguyanje ingutenda nne, na mwaalolanje bhene bhaakaguyanga gutunnjigenyenje gala. 18 Nammalanjilenje genego papagwinji, nnaino ngunakummalanjilanga akuno nilikopoka minyoi kuti, bhandu bhahagwinji bhanatamangana mbuti bha magongo, bha shiwo sha a Kilishitu munshalabha. 19 Mpelo gwabhonji ni kuobha, na nnungu jwabhonji ni ilokoli ya shiilu, na bhanakwiipunilanga ya tokomala, ibhaganishiyanga ya pa shilambolyope. 20 Ikabheje uwe ushilambo gwetu kuuli kunnungu, koposhela kweneke tunakwaalolela kwa lilaka, Bhaatapula na Bhakulungwa bhetu a Yesu Kilishitu. 21 Bhaapinga tindiganya iilu yetu yangali mashili ino, nkupinga ilandane na shiilu shabho sha ukonjelo, kwa gene mashiligo shibhaibhishe indu yowe, ibhe muukulungwa gwabho.

4 Bhai ashaalongo ajangunji bhungumpinganga, ngunalokolila kummonanga kabhili, mmanganyanji nninginji kuangalala kwangu, na shilemba shangu, bhai nnapinjikwanga kwiishimilika nkulundana na Bhakulungwa, mmanganya ashaambwiga ajangu. 2 Ngunakwaashondelesheyanga a Eudiya na a Shintike kuti bhaelewananje nkulundana na Bhakulungwa. 3 Na mmwe apwanga, ngunakumpinga mwaajangutilanje bhene bhanabhakongwebho, pabha bhashitendanga liengo lya lunguya Ngani ja Mmbone pamo na nne, na a Kelementi na bhatumishi ajangunji bhowe, bhene bhajandikwenje mena gabhonji nshitabhu sha gumi. 4 Bhai, nng'angalalanje nkulundana na Bhakulungwa mobha gowe, kabhili nguti, nng'angalalanje! 5 Kwiitimalika kwenunji kumanyishe na bhandu bhowe. Bhakulungwa bhali tome na buja. 6 Shindu shoshowe shinampanganje lipamba, ikabhe kwa kila shindu kwa jwaga na

tenda eja kwa a Nnugu, na itupinga imanyishe na a Nnugu. 7 Na ulele gwa a Nnugu upita lunda lowe, shigunngoyanje mitima jenunji na ndumbililo yenunji, nkulundana na a Kilishitu Yesu. 8 Kungai, ashaalongo ajuangunji, yoyowe ili ya kweli, na yoyowe ili ya ishima, na yoyowe ili ya aki, na yoyowe ili ya mmbone, na yoyowe ili ya konja, na yoyowe ya iniywa ukoto, na upagwaga uguja gogowe, nnganishyanje yeneyo. 9 Ntendanje gowe gumwijigenyenje na poshela kopoka kwangu nne, gumpilikenenje nilibheleketa na kugabhona ntendanje genego. Na Bhalabho a Nnugu bha ulele shibhabhe na mmanganya. 10 Nkulundana na Bhakulungwa njiangalala kaje kubhona kuti, kungai nnangumbushilanga kabhili, kweli mwangumbushilangaga, ikabheje nkatangaga malanga ga tenda shindu. 11 Ngaabheleketa nneyo kwa ligongo lya pinga indu, pabha njikwijiganya togoleta na indu ingwete. 12 Nikumanyi kumalilwa na kushulushilwa. Njikwiyobhelesheya kutogolela kwa kila shindu, nkujukuta eu nkutotoka, kushulushilwa eu kumalilwa. 13 Ngunakombola kutenda gowe, kupitila kwa a Kilishitu bhamba mashili. 14 Nkali nneyo mwashinkutendanga ya mmbone kwa nyangutila nshilaje shangu. 15 Mmanganyanji Bhapilipi mmumanyinji mwaashayenenji kuti, punatandwibhe lunguya Ngani ja Mmbone ngajabhuleje ku Makedonia, mmanganyanji jikape ni likanisha lya lundene na nne, nkushoya na nkuposhela indu. 16 Pabha nkali punaliji ku Teshalonike mwambelenje indu inapingaga, wala nngabha kamo. 17 Nngabha kuti ngunapingape kuposhela indu yenunji, ikabhe shingupinga kujenjesheka kwa indu ya mmbone intendilenje. 18 Ikabheje, indu yaigwinji numbe ya punda, imwaakamuyenje a Epapulodito kubhambeyo, mboshele. Yene upoi pwili mbuti mbepei ya nunjila, mbepei iposhelwa na ikwanonyela a Nnugu. 19 Bhai a Nnugu bhungwatumishila kwa utajili gwabho shibhampanganje kila shinkupinganga, kwa Ukonjelo gwa a Kilishitu Yesu. 20 Ukonjelo ubhe kwa Atati a Nnugu bhetu, pitipiti. Amina. (aiōn g165) 21 Mwaalamushilanje bhandunji bhowe bha ukonjelo bhalinginji bha a Kilishitu Yesu. Ashaalongo bhalinginji na nne apano bhanakunnjumushilanga. 22 Bhandunji bhowe bha ukonjelo bhanakunnjumushilanga, bhalinginji nnyumba ja a Kaishali. 23 Nema ja Bhakulungwa a Yesu Kilishitu, jibhe na mmanganya.

Bhakoloshai

1 Jene bhaluwa jino kujikopoka kwangu nne a Pauli ntume na apwetu a Timoteo. Njishemwa na a Nnungu kwa pinga kwabho kubha ntume jwa a Yesu Kilishitu. **2** Tunakunjandishilanga mmandunji bha ukonjelo nninginji ku Koloshai, mmakulupalikanga mnundenenja na a Kilishitu. Nema na ulele ibhakutupa a Atati a Nnungu, ibhe na mmanganyanji. **3** Kila putukunjjilanga, tunakwaatendela eja a Nnungu, Aina bhabho Bhakulungwa bheta a Yesu Kilishitu. **4** Pabha tushipilikana ngani na ngulupai yenunji nkulundana na a Yesu Kilishitu, na nkwaapinganga bhandu bhowe bha ukonjelo. **5** Kwa ligongo lya ngulupalilo ya indu immishilwenje kunnungu, numbe ngani jakwe mwapiikenenje bhukala kwa illobhe lya kweli limwalungushiwenje, yani, Ngani ja Mmbone. **6** Ngani ja Mmbone jinapunda peleshela mboka na shuma pashilambolyo, malinga shiili kunnngwenunji kutandubhila lyubha limwapiikenenje na kujimanya nema ja a Nnungu shijili ja kweli. **7** Malinga shinnjigenyenye ga nema ja a Nnungu na a Epapula, bhatumishi ajetu bha a Kilishitu bhaakulupalika, kwa ligongo lyenu mmanganyanji. **8** Bhenebho bhatubhalanjile ga pinga kwenunji kumpatilenje naka Mbumu. **9** Kwa lyene ligongolyo, numbe uwe tukapiikaneje tukaaleka kunnjjilanga kwa a Nnungu, nkupinga bhampanganje lunda na lumanyio lwa muntima. **10** Penepo shinkombolanje tama malinga shibhapinga Bhakulungwa a Nnungu, nitenda yowe ikwaanonyela, ndamo jenunji shijipunde peleshela mboka ya kila namuna kwa itendi ya mmbone na shimpundanje kwaamanya a Nnungu. **11** A Nnungu bhampanganje mashili kwa kombola kwabho kwa ukonjelo, nkupinga mwiipilililanje kwa kila shindu na kwiluma na angalala. **12** Mwaatendelanje eja Atati a Nnungu, bhantendilenje nkombolanje poshela miadi ja indu ibhaabshilenje bhandunji bha ukonjelo, muupalume gwabho gwa shilangaya. **13** Na bhenebho bhashinkututapula mmashili ga lubhindu, nikutushoya na kutujinjija muupalume uka mwana gwabho jubhakumpinga. **14** Kwa bhenebho tunagombolwa, nileshelelwa yambi yetu. **15** Na a Kilishitu ni shilanda shibhoneka, sha a Nnungu bhakaabhoneka, nantando jwa indu yowe ipengenywe. **16** Pabha indu yowe ishiringanywa kupitila Bhenebho, kila shindu sha kunnungu na sha pa shilambolyo, indu ibhoneka na ikaabhoneka, ibhaga ashinandenga, na majini na ashimaoka bhowe. Yowe puipengenywe na Bhenebho na kwa ligongo lyabho. **17** Bhenebho bhaapali indu yowe ikanabhe pagwa, yowe inatama ukoto kwa lundana na bhenebho. **18** Bhenebho ni akalongolele bha likanisha, malinga ntweshiukuti longolela shiilu, numbe bhenebho ni shiumilo sha gumi gwa shene shiilusho. Bhenebho ni nantando bha gumi, bhantai kuyuka bhakaweje, nkupinga bhabhe bha nta kwa indu yowe. **19** Pabha a Nnungu bhashipinga kutimilila kwabho kowe kutame mubhanabhabho a Yesu. **20** Na kwa bhana bhabho, a Nnungu bhayene bhashilundanywa na indu yowe, kwa shiwo sha a Yesu munshalabha, a Nnungu gubhatendile ulele na indu yowe, ibhe ya pa shilambolyo eu ya kunnungu. **21** Mmanganyanji bhukala mwashinkutalikangana na a Nnungu nibha magongo, kwa ligongo lya ng'anyiyo yenunji na itendi yenunji ya nyata. **22** Ikabheje nnaino, kwa shiwo

shika mwana gwabho atemi pa shilambolyo pano, a Nnungu bhashikunnundanyanga, nkupinga bhammikanje pamo na bhenebho, nninginji bha ukonjelo na bhammbonenji na wala sha gambwa, **23** ikabheje nnapinjikwanga kwiishimilika ukoto nngulupai, wala nnakundanje kutendebhuwya nikunshoyanga nngulupai impatilenje pumwapiikenenje Ngani ja Mmbone. Nne a Pauli ni ntumishi jwa jene Ngani ja Mmbone, jilungwiye pa shilambolyojo. **24** Nnaino ngunaangalila kupotekwa kwangu kwa ligongo lyenunji, pabha ngunagumbashiya pasiilu shangu indu itubhile mmboteko ya a Kilishitu kwa ligongo lya likanisha, lili shiilu shabho. **25** Nne njibha ntumishi jwa likanisha malinga shibhapanje a Nnungu kumba, kwa pwaida jenunji. Nunguye illobhe lyabho gwangali leka shindu, **26** indu ya nng'iyoyo ibhaishiywenje bhandu bhowe kuumila bhukala, ikabheje nnaino bhashikwaibhulilanga bhandunji bhabho bha ukonjelo. **(aiōn g165)** **27** A Nnungu bhashinkupinga kwaibhulilanga bhanganjabho ga ukonjelo nkulu gwa gwene nng'iyoyo, kubhandunji bhalinginji nngabha Bhayaudi. Nng'iyoye gwene ni a Kilishitu, bhali mmitima jenunji. Na lyenelyo linalangula kuti shinkundikanywanje muukonjelo gwa a Nnungu. **28** Kwa lyene ligongolyo, tunakwalunguya a Kilishitu kubhandu bhowe, kwaaleyanga na kwaajiganyanga bhandu bhowe kwa lunda lowe, nkupinga tunjijenajo kila mundu kwa a Nnungu ali aishimiliske nkulundana na a Kilishitu. **29** Kwa ligongo lyolyo, nne ngunalajilila tenda liengo, kwa mashili gungupegwa na a Kilishitu gakamula liengo muntima gwangu.

2 Ngunapinga mmumanyanje, shinguti lajilila kutenda liengo kwa ligongo lyenunji, na kwa ligongo lya bhandunji bha ku Laodikia na kwa ligongo lya bhowe bhakanabhe monanga mmeyo bhala. **2** Ngunatenda nnei nkupinga bhatagwanje ntima na bhalundananje nkupingana, bhaumanyanje utajili gowe kwa kuimanya ukoto indu ya kweli. Nkupinga bhaimanyanje kaje ya nng'iyoye gwa a Nnungu, yani a Kilishitu bhayene. **3** Kwa bhenebho ishikwiya ibhiko yowe ya lunda na lumanyio. **4** Bhai, ngunakummalanjilanga genega, nkupinga mundu jowowe anantembanje kwa malobhe ga unami, nkali ganonye. **5** Pabha, nkali nkamonanje kwa meyo, ikabheje kwa muntima puni na mmanganyanji, nguliangalala nkummonanga shinkuti tamangana ukoto, na kwiishimilika nngulupai jenunji nkulundana na a Kilishitu. **6** Bhai, shimwaaposhelenje a Yesu Kilishitu kubha Bhakulungwa bhenuunji, bhai ntamangananje nneyo peyo nkulundana nabho. **7** Ntamangananje ukoto nkulundana na bhenebho na shengwa panani jabho, na kwiishimilika nngulupai malinga shinnjigenyenye, na mpundanje kutenda eja. **8** Bhai mwiiteiganje, mundu anantembanje kwa lumanyio lwakwe lwa unami, lwa poshela kubhandu na majiganyo ga pa shilambolyo, gali nngabha ga a Kilishitu! **9** Pabha kukamilika kowe kwa a Nnungu, kwabhoneshe mwa a Kilishitu nshiilu shabho, **10** na mmanganyanji nshipegwanga gumi gwa nng'ilimila nkulundana na bhenebho, bhali bhakulungwa bha mashili na ukulungwa gowe. **11** Nkulundana na a Kilishitu mmanganyanji nnjalwenje, numbe nngabha kwa tagwa na bhandu, ikabheje na a Kilishitu bhayene, nkugombolwa kopoka kushiilu shangali mashili. **12** Pabha, nkabhatishwanje mwashinkushikwanga pamo na a Kilishitu, na uyuya pamo na bhenebho kwa kulupalila mashili

ga a Nnungu, bhaayushiye a Kilishitu bhakaweje. 13 Na mmanganyanji pumwalinginji nng'wilenje, kwa ligongo lya yambi yenunji na gwangajaluka gwenunji. Ikabheje nnaino a Nnungu bhashikumpanganga gumi pamo na a Kilishitu, nikutuleshelela yambi yetu yowe, 14 gubhaputile malobhe gajandikwe ga kutulugula, na ukumu jakwe nikujishoya jinapagwe kabhili, kwa kujikomela munshalabha. 15 Gubhaapokonyolenje ukulungwa na mashili gabhonji bhakulungwanji na bhakwetenje mashili ga kumaoka, nikwatokomayanga palugwinjili akuno bhaliangalala pa lugwinjili lwa bhandu pa nshalabha gwa a Yesu. 16 Kwa nneyo, bhai, munda ananng'ukumulanje kwa ligongo lya shalya, eu ya papila, eu kwa ligongo lya shikukuu, eu ga mwei gwa ambi, eu ga lyubha lya pumulila. 17 Pabha yenyoye ni ilanda ya indu ikwiya, ikabhe shindu ukoto, ni a Kilishitu. 18 Munda jojowe ananng'ukumulanje, alikwiitamba kwiitimalika akuno ali kwaatindibhalila ashimalaika. Munda malinga jwenejo anagakulila agamii yakwe, alikwiitapa kwa lunda lwake lwa shigundu, 19 jwene mundujo ashikwaaleka a Kilishitu bhali ntwе gwa shiilusho. Nkulongoywa na a Kilishitu, shiilu showe shinaliywa na lundanyawa pamo kwa ibhalo na minanga jakwe, penepo shiilu shinakula, malinga shibhapinga a Nnungu. 20 Bhai, ibhaga mmanganyanji mwashinkuwanganga pamo na a Kilishitu na gombolwa mmashili ga bhaatagwala bha pa shilambolyo, bhai, kwa nndi tama kabhili mbuti bhandu bha pa shilambolyo, nibhishilwanga ibhagu? 21 "Eti nnakumulanje ashi, eu nnapayanje ashi, eu nnakwayanje ashi!" 22 Gene gowego ni ga indu ya angabhanika, gali malajilo na majiganyo ga bhandunjipe. 23 Yenyoye puibhoneka mbuti ya lunda kwa namuna ja tindibhalila jimwiibhishilenje mwashaayenenji, nkwiitimalika na nkushipoteka shiilu na ilokoli yakwe, ikabheje ikapwaa shindu nkulekaya ilokoli ya shiilu.

3 Bhai monaga nnyushiywenje pamo na a Kilishitu, mwiloleyanje indu ya kunani kubhali a Kilishitu, numbe bhashitama kunkono nnilo gwa a Nnungu. 2 Mwiganishayanje indu ya kunani, nngabha indu ya pa shilambolyo pano. 3 Pabha mwawilenje, na gumi gwenunji ushiywa pamo na a Kilishitu kwa a Nnungu. 4 Pushibhabhoneshe a Kilishitu bhali gumi gwetu, penepo shimmonkanje pamo na bhenebho, muukonjelo. 5 Bhai, ibhalo yenunji inalame nkulokolila indu ya pashilambolyo, malinga kulabhalabha na indu ya nyata na ilokoli ya nyata na ng'aniyo yangali ya mmbone, pabha kutenda yenyoye ni malinga kutindibhalila yanamu. 6 Kwa ligongo lya genego, nnjmwaja a Nnungu jinakwiya. 7 Nkali mmanganyanji bhukala mwatimingenje nndamo ja tenda yene induyo. 8 Ikabheje nnaino mmanganyanji nnapinjikwanga kuileka yoweyo, nnjmwaja, na ilokoli, na ilebho na kulosha na matukano, ganakoposhe nkang'wa yenunji. 9 Nnabhalanjilanjanje ya unami, pabha nng'ulilenje gundu gwa bhukala na itendi yakwe yowe, 10 nng'wetenje gundu gwa ambi. Upunda alaywa ukoto nkwaalanda a Nnungu, nkupinga nkolanje lunda lwa kwaamanya bhayene bhaapanganya. 11 Penepo shakwa sha lugula kabhili kuti abha, Bhayaudi eu Bhagiliki eu ajalwishe na jwangajaluka, nngumba wala jawampenyе, ntumwa wala nngwana, ikabhe a Kilishitu ni yowe, na kwa kila shindu. 12 Bhai pabha nshibhanganga bhandu

nng'agwilwenje na a Nnungu, bha ukonjelo nkupinganya, ntolanje ntima gwa shiya na uguja na kwiitimalika na shinunu na kwiiluma. 13 Nnaukumulane nneshelelananje, munda akolaga shiumilo sha kunnugula nnjakwe, bhai mbaya anneshelele malinga Bhakulungwa shibhanneshelelenje mmanganyanji. 14 Kupunda gene gowego, ntamangananje nkupingana, pabha kupingana kunalundanya indu yowe nibha shindu shimo sha nng'ilimila. 15 Na ulele gwa a Kilishitu gunnongoyanje mitima jenunji, pabha genego ni gunshemelwenje kubha shiilu shimo. Na mmanganje bhandunji bhatandanga eja. 16 Malobhe ga ngani ja a Kilishitu gumbale mmitima jenunji, akuno nnijiganyananga na leyana kwa lunda lowe, nnikwaajimbianga a Nnungu nyimbo ya mbeembela na nyimbo ya muntima, akuno nntitandanga eja mmitima jenunji. 17 Shoshowe shinkukumulanga kwa lilibhe eu itendi, yowe ntendanje kwa lina lya Bhakulungwa a Yesu, na kwaatendela eja Atati a Nnungu kwa lina lya a Yesu. 18 Mmandonyanji mwaapiikanlanje ashimbuje bhenunji, nneyo ni shibhapinga Bhakulungwa. 19 Mmanabhalume nnombilenje, mwaapinganje ashakongo bhenunji, nnakolanje nngomo. 20 Bhana, mwaapiikanlanje bhankwetenje kwa kila shindu, pabha genego ni gubhapinga Bhakulungwa. 21 Na mmanganyanji ashaaina munda, nnaatandubhanje ashibhana bhenunji, bhanawanganga mitima. 22 Bhatumwa, mwaapiikanlanje bhakulungwa bhenunji bha pa shilambolyo pano, kwa kila shindu na nngabha kwa jimililwape nkupinga muikonjeleyanje pa meyo gabhonji, ikabheje ntendanje nneyo kwa ntima gwa mmbone, akuno nnikwaajogopanga a Nnungu. 23 Shoshowe shinkukumulanga, ntendanje kwa ntima gowe mbuti nkwaatendela Bhakulungwa na wala nngabha munda. 24 Mmumanyanje kuti shimposhelanje upo ya ulishi ibhammishilenje Bhakulungwa. Pabha nnakwaatumishilanga Bhakulungwa a Kilishitu. 25 Pabha atenda yangali ya mmbone shalipwe yangali ya mmbone malinga shatendile, pabha kwa a Nnungu kwangali bhonelwa.

4 Bhakulungwanji bha bhatumwa, mwaatendelanjе bhatumwa bhenunji aki na uguja, nnikumumanyanga kuti, nkali mmanganyanji nkwenje Bhakulungwa kunnungu. 2 Nnonjeyanje kaje nkujuga nnaibhukanje, na mwaatendelanjе eja a Nnungu. 3 Ntujujilanjе na uwe, nkupinga a Nnungu bhatupe malanga ga lunguya lilibhe lyabho, tushumye indu ya nng'iyoye ya a Kilishitu, numbe kwa ligongo lya yenyoye, nne njitabhwa. 4 Kwa nneyo nnyujilanjе kupinga ngombole kulunguya ga indu ya nng'iyoye malinga shingupinjikwa. 5 Ntamangananje kwa lunda na bhandunji bhanganjilinginji ngulupai jimo na mmanganyanji, nnikugakumulilanga liengo ukoto, malanga gumpegwilwenje. 6 Mobha gowe malobhe genunji ganapinjikwa gabhe ga mboka, na ga pwaa, nkupinga mmumanyanje namuna ja kunnjangula kila munda. 7 A Tikiko, apwetu bha mmbone, bhatumishi bha kulupalika na ajangu nniengo lya Bhakulungwa, shibhantashyanje ngani jangu nne jowe. 8 Njikwaatuma kweneko kwa ligongo lya genego, nkupinga nngamanyanje getu uwe, na bhantanganje ntima. 9 Bhanakwiya pamo na a Oneshimushi apwetu bha mmbone na bha kulupalika, numbe ni bhashilambo ajenunji. Bhene bhanganjabho shibhantashyanje indu yowe itendeka kunnngwetu kuno. 10 A Alishitako bhatabhilwe

pamo na nne, bhanakunnjumushilanga, pamo na a Maliko aibhani bhabho a Bhanabha, bhumwaposhelenje malajilo ga bhenebho, bhaikaga kweneke mwaaposhelanje. **11** Na a Yoshua bhaashemwa a Yushitushi, nneila peila bhanakunnjumushilanga, bhene bhanganya pebha ni bhalinginji Bhayaudi, munkumbi gwa bhaakumulanga maengo pamo na nne, kwa ligongo lya upalume gwa a Nnungu, na bhashindaganga ntima kwa kaje. **12** A Epapula bhashilambo ajenunji na bhatumishi bha a Yesu Kilishitu bhanakunnjumushilanga, mobha gowe bhanakunjujilanga gwangali toto shela, nkupinga ntamangananje kwa kamilika, na nkombolanje kwa kaje kutenda yowe ipinjikwa na a Nnungu. **13** Bhai ngunakong'ondela kuti bhanakamula liengo kwa tumbila, kwa ligongo lyenu mmanganyanji, na lya bhalinginji ku Laodikia na bhalinginji ku Ilapolishi. **14** Ambwiga ajetu a Luka a dakitali bhala, na a Dema bhanakunnjumushilanga. **15** Mwaajumushilanje ashaapwetu bha ku Laodikia na a Nimpa na bhandunji bha likanisha bhaimananga nnyumba jabho. **16** Jene bhaluwa jino jishomwaga na mmanganyanji, mwaapanganje na bha likanisha lya ku Laodikia bhajishomanje, na mmanganyanji nshomanje bhaluwa ja kopoka ku Laodikia. **17** Mwaabhalanjilanje a Alikipo, bhatende ukoto nkukamilisha liengo libhapegwilwe na Bhakulungwa. **18** Nne a Pauli, ngujandika shene shalamu shino kwa nkono gwangu. Nkumbushilanje kuti muni nkutabhwa. Nema ya a Nnungu ibhe na mmanganyanji.

1 Bhateshalonike

1 Ajino bhaluwa jino kujikopoka kwangu nne a Pauli, na a Shilubhanushi, na a Timoteo. Tunakunnjandishilanga nninginji ku likanisha Iya bha Teshalonike, bhandunji bha Atati a Nnungu na Bhakulungwa a Yesu Kilishitu. Tunakumpinjilanga nema na ulele. **2** Tunakwaatendela eja a Nnungu mobha gowe, kwa ligongo Iyenunji mmowe na kunkumbushilanga kila putukwaajuga a Nnungu. **3** Tunakumbushila shinkuti languyanga ngulupai jenunji kwa pinga, na shinkuti lajililanga tenda liengo kwa tumbilla na kulupalila, na shinshite kwiishimilikanga ku Bhakulungwa bhetu a Yesu Kilishitu. **4** Ashaalongo, tumumanyi kuti a Nnungu bhanakumpinganga na bhashikung'agulanga mmanganje bhandu bhabho, **5** pabha putwannungushiyenje Ngani ja Mmbone jila nngabha kwa malobhepe, ikabhe kwa mashili na kwa Mbumu jwa Ukonjelo, tulikumumanya kuti ntengago ni gwa kweli. Mmumanyinji shitwaashite tama na mmanganyanji, nkupinga mpwakanje. **6** Mmanganya mwashinkukaguyanga itwatendaga uwe na ibhatendaga Bhakulungwa. Nkali mwapotekwenje kwa kaje, mwashinkuuposhelanga ntenga kwa angalala kukopoka kuka Mbumu jwa Ukonjelo. **7** Kwa nneyo mmanganya nshibhanganga shilangulo sha kagulwa na bhandunji bhowe, bhaakulupalilanga bha ku Makedonia na bha ku Akaya. **8** Pabha, koposhela kwenu mmanganyanji, ntenga gwa Bhakulungwa ushumile, nngabha ku Makedonia na ku Akayape, ikabhe ngulupai jenunji kwa a Nnungu jishishuma mmbali yowe. Numbe twangali sha bheleketa kabhili. **9** Pabha ashaayenenji bhanatalashiyanga ga mwanja gwetu kungwenunji, shimwatuposhelenje na shimwashite kuilekanga yanamu, nikwaatendebhushila a Nnungu bhali na gumi na bha kweli, **10** niikwaalinda Bhanabhabho kopoka kunnungu, yani a Yesu. Bhayushiywe na a Nnungu, bhakututapula na nnjimwa jikwiya ja a Nnungu.

2 Ashaalongo, mwashaayenenji mmumanyinji kuti kung'owelanga kwetu kukaliji kwa yoyo. **2** Mmumanyinji shitwashite potekwa na tukanwa ku Pilipi kula tukanabheika kungwenunji. Nkali twaimene ndabhila, a Nnungu bhashinkutupa makangala ga kunnungushiyanga Ngani ja Mmbone. **3** Shindu shitukunneyanga mmanganya nngabha sha puganya eu shanyata na wala tukapinga kuntemba mundu jojowe. **4** Uwe tunabheleketa malinga shibhapinga a Nnungu, pabha bhashikutubhona tunapwaa, gubhatupele liengo Iya lunguya Ngani ja Mmboneji. Tukaapinga kwaanonyeyanga bhandunji, ikabheje a Nnungu bhakujimanya mitima jetu mpaka nkati. **5** Pabha malinga shimmumanyinji, uwe twangantekeya mundu jojowe, wala twangalokolila kupata indu kwa nng'iyoy, a Nnungu ni bhaakong'ondela bhetu! **6** Twangaloleya ukonjelo kwa bhandunji, wala na mmanganyanji, wala na mundu jojowe, **7** nkali twaaliji mitume bha a Kilishitu, twangalanga shindu kungwenunji. Ikabheje twashinkwitimalika mbuti nyinamundu anilela ashibhanagwe. **8** Twashinkumpinganga mpaka muntima mmanganyanji, gutupinijile nngabha kuntalashiyangape ga Ngani ja Mmbone ja a Nnungu, ikabhe na kwiishoya twaashayene. Pabha munninginji mmitima jetu. **9** Ashaalongo,

nnikumbushilanga shitwashite tenda maengo ga ukomu na ga totoya. Akuno tulikunnungushiyanga Ngani ja Mmbone ja a Nnungu, twashinkutenda liengo mui na shilo, nkupinga tunabhe nshigo kuka mundu jojowe munkumbi gwenunji. **10** Mmanganya ni mmaakong'ondela bhetu, nneila peila na a Nnungu bhanakong'ondela, kuti twashinkutama munkumbi gwenunji nkwenenje aki, kwa ukonjelo na uguja na gwangali kugambwa. **11** Mmumanyinji kuti twashinkunneya kila mundu mbuti ainamundu shibhaaleya bhana bhabho, **12** tushinkutaganga ntima, nkupinga mmanganje na ndamo malinga shibhaapinga a Nnungu bhanshemilenje nnjinjilanje muupalume na muokonjelo gwabho. **13** Kwa Iyene ligongolyo tunakwaatendela eja a Nnungu mobha gowe, pabha putwannungushiyenje ntenga gwa a Nnungu mmanganya mwashinkuupilikanishiyanga niposhela, nngabha malinga ntenga uka mundu, ikabhe malinga kweli ntenga gwa a Nnungu. Na gwene ntenga gula, ni utenda liengo mmitima jenunji mmanganyanji nkukulupalilanga. **14** Mmanganya ashaalongo, yashinkumpatanga indu malinga yaapatilenje bha ku makanisha ga a Nnungu ku Yudea kula, indu yaapatilenje bhandunji bhalinginji bha a Yesu. Mmanganyanji mwashinkupotekwanga na bhashilambo ajenunji, malinga bhangananyabho shibhashite potekwanga na Bhayaudi ajabhonji, **15** bhaabhulegenje Bhakulungwa a Yesu na ashikulondola bha a Nnungu, gubhatupotekwenje na uwe. Bhanakwaashimanga a Nnungu na bhanashimwanga na bhandu bhowe! **16** Gubhalinjilenje kutuibhila tunaalungushiyanje bhandunji bha ilambo ina ntenga gwa kwaatapulanga. Kwa nneyo gubhatendilenje ilebho yabhonji imalile. Kungai nnjimwa ja a Nnungu jaishilenje. **17** Ikabheje ashaalongo, kulekana kwetu pukwaliji nngabha kwa lonjeya, numbe pukwaliji kwa shiilu, na nngabha kwa muntima. Uwe gutulokolile mmitima jetu kummonanga kabhili. **18** Kwa nneyo gututumbilile kung'owelanga kabhili. Nne a Pauli, nashinkupinga ning'owelannje papagwinji, ikabheje Lishetani ashinkutuibhila. **19** Bhuli, shitwipunile nndi pushitujijeyima mmujo ja Bhakulungwa a Yesu mobha gushibhaishe? Ikabhe mmanganyanji nninginji ngulupai jetu, na angalala kwetu. **20** Elo, mmanganyanji ni ukonjelo gwetu na angalala kwetu.

3 Kungai gutulepele kwiipililila kabhili, gututumbilile kulepeka ku Atene jika jwetu, **2** nigutuntumile mpwetu Timoteo, nkamula liengo jwa a Nnungu nkulunguya Ngani ja Mmbone ja a Kilishitu. Twashinkuntuma nkupinga anshimilikanje na kuntaganga ntima ngulupai jenunji, **3** nkupinga mundu anapuganywe ngulupai jakwe kwa ligongo Iya mbotekoyo. Mmanganya mmumanyinji kuti tushibhishilwa mboteko. **4** Pabha, putwaliji pamo na mmanganyanji twammalanjilenje kuti shitupotekwe, malinga shimmumanyinji kuti ikoposhele. **5** Kwa nneyo ngalepeleje kwiipililila kabhili, gunintumile Timoteo kungwenunji, nkupinga nijimanye ngani ja ngulupai jenunji. Inabhe nkulinga, anninjilenje nkupinga liengo Iyowe litutendile kungwenunji lila, libhe Iya yoyo. **6** Ikabheje nnaino, a Timoteo bhaishe kopoka kungwenunji na bhatupeleshele ngani ja mmbone, ja ngulupai na pinga kwenu. Bhashikutubhalanjila kuti nnakutukumbushilanga mobha gowe na nnalokolilanga

kutubhona malinga shitulokolila uwe kummonanga. 7 Bhai, ga ngani ja ngulupai jenunji jishikututaga ntima nshilaje na potekwa kwetu kowe, 8 nnaino tunatama ukoto, ibhaga mmanganya mwiishimilikenje nkulundana na Bhakulungwa. 9 Na nnaino kanga twaatendele bhuli eja a Nnungu bhetu, kwa ligongo lyenunji! Tunakwaatendela eja kwa nng'angalo gutukwete kwa a Nnungu bhetu, kwa ligongo lyenunji. 10 Shilo na mui tunapunda kwaajuga a Nnungu kwa ntima gwetu gowe, nkupinga tubhonegane na mmanganya nkupinga tugumbashiye shitubhile ngulupai jenunji. 11 Tunakwaajuga Atati a Nnungu na Bhakulungwa bhetu a Yesu bhatulongoye kuika kunnngwenunji. 12 Bhakulungwa bhankomboyanaga ga pingana na punda kwaapinganga bhandu bhowe, malinga uwe shitukuti kumpinganga mmanganyanji. 13 Kwa nneyo bhashimilise mitima jenunji jibhe jangali sha gambwa, muukunjelo pa meyo ga a Nnungu Aina bhetu, mobha ga ika Bhakulungwa bhetu a Yesu pamo na bha ukunjelo bhahho bhowe.

4 Kungai bhakilishitu ajangunji, tunakunshondelesheyanga na kunnjuganga kwa lina lya Bhakulungwa a Yesu, malinga shimwiiijigenyenje kopoka kwetu uwe kutama nkwaanonyeya a Nnungu, na malinga shinkutamanganashi, nnapinjikwanga mpundanje kutenda nneyo. 2 Pabha nnikumbushilanga malajilo gutwampelenje gala, kwa mashili ga Bhakulungwa a Yesu. 3 A Nnungu bhanapinga mmanganya mmanganje bha ukunjelo nnkwiembuyanga na labhalabha. 4 Kila jwannume amanye kwiigoya nnyene atame kwa ukunjelo na ishima, 5 ngabha kwa ilokoli yangali ya mmbone malinga shibhatendanga bhandunji bhakakwaamanyanga a Nnungu. 6 Bhai kwa gene malobhe gano, mundu jojowe ananneebhele nnjakwe eu kuntekeya kwa ligongo lya ilokoli yakwe. Twammalanjilenje genego na kunnnyanga kuti Bhakulungwa shibhaakumulanje bhatendanga genego. 7 Pabha a Nnungu bhangatushema nkupinga tutende ya nyata, ikabhe tutame muukunjelo. 8 Bhai, kwa nneyo akana gene majiganyogo, akakunkana mundu, ikabhe anakwaakana a Nnungu bhayene, bhakupanganga Mbumu jwabho jwa Ukonjelo. 9 Ga pingana, bhakilishitu ajetunji nkwtetenje ngulupai, tukannjandishilanga pabha mwaashayene nnjigenyenwenje na a Nnungu ga pingana. 10 Pabha nnatendanga nneyo kwa bhakilishitu ajetunji bhowe bhalinginji ku Makedonia. Bhai, tunakunnjuganga mpundanje tenda nneyo. 11 Nntamangananje kwa kwitimalika, kila mundu atende indu yakwe nyene na tenda liengo malinga shitwannajilenje. 12 Kwa tenda nneyo shinnumbililwanje na bhandunji bhangabha Bhakilishitu, wala nkalolelanga kujangutilwa indu naka mundu jojowe. 13 Ikabheje bhakilishitu ajetunji, tukaapinga nnamumanyanje ga bhandu bhawilenje, nkupinga nnainjikanga malinga bhandunji bhana bhanginginji na ngulupai. 14 Pabha uwe tunakulupalila kuti a Yesu bhashinkuwa niyuka, nneyo peyo tunakulupalila kuti a Nnungu kupitila a Yesu, bhowe bhawilenje bhalikwaakulupalilanga a Yesu, a Nnungu shibhaajianabhonji pamo na a Yesu. 15 Pabha kwa tolelela na majiganyo ga Bhakulungwa ni kuti, tubhabhakoto uwe, shitulepeshe mpaka malanga gushibhaishe Bhakulungwa, kweli tukaalongoelanga bhawilenje bhala. 16 Pabha Bhakulungwa bhayene shibhatulushe kopoka

kunnungu na lilibhe lya utiya, na akuno lilibhe lya utiya lika malaika nkulu lilipilikanika, na akuno mbalapala ja a Nnungu jilipilikanika, na bhawilenje bhalikwakulupalilanga a Yesu bhala, shibhabhanganje bha nta kuyuywa. 17 Kungai uwe tuli tubhabhakoto shitunyakulwe pamo na bhanganyabho kukwaposhela Bhakulungwa kunani. Kwa nneyo shitutame nabho mobha gowe. 18 Bhai, ntagananje ntima kwa gene malobhega.

5 Ikabheje bhakilishitu ajetunji, tukapinga kunnjandishilanga ga malanga na mobha pugapinga koposhela genego. 2 Pabha mmanganyanji mwashaayenenji mmumanyinji kuti lyubha lya Bhakulungwa shiliishe mbuti sha kwiya ngwii shilo. 3 Bhandu bhalinkutinji, "Ulele na ushalama," penepo ni pushiukoposhele mpaulo shangupe! Mbuti poteka kwa shitumbo nkwiigopola, wala jwakwapi shatolose. 4 Ikabheje mmanganyanji bhakilishitu ajetunji, nkatamangananga nnuhindu kuti lyene lyubhalyo linng'imananje mbuti ngwii. 5 Pabha mmowe mmwe nshibhanganga nshilangaya, bhandunji bha mui. Uwe nngabha tubhandu bha shilo wala bha lubhindu. 6 Bhai, tunagone lugono malinga bhananji, ikabhe tusheyenje na tunapunde. 7 Pabha bhaagonanga lugono pubhagonanga shilo, na bhakolelwanga, pubhakolelwanga shilo. 8 Ikabheje uwe tuli bha kushilangaya tunapunde. Mitima jetu tujibhishe muulinda kwa ngulupai na pingana, na kukulupalila kwetu ga ntapulo, kubhe mbuti kopiya ja shitala. 9 Pabha a Nnungu bhanganatugula tupotekwe na nnjmwaba jabho, ikabhe tatapulwe na Bhakulungwa bhetu a Yesu Kilishitu, 10 bhahulegwe kwa ligongo lyetu, nkupinga tutame nabho pamo ibhe tubhabhakoto eu tuwile. 11 Kwa nneyo, ntagananje ntima na jangutana mwaashayenenji malinga shinkutendangasho. 12 Bhai ashaalongo, tunakunnjuganga mwaishimunji bhatumbilanga kutenda liengo munkumbi gwenunji, nikunnongoyanga kwa a Kilishitu, na kunnnyanga bhala. 13 Mwaishimunji na kwapinganga kwa ligongo lya liengo libhatendanga. Mmanganje na ulele munkumbi gwenunji. 14 Ashaalongo tunakunshondelesheyanga, mwaaleyanje bhandunji bhakata, mwaataganje ntima bhawilenje ntima, na kwaajangutilanga bhanginginji mashili, mwiilumanje ntima na bhandu bhowe. 15 Nnolanje, mundu jojowe anannipe nnjakwe yangali ya mmbone, ikabhe ntendelananje uguja mwaashayenenji na kubhandu bhowe. 16 Nng'angalalanje mobha gowe, 17 nnjuganje gwangali totohela, 18 na ntendanje eja kwa kila shindu. Pabha genego ni gubhapinga a Nnungu kungwenunji, nkulundana na a Yesu Kilishitu. 19 Nnanng'ibhiilanje Mbumu jwa Ukonjelo, 20 nnanyegayanje malobhe ga ashinkulondola, 21 nkagutilanje kila shindu, na bhika muntima shili sha mmbone, 22 mwiepuyanje na yangali ya mmbone yowe. 23 A Nnungu bhayene bhakutupa ulele bhantakayanje kwa kaje mitima jenunji, na ng'anyi yenunji, na ilu yenunji mmikwanje ukoto, nnakolanje sha gambwa malanga gushibhaishe Bhakulungwa bhetu a Yesu Kilishitu. 24 Bhene bhakunshemanga bhala shibhatende genego, pabha ni bhaakulupalika. 25 Bhakilishitu ajetunji, ntujujilanje na uwe. 26 Mwaalamushilanje Bhakilishitu ajetunji bhowe, nkupingana kwa ukunjelo. 27 Ngunakunkwiyanga kwa lina lya Bhakulungwa, mwaashomelanje jene bhaluwa jino Bhakilishitu ajetunji bhowe. 28 Nema ja Bhakulungwa bhetu a Yesu Kilishitu, jibhe na mmanganyanji.

2 Bhateshalonike

1 Ajino bhaluwa jino kujikopoka kwangu nne a Pauli, na a Shilibhanushi na a Timoteo tunakunnjandishilanga mmanganyanji mma kulikanisha Iya ku Teshalonike nninginji bhandu bha a Nnungu Ainabhetu, na Bhakulungwa a Yesu Kilishitu. **2** Tunakumpinjianga nema na ulele kukopoka kwa a Nnungu Ainabhetu, na kwa Bhakulungwa a Yesu Kilishitu. **3** Ashaalongo, tunapinjikwa kwaatendela eja a Nnungu mobha gowe kwa ligongo Iyenunji. Inapwaa tutende nneyo pabha ngulupai jenunji jinapunda kula, na pingana kwenunji kunajenjesheka. **4** Pabha uwe tunakwiipunia mmanganyanji, nninginji bha makanisha ga a Nnungu. Tunakwiipuna shinkuti pundanga kulupalila na kuikakatimila na mboteko inkwiipatanga. **5** Gene gowega ganakomelesheya kuti ukumu ja a Nnungu ni ja aki, kwa nneyo mmanganyanji nnapinjikwanga kuupata Upalume gwabho, kwa ligongo Iya mboteko inkupatanga. **6** A Nnungu ni bha aki, shibhaalipanje mboteko bhene bhakumpotekanga mmanganyanji bhala, **7** na shibhantendanje mpumulilanje na uwe mmanganyanji nkupotekwanga. Genego shigatendeshe malanga gushibhakoposhele Bhakulungwa a Yesu kukopoka kunnungu, na ashimalaika Bhabho bhakwetenje mashili, **8** na lilamba Iya moto, kwaaukumulanga bhene bhakwaakananga a Nnungu, na bhaakakunganda Ngani ja Mbone ja Bhakulungwa bhetu a Yesu. **9** Mboteko yabhonji, shiibhe kuangabhanywa pitipiti na bhakalubhonanga lubhombho Iwa Bhakulungwa na Ukonjelo gwa mashili Gabho, (aiōnios g166) **10** Iyubha lishibhaishe kuuposhela ukonjelo kukopoka kwa bhandu bhabho bha ukonjelo na iniywa na bhandu bhakwaakulupalilanga. Na mmanganya shimanganje munkumbi gwabhoronji, pabha nshikulupalilanga ntenga gutwampeleshenje gula. **11** Kwa nneyo mobha gowe tunakunnjijilaga nkupinga a Nnungu bhankomboyanje kutama malinga shibhanshemilenje. Tunakwaajuga, kwa kumbola kwabho Bhatende ndumbililo yenunji ya tenda uguja, na liengo Iyenunji Iya ngulupai litimilile. **12** Kwa nneyo, Iya Iya Bhakulungwa bhetu a Yesu shiilipate ishima kukopoka kungwenunji na mmanganya shimpatanje ishima kukopoka kwa bhenebho, kwa nema ja a Nnungu bhetu na ja Bhakulungwa a Yesu Kilishitu.

2 Bhai, ga kwiya kwabho Bhakulungwa bhetu a Yesu Kilishitu na imana kwetu nkupinga tutame nabho, ashaalongo tunakunshondelesheyanga, **2** nnapuganywanje na wala nnakolanje lipamba eu kwaapilikanishianga bhaabheleketanga kuti Iyubha Iya Bhakulungwa liishe. Nnapuganywanje kwa londola, eu kwa lunguya, eu kwa bhaluwa Ijiganishiywa kuti kujikopweshe kwetu uwe. **3** Nnakundanje kutembwa naka mundu jojowe kwa shoshowe shila, pabha Iyene Iyubhalo likaika mpaka ukoposhele Ungakunda Gwankulungwa na Iwene Nkuteba jula akoposhele, na mpelo gwakwe kuobha. **4** Pabha anakwikuya nnyene kwa indu yowe ishemwa na bhandunji kuti nnungu, eu kila shindu shitindibhalilwa. Shajinjile nkali Nniekalu Iya a Nnungu, nikwiitenda kuti jwalakwe Nnungu. **5** Bhuli, nkakumbushilanga kuti nashinkummalanjilanga gene gowega mobha punaliji na mmanganya? **6** Ikabheje shipali shindu shikunng'ibhilila nnaino,

mmanganya nshimanyinji shene shindusho. Bhai, Iwene jwangali jwa mmbone jula, shalangulwe malanga gakwe gaishilaga. **7** Nkali nneyo, Jwangali jwa Mmbonejo aiishiye, anakamula liengo nnaino, ikabheje akabhoneka mpaka pushashoywe aibhilila jula. **8** Penepo Jwangali jwa Mmbone jula pushakoposhele, ikabheje Bhakulungwa a Yesu pushibhaishe shibhammulaje kwa mbumu ya nkang'wa jabho, kwa ukonjelo gwa kwiya kwabho. **9** Jwangali jwa Mmbone shaishe na mashili gaka Lishetani na tenda ilapo ya unami, **10** na kwaatembanga bhowe bhalinginji munkumbi gwa bhaobhanga. Bhanganyabho shibhaobhanje, pabha bhakangundanga nkupinga bhatapulwanje. **11** Kwa nneyo a Nnungu bhanakwaalekanga bhaobhanje, bhaukulupalilanje unami. **12** Nkupinga bhaukumulwanje bhowe bhaakakulupalilanga, ikabhe inakwaanonyelanga ilebho. **13** Ikabheje tunaapinjikwa kwaatendela eja a Nnungu mobha gowe kwa ligongo Iyenunji, mmanganya nkupingwanga na Bhakulungwa. Pabha a Nnungu bhashinkung'agulanga kuumila kundandubho nkupinga ntapulwanje kwa mashili gaka Mbumu, mmanganje bhandu bhabho bha ukonjelo, kwa ngulupai yenunji. **14** A Nnungu bhashinkunshemelanga yenei kupitila Ngani ja Mmbone jitwannungushiyenje, mposhelanje upo yenunji Muukonjelo gwa Bhakulungwa bhetu a Yesu Kilishitu. **15** Bhai, ashaalongo, muishimilikanje ukoto na kugabhika mmitima jenunji, majiganyo gutunnjigenyenje kwa lunguya kwetu, na kwa bhaluwa yetu. **16** Tunakwaajuga Bhakulungwa bhetu a Yesu Kilishitu na a Nnungu ainabhetu bhakutupinga, na kwa nema jabho gubhatupele kuangalala pitipiti na kulupalila kuli kwa mmbone, (aiōnios g166) **17** bhaangalalaye mitima jenunji na kunshimilikanga nkupinga nkombolanje mobha gowe tenda na bheleketa gali ga mmbone.

3 Kumpelo, ashaalongo, ntujijilanje nkupinga ntenga gwa Bhakulungwa upunde jenela na poshelwa kwa ishima malinga shiishitebha kungwenunji. **2** Nnjuganje nkupinga bhatatupule na bhandunji bhanginginji bha mmbone na bhaatendanga ikaapinjikwa, pabha nngabha bhowe bhaakulupalilanga gwene ntenga guno. **3** Ikabheje Bhakulungwa nibhaakulupalikwa. Bhenebho shibhanshimilikanje na kunnindililanga Lishetani anakumpuganyanga. **4** Numbe uwe tukulupalile ku Bhakulungwa, kuti mmanganyanji nnatendanga na shinntendanje itunnugulilenje Ila. **5** Bhakulungwa bhajilongoye mitima jenunji nkwaapinga a Nnungu, na nkwiiluma kutupegwa na a Kilishitu. **6** Ashaalongo, tunakunnajilanga kwa Iya Iya Bhakulungwa bhetu a Yesu Kilishitu, mwiiteiganje na Bhakilishitu bhakata, na bhaakagulanga malajillo gutumpelenje. **7** Mmanganyanji mwaashayene mmumanyinji shinkuti pinjikwanga kaguya itutenda. **8** Uwe putwaliji na mmanganya tukuliji tubhakata, **8** twangalya shalya gwayoyo kuka mundu jojowe. Twashinkukamula liengo kwa tumbilila shilo na mui nkupinga tunantopele mundu munkumbi gwenunji. **9** Twashinkutenda nneyo nngabha kuti tukapinjikwaga kujangutlwa, ikabhe nkupinga nkaguyanje itutenda. **10** Putwaliji pamo na mmanganya twannajilenje kuti, "Mundu jojowe akaapinga kamula liengo, analye shalya." **11** Tunabheleketa genego pabha tushipilikana kuti bhapalinji bhakata munkumbi gwenunji bhakapinganga kukamula

shoshowe, ikabhe kujinjilila malobhe ga bhandunji bhana. **12** Kwa lina lya Bhakulungwa bhetu a Yesu Kilishitu tunakunnajilanga na kwaaleyanga bhene bhandunjibho bhaitimalikanje na kamula maengo nkupinga bhakolanje indu yabhonji. **13** Ikabheje mmanganyanji ashaalongo, nnatotoshelanje tenda uguja. **14** Pana kweneko apali mundu akakuukunda ntenga gutukumpeleshelanga mmaluwa muno. lbhaga nneyo, bhai, mwiiteiganje na jwene mundujo wala nnakungulushe nabho nkupinga akole oni. **15** Ikabheje nnantendelanje mbuti mmagongo nnjenunji, ikabhe munneyanje mbuti nnongo nnjenunji. **16** Bhakulungwa bhayene bhali shiumilo sha ulele, bhampanganje ulele mobha gowe. Bhakulungwa bhabhe na mmanganya mmowe. **17** Kwa nkono gwangu namwene ngunajandika nnei, shalamu kopoka kwa a Pauli! Nnei ni shinguti kong'ondela bhaluwa yowe. **18** Tunakumpinjilanga mmowe nema ja Bhakulungwa bhetu a Yesu Kilishitu.

1 Timoteo

1 Nne Pauli ntume jwa a Yeshu Kilishitu, kwa pinga kwabho a Nnangu Bhaatapula na a Yeshu bhali ngulupailo yetu. 2 Ngunakunnjandishila mmwe a Timoteo mmanangu bha kweli nngulupai. Ngunakunnjijila nema na shiya na ulele, kukopoka kwa Atati a Nnangu, na a Yeshu Kilishitu Bhakulungwa bhetu. 3 Ngunaaapinga ntime ku Epesho, malinga shinanshondelesheye punajendaga ku Makedonia, nkupinga mwaalimbinye bhandunji bhaajiganyanga majiganyo ga unami, 4 wala bhanakagulilanje ndango yangali malombolelo, na nndondonga gwa mena ga bhanyikala, gwangali mpelo, ikumbuya mitau na wala ikakwaajangutilanga bhandunji nngulupai. 5 Kwa nneyo, shitumbiliwe kwa gene malajiloga, nikwaakwiyanga bhandunji bhapangananje, kwa ntime gwa mmbone, na ng'aniyo ya muntima ili ya mmbone, na ngulupai yangali ugulumba. 6 Bhandu bhananji bhashipuganikanga ni tendebhushila malobhe gangali ga mmbone. 7 Bhanapinganga kubha bhaajiganya bha malajilo ga a Musha, ikabheje bhakakugamanyanga malobhe gubhaabheleketanga, wala ibhakong'ondelanga. 8 Tumumanyi kuti shalia ja a Musha ni ja mmbone, ibhaga mundu shaakagulle kwa aki. 9 Ikabheje tukumbushile kuti, shalia jangabhikwa kwa ligongo lya bhandunji bhanguja, ikabhe kwa ligongo lya bhandunji bhaatendanga yangali ya mmbone, na bhakaakundanga, na bhakakwaishimiyanga a Nnangu, na bhakwetenje yambi, na bhandunji bhanyatiyanga indu ya ukonjelo pa shilambolyo, na bhandunji bhakwaabhulaganga bhaakwetenje, eu bhaabhulaganga bhobhowe bhala, 10 shalia jishibhikwa kwa ligongo lya bha labhalabha, na bhaagonana ashaayene, yani, bhanabhalume kwa bhanabhalume, na bhanabhakongwe kwa bhanabhakongwe, bhandunji bhaajibhanga bhandu, na bhandunji bha unami, na bhandunji bhaalumbilanga kwa unami, na bhaatendanga shindu shoshowe shikana malajilo ga kweli. 11 Gene majiganyogo mugaabhoneka, Nngani ja Mmbone ja a Nnangu bha ukonjelo na bha mboka, jimbegwilwe nunguye. 12 Ngunakwaatendela eja a Yeshu Kilishitu bhambele mashili ga kamula liengo lyangu. Ngunakwaatendela eja pabha bhashimona nne kuti najwaakulupailiwa, gubhang'agwile naatendele liengo lyabho, 13 nkali bhukala gula, natendaga kwaatukana na kwaashima, na kwaatendela nngomo. Ikabheje a Nnangu gubhamonele shiya, pabha ngakweteje ngulupai na ngashimanyanga shingutenda. 14 Ikabheje Bhakulungwa bhetu bhashinkumba nema ja punda, gubhambele ngulupai na pingana, nkulundana na a Yeshu Kilishitu. 15 Ni lilobhe lya kulupalika kaje, na linapinjikwa liposhelwe kuti, a Yeshu Kilishitu bhashinkwiya pa shilambolyo kukwaatapulanga bhakwetenje ilebho. Na nne, ni napundile kulebha punda bhowenji, 16 ikabheje a Nnangu gubhamonele shiya nkupinga a Kilishitu bhalanguye kwiipiilila kwabho kowe mwangu nne naaliji nankulebha kupunda bhowe, nkupinga nne mme jwa langulwa ku bhandunji bhowe, shibhajiye kwaakulupalilanga na poshela gumi gwa pitipiti. (aiōnios g166) 17 Kwa bhenebho bhali a Mpalume bha pitipiti, bhakawa na bhakaabhoneka, bhene bhali a Nnangu jikape, kwa bhenebho jibhe ishima, na ukonjelo pitipiti! Amina. (aiōn g165) 18

Mwanangu Timoteo, ngunakupa gene malajilo gano, malinga malobhe gunabhalanjilwe bhukala na ashinkulondola bha a Nnangu. Ugatende gene malobhego gabhe shikomanilo shako nkukomana ukoto ngondo jako. 19 Ukole ngulupai na ng'aniyo ya mmbone. Bhandunji bhana gubhaikanilenje ng'aniyo yabhonji, niobhiya ngulupai yabhonji. 20 Munkumbi gwabhonji bhapalinji, a Imeneyo na a Alekishanda, bhene bhunimpele Lishetani, nkupinga bhaajiganywanje bhanaatukananje a Nnangu kabhili.

2 Bhai sha ntai kaje, nnjuganje na tenda eja kwa a Nnangu, kwa ligongo lya bhandunji bhowe, 2 kwa ligongo lya bhapalume, na bhowe bhakwetenje ukulungwa, nkupinga tutame ndamo ja ulele pamo na kwaakuya a Nnugnu, na ndamo ja ukonjelo na gundu. 3 Shene shindushi ni sha mmbone, shikwaanonyela a Nnangu, bhaatapula bhetu, 4 bhaapinga bhandu bhowe bhatapulwanje, na kuimanya indu ya kweli. 5 Pabha bhapali a Nnangu bhamope, na bhapali bhaalundanya bhamo, bhaalundanya bhandu na a Nnangu, ni mundu, a Yeshu Kilishitu, 6 bhene bhaishoshiye bhayene kwaatapulanga bhandu bhowe. Gweneo pugwaaliji ukong'ondelo, gakaishileje malanga gakwe ga pwaa, kuti a Nnangu bhanapinga kwaatapulanga bhandu bhowe. 7 Kwa lyene ligongolyo, njibhikwa kubha ntume, na nkulungwa, na nkujiganya, na bhandu bhanga bha Bhayaudi, ga ntenga gwa ngulupai na kweli. Ngunabheleka kweli nngabha unami. 8 Bhai, shingupinga nne, popowe punkumanyanga nkujuga, ngunaapinga bhanabhalume bhaajuganje a Nnangu, akuno bhajinwilenje makono gamatakaywe, bhalijuganga gwangali njimwa wala mitau. 9 Nneyo peyo, bhanabhakongwe bhawalanje nngubho ya mmbone, na ya shigundu, na ya langula kwiitimalika ntime, na nngabha kwiikelengelela kwa tibha umbo, wala kwa shaabhu na lulu, eu nngubho ya galama. 10 Ikabheje kwa itendi ya mmbone, malinga shibhaapinjikwanga bhanabhakongwe bhakwaajogopanga a Nnangu. 11 Bhanabhakongwe bhajiganyanje kwa kwiitimalika, akuno bhalikundanga yowe. 12 Nne nguti, jwankongwe anannjiganye wala kuntagwala jwannume, ikabhe aitalishe. 13 Pabha a Adamu ni bhatandwibhe kupanganywa, kungai a Awa. 14 Na wala a Adamu bhangatembwa, ikabhe bhakongwe ni bhatembilwe, gubhajinjile muilebho. 15 Ikabheje, bhakongwe shibhatapulwe kwa bheleka bhana, ibhaga shibhalonjeje nngulupai na nkupingana, na ukonjelo, na ntime gwa kwiitimalika.

3 Ni kweli kuti, mundu apinga kubha kalongolele jwa likanisha, anapinga liengo lya mmbone. 2 Bhai inapinjikwa kalongolele abhe mundu anakole ilebho ku bhandunji, na analombe matala, na abhe jwa kwiiluma na jwa ishimika, na jwa lunda, na jwa mituka na akombola kujiganya, 3 nngabha mundu jwa kolelwa na nngomo, ikabhe abhe jwa kwiitimalika na jwangali mitau, na anabhe mundu jwa kunnonnyela mbiya, 4 mundu akombola kulongoya ukoto bhandu bha likaja lyakwe, na akombola kwaatendanga bhaanagwe bhampiikananje na bhakolanje ishima. 5 Pabha monaga mundu akakombola kwaalongoyanga ukoto bhandu bha likaja lyakwe, shakombole bhuli kulilongoya likanisha lya a Nnangu? 6 Na kabhili mundu akanabhe kwiishimilika ukoto nngulupai, anaagulwe kubha kalongolele, nngakabha anakwiipuna niukumulwa malinga shatendilwe

Lishetani. 7 Abhe mundu jwa shuma uguja kubhandunji bha kunyenje, nkupinga anagambwe nitanjila nniyau lika Lishetani. 8 Nneyo peyo na mashemashi nnikanisha bhabhanganje bhandunji bha ishimika, na bhanabhanganje bha malobhe malobhe, na bhanabhanganje bha kolelwa, na bhapinganga mmbiya ya tokomaya, 9 bhabhanganje bhaakagulilanga ngulupai ya kweli. 10 Kwa nneyo bhatandubhanje kulingwa, kungai bhatandanje liengo lya jangutila nnikanisha, bhabhonekangaga kuti bhanganjini itendi ya nyata. 11 Nneyo peyo na ashaakongo bhabhonji, bhabhanganje bhaishimikanga, bhanabhanganje bha lung'wenyi, bhabhanganje bhakwiitimalika, na bhaakulupalikanga kwa kila shindu. 12 Mashemashi bhanalombanje matala, numbe bhakombolanje kulongoya ashibhana bhabhonji na makaja gabhonji ukoto. 13 Pabha bhatendanga liengo ukoto nnikanisha, bhanapatanga kushimilika ukoto, nikola mashili ga bheleketa kwa makangala, ga ngulupai yabhonji nkulundana na a Yesu Kilishitu. 14 Ngunakunnjandishila gegano, akuno nguliganishiya kuti ngakabha kwiya kweneke. 15 Ikabheje monaga ngabhaga kwiya, bhai mmumanyanje shiikupinjikwa bhandu kutama nnikaja lya a Nnungu, yani nnikanisha lya a Nnungu bhakwete gumi, bhali lipoto, na nshingi gwa kweli. 16 Bhai, pangali lipamba lyolyowe ga shinjubhi shikulu sha dini jetu, a Kilishitu bhakoposhele kwa shiilu sha shigundu, gubhakong'ondelwe naka Mbumu jwa Ukonjelo kuti bhakwete aki, gubhabhoneshe na ashimalaika. Gubhalungwiye ku bhandu bha ilambo ina. Gubhakulupalilwe pa shilambolyo, nigubhanyakwilwe kunani muukonjelo.

4 Bhai Mbumu anabheleketa gwangali nng'yo, kuti mobha ga kumpelo bhananji shibhalekanje ngulupai, nikagulila mitima ja unami na majiganyo ga ashimaoka. 2 Gene majiganyogo kugakopoka ku bhandunji bhanami na ugulumba, ng'aniyo ya mmitima jabhonji iangabhanyishe mbuti itiniywe na moto. 3 Bhalikwaalimbiyanga bhandunji bhanalombanje na bhanalyanganje yalya ina. Ikabheje a Nnungu bhashinkwiipanganya yene yalyayo, nkupinga bhakwetenje ngulupai na kuimanya ya kweli bhala, bhaiposhelanje nikwaatendela eja. 4 Pabha indu yowe ibhapengeny a Nnungu ni ya mmbone, wala shakwa sha kanwa, monaga shiposhelwaga kwa tenda eja, 5 pabha shishitakaywa kwa lilobhe lya a Nnungu na kwa juga. 6 Monaga shimwaakumbushiyanje ashaalongo ajenunji genego, shimme ntumishi jwa mmbone jwa a Yesu Kilishitu na nnelilwe kwa malobhe ga kweli ga ngulupai, na majiganyo ga mmbone gunkagulile. 7 Ikabheje mwileshe ndango ya bhukala yangabha ya dini ya bhanabhakongwe bhakongopa, mwiyoobhelesheya ndamo ja kwaajogopa a Nnungu. 8 Pabha kushiyobhelesheya shiilu kwa ing'ando, kunapwaa kashoko, ikabheje kuiyobhelesheya kwaajogopa a Nnungu, kunapwaa kwa indu yowe, pabha tunabhikwa mmiadi ja pata gumi gwa nnaino, na gwa mobha gakiyago. 9 Shene shibheleketosho ni sha kulupalika na shinapinjikwa shiposhelwe kwa kaje. 10 Pabha tunakwiabhuya na tumbila kwa ligongo lya genego, tunakwaakulupalila a Nnungu bhakwete gumi, bhaatapula bha bhandu bhowe, na kaje kwa bhaakulupalilanga bhala. 11 Bhai mwaalajilanje na mwaajiganyanje gene malobhego. 12

Mundu jojowe anannyegaye ga ushanda gwenu, ikabheje mme mmandu bha kagulwa kwa bhaakulupalilanga, muibheleketi na muitendi, na nkupingana, na nngulupai, na nkuikonjeleya. 13 Nnatotoshele kwaashomelanga bhandu Majandiko na lunguya, na kujiganya mpaka pushing'ishe. 14 Nnaleshe kutendela liengo shilo shimposhele kwa bhishilwa makono na bhanangulungwa, na kwa malobhe ga ukulondola shila. 15 Ntumbile kutenda genego, nkupinga kwiigongolela kwenu kumanyishe na bhandu bhowe. 16 Muiteije mmayene na majiganyo genu, nnaleshe tenda genego, pabha ntendaga genego shimwiitapule mmayene, na bhakumpilikaniishiyanjabho.

5 Nnaakalipile bhakongopa, ikabhe mwaaleye mbuti ainabhenu. Na bhashanda mwaatendelanje mbuti ashaapwenu, 2 bhanabhakongwe bhakongopa, mbuti anyinabhenu, na bhali mbuti ashaalumbu bhenu, nkuikonjeleya mowe. 3 Mwaalelanje bhanabhakongwe bhalinginji bhashitenga bha kweli. 4 Ikabheje bhashitenga bhakwete bhana eu bhaukulu, bhana eu bhaukulubho, bhajiganyanje kutenda ipinjikwa na dini kwa ashaalongo ajabhonji nkwaalanga bhaakwetenje, pabha genego ni ga pingwa na a Nnungu. 5 Bhai bhakongwe bhali bhashitenga kweli, bhanganji mundu jwa kwaajangutila, bhenebho bhashibhika ngulupai yabho kwa a Nnungu, na bhanalonjeya nkwaatindibhalila na nkwaajuga shilo na mui. 6 Ikabheje nshitenga akagulila ilokoli yangali ya mmbone jwenejo awile, nkali alonjeye. 7 Mwaalajilanje genego, nkupinga bhanagambwanje. 8 Ikabheje mundu jojowe alepela kulela ashaalongo ajakwe, yani bhandu bha nnikaja lyakwe, jwenejo ajikanile ngulupai, numbe jwangali jwa mmbone kupunda mundu jwangali ngulupai. 9 Bhakongwe bhashitenga bhanajandikwe munkumbi gwa bhashitenga bhakaishile yaka makumi shita, numbe bhabhe bhakongwe bhalombilwe na kamope, 10 na bhalumbililwe itendi ya mmbone, nkulela bhana bhabho ukoto na nkuposhela bhajeninji, na nkwaatendelanga ya mituka bhandunji bha ukonjelo na nkujangutila bhandunji bhalaga, na nkutumbilila kutenda ya mmbone. 11 Ikabheje bhashitenga bhalinginji bhali, nnaajandikwanje, pabha shilokoli sha nshiilu shipundaga, shibhalekanje kwaapinga a Kilishitu, nilombwa kabhili, 12 penepo shibhaukumulwanje kuti bhashilekanga ngulupai jabhonji ja ntai. 13 Numbe pamo na genego, bhashitenga bha nneyo paatandubha ukata, na kukonangona mmajumba ga bhandunji, na nngabha ukatape, ikabheje na lungw'enyi, na kwiijinjia mmalobhe ga bhananji, akuno bhalibheleketanga ikapinjikwa bheleketa. 14 Bhai nne punguganishiya, bhashitenga bhananabhe kongopalanga, bhalombwanje na bhakolanje bhana na bhagoyanje nyumba yabhonji, nkupinga ashaamagongo ajetu bhanakolanje sha kutugamba. 15 Pabha, bhashitenga bhananji bhaobhilenje nikunkagula Lishetani. 16 Ikabheje bhakongwe Bhakilishitu, bhakolaga alongo ajabho bhashitenga, bhanapinjikwa kwaajangutila, nngabha kulileshela likanisha lyene liengolyo, nkupinga likanisha likole liengo lya kwaalanga bhashitenga bhapundilenje kulaga. 17 Bhanangulungwa bhatendanga liengo ukoto nnikanisha, inapinjikwa bhalipwanje pabhili, na kaje bhene bhatendanga liengo lya lunguya na jiganya bhala. 18 Pabha Majandiko ga Ukonjelo ganalugula,

"Nnantabhe kangwa ng'ombe alilibhata yalya nkukubhata." Kabhili, "Nkamula liengo anapinjikwa kupata nshaala gwakwe." 19 Nnakunde malobhe ga kwaashitakiya bhanangulungwa bha likanisha, gwangali bhaakong'ondela bhabhili eu bhatatu. 20 Bhene bhatendanga ilebho, mwaaleyanye palugwinjili, nkupinga bhananji bhajogopanje. 21 Ngunakunnajila pa meyo ga a Nnungu na a Yesu Kilishitu na ashimalaika bha ukonjelo, nkamule gene malajilogo gwangali luagu wala kummika mundu pa ligaa. 22 Nnatende shangu kummishila mundu makono. Wala nnaajinjije muilebho ya bhananji, mwiiteije nnainyatiye. 23 Tandubhila nnaino nnangw'e mashipe, ikabheje na divai kashoko, kwa ligongo lya matumbo genu gakumpoteka na itwele inkulwala lwala. 24 Yambi ya bhandunji bhana inabhoneka gwangali nng'iyu na inalongoleta kuukumu, ikabheje yambi ya bhananji pabhoneka kungai. 25 Nneyo peyo na itendi ya mmbone, inabhoneka gwangali nng'iyu na nkali gakamanyikago gakaishika.

6 Bhatumwa bhowe bhanapinjikwanga kwaishumunji bhakulungwa bhabhonji, nkupinga lina lya a Nnungu na majiganyo getu ganatukanwe. 2 Bhatumwa bhalinginji bhakulungwa bhabhonji Bhakilishitu, bhanaanyegayanje pabha ni ashaalongo ajabhonji. Ikabhe, mbaya bhaatumishilanje ukoto, pabha apwaika kwa liengo lyabhonji, ni Nkilishitu nnjabhonji. Nnapinjikwa nnjiganye na nnunguye genega 3 Mundu jojowe ajiganya majiganyo gana ga kanana na gegano, na akaakunda malobhe ga gumi ga Bhakulungwa bheta a Yesu Kilishitu, wala majiganyo ga dini ja kweli, 4 jwenejo anakwiipuna na wala akakushimanya shoshowe, ikabhe jwenejo ashikola shalubha sha pinga mitau, na malobhe ga nngomo ga kumbuya lupimililo, na mpwai na matukano na nnjimwa, 5 na mitau jangali mpelo jikoposhela kubhandu bhaangabhanikenje lunda, na bhanginginji ya kweli. Bhaganishiyanga kuti dini mpanda gwa patila utajili. 6 Ikabheje dini ja kweli jinakumpa mundu kupwaika kaje, atogolelaga na yakwete. 7 Pabha pa shilambolyo twangaika na shindu, na tukajabhula na shindu. 8 Kwa nneyo tukolaga shalya na nngubho, tutogolele na yeneyo. 9 Ikabheje bhapinganga shipato shikulungwa pagwila mmalinjilo, nitanjila nniyau lya ilokoli ya indu yaigwinji, ya nyata na ya mboteko ikwaajinjiyanga bhandunji nkuobha na nkuangabhanika. 10 Pabha shiumilo shikulungwa sha indu yowe ya nyata, ni kupinjya ela. Na bhananji nkupinjya ela bhashilekanga nngulupai, nikwiijweka mmboteko ya punda. 11 Ikabheje mmwe, mmandu bha a Nnungu, muiembuye na genego. Nkagulile aki, na kwaatindibhalila a Nnungu, na ngulupai, na pingana, na kwiipililila na kwiitimalika. 12 Nkomane ukoto ngondo ja ngulupai, na mpate gumi gwa pitipiti gunshemelve gula, gumwapatile nkakundeje pa bhaakong'ondela bhabhagwinji. (aiōnios g166) 13 Ngunakunnajila pa meyo ga a Nnungu bhakwiipa gumi indu yowe, na a Yesu Kilishitu, bhakong'ondele ukoto pa meyo ga a Pontio Pilato, 14 kuti nkamule malajilo genu kwa kunda na kulupalika, mpaka lyubha lishibhaishe Bhakulungwa bheta a Yesu Kilishitu. 15 Na kuika kwabho shikubhe mobha ga pwa, gabhishilwe na a Nnungu Bhaatagwala jikape, Bhakulungwa bha bhakulungwanji. 16 Ni

bhenebho jikape bhakawa, bhatama pashilangaya shikabhandishilwa naka mundu. Wala jwakwapi mundu abhabhweni eu akombola kwaabhona. Bhenebho ni bha ishimiywa, na bhakwete mashili ga tagwala pitipiti! Amina. (aiōnios g166) 17 Mwaalajilanje bhandunji bhakwetenje utajili pa shilambolyo pano, bhanaipunanje na bhanaikulupalilanje indu ibhakwetenje ikaakulupalika, ikabhe bhaakulupalilanje a Nnungu, bhakutupa indu yowe kwa ntuka gwabho nkupinga tuinonyele. (aiōn g165) 18 Mwaalajilanje bhatendanje uguja, bhapundanje kutenda ya mmbone, na bhakolanje ntuka akuno bhaliengwanga kugabhana indu yabhonji na bhananji. 19 Kwaatenda nneyo, shibhaibhishilanje shibhiko sha mmbone kwa mobha gakiyago. Nkupinga bhapatanje gumi gwa kweli. 20 Mmwe a Timoteo, nngoye shimmishilwesho. Mwiembuye na nkungulu gwangali gwa mmbone, na mitau ja ungumba ga shene shishemwa lumanyio, mbeni unami. 21 Pabha bhananji bhaitapilenje kuti bhakwetenje lumanyio, bhashilekanga ngulupai. Ngunakumpinjilanga nema ja a Nnungu.

2 Timoteo

1 Nne a Pauli, kwa pinga kwabho a Nnungu, njemilwe kubha ntume jwa a Yesu Kilishitu, nkupinga nunguye ga gumi gubhalajile a Nnungu tupegwe, nkulundana na a Yesu Kilishitu, 2 ngunakunnjandishila mmwe mmanangu a Timoteo bhungumpinga. Ngunakumpinjila mboka, na shiya, na ulele ikoposhela kwa Atati a Nnungu, na a Yesu Kilishitu Bhakulungwa bhetu. 3 Ngunakwaatendela eja a Nnungu bhungwatendela liengo kwa ntima gwa mmbone malinga shibhatandangaga ashaambuje bhukala, ngunakwaatendela eja kila pungunkumbushila mmwe mobha gowe, nkujuga kwangu shilo na mui. 4 Pungukumbushila minyoi jenu, ngunalokolila kummona nkupinga kuangalala kwangu kupunde. 5 Ngunakumbushila ngulupai jenu ja kweli, ngulupai jatandubhile kwa anakulu bhenu a Loishi na anyinabhenu a Eunike. Kwa nneyo ngunakulupalila kuti, jipali nkali kwenu mmwe. 6 Kwa nneyo ngunakunkumbushiya kuti nkwiye shipaji sha a Nnungu, shimposhele punammishile makono. 7 Pabha a Nnungu bhangatupa Mbumu jwa bhoga, ikabhe Mbumu jwa mashili, na jwa pingana, na jwa kwiitimalika. 8 Bhai nnakole oni kong'ondela ga Bhakulungwa bhetu, nkali kungolela oni nne ndabhilwe kwa ligongo lyabho. Ikabheje mme pamo na nne mmboteko kwa ligongo lya Ngani ja Mmbone, malinga shinkupegwa mashili na a Nnungu. 9 Bhene bhatutapwile nikutushema tubhe tubhandu bhabho bha ukonjelo, nngabha kwa ligongo lya itendi yetu, ikabhe kwa ligongo lya pinga kwabho na nema jabho bhayene. Jene nemaji twashinkupegwa nkulundana na a Yesu Kilishitu kuumila bhukalago. (aiōnios g166) 10 Kwa nneyo, jene nemaji nnaino jishiibhulwa bhakayuyewe bhaatapula bhetu a Yesu Kilishitu. Bhenebho bhashikugapeya mashili ga shiwo, nipeleshela gumi gwa pitipiti kwa Ngani ja Mmbone. 11 Kwa ligongo lya jene Ngani ja Mmboneji, nne njiajulwa kubha nkulunguya, na ntume na nkujiganya. 12 Kwa ligongo lya genego, nne ngunapotekwa, nkali nneyo ngakola oni, pabha naamanyi bhene bhungwaakulupalila bhala, numbe nimumanyi kuti shibhashibhishile ulinda shene shibhambele shila, mpaka kuishila lyubha lya mpelo. 13 Nkamulile ukoto majiganyo ga kweli guninnjigenye gala, na ngulupai na nkupingana kwa nkulundana na a Yesu Kilishitu. 14 Kwa Mbumu jwa Ukonjelo atama nkati jetu, nshibhishile ulinda shene shindu sha mmbone shimpegwilwe shila. 15 Malinga shimmumanyi kuti bhandu bhowe bha ku Ashia, bhaneshilenje, munkumbi gwabhonji bhaapali a Pigelo na a Elimogene. 16 Bhakulungwa bhaabhonelanje shiya bha ulongo bha a Oneshipolashi, pabha bhatendaga ndaga ntima wala bhakakolaga oni ga tabhwa kwangu. 17 Ikabhe bhakaisheje ku Loma, gubhatumbile kunoleya, mpaka gubhamweni. 18 Bhakulungwa a Yesu bhaabhonele shiya sha a Nnungu lyene lyubhalo! Na mmwe mmumanyi indu yaigwinji ibhandendele ku Epesho kula.

2 Bhai ugwe mwanangu, ukole mashili kwa nema jitupegwa nkulundana na a Yesu Kilishitu. 2 Na majiganyo gumpilikene ngulijiganya pa bhaakong'ondela bhabhagwinji, numbe mmwe mwaajiganyanje bhandunji bhaakulupalika, bhaakombolanga

kwaajiganyanga bhananji. 3 Gwiilunde mmboteko pamo na nne, malinga nkomana ngondo jwa mmbone jwa a Yesu Kilishitu. 4 Linjola pabha nkukomana ngondo akakwiibhuka nkukamula maengo gana, pabha shaapinga ni kwaanonyeya bhakulungwa bha likundi lyakwe. 5 Nneyo peyo mundu apwatanila upo mwiing'ando, akapegwa upo ya kombola monaga jwangakaguya ikubho ya nng'andogo. 6 Mundu atumbila kulima, ni apinjikwa abhe jwantai kupata shipeta sha mauno. 7 Nnganishiye kaje malobhe gungummalanjila gano, pabha Bhakulungwa shibhampe lumanyo lwa kugamanya gowe. 8 Mwaakumbushile a Yesu Kilishitu bhayushiye bhakaweje, bha shippinga sha a Daudi, malinga shijitaya Ngani ja Mmbone jingulunguya jino. 9 Kwa lyene ligongolyo ngunapotekwa nitabhwa mbuti nkulebha, ikabheje lilibhe lya a Nnungu likatabhwa. 10 Kwa nneyo ngunakwiipililila gowe, kwa ligongo lya bhandunji bhaagwilwenje na a Nnungu, nkupinga na bhalabhonji bhapatanje ntapulo nkulundana na a Yesu Kilishitu, na ukonjelo gwa pitipiti. (aiōnios g166) 11 Na malobhe ga kulupalika gakuti, "Monaga tuwile pamo na bhenebho, nneyo peyo shitulame pamo na bhenebho. 12 Monaga shituipililile, shitutagwale pamo na bhenebho. Na ibhaga shitwaakane bhenebho, na bhalabho shibhatukane uwe. 13 Nkali tubhe bhangakulupalilanga, bhenebho ni bhaakulupaiikape, pabha ikaakomboleka kwiikana bhayene." 14 Bhai, mwaakumbushiyanje bhandu gene malobhego, na mwaaleyanye pa meyo ga a Nnungu, bhanakolanje malobhe ga mitau, pabha gangali mana, ikabhe ganapuganya bhaapiikananga. 15 Ntumbile kwiilunguya kwa a Nnungu kuti mmaakulupalika, ntumishi jwangali oni, nnilunguya kwa aki ntenga gwa kweli gwa a Nnungu. 16 Mwiembuye na nkungulu gwangali mana na gwa shingumba, pabha ganakwaashoyanga bhandunji nngulupai niileka kwaajogopa a Nnungu. 17 Majiganyo gabhonji ganajambushiya malinga libhanga shilijenela nshiilu, munkumbi gwabhonji bhapalinji a lmenayo na a Piletushi. 18 Bhanganyabho bhapuganikenje niileka ya kweli, bhalinkutinji kuyuywa kwa bhandunji kupitile, nipuganya ngulupai ya bhandu bhabhagwinji. 19 Ikabheje a Nnungu bhabhishile ishi ya nyumba, ishimilishwe kwa olela ukoto, na gene malobhe gano, gashijandikwa pantundu yene ishii, "Bhakulungwa bhaamanyi bhandunji bhabho," na kabhili, "Kila ashema lina lya Bhakulungwa, aleshe ilebho." 20 Nnyumba jikulungwa ikaapagwa indu ya shaabhu na ela pe, ikabhe na indu ya mikongo na ya lilongo, ina ya tendela maengo gamashoko ina ya maengo gamakulungwa. 21 Bhai mundu aikonjeleyaga niileka ilebho, shaabhe mundu jwa maengo gamakulungwa, sha ukonjelo shibhishilwe na bhayene nyumba, shaapwae kwa kila liengo lya mmbone. 22 Mwiembuye na ilokoli ya ushanda, nkagulile uguja na ngulupai na kupingana na ulele, pamo na bhene bhakwaajuganga Bhakulungwa kwa ntima gwa mmbone. 23 Mwiembuye na mitau ja shingumba na jangali mana, pabha mmumanyi kuti yeneyo inakumbuya mipwai. 24 Numbe ntumishi jwa Bhakulungwa akapinjikwa kubha jwa mipwai, ikabhe jwa kwiitimalika kubhandu bhowe, akombola kujiganya na kwiipililila. 25 Anapinjikwa kwaaleyanga kwa kwiitimalika bhakuntaukanga, pana a Nnungu shibhaajalanye kwiipeta nikagula ya kweli. 26 Nkupinga lunda lwabhonji lwaabhujilanye kabhili nikolobhoka

nnyau lika Lishetani, lyabhatanjiyenje nkupinga bhatendanje yapinga jwenejo.

3 Ikabheje nnapinjikwa mmumanye kuti mobha ga kumpelo shigabhe ga atali. **2** Pabha, bhandunji shibhabhanganje bhakwiipinganga ashayenenji, na bhapinganga mmbiya, na bhakwiinyanga, na bha mbwinya, na bhaatukananga, na bhakakwaakundanga bhaakwetenje, na bhakaapinganga kutenda eja, na bhangalinginji bha mmbone. **3** Shihbakoposhelanje bhandunji bhakakwaapinganga ashaalongo ajabhonji, na bhakaapinganga kumaliya mipwai, na bhalambililanga, na bhakakwiitimalikanga, na bha kolanga nngomo, na bhakaapinganga kutenda ya mmbone, **4** bhaatendebhukana, na bhamitau, na bhakwiipunanga, na bhapinganga ya manong'a, kupunda kwaapinga a Nnungu. **5** Bhalinginj mbuti bhakwaatindibhalilanga a Nnungu, ikabheje bhalikananga mashili ga a Nnungu, mwiembuye na bhene bhanganjabho. **6** Pabha munkumbi gwabhonji bhapalinji bhaowelanga mmajumba ga bhandu, nikwaatekeyanga bhanabhakongwe bhangalinginji lunda, bhakwetenje mishigo ja ilebho na ilokoli yaigwinji, **7** bhene bhanabhakongwebho bhalikwiijiganyanga mobha gowe, ikabheje bhakakolanga lunda lwa kuimanya indu ya kweli. **8** Ni malinga a Yaneshi na a Yambuleshi bhaataukenje a Musha, nneyo peyo na bhene bhaataukanga indu ya mmbone, bhandu bhaangabhanikenje lunda lwabhonji, bhakanilwenje nngulupai. **9** Ikabheje bhakapundanga kutenda nneyo, pabha ubhelu gwabhonji shigumanyishe na bhandu bhowe, malinga puyaliji kwa a Yane na a Yambule. **10** Ikabheje mmwe nkagwile majiganyo na ndamo jangu, na ng'aniyo na ngulupai yangu, na kwiitimalika kwangu, na kupingana na kwiipililila kwangu, **11** ga mboteko na laga. Yani ku Antiokia, na ku Ikonio, na ku Lishitila, na gowe ga jogoya gunaipililile! Ikabheje Bhakulungwa gubhandapwile mowemo. **12** Bhai, bhowe bhaapinganga kutama nkwaakulupalila a Kilishitu Yeshu, shibhapotekwanje. **13** Bhandu bha ilebho, na bha unami shibhapundanje kutenda ilebho, bhalitembanga na tembwanga. **14** Ikabheje, mmwe ntame mmajiganyo gunnjigenywe nikugaposhela ukoto gala, pabha mwaamanyinji bhannjigenyenje bhala. **15** Numbe kuumila pumwaliji mmashoko mwagamanyi Majandiko ga Ukonjelo, ga kumpa ng'aniyo ya lunda ya kuntapula kwa ngulupai ya nkulundana na a Yeshu Kilishitu. **16** Majandiko gowe gajandikwe nkulongoywa na Mbumu jwa a Nnungu, ganapwaa nkujiganya na nkuleya bhandu muilebho yabhonji, na kwaalongoyanga, nikwaapanganga aki, **17** nkupinga mundu jwa a Nnungu atimilile, na aengwe kutenda maengo gowe ga mmbone.

4 Ngunakunnajila pa meyo ga a Nnungu na a Yeshu Kiliishitu, bhaapinga kwaukumulanga bhandunji bhabhakoto na bhawilenje, pene pushibhaishe mu upalume gwabho. **2** Nnunguye lyene lilobheli, na njjime ukoto mobha gowe, gapwaa na ganngapwaa, na nkalipile, na nnimbiye, na mwaaleyanje bhandu nnikwaajiganyanga kwiitimalika. **3** Pabha shigaishe mobha gushibhakananje majiganyo ga kweli ga gumi, ikabheje shibhakagulilanje ng'aniyo yabhonji, nikwiigumbashiya bhaajiganya bhabhonji bhabhagwinji, nkupinga bhapilikananje

indu ikwaanonyelanga. **4** Numbe shibhakananje kupilikanashiya malobhe ga kweli, nitendebhushila ndango ya unami. **5** Ikabheje mmwe ntame nkwiitimalika na indu yowe, mwiipililile mmboteko, nkamule liengo lya lunguya Ngani ja Mmbone, mmalishiye liengo lyenu. **6** Pabha, nnaino nne ngunashoywa mbuti mbepei, malanga gangu gawa gaishile. **7** Njikomana ngondo ja mmbone ja ngulupai, mwanja nigumaliye, na njikamulila ukoto ngulupai. **8** Nnaino, njibhishilwa shilemba sha aki shishibhambé Bhakulungwa lyene lyubhalyo, numbe ngabha nne pe nne, ikabheje na bhandu bhowe nkwaapinga bhanalolelanga kuika kwabho. **9** Ntende shangu kwiya akuno. **10** Pabha a Dema ga pinga indu ya pa shilambolyo, bhashineka gubhapite ku Teshalonike, na a Keleshike gubhapite ku Galatia, na a Tito bhapite ku Dalimatia. (aiōn g165) **11** Bhali na nne apano, ni a Luka jikape. Mwaaloleye a Maliko, nnjiye nabho, pabha bhananyanguta mmaengo. **12** A Tikiko naatumile ku Epesho. **13** Pushinnjiyepo nnyigalile likoti lyangu lineshile kwa a Kalipashi bha ku Toloa, nnyigalile na itabhu, na kaje ya mapende ila. **14** A Alekishanda bha yana itale bhala, bhashindendela ya nyata yaigwinji, Bhakulungwa shibhaalipe kwa itendi yabho. **15** Na mmwe mwiiteje na bhenebho, pabha bhashinkutauka kwa puya malobhe getu. **16** Punaibheleketelaga malobhe ga kwiitapula gwa ntai, jwakwa mundu ajimi na nne kunyangutila, ikabhe bhowe bhashinkunekanga, nne ngunakwaajujilanga kwa a Nnungu bhaleshelelwanje, na bhanabhonekanje kulebha kwa genego! **17** Ikabheje Bhakulungwa gubhajimi na nne, nigubhambéle mashili, nkupinga nnunguye ntenga gula ukoto, nkali ku bhandu bha ilambo ina, na nne gundapwilwe nshiwo, mbuti ngutapulwa nkang'wa ja imba. **18** Bhakulungwa shibhandapule na indu yowe ya nyata, shibhandole ng'ishe ku Upalume gwabho gwa ku nnungu. Ukonjelo ni gwabho pitipiti! Amina. (aiōn g165) **19** Mwaalamushilanje a Pilishika na a Akula na bhandunji bha munngwabho a Oneshipolashi. **20** A Elashito kubhatama ku Kolinto, na a Tolopimo kunaaleshile ku Mileto, bhalwele. **21** Ntende shangu kwiya akuno, gakanabhe ishila mobha ga mmbepo. A Ebhulo bhanakunnamushilanga, na a Pudenisshi na a Linushi, na a Kilaudia, na Bhakilishitu bhowe. **22** Bhakulungwa bhatame muntima gwenu. Nema jitame na mmanganyanji mmowe.

Tito

1 Nne Pauli, ntumwa jwa a Nnungu na ntume jwa a Yeshu Kiiishitu, njitumwa kwa ligongo lya bhanndunji bhaagwilwenje na a Nnungu, kwaalongoyanga ku ngulupai na kweli na namuna ja mmbone ja tama malinga shibhaapinga a Nnungu. **2** Na kwa nneyo, ngulupai yabhonji yaapeleshelanje nnolelo gwa gumi gwa pitipiti gubhalajile a Nnungu, kuumila bhukala shilambolyo shikanabhe panganywa, na bhenebho bhakabeheketa ya unami. (**aiōnios g166**) **3** Gubhagatendile malobhe gabho gamanyishe kwa malanga gubhapanjile, kwa ntenga gubhangamiye, niinajila nunguye kwa mashili gabho bhayene a Nnungu bhaatapula bhetu. **4** Jene bhaluwa jino, ngunakukujandishila ugwe Tito mwanangu jwa kweli nngulupai jikutulundanya pamo. Nema na ulele kukopoka kwa Atati a Nnungu na kwa a Yeshu Kiiishitu Bhaatapula bhetu, ibhe na ugwe. **5** Nashinkukuleka ku Kilete shilambo shitimbililwe na mashi, nkupinga umalishiye maengo galepeshe, na kwaabhekanga bhanangulungwa mmakanisha, kila shilambo malinga shinakulajile. **6** Nkulungwa jwa likanisha anabhe mundu jwa gambwa. Alombe jwankongwe jumo, anabhe mundu jwa matala, na ashibhana bhahho bhabhanganje Bhakilishitu ukoto, wala bhanakolanje sha gambwa kwa itendi ya shonanga na ungakunda. **7** Pabha nkulungwa jwa likanisha anapinjikwa abhe mundu jwangali sha gambwa, pabha jwenejo ni mundu ajimilila liengo lya a Nnungu, anabhe mundu jwa mbwinya, eu jwa nngomo, eu jwa kolelwa, na wala anabhe jwa mipwai, na anabhe mundu jwangajogopa tokomala ga mmbiya, **8** ikabhe abhe mundu jwa poshela bhajeninji na bhapita mpanda, na apinga ya uguja, na abhe mundu jwa lunda na jwa pinga ya aki, na abhe mundu jwa ukonjelo na kwiluma. **9** Anapinjikwa abhe mundu jwa kamulila ukoto lilobhe lya ngulupai malinga shajigenywe, nkupinga akombole kwaataganga ntima bhandu kwa majiganyo ga kweli, na abhapeyanje bhandu bhaataukanga. **10** Pabha bhalalinji bhandunji bhabhagwinji bhakaakananga, bhakwetenje malobhe gangali mana, bhanaminji, kajekaje bhaatolelanga ga jaluka kubha shiumilo sha ukilishitu. **11** Inaapinjikwa kwaapeyanga bhene bhanganjabho bhanakolanje sha bheleketa, pabha bhanakwaapuganyanga bhandunji bha likaja lyowe, bhalijiganyanga indu ikapinjikwa, nkupinga bhaipatanje mmbiya kwa tekeya bhandu. **12** Na mundu jumo akwiitemba nkulondola ashibheleketa kuti, “Bhandunji bha ku Kilete bhanami mobha gowe, bhanyanya bha jogoya, na bhandunji bha kongolela kulya, na bhandunji bha ukata.” **13** Gene malobhego ga kweli. Kwa nneyo mwaakalipalanje kwa kaje, nkupinga bhaishimilikanje nngulupai ya kweli. **14** Bhanapilikanishiyanje ndango ya unami ya Bhayaudi, wala malajilo ga bhandunji bhaakananga indu ya kweli. **15** Kila shindu shinakonja kwa mundu akonjile, ikabheje shakwa sha konja kubhandu bhanyatilenje mitima, na bhanyatilenje lumanyio na ng'aniyo yabhonji ya muntima. **16** Bhandunji bhakuitendanga kuti bhanakwaamananga a Nnungu, ikabheje kwa itendi yabhonji bhanakwaamananga, bhandunji bhaatendanga ya nnjimwa, bhaatendebhukenje a Nnungu, na wala bhakapwaanga kwa itendi yoyowe ili ya mmbone.

2 Ikabheje ugwe ujiganye majiganyo ga kweli. **2** Gwaajiganyanje bhanangulungwa bhailumanje, na kutungamana na bhakolanje lunda. Bhakolanje ngulupai ya kweli, na pingana na kwiiluma ntima. **3** Nneyo peyo na bhanangulungwa bhanabhakongwe bhatamangane ukoto na mitima ja ukonjelo, bhanaalambililanje bhandu, na bhanakolelwanje ukana, ikabhe bhajiganyanje indu ya mmbone. **4** Nkupinga bhakombolanje kujiganya bhali bhalombilwenje bhaapinganje ashimbuje bhabhonji na ashibhana bhabhonji, **5** bhakolanje lunda, bhakonjeleyanje, na bhagoyanje nyumba yabhonji, bhabhanganje bha mmbone, na bhakundanje ibhabhalanjilwanga na ashimbuje bhabhonji, nkupinga lilobhe lya a Nnungu linatukanishe. **6** Nneyo peyo, gwaakwiyanje bhashanda bhakolanje lunda. **7** Ugwe gunnyene ulanguye mpanda kwa itendi ya mmbone, akuno ulilanguya ishima na ya kweli, mmajiganyo gako, **8** malobhe gako gagoloshе, nkupinga mundu jwa mitau akole oni, pabha akakola malobhe ga nyata ga kutubheleketa. **9** Mwaajiganyanje bhatumwa bhaakundanje bhakulungwa bhabhonji, bhalikwaanonyeyanga mmaengo gowe, bhanapinganje ya taukangana, **10** wala kwaajibhilanga indu yabhonji, ikabhe bhalanguyanje kukulupalika, pabha kwa tenda nneyo, majiganyo ga a Nnungu bhaatapula bhetu, gamanyishe kuti ga mmbone. **11** Pabha nema ja a Nnungu jitapula, jiuukwilwe ku bhandu bhowe. **12** Numbe jinakutujiganya kukana ilebho na ilokoli ya pa shilambolyo, tutame nkwiiluma, na nkupinga ya aki na kutama malinga shibhapinga a Nnungu, nshilambolyo sha nnaino shino, (**aiōn g165**) **13** akuno tulilindilila nnolelo gwa mboka ipinga unukulwa kwa ukonjelo gwa a Nnungu bhetu Bhakulu, na a Yeshu Kiiishitu bhaatapula bhetu. **14** Bhenebho bhaihoshiye bhayene kwa ligongo lyetu uwe, nkupinga bhatugombole na ilebho yowe, na kwaakonjeleyanga bhandunji bhabhanganje bhandu bhahho, ni bhene bhaatumbilanga kutenda itendi ya mmbone. **15** Bhai ugwe ujiganye gene malobhe gano, gwaataganje ntima bhandunji kutenda ya mmbone, na kwakalipilanga kwa mashili gowe, anapagwe mundu jojowe jwa kukunyegaya.

3 Mwaakumbushiyanje bhandunji bhaitetesheyanje kubhakulungwanji na bhaatagwalanga na kukunda ibhabhalanjilwanga, kutenda yowe ili ya mmbone. **2** Bhanammeleketelanje ya nyata mundu jojowe, na bhanabhanganje bha mipwai, bhabhanganje bhanguja, bhaililanguyanga kwiitimalika kwa kaje, kubhandu bhowe. **3** Pabha na uwe bhukala putwaaliji mabhelu, bhandunji bha kwaatendebhukanga a Nnungu na puganyika, akuno tulitlwa na ilokoli, na itendi yaigwinji ya kwiikonja yangali mana, tulitama muilebho na nnupimililo na nkubheleketa na nkubhengana. **4** Ikabheje a Nnungu Bhaatapula bhetu bhakalanguleje uguja na nonyelwa kwabho ku bhandu, gubhatutapwile, **5** Nngabha kwa itendi ya aki itwatendile, ikabhe kwa ligongo lya shiya shabho, gubhatubheleshe gwa bhili nikutubhika nndamo ja ambi kwa kutukonjeleya kwa Mbumu jwa Ukonjelo. **6** Pabha bhashinkutugumbashiya Mbumu jwa Ukonjole, kupitila a Yeshu Kiiishitu Bhaatapula bhetu, **7** nkupinga kwa nema jabho tubhalanganishiwe kubha bhanguja na bhalishi bha gumi gwa

pitipiti, malinga shitukulupalila. (aiōnios g166) 8 Lyeneli ni lilobhe
lya kulupalika. Shingupinga gene malobhe gano, ubhelekete
kwa komelesheya, nkupinga bhene bhaakulupalilenje a Nnungu
bhala, bhalonjeyanje nkutenda ya mmbone, genego ni ga
mmbone na ganapwaa kwa kila mundu. 9 Ikabheje mwiepuye
na mitau ja shingumba, na mipwai na kutaokangana ga ashigani
bha nnuubheleko lwetu na ga shalia ja a Musha. Pabha yene
induyo ikapwaa, numbe yangali mana. 10 Mundu alekanya
bhandu munnneyaga pabhili, nibhujila kabhili, munkane. 11
Pabha mmumanyi kuti mundu jwa nneyo apuganishe, na itendi
yakwe ya yambi inng'ukumwile nnyene. 12 Pushinaatume a
Atemashi eu a Tikiko, ntende shangu kwiya imana na nne ku
Nikapoli, pabha malanga ga shipwepwe njitumbilila ngatame
kweneko. 13 Ntende kila mushinkombole, mwaajangutilanje
mmwanja gwabhonji a Shena bha lumanyio lwa shalia, na a
Apolo bhanatubhilwanje shindu shoshowe. 14 Bhandunji bhetu
bhajiganyanje kulonjeya muitendi ya uguja, nkupinga
bhaajangutilanje Bhakilishitu kwa indu ipinjikwa, kwa nneyo,
ndamo jabhonji jibhe japwaa. 15 Bhandunji bhowe bhalinginji
apamo na nne bhanakunnamushilanga. Mwaalamushilanje
bhakutupinganga nngulupaibho. Nema jibhe na mmanganyanji
mmowe.

1 Nne Pauli nankutabhwa kwa ligongo lya a Yesu Kilishitu, na alongo ajetu a Timoteo, tunakunjandishila mmwe a Pilimoni nkupingwa na uwe na mmakamula liengo ajetu, **2** na alumbu bhetu a Apiya, na a Alikipo linjola njetu ngulupai na likanisha liimananga nnyumba jabho. **3** Nema na ulele kopoka kwa Atati a Nnungu na Bhakulungwa a Yesu Kilishitu, ibhe na mmanganyanji. **4** Ngunakwaatendela eja a Nnungu bhangu mobha gowe, pungunkumbushila mwe a Pilimoni nkujuga kwangu, **5** pabha ngulipilikana shinkuti kwaakulupalila a Yesu Bhakulungwa bhetu na shinkuti kwaapinganga bha ukonjelo bhowe bha a Nnungu. **6** Ngunakwaajuga a Nnungu kuti, ngulupai jimuilundile na uwe jinkomboye kubha na lumanyo lwa kushimanya kila shindu sha mmbone shitukwete, nkulundana kwetu na a Kilishitu. **7** Pabha kwa kwaapinganga kwenu bhandu, kushing'angalaya kaje na njitagwa ntima kwa ligongo lyenu mwe mmakilishitu ajangu, numbe nshikujiangalaya mitima ja bhandunji bha ukonjelo. **8** Kwa nneyo, ikabhe ngwete makangala ga kunnajila mmwe ntende indu inkupinjikwa tenda pabha nkulundana kwangu na a Kilishitu, **9** ikabheje kwa ligongo lya nonyelana ngunakunjuga, malinga nne Pauli shingongopele shino, na numbe nnaino nankutabhwa kwa ligongo lya a Yesu Kilishitu. **10** Bhai ngunakunnjuga kwa ligongo lika mwanangu Oneshimushi, junimpatile ngulupai nili nkutabhwa. **11** Bhukala jwenejo akampwaaga, ikabheje nnaino shampwae mmwe na nkali nne. **12** Lelo ngunakummuja najo kwenu mmwe, jwenejo ni malinga ntima gwangu namwene. **13** Napinjile atame na nne nkupinga anyangutile maengo penu mmwe, pepano pundabhilwe kwa ligongo lya Ngani ja Mmbone pano. **14** Ikabheje ngapinga kutenda shoshowe gwangali kumpilikana mmwe, nkupinga uguja gwenu unabhe gwa shishilishiywa, ikabhe ubhe gwa pinga mmayene. **15** Pana mwashinkulekana naka Oneshimo mobha gashoko, nkupinga abhujaga, atame na mmwe mobha gowe. (aiōnios 1:6) **16** Bhai nnaino jwenejo nngabha ntumwape, ikabhe jwa mmbone kupunda ntumwa, ni nnongo njetu, nne ananonyela kaje, numbe mmwe shapunde kunnonyela, jwenejo njetu na nnongo njetu nkulundana na Bhakulungwa. **17** Kwa nneyo malinga shinkumona nne kuti nannjenu, bhai mumposhele jwenejo mbuti nkumboshela nne. **18** Monaga annebhele shoshowe eu nnakunnonga shoshowe, bhai shenesho nnonje nne. **19** Nne Pauli nguandika jene bhaluwa jino kwa nkono gwangu namwene, nguti shinipe. Ngakunkumbushiya kuti ngunalongwa ga maisha genu. **20** Elo apwanga, ngunapinga mbwaishe kwenu mmwe kupitila Bhakulungwa, nng'angalaye ntima gwangu nkulundana na a Kilishitu. **21** Ngunakunnjandishila pabha nikumanyi kukunda kwenu, nimumanyi kuti shintende nkali kupunda guninnjandishilego. **22** Punda genego, mmishile ukoto pa ishila, pabha ngunakulupalila kuti, kwa nyujilanga kwenunji, a Nnungu shibhambwe shikono sha bhujwa kweneko. **23** A Epapula, bhaatabhwa pamo na nne kwa ligongo lya kwaatumishila a Yesu Kilishitu, bhanakunnamushilanga. **24** Na a Maliko, na a Alishitako, na a Dema, na a Luka bhaakamula maengo ajangunji

Bhaebhulania

1 Bhukala a Nnangu bhatendaga bheleketa na ashaambuje yetu, kupitila ashinkulondola bhobho papagwinji na kwa namuna yaigwinji, **2** ikabheje agano mobha ga kumpelo gano, a Nnangu bhanabheleketa na uwe kupitila Bhanabhabho. Bhubhaabhisile kubha bhalishi bha indu yowe, na kupitila bhenebho bhashipanganya shilambolyo. (aiōn g165) **3** Bhenebho ni nnga'nyimo gwa ukonjelo gwa a Nnangu, nnandanyo gwa a Nnangu bhayene, gubhabhisile indu yowe kwa lilobhe lyabho likwete mashili, bhakamaliyeje kwaaleshelelanga bhandunji yambi, gubhatemi kunkono niilo gwa Bhakulungwa a Nnangu kunnungu. **4** Mwana ni nkulungwa kupunda ashimalaika, malinga ukulungwa gwa lina lyabho libhapegwilwe na a Nnangu kupunda mena gabhonji. **5** Pabha a Nnangu bhanganugulila nkali kamo, malaika jwabho jumo, "Ugwe ni Mwanangu, Nne lelo nanng'inago." Wala bhangaabheleketa kuka malaika jowewe kuti, "Nne shimme nanng'inagwe, Na jwalakwe shabhe mwanangu." **6** Ikabheje a Nnangu pubhaatumile bhanabhabho, lyelo lyabho bhalinkuti, "Ashimalaika bhowe bha a Nnangu bhaatindibhalilanje." **7** Ikabheje ga ashimalaika bhakuti, Bhashikwaatendanga ashimalaika bhobho bhatumshi, kubha mbungo na lilamba lya moto. **8** Ikabheje gaka Mwana, a Nnangu bhakuti, "Upalume gwenu, mmwe a Nnangu unalonjeya pitipiti! Mmwe nnatagwala kwa aki. (aiōn g165) **9** Mmwe nnaapinga aki na nkaapinga ya ilebho. Kwa nneyo a Nnangu, a Nnangu bhenu, bhashikumpa ukulungwa kupunda ajenunji, Kwa kunng'agula kubha a mpalume bha nng'angalo." **10** Kabhili a Nnangu bhakuti, "Mmakulungwa, mmwe mpengeny shilambolyo kundandubho, Na kunnungu ni mmwe pemmwe mpengeny. **11** Yowe shiipite, ikabheje mmwe nalonjeya. Na yowe shiilale mbuti nngubho. **12** Nkupinga kwiipindanya mbuti likoti, na ipinga tindiganywa mbuti iwalo. Ikabheje mmwe shininapeshe shimwalji, Na gumi gwenu ukakola mpelo." **13** Bhuli apali malaika jubhakunnugulilaga a Nnangu kuti, "Utame kunkono niilo gwangu, mpaka pushinaabhikanje ashaamagongo ajako pai jako?" **14** Igala ashi malaikabha ni nndi? Bhalabhonji ni ashi mbumu bhakwatumishilanga a Nnangu na bhaatumwanga na bhenebho kwa ligongo lya kwaajangutilanga bhalishi bha ntapulo.

2 Kwa nneyo, tunapinjikwa kugabhika muntima gowe gutupilikene, nkupinga tunaobhye. **2** Ntenga gwa shalia gwalungwiye na ashimalaika gwamanyishe kuti gwa kweli, mundu jowewe jwangaubhika muntima eu kuukunda ashinkuukululwa kwa aki, **3** bhai, uwe shitulame bhuli tukaujali ntapulo nkulu malinga gwenu gwalungwiye kundandubho na Bhakulungwa bhayene, na kungai bhapiikenenje bhala gubhakong'ondelenje kwetu uwe? **4** A Nnangu na bhalabho bhalikong'ondela kwa ilangulo na ilapo, bhalikwaapanganga bhandu shukilo ika Mbumu jwa Ukonjelo malinga shibhapijile bhayene. **5** A Nnangu bhangaabhikanga ashimalaika bhatagwalanje shilambolyo shikwiya, shilambo shitukungulushila. **6** Kabhili ishilugulwa Mmajandiko, "Mundu shindu shashi, mpaka munnganishiyee, Mwana juka mundu ni shindu shashi

mpaka munnjali? **7** Kwa malanga gashoko mwashinkuntenda kubha jwa pai kupunda malaika, Nshikuntabha shilemba sha ukonjelo na ishima, **8** Nshikumpa indu yowe aitagwale." Inalugulwa kuti a Nnangu bhashinkummika mundu atagwale indu yowe, yani gwangali leka nkali shindu shimo. Nkali nneyo, nnaino tukakummona mundu alitagwala indu yowe. **9** Ikabheje tulikwaabhona a Yesu bhabhisilwe pai kwa malanga gashoko kupunda ashimalaika, nkupinga kwa nema ja a Nnangu bhawe, kwa ligongo lya bhandu bhowe. Nnaino bhashipegwa ukonjelo na ishima kwa ligongo lya shiwo shabho. **10** Kwa nneyo ishinkupinga na a Nnangu, bhapengenyee indu yowe, kwaakamilisha a Yesu kubha bhaatapula kupitila mboteko. Bhashinkutenda nneyo nkupinga bhaapelekanje bhana bha a Nnangu bhabhagwinji bhaguposhelanje ukonjelo gwa a Nnangu. Pabha a Yesu ni bhaalongoya bhandu kuntapulo. **11** Pabha a Yesu bhakwaatendanga bhandunji kubha bha ukonjelo na bhatakaywanga, nnaino bhowe Ainabhabhonji bhamope. Bhai a Yesu, bhakaakola oni kwaashemanga ashaapwabho. **12** Bhalinkuti, "Mmwe a Nnangu, shinunguye lina lyenu kwa ashaapwanga. Ngupinga jimba nkunng'iniya pa maimano gabhonji." **13** Kabhili bhakuti, "Ngupinga bhika ngulupai kwa a Nnangu." Na kabhili, "Nne puni apano na bhana bhumbegwilwe na a Nnangu." **14** Bhai pabha bhene bhanabho ni bhandunji, bhakwetenje shiilu na minyai, kwa nneyo a Yesu gubhautolile shiilu na minyai nibha mundu. Nkupinga kwa shiwo shabho bhampokonyole Lishetani mashili ga shiwo, **15** na bhowe bhalingini muutumwa gwa lipamba lya shiwo nipatanga kuleshelelwa. **16** Pabha bhagajiya kwaajangutilanga ashimalaika, ikabhe lubheleko lwa a Bhulaimu. **17** Kwa nneyo bhashinkupinjikwa kubha malinga ashaapwabho, nkupinga bhahbe Bhakulungwa Bhaabhisila bhakwete shiya na bha kulupalika nniengo lyabho kwa a Nnangu, na kwa kwiishoya kwabho kubha mbepei, yambi ya bhandunji ileshelelwe. **18** Na pabha bhayene bhashinkupotekwa pubhalingwaga, bhanakombola kwaajangutilanga bhene bhaalingwaga bhala.

3 Kwa nneyo mmaakulupalila ajangunji, mmandunji bha ukonjelo nshemilwenje, na a Nnangu, nibha bhandunji bhobho malinga uwe mwaaganishiyane a Yesu ni a Ntume na Bhakulungwa Bhaabhisila bhutukwaalunguya. **2** Bhashinkubha bhaakulupalika kwa a Nnangu bhaabhisile bhatende liengo lila, malinga a Musha shibhashite kulupalika nnyumba jowe ja a Nnangu. **3** A Yesu bhanapinjikwa kuishimika kupunda a Musha, malinga nkushenga nyumba anaishimika kupunda nyumba jiyene. **4** Pabha kila nyumba pujishengwa naka mundu, ikabheje a Nnangu ni bhaashenga bhapengenyee indu yowe. **5** A Musha bhashinkukulupalika nnyumba jowe ja a Nnangu, bhalibheleketa ga indu ipinga kwiya lugulwa. **6** Ikabheje a Kilishitu bhanakulupalika nnyumba ja a Nnangu malinga Mwana akwete ukulungwa. Uwe twaashayene ni nyumba jabho, tupundaga kola makangala na tama nkwaakulupalila a Kilishitu. **7** Kwa nneyo, malinga shaabheleketa Mbumu jwa Ukonjelo, "Monaga lelo mpilikanangaga lilobhe lyangu, **8** nnanonopanje mitima jenunji, mbuti shibhatendilenje ashinakulu bhenuji pubhaakanilenje a Nnangu lyubha lya lingwa, kuanga

kula. 9 Kwekula ashinakulu bhenunji bhashinkuninganga, Nkali bhaibhweninji itendi yangu yaka makumi nsheshe! 10 Kwa lyene ligongolyo nashinkulutumbaliia lwene lubhelekolo gunjite, 'Mobha gowe bhanapuganyikanga, Bhakaakagulanga mipanda Jangu.' 11 Bhai, nkutumbala gunumbile, 'Bhakajinjilanga pa shipumuli shangu.'" 12 Bhai ashaalongo ajangunji, mwiteiganje anapagwe munkumbi gwenunji jojowe jwa ntima gwangali gwa mmbone na ukaakulupalila, ukwaabhambala a Nnungu bhakwete gumi. 13 Ikabheje kutagana ntima mobha gowe, kila pwiikushemwa "Lelo", nkupinga mundu munkumbi gwenunji anatembe na yambi nibha jwa jitau. 14 Pabha uwe tubhowe tunalundana na a Kilishitu ibhaga tubhikaga mmitima ngulupai jitukwete mpaka kumpelo. 15 Majandiko ga ukunjelo gakuti, "Monaga mpiikanangaga lilibhe lyabho lelo, Nnanonopanje mitima jenunji. Malinga shimwatendilenje mobha gumwaakanilenje a Nnungu." 16 Igala ashigani bhapiikenenje lilibhe lya a Nnungu nikwaakana? Nngabha bhowe bhalongoywenje na a Musha kopoka ku Mishili? 17 Na kabhili, ni ashigani bhaatumbeyenje a Nnungu yaka makumi nsheshe? Nngabha bhowe bhalebhilenje niwanganga nng'anga bhala? 18 Kabhili, ashigani bhuhhalumbile kuti, "Bhakajinjilanga pa shipumuli shangu," ikabhe bhalebhilenje bhala? 19 Bhai, tubhwene kuti bhangajinjilanga pa shipumuli kwa ligongo lya ungakulupalila gwabhonji.

4 Bhai, pabha jipali miadi ja jinjila pa shipumuli, tuipelele nkupinga anapagwe mundu munkumbi gwetu shalepele kujinjila. 2 Numbe uwe tulungushiywe Ngani ja Mmbone, malinga bhanganyabho. Ikabheje lyene lilibhelo lyangaapwailanga, pabha bhagaliposhelanga nikulikulupalila. 3 Ikabheje uwe pabha tukulupalile shitujinjile pa shipumuli pala, malinga shibhalugwile a Nnungu bhalinkuti, "Malinga shinatumbale, nilumbila, 'Bhakajinjilanga pa shipumuli shangu.'" A Nnungu bhabehekete genego, ikabheje liengo lyabho lyamalile kuumila pabhapengeny shilambolyo. 4 Pabha Majandiko gana ganataya ga lyubha lya shabha, a Nnungu bhashinkupumulila lyubha lya shabha, gubhaleshile maengo gasho gowe. 5 Malinga shiilugwile, "Bhakajinjilanga pa shipumuli shangu." 6 Bhai, pabha miadi ja jinjila pa shipumuli jatangu, bhapalinji shibhajinjilanje penepo. Ikabheje bhatandubhenje kulungushiywa Ngani ja Mmbone bhala, bhangajinjilanga kwa ligongo lya ungakunda gwabhonji. 7 Kungai a Nnungu bhashikuli bhika lyubha lina bhalinkuti "Lelo," bhabehekete kupitila a Daudi kwa malobhe galugwile bhukala, "Monaga mpiikanangaga lilibhe lyangu lelo, nnanonopanje mitima." 8 Bhai monaga a Yoshua bhaapelekenje bhandunji kushipumuli, a Nnungu bhakanabhelekete kabhili ga lyubha lina. 9 Bhai, kwa nneyo, launo kupali kupumulila kwa bhandu bha a Nnungu. 10 Pabha jojowe ajinjila pa shipumuli sha a Nnungu, anapumulila maengo gakwe malinga shibhapumulile a Nnungu. 11 Bhai, ntumbilanje kuika pa shipumulipo, nkupinga anapagwe jojowe munkumbi gwenunji jwangakunda, malinga shibhatendilenje bhanganyabho nng'anga. 12 Pabha lilibhe lya a Nnungu lishikola gumi na kabhili lishikola mashili, numbe linakombola kamula maengo popowe, kupunda upanga utema akuno na kukuno. Linapelenganya mpaka gabhanya ntima na mbumu na ibhalo

na utita guli nkati. Lyene lilibhelo linakwiimanya ndumbililo na ng'aniyo ya muntima. 13 Shakwa shikwete gumi shishika kwa a Nnungu, indu yowe inamanyika kwa a Nnungu, shitujijye kwaatalashiya itutendile. 14 Bhai, pabha tukwete Bhakulungwa kaje Bhaabhisila bhajinjile kunnungu, a Yesu Bhanabhabho a Nnungu, twiishimilishie nngulupai jetu jituukong'ondela. 15 Pabha Bhakulungwa bhetu Bhaabhisila bhanakutubhonela shiya ga ungakola mashili gwetu, pabha bhayene bhalinjilwe kwa indu yowe malinga uwe, ikabheje bhangatenda yambi. 16 Kwa nneyo, tuubhandishile gwangali bhoga upalume gwa nema gwa a Nnungu bhakwete shiya, nkupinga bhatubhonele shiya na bhatupe nema ja kutujangutula mobha ga ngakola mashili.

5 Pabha kila nkulungwa jwa bhishila anaagulwa kopoka munkumbi gwa bhandunji, nibhikwa abhatumishile a Nnungu kwa ligongo lya bhandunji, nkupinga ashoye mbepei na yukilo kwa a Nnungu kwa ligongo lya yambi. 2 Pabha bhayene bhangali mashili, shibhaabhonelanje shiya bhene bhakakuumanyanga, na bhaalekanga mpanda gwa a Nnungu. 3 Kwa lyene ligongolyo, bhanapinjikwa kushoya mbepei nngabha kwa yambi ya bhandunjipe, ikabhe na kwa yambi yabho bhayene. 4 Jwakwa mundu akwiipa nnyene jene ishijami, ikabhe anaagulwa na a Nnungu kubha Nkulungwa jwa Bhishila malinga shibhaaliji a Aluni. 5 Nneyo peyo na bhalabho a Kilishitu, bhangaipa ishima bhayene kubha bhakulungwa bhaabhisila, ikabhe a Nnungu ni bhaabhalanjile, "Mmwe mmanangu, Nne lelo njibha nanng'inagwenu." 6 Kabhili bhabehekete Mmajandiko gana, "Mmwe ni mmabhisila pitipiti, malinga a Melikishedeki." (aiōn g165) 7 Mobha gubhaaliji a Yesu pa shilambolyo pano, bhatendaga juga na shondelesheya bhailkuigutanjila kwa minyoi kwa a Nnungu, bhenebho bhanakombola kwaatapula nshiwo. A Nnungu nigubhaapiikanile pabha bhatendaga kuitimalika na kwaishimiya. 8 Nkali bhaaliji bhanabhabho a Nnungu, bhashinkuijiganya kukunda kwa mboteko ibhapatile ila. 9 Bhakakamilishweje, nibha shiumilo sha ntapulo gwa pitipiti kwa bhandu bhowe bhakwaakundanga, (aiōnios g166) 10 na bhalabho a Nnungu gubhaabhisile kubha bhakulungwa bhaabhisila malinga a Melikishedeki. 11 Tushikola malobhe gamagwinji gataya ngani jabho, ikabheje inakola ukomu kuntashiyanga, pabha nnakolanga njijishi kupilikanishiya. 12 Pabha agano mobha gano mmanganyanji nkalinginji bhaajiganya, ikabheje nnapinganga kujiganywa numbe majiganyo ga kundandubho ga lilibhe lya a Nnungu. Nnapinjikwanga kulya shalya sha topela, ikabheje mmanganya nnapapilanga mabhele. 13 Pabha jojowe alamila mabhele jwenejo ni mwana jwanshoko, akakugamanya majiganyo ga aki. 14 Ikabheje shalya sha topela ni kwa bhakulungwanji, lunda lwabhonji luobhelele kwa itendi nkwiimanya ya mmbone na yangali ya mmbone.

6 Bhai kwa nneyo, tushoshe kumajiganyo ga kundandubho ga a Kilishitu, tujende mmujo nkwiijiganya ga ngulupai jetu tukamilishe, tunabhujile kabhili mmajiganyo ga kundandubho, ga leka yangali ya mmbone nikwaakulupalila a Nnungu, 2 nkali majiganyo ga namuna ya ubhatisho, na ga bhishila bhandu makono, na ga yuka bhawilenje, na ga ukumu ja pitipiti. (aiōnios g166) 3 A Nnungu bhapingaga, genego shitutende. 4 Pabha

bhandunji bhalangashiywenje nipaya shukilo sha kunnungu, nilundana naka Mbumu jwa Ukonjelo, 5 nipaya kunong'a kwa ilobhe lya a Nnungu, na mashili ga shilambolyo shikwiya, (aiōn g165) 6 kungai niileka ngulupai yabhonji, ikakomboleka kwaatendanga bhaipetanje kabhili. Bhatendanga nneyo, ni mbuti bhanakwaakomelanga munshalabha kabhili Bhanabhabho a Nnungu, na kwaatokomaya pa bhandu. 7 Litaka linyelwa ula papagwinji nimeya yalya, ni pwaida ja bhaalima na lyene litakalyo linapegwa mboka na a Nnungu. 8 Ikabheje limeyaga mibha na likonde likapwaa, lyene litakalyo pulibha tome na loshwa na mpelo gwakwe kujokwa moto. 9 Ikabheje ashaambwiga ajangunji, nkali tuubheleketa nnei, twangali lipamba kwenu mmanganyanji, tumumanyi kuti nnikaguyanga itendi ili ya mmbone nkatapulwanjeje. 10 Pabha a Nnungu ni bha aki, bhenebho bhakalibhala liengo linkutendanga na kupinga kwenunji kunnanguyenje kwa lina lyabho pabha nnakwaajangutilanga bhandunji bha ukonjelo na launo nnakwaajangutilanga. 11 Na uwe putupinga kila mundu atumbile nneyo peyo mpaka kumpelo, nkupinga yene inkukulupalilangayo imalile. 12 Bhai nnakolanje ukata, ikabhe mmanganje malinga bhene bhaakulupalilanga nikuiakatimila, niilishi miadi ja a Nnungu. 13 Pabha a Nnungu pubhaapele a Bhulaimu miadi, bhashinkulumbila kwa lina lyabho bhayene, pabha jwakwa ali nkulungwa kupunda a Nnungu jwa kunnumbila, 14 bhalinkuti, "Kweli shinimpe mboka na lubheleko lwalugwinji." 15 A Bhulaimu bhakalindilileje kwa kuikakatimila nigubhapatile miadi ja a Nnungu jila. 16 Pabha bhandunji pubhaalumbilanga bhanakwaalugulanga bhali bhakulungwa kupunda ashaayenenji, nkukong'ondela gabheleketwe kupinga peya mitau. 17 Na bhalabho a Nnungu pabha bhashinkupinga kulangula kubhandu ga miadi jabo, kuti bhakatendebhuka mmalobhe gabho, gubhakong'ondele kwa lumbila. 18 Bhai ipali indu ibhili, miadi na lumbila, ikakomboleka tendebhuka pabha a Nnungu bhakaabheleketa unami. Kwa nneyo uwe twaabhutushile, tunatagwa ntima tupunde kamulila ngulupai itubhishilwe. 19 Jene ngulupaiji jinakutupa mashili malinga nanga shijikuti kuujimika ntumbwi. Jene ngulupaiji jinapelenganya lukungushi lwa pa nnango mpaka pa ukonjelo kaje. 20 A Yeshu bhayene bhashilongolela jinjila mwenemo kwa ligongo lyetu na bhaashibha, Bhakulungwa Bhaabhishila pitipiti, malinga shibhaaliji a Melikishedeki. (aiōn g165)

7 A Melikishedeki pubhaliji a mpalume bha ku Shalemu na bhaabhishila bha a Nnungu Bhakulu. A Bhulaimu bhali nkubhujia kungondo kubhakombwele kwaakomanga bhalume nsheshe, gubhaimene na a Melekishedeki na a Melkshedeki gubhaajujile mboka a Bhulaimu. 2 A Bhulaimu na bhalabho gubhaapele lipungu limo lya kumi lya indu yowe ibhapatile ku ngondo. Malombolelo ga nta ga lina lyabho lya Melikishedeki ni "A mpalume bha aki," kabhili a mpalume bha ku Shalemu, malombolelo gakwe "A mpalume bha Ulele." 3 Aina bhabho na anyinabhabho bhakaalugulwanga, nkali shipinga shabho shikaamanyika na wala ikamanyika shakani pubhabelelwe na pubhawile. Bhanalandana na Bhana Bhabho a Nnungu, pabha bhalabho ni bhaabhishila pitipiti. 4 Bhai, nnolanje bhene bhandubho shibhashitebha bhakulungwa, mpaka aina bhetu a Bhulaimu nikwaapa lipungu lya kumi lya indu yowe

ibhapatile kungondo. 5 Bhai bhana bha a Lawi bhalinginji bhaabhishila, bhanaamulishwanga na shalia kutola lipungu lya kumi kukopoka kwa ashaapwabhonji Bhaishilaeli, nkali bhalinginji bha nnuubheleko lwa a Bhulaimu. 6 Ikabheje a Melikishedekibho bhakaliji bha nnuubheleko lwa a Lawi, nkali nneyo bhashinkuposhela lipungu lya kumi kukopoka kwa a Bhulaimu, gubhaajujile mboka bhene bhapegwilwe miadi na a Nnungu bhala. 7 Wala pangali lipamba kuti ali nshoko ni ajujilwa mboka naka nkulungwa. 8 Bhene bhaabhishila bhaaposhelanga lipungu lya kumi ni bhandunji na bhanaawanganga, ikabheje a Melikishedeki bhaaposhela lipungu lya kumi, inalugulwa kuti bhakawa. 9 Bhai tujile kuti, a Bhulaimu pubhashoshiye lipungu lya kumi lya mali gabho, kwa nneyo nkali a Lawi na bhalabho bhashoshiye lipungu lya kumi kupitila kwa a Bhulaimu. 10 Pabha a Lawi bhanakabhe bhelelwa, mubhaliji nshilu sha ainabhabho a Bhulaimu, mobha a Melikishedeki pubhaimene nabho. 11 Bhai ibhaga kukamilika kwatendaga patikana kwa liengo lya bhishila lya Bhalawi, pabha kwa tolelela genego shalia jashinkubhikwa ku Bhaishilaeli, ikanapinjikwe kabhili bhaishie bhaabhishila bhana bha malinga a Melikishedeki, nngabha bhaabhishila kopoka kwa a Aluni? 12 Pabha ubhishila unatindiganywa, bhai na shalia shijitindiganywe. 13 Bhene bhaabhishila bhaabheleketelwa genega, pubhaliji bha kabhila jina na wala jwakwa nkali mundu jumo jwa kabhila jabho atendile liengo lya ubhishila pa shitala. 14 Inamanyika kuti Bhakulungwa bhetu kubhakoposhele ku likabhila lya a Yuda, na kwa lyene likabhialyo a Musha bhakabheleketete shindu shoshowe ga ubhishila. 15 Kabhili, genego gamanyishe kaje, bhakoposhelaga bhaabhishila bhana bha malinga a Melikishedeki. 16 Bhenebha bhangabhikwa kubha bhaabhishila kwa shalia ja ashinakulu bhabho, ikabhe kwa mashili ga gumi ukaangabhanyika. 17 Pabha Majandiko ganaataya, "Mmwe mmabhishila pitipiti, Malinga a Melikishedeki." (aiōn g165) 18 Bhai amuli ja bhukala jila jishilekwa pabha jikakweteje mashili na jangapwaa, 19 pabha shalia ja a Musha jangatimiliya shindu. Ikabheje nnaino tupegwilwe nnolelo gwa pwaa ukutukomboa kwaabhandishila a Nnungu. 20 Na pabha, lyelila lyatendaga tendeka nkutolelela kulumbila kwa a Nnungu. Bhene bhaabhishila bhananji bha nnuubheleko lwa a Lawi bhatendaga bhikwanga nniengo lya ubhishila gwangali kulumbila. 21 Ikabheje a Yeshu bhashinkutendwa bhaabhishila kwa lumbila, malanga a Nnungu gubhashite, "Bhakulungwa bhashilumbila, wala bhakatindiganya ibhatumbilile, 'Mmwe mmabhishila pitipiti.'" (aiōn g165) 22 Bhai, kwa ligongo lya kwene lumbilako, a Yeshu bhashibha bha ngamulo bha malagano ga mmbone kaje. 23 Kabhili, bhaabhishila bhananjibho bhashinkushulukanga pabha bhatendaga wanganga, ninngalonyeya nniengo lyabhonji. 24 Ikabheje a Yeshu nngabha malinga bhanganayabho, bhenebho ni bha pitipiti na ubhishila gwabho ukapela. (aiōn g165) 25 Kwa nneyo, bhenebho bhanakombola kwaatapulanga kaje bhakwaajendelanga a Nnungu kupitila bhenebho, pabha bhenebho bhanaalonjeya pitipiti nkupinga bhaajujilanje kwa a Nnungu. 26 Bhai, yashinkupwaa uwe tubhe na Bhakulungwa Bhabhishila malinga bhenebho, bha ukonjelo bhanganali sha gambwa, bhanganali shilebho shoshowe, bhabhishilwe kwa taliya na ilebho, ninyakulwa kunani kunnungu. 27 Bhenebho

bhakaapinjikwa kushoya mbepei mobha gowe kwa ligongo lya yambi malinga bhaabhisila bhananji, kutandubhila ga yambi yabho bhayene, kungai ga yambi ya bhandunji bhana. Bhenebho bhashinkushoya mbepei ya yambi ya bhandu bhowe gwanakamo, pubhahoshiye bhayene kuwa munshalabha. 28 Pabha shalia ja a Musha jinakwaabhikanga bhandunji bhaanyegala kubha bhakulungwanji bhaabhisila, ikabheje kwa lilobhe lya lumbila litendilwe kungai shalia, lishikunng'agula Mwana gwabho a Nnungu ali jwa ntimilile kubha nkulungwa jwa bhaabhisila. (aiōn g165)

8 Shipundile kwa gutubheleketago ni kuti, tukwete Bhakulungwa Bhaabhisila, bhaatama kunkono nnilo gwa Upalume gwa ukonjelo gwa a Nnungu kunnungu. 2 Bhenebho bhanakamula liengo lya ubhishila pa ukonjelo, yani nniema liene lya a Nnungu libhishilwe na Bhakulungwa na nngabha naka mundu. 3 Kila bhakulungwa bhaabhisila bhanabikwa nkupinga bhashoye mbepei na shukilo kwa a Nnungu, kwa nneyo bhakulungwa bhetu bhaabhisila bhanaapinjikwa bhakole shindu sha shoya. 4 Monaga bhenebho bhakaaliji bha pa shilambolyo pano, ngubhakaliji bhaabhisila, pabha tayali bhapalinji bhaabhisila bhananji bhaashoyanga mbepei malinga shiishite lajiywa na shalia. 5 Bhanaatendanga liengo pa ukonjelo, pali mbuti shiwili sha gaatendeka kunnungu. Pabha a Musha pubhaaliji tome na alaya liema lila, a Nnungu gubhaabhalanjile, "Nng'alaye indu yowe malinga shinnangwilwe kushitumbi kula." 6 Ikabheje nnaino a Yeshu bhashipegwa liengo lya bhishila lili lya mmbone kupunda liengo lya bhaabhisila bhala, malinga bhenebho bhashibha bhaapatanisha bha malagano ga mmbone kaje kupunda malagano ga bhukala gala. Malagano gakwete miadi ja a Nnungu jili ja mmbone kaje. 7 Kaliji malagano ga ntai gakanakole shitubhile, gakanapinjikwe malagano ga bhili. 8 Ikabheje a Nnungu gubhaihwene ilebho kubhandu bhabho nigubhashite, "Ganakwiya mobha, Pushindende malagano ga ambi na bhandunji bha Ishilaeli, na bha Yuda. 9 Gene malaganogo gakabha malinga gunatendile na ashinakulu bhabhonji, Lyubha linaakamulenje nkono nikwaashoyanga ku Mishili. Pabha bhangatolelelanga malagano gangu, Na nne gunaaleshilenje, bhakuti Bhakulungwa. 10 Gegano ni malagano gushindende na bhandunji bha Ishilaeli, Mobha gakwiyago, Shimishe shalia yangu nng'aniyo yabhonji, Na jandika mmitima jabhonji. Na nne shime a Nnungu bhabhonji Na bhalabhonji shibhabhanganje bhandunji bhangu. 11 Jwakwapi ashannjiganye nshilambo njakwe, eu ashannugulle mpwakwe, 'Gwaamanye Bhakulungwa.' Pabha bhowe, shibhamanyanje nne. Kutandubhila jwanshoko, mpaka jwankulungwa. 12 Pabha shinaaleshelenje ilebho yabhonji, Na ngakumbushila kabhili yambi yabhonji." 13 Kwa lugula ga malagano ga ambi, a Nnungu bhashinkutenda malagano ga ntai gala gabhe ga makongopa, na shoshowe shikongopala shikakabha kumala ninngabhoneka.

9 Bhai, malagano ga ntai gashinkukola ikubho yakwe ya kwaajuga a Nnungu, na liema lya ukonjelo lya pa shilambolyo. 2 Pabha liema lyashinkualaywa, kati ja kungoposhelo pujashemwaga pa Ukonjelo. Mwenemo pashinkupagwa pabhishilwe kandili, na mesha, na mikate

ja ukonjelo. 3 Kunyuma ukungushi, jashinkupagwa kati jina jashemwaga pa Ukonjelo gwa Puya. 4 Mwenemo mwashinkupagwa shitala sha shaabhu sha tutumishiya lubhani na lishanduku lya malagano, lipashilwe shaabhu mmbali yowe. Nkati lyene lishandukulyo, lyashinkupagwa shibhiga shipashilwe shaabhu shatajilwe mana na ntindisho gwa a Aluni gwa ipuka na ibhao ibhili ya maganga yajandikwe malagano. 5 Panani lishandukulyo yashinkupagwa igobhi ibhili ya malaika ya ukonjelo gwa a Nnungu, mapapiko gabhonji galibhika nng'wili pa leshelela yambi. Ikabheje nnaino nngabha malanga ga talashiya geneho kwa kaje. 6 Bhai nnei ni shiyashite pangwa indu yowe, bhaabhisila bhatendaga jinjilangana kila lyubha nniema lya palanga kuitenda ikubho yabhonji ya kwaajuga a Nnungu, 7 Ikabheje bhakulungwa bhaabhisila jikape bhajinjilaga nniema lya bhili, kamo kwa shaka. Bhatendaga pinjikwa kupeleka minyai ja bhannyama, jibhashoyaga kwa ligongo lya yambi yabho bhayene, na yambi ya bhandunji ibhatendilenje gwangali kumumanya. 8 Kwa nneyo, Mbumu jwa Ukonjelo atendaga langula kuti mpanda gwa jinjila pa Ukonjelo Gwa puya, gwaaliji ukanabhe ugulwa mobha gowe ga lonjeya kwa liema lya ntai. 9 Geneho gashinkubha shilanda sha mobha ga nnaino gano, shilanguya kuti mbepei na yukilo, ikakuntenda mundu atindibhalila akamilishe muntima. 10 Yene yoweyo ni shalia ya nshiilu, ga yalya, na ya papila, na namuna ja nabha. Yenyoye yashinkuamulishwa kukagulwa mpaka mobha a Nnungu pushibhaalaye indu yowe gwa ambi. 11 Ikabheje a Kilishitu gubhaishe, bhali bhakulungwa bhaabhisila bha indu ya mmbone iishe nnaino. Bhenebho gubhapite nniema lya kamilika lyangaalaywa kwa makono ga bhandu, yani nngabha liema lya pa shilambolyo pano. 12 Bhashinkujinjila pa Ukonjelo kaje kamope gubhapeleshe minyai, nngabha ja mmbui na ng'ombe, ikabhe minyai jabho bhayene, nkupinga tugombolwe piti piti kwa bhei jikulungwa. (aiōnios g166) 13 Bhandu bhalebhilenje bhashinkutakaywanga kwa mishiywa minyai ja ng'ombe na mmbui, na liu lya litumbwe lya ng'ombe lya ikolo lyalitiniywe. 14 Bhai kwa minyai ja a Kilishitu indu yaikulungwa ikatendeka? Kwa mashili gaka Mbumu jwa pitipiti, a Kilishitu bhashinkwiishoya bhayene kubha mbepei ya ukonjelo kwa a Nnungu. Minyai jabho shijitutakaye ng'aniyo yetu ya muntima, ipeleshela shiwo, nkupinga twaatumishile a Nnungu bhakwete gumi. (aiōnios g166) 15 Kwa nneyo a Kilishitu ni bhaalundanya bha malagano ga ambi, na bhene bhashemilwenje na a Nnungu, shibhaposhelanje ulishi gwa pitipiti gubhabhishilwenje na a Nnungu. Shiwo shabho shinakwaagombolanga bhandunji na yambi yabhonji ibhatendilenje mobha ga malagano ga bhukala. (aiōnios g166) 16 Malajilo ga ulishi pugaakagulwa mpaka imanyishe kuti ajandishe jula awile. 17 Malajilo ga ulishi gakakola mashili mpaka awe alajile, pabha malajilo ga ulishi gakakola malombolelo ibhaga alajile ali jwankoto. 18 Pabha nkali malagano ga ntai gakanatendeshe gwangali jitika minyai. 19 A Musha pubhatandubhaga kulunguya ku bhandu bhowe, amuli yowe ya shalia, nitolaga minyai ja litumbwe lya ng'ombe na mmbui na mashi, na maamba ga nkongo gwa ishopo na mabhetya ganashe ga ngondolo, gubhamishiye nshitabhu sha malajilo shila, na ku bhandunji bhowe. 20 A Musha bhalinkuti, "Jejino

ni minyai ja malagano gung'amulishwenje na a Nnungu." 21 Nneyo peyo a Musha gubhamishiye minyai jila nniema na indu itumika nkwaajuga a Nnungu 22 Elo, kwa tolelela shalia tome indu yowe inatakaywa kwa minyai, gwangali jitika minyai yambi ikaaleshelelwa. 23 Yene indui puyaaliji malinga shilanda sha indu ya kunnungu, yashinkutakaywa kwa shana nneyo. Ikabheje indu ya kunnungu inaapinjikwa kutakaywa na mbepei ya mmbone kupunda yeneyo. 24 Pabha a Kilishitu bhangajinjila pa Ukonjelo pashenjilwe na bhandunji, paliji shilanda sha kweli. Ikabhe bhashinkujinjila kunnungu kuyene, nnaino kubhali kwa a Nnungu, kwa ligongo lyetu uwe. 25 Bhakulungwa bhaabhisshila bha Bhayaudi, bhanajinjila pa Ukonjelo kila shaka bhali bhajigele minyai jika nnyama. Ikabheje a Kilishitu bhangajinjila mwenemo nkupinga bhaishoye bhayene mbepei papagwinji, 26 pabha ikaliji nneyo, a Kilishitu bhakapotekwe papagwinji kuumila kupanganywa kwa shilambolyo. Ikabheje nnaino, mobha pugabhandishila kumpelo, bhenebho bhashinkukoposhela kamope pubhaishoshiye bhayene kubha mbepei ja leshelela yambi. (aiōn g165) 27 Bhai malinga shiikubha, mundu anawa kamope na awaga anakumulwa na a Nnungu. 28 Nneyo peyo, a Kilishitu na bhalabho bhashinkwiishoye bhayene kubha mbepei kamope, kwa ligongo lya leshelela ilebho ya bhandu bhabhagwinji. Pushibhaishe gwa bhili nngabha kuleshelela ilebho, ikabheje kukwaatapulanga bhene bhakwaalindanga kwa amu bhala.

10 Bhai, pabha shalia ja a Musha pujaaliji shiwili sha indu ya mmbone shiijiye koposhela na nngabha indu iyene, mbepei ila peila ya Shalia ishoywa kila shaka, ikakombola kwaakamilishanga nkwaatindibhalila a Nnungu. 2 Monaga bhandunji bhakwaatindibhalilanga a Nnungu bhakalinginji kweli bhaleshelelwenje yambi yabhonji, bhakanaibhonoranje kuti bhashilebhanga, na mbepei yowe ikapelite. 3 Ikabheje yene mbepeiyo inakumbushiya bhandu ga yambi yabhonji kila shaka. 4 Bhai, minyai ja ng'ombe lilume na mbui jikaashoya yambi. 5 Kwa nneyo a Kilishitu pubhaishe pa shilambolyo, bhashinkwaalugulila a Nnungu, "Mwangapinga mbepei, ikabhe nshing'alashiya shiilu. 6 Mbepei ya tiniywa pa moto eu ya leshelela yambi yangannyela. 7 Penepo gunjite, "Puni apano, mmwe a Nnungu, kutenda inkupinga malinga shiishite jandikwa gangu nne nshitabhu." 8 Kundandubho a Kilishitu bhaashite, "Yangannyela wala mwangaipinga mbepei, na bhannyama bha tiniywa pa moto wala mbepei ya shoya yambi." Nkutolelela shijapingaga shalia. 9 Kungai gubhashite, "Puni apano, mmwe a Nnungu njikwiya kuutenda inkupinga." Kwa nneyo a Nnungu gubhaleshile malagano ga bhukala, nkupinga bhabhishe ukoto ga ambi. 10 Na pabha a Yesu Kilishitu bhashinkutenda ibhaapinga a Nnungu, uwe tunaaleshelelwa yambi kwa mbepei ya shiilu shabho, shibhashishoshiye gwanakamope. 11 Lyubha kwa lyubha kila bhaabhisshila bhanashoya mbepei kila lyubha, mbepei ikakombola shoya yambi. 12 Ikabheje a Kilishitu bhashinkushoya mbepei jimo ja lonjeya mobha gowe, kungai gubhatemi kunkono nnilo gwa a Nnungu, 13 bhanaalinda ashaamagongo ajabho bhabhikwanje pa makongono gabho. 14 Bhai, kwa mbepei jabho jimo, bhashikwaatendanga bhaatakaywanga bhala, kukamilika

pitipiti. 15 Na jwalakwe Mbumu jwa Ukonjelo anakong'ondela, alinkuti, 16 "Gegano malagano gushindende na bhanganayabho, Shimishe shalia jangu mmitima jabhonji, mmobha gakwiya na jandika nnunda lwabhonji." 17 Gubhajenjesheshe bhalinkuti, "Yambi yabhonji ngaikumbushila kabhili, wala itendi yabhonji yangali ya mmbone." 18 Bhai, yambi ileshelelwaga, mbepei ya leshelela yambi ikaapinjikwa kabhili. 19 Bhai, ashaapwanga, kwa minyai ja a Yesu tunaapegwa makangala ga jinjila pa Ukonjelo. 20 Kwa kwiishoya shiilu shabho bhayene kubha mbepei, a Yesu bhashikutuugulla mpanda gwa ambi, mpanda gwa ambi ukutulongoya ku gumi, yani lipashiya lila. 21 Pabha, tushikola bhakulungwa bhaabhisshila bhakwete mashili nnyumba ja a Nnungu, 22 twaabhandishile a Nnungu kwa ntima gwa kulupalila gwangali lipamba, na mitima jikonjeleywe ga ng'aniyo ya nyata na ilu ikundilwe na mashi ga mmbone. 23 Tukamulile ukoto nnolelo gwetu gutukong'ondela, pabha a Nnungu bhabhisshile miadibho, ni bhaakulupalika. 24 Tulolane nitagana ntima twaashayene, na punda pingana, na tenda ya mmbone. 25 Tunaleshe nkubho gwa imana pamo gula, malinga shibhaatendanga bhananji. Ikabheje tinapinjikwa jangutana, pabha lyubha lya ukumu ja Bhakulungwa linabhandishila. 26 Pabha tupundaga tenda yambi melepe, tukajimanyeye kweli, jakwapi mbepei jina shijishoywe ja kombola kuleshelela yambi, 27 ikabheje shiilepeka ni kulolela ukumu ja a Nnungu na moto gwaatitimiyanje bhakakwaakundanga. 28 Mundu jojowe akaakunda shalia, anaatitimiywa gwangali kummonnela shiya, bhapagwangaga bhaakong'ondela bhabhili eu bhatatu. 29 Bhuli, mundu akunnegaya Mwana jwa a Nnungu na nyegaya minyai ja malagano ga a Nnungu janneshelele yambi, mundu akuntukana Mbumu jwa nema, akapinjikwa kuitimiywa kwa kaje? 30 Pabha twaamanyi bhene bhabheleketete, kuti, "Kupindikulila ni liengo lyangu, nne shimbindikulile." Kabhili kuti, "Bhakulungwa shibhaaukumulanje bhandu bhabho." 31 Kuukumulwa na a Nnungu bhali shiumilo sha gumi, ni shindu sha jogoya kwa kaje! 32 Nkumbushilanje yakoposhele kundandubho pumwalangashiywenje shilangaya sha a Nnungu. Nkali mwapotekwenje kwa kaje, mmanganya mwashinkwiikakatimilanga. 33 Guna mwashinkutukanwanga na nyegaywa pa lugwinjili, guna mwashinkukundanga kulundana na bhene bhapotekwenje bhala. 34 Bhashinkuabhonelanga shiya bhatabhilwenje, nipokonyolwa indu yenunji akuno nniangalalanga, pabha mwamumanyinji kuti, nshikolanga indu ina ya mmbone kaje na ya lonjeya pitipiti. 35 Bhai, nnalekanje makangala genunji, pabha shimpatanje yukilo yaikulungwa. 36 Nnapinjikwanga muikakatimilanje, nkupinga ntendanje ibhaapinga a Nnungu, na poshela shibhalajile shila. 37 Malinga shigataya Majandiko kuti, Palepeshe pashokope, na bhakwiya bhala, shibhaishe, wala bhakakabha. 38 Ikabheje mundu jwangu akwete aki, shatame kwa kulupalila, ikabheje abhujilaga nnyuma, nne nganonyelwa najo. 39 Bhai, uwe twangabha munkumbi gwa bhaabhujilanga nnyuma, ikabheje putuli na bhaakulupalilanga na tapulwa.

11 Bhai ngulupai ni kutolelela kuti kweli ga indu ilolelwa, ni kukulupalila indu ikabhoneka. 2 Pabha, kwa ligongo lya ngulupai jabhonji ashinakulu bhetu bhashinkukong'ondelwanga

ukoto na a Nnungu. **3** Kwa ngulupai tunakumumanya kuti shilambolyo shashinkupanganywa kwa amuli ja a Nnungu. Indu ibhoneka yashinkupanganywa kopoka kuindu ikabhoneka. (aion g165) **4** Kwa ngulupai, a Abheli bhashinkushoya mbepei ya mmbone kwa a Nnungu kupunda a Kaini. Kwa ligongo lya ngulupai jabho gubhakwete aki kwa a Nnungu, pabha a Nnungu bhayene bhanonyelwe na mbepei yabho. Kwa jene ngulupaijo nkali a Abheli bhawileyo, launo ngulupai jabho jinabha shindu sha mmbone sha kaguya. **5** Kwa ngulupai, a Eneko bhashinkutolwa na a Nnungu kujabhula pashilambolyo gwangali kwa. Bhangabhoneka kabhili pabha a Nnungu bhashinkwaatola kwenda kunnungu. A Eneko bhakanabhe tolwa na a Nnungu bhatendaga nonyelwa nabho. **6** Ikabheje, gwangali ngulupai ikatendeka kwaanonyeya a Nnungu, pabha akwaajendela a Nnungu anapinjikwa akulupalile kuti Bhenebho bhapali na kuti bhanakwaapanganga shukilo bhene bhakwaaloleyanga bhala. **7** Kwa ngulupai a Nuu bhashinkukunda kuleywa na a Nnungu ga ipinga koposhela, bhali bhakanabhe kuibhona. Kwa kwaakunda a Nnungu, a Nuu gubhaeeye shapina ngupinga kuitapula bhayene na ashaalongo ajabho. Kwa ligongo lya ngulupai ja a Nuu, a Nnungu gubhashiukumwile shilambolyo ga lebha. **8** Kwa ngulupai, a Bhulaimu bhashinkukunda pubhashemilwe na a Nnungu bhajende kushilambo shibhalajilwe kupeywa kwa miadi shibhe ulishi gwabho. Gubhaleshile shilambo shabho, bhali bhakakukumanya kubhakwenda. **9** Kwa ngulupai bhashinkutama mbuti bhajeni nshilambo sha miadi ja a Nnungu, gubhatemi mmakambi, malinga shibhatendilenje a Ishaka na a Yakobho kungai, bhalinginji bhalishi bha mmiadi jila na a Nnungu. **10** Pabha a Bhulaimu bhatendaga lelela kushibhona shilambo shishenjiilwe kwa majumba ga shimilika, shilambo shikumbwiye na shengwa na a Nnungu. **11** Kwa ngulupai, a Bhulaimu nkali bhaaliji bhakongopa, na a Shala nkali bhaaliji nannii na bhakongopa gubhapegwilwe mashili ga jukuta shitumbo nikola mwana, pabha bhakulupalile kuti a Nnungu shibhakamilishe miadi jabho. **12** Kwa nneyo, kwa ligongo lika mundu jumo aaliji nkulolela kuwa, gubhabhelekwenje bhandu bhahagwinji malinga ndondwa ya kuliunde na malinga nng'anji gwa nnyenje bhaali ukamboleka kubhalanganyanga. **13** Bhene bhandunji bhobebha gubhawilenje ngulupai gwangali kuposhela indu ya miadi ja a Nnungu ila, ikabheje bhaibhweninji kwa taliya nikuiangalila, niikunda kuti pubhalinginji bhajeninji na bhapita mpanda pa shilambolyo. **14** Bhandu bhahheleketanga nnei, bhanalangulanga kuti muhalinginji nkuloleya shilambo shabhoriji. **15** Monaga bhakaganishiyenje ga shilambo shabhoriji shibhashileshilenje bhukala, bhakapatilenje muubhujilo kweneke. **16** Ikabheje bhanapinganga shilambo shili sha mmbone kaje, yani shilambo sha kunnungu. Kwa nneyo a Nnungu bhakaakola oni kushemwa a Nnungu bhahoriji, pabha bhaeeye shilambo sha bhene bhanganyabho, yani kunnungu. **17** Kwa ngulupai, a Bhulaimu bhakalingweje na a Nnungu, bhashinkunshoya Ishaka abhe mbepei. A Bhulaimu bhashinkukunda kunshoya mwanagwabho jwa jika abhe mbepei, jubhapegwilwe na a Nnungu kwa miadi. **18** Nkali a Nnungu bhaabhalanjile, kupitila kwa a Ishaka shinkole lubheleko shilushemwe lweni. **19** A Bhulaimu bhaganishiyenje kuti a Nnungu bhanakombola kunnyuya mundu awile, kwa nneyo ni

malinga bhashinkupata kabhili Ishaka akaweje. **20** Kwa ngulupai a Ishaka bhashinkwaapanganga mboka a Yakobho na a Eshau nndamo ja mobha ga kwiya. **21** Kwa ngulupai a Yakobho pubhaaliji tome na kuwa, bhashinkumpa mboka kila mwana jwa a Yoshepu nigubhaatindibhalile a Nnungu bhali bhajegamile ntindisho gwabho. **22** Kwa ngulupai a Yoshepu pubhaaliji tome na kuwa, bhahheleketete ga mobha gushibhashokangane Ishilaeli ku Mishili, nigubhalajile ga maupa gabho bhawaga. **23** Kwa ngulupai, bhankwetenje Musha bhashinkunng'iyanga myei jitatu akabhelekeje, pabha bhashinkummonanga mwana jwa konja, wala bhakajogopenje amuli ja a mpalume. **24** Kwa ngulupai, Musha akakuleje, ashinkukana kushemwa mwana jwa abhiti Palao. **25** A Musha gubhaagwile na mbaya kutama maisha ga bhonelwa pamo na bhandunji bha a Nnungu, na nngabha kunonyelwa na maisha gakaalonjeja ga tenda yambi. **26** Bhashinkukunda kupotekwa malinga shibhapinga potekwa a Kilishitu, ni shindu sha mana kupunda utajili gowe gwa shilambo sha Mishili, pabha bhatendaga lelela kupeywa shukilo. **27** Kwa ngulupai, a Musha bhashinkujabhula ku Mishili gwangali jogopa nnjimwa ja a mpalume, bhashikiwikakatimila pabha bhaabhweni a Nnungu bhakabhoneka bhala. **28** Kwa ngulupai bhashinkukumbuya shikukuu ja pashaka nipakaya minyai pa nnango, nkupinga malaika nkubhulaga, anaabbulaganje bhana bhanabhalume bha lielo bha Bhaishilaeli. **29** Kwa ngulupai, Bhaishilaeli bhashinkujombokanga bhaali ja Shamu mbuti pantaka njumu, ikabheje Bhamishili bhakalinganje kutenda nneyo, gubhatitimilenje mmashi. **30** Kwa ngulupai, makumba ga Yeliko gashinkugwa, Bhaishilaeli bhakagatimbiilanjeje kwa mobha shabha. **31** Kwa ngulupai, a Laabhu bhaliji lijajana, bhangabhulagwa pamo na bhaakanilenje a Nnungu bhala, pabha bhashinkwaaposhelanga bhanushishiya kwa ulele. **32** Igala mbunde bheleketete nndi? Nne ngapinga kutalashiya ga ngani ja a Gidioni, na a Bhalaka, na a Shanshoni, na a Yeputa, na a Daudi, na a Shamweli na ashinkulondola bha a Nnungu. **33** bhanganayabho kwa ngulupai, bhashinkukombolanga kupokonyola ilambo ya bhapalume, na bhashinkutendanga indu kwa aki, niipeywa ya miadi ja a Nnungu, bhashinkutabhanganga kang'wa ya imba, **34** bhashinkuimanga malamba ga moto, bhashinkutapulwanga nkubhulagwa na upanga, bhakakwetenjeje mashili, ikabheje gubhapegwilwenje mashili, bhashinkukolanga makangala nngondo nikugakombola makundi ga bhajeninji bhakomana ngondo. **35** Kwa ngulupai, bhanabhakongwe bhashinkuposhelanga bhandunji bhahoriji bhawilenje niyuywa. Ikabheje bhananji bhashinkupotekwanga niikana kugopolwa, nkupinga bhapatanje kuyuywa nibha nndamo jili jammbone kaje. **36** Bhananji bhashinkunyegeyanga nikomwa ndomondo, nitabhwa mindondolo niugaliilwa mmagelesha. **37** Bhananji bhashinkubhulagwanga kwa komwa maganga, bhananji bhashinkugabhanyanga ipande na mishumeno, kubhulagwa na upanga, bhatendaga konangonanga bhali bhawetenje mapende ga ngondolo na mbui, bhalinginji nshilaje, bhalipotekwanga na tendelwa yangali ya mmbone. **38** Shilambolyo shikapwaleje kubha na bhandunji bha mmbonebha malinga bhanganyabho. Bhatendaga konangonanga nng'anga na mmitumbi, bhalitamangana mmashembo na mmaimbo. **39** Na

bhene bhandunji bhowebho, bhashinkukong'ondelwanga ukoto na a Nnungu ga ngulupai jabhoni, ikabheje bhangaposhelanga ya miadi ja a Nnungu ila mpaka kungai. **40** Pabha a Nnungu bhashinkulongolela kutubhishila indu ya mmbone kaje, nkupinga bhanganyabho bhanakamilishwanje gwangali uwe.

12 Pabha numbe uwe tushitimbilwa na likundi likulungwa lya bhaakong'ondela malinga nnei, bhai tuleshe indu yowe ikutuibhuya, na shambi shikutukamuliya shila, na tubhututse kwa kwiikakatimila nkubhingayana kutubhishilwe na a Nnungu. **2** Bhai twaalole a Yesu bhakumbwiye na bhaakamilisha ngulupai jetu, bhalabho kwa ligongo lya kuangalala kubhabhishilwe, gubhapiilile kuwa munshalabha gwangali kola oni, na nnaino bhatemi kunkono nnilo gwa shitengu sha upalume gwa a Nnungu. **3** Kwa nneyo munnganishiyanje jwene aipililile kukanwa na bhakwetenje yambi, nkupinga nnatotoshelanje niwa ntima. **4** Nkulajilila ga leka yambi, nkanabhe ishilanga pa bhulagwa. **5** Na kupunda nneyo, nshilibalanga malobhe ga taga ntima ga a Nnungu, gubhammalanjilenje mbuti bhana bhabho, kuti, Mwanangu, nyaneyegaye malajilo ga Bhakulungwa. Wala unawe ntima pubhakuukalipila, **6** pabha Bhakulungwa jubhakumpinga jula, bhanakunkalipila na kila akunda kubha mwana gwabho bhanakunkoma. **7** Mwiipilililanje nkuundwa, pabha a Nnungu bhanakuntendelanga malinga ashibhana bhakho. Apali mwana akakomwa na ainagwe? **8** Ibhaga nkaundwanga na a Nnungu malinga ashibhana bhabho shibhakuti undwanga, bhai mmanganyanji nngabha bhana bha kweli bha a Nnungu, ikabhe bhana bha alamu. **9** Na ibhaga ashaatati bha shigundu, bhalikutuundanga nikwaishimunjii, penepo inalangula kuti, inapinjikwa kwaishimu kaje, Aina bhetu bha mbumu, nkupinga tulame **10** Ashainabhetu bha shigundu, bhatuundanje kwa mobha gashoko, malinga shibhabhweninji ashaayenenji kuti sha mmbone. Ikabheje a Nnungu bhanakutuunda kwa pwaida jetu, nkupinga bhatukundikanye muukonjelo gwabho. **11** Kuundwa kokowe kukanong'a, pukuutendeka kunapoteka, ikabheje kungai kunapeleshela aki na ulele kwa bhajigenyenje bhala. **12** Bhai, nngoloyanje makono genunji gangali mashiligo, na malungo genunji galegeleshego. **13** Nng'alayanje mwa pita makongono genunji, nkupinga akwete shilema anagwe, ikabheje alame. **14** Nnoleyanje kutama kwa ulele na kila mundu, na ukonjelo pabha jwakwa mundu shaabhabhone Bhakulungwa gwangali kubha na ukonjelo. **15** Mwiiteiganje, nkupinga anapagwe nkali jumo jwa pelela nema ja a Nnungu, wala anapagwe jwabha shumilo sha ya nyata, nibhuya bhandu na jambushiya bhahagwinji. **16** Anapagwe jwa labhalabha eu jwangaajogopa a Nnungu, malinga a Eshau bhaushiye ulishi gwabho gwa lielo, kwa shalya sha kamope. **17** Malinga shimmumanyinji, bhalajilile numbe kwa minyoi bhapate mboka kopoka kwa ainabhabho, ikabheje bhangakombola kwiipeta, pabha bhashinkusehewa. **18** Mmanganyanji nkanabhe ishilanga kushitumbi sha komboleka kukwaya, malinga shibhaishilenje Bhaishilaeli kushitumbi sha Shinai. Shitumbi shashinkukolela moto, nitabha lubhindu, na nnindimo na shimbungu. **19** Na nneila peila jashinkupilikana mbalapala na lindimila kwa malobhe, na Bhaishilaeli bhakapilikananje, gubhajujilenje bhanabhalanjilwanje kabhili lilobhe lyolyowe, **20** pabha

bhangakombolanga kwiikakatimila amuli ibhagegwilwenje, "Jojowe nkali abhe nnyama, shaakwaye shene shitumbisho, shaabbulagwe kwa komwa maganga." **21** Gene gowego pugabhonese gashinkujogoya kaje, nkali a Musha gubhashite, "Ngunajogopa na ngunatetemela." **22** Ikabheje mmanganyanji nng'ikengeneneje kushitumbi sha Shayuni, ku shilambo sha a Nnungu bhakwete gumi, Yelushalemu ja kunnugu, kulugwinjili lwa malaika, **23** maimano ga lugwinjili lwa nng'angalo gwa bha lielo lya a Nnungu bhajandikwenje mena gabhoni kunnugu. Na kabhili nshiikangana tome na a Nnungu, bhali bhakumula bha bhandu bhowe, na bhandunji bhakwetenje aki na bhakamilikenje. **24** Nng'ikengeneneje kwa a Yesu bhaalundanya bha malagano ga ambi, na kwa minyai jabho, jibheleketa ngani ja mmbone kupunda minyai ja a Abheli jila. **25** Bhai, mwiiteiganje nnakunkananga abheleketa na mmanganyanji jula. Ibhaga bhene bhakanilenje kumpilikanishiya alikwaaleyanga pa shilambolyo pano bhangatapulwanga, uwe shitukombole bhuli kutapulwa ibhaga shitukane kumpilikanishiya jwene akutuleya kukopoka kunnugu? **26** Gene malanga gala, lilobhe lyabho lyashinkutenda shilambolyo kuungumila, na nnaino bhashilajila, Shing'ungumiyiye kabhili kamo, nngabha shilambolyope, ikabheje nneila peila na kunnugu. **27** Lyene lilobhe lya kuti, "Kabhili kamo" linaalangula kuti, indu yowe ipengenywe ikomboleka ungumiywa, ipinga ungumiywa niobha, nkupinga yangakomboleka ungumiywa ilonje. **28** Bhai uwe, tutende eja, pabha tunaaposhela upalume gwangatanganyika. Tutende eja na kwaatindibhalila a Nnungu, nkwaanonyeya, na kwaishimu na kwaajogopa, **29** pabha a Nnungu bhetu ni malinga moto utitimiya.

13 Mpundanje kupingana malinga bhandu bha likaja limo. **2** Nnalibhalanje kuposhela bhajeninji, pabha kwa tenda nneyo bhananji bhaaposhelenje ashimalaika gwangali kumumanya. **3** Mwaakumbushilanje bhatabhilwenjebho, mwiibhonganje mbuti nntabhilwenje pamo na bhanganyabho, na mwaakumbushilanje bhaapotekwanga, mwiibhonganje mbuti nkupotekwanga malinga bhanganyabho. **4** Ndoa jishimiwe na bhandu bhowe, inapagwe ya labhalabha, mundu na nkagwe bhanatendebhukane, pabha a Nnungu shibhaaukumulanje bhowe bha labhalabha na bha utwai. **5** Nnabhanganje bhandunji bha pinjiya mmbiya, ikabheje ntogolelanje na inkwetenje, pabha a Nnungu bhayene bhashite, "Nnganneka wala nkatubhilwa." **6** Kwa nneyo tunakola mashili ga bheleketa kuti, Bhakulungwa ni bhaajangutula bhangu, ngajogopa shindu. Mundu shandende nndi? **7** Mwaakumbushilanje ashikalongolele bhenunji, bhannungushiyenje lilobhe lya a Nnungu. Nnolesheyenje shibhashite tamangana ukoto, nkaguyanje ya mmbone ibhatendangaga. **8** A Yesu Kilishitu ni bhala pebhala, liyo na lelo na pitipiti. (aiōn g165) **9** Nnapuganywanje na majiganyo gana gogowe, pabha mitima jenunji jinapinjikwa jikole mashili kwa nema ja a Nnungu, na wala nngabha nkukagulila ikubho ya nkulya yalya. Yene ikubhoyo, yangaapwaanga shindu bhene bhaakaguilanga bhala. **10** Uwe tukwete shitala, na bhaabhishila bha Shiyaudi bhaatumishilanga pa Ukonjelo bhakapinjikwanga kulya indu ishoywa mbepei ya pa shitala shetu. **11** Bhakulungwa

Bhabhishila, bhanapeleka minyai ja bhannyama pa Ukonjelo Kaje, nkupinga shoya jibhe mbepei ja leshelelwa yambi, ikabheje bhannyama bhawilenje bhala bhanatiniywanga na moto palanga likambi. 12 Kwa lyene ligongolyo na bhalabho a Yesu, nkupinga bhandunji bhatakatanje kwa minyai jabho bhayene, bhashinkupotekwa nibhulagwa kunyenje shilambo. 13 Bhai twaajendele kunyenje shilambo kula, tukunde kunyegaywa, malinga bhalabho shibhakundile kunyegaywa. 14 Pa shilambolyo pano twangali shilambo sha lonjeya, ikabheje tunalolela shilambo shikwiyasho. 15 Bhai kupitila a Yesu, twaape a Nnungu mbepei ya kwaainiya kwa kang'wa yetu mobha gowe, nkukong'ondela kuti tulikulupalile lina lyabho. 16 Na nnalibhalanje kutenda ya uguja na jangutana, pabha yenei ni mbepei ikwaanonyela a Nnungu. 17 Mwaakundanje ashikalongolele bhenunji, na nkaguyanje amuli yabhonji pabha bhanganyabho bhanasheyanga kwa ligongo lya mitima jenunji, malinga bhandunji bhapinga bhalanganga kwa a Nnungu ga imwatandangaga. Nkupinga bhatendanje nneyo kwa nonyelwa nngabha kwa injika, pabha bhatandangaga kwa injika ikampwailanga shindu. 18 Ntujujilanje na uwe, pabha tukulupalile kuti ndumbililo yetu ya mmbone, na tunapinga kutenda ya mmbone kwa indu yowe. 19 Ngunakunshondelesheyanga nnyujilanje, nkupinga a Nnungu bhamujenabho kunngwenunji shangu. 20 A Nnungu bha ulele, bhaayushiye Bhakulungwa bhetu a Yesu, bhali bhashunga bhakulu bha ngondolo, kwa ligongo lya minyai jabho jibhika malagano ga pitipiti. (aiōnios g166) 21 Bhanshimilikanje nkutenda yowe ili ya mmbone, nkupinga nkombolanje kutenda ibhapinga, nabhalabho bhatende ibhapinga mmitima jetu, kupitila a Yesu Kilishitu. Ukonjelo ubhe na bhenebho pitipiti. Amina. (aiōn g165) 22 Bhai, ashaapwanga ngunakunshondelesheyanga mposhelanje gene maleyo ga kuntaganga ntima pabha bhaluwa jino njjandika shiupikaya. 23 Ngunaaapinga mmumanyanje kuti apwetu a Timoteo bhagopwelwe kujela. Bhaikaga apano shangu, shing'ishe nabho pushinyiye kunngwenunjiko. 24 Shalamu jabhonji ashikalongolele bhenunji bhowe, na bhandunji bha ukonjelo. Ashaapwetu bha ku Italia bhanakunnamushilanga. 25 Tunakumpinjiilanga mmowe, nema ja a Nnungu.

Yakobho

1 Nne Yakobho nili ntumwa jwa a Nnungu na jwa Bhakulungwa a Yesu Kilishitu ngunakunnjandishilanga mmandunji bha makabhila likumi limo na gabhili mpwilinganishilenje nshilambolyo, shalamo jenunji. **2** Mmaakulupalilanga ajangunji nng'angalalanjeje punkulingwanga kwa mboteko ya kila namuna, **3** pabha mmumanyinji kuti kulingwa kwa ngulupai jenunji kunapeleshela kwiipililila. **4** Kwiipililila kwenunji kumpanganje kushimilika na kutimilila nngulupai gwangali tubhilwa shindu shoshowe. **5** Ikabheje mundu munkumbi gwenunji atubhilwaga na ng'aniyo ya lunda, abhajuje a Nnungu bhakwaapanganga bhandu bhowe kwa ntima gwa ntuka wala bhakaatumbala, najwalakwe shaapegwe. **6** Ikabheje ajuje aikulupalila gwangali lipamba lya jangulwa, pabha akwete lipamba anabha mbuti libhimbili lya mashe ga bhaali linokolwa na bungo akuno na kukuno. **7** Pabha mundu jwa nneyo anakulupalile kuti shaapate shindu koposhela kwa Bhakulungwa. **8** Mundu jwa ng'aniyo ibhili akakamula shindu shimo muitendi yakwe yowe. **9** Bhaakulupalilanga bhaalaga, bhaangalalanje pabha a Nnungu bhanakwaishimunji bhowe. **10** Na matajili bhaangalalanje pubhatuluywanga na a Nnungu, pabha nabhalabhonji shibhaobhanje malinga lilubha lya mukonde shilijumula niobha. **11** Pabha lyubha libhalaga, linajumuya maamba na malubha gakwe ganawa na konja kwakwe kowe kunapela. Nneyo peyo na nkali mundu ashulushilwe indu shaapele nniengo lyakwe pemo. **12** Mbaya mundu akwiiluma ntima alilingwa, pabha akombolaga shaapegwe upo ya gumi shibhalajile Bhakulungwa ku bhandu bhakwaapinganga. **13** Monaga mundu alingwaga, analugule kuti, "A Nnungu bhanananga." Pabha a Nnungu bhakaalingwa na ilebho, na bhenebho bhakakunninga mundu. **14** Ikabheje kila mundu analingwa, kwa nonyelwa na tembwa na ilokoli yakwe nnyene. **15** Kwa nneyo shilokoli shipundaga shinabheleka shambi na shambi shikomalaga shinabheleka shiwo. **16** Bhaakulupalilanga ajangunji nkupingwanga, nnatembwanje! **17** Kila shambone shinkupegwa, na shoshowe shitimilile, kushikoposhela kunnungu, kwa Atati bhapeleshe shilangaya. Bhenebho bhakatendebhuka, numbe bhanganji nkubho gwa tendebhukatendebhuka. **18** Kwa pinga kwabho bhayeneuwe, nigubhatubhishile nndamo ja ambi kwa lilobhe lyabho lya kweli, nkupinga tubhe nrimbu gwa indu yabho ipengenywe. **19** Bhaakulupalilanga ajangunji bhungumpinganga, nngamanyanje gegano. Bhai mundu abhe jwa minda kupilikanishiya na nngabha jwa minda kubheleketa na anabhe jwa tumbala shangu. **20** Pabha mundu akwete nrimwa, nngakombola kwaanonyeya a Nnungu. **21** Kwa nneyo mwiilekanje kwa taliya indu yowe ya nyata na itendi yangali ya mmbone, mposhelanje lilobhe libhishilwe mmitima jenunji, likombola kuntapulanga mitima jenunji. **22** Ikabheje ntendelanje liengo malobhe ga Nnungu na nngabha kupiikanilape, akuno nnikwiitombanga mmitima jenunji. **23** Pabha mundu apilikana lilobhe gwangali tendela liengo, jwenejo pabha mbuti mundu akwiilola ku meyo kwake nshiyoo. **24** Pabha ailolaga nijabhula, shangupe analibhala shikuli kumeyo kwakwe. **25** Ikabheje mundu akujilola ukoto shalia jikamilishe,

jikwaapanganga bhandunji ungwana nikujikagulila gwangali kulibhala shapiikene na tenda malinga shiikupinjikwa, bhai jwenejo itendi yakwe shiipate mboka ya a Nnungu. **26** Ibhaga mundu aiganishiyaga kuti anakagulila dini, ikabheje akakombola kuluibhila lulimi lwakwe ukoto, jwene mundujo dini jakwe jikapwaa. **27** Mundu akwete dini ja mmbone jibhoneka jangali ya nyata kwa a Tati a Nnungu ni ajuno, akwaajangutilanga bhanabhalekwa na bhashitenga nshilaje shabhonji na akwiiepuya na ya nyata ya pa shilambolyo pano.

2 Bhaakulupalila ajangunji, nkwaakulupalilanga Bhakulungwa bhetu a Yesu Kilishitu, Bhakulungwa bha ukonjelo nnakolanje luagu ku bhandu. **2** Monaga mundu ajinjilaga nnyumba ja kwaajujila a Nnungu, ali awete lupete lwa shaabhu na ngubho ya konja na kabhili ajinjilaga mundu nkulaga awete manyangui, **3** ibhaga mumposhelangaga ukoto awete ngubho ya konja nninkutinji, "Mmwe kuntame pa mmbone pano," na nkulaga jula nikummalanjila, "Ugwe ukajime apala" eu, "Kuumete pai tome na makongono gangu," **4** bhuli, lwenelo nngabha luagu, na kwa gwene utendego, ng'aniyo yenunji nngabha impelenje kutenda ukumu jangali ja mmbone? **5** Bhaakulupalilanga ajangunji bhungumpinganga, mpilikananje! Bhuli, a Nnungu bhangaagulanga bhaalaga bha pa shilambolyo pano bhakolanje shipato shikulungwa nngulupai, na bhaposhelanje upalume gwa a Nnungu gubhaalajilenje bhakwaapinganga? **6** Ikabheje mmanganyanji nnakwanyegayanga bhaalaga! Bhuli matajili bhakakumonelanga nikumpelekanga ku bhaukumula? **7** Bhuli nngabha bhobho pebho bhakulitukananga lina lya mmbone lya a Yesu Kilishitu limpegwilwenje? **8** Nkamulilangaga shalia ja upalume gwa a Nnungu malinga shijibhoneka Mmajandiko ga ukonjelo kuti, "Mumpinje ntami nnjenu malinga shinkwiipinga mmayene," shintendanje ya mmbone. **9** Ikabheje ntendangaga luagu mmumanyanje kuti nnatendanga shambi, na shalia jinakunn'ukumulanga kuti nshilebhanga. **10** Pabha mundu jojowe akamulila shalia yowe, aleggaga jimo, bhai penepo alebhile kwa yowe. **11** Pabha bhene bhaguwile kuti, "Nnalabelabhe," ni bhobho pebho bhaguwile kuti, "Nnabhulaje." Kwa nneyo nkali nkalabelabhe, ikabhe nshibhulaga, penepo nnebhile shalia. **12** Bhai, mmeleketanje na tenda malinga bhandu bhapinga ukumulwanga na shalia jikwaapanganga bhandu ungwana. **13** Pabha ukumu ja a Nnungu jikakumonela shiya mundu jwangali shiya kuka mwine. Ikabheje shiya sha a Nnungu shinapunda ukumu. **14** Bhaakulupalila ajangunji, ipwaa nndi mundu abheleketaga kuti akwete ngulupai, ikabheje gwangali kwaakunda a Nnungu? Bhai jene ngulupaijo shiikkombole kuntapula? **15** Ibhaga nnongo nnjenu jwangali ngubho eu shalya, **16** shiipwae nndi mundu jwa munkumbi gwenunji annugulilaga kuti, "Jenda kwa ulele, ukajote moto na jukuta," gwangali kumpa indu yatubhilwe, shiipwae nndi? **17** Nneyo peyo na ngulupai gwangali kwaakunda a Nnungu, jiwile. **18** Ikabheje mundu juna shaabhelekete, "Mmwe nkewete ngulupai na nne ngwete itendi!" Ayaga, nnanguye ngulupai yenu gwangali itendi, na nne shininnanguye ngulupai yangu kwa itendi. **19** Mmwe nnikulupalila kuti a Nnungu ni bhamo, bhai ni sha mmbone! Ikabheje nkali mashetani galikulupalila na ungunila na

jogopa. 20 Mmwe mmajinga, nnapinga nnangulwe kuti, ngulupai gwangali itendi jiwile? 21 Bhuli, atati a Bhulaimu bhangashemwa bhakwete aki kwa shitendi shabho, pene pubhanshoshiye mwana gwabho Ishaka pa shitala pala? 22 Nnilola, kuti ngulupai jishinkutenda liengo pamo na shitendi shabho, na ngulupai jila gujitimilile kwa itendi ila. 23 Kwa nneyo gugatimilile Majandiko ga kuti, “A Bhulaimu bhashinkwaakulupalila a Nnungu, na ngulupai yabho guyaatendile kukola aki, kwa nneyo gubhashemilwe ambwiga ajabho a Nnungu.” 24 Bhai nnilolanga kuti mundu anapegwa aki, kwa ligongo lya itendi yakwe na nngabha kwa ngulupaipa. 25 Nneyo peyo puyaliji kwa a Laabhu lijajana bhala, bhuli bhangapegwa aki kwa shitendi shabho, pene pubhaaposhelenje bhaanushishiya niikwaatolosheyanga kwa mpanda guna? 26 Kwa nneyo malinga shiilu gwangali mbumu shiwile, nneyo peyo na ngulupai gwangali itendi jiwile.

3 Bhaakulupalilanga ajangunji, nnabhanganje bhaajiganya bhahagwinji. Nnikumumanyanga kuti uwe tuli bhaajiganya ukumu jetu shijibhe jikulungwa kupunda bhananji. 2 Pabha uwe tubhowe tunaakubhala nng'indu yaigwinji. Ibhaga apali mundu akaakubhala nkubheleketa, jwenejo atimilile na alikombola kwiilongoya. 3 Nnolanje putukuntabha migoji ja kunngongoya palashi, nkupinga akunde putukuntendebhuya aloye kutupinga. 4 Na nnolanje ntumbwi nkali ubhe gwankulungwa, ikabheje unatendebhuya na ushukani nshokope, niloya kokowe kwaapinga nkulungoya, nkali jipuje mbungo jikulungwa. 5 Nneyo peyo nkali lulimi shibhalo shishoko sha nshiilu, ikabheje lunakwiipuna kwa kaje. Nnolanje moto nshokope unakombola kutiniya nng'itu gwankulungwa. 6 Na lulimi ni mbuti moto. Lushigumbala ilebho munkumbi gwa ibhalo yowe ya shiilu, na yeneyo ni inyatiya shiilu showe. Lulimi lunakoleya moto gwangali mpelo gwa ku Jeanamu. (Geenna g1067) 7 Pabha mundu anakombola kulanga bhannyama bhowe, na ijuni na bhannyama bhaatambalanga na yamaki. 8 Ikabheje jwakwa mundu akombola kululanga lulimi. Lulimi lwa ilebho lukaatondobha, lushigumbala ushungu gwa bhalaga. 9 Kwa lulimi lwetu tunakwaaniya Bhakulungwa na Atati a Nnungu, na kwa lulimi pelo tunakwaaloshanga bhandunji, bhapengenywenje kwa landana na bhayene a Nnungu. 10 Lulimi pelo lunajujila mboka na lunalosh. Bhaakulupalila ajangunji yeneyo inalimbiywa. 11 Bhuli shinjeshwe shimo shinakombola kukopoya mashi ga ima na mashi ga lalama? 12 Bhaakulupalila ajangunji, bhuli nkongo gwa ntini unakombola kuogoya iyepo ya shaituni, eu nshabhibhu kuogoya tini? Bhai ni nneyo peyo shinjeshwe shimo ngakombola kukopoya mashi ga lalama na mashi ga ima. 13 Gani munkumbi gwenunji akwete lunda na lumanyo? Bhai alanguye liengo lyakwe kwa itendi ya mmbone nkwiitimalika kwa lunda. 14 Ikabheje monaga mmitima jenunji igumbele ya ikidi na shojo, bhai nnailumbililanje akuno nnibheleketa unami. 15 Lunda lwa nneyo lukaakoposhela kunnungu, ikabhe lwa shibheleke na lwa ikubho ya bhandunji na ya mashetani. 16 Pabha popowe pakwete ikidi na shojo ni pali na mipwilingano na kila itendi ya nyata. 17 Ikabheje lunda lukopoka kunani kunnungu, ni lwa mmbone numbe ni lwa ulele, na lwa kwitimalika na lwa kwapilikanishiyanga bhandunji, ni lugumbele shiya na

lulongoya bhandu ku itendi ya mmbone na ya uguja lwangali luagu na wala ugulumba. 18 Aki ni iyepo ya mmebeju ipandilwe kwa ulele na bhandu bhapinganga ulele.

4 Ngondo na mipwai munkumbi gwenunji kujikoposhela kwei? Twajilaga muilokoli yenunji ikumbuya ngondo nkati jenunji. 2 Nnapinganga indu inkanakolanga, kwa nneyo nnatumbililanga kubhulaga nnilokolilanga kuipata yene induyo, ikabhe nkakwiipatanga. Nnapwatanga na komana nkupinga mwapakonyolanje yene induyo. Nkapatanga shindu shinkupinganga pabha nkaajuganga shenesho kwa a Nnungu. 3 Numbe nkali nnjugangaga nkaapatanga, pabha nnajuganga kwa ndumbililo ya nyata nkupinga nkamilishanje ilokoli yenunji ya nyata. 4 Mmanganyanji nkakulupalikanga, bhuli nkakumumanyanga kuti kupanga mbwiga na shilambolyo ni kubhika umagongo na a Nnungu? Bhai jojowe apanga mbwiga na shilambolyo anakwiibhika kubha mmagongo jwa a Nnungu. 5 Eu punkuganishiyanga kuti Majandiko ga Mmbone ganabheleketa unami pugataya kuti, “Mbumu jwa Mmbone jubhammishile a Nnungu atama nkati jetu anakutulokolila kwa kutubhonela lupimililo lwa kaje. 6 Ikabheje anakutupa mboka ja kaje, malinga Majandiko shigalugula kuti, a Nnungu bhakakwaapinganga bhakwaataukanga na bhakwiikuyanga ikabheje bhakwiitimalikanga bhanakwaapinganga mboka.” 7 Bhai mwaakundanje a Nnungu, munkananje Lishetani penepo shammutukanje. 8 Mwaabhandishilanje a Nnungu na bhalabho shibhammandishilanje mmanganyanji. Nnabhanje makono genunji mmanganyanji nnebhilenje na ntipitayanje mitima jenunji nkwenenje ng'aniyo ibhili ya pinga kukamula kwa pamo. 9 Nng'inginikanje nkwiipeta kwa ililo na nguto. Kueka kwenunji kutendebhushe nibha kuguta, na kwinyela kwenunji nibha kuinjika. 10 Mwiitimalikanje ku Bhakulungwa, penepo shibhankuyanje. 11 Bhaakulupalila ajangunji, nnabheleketa nanje, akummeleketa nnjakwe eu kunn'ukumula, penepo anakujibheleketa na kujiukumula shalia. Kwa nneyo ujukumulaga shalia, bhai penepo ni ukakujikunda, ikabhe unabha mundu nkuukumula. 12 A Nnungu jikape nibhabhishile shalia, na bhaukumula ni bhobho pebho jikape, bhaakombola kutapula na kutitimiya. Bhai ugwe gani ukunn'ukumula mundu nnjako? 13 Bhai, mpiliikanilanje mmanganyanji nkulugulanga kuti, “Lelo eu malabhi shitujende ashila shilambo shila tukatame shaka tukatende upindi nkupinga tupate mbwaiko.” 14 Ikabheje ukakugamanya gapinga koposhela malabhi. Kulama kuli kwei? Pabha mmanganyanji malinga ndambwepe, jiihboneka malanga gashokope, kungai jilitandanuka. 15 Punkupinikwanga mmeleketa nje kuti, “A Nnungu bhapinganga shitulame, nitenda ashino na shishila.” 16 Ikabheje nnaino nnakwiiniyanga na kwiipuna, kwiiniya na kwiipuna kwa nneyo, kwangali kwa mmbone. 17 Bhai mundu akakushikamula shindu sha mmbone akuno alikushimanya, penepo kuka jwenejo analabha.

5 Bhai, nnaino mmanganyanji matajili nngutanje shililo kwa ligongo lya shilaje sha ogoya shipinga kunnjiilanga. 2 Utajili gwenunji ubholile na nngubho yenunji iligwilwe na mang'ong'ota. 3 Shaabhu na ela yenunji ibhishile nkubha, na gwene nkubhago,

shigunkong'ondelanje na shiguntaunanje iilu yenunji mbuti moto. Agano mobha ga kumpelo na mmanganyanji launo nnapunjilangape indu. 4 Nnolanje bhandunji bhakumulangaga maengo mmigunda jenunji bhunkanakwaalipanga, ililo ya bhaunanga inapilikanika, numbe yaishile Bhakulungwa a Nnungu. 5 Mobha gowe nshitamangana pa shilambolyo nkupoka na indu ya nong'a, nikwijimbaya kwiibhika ukoto kwa lyubha lya ingwa. 6 Nshikwaukumulanga na kwaabhulaganga bhandunji bhangani ilebho, na wala bhakakombolanga kupwata na mmanganyanji. 7 Kwa nneyo bhaakulupalila ajangunji, mwiikakatimilanje mpaka pushibhaishe Bhakulungwa. Nnolanje mundu nkulima pa lindilila yalimile itendeshe, anakwikakatimila mpaka pushijiishe ula ja nduluko na janula. 8 Nneyo peyo na nkali mmanganyanji nnapinjikwanga kutama nnikwiikakatimilanga na nnikwiishimilikanga na kwiiluma mitima jenunji, pabha Bhakulungwa bhabhandishile kuika. 9 Bhaakulupalila ajangunji nnainginishilane, nnaukumulwanga na a Nnungu. Nnolanje bhaukumula bhali tome na ika. 10 Bhaakulupalila ajangunji, mpingangaga kumumanya namna ja kwiipililila na mboteko, nkumbushilanje shibhaashite tendanga ashinkulondola bha a Nnungu bhalunguyenje kwa lina lya Bhakulungwa. 11 Tunabheleketa kuti, mbaya bhene bhaipilililanje bhala pabha bhapatilanje mboka. Mpilikenenje ga kwiipililila kwa a Ayubhu, na nshimanyinji shibhatendelwe na Bhakulungwa a Nnungu kumpelo, pabha bhashikola shiya sha kaje na uguja. 12 Kupunda gowego, bhaakulupalila ajangunji nnalumbilanje kwa a Nnungu eu kwa litaka, wala kwa shindu shina shoshowe. Ikabheje njangulanje, "Elo" monaga shindusho sha jangula elo, na "Nng'oope" monaga shindusho sha jangula ng'oope. Penepo nkaukumulwanga na a Nnungu. 13 Bhuli, mundu njenunji mwali nshilaje? Bhai ajuje Nnungu. Bhuli, anaangalala? Bhai ajimbe nyimbo ya lumbilila. 14 Bhuli, mundu munkumbi gwenunji nnwele? Bhai penepo mwaashemanje bhanangulungwa bha likanisha, bhannjijilanje na kumpaka mauta kwa lina lya Bhakulungwa. 15 Kwa nneyo ibhaga kujuga kwabhonji kwa a Nnungu ni kwa ngulupai shikunnamiye nnwele jula, numbe Bhakulungwa shibhannjinule, na monaga akwete ilebho, shibhanneshelule. 16 Bhai nkolangaga ilebho nng'ungamilenanje mwashayenenji na nnjijilananje nkupinga namiywanje. Malomboshelo gaka mundu akwete aki gashikola mashili ga kaje numbe ganapwaa kwa kaje. 17 A Eliya pubhaaliji bhandu malinga uwe, gubhaajujile a Nnungu kwa tumbila kuti ula jinanye, gujilleshile kunya kwa yaka itatu na miei shita. 18 Gubhaajujile a Nnungu kabhili, ula gujinyele kukoposhela kunnungu, litaka gulimeshiye mitipo jakwe. 19 Bhaakulupalila ajangunji, monaga mundu munkumbi gwenunji aobhiywaga na itendi yangali ya mmbone, na juna annjendelaga nikutendebhushiya kuitendi ya mmbone kabhili, 20 mmumanyanje kuti jwene anshoshiye njakwe kumpanda gwa obha, shantapule nshiwo jwene mundu aobhile, na yambi yaigwinji shiileshelulewe.

1 Petili

1 Nne a Petili, ntume jwa a Yesu Kilishitu, ngunakunnjandishilanga mmanganya nng'agulwenje na Atati a Nnungu, bhajeninja nshilambolyo mmutushilenje ku nkoa gwa ku Ponto na ku nkoa gwa ku Galatia na ku Kapadokia na ku Ashia na ku Bhishinia. **2** Atati a Nnungu bhashinkutumbilila kunnng'agulanga mmanganya kuumila bhukalago na mwashinkutakaywanga nagwe Mbumu, kupinga mwaakundanje a Yesu Kilishitu na nkonjeleywanje na minyai jabho. Ngunakunnjijilanga nrijeshewanje mboka na ulele. **3** Bhalumbililwe a Nnungu Atati bha Bhakulungwa bhetu a Yesu Kilishitu! Kwa shiya shabho shikulungwa bhashikututenda tupate gumi gwa ambi kwa kwaayuya a Yesu Kilishitu kukopoka bhakaweje. Bhatupele ngulupai ya kweli, **4** kwa nneyo tunalindilila ulishi gubhaabhishilenje a Nnungu bhandunji bhabho. A Nnungu bhashikumishilanga gwene ulishigo kunnungu na kweneko ukabhola, ukaangabhanika na wala ukajumula. **5** Yeneyo shiibhe yenuji mmanganya kwa ngulupai nnatamangana muulinda gwa mashili ga a Nnungu mpaka muupatanje ntapulo upinga langulwa kumpelo gwa yaka. **6** Nng'angalalanje kwa genego, ikabheje kwa malanga gashoko ga nnaino gano, nkaangalala ukoto kwa ligongo lya mboteko ya malinjilo gamagwinji, **7** malinjilo nkupinga nkong'ondelanje ngulupai yenuji. Shaabhu nkali jiangabhanikayo jinalingwa pa moto, na malinga ngulupai jenuji jili ja mana kupunda shaabhu, jinapinjikwa jilingwe jimanyishe gwa mmbone gwakwe. Penepo shinnumbililwanje na kuywa na ishimika lyubha lishibhabhoneshe a Yesu Kilishitu. **8** Nkali nkanabhe kwabhonangayo, mmanganyanji nnakwaakulupalilanga nkali nnakwaabhonanga nnainoyo. Kwa nneyo nnakwiinonyelenga kwa kaje numbe kwangatendeka kutalashiywa, **9** pabha nnapatanga ntapulo gwa mitima jenuji na shitumbililwe ngulupai jenuji. **10** Ashinkulondola bha a Nnungu bhashinkuleleyanga na kaguliila ga gwene ntapulogo, gubhalondolenje ga mboka jipinga kunnng'ishilanga mmanganya. **11** Gubhalinjilenje kuloleya malanga na miongwe gugapinga koposhela genego. Yani malanga galugwile Mbumu jwa a Kilishitu aliji nkati jabhonji, alilondola ga mboteko ipinga kwaapata a Kilishitu na ukonjelo upinga kagula gapitaga genego. **12** A Nnungu bhashikwaunukulilanga bhamumanyanje kuti pubhabheleketangaga gene gumpilikenenje mmanganya kukopoka kwa ashintame. Bhene bhannungushiyenje Ngani ja Mmbone kwa mashili gaka Mbumu jwa Ukonjelo atumilwe kukopoka kunnungu. Lyene liengolyo likaliji kwa ligongo lyabhonji ashaayene, ikabhe kwa ligongo lyenu mmanganya. Genego nkali ashimalaika bha a Nnungu bhatendaga pinganga bhagabhonanje. **13** Kwa nneyo, bhai, mwishimilikanje na nsheyanje. Nnolelanje nema jinkupinga poshelanga pushibhaishe a Yesu Kilishitu. **14** Nkundanje ga a Nnungu, nnakaguyanje kutenda yangali ya mmbone imwatendanga bhakala pumwalinginji mabheli. **15** Ikabhe malinga bhayene bhanshemilenje shibhali bha ukonjelo, nnapinjikwanga mmanganje mma ukonjelo. **16** Pabha ishijandikwa, "Mmanganje

mma ukonjelo, pabha nne najwa ukonjelo." **17** Na ibhaga a Nnungu bhunkwashemanga Atati, bhai mmumanyanje kuti bhenebho bhanaukumula bhandu bhowe kwa itendi yabhonji, gwangali kuagulanya. Kwa nneyo ntamangane kwa lipamba lya kwaajogopa a Nnungu kwa mobha genunjiga tama mbuti bhajeninja pa shilambolyo pano. **18** Na mmanganya mmumanyinji kuti nshigombolwanga kukopoka ku gwangali gwa mmbone gwenunji gumwauposhelenje kukopoka kwa ashainabhenunji. Numbe mmangagombolwanga kwa indu iangabhanika, ela na shaabhu, **19** ikabhe kwa minyai ja mmbone ja a Kilishitu, bhaaliji malinga mwana ngondolo jwa mmbone na jwangali ilebho. **20** Bhenebho bhashinkuagulwa na a Nnungu kutandubhila bhukala, shilambolyo shikanabhe panganywa, ikabheje kuyaka ya kumpelo ino gubhalangwilwe kwa ligongo lyenu mmanganyanji. **21** Kwa ligongo lya bhenebho, nnakwakulupalilanga a Nnungu bhaayushiye bhenebho bhakaweje nikwaapa ukonjelo. Kwa nneyo ngulupai yenuji ibhe kwa a Nnungu. **22** Pabha nnaino, nshikundanga majiganyo ga kweli ga a Yesu Kilishitu, mmanganya mwiikonjeleyenje mmitima jenuji na kwaapinganga bhandu ajenuji gwangali ya kwilambilila, bhai, mpingananje mpaka mmitima. **23** Pabha nshibhelekwanga gwabhili, nngabha kwa mbeju yawa, ikabhe kwa mbeju yangawa, kwa lilobhe lya a Nnungu likwete gumi, litama pitipiti. (aiññ g165) **24** Na malinga Majandiko shigakuti bheleketi. "Bhandunji bhowe malinga manyai, na ukonjelo gwakwe gowe na malinga lilubha lya manyai. Manyai ganajumula na malubha ganapakatika. **25** Ikabheje lilobhe lya Bhakulungwa linatama pitipiti." Na lyene lilobhelo ni Ngani Ja Mmbone jilungwiye kwenu mmanganyanji. (aiññ g165)

2 Bhai, nnekanje yowe yangali ya mmbone na ya unami na ya ugulumba na ya lupimililo na malobhe ga lambilila ganapagwe kabhili. **2** Malinga ashinambombe shibhakugapinganga mabhele, nneila peila mmanganya nngapinganje mabhele ga mmbone ga ukonjelo gwa a Nnungu, kupinga nkulanje ukoto muntapulo gwa a Nnungu. **3** Malinga shigabheleketi Majandiko ga Mmbone. "Nninganje nnolanje kuti Bhakulungwa ni bhanguja." **4** Bhai, mwaajendelanje Bhakulungwa! Bhenebho ni liganga likwete gumi likanilwe na bhandunji, ikabheje kwa a Nnungu ni liganga lya galama kaje liagwilwe. **5** Numbe mmanganya, malinga maganga gwakwete gumi, nshishengwanga mmanganje nyumba jika Mbumu na mmanganje mmabhisilanga bha a Nnungu bhakwetenje ukonjelo na mmishilanje mbepei ipingwa na a Nnungu, kwa ligongo lya a Yesu Kilishitu. **6** Pabha ishijandikwa Mmajandiko Gammbone. "Nnole, ngunaabhika liganga ku Shayuni, liganga likulu lya pa ndumba, liagwilwe lya galama. Na mundu ashaabhakulupalile akaigamba." **7** Kwenu mmanganya nkukulupalilanga, lyene ligangalyo ni lya galama, ikabheje kwa bhene bhakangulupalilanga bhala, "Liganga libhakanilenje bhaashenga, nnaino ni liganga likulu lya pa ndumba." **8** Na kabhili kuti. "Lyenelyo ni liganga lya kwiikubhala, liganga likulu lya gwiya bhandu." Bhandunji bhanakwiikubhalanga kwa ligongo lyangakulupalila lilobhe lila na bhene bhanganjabho bhashibhikwanga bhagapatanje genego. **9** Ikabheje mmanganya lubheleko luagwilwe, ashinkulondola bha a mpalume, bhandunji bha ukonjelo, bhandu

bhaka bhayene a Nnangu, nshiangulwanga nnunguyanje itendi yaikulungwa ya a Nnangu bhanshemilenje kukopoka ku lubhundu, nikunjinjiyanga nshilangaya shabho sha lapa bhandu. 10 Bhukala mmanganya nkalinginjiji mmandunji, Ikabheje nnaino ni bhandunji bha a Nnangu. Bhukala nkabhonelwangaga shiya. Ikabheje nnaino nnabhonelwanga shiya na a Nnangu. 11 Ashaambwiga ajangu, mmanganya nninginji malinga bhapita mpanda na bhalinginji mmwanja pa shilambolyo pano, ngunakunneyanga nnekanje ilokoli yangali ya mmbone ya nshilu ikapinjikwa na ntima. 12 Ntamangane ukoto na bhandunji bhakwaamanyanga a Nnangu, nkupinga bhannambillilangaga kuti nkutendanga yangali ya mmbone, bhaibhonangaga itendi yenunji ya mmbone, bhaakuyanje a Nnangu lyubha lya ukumu. 13 Nkundanje yowe ilajilwa na bhandu, kwa ligongo lya Bhakulungwa, ibhaga a mpalume ni bhakwete ukulungwa, 14 ibhaga bhakulungwanji bha ilambo, ibhaga bhaagulwenje na bhenebho kupinga kwaapanyangulanga bhatendanga yangali ya mmbone na kwapanganga iukilo bhatendanga ya mmbone. 15 Pabha a Nnangu bhanapinga mpeyanje malobhe ga shibhelo ga bhandunji bhalinginji lunda kwa itendi yenunji ya mmbone inkutendangayo. 16 Nnatamangane malinga bhangwana, ikabhe kwiitagwala kwenunji kunabhe kwa ishiya yangali ya mmbone, ikabhe ntamangane mbuti bhatumwa bha a Nnangu. 17 Mwaishimiyanje bhandu bhowe, mwaapinganje bhakilishitu ajenunji, mwajogopanje a Nnangu na mwaishimiyanje a mpalume. 18 Mmanganya bhatumwa, nkundanje inkubhalanjilwanga na bhakulungwa bhenunji kwa lipamba lya kaje, nngabha bhalinginji bha kwiitimalikangape ikabhe nkali bha nngomo. 19 Pabha gwenege ni uguja gwa kaje, mundu kwiipililila mboteko gwangali sha lebhile, kwa ligongo lya kwaishimiya a Nnangu shimpatanje mboka. 20 Pabha, shimpatanje upo yashi kwa kwiipililila kukomwa ga ilebho yenunji? Ikabheje mwiipilililangaga mboteko akuno nnitendanga ya mmbone, a Nnangu bhananyelwa kwa genego. 21 Genego ni gunshemelwenje, pabha a Kilishitu bhayene bhashinkupotekwa kwa ligongo lyenu mmanganyanji, nikunneshelanga nnandanyo, nkaguyanje ibhatendile bhanebho 22 Bhanebho bhangalebha, wala ilobhe lya unami lyangapilikanika nkang'wa jabho. 23 Pubhatukanwaga bhangagalabhula, pubhapotekwaga bhanebho bhangakalipa, ikabhe bhashinkwaaleshela a Nnangu, bha ukumula kwa aki. 24 Bhenebho bhayene bhashinkwiijigala yambi yetu nshilu shabho panani nshalabha, nkupinga kwa itendi ya yambi, tubhoneshe mbuti tuwile, na kwa itendi aki tukole gumi, bhai tulame kwa ligongo lya itendi ya aki. Na kwa komwa kwabho mmanganya nnamiywenje. 25 Mmanganya pumwalinginji mbuti ngondolo iobhile, ikabheje nnaino mmujengene ku Bhashunga, Bhaulinda bha mitima jenunji.

3 Na mmanganya mmandonyanji nnombilwenje, nkundanje inkubhalanjilwanga na ashimbujje bhenunji, nkupinga ibhaga bhapalinji bhanabhalume bhakaakulupalilanga ga ilobhe lya a Nnangu, bhai bhaibhonangaga itendi yenunji ya mmbone bhakulupalilanga. Wala gwangali kubheleketi ilobhe, 2 pabha shibhaibhonanje itendi yenunji ya mmbone na ya kwaajogopa a Nnangu. 3 Kwiikelengelela kwenunji kunabhe kwa indu ya

bhoneka palangape na kuwaila indu ya shaabhu na nngubho ya konja. 4 Ikabheje, kukonja kwenunji pukupinjikwa kubhe kwa gundu gwenunji gwa muntima, gwa indu yangaangabhanika, yani, ntima gwa uguja na kwiitimalika pabha genego ni gapinjikwa na a Nnangu. 5 Nneyo ni shibhaikelengelelangaga bhanabhakongwe bha bhukala bhalinginji bha ukonjelo na bha kwaakulupalilanga a Nnangu na kunda ibhabhalanjilwanga na ashimbujje bhahonji. 6 Malinga a Shala bhatendaga kunda ibhabhalanjilwaga na a Bhulaimu nikwaashema bhenebho bhakulungwa bhabho. Numbe mmanganya shimmanganje ashibhana bhahho ntendanga ga mmbone gwangali kola lipamba lya shindu shoshowe. 7 Numbe mmashileunji nnombilenje, nkolanje lunda punkutamangana na ashaakongobhenunji, nnapinjikwanga mwaateteleshayanje malinga iumbe yangali mashili, pabha mpinga poshelanga mboka ya gumi pamo, nkupinga kujuga Nnangu kwenunji kunaibhiliwe. 8 Kungai nguti, nnapinjikwanga nkolanje ntima gumo na ng'aniyo imo na mpingane shiulongo na mwiitimalikanje 9 Nnagalabhulanje yangali ya mmbone kwa yangali ya mmbone ku bhandu, eu kugalabhula matukano kwa matukano, ikabheje bhakuntendelanga yangali ya mmbone mwaajujilanje mboka, pabha mmanganya nshishemelwanga mboka na a Nnangu. 10 Malinga shigalugula Majandiko, "Apinga kuangalila kulama, na kugabhona mobha ga mboka, aibhiliile lulimi lwakwe lunabheleketi yangali ya mmbone, na kang'wa jakwe jinabheleketi ya unami. 11 Aleshe yangali ya mmbone, atende ya mmbone, auloleye ulele na aukagulile kwa kaje. 12 Pabha meyo ga Bhakulungwa ganakwaloleyanga bhakwetenje aki, na makutu gabho ganapilikanishiya kujuga kwabhonji. Ikabheje bhaatendanga yangali ya mmbone bhakakubhonanga kumeyo kwa Bhakulungwa." 13 Gani shampotekanje ntumbilangaga kutenda ya uguja? 14 Ikabheje, nkali mpotekwangaga kwa ligongo lya tenda ya aki, bhai mbaya. Nnannjogopanje mundu jojowe, wala nnakolanje lipamba. 15 Ikabheje mwaishimiyanje Kilishitu mmitima jenunji. Mmanganje tayali kunjangula mundu jojowe shammuyanje ga ngulupai jili mmitima jenunji. 16 Mwiibhikanje ng'aniyo yenunji ya muntima ibhe ya mmbone, nkupinga bhakummelekatanga ya kunnambillilanga bhakolanje oni pubhakwiibhonanga itendi yenunji ya mmbone ya Shikilishitu. 17 Pabha, mbaya kupotekwa kwa ligongo lya tenda ya uguja, monaga a Nnangu bhapinjile, nngabha kupotekwa kwa ligongo lya tenda yangali ya mmbone. 18 Pabha a Kilishitu bhayene bhapotekwe kamope, kwa ligongo lya bhandunji bhalebhilenje, mundu akwete aki kwa ligongo lya bhandunji bhalinginji aki, kupinga bhampelekanje mmanganya kwa a Nnangu. Shiilu shabho gushibhulegwe, ikabheje kwa mashili gaka Mbumu, gubhapatile gumi kabhili, 19 na kwa gwene gumigo nigubhapite kukwaaalungushiyanje ashimbumu bhatabhilwenje bhala. 20 Bhene bhanganjabho ni bhakanilenje kwaakunda a Nnangu, pubhaipililile kwaalindililanga a Nuu mobha gubhaalayaga shapina. Bhandunji bhashokope, yani bhandunji nane, gubhatapulwenje kuwa na mashi. 21 Gene mashigo pugaliji malinga ubhatisho, ukuntapulanga mmanganya agano mobha gano. Ubhatisho nngabha ushoya ya nyata nshilu, ikabhe malagano kwa a Nnangu ga tumbilila kutenda ya uguja. Unakuntapulanga kwa yuka kwabho a Yesu Kilishitu, 22

nnaino a Yesu bhapite kunnungu na bhatemi kunkono nnilo gwa a Nnungu, bhanatagwala ashimalaika bha a Nnungu na ukulungwa gowe.

4 Pabha, a Kilishitu bhashinkupotekwa nshiilu, na mmanganya nneila peila nnapinjikwanga mwiishimilikanje na tumbilila kutenda nneyo peyo, pabha mundu apotekwaga nshiilu, aleshile yambi. **2** Bhai, kutandubhila nnaino kwa mobha gannepeshelenje kutama pa shilambolyo pano, nnapinjikwanga ntamangananje malinga shibhapinga a Nnungu, nnatamangane kwa kagulila ilokoli yenuji ya nshiilu. **3** Mobha gapitilego, mwashinkwiibhukanga kaje nkutenda ibhatendangaga bhandunji bhakakwamanyanga a Nnungu, mwayobhelelenje kutenda ya labhalabha, na ilokoli yangali ya mmbone, na ya kolelwa, na ya yoloka, na kutindibhalila yanamu, na nngoma ya mashetani, yoweyo ni ikwaashima a Nnungu. **4** Nnaino bhandunji bhakakwaamanyanga a Nnungu bhala bhanakunganganigwanga, pubhakummonanga nkalongana nabhonji kabhili mwiitendi yabhonji yangali ya mmbone. Bhai, nikuntukanangaga. **5** Ikabheje shibhapingikwanje kotalashiya ga ndamo yabhonji kwa a Nnungu bhali tayali kwa ukumula bhahhakotonji na bhawilenje! **6** Kwa lyene ligongolyo nkali bhawilenje bhashilungushiya Ngani ja Mmbone, nkupinga bhaukumulwanje nshiilu, malinga shibhaukumulwanga bhananji, ikabhe bhakolanje gumi mbumu, malinga a Nnungu shibhali na gumi. **7** Ikabheje mpelo gwa indu yowe ubhandishile. Kwa nneyo nnapinjikwanga nkolanje lunda na kwiiluma na sheya, nkujuga Nnungu. **8** Nakupunda genego mpingane kwa kaje, pabha kupingana kunaunishila gwinji gwa ilebho. **9** Nnagushiyananje gwangali ya inginika. **10** Kila mundu atendele liengo shiloi shapegwilwe na a Nnungu nkwaajangutilanga bhananji malinga ntumishi jwa mmbone, jwa nema ja a Nnungu. **11** Mundu akwete shiloi sha bheleketeta, alunguye ntenga gwa a Nnungu, akamula maengo, akamule kwa mashili gapegwilwe na a Nnungu, nkupinga kwa gowe gatendeka bhakuywe a Nnungu, kwa ligongo lya a Yesu Kilishitu bhakwete ukonjelo na mashili pitipiti! Amina. (aiōn g165) **12** Ashaambwiga ajangunji, nnakanganganigwanje ga malinjilo ga mboteko gunkugapatanga, nnabhananje mbuti shindu shijeni kwenu mmanganya. **13** Ikabheje mwiinonyelanje pabha numbe mmanganya nnapotekwanga malinga a Kilishitu, nkupinga kumwinonyelanje mobha pushujiye bhoneka ukonjelo gwabho. **14** Monaga ntukanwangaga kwa ligongo lya lina lya a Yesu Kilishitu mbaya, pabha Mbumu jwa ukonjelo gwa a Nnungu, pali na mmanganya. **15** Anapagwe mundu jojowe munkumbi gwenunji apinjikwa kupotekwa kwa ligongo lyabha nkubhulaga, eu nngwii eu malinga mundu aloleya ngani ya bhandu ajakwe. **16** Ikabheje mundu apotekwaga kwa ligongo lyabha nkilishitu, bhai, anakole oni, ikabhe abhakuye a Nnungu pabha anashemwa kwa lina lya a Kilishitu. **17** Pabha mobha ga ukumu gaishe na ukumu kujitandubhila nnyumba ja a Nnungu. Na ibhaga ukumu jitandubhila kwetu uwe, bhai, mpelo gwa bhandunji bhakaakulupalilanga Ngani ja Mmbone ja a Nnungu shiubhe bhuli? **18** Malinga shigataya Majandiko ga ukonjelo, "Ibhaga ikomala kutapulwa mundu akwete aki, shiibhe bhuli kwa bhandunji bhakakwaajogopanga a Nnungu na bhakwetenje

ilebho?" **19** Bhai kwa nneyo, bhaapotekwanga kwa pinga kwabho bhayene a Nnungu, bhanapinjikwanga kwa itendi yabhonji ya mmbone, bhaikamuyanje kwa Ashipanganya bhaakulupalika.

5 Nne nili kalongolele njenunji jwa likanisha na nkukong'ondela jwa mboteko ya a Kilishitu nneila peila shingundikanywe muukonjelo upinga bhoneka kungaigo, ngunakunshondelesheyanga, **2** nnishunganje likundi lya a Nnungu limpegwilwenje, nnigoyanje nngabha kwa shishilishiywa, ikabhe kwa engwa malinga shibhapinga a Nnungu. Ntendanje lyene liengolyo nngabha kwa lubobho lwa ela ikabhe kwa ntima gwa kwaatumishila a Nnungu. **3** Nnaabhuyanje bhandunji bhumpegwilwenje kwaalongoyanga, ikabhe mmanganje nnandanyo gwa kaguywa nnikundimo. **4** Pushakoposhele Nshunga Nkulu shimpegwanje shilemba sha ukonjelo shangaangabhanyika. **5** Nneyo peyo numbe mmanganya mmangwendo nkundanje inkubhalanjilwanga na bhanangulungwa bha makanisha. Mmanganya mmowenji mwiitimalkanje nnijangutilananga, pabha Majandiko ga ukonjelo gakuti. "A Nnungu bhanakwaataukanga bhandunji bha kwiipuna, ikabheje bhanakwapanganga nema bhakwiitimalkanga." **6** Bhai, mwiitimalkanje mmakono ga Bhakulungwa a Nnungu, nkupinga bhannjinulanje pa malanga ga pwaa. **7** Mwaapeleshelanjje ngolobha yenuji yowe, pabha shibhampanganje inkuloleya. **8** Mwiteteleshayanje na nsheyanje! Pabha mmagongo njenunji Lishetani, anakonangona mbuti imba jitongola jililoleya jwa kunkamula. **9** Mwiishimilikanje ngulupai na munkananje, akuno nnikumumanyanga kuti ashaapwenuji nshilambolyo bhanapatanga mboteko yoyo. **10** Na a Nnungu bhakwete nema, bhanshemilenje kujinjila muukonjelo gwabho gwa pitipiti nkulundana na Kilishitu, mpotekwangaga kwa mobha gashoko, bhayene shibhann'galayanje, nikunshimilikanga na kumpanganga mashili. (aiōnios g166) **11** Bhenebho ni a Nnungu bhakwete mashili pitipiti! Amina. (aiōn g165) **12** Njikunnjandishilanga malobhe gashokope gano kwa jangutilwa na a Shilibhanushi, bhunaamanyi kuti bhakilishitu ajangu bha kulupalika. Ngunakuntaganga ntima kwa kunnkong'ondelanga kuti jejino kweli nema ja a Nnungu. Ntamangane ukoto na jene nema jino. **13** Bhandunji ajenuji bha a Nnungu bhalinginji ku Bhabhuloni kuno na a Maliko bhanakunnamushilanga. **14** Nnamushilananje kwa pingana Shikilishitu. Ngunakunnjililanga ulele mmowenji, nninginji bha a Kilishitu.

2 Petili

1 Nne a Shimoni Petili, ntumishi na ntume jwa a Yesu Kilishitu, ngunakunnjandishilanga mmanganya mpatilenje ngulupai jikulungwa malinga jitupatile uwepe jila, kwa aki ja a Nnungu bhetu na a Yesu Kilishitu bhaatapula. **2** Ngunakunnjilanga nema na ulele nkwaamanya a Nnungu na a Yesu Kilishitu Bhakulungwa bhetu. **3** Kwa kombola kwabho bhayene, a Nnungu bhashikutupa indu yowe itukwiipinga nkupinga tutame kwa kwaishimiya na kwaamanya kuti bhenebho ni bhatusemile kwa ukonjelo gwabho na uguja gwabho bhayene. **4** Kwa nneyo bhashikutupa indu ya mmbone malinga shibhalajile mmiadi jabho, nkupinga kwa yeneyo nkombolanje kwiikana ilokoli yangali ya mmbone ya indu ya pashilambolyo iangabhanya bhandu na tulandane na bhayene a Nnungu. **5** Kwa lyene ligongo lya ngulupai jenunji mpundanje kukola uguja na kwa gwene ugujago mpundanje kukola lumanyio. **6** Kwa lumanyio lwenunji, mwiilumanje na nkwiiluma kwenunji, mwiipilillanje na nkwiipililla kwenunji mwiitmalikanje na mwaishimiyanje a Nnungu, **7** nnonanganje nkwaajuganga a Nnungu, na nkwaajuganga a Nnungu kwenunjiko, mpingane shiulongo na mwapinganje bhandu bhowe. **8** Pabha mpundangaga kushulushilwa na yenei, nkakolanga ukata na shimmanganje bhandunji bha pwaa nkwaamanya Bhakulungwa bhetu a Yesu Kilishitu. **9** Pabha jwngali gene malangogo pali malinga nangalole eu akakwiibhona indu ya kwa taliya, na alibhalile kuti aleshelelwe yambi yakwe ya bhukala. **10** Bhai, kwa nneyo bhakilishitu ajangunji, nshemilwenje na a Nnungu ntumbilanje kukong'ondela kushemwa kwenunji kushemilwenje na a Nnungu kulonjeye nndamo jenunji, pabha ntendangaga nneyo nkaikubhalanga. **11** Kwa nneyo shintendelwanje mituka ja jinjila muukulungwa gwa pitipiti gwa Bhakulungwa bhetu na Bhaatapula bhetu a Yesu Kilishitu. (*aiōnios g166*) **12** Kwa nneyo mobha gowe shimbunde kunkumbushiyanga gegano, nkali nngamanyinjio na mwiishimilikanje kwa jene kweli jinnjiposhelenjejo. **13** Ngunabhona sha aki, ninjumyanje na nintaganje ntima na kunkumbushiyanga gegano mobha gowe niilitama pashilambo pano. **14** Numumanyi kuti kuwa kwangu kubhandishile, malinga Bhakulungwa bhetu a Yesu Kilishitu shibhashite nangula. **15** Bhai, shindumbile kunkumbushiyanga nkupinga nkali ng'waga nkumbushilanje gegano mobha gowe. **16** Pabha putwannugulilangaga kwa kwiya kwabho Bhakulungwa bhetu a Yesu Kilishitu, tukannugulilangaga ndango ya ugulumba. Ikabheje uwe twaashayene tushikuubhona kwa meyo getu ukulungwa gwabho. **17** Pabha bhashinkupegwa ishima na ukonjelo kukopoka kwa Atati a Nnungu, ilobhe pulyaishile kwa Ukonjelo Nkulu lilibheleketi, "Jweneju ni Mwanangu jungumpinga kwa kaje." **18** Na, uwe twaashayene twalipilikene lyene lilibhelo kukopoka kunnungu putwaaaji na bhenebho kuntundu shitumbi sha ukonjelo shila. **19** Na kabhili, ntenga gwa ashinkulondola bha a Nnungu unakong'ondela genego, na mmanganya nntendanga mwambone malinga shinkulolelanga mbuti shenje shikolela pa lubhinda mpaka kuika kwa a Yesu bhali shilangaya shetu. **20** Kupunda genego, gwakwapi ukulondola uli Mmajandiko ga

Ukonjelo ulondwele kwa mashili ga nkulondola nnyene. **21** Pabha gwakwapi ukulondola ukoposhela kwa pinga mundu, ikabhe bhandunji bhalondolanga bhanalongoywanga naka Mbumu jwa Ukonjelo.

2 Ikabheje munkumbi gwa Bhaishilaeli gubhakoposhelenje ashinkulondola bha unami, malinga shibhaapinga koposhelanga bhaajiganya bha unami munkumbi gwenunji. Kwa nng'yo bhene bhandunjibho shibhajiganyanje majiganyo ga puganya bhandu, akuno bhalikwaakananga Bhakulungwa a Yesu bhaagombwelenje na kwa gwene utendego shibhaimushilanje bhaiobhiyenje ashaayenenji. **2** Na bhandunji bhabhagwinji shibhakaguyanji itendi yabhonji ya nyata na kwa ligongo lya bhene bhanganjabho mpanda gwa kweli shiutukanwe. **3** Kwa ilokoli yabhonji yangali ya mmbone ya pinga indu, shibhapwaikanje kwenu mmanganya kwa kummalanjilanga malobhe ga unami. Ikabheje kuumila bhukala Nkuukumula jwabhonji aibhishile ukoto, na mboteko yabhonji ikakabha! **4** Na nkali ashimalaika bhatendilenje ilebho, a Nnungu bhangaabhonelanga shiya, ikabhe bhashinkwaaleshelanga nniimbo, nikwaatabhanga nnuhindu bhatamangane mwenemo mpaka lyubha lya ukumu. (*Tartarō g5020*) **5** Wala a Nnungu bhagashibhonela shiya shilambolyo sha bhukala, bhashinkupeleka nduluko nshilambolyo sha bhandu bhakaajogopangaga a Nnungu, ikabhe a Nuu bhalunguyaga ya aki, gubhaatapwile na bhandunji bhananji shabha. **6** A Nnungu kabhili gubhaiukumwile ilambo ya Shodoma na Gomola, nikwiitiniya na moto ibhe shilangulo sha gapinga kwaapatanga bhandunji bhakakwaajogopanga a Nnungu. **7** A Nnungu gubhaatapwile a Lutu, bhandu bhaakwete aki, bhainjikaga ga ikubho yangali ya mmbone yatendwaga na bhandunji. **8** Pabha mundu akwete aki amaga munkumbi gwabhonji jula, atendaga kwiibhona na pilikana itendi yabhonji yangali ya mmbone, kwa nneyo ntima gwakwe gwatendaga injika mobha gowe. **9** Bhai, Bhakulungwa bhamumanyi namuna ja kwaatapulanga bhandunji bhakwaajogopanga a Nnungu. Numb bhanakwaalindililanga bhandunji bhaatendanga yangali ya mmbone mpaka lyubha lya ukumu. **10** Bhene bhandunjibho bhanaakagulilanga ilokoli ya nyata ya nshiilu, na petekuya mashili ga ukulungwa gwa a Nnungu. Bhene bhaajiganyabho bhashikolanga mbwinya na kwipuna, bhakaajogopanga kwiitukana iumbe ya kunani ipegwilwe ukonjelo. **11** Ikabheje ashimalaika bhakwetenje mashili na kombola kupunda bhene bhaajiganya bha unamibho, bhakakwaashitakiyanga ku Bhakulungwa. **12** Bhene bhandunjibha bhananyegayanga indu ibhakakuumanyanga, mbuti bhannyama bhanginginjini lunda bhahbelekenje nkupinga bhakumulwanje na ingwa. Na bhalabhonji mbuti bhannyama shibhabhulagwanje. **13** Shihapatanje mboteko kwa ligongo lya ilebho ibhaatendelenje bhandu ajabhonji. Inakwaanonyelanga kutenda shoshowe shijipinga mitima jabhonji, nkali mui nakalanga. Bhene bhanganjabho bhanakuntokomayanga pubhakwianganyanga na mmanganya nkulya shalya sha pamo sha Bhakilishitu, akuno bhalinonyelwanga na ikubho yabhonji ya nyata. **14** Meyo gabhonji ganalokolila ya labhalabha na bhakaatogolelanga kulebha, bhalikwaatekeyanga bhandunji

bhakwetenje mitima ja shopoli. Na mitima jabhonji jjobhelele kulokolila indu ya bhandunji bhaloshilwenje na a Nnungu. 15 Bhashikuulekanga mpanda ugweshe, niobha, nikagula mpanda gwa a Bhalaamu bhanabhabho a Bheoli, yaanonyelaga kuposhela mmbiya kwa itendi ya lulunganya. 16 Ikabheje gubhakalipilwe ga ya nyata yabho. Na mbunda jwabho, nnyama akabheleketi, gwabheleketi mbuti mundu, gwapeshiye shalubha sha bhene ankulondolabho. 17 Bhene bhandunji bha paalinginji bhangali bha mmbone mbuti injweshwe ijumilile, na mbuti maunde gapepeluywa na mbungo, na lubhindu lwa totolo lushibhikwa kubha ndamo jabhonji. (questioned) 18 Kwa malobhe gabhonji ga nyata, na ga kwiipuna, na kwa ilokoli yabhonji yangali ya mmbone ya nshiilu bhanakwaatanjijanga bhandunji bhaiepuyenje kunnaino na nkumbi gwa bhandunji bhaatamangana muunami. 19 Bhalikwaalugulilanga bhandunji kuti shibhabhanganje bhangwana kwa leshelelwa yambi yabhonji, akuno ashaayene bhalinginji bhatumwa bha itendi ya nyata, pabha mundu anabha ntumwa jwa shoshowe shikuntagwala. 20 Pabha bhandunji bhaikombolelenje kwiibhutuka ya nyata ya pashilambolyo, kwa kwaamanyu Bhakulungwa bhetu na Bhaatapula a Yesu Kilishitu, bhatanjilangaga kabhili nibhujila ya nyata ila, mpelo gwa ndamo yabhonji unapunda kubha gwangali gwa mmbone kupunda kundandubho. 21 Bhene bhanganyabho mbaya bhakanaumanyanje gwene mpanda gwa akigo, nngabha kuumanyu nileka malajilo ga ukonjelo gubhaposhelenje gala. 22 Ikabheje kwa bhene bhanganyabho ishibha malinga shibheleketi, shilugula. "Mbwa anakugabhujila matapi gakwe," na shibheleketi shina shikuti, "Ngulubhe jwankundwe, anabhujila kugalabhuka kabhili mmatope!"

3 Ashaambwiga ajangunji, jejino bhaluwa jabhili ngunakunnjandishilanga mmanganya. Kwa bhaluwa inabhili njilinga kuiimuya ng'aniyo ya mmbone kwa kunkumbushiyanga gegano. 2 Kupinga nkumbushilanje gene malobhe gabheleketwe bhukala na ashinkulondola bha ukonjelo na malajilo ga Bhakulungwa gumpegwilenje kupitila kwa ashimitume bhenunji gala. 3 Ntandubhanje kumumanyu kuti mobha ga kumpelo shibhajiyangane bhandunji na mbetepete yabhonji, bhandunji bha petekuya, bhandunji bhakaguyanga ilokoli yabhonji yangali ya mmbone, 4 bhalinkutinji. "Pubhalajile kuti shibhaishe! Igala, bhali kwei? Pabha, kutandubhila pubhawilenje ashinakulu bhetu indu yowe pwiili nneila peila, malinga shiyapengenywe kundandubho!" 5 Bhashilibhalilanga meelepe kuti kwa lilobhepe, a Nnungu bhashinkupanganya kunnungu na shilambolyo kuumila bhukala kwa nneyo shilambolyo mushakoposhele mmashi na kwa masi. 6 Kwa masi pego shilambolyo sha bhukala shashinkutolwa na ndanje jikulu shikuobhaga. 7 Ikabheje kwa lilobhe lyolyo, kunnungu na shilambolyo sha nnaino, inagoywa nkupinga kwiitinywe moto. Inagoywa mpaka lyubha lya ukumu, na bhandunji bhakakwajogopanga a Nnungu shibhatitimiyanje. 8 Ikabheje ashaambwiga ajangunji, nnalibhalilanje shindu shimo! Kutu ku Bhakulungwa lyubha limo ni malinga yaka elupu, na yaka elupu ni malinga lyubha limo. 9 Bhakulungwa bhakakabha kutenda ibhalajile malinga bhandunji bhana shibhaganishiyanga kuti bhanakabhiya. Bhenebho bhanakwiiipilila kwa ligongo lyenunji,

pabha bhakaapinga mundu jojowe aobhe, ikabhe bhowe bhaipetanje. 10 Ikabheje lyubha lya Bhakulungwa shilishhe malinga nngwii. Lyene lyubhalyo kunnungu kupinga obha kwa nng'indo gwa nkulungwa, indu yowe ya tangu na tangu ipinga tiniywa na moto na angabhanywa na shilambolyo na indu yowe ili nkati jakwe ipingatinywa. 11 Indu yowe ipinga angabhanywa, bhai ibhaga nneyo, mmanganya punkupinjikwanga mmanganje bhandu bhashi? Nnapinjikwanga mmanganje bhandunji bha ukonjelo na kwaajogopa a Nnungu, 12 akuno nnikulilolanga lyubha lya a Nnungu na nnijuganga liishe shangu. Lyubha lya tiniywa kunnungu na moto na angabhanywa, na indu yakwe ya tangu na tangu ipinga tiniywa na moto. 13 Ikabheje uwe, kwa malagano gabho tunalindilila kunnungu kwa ambi na shilambolyo sha ambi, shigumbele aki. 14 Kwa nneyo ashaambwiga ajangunji, akuno nnikulilolanga lyene lyubhalyo, ntamangane ukoto kwa ulele na a Nnungu, nnakolanje ilebho wala sha gambwa. 15 Nnapinjikwanga nkubhonganje kwiipilila kwa Bhakulungwa kuti ntapulo gwetu, malinga apwetu a Pauli shibhashite kunnjandishilanga kwa lunda lubhapegwilwe na a Nnungu. 16 Genego ni gubhaakumbushiya mmalua yabho yowe. Mmalua yabhomo ipali indu ina ya ukumu kwiimanyu, indu ipuganywa na bhandunji bhangalinginji lunda na bhangaishimilikanga, malinga shibhapuganyanga malobhe gana ga Mmajandiko. Kwa nneyo bhanakwiiangabhanyanga ashaayeneni. 17 Bhai mmanganya ashaambwiga ajangunji, mwiimanyinji yenei. Mwiiteiganje nnapuganywanje na bhene bhatendanga yangali ya mmbonebho, nnaagwanganga nileka kuishimiliika kwenunji. 18 Ikabheje mpundanje kukula nnema na nkwaamanyu Bhakulungwa bhetu na Bhaatapula a Yesu Kilishitu. Ukonjelo ubhe na bhenebho, nnaino na piti piti! Amina. (aiōn g165)

1 Yowana

1 Tunakunnjandishilanga mmanganyanji ga Lilobhe Iya Gumi, Iyaapali kuumila kundandubho, uwe twalipiliikene, twalibhweni kwa meyo getu twaashaayene, twashinkulibhona kwa meyo getu na kulikwaya kwa makono getu twaashayene. **2** Gwene gumigo pugwalangwilwe kwetu uwe twaubhweni. Kwa Iyene ligongoli tunakuukong'ondela na kunnungushiyanga ngani ga gwene gumi gwa pitipiti uli na a Tati na ulangwilwe kunnungwetu (**aiōnios g166**) **3** Iyene litulibhweni na kulipilikana lila, ni litulunguya kunnungwenunji nkupinga na mmanganya nnundanjanje na uwe. Na kulundana kwetu, ni kubha pamo na a Tati na Bhana bhabho a Yesu Kilishitu. **4** Tunakunnjandishilanga mmanganyanji gene malobhe gano nkupinga tubhowe pamo, tuangalale kwa kaje. **5** Gegano ni malobhe gutupiliikene kukoposhela kwa a Yesu Kilishitu na gutukunnungushiyanga ni gegano. A Nnungu ni shilangaya, na kwa bhenebho kwangali lubhindu. **6** Tujilaga kuti tuli pamo na Bhenebho, akuno tulitama nkutenda ya nyata, penepo tunalambila, na itendi yetu nngabha ya kweli. **7** Ikabheje tutamaga nshilangaya malinga Bhenebho shibhali nshilangaya, bhai uwe tunabha pamo, na minyai ja a Kilishitu, jinakututakaya yambi yetu yowe. **8** Tubheleketaga kuti twangali yambi tunakwiitamba twaashayene, wala twangali kweli mmunda jetu. **9** Ikabheje twiilugulaga yambi yetu, pabha a Nnungu ni bhaakulupalika na bhanatenda aki, bhai shibhatuleshelele yambi yetu, na kututakaya na ya nyata yowe itukwete. **10** Tujilaga kuti tukanabhe tenda yambi, tunakwaatenda a Nnungu bhanami, na lilobhe iyabho liikaatama mmunda jetu.

2 Ashibhanangu bhungumpinganga, ngunakunnjandishilanga gene malobhe gano nkupinga nnatendanjanje yambi. Ibhaga mundu atendaga yambi, tukwete bhakutubheleketela kwa a Tati, na bhene bhakutubheleketelabho, ni a Yesu Kilishitu bhakwete aki. **2** Bhenebho ni mbepei jishoshiywe kwa ligongo Iya Ileshelelwa yambi yetu, wala nngabha kwa ligongo Iya yambi yetu pe, ikabheje kwa ligongo Iya yambi ya bhandu bhowe. **3** Uwe tumumanyi kuti twaamanyi a Nnungu, ibhaga tukunduga amuli yabho. **4** Mundu aitembaga kuti, abhamanyi a Nnungu akuno akaakunda amuli yabho, jwenejo ni nmani, na jwangali kweli mmunda jakwe. **5** Ikabheje jwene akunda lilobhe Iya a Nnungu, analangula shakuti kwaapinga a Nnungu mmunda jakwe. Kwa Iyene, tumumanyi kuti tunaalundana na a Nnungu. **6** Mundu jojowe abheleketela kuti analundana na a Nnungu, anapinjikwa kutama malinga shibaatemi a Yesu Kilishitu. **7** Bhakilishitu ajangunji ngakunnjandishilanga amuli ja ambi, ikabheje ja bhukala jinnjmanyinji kuumila kundandubho. Na jene amuli ja bhukala, ni lilobhe limpilikenenje lila. **8** Nkali nneyo ngunakunnjandishilanga amuli ja ambi, yani lilobhe lili Iya kweli nkati jabho a Kilishitu na nkati jetu, pabha lubhindu lunapita na shilangaya sha kweli tayali shinalangaya. **9** Mundu abheleketela kuti mwali nshilangaya akuno alikumpata nkilishitu nnjakwe, jwenejo launo mwali nnuhindu. **10** Jwene akumpinga nkilishitu njakwe, anatama nshilangaya na nkati jakwe shakwapi sha kummulaya kutenda yambi. **11** Ikabheje akumpata nkilishitu njakwe, anatama na owa

nubhindu na akakukumanya kwa kwenda, pabha lubhindu lushikung'ibhila meyo. **12** Ngunakunnjandishilanga mmanganya ashibhanangu, pabha nshileshelwanga yambi yenunji kwa lina Iya a Kilishitu. **13** Ngunakunnjandishilanga mmanganyanji bhanangulungwa, pabha mwaamanyinji Bhene bhaapali kuumila kundandubho ja indu yowe, ngunakunnjandishilanga mmanganya mmashanda, pabha nshikunkombolanga Lishetani jula. **14** Ngunakunnjandishilanga mmanganyanji ashibhanangu, pabha mwaamanyinji a Tati. Ngunakunnjandishilanga mmanganyanji bhanangulungwa, pabha mwaamanyinji bhaaliji kundandubho ja indu yowe. Ngunakunnjandishilanga mmanganyanji mmashanda, pabha nshikolanga mashili na lilobhe Iya a Nnungu linatama nkati jenunji, na munkombwelenje Lishetani. **15** Nnashipanganje shilambolyo, wala indu itama nshilambolyo. Mundu ashipingaga shilambolyo akakombola kwaapinga a Tati a Nnungu. **16** Pabha kila shindu shili pa Shilambolyo, malinga kukongolela ilokoli ya pa shiilu, ilokoli ya meyo, na kuipuna kwa nndamo, yene yowe ikaakoposhela kwa a Tati, ikabheje kuikopoka ku shilambolyo. **17** Shilambolyo na ilokoli yakwe inapita, ikabheje mundu atenda ibhaapinga a Nnungu shatame pitipiti. (**aiōn g165**) **18** Ashibhanangu, gegano ni malanga ga kumpelo. Mwapilikenenje kuti akakwaakunda a Kilishitu shaaishe, ikabheje nkali nnaino bhakwaataukanga a Kilishitu bhabhagwinji bhaikengenene. Kwa nneyo tumumanyi kuti gegano ni malanga ga kumpelo. **19** Bhene bhandunjibha, mubhakoposhelenje munkumbi kwetu, ikabheje bhakalinginjiji bhету, na kwa Iyene ligongolyo bhatuleshilenje. Kaliji bhakalinginji na uwe, bhakatemingene na uwe. Ikabheje bhashikutulekanga kupinga imanyishe kuti bhakalinginjiji bha munkumbi kwetu. **20** Ikabheje nshigumbaywanga naka Mbumu jwa Ukonjelo, na mmowenji nnjmanyinji kweli. **21** Bhai, nangannjandishilanga pabha nkakujimanyanga kweli, ikabheje pabha nnjmanyinji kweli na kabhili pabha gwakwa unami gogowe ukoposhela nkwele. **22** Gani ali nmani? Ni jwene atauka kuti a Yesu nngabha a Kilishitu. Jwenejo ni akakwaakunda a Kilishitu, pabha anakwaakana a Tati naka Mwana gwabho. **23** Jwene akumposhela Mwana, akakwaaposhela na a Tati nneila peila, ikabheje akumposhela Mwana, anakwaaposhela a Tati nneila peila. **24** Kwa nneyo nkamulanje mmitima jenunji majiganyo gumpilikenenje kuumila ku ndandubho. Ibhaga nkgulilangaga majiganyo gumpilikenenje kuumila ku ndandubho, shintamangananje nkati jika Mwana na a Tati **25** Na a Kilishitu bhayene bhatupele miadi ja gumi gwa pitipiti. (**aiōnios g166**) **26** Njikunnjandishilanga gene malobhega kwa ligongo Iya bhandu bhaapinganga kumpuganyanga. **27** Ikabheje a Kilishitu bhashikutupa Mbumu jwa Ukonjelo. Na pabha Mbumu jwa Ukonjelo anatama nkati jetu, nkapingikwanga kujiganywa naka mundu jojowe, pabha Mbumu jwabho anakunnjiganyanga indu yowe. Jwene Mbumujo anakunnjiganyanga ya kweli na wala akabheleketela unami. Bhai malinga Mbumu shakuti kunjiganyanga, ntamangananje nkati ja a Kilishitu. **28** Na nnaino ashibhanangu, ntamangananje nkati jabho a Kilishitu, nkupinga tubhe na ngulupai ja kweli malanga gubhapinga koposhela, na tunakole oni Iyubha lishibhabhuje. **29** Mmumanyinji kuti a Kilishitu ni bhakwete aki, kwa nneyo nnapinjikwanga nneila

peila kumumanya kuti kila mundu atenda aki, ni mwana jwa a Nnungu.

3 Bhai nnolanje, Atati shibhakuti kutupinga mpaka muntima, nikutushema bhana bha a Nnungu, na nneyo ni shituli uwe. Shilambolyo bhakakutumanyanga uwe pabha bhakakwaamanyanga a Nnungu. **2** Bhakilishitu ajangunji, uwe nnaino ni tubhana bha a Nnungu, ikabheje ikanabhe manyika shitubhe bhuli pushibhakoposhele a Kilishitupo. Ikabheje tumumanyi kuti shitulandane nabho pabha shitwaabhone shibhali. **3** Bhai kila mundu akulikupalila lyeneli mwa a Kilishitu, anakwiibhika ukoto mbuti a Kilishitu shibhali bha ukonjelo. **4** Kila mundu atenda shambi anakujikana shalia ja a Nnungu pabha shambi ni kujikana shalia. **5** Mmumanyinji kuti a Kilishitu bhashinkuika kuushoya yambi yetu na bhenebho bhngali shambi shoshowe. **6** Bhai kila atama nkulundana na a Kilishitu akayobhelela kutenda shambi, ikabheje kila mundu atenda shambi akanabhe kwaabhona a Kilishitu, wala akakwaamanya a Kilishitu. **7** Bhai ashibhanangu nnakundanje kupuganywa naka mundu jojowe. Mundu atenda itendi ya mmbone, jwenejo akwete aki malinga a Kilishitu shibhali bha aki **8** Ikabheje ayobhelela kutenda shambi, jwenejo juka Lishetani, pabha Lishetani ayobhelele kutenda shambi kuumila kundandubho. Ikabhe Mwana jwa a Nnungu, ashinkuika pa shilambolyo kuangabhanya maengo gaka Lishetani. **9** Kila mwana abheleke na a Nnungu, akayobhelela kutenda shambi pabha Unnungu uli nkati jakwe, wala akayobhelela kutenda shambi, pabha jwenejo ni mwana jwa a Nnungu. **10** Nneyo peyo ni pwiikumanyika mwana jwa a Nnungu na mwana juka Lishetani. Mundu jojowe akaatenda ya aki, na akakwaapinganga bhaakulupalilanga ajakwe, jwenejo nngabha mwana jwa a Nnungu. **11** Ntenga gumpilikenenje kuumila kundandubho ni gweguno, tunapinjikwa kupingana twaashayene. **12** Tunabhe mbuti Kaini, jwenejo paaliji juka Lishetani, ashinkummulaga mpwakwe. Kwa ligongo lyashi ashinkummulaga mpwakwe? Kwa ligongo lya itendi yakwe nnyene ishinkubha ya nyata, ikabheje ika mpwakwe puyaliji ya aki. **13** Bhai bhaakulupalilanga ajangunji, nnakanganigwanje ibhaga shilambolyo shikakumpinganga mmanganyanji. **14** Uwe tumumanyi kuti tupitile kukopoka nshiwo nikwenda ku gumi, pabha tunakwaapinganga Bhakilishitu ajetunji. Mundu akakwaapinganga bhakilishitu ajakwe anatama nshiwo **15** Kila akakumpinga akulupalila nnjakwe jwenejo nkubhulaga, na mmanganyanji mmumanyinji kuti jojowe abhulaga jwangali gumi gwa pitipiti nkati jakwe. (aiōnīs g166) **16** Uwe putukumanyi kupingana ni nneino. A Yesu Kilishitu bhashinkwiishoya gumi gwabho kwa ligongo lyetu uwe, numbe uwe tunapinjikwa kwiishoya gumi gwetu kwa ligongo lya bhaakulupalilanga ajetu **17** Bhai mundu akolaga mali ga pashilambo pano, na ammonaga nnjakwe ali nshilaje, nikola ntima gwa nonopa gwangali kummonela shiya, a Nnungu shibhampinje bhuli jwenejo? **18** Ashibhanangu kupingana kwetu kunabhe malobhe jika, ikabhe tupingane kwa kweli na kwa itendi. **19** Nneyo ni pushitumumanye kuti uwe ni tubhandu bha kweli, na tukakola lipamba kwa a Nnungu. **20** Ibhaga ndumbililo yetu itukumulaga, tumumanyi kuti a Nnungu ni bhakulungwa kupunda ndumbililo yetu, na

kuti Bhenebho bhashimanyi kila shindu. **21** Ashaambwiga ajangunji, ibhaga mitima jetu jangali sha kutuukumula, bhai shitukombole kubha na makangala ga kwaajendela a Nnungu. **22** Na shituposhele kwa bhenebho shoshowe shitujuga, pabha tunakagulila malajilo gabho, na tenda ikwaanonyela. **23** Na malajilo gabho ni nnei, twaakulupalile Bhanabhabho a Yesu Kilishitu, na tupingane malinga shibhatulajile. **24** Akagulila malajilo ga a Nnungu, anatama nkulundana na a Nnungu, na a Nnungu bhanatama nkulundana na jwenejo. Kupitila kuka Mbumu jubhatupeleshele a Nnungu, uwe tumumanyi kuti a Nnungu, bhanatama nkulundana na uwe.

4 Bhakilishitu ajangunji, nnankulupalilanje kila mundu abheleketi kuti ashikola Mbumu jwa a Nnungu, ikabheje munninganje ibhaga jwene mundujo anaalongoywa naka Mbumu jwa a Nnungu, pabha ashinkulondola bha unami bhabhagwinji bhashikoposhelanga pa shilambolyo. **2** Mpingangaga kumanya kuti jwene mundujo analongoywa naka Mbumu jwa a Nnungu, shimummanyanye nnei. Kila akunda kuti a Kilishitu bhashinkuika nibha mundu, jwenejo akwete Mbumu jwa a Nnungu. **3** Ikabheje jojowe akakwaakunda a Kilishitu, jwenejo jwangali Mbumu akopoka kwa a Nnungu. Jwenejo ashikola mbumu ataukangana na a Kilishitu, mmanganyanji mwapilikenenje kuti alikwiya, na nnaino tayali aise pa shilambolyo. **4** Ikabheje Mmanganyanji ni bhana bha a Nnungu, numbe mwaakombwelenje bhene ashinkulondola bha unami, pabha Mbumu ali nkati jenunji, ni nkulungwa kupunda mbumu ali nkati jabhonji bhene bhalinginji bha shilambolyo. **5** Bhanganyanjibho ni bha pa shilambolyo, na ibhabheleketanga indu ya pa shilambolyo, na shilambolyo shinakwaapiikanishiyanga, pabha bhene bhanganyanjibho ni bha pa shilambolyo. **6** Uwe ni tubha a Nnungu. Mundu abhamanyi a Nnungu anakutupilikanila, mundu akakwaamanya a Nnungu akakutupilikanila. Bhai nneyo, ni shitukombola kumanya Mbumu jwa Kweli na mbumu jwa unami. **7** Bhakilishitu ajangunji, tupingane, pabha kupingana kukoposhela kwa a Nnungu. Kila mundu akumpinga nnjakwe, jwenejo ni mwana jwa a Nnungu na akakwaamanya a Nnungu. **8** Mundu akakwaapinganga ahaajakwe jwenejo akakwaamanya a Nnungu, pabha a Nnungu ni kupingana. **9** A Nnungu bhashinkulanguya kuti bhanakutupinga uwe pubhampeshe Mwanagwabho jwa jika pa shilambolyo, nkupinga tupate gumi kuka jwenejo. **10** Kwenuki ni kupingana, nngabha kuti uwe tushinkutandubhila kwaapinga a Nnungu, ikabhe Bhenebho bhashinkutupinga kuishila kuntuma Mwanagwabho abhe mbepei ja kutuleshelela yambi yetu. **11** Bhakilishitu ajangunji, ibhaga a Nnungu bhashinkutupinga nneyo, bhai, numbe uwe tunapinjikwa kupingana. **12** Jwakwa mundu abhabhweni a Nnungu, ikabheje tupinganaga a Nnungu bhanatama nkulundana na uwe na kutupinga kwabho kunashimilika nkati jetu. **13** Tumumanyi kuti tunatama nkulundana na a Nnungu, na Bhalabho a Nnungu bhanatama nkulundana na uwe, pabha bhenebho bhashikutupa Mbumu jwabho. **14** Uwe tugabhweni, numbe tunakwakong'ondelanga bhananji kuti, Atati bhashinkwaatuma Bhanabhabho bhabhe bhaatapula bha shilambolyo. **15** Kila mundu akwaakunda a Yesu Kilishitu kuti Mwana jwa a Nnungu,

a Nnungu bhanatama nkulundana na jwene mundujo, na jwenejo anatama nkulundana na a Nnungu. **16** Bhai uwe tumumanyi na tunakulupalila kuti a Nnungu bhanakutupinga. A Nnungu ni pingana, na mundu jojowe atama nkupingana, anatama nkulundana na a Nnungu, na a Nnungu bhanatama nkulundana na jwenejo. **17** Kwa nneyo kupingana kutimilile nkati jetu nkupinga tukole makangala lyene lyubha lya ukumu, pabha kutama kwetu pa shilambolyo pano, shikubhe mbuti kutama kwa a Kilishitu. **18** Pukutemi kupingana pangali bhoga, elo, kupingana kwa timilika kunashoya bhoga gowe. Bhai, mundu akwete bhoga akanabhe timilika nkupingana, pabha bhoga unakagulana na kupanyangulwa. **19** Uwe tunapingana pabha a Nnungu ni bhatandwibhe kutupinga uwe. **20** Mundu abheleketaga kuti anakwaapinga a Nnungu, akuno akakumpinga nkilishitu njakwe, jwenejo analambila. Pabha mundu akakumpinga njakwe jwa kummona, akakombola kwaapinga a Nnungu akakwaabhona. **21** Bhai jejino ni amuli jibhatupele a Kilishitu. Akwaapinga a Nnungu anapinjikwa kumpinga nkilishitu njakwe.

5 Mundu jojowe akulupalila kuti a Yesu ni a Kilishitu, jwenejo ni mwana jwa a Nnungu na kila mundu akwaapinga a Tati, nneila peila anakumpinga mwana gwabho. **2** Nnei ni putukumumanya kuti tulikwaapinganga bhana bha a Nnungu, kwa kwaapinga a Nnungu na kuikamula amuli yabho. **3** Pabha kwaapinga a Nnungu ni kukagulila amuli, na amuli yabho yangali ukumu. **4** Pabha kila mwana jwa a Nnungu anakushikombola shilambolyo. Tunakushikombola shilambolyo kupitila ngulupai yetu. **5** Gani akushikombola shilambolyo? Ni jwene akulupalila kuti a Yesu ni mwana jwa a Nnungu. **6** A Yesu Kilishitu ni bhaaishe kwa bhatishwa kwabho mmashi, na kwa minyai ja kuwa kwabho. Bhangaike kwa mashipe, ikabheje pamo na mashi na minyai. Na Mbumu ni akong'ondela yene indu ila, pabha Mbumu ni jwa kweli. **7** Pabha pubhalinginji bhaakong'ondela bhatatu. **8** Mbumu, Mashi na Minyai na bhanaatatu lilibhe lyabhonji limope. **9** Ibhaga tuukunda ukong'ondelo gwa bhandunji, ukong'ondelo gwa a Nnungu ni gwankulungwa kaje, na gwenego ni ukong'ondelo gubhakong'ondele a Nnungu, ga bhanabhabho. **10** Kila mundu akunkulupalila mwana jwa a Nnungu, akwete gwene ukong'ondelogu muntima gwakwe. Ikabheje jwene akakwaakulupalila a Nnungu, ashikwaatenda kuti bhanami, pabha jwangakulupalila ukong'ondelo gubhakong'ondele a Nnungu, ga bhanabhabho. **11** Na gwenegu ni ukong'ondelo, kuti a Nnugnu bhashikutupa gumi gwa pitipiti, na gwene gumigu muuli mwa bhanabhabho. (aiōnios g166) **12** Jwene akwete bhanabhabho a Nnungu, akwete gumi, ikabheje jwene jwangali bhanabhabho a Nnugnu, jwangali gumi. **13** Ngunakunnjandishilanga gene malobhe gano mmanganyanji nkulikulupalilanga lina lya bhanabhabho a Nnungu, kupinga mmumanyanje kuti nkwetenje gumi gwa pitipiti. (aiōnios g166) **14** Na uwe tukwete makangala ga muntima kwa a Nnungu. Pabha tumumanyi kuti shibhatupilikane twaajugaga shindu shoshowe, malinga shibhapinga bhayene. **15** Bhai, ibhaga tumumanyi kuti bhanakutupilikana putukwaajuga, tumumanyi kuti bhatupele shoshowe shitwaajujile. **16** Mundu ammonaga nkilishitu njakwe alitenda shambi shikaapeleshela shiwo, anapinjikwa annjujile kwa a Nnungu, na a Nnungu shibhampe jwene mundujo gumi.

Yani mundu atendile shambi shikaapeleshela shiwo. Pabha shipali shambi shiipeleshela shiwo, ikabheje ngaabheleketa ajuje ga shene shambisho. **17** Kila shitendi shangali aki ni shambi, ikabheje shipali shambi shikaapeleshela shiwo. **18** Tumumanyi kuti kila mwana jwa a Nnungu akaatenda yambi, pabha Bhanabhabho a Nnungu shibhampe ulinda, na Lishetani akakombola kunkwaya. **19** Tumumanyi kuti uwe ni bhana bha a Nnungu, nkali Shilambolyo showe shitagwalwa na Lishetaniyo. **20** Tumumanyi nneila peila kuti mwana jwa a Nnungu aishe, na jwenejo atupele lumanyio kupinga twaamanye a Nnungu bhali bha kweli. Na uwe tunalundana na a Nnungu bha kweli, kupitila bhana bhabho a Yesu Kilishitu. Bhenebha ni a Nnungu bha kweli na gumi gwa pitipiti. (aiōnios g166) **21** Mmana bhungumpinganga, mwiembuyanje na kuitindibhalila yanamu.

2 Yowana

1 Jene bhaluwa jino kujikopoka kwangu nne nkulungwa jwa likanisha. Ngunakunnjandishila mmanganya bhandunji bha likanisha, bhungumpinganga mpaka muntima. Nngabha nne jikape ngumpinganga, ikabheje nneila peila na bhowe bhakujimanyanga kweli, bhanakumpinganga. **2** Pabha jene kweliji jinatama nkati jetu, na shijilonjeje tama na uwe pitipiti. (aion 9:165) **3** Atati a Nnungu pamo na a Yesu Kilishitu bhana bhabho, bhanakutupa nema na shiya na ulele, bhene bhatama kweli na pingana bhala. **4** Njialalala kwa kaje kubhona kuti bhananji munkumbi gwa ashibhana bhenu, bhanatamangananga kweli malinga Atati shibhashite kutuamulisha. **5** Na nnaino a mama ngunakunshondelesheya, nngabha kuti ngunakunnjandishila amuli ja ambi, ikabheje ni amuli jituposhele kuumila ku ndandubho, tupingane. **6** Na kupingana ni kutama nkukagulila amuli ya a Nnungu. Jeneji ni amuli jinjipilikenenje kuumila ku ndandubho, ntamangane nkupingana. **7** Bhaunaminji bhabhagwinji bhakaakundanga kuti a Yesu Kilishitu bhaaishe bhali na shiilu shabho, bhakoposhelenje pa shilambolyo. Mundu jwa nneyo analambila na akakwaakunda a Kilishitu. **8** Mwiiteiganje nnaobhianga shene shintendelenje maengo shila, ikabhe mpatanje upo itimilile. **9** Mundu jojowe akaatama mmajiganyo ga a Kilishitu, jwenejo jwangali a Nnungu. Na jojowe akalonjeja mmajiganyo ga a Kilishitu na kugaleka, jwenejo jwangali a Nnungu. Jojowe atama mmajiganyo, akwete Atati na Mwana nneila peila. **10** Nnamposhelanje mundu jojowe akunjilanga gwangali kumpeleshelanga gene majiganyo gano, numbe nnaposhelanje mmajumba genunji. **11** Jojowe akumposhela mundu jwa nneyo, na jwalakwe anakwiilunda mwiitendi yangali ya mmbone. **12** Ngwete indu yaigwinji, ikabhe ngaapinga kunnjandishilanga kwa kalatashi na wino, ikabheje kuengwa kwangu ninng'owelanje kutukungulushe pamo na mmanganya tulibhonegana, nkupinga kuangalala kwetu kutimilile. **13** Bhana bha alumbu bhenu bhaagwilwe na a Nnungu, bhanakunnamushilanga.

3 Yowana

1 Nne kalongolele jwa likanisha, ngunakunnjandishila mmwe ambwiga ajangu a Gayo bhungumpinga mpaka muntima. **2** Ambwiga ajangu, ngunakunnjula nkole ndamo ja mmbone na shiilu shiangalale malinga ntima gwenu shiguangalala. **3** Pabha ishinonyela kwa kaje, pubhaikengene bhakilishitu bha kweneko ningong'ondelanga ga kulupalika kwenu, na shinkuti kamulila ya kweli ga a Kilishitu. **4** Shakwa shipundile kunonyela, malinga shene sha pilikana kuti ashibhanangu bhanatamangana nkwele. **5** Ambwiga ajangu, kwa yene inkwaatendelanga bhakilishitu ajenunji nkali na bhajeninji, ni ikutenda nkulupalilwe. **6** Bhene bhandunjibho bhashikong'ondelanga nnikanisha kuti nshikola ntima gwa pinga bhandu. Kwa nneyo, shintende ya mmbone mwaajangutilangaga bhene bhakilishitubho, mmwanja gwabhonji malinga shibhaapinga a Nnungu. **7** Pabha kwa ligongo lya lina lya a Yeshu, bhashinkujabhulangana gwangali kukunda kuposhela shindu sha kwaajangutilanga, kukopoka ku bhandunji bha ilambo ina. **8** Bhai uwe tunapinjikwa kwaatendelanga mituka bhene bhandunjibho, nkupinga tukamule liengo lya kweli pamo. **9** Nashinkujandika ku likanisha bhaluwa, ikabhe a Deotilipa bhaapinga kwiibhika kubha akalongolele munkumbi gwabhonji, bhashinkukana kutupilikanila. **10** Kwa nneyo, ng'ikaga kweneko shinugule indu yowe yangali ya mmbone ibhatendile na malobhe ga unami gubhatulambilile, numbe kupunda genego, bhenebho bhanakana kwaaposhelanga Bhakilishitu ajetunji bhene bhaapinganga kwaaposhelanga bhala, bhanakwaalimbiyanga na kwaabhinganga nnikanisha. **11** Ambwiga ajangu, nnayaye indu ya nyata, ikabhe nnyaye ya mmbone. Pabha jwene atenda indu ya mmbone ni jwa a Nnungu, ikabhe jwene atenda indu ya nyata akakwaamanya a Nnungu. **12** Bhandu bhowe bhanakwalumbililanga a Demetulusi, numbe uwe tunakwaakong'ondela na mmumanyinji kuti ukong'ondelo gwetu, ni gwa kweli. **13** Ngwete indu yaigwinji ya kunnjandishila, ikabheje ngaapinga kunnjandishila na kalamu na wino. **14** Ikabheje shitubhonegane nikunguluka, tuli tutemi pamo. Ulele utame na mmwe. Ashambwiga ajetu bhanakunkumbushilanga, mwaalamushilanje ashaambwiga ajetunji bha kweneko bhowe, nnikwalugulanga kwa mena gabhonji.

Yuda

1 Nne Yuda ntumwa jwa a Yesu Kilishitu, mpwabho a Yakobho. Ngunakunjandishilanga nkupingwanga na Atati a Nnungu na kubhikwa muulele kwa ulinda gwa Yesu Kilishitu. **2** Ngunakumpinjilanga n njenjeshywanje shiya na ulele na kupingana. **3** Ashaalongo, nkali napinjile kunnjandishilanga ga ngani ja ntapulo gwetu uwe tubhowe, gumweni kuti ngunapinjikwa kunnjandishilanga, nkukwiyanga mpundanje kukamulila ukoto ngulupai jimpegwilwenje mmandunji bha ukonjelo kamope. **4** Pabha bhapalinji bhandu bhajinjijyenje kwa nng'yo, bhajandishilwenje kupanyangulwa kuumila bhukala, bhaatendanga ya nyata ikwashima a Nnungu, bhalikugupuganya ntenga gwa nema ja a Nnungu bhetu kubha shindu shangali sha mmbone, na kwaakananga a Yesu Kilishitu bhali bha jikape, na Bhakulungwa bhetu a Yesu Kilishitu. **5** Nkali mwimanyinji yowe i ngunakunkumbushiyanga kuti, Bhakulungwa nankali Bhaatapwilwenje Bhaishilaeli ku Mishili, bhene bhakakwetenenje ngulupai bhala gubhabhulegwenje. **6** Na nkali ashimalaika bhalepelenje kutama ukoto nndamo jabhonji, bhashitabhwanga na a Nnungu mindondolo ja itale ja pitipiti nnuhindu, mpaka pushiliishile lyubha likulu lya ukumu. (aiōnios g126) **7** Nkumbushilanje bhandunji bha ilambo ya ku Shodoma na ku Gomola na ya tome na kweneke, bhashinkutendanga malinga bhene ashimalaika bhala bhalitendanga ya labhalaba na ilokoli yangali ya mmbone ya nshiilu, bhalilekanga mwa kawaida nitenda ikapinjikwa, nipanyangulwa mmoto gwa pitipiti, kubha shilangulo kubhandunji bhowe. (aiōnios g166) **8** Nneyo peyo nkali bhanganayabha, agamii yabhonji inanyatiya iilu yabhonji na nikuunyegaya ukulungwa gwa a Nnungu na kuilosha iumbe ya ukonjelo gwa kunnungu. **9** Nkali a Mikaeli bhakulungwa bha ashimalaika bha kunnungu, pubhataukanganaga naka Lishetani ga shiilu sha a Musha, bhanganalinga kummeleketa kwa kunnung'ukumula kwa malobhe ga matukano, ikabheje gwaalugwilepe, "Bhakulungwa bhayene bhakukalipile." **10** Ikabheje bhene bhandunjibha bhanakwiloshanga indu ibhakakwimanyanga, na indu ibhakwiganishiyanga nng'aniyo yabhonji ni ikwaobhiyanga malinga bhanyama bhanganlinji lunda. **11** Ole gwabhonji! Pabha bhashikagulanga mpanda gwa a Kaini. Bhashibhutushilanga kupata mbwaiko muilebho malinga ya a Bhalaamu na gubhatitimilenje malinga shibhatitimile a Kola. **12** Bhene bhandunjibha, mapyotopyoto ga jogoya, bhunkulyanabhonji shalya malanga gunkuimananga kwaakumbushila a Nnungu. Bhalyanganga pamo na mmanganya, gwangali lipamba. Paalinginji mbuti maunde ganokolwa na mbungo gwangali kunya ula. Numbe malinga mikongo jipakatishe maamba na wala jikaogoya iepo na jiwile na jitungumbulwe. **13** Bhene bhandunjibho pubhalinginji malinga mabhimbili gamakulungwa ga bhaali, gakaibhilika na itendi yabhonji ya tokomaya ilitutuma liulo mbuti ndondwa ijimajima, a Nnungu bhaabshihilenje shibhiko nnuhindu lwa totolo lwa pitipiti. (aiōn g165) **14** Na a Eneko bhandu bha lubheleko lwa shabha kuumila a Adamu, bhashinkulondola ga bhene bhandunjibho bhalinkuti,

"Mpilikananje! Bhakulungwa bhanakwiya na bha ukonjelo bhabho maelupu kwa maelupu, **15** kupinga bhaaakumulanje bhandunji bhowe na kwaapotekanga bhandu bhowe bhakakwaakundanga a Nnungu, ligongo lya itendi yabhonji ya ilebho ibhatendilenje, na ligongo lya malobhe gabhonji gowe ga nyata gubhabheleketenje bhandunji bha ilebhobha, kwa a Nnungu." **16** Bhene bhandunjibha bhanainginikanga na kwigutanjila, bhalikagulilanga ilokoli yabhonji ya nyata, bhalikwiinyanga na kwaalumbililanga bhananji kwa unami nkupinga pwaika. **17** Ikabheje mmanganyanji bhakilishitu ajangu, nkumbushilanje malobhe gummalanjilwenje bhukala na ashimitume bha Bhakulungwa bhetu a Yesu Kilishitu. **18** Bhammalanjilenje kuti, "Mobha ga kumpelo shibhakoposhelanje bhandunji bha mbenji bhaakagulilanga ilokoli yabhonji ya nyata." **19** Bhene bhandunjibho bhaakumbuyanga malekano na mipwilingano, bhandunji bha ilokoli ya nshiilu na lunda lwa shibheleke, bhanganlinginji Mbumu jwa a Nnungu. **20** Ikabheje mmanganyanji bhakilishitu ajangunji ntamangane ukoto ngulupai yenunji ya mmbone nnilongoywanga naka Mbumu jwa Ukonjelo nkujuga. **21** Ntamangane malinga shibhapinga a Nnungu, akuno nnilindililanga shiya sha Bhakulungwa bhetu a Yesu Kilishitu mpaka mpatanje gumi gwa pitipiti. (aiōnios g166) **22** Mwaabhonelanje shiya bhandunji bhakwetenje lipamba, **23** Bhananji mwaatapulanje pa moto gwa ukumu. Mwaabhonelanje shiya nnikwiiteiganga na nnishimwanga na yambi inyatiya iilu yabhonji. **24** Kwa Bhene bhaakombola kumpanganga ulinda nnaikubhalanje nigwa na bhakummikanga muukonjelo gwabho gwangali ilebho na kwa nng'angalo gwa punda, **25** Bhenebho ni a Nnungu bha jikape, Bhaatapula bhetu kupitila a Yesu Kilishitu Bhakulungwa bhetu, ukonjelo ku bhenebho na ukulungwa na mashili kuumila bhukala, na naino na pitipiti. Amina. (aiōn g165)

Nng'ibhulo

1 Gweguno ni nng'ibhulo gwa a Yesu Kilishitu gubhapegwilwe na a Nnungu, nkupinga bhaalanguyanje bhatumishi bhahbo indu ipinga koposhela shangupe. Bhashinkulangula yene indui kwa kuntuma malaika jwabho kwa a Yowana bhatumishi bhahbo, 2 bhenebho bhakong'ondele ga kila shindu shibhashibhwene, ga lilobhe Iya a Nnungu na ukong'ondelo gwa a Yesu Kilishitu. 3 Apegwe mboka jwene akwaashomelanga nnikanisha malobhe ga gweguno ukulondola guno, nneila peila bhapegwanje mboka bhene bhaapilikananga na kugabhika muntima gajandikwe mwemuno gano, pabha malanga gabhandishile. 4 Nne a Yowana ngunakugajandishila makanisha shabha gali kunkoa gwa Ashia. Ngunakumpinjilanga nema na ulele kukopoka kwa a Nnungu bhapali, bhaapali na bhaapinga kwiya kukoposhela kwa ashi Mbumu shabha bhalinginji mmujo ja shitengu sha upalume, 5 na kwa a Yesu Kilishitu bhaakong'ondela bhaakulupalika, bhali bha Iyelo ku bhawilenje, na bhakulungwa bha bhapalume bha pa shilambolyo. Bhenebho bhanakutupinga na bhashikututakaya yambi yetu kwa minyai jabho, 6 ni gubhatutendile uwe kubha upalume gwa bhaabshila nkupinga twaatendele liengo a Nnungu, bhali aina bhahbo. Ukonjelo na mashili ibhe na bhenebho piti piti, amina. (aiōn g165) 7 Nnole bhenebho bhanakuti na maunde na kila mundu shaabhabhone nkali bhene bhaaomilenje lipanga bhala, na ilambo yowe ya pashilambolyo shiigutanjiye kwa ligongo lyabho. Elo nneyo ni shiipinga kubha. 8 Bhakulungwa a Nnungu Bhakwete Mashili bhakuti, "Nne ni jwa ntai na jwa mpelo, mbali, naapali na mbinga kwiya." 9 Nne a Yowana nankukulupalila njenunji, nili mmboteko pamo na mmanganyanji muupalme gwa a Nnungu na nkupunda kwiipililila, nashinkubhikwa jikape ku shilambo shitimbililwe na mashi shiishemwa Patimo kwa ligongo Iya lunguya lilobhe Iya a Nnugnu na kong'ondela ga a Yesu. 10 Bhai, Iyubha limo Iya Bhakulungwa, nili ng'umbelwe naka Mbumu, gumbilikene lilobhe Iikulungwa mbuti Iya lipenga kunyuma jangu 11 Iilinkuti, "Nnjandishe nshitabhu gowe gunkugabhonaga, npeleshe ku makanisha shabha, yani ku Epesho, na ku Shimilina, na ku Peligamo, na ku Tiatila, na ku Shalidi, na ku Piladelipia, na ku Laodikia." 12 Penepo nigundendebhwishe nole, ni gani abheleketaga na nne. Ngatendebhusheje niguniibhwene itengu shabha ya kandili ya shaabhu. 13 Pakati pakati yene itengu ya kandili Ila, nigunaabhwene bhandu bhamo malinga Mwana jwa Mundu, awete likoti Iya lileu na nshipi gwa shaabhu pa ntima. 14 Ntwe gwakwe na umbo yakwe puyaaliji yanawe malinga mabhetya ga ngondolo, eu malinga ndambwe, na meyo gakwe pugaaliji malinga shitale shiukengwe kaje, eu mbuti shijoshilwe pa moto gwa shipala, na lilobhe Iyakwe puyaaliji malinga mabhimbili ga mashi gamagwinji. 16 Munkono gwakwe gwa nnilo ashinkukamulila ndondwa shabha, na nkangwa jakwe ushinkukopoka upanga gwa tema akuno na kukuno. Lubhombolwawe luliimelemeta kwa kaje, mbuti Iyubha Iya nakalanga. 17 Ngaabhoneje ngugbwaga pa makongono gabho mbuti mundu awile. Penepo nigubhamishile nkono gwabho

gwa nnilo bhalinkuti, "Nnajogope, Nne ni na jwa ntai na jwa mpelo. 18 Nne ni jwene akwete gumi, na awile na nnole nnaino, na jwa nkoto piti piti, na ni ngwete mashili ga kundamo ja bhawilenje. (aiōn g165, Hadēs g86) 19 "Bhai nnaino nnjandishe indu imuibhwene, ipali na yene ipinga koposhela kungai. 20 Ga shinjubhi sha yene ndondwa shabha imuibhwene munkono gwangu gwa nnilo Ila, na itengu shabha ya kandili ya shaabhu ni nnei, ndondwa shabha Ila ni ashimalaika bha Makanisha shabha, na itengu shabha Ila, ni Makanisha shabha."

2 Kuka malaika jwa likanisha Iya ku Epesho nnjandishe. "Genego ni malobhe ga bhene bhaakumula ndondwa shabha munkono nnilo gwabho, na bhapita jimajima pakatipakati itengu ya kandili shabha ya shaabhu. 2 Nishimanyi shinkutenda, nimumanyi kutumbilila kwenu nniengo na shinkuti kwiipililila. Nimumanyi kuti nkaakombola kumpililila mundu jwangali jwa mmbone, na kuti nshikwaalinganga bhene bhakwiishemanga kuti ashimitume, mbenanngabha, na mwaabhwenninji kuti bhanami. 3 Mmwe nnakwiipililila nipotekwa kwa ligongo Iyangu nne, na mwangalepela. 4 Ikabheje gegano ni gungwete kwenu mmwe, nnaino nkaambinga malinga shimwambingaga bhukala. 5 Nkumbushile punnepele. Ntendebhushe ntende shimwatendaga bhukala. Monaga nkaipete, shinyie shoya kandili jenu pa shitengu shakwe. 6 Ikabheje ngunakunumbilila ga shindu shimo, inakunshima yaakutendanga Bhanikolai, malinga shiikunjima nne." 7 "Akwete makutu, bhai apilikane yaabheleketa Mbumu ku makanisha." Shihhakombolanjebho shinaalekanje bhalyanganje iepo ya nkongo gwa gumi, uli mungunda gwa a Nnungu. 8 Kuka malaika jwa likanisha Iya ku Shimilina nnjandishe. "Gegano ni malobhe ga bhene bhali bha ntai na bha kumpelo, bhaawile nnaino ni bhakoto. 9 Nigamanyi ga shilaje shenu, nimumanyi kuti mmwe mmaalaga. Ikabheje mmwe ni tajiji, nimumanyi shibhashite kuntokomayanga bhene bhakwiitombanga kuti Bhayaudi ikabheje nngabha, bhene bhanganjabho ni likundi lika Lishetani. 10 Nnajogope shindu shoshowe shipinga kumpoteka. Mpilikane, Lishetani shanninganje kwa kuntendanga mmananji munkumbi gwenunji ntabhwanje nngielesha, na shimmganje mmboteko kwa mobha likumi limo. Mwiishimilikanje ngulupai na nkali mpinjikwangaga kuwa, numbe nne shinimpanganje gumi, ibhe upo kwa kombola kwenunji." 11 Akwete makutujo, bhai apilikane gaabheleketa Mbumu ku makanisha. Jwene shaakombolejo, akapotekwa na shiwo sha bhili. 12 Kuka malaika jwa ku likanisha Iya ku Peligamo nnjandishe. "Gegano ni malobhe gubhaabheleketa bhene bhakwete upanga gwa tema akuno na kukuno bhala. 13 Nikumanyi kunkutama, mmwe kunkutama ni kushitengu sha upalume shika Lishetani. Ikabheje mwangangana, na wala mwangaleka kungulupalila, nkali mobha ga a Antipashi, bhaakong'ondela bhangu bhaakulupalika, pubhabhulegwe munkumbi gwenunji kwene kulitama Lishetani. 14 Ikabheje ipali ishoko ingwete kungwenu mmwe, bhapalinji munkumbi gwenunji bhaakagulilanga majiganyo ga a Bhalaamu, bhaajigenye a Bhalaki bhaalongoyanje Ishilaeli bhatendanje yambi kwa kwaatendanga bhalyanganje yalya ishoshiwe mbepei kuyanamu na itendi ya labhalabha. 15 Na nneyo peyo bhapalinji bhandunji munkumbi gwenunji bhaakagulilanga majiganyo ga

Bhanikolai. 16 Bhai nnaino nnekanje yambi yenunji, nkalekanje shining'ishilanje shangupe kuukomana na bhene bhandunjiho na upanga gwankulungwa ukopoka nkang'wa jangu." 17 Monaga nkwenje makutu, bhái, mpiikananje gaabheleketwa naka Mbumu ku makanisha. Jwene shaakombole jula shinimpe shalya shishiywe shila. Shinimpe na liganga Iyanawe lijandikwe lina Iya ambi likamanyika na mundu jojowe ikabheje jwene apegwilwe jula. 18 Kuka malaika jwa ku likanisha Iya ku Tiatila, njandishe. "Gwenego ni ntenga ukopoka kuka Mwana jwa a Nnungu, meyo gakwe mbuti lilamba Iya moto, makotwa gakwe gacamelemeta mbuti liabha Iyalikubhule. 19 Niimanyi yowe inkutenda. Nikumanyi kupinga kwenu, kukulupalika kwenu, liengo lyenu na kuipililla kwenu. Nimumanyi kuti nnaino nnatenda indu yaigwinji kupunda imwatendaga bhukala. 20 Ikabheje ngwete lilobhe Iya kummalanjila, mmwe nnakwaaleshelela bhakongwe a Jeshebhelí, bhakwiishema bhayene ankulondola. Kwa majiganyo gabho bhanakwaapuganyanga bhatumishi bhangu, nkupinga bhatendanje ya labhalabha na kulya yalya ishoshiwe mbepi ku yanamu. 21 Nne naapele malanga ga kwiipeta yambi yabho, ikabheje bhakaapinga kuleka ya labhalabha yabho. 22 Kwa nneyo shinaagwishiye pa shinanda sha mboteko bhene bhakongwebho na bhowe bhagonilenje na bhenebho na bhalabhonji shibhapotekwanje kwa kaje. Shindende yenei nnainope ibhaga bhakaipetanje na indu ya nyata ibhatendilenje na bhene bhakongwebho. 23 Numbe shinaabhulaganje bhene bhakwaakagulanga bhene bhakongwebho, na makanisha gowe shibhamumanyanje kuti nne ngunatonela ya mmitima na ng'anyi ya kila mundu. Shinimpe kila mundu malinga shatendile." 24 Ikabheje mmananyi nninginji ku Tiatila mwangakagulanga gene majiganyo, na mwangajiganyanga yene ishemwa injubhi ika Lishetani. Nguti mmanganya, ngantwikanga nshigo guna. 25 Ikabheje nkamulilanje ukoto shoshowe shimpatilenje mpaka pushimujepo. 26 Shaakombole, na shaatende ingupinga nne mpaka kumpelo, shinimpe ukulungwa ku bhandunji bha ilambo ina. 27 Shaabhalongoyanje na imbo ja shitale, na shaabhakaanyanje mbuti ikelelo ya lilongo, malinga nne shimboshele ukulungwa kopoka kwa Atati. 28 Jwene shaakombolejo, shinimpe lutondwa Iwa nng'andu. 29 Akwete makutujo, bhái, apilikane yaabheleketwa Mbumu ku makanisha.

3 Kuka malaika jwa Likanisha Iya ku Shalidi njandishe nnei. "Gegano ni malobhe ga bhene bhakwete mbumu shabha ya a Nnungu, na ndondwa shabha Ila. Niimanyi itendi yako, nkali ushuma kuti ukwete gumiyo, ugwe uwile. 2 Jumuka na ubhishe ukoto yowe Ili tome nawa, pabha niibhweni itendi yako kuti yangakamilika pa meyo ga a Nnungu bhangu. 3 Bhai kumbushila majiganyo gupegwilwe na gupilikene gala, ugakumulile nikwiipeta yambi yako. Ukasheye, shinikujile shiimushila malinga shakwiya nngwii, wala ukagamanya malanga gushinikujile. 4 Ikabheje ukwete bhandu bhashoko ku Shalidi bhakanabhe nyatiyanga nngubho yabhonji. Bhene bhanganjabho ni shibhalongane na nne bhawetenje nngubho yanawe, pabha ni bhaapingikwanga." 5 Jwene shaakombolejo shawashwe nngubho yanawe malinga bhanganjabho, na nne ngalishoya lina Iyakwe nshitabhu sha gumi, ikabheje

shingong'ondele lina Iyakwe pa meyo ga Atati na pa meyo ga ashimalaika bhabho. 6 Jwene akwete makutujo apilikane, gene gabhelenje Mbumu ku makanisha. 7 Kuka malaika jwa Likanisha Iya ku Piladelpia njandishe nnei. "Gegano ni malobhe gubhaabheleketwa bhene bha ukunjelo na bha kweli, bhakwete upunguo gwa a Daudi. Bhaugulaga jwakwa shaakombole kuugala, na bhaugulaga jwakwa shaakombole kuugula. 8 Niimanyi itendi yako. Lola mmujo jako njibhika nnango gwann'ugulwe na jwakwapi shaakombole kuugala. Nimumanyi kuti ukwete mashili gashoko, ikabheje ushikumulila lilobhe Iyangu na gwangalikana lina Iyangu. 9 Lola, shinikupe bhene bha nyumba Ika Lishetani bhakwishemanga Bhayaudi bhalinginji nngabha Bhayaudi, mbena bhanami. Shinaatendanje bhakutindibhalilanje pa makongono gako, bhamumanyanje kuti nne nikupinjile. 10 Pabha ushikumulila lilobhe Iyangu Iya kwiipililla, numbe nne shinikubhishile ulinda ushoshe mmalanga ga shilaje gakiya pa shilambolyo powe, nkupinga kwaalinganga bhaatamangana pa shilambolyo. 11 Ngunakwiya shangu. Ukumulile ukoto shiukwete, nkupinga mundu anakupokonyole shilemba shako." 12 Jwene shaakombole kutenda ukoto kupunda bhananjijo, shinintende kubha lipoto Iya liekalu Iya a Nnungu bhangu, na akashoka mwenemo kabhili. Na kabhili pa ntundu jakwe shinyandishe lina Iya a Nnungu bhangu, na lina Iya shilambo sha a Nnungu bhangu, yani Yelushalemu ja ambi, jituluka kopoka kunnungu, kwa a Nnungu bhangu. Nneila peila pa ntundu jakwe shinyandishe lina Iyangu Iya ambi. 13 Akwete makutujo apilikane gene gabhelenje Mbumu ku makanisha. 14 Kuka malaika jwa Likanisha Iya ku Laodikia njandishe nnei. Gegano ni malobhe ga bhene bhali Amina yani, Nneyo Peyo, bhaakong'ondela bhaakulupalika na bha kweli, bhali nantando jwa indu yowe ipengenywe na a Nnungu. 15 Niimanyi itendi yako kuti ugwe ukaima na wala ukaababhula, mbaya ukali jwa ima eu jwa bhabhula. 16 Bhai, pabha ugwe ushibha jwa ntukuta, ukaima na wala ukaababhula shinikuune ukoposhe nkang'wa jangu. 17 Pabha ukuti, nne tajili ngwete indu yaigwinji na ngatubhilwa na shindu, ukakwiimanya kuti gwangali mashili, na unalaga, na gwangali shindu na nangalole na uli makonope. 18 Kwa nneyo, ngunakuupa lunda, kuume kwangu nne shaabhu jijiitwilwe pa moto ubhe tajili, na kuume nngubho yanawe uwale pabha uli makonope gwijjambate. Na kabhili kuume ntela gwa taga mmeyo gagoko nkupinga ulole. 19 Nne ngunakwaakalipilanga na kwaakomanga bhowe bhungwaapinganga, kwa nneyo utumbilile kwiipeta yambi yako. 20 Lola, ngunajima pa nnango niolishiya, mundu apilikanaga lilobhe Iyangu niugula, shinyinjile munngwakwemo, na shutulye pamo. 21 Jwene shaakombole kutenda ukoto kupunda bhananjijo, shinimmishe tome na shitengu shangu sha upalume, malinga nne shingombe kutenda ukoto, gundemi tome na Atati pa shitengu shabho sha upalume. 22 Akwete makutujo, apilikane gene gabheleketwa Mbumu ku Makanisha.

4 Gakapiteje genego nashinkulola gunigubhweni nnango uugwilwe kunnungu. Na Iyene lilobhe linatandwibhe kupilikana mbuti lilobhe Iya lipenga lila gulishite, "Nnjiye kunani kuno, nne shininnanguye gaapinga koposhela kungai." 2 Shangupe, Mbumu gwandolile, gunishibhweni shitengu sha upalume

kunnungu, na panani jakwe bhapali bhaatemi. **3** Bhene bhaatemi panani jakwe bhala pubhaaliji mbuti alimashi na liganga lya nashe lya konja. Lipinda lya a Nnungu lya melemeta mbuti shumaladi lyatendaga kushitimbillia shitengu showe sha upalume **4** Lyashinkupagwa likungo lya itengu makumi gabhili na nsheshe kushitimbillia shitengu sha upalume shila, na panani ja yene itenguyo, bhashinkutamangana bhanangulungwa makumi gabhili na nsheshe, bhali bhawetenje nngubho ya nawe na ilemba ya shaabhu mmitwe jabhonji. **5** Kumeta na lindimila na kubhalula kwa nnjai, yatendaga koposhela pene pa shitengu sha upalume pala. Mmujo mwa shitengu sha upalume yashinkupagwa kandilii shabha ilikolela, yene kandiluyo ni ashimbumu shabha bha a Nnungu. **6** Numbwe mmujo mwa shene shitengu sha ukulungwashi shashinkupagwa shindu mbuti bhaali ja shioo sha melemeta mbuti liganga lya melemeta kaje. Kila mbali ja shene shitengu sha ukulungwa na nnyenje jakwe, yashinkupagwa iumbe nsheshe ikwete gumi. Yene iumbeyo yashinkukola meyo mmujo na nnyuma. **7** Shiumbe jwa ntai paaliji mbuti imba, jwa bhili mbuti ng'ombe, jwa tatu ashinkukola na lubhombu lwa mundu, na jwa nsheshe paaliji mbuti litumbui. **8** Lumbe yowe yashinkukola mapapiko nng'ano na limo kila jumo, na bhashinkukolanga meyo kila mbali, nkati jabhonji na palanga. Shilo na mui bhatendaga jimbanga bhalinkutinji, "Mmaukonjelo, mmaukonjelo, mmaukonjelo, Mmakulungwa a Nnungu Nkwete mashili, bhaapali, bhapali na bhakwiyabho." **9** Na kila yene iumbeyo puyaainiyangaga na kwaishimiya na kwaatendela eja, bhene bhatemi panani shitengu sha ukulungwa bhakwete gumi gwa piti piti bhala, (aiōn g165) **10** bhanangulungwa makumi gabhili na nsheshe bhala, bhatendaga kotimanga mmujo ja bhene bhatemi pa shitengu sha ukulungwa na kwaatindibhalila bhene bhakwete gumi gwa piti piti bhala, na bhalibhikanga ilemba yabhonji ya ukulungwa, mmujo ja shitengu sha ukulungwa shila bhalinkutinji, (aiōn g165) **11** "Mmwe ni Mmakulungwa na a Nnungu bhetu, nkupinjikwa kuposhela ukonjelo na ishima na mashili. Pabha mmwe nshipanganya indu yowe, na ishikipanganywa na ipali kwa pinga kwenu."

5 Bhai gunishibhweni shitabhu munkono gwa nnilo gwa bhene bhatemi pa shitengu sha ukulungwa, na shene shitabhusho shashinkujandikwa nkati na palanga na shashinkutabhwa iundo shabha. **2** Kabhili gunimmweni malaika akwete mashili aliutiya lilobhe alinkuti. "Gani apinjikwa kugopola yene iundo nikushiunukula shene shitabhu shino?" **3** Ikabheje jwakwa mundu jojowe kunnungu, wala pa shilambolyo wala pai kubhawilenje, akombwele kuunukula shene shitabhusho eu kulola nkati. **4** Bhai, nne gung'utile kaje pabha jwangabhonoka mundu apinjikwa kuunukula shene shitabhusho eu kulola nkati. **5** Ikabheje bhamo munkumbi gwa bhanangulungwa bhala, gubhanugulile, "Unagute, lola, Imba jwa shipinga sha a Yuda, jwa lubheleko lwa a Daudi, akombwele. Jwenejo shaakombole kuigopola iundo shabhayo na kuunukula shene shitabhusho." **6** Na gunimweni Mwana Ngondolo ajimi pakati shitengu sha upalume, shitimbililwe kila mbali na yene iumbe nsheshe ikwete gumi ila, na bhanangulungwa bhala. Jwene Mwana Ngondolo jula pabhonokaga mbuti ashingwa. Ashinkukola mbembe shabha

na meyo shabha na yeneyo ni ashi Mbumu shabha bha a Nnungu bhapelekwenje kila mbali pa shilambolyo. **7** Mwana Ngondolo nigwapite tola shene shitabhu shila, munkono nnilo gwa bhatemi pa shitengu sha upalume bhala. **8** Shangupe akatoleje shene shitabhu shila, yene iumbe ikwete gumi ila, na bhene bhanangulungwa makumi gabhili na nsheshe bhala, gubhagwilenje namanguku mmujo jika Mwana Ngondolo jula. Kila shiumbe ashinkukamula shingushingushi na nkungu gwa shaabhu ugumbeywe lubhani, yani malobhe ga bhandunji bha ukonjelo nkwaajuganga a Nnungu. **9** Na gubhajimilenje lwimbo lwa ambi bhalinkutinji. "Mmwe ni nkupinjikwa kutola shene shitabhusho, na gopola iundo yakwe. Pabha mmwe nshingwa, na kwa minyai jenu nshikwaumila a Nnungu bhetu bhandunji koposhela kila likabhila, na bha kila shibheleketi, na bha kila ulongo, na bha kila shilambo. **10** Nshikwaatendanga bhabhe upalume gwa bhakulungwanji bha bhishila bhaatumishilanje a Nnungu bhetu, na shibhatagwalanje pa shilambolyo." **11** Gunolile kabhili, gumbilikene malobhe ga a shimalaika bhabhagwinji kaje, maelupu na mamilioni, bhatimbilenje shitengu sha upalume, na yene iumbe nsheshe ikwete gumi ila, na bhanangulungwa bhala, **12** kwa lilobhe lya utiya nigubhashitenje, "Mwana Ngondolo ainjiilwe, jwenejo ni apinjikwa kuposhela mashili ga kombola, utajili, lunda, mashili, ukonjelo na iniywa." **13** Gumbilikene iumbe yowe kunnungu, na pa shilambolyo, na pai shilambo na mbhaali, iumbe yowe pa shilambolyo ilijimba. "Kwa bhene bhaatama pa shitengu sha upalume, na kuka Mwana Ngondolo, kupagwe kuiniywa na ishima na ukonjelo na ukulungwa piti piti." (aiōn g165) **14** Na yene iumbe nsheshe ikwete gumi ila guishite, "Nneyo peyo." Na bhanangulungwa bhala gubhagwilenje namanguku, nkwaatindibhalila.

6 Bhai, gunimmwene Mwana Ngondolo pagopolaga shiundo shimo munkumbi gwa iundo shabha ila, nigumbilikene jumo munkumbi gwa bhene nsheshe bhakwetenje gumi bhala, alibheleketi kwa lilobhe lya mbuti nnjai alinkuti, "Nnjiye!" **2** Ngalojele nigunimmwene palashi jwanawe, na ankwelile jula ashinkukola upinde, nigwapegwilwe shilemba, bhai nigwakopweshe malinga akombola ngondo na apunde kombola. **3** Mwana Ngondolo akagopoleje shiundo sha bhili gunimpilikene jwene akwete gumi jwa bhili jula alinkuti, "Nnjiye" **4** Nigwakoposhele palashi jwa bhili jwanashe, na jwene ankwelilejo ashinkupegwa mashili ga kuushoya ulele pa shilambolyo, nkupinga bhandu bhabhulagane, na ashinkupegwa upanga gwankulungwa. **5** Mwana Ngondolo pagopolaga shiundo sha tatu, gunimpilikene jwene akwete gumi jwa tatu lula alinkuti, "Nnjiye!" **6** Nnole, gunimmwene palashi jwanapi na jwene ankwelile jula ali na shipimilo munkono gwakwe. **6** Nigumbilikene mbuti lilobhe koposhela munkumbi gwa bhakwetenje gumi nsheshe bhala alinkuti, "Kilo jimo ja utandi gwa ngano, shijushwe kwa nshaala gwa liengo lya lyubha limo, na kilo itatu ya utandi gwa shaili, shiushwe kwa nshaala gwa liengo lya lyubha limo. Ikabheje nnajonanje mauta ga nsheituni wala divai." **7** Na Mwana Ngondolo pagopolaga shiundo sha nsheshe, nigumbilikene lilobhe koposhela kuka akwete gumi jwa nsheshe jula alinkuti, "Nnjiye." **8** Nnole, nigunimmwene palashi jwa langi ja liu, na

ankwellelejo lina lyakwe ni Shiwo, na Kundamo ja bhawilenje alikagula nnyuma. Na bhalabhonji nigubhapegwilwenje mashili ga tagwala, shipande shimo nngabhanyaga shilambolyo pa sheshe, bhaabhulaganje bhandu kwa upanga, na kwa shibhanga, na kwa ilwele, na kwa bhannyama bha jogoya bha pa shilambolyo. (Hadēs g86) 9 Mwana Ngondolo pagopolaga shiundo sha nng'ano, nigunijibhwene pai shitala mitima ja bhabhulegwenje kwa ligongo lya lilobhe lya a Nnungu, na kwa ligongo lya ukong'ondelo gubhakwetenje. 10 Nigubhagutilenje kwa utiya bhalinkutinji, "Ama, a Nnungu Nkwete Mashili, Mmwne ni bha ukonjelo na Mmaakulupalika, mpaka shakani pushing'ukumule na pindikulila ku bhandu bhaatamangana pa shilambolyo kwa ligongo lya minyai jetu?" 11 Kungai na bhalabhonji nigubhapegwilwenje majoo ganawe, nigubhabhalanjilwenje bhalindanje kwa malanga gashoko, mpaka bhatimililanje bhatumishi na ashalongo ajabhonji bhaapinjikwanga kubhulagwa, malinga shibhabhulegwenje bhanganyabho pushigaishe. 12 Nigunolile, Mwana Ngondolo pagopolaga shiundo sha shita, shilambolyo shikutetemelaga kwa kaje, na lyubha nibha lyanapi mbuti nngubho ja likang'anda. Mwei gowe guupindikwishe nibha gwanashe mbuti minyai. 13 Na ndondwa kumaunde niguigwile pai, mbuti shiikugwa ndolo ya iepo ya nkongo utikinywa na mbungo jikulu. 14 Kumaunde kukushoywaga mbuti kalatashi jiligwa, na itumbi yowe, na kila patimbiilwe na mashi nigupashoshiywe. 15 Na bhalalume bha pa shilambolyo, na bhakulungwanji, na bhakulungwanji bha manjola, na matajili, na bhakwetenje mashili, na bhatumwa, na bhangwana, nigubhaiishiyenje mmashembo na mwiitumbi ya maganga. 16 Nigubhaishemilenje itumbi na mandandawe bhalinkutinji, "Ntugwilanje, ntuiyanje na lubhombho lwa bhene bhaatama pa shitengu sha ukulungwa na ntuembuyanje na nnjimwa jika Mwana Ngondolo. 17 Pabha lyubha lya nnjimwa jabhonji liishe. Gani shaalame?"

7 Gakapiteje genega, gunaabhweninji ashimalaika nsheshe bhali bhajimingenenje nndumba nsheshe ya shilambolyo, bhaliibhilanga mbungo nsheshe ya shilambolyo, nkupinga panapagwe mbungo ja puga pa shilambolyo, na pantundu bhaali, wala panani nkongo gogowe. 2 Nigunimmwene malaika juna alikwela kukopoka kulikoposhela lyubha, ali na lulembo lwa a Nnungu bhakwete gumi. Nigwabhashemilenje kwa lilobhe lya utiya ashimalaika nsheshe bhapegwilwenje mashili ga kushiangabhanya shilambolyo na bhaali alinkuti, 3 "Nnashiangabhanyanje shilambolyo wala bhaali, na wala mikongo, mpaka pushitubhishe lulembo pa shenyi sha kila ntumishi jwa a Nnungu bhetu." 4 Penepo nigumbilikene ishahbu ja bhabhishilwenje lulembo, yani bhandunji 144,000 kukoposhela ku makabhila gowe ga Ishilaeli. 5 Kukoposhela ku likabhila lya a Yuda bhandunji 12,000, kukoposhela ku likabhila lya a Lubheni bhandunji 12,000, kukoposhela ku likabhila lya a Gadi bhandunji 12,000, 6 kukoposhela kulikabhila lya a Asheli bhandunji 12,000, kukoposhela ku likabhila lya a Naputali bhandunji 12,000, kukoposhela ku likabhila lya a Menashi bhandunji 12,000, 7 kukoposhela ku likabhila lya a Shimoni bhandunji 12,000, kukoposhela ku likabhila lya a Lawi bhandunji 12,000, kukoposhela ku likabhila lya a Ishakali bhandunji 12,000, 8 kukoposhela ku likabhila lya a Shabholoni

bhandunji 12,000, kukoposhela ku likabhila lya a Yoshepu bhandunji 12,000, na kukoposhela ku likabhila lya a Bhenjamini bhandunji 12,000. 9 Gakapiteje genega, guniibhwene likuga lya bhandunji lyagakombola mundu kubhalanganya. Bhandunji kukoposhela kila shilambo, na bha kila likabhila, na bha kila shipinga, na bhandunji bha kila ulongo, na bha kila shibheleketi. Bhajimingenenje mmujo ja shitengu sha upalume, na mmujo jika Mwana Ngondolo, bhali bhawetenje nngubho yanawe na bhali bhakamwilenje maagala ga mitende mmakono gabhonji. 10 Na bhene bhanganyabho bhatendaga utiyanga lilobhe bhalinkutinji, "Ntapulo ukoposhela kwa a Nnungu bhetu, bhaatama pa shitengu sha upalume na kuka Mwana Ngondolo!" 11 Na ashimalaika bhowe, gubhajimingenenje kutimbiilla shitengu sha upalume shila, na bhanangulungwa makumi gabhili na nsheshe, na yene iumbe nsheshe ikwete gumi ila. Nigubhagwilwenje namanguku mmujo ja shene shitengu sha upalume nikwaatindibhalila a Nnungu, 12 bhalinkutinji, Amina, yani Nneyo Peyo! Kuinyiwa, na ukonjelo, na lunda, na tenda eja, na ishima, na kukombola, na mashili, ibhe kwa a Nnungu bhetu piti piti Amina. (aiōn g165) 13 Penepo jumo munkumbi gwa bhene makumi gabhili na nsheshe bhala, nigubhamushiye, bhene bhawetenje nngubho yanawebha ni ashi gani, na bhaakoposhelanga kwei? 14 Nigunaajangwile, "Mmakulungwa, mmwe mmumanyi." Na bhalabho nigubhamalanjile, "Bhanganyabha ni bhakoposhelenje nshilaje sha punda, na bhashapilenje nngubho yabhonji minyai jika Mwana Ngondolo, nikuitenda ibhe yanawe kaje. 15 Kwa nneyo, bhanajimangana mmujo ja shitengu sha upalume, nkwaakumulila a Nnungu maengo, shilo na mui Nniekalu lyabho. Na bhene bhaatama pa shitengu sha upalume, shibhaabhikanje muulinda kwa kwaunishilanga liema lyabho. 16 Bhakakolanga shibhanga kabhili, wala nnjota. Lyubha likaabhalilanga, na wala lyoto likaabhabhulilanga. 17 Pabha Mwana Ngondolo ali pakatipakati shitengu sha upalume shaabhe nshunga jwabhonji, jwalakwe shaabhalongoyanje ku shinjweshwe sha mashi gakwete gumi. Na a Nnungu shibhaaungutanje minyoi jowe mmeyo gabhonji."

8 Mwana Ngondolo pagopolaga shiundo sha shabha, kunnungu kukujilaga malanga ga nushu shaa. 2 Nigunaabhweninji ashimalaika shabha, bhaajimangana mmujo ja a Nnungu bhala, nigubhapegwilenje mapenga shabha. 3 Malaika juna gwaishhe, nijima mmujo ja shitala shila, ajigele nkungu gwa shaabhu gwa bhishila lubhani. Gwapegwilwe lubhani lwalungwinji, nkupinga abhishile na malobhe ga bhandunji bha ukonjelo, pa shitala sha shaabhu shijima pa shitengu sha upalume. 4 Lyoui lya lubhani lila, na malobhe ga kwaajuga a Nnungu ga bhandunji bha ukonjelo, guipite kwa a Nnungu kupitila nkono uka malaika. 5 Penepo malaika gwatolile nkungu gwa bhishila lubhani gula, nikuugumbaya moto koposhela pa shitala pala, na gwauleshele ku shilambolyo. Penepo guikoposhele kulindimila, na nnjai, na lilobhe, na kumeta, na tetemela kwa litaka. 6 Bhai, bhene ashimalaika shabha bhala, bhalinginji na mapenga shabha, gubhaiibhishilenje ukoto bhagagombanje. 7 Malaika jwa ntai wagombile lipenga lyakwe, guikoposhele ula ja maganga na moto uanganyishe na minyai, guileshele pai, nngabhanyaga

shilambo showe pa tatu, shipande shimo gushitinishe, na nngabhanyaga mikongo jowe patatu, lipungu limo lya mikongo gulininishe, na maamba gowe ganashibhii gugatinishe. **8** Malaika jwa bhili gwagombile lipenga lyakwe, na shindu mbuti shitumbi shikulungwa shilikolela moto, gushilshelwe mbhaali. Na nngabhanyaga bhaali jowe pa tatu, shipande shimo, nibha minyai. **9** Nngabhanyaga iumbe yowe itama mbhaali pa tatu, lipungu limo guiwile na nneyo peyo, meli lipungu limo ikuangabhanywaga. **10** Malaika jwa tatu gwagombile lipenga lyakwe na lutondwa lukulungwa lulikolela mbuti kandili, gulugwile koposhela kumaunde, nngabhanyaga pa tatu nushi yowe ya mabhutuka na injweshwe, shipande shimo nigushigwililwe na lwene lutondwa lula. **11** Lwene lutondwalo pulushemwa, "Kubhabha" na shene shipande shagwililwe na lwene lutondwalo, mashi gakwe gatendaga bhabha, na bhandunji bhabhagwinji gubhawilenje kwa ligongo lya gene mashigo, pabha gatendaga bhabha kwa kaje. **12** Numbe malaika jwa nsheshe gwagombile lipenga lyakwe na nngabhanyaga lyubha, mwei na ndondwa yowe pa tatu, shipande shimo gushikomilwe, kwa nneyo shipande shimo sha shilangaya nibha lubhindu. Shipande shimo sha mui nibha lubhindu, na shipande shimo nibha shilo. **13** Ngaleleje kabhili, gunimpilikene litumbi jumo aliguluka kunani kaje, kwa lilibhe lya utiya alinkuti, "Ole, ole, ole ku bhandu bhaatamangana pa shilambolyo, kwa ligongo lya mapenga gana gapinga gombwa na ashimalaika."

9 Malaika jwa nng'ano gwagombile lipenga lyakwe, na gunilubhweni lutondwa lukulungwa lwagwile koposhela kumaunde mpaka ku litaka. Lwene lutondwalo lushinkupegwa upunguo gwa ku Jeanamu. (**Abyssos g12**) **2** Akaunukuleje ku Jeanamu, lyoui gulikwelile kukoposhela mwenemo, mbuti lyoui liikoposhela nnituto lyalikulungwa kaje. Kwa ligongo lya lyoui lyakoposhelaga mwenemo lyubha na liunde nibha lubhindu. (**Abyssos g12**) **3** Nnyoimo gugakoposhele maije, gugapite kunani shilambo showe, na gene maije gala gashinkupegwa mashili mbuti ga ibhalabhala ya pa shilambo pano. **4** Gubhalugulilwenje bhanaangabhanyanje manyai eu mikongo eu mitipo ja pa shilambo, ikabhe bhandu bhowe bhanginginji shilangulo shoshowe sha a Nnungu pa shenyi. **5** Gubhalugulilwenje bhaapotekanje kwa miei nng'ano, ikabheje bhanaabbulaganje. Kupoteka kwakwe pukwaliji mbuti mundu alumilwe na shibhalabhala. **6** Gene mobhago bhandunji bhaapinga kushiloleyanga shiwo ikabheje bhakashibhonanga, bhaapinga lokolilanga kuwa, ikabheje shiwo shiipinga kwaabhutukanga. **7** Gene maije gala pugaaliji mbuti palashi, ibhishilwe ukoto jende ku ngondo. Ku mitwe jabhonji bhashinkukolanga shindu mbuti shilemba sha shaabhu, na ku meyo kwabhonji pukwaaliji mbuti kuka mundu. **8** Bhashinkukolanga umbo ya manyololo mbuti ya bhanabhakongwe, na meno gabhonji pugaliji mbuti ga imba. **9** Bhashinkuwalanga shindu sha mbuti itale kuibhila pa ntima, na mapapiko gabhonji gatendaga ona mbuti nnindimo gwa mutuka yaigwinji ya palashi ibhutushila ku ngondo. **10** Bhashinkukolanga mishila ja mibha ja lumila bhandu mbuti shibhalabhala. Mashili ga kwaapotekanje bhandu miei jowe nng'ano kugakoposhelaga mmishila jabhonjimo. **11** Pubhalinginji

naka mpalume, malaika koposhela ku Jeanamu, mpalume jwabhonji, jwenejo kwa Shiebhulania pashemwaga Abhadoni, na Shiyunani pashemwaga Apolioni. (**Abyssos g12**) **12** Limbukute lya ntai lipitile, gaigele mambukute gabhili na ganakwiya. **13** Malaika jwa shita gwagombile lipenga lyakwe, numbe nne gumbilikene lilibhe liikoposhela ndumba nsheshe ja shitala sha shaabhu shaaliji mmujo ja a Nnungu. **14** Lyene lilibhelo gulinnugulile jwene malaika jwa shita akwete lipenga jula, "Gwaugulilanje ashimalaika nsheshe bhala bhatabhilwenje nnushi lukulungwa lushemwa Pulateshi." **15** Bhai bhene ashimalaika nsheshe bhala gubhaugulilwenje bhali bhabhishilwenje ukoto kwa gene malangano na lyene lyubhalyo na gwene mweigo na shene shakasho, bhandu bhowe nngabhanyaga patatu, lipungu limo bhaabbulaganje. **16** Manjola bhakwelilenje palashi pubhalinginji milioni mmia pa bhili. **17** Na nkulola kwangu, guniibhweni palashi na bhakwelilenje palashi. Bhakwelilenje palashi bhala bhashinkukolanga ngao ya itale ya langi janashe mbuti moto na ina ya langi ja buluu janapi na ja lindani. Mitwe jabhonji bhene ashipalashi bhala pujaaliji mbuti ja imba. Moto na lyoui na bhonga shiikoposhela nkang'wa yabhonji. **18** Bhandu bhowe nngabhanyaga patatu, lipungu limo gubhabhulegwenje kwa ligongo lya mambukute gatatu, yani, moto, lyoui, na bhonga, yakoposhelaga nkang'wa ja ashipalashi. **19** Mashili ga ashipalashi mugaaliji nkang'wa yabhonji na mmishila jabhonji. Mishila jabhonji pujaaliji mbuti mitwe ja lijoka, na kwa jene mishilajo, bhatendaga ulayanga bhandu. **20** Ikabheje, bhandu bhalepekenje gwangali kubhulagwa bhashinkukananga kuipeta na leka kuntindibhalila Lishetani na indu ibhaeleyenje kwa makono gabhonji yani, yanamu ya shaabhu, na ya ela, na ya shitala, na ya maganga, na ya mikongo, ikaakombola kulola, wala kupilikana, wala kujimajima. **21** Bhangaipetanga nileka itendi yabhonji ya bhulaga, na ya uabhi, na ya labhalabha na wala ya gwii gwabhonji.

10 Kabhili nigunimmwene malaika akwete mashili alielela kukoposhela kunnungu. Atimbililwe na liunde, na lipinda lya a Nnungu pantundu ntwе gwakwe. Lubhombu lwakwe lushinkubhala mbuti lyubha na makongono gakwe pugaaliji mbuti mapoto ga moto. **2** Munkono gwakwe ashinkukamula shitabhu shishoko shashiunukulwe. Nigwabhishile lukongono lwakwe lwa nnilo mbhaali na lukongono lwa nshinda pai papajumu, **3** Na gwashemile kwa utiya mbuti imba atuluma. Akajobheleje, nigujipilikanishe milindimo shabha ja nnjai. **4** Na yene nnjai shabha ila ikalindimileje napingaga kutandubha kujandika, ikabheje nigumbilikene lilibhe kukoposhela kunnungu lilinkuti, "Nnagajandishe gene gabheleketwe na yene nnjai shabha gala, ntende ga nng'yo." **5** Na malaika junammweni ajimi papajumu na mbhaali, nigwajinwile nkono gwakwe gwa nnilo kuloya kunnungu. **6** Nigwalumbile kwa lina lya a Nnungu bhaatama pitipiti na pitipiti, bhapengenyе kunnungu na yowe ili nkatimo, na indu yowe ili nshilambolyo, pamo na bhaali na yowe ili nkatimo, alinkuti, malanga ga lindilila kabhili gamalile. (**aiōn g165**) **7** Ikabheje mobha malaika jwa shabha gapinga gomba lipenga lyakwe, shirjubhi sha a Nnungu shishitimilile, malinga shibhashite kwaalungushiyanga bhatumishi bhabho ashinkulondola. **8**

Penepo lyene lilobhe linalipilikene kukoposhela kunnungu, nigulibhelekete na nne kabhili lilinkuti, “Nnjende nkatole shene shitabhu shiunukwilwe, shili munkono gwa jwene malaika ajimi mbhaali na pai papajumu.” 9 Bhai guninnjendele malaika jula guninnjulle ambe shene shitabhusho. Nigwamalanjile, “Ntole na nshilye, shipinga bhhabha mmatumbo genu, ikabheje shiipinga nong’a mbuti bhushi nkangw’a jenu.” 10 Kwa nneyo nigundolile shitabhu shishoko kukoposhela munkono gwakwe jwene malaika jula gunile. Ninong’a mbuti bhushi nkangw’a jangu, ikabheje ngamileje, matumbo gakumbotekaga. 11 Kabhili nigumalanjilwe, “Nnapinjikwa kulondola kabhili, ga makabhila gamagwinji, na ga ilambo, na ga ibhelekete, na ga bhapalume bhahagwinji!”

11 Penepo nigumbegwilwe nnai gwaapimila gwa mbuti imbo, nigumalanjilwe, “Nnjende nkapime liekalu pamo na shitala, na mwaabhalanganyanje bhakwaajuganga a Nnungu mwenemo. 2 Ikabheje nnapime lugwani lwa palanga lwa liekalu nneshe, pabha lugwanilo bhashipegwanga bhandunji bha ilambo ina. Bhene bhanganjabho shibhalibhatanje shilambo sha ukonjelo kwa myei makumi nsheshe na jibhili. 3 Na nne shinaatumanje bhaakong’ondela bhangu bhabhili, na shibhalondolanje kwa mobha 1,260 bhali bhawetenje nngubho ya shililo.” 4 Bhene bhanganjabha ni jene misheituni jibhili jila, na itengu ibhili ya kandili, ijima mmujo ja bhakulungwa bha shilambo showe. 5 Ibhaga mundu jojowe apingaga kumpotekanga, moto shiukoposhe nkangw’a jabhonji, nikwaatiniyanga ashaamagongo ajabhonji. Nneyo peyo shaapinjikwa kubhulagwa, mundu apinga kumpotekanga. 6 Bhene bhandunjabha bhakwetenje mashili ga tabha maunde jinanye ula, mobha ga ukulondola gwabhonji. Na shibhakanjanje mashili ga pindikula mashi kubha minyai, na kushikoma shilambolyo kwa limbukute lyolyowe, malinga shibhaapinganga. 7 Bhai pushibhamaliyanje ukong’ondelo gwabhonji, jwene nnyama akoposhela ku Jeanamu, ashaakomane nabhonji ngondo, na ashaabhakombolanje nikwaabbulaganga. (Abyssos g12) 8 Mitui jabhonji shijijeshwe mumpanda gwa shilambo shikulungwa, kwa lina lya nng’iyo pushashemwaga, Shodoma eu Mishili, kubhapotekwe Bhakulungwa bhahonji. 9 Kwa malanga ga mobha gatatu na nushu, bhandu bha kila likabhila, na kila ulongo, na bha kila shibhelekete, na bha kila shilambo, shibhajiolanje jene mituijo, na bhakapinganga jishikwe. 10 Bhandunji bhaatamangana pa shilambolyo, shibhaangalalanje kwa shiwo sha bhene ashinkulondola bhahilibo, kwa pelegana upo, pabha bhene ashinkulondolabho bhashinkwaapotekanga bhandunji bhaatamangana pa shilambolyo. 11 Ikabheje kumpelo gwa gene mobha gatatu na nushugo, mbumu jwa gumi kukoposhela kwa a Nnungu nigwabhayushiyanje, na bhandu bhowe bhaibhwenenye yenei nigubhajogopenje kwa kaje. 12 Kungai ashinkulondola bhabhili bhala gubhapilikenenje lilobhe lya utiya kukoposhela kunnungu lilikwaabhalanjilanga, “Nnjyanganane kunani kuno.” Nabhalabhonji gubhapitengene kunani ku mmaunde, akuno ashaamagongo ajabhonji bhalinkwaalolesheyanga. 13 Malanga gogo pego niguukoposhele nng’ungumilo gwankulungwa gwa pa shilambolyo, na shipande shimo sha ipande kumi ya shilambolyo nigushigwile. Bhandunji elupu shabha nigubhawilenje kwa

gwene nng’ungumilo, na bhaigelenje bhala nigubhajogopenje kaje, nikwaakuya a Nnungu bha kunnungu. 14 Limbukute lya bhili lipitile, nnole, limbukute lya tatu linakwiya. 15 Kungai malaika jwa shabha gwagombile lipenga lyakwe, malobhe ga utiya gakupilikanikaga kukoposhela kunnungu galinkuti, “Upalume gwa shilambolyo, nnaino ushibha upalume gwa Bhakulungwa bhetu na gwa a Kilishitu bhahho na bhenebho shibhatagwale pitipiti.” (aiōn g165) 16 Na bhakulungwanji makumi gabhili na nsheshe bhala, bhatemingenenje mmujo ja a Nnungu pa itengu jabhonji ya upalume, nigubhagwilenje namanguku nkwaatindibhalila a Nnungu 17 bhalinkutinji, “Tunakuntendela eja mmakulungwa a Nnungu, mpali, na mwaapali, pabha kwa mashili genu ga punda, nshikombola kuubhika upalume gwenu! 18 Bhandunji bha ilambo ina bhashitumbalanga, ikabheje malanga ga nnjimwa yenu gaishe. Malanga gaishe ga kwaukumulanga bhawilenje, na kwaapanganga upo bhatumishi bhenu ashinkulondola na bha ukonjelo, pamo na bhowe bhakuliishimunji lina lyenu, bhakulungwanji na bhashoko, ni malanga ga kwaangabhanyanga bhakushiangabhanyanga shilambolyo.” 19 Penepo liekalu lya a Nnungu lili kunnungu guliugwisha na lishanduku lya malagano lyabho gulibhoneshe nniekalumo. Guikoposhele kumeta, malobhe ga utiya, kulindimila kwa nnjai, na nng’ungumilo gwa shilambolyo, na ula jikulungwa ja maganga.

12 Kungai, shilangulo shikulungwa shikubhonekaga kunnungu, jwankongwe awashiywe lyubha na mwei uli pai makongono gakwe, na pa ntwē gwakwe shilemba sha ndondwa likumi limo na ibhili. 2 Ashinkukola shitumbo, aliguta kupoteka ushungu gwa kola mwana. 3 Shilangulo shina shikubhonekaga kunnungu, lijoka likulungwa lyanashe lya mitwe shabha na mbembe shabha na kila ntwē na shilemba. 4 Na nshila gwakwe nipejila ndondwa lipungu limo lya gatatu ga ndondwa yowe ya kunnungu, nikwiigwiya pa shilambolyo. Na lijoka jula gwajimi mmujo muka jwankongwe aliji tome na kola mwana jula, nkupinga abhelekwaga ammile. 5 Na jwankongwe jula gwakwete mwana jwannume, jwenejo shatagwale ilambo yowe kwa imbo ja shitala. Na mwana jula gwanyakwilwe kupelekwa kwa a Nnungu ku shitengu shakwe sha upalume 6 Jwankongwe jula gwabhutushile kuanga kweneko a Nnungu bhashinkuntendela ndamo, nkupinga kweneko bhammikanje muulinda kwa mobha elupu jimo na mmia pa bhili na makumi shita. 7 Bhai jikutandubhaga ngondo kunnungu. Mikaeli na ashimalaika bhakwe gubhakomenenje ngondo naka lijoka jula, najwalakwe lijoka jula na ashimalaika bhakwe gwakomene nabhonji. 8 Ikabheje lijoka jula na ashimalaika bhakwe gubhalepelenje na kunnungu kula bhanganakolanga ndamo kabhili. 9 Bhai, lijoka nkulungwa jula akuleshelwaga palanga. Jwene lijokajo ni lijoka jwa bhukala ashemwa ibhiliishi eu Lishetani lipuganya bhandu pa shilambolyo. Gwaleshelwe mpaka kushilambolyo pamo na ashimalaika bhakwe. 10 Gumbiikene lilobhe likulungwa kukoposhela kunnungu lilinkuti. “Nnaino uishe ntapulo na mashili na upalume gwa a Nnungu bhetu na ukulungwa gwa a Kilishitu bhahho. Pabha akwaashitakiyanga ashaapwetu kwa a Nnungu jula, aleshelwe pai. Elo aleshelwe pai akwaashitakiyanga shilo na mui. 11 Ashaapwetu bhankombwelenje kwa minyai jika

Mwana Ngondolo na kwa lilobhe libhakong'ondelenje, pabha bhangapinganga gumi gwabhonji, mpaka nibha tayali nkali kuwa. 12 Kwa nneyo mwinonyelanje kunnungu na indu yowe itama kunnungu. Ikabheje, ole pa shilambolyo na mbhaali. Pabha lbhilishi ashikunjiilanga ali na nnjimwa ya kaje, pabha amumanyi kuti mobha gakwe galepeshe gashokope." 13 Lijoka jula akabhoneje kuti aleshelwe pai pashilambolyo, gwatandwibhe kunkagulila jwankongwe akwete mwana jwa shileu jula. 14 Ikabheje jwankongwe jula gwapegwilwe mapapiko gabhili mbuti ga litumbu jwankulungwa kupinga agulushe kwataliya kummutuka lijoka jula, mpaka ku ndamo jakwe ku anga kweneko abhikwe muulinda gwangali shigwegwe kwa yaka itatu na myei shita. 15 Bhai, lijoka jula gwakopweye mashi gamagwinji mbuti lushi lwa mabhutuka, galikunkagula jwankongwe jula nnyuma kupinga gantole. 16 Ikabheje ntaka ukunnjangutilaga jwankongwe jula, nikwiunukula mbuti kang'wa nikugamila mashi ga mabhutuka gakopokaga nkang'wa muka lijoka jula. 17 Bhai, lijoka lila gulintumbalile jwankongwe jula, gulijabhwiile likakomane ngondo na bhana bhalepekenje bhabelekwenje naka jwankongwe jula, yani bhowe bhaakundanga malajilo ga a Nnungu na kwaakong'ondela a Yeshu.

13 Bhai, lijoka lila gulijimi nnyenje bhaali. Gunimmwene nnyama jumo alikopoka mbhaali. Ashinkukola mitwe shabha na mbembe likumi limo, na kila lupembe lwashinkubhikwa shilemba. Muntundu mitwe jakwe gashinkujandikwa mena ga kwaatukana a Nnungu. 2 Jwene nnyama junammwene jula paaliji mbuti ubhi, makongono gakwe mbuti liogo na ntwе gwakwe mbuti imba. Lijoka jula gwannagbhile nnyama jula mashili gakwe na shitengu shakwe sha ukulungwa na mashili ga kaje. 3 Ntwе gwakwe gumo pugwabhonekaga mbuti ushulaywa libhanga lya shiwo, ikabheje libhanga lyakwe liponile. Shilambo showe shikunkanganigwaga nnyama jula nigubhankagulenje. 4 Bhandunji bhowe gubhantindibhalilenje lijoka jula kwa pabha nnyama jula ashinkunngabhila mashili gakwe. Gubhantindibhalilenje na nnyama jula bhalinkutinji, "Gani ali malinga aju nnyamaju? Numbe gani akombola kukomana najo?" 5 Na nnyama jula gwaleshilwe abheleketete malobhe ga kwiitapa na ga kwaatukana a Nnungu, gwapegwilwe mashili ga tenda liengo lyakwe kwa myei makumi nsheshe na jibhili. 6 Bhai, gwatandwibhe kwaatukana a Nnungu na alitukana na lina lyabho na ndamo jabho na bhowe bhaatamangana kunnungu. 7 Na gwaleshilwe akomane ngondo na bhandunji bha ukonjelo nikwaakombolanga. Gwapegwilwe ukulungwa kubhandunji bha kila kabhila, na kila shipinga, na kila shibheleketi, na kila shilambo. 8 Bhowe bhaatamangana pa shilambolyo shibhantindibhalilanje, ikabheje bhene bhajandikwenje mena gabhonji nshitabhu sha gumi shika Mwana Ngondolo ainjiwe, kuumila ku ndandubho kwa panganywa shilambolyo. 9 Akwete makutujo, apilikane! 10 Mundu atumbililwe kukamulwa utumwa, shaakamulwe utumwa, na mundu jwa bhulagwa na upanga, shabhulagwe na upanga. Kwa nneyo, bhandunji bha ukonjelo bhapaiililanje na bhakolanje ngulupai. 11 Kabhili, gunimmwene nnyama juna alikopoka nnitaka. Ashinkukola mbembe ibhili mbuti ya ngondolo, ikabheje atendaga bheleketete mbuti lijoka. 12 Ashinkukola mashili gapegwilwe nagwe nnyama jwa ntai jula, na gwalangwile

mashili gakwe kuka nnyama jula. Akushitendaga shilambolyo, na bhowe bhaatamangana mwenemo, kuntindibhalila nnyama jwa ntai, akwete libhanga liponile jula. 13 Gwatendile ilapo yaikulungwa, akubhulayaga moto ukoposhe kunnungu utulushe pa shilambolyo, nibhoneka ku bhandu bhowe. 14 Alikwaapuganyanga bhandunji bhaatamangana pa shilambolyo, kwa ilapo yapegwile kwiitenda paka nnyama jwa ntai jula. Alikwaabhalanjilanga bhaatamangana pa shilambo bhang'alashiyanje shanamu nnyama jwa ntai auleywe kwa upanga nilama kabhili jula. 15 Nigwapegwilwe mashili ga pepetela mbumu ya gumi nshanamu shika nnyama jwa ntai jula, mpaka gushikombwele kubheleketete nikwaabhulaganga bhandunji bhowe bhashitindibhalilenje shanamu shika nnyama shila. 16 Na alikwaatendanga bhowenji, bhashoko na bhakulungwanji, matajili, na bhaalaga, na bhangwana, na bhatumwa bhalembwanje lulembo munkono gwabhonji gwa nnilo eu pa shenyi shabhonji. 17 Na kabhili kuti mundu jojowe anaume shindu eu kuusha, ikabheje mundu alembilwe lwene lulembolo, yani lina lika nnyama jula eu eshabhu ja lyene linalyo. 18 Penepa panapinjikwa lunda! Akwete lunda shagamanye malombolelo ga eshabhu jika jwene nnyamajo, pabha ni eshabhu jikunnombola mundu. Jene eshabhujo, mmia shita na makumi shita na shita.

14 Kabhili, gunishibhweni shitumbi sha Shayuni, na Mwana Ngondolo ajimi pantundu jakwe, na bhandunji 144,000, bhalinginji pamo na jwenejo, bhajandikwenje lina lyakwe, na lya Ainagwe, pa shenyi shabhonji. 2 Bhai, gumbilikene lilobhe kukopoka kunnungu lya mbuti mashi gamagwinji galibhutuka na lilobhe lya mbuti kubhalula kwa nnjai. Lyene lilobhelo pulyaaliji mbuti lya bhaagombanga ingwaya. 3 Bhatendaga jimbanga lwimbo lwaambi pa shitengu sha ukulungwa, na mmujo ja iumbe nsheshe ila, na bhanangulungwa bhala. Jwakwapi mundu akombwele kwijiganya lwene lwimbo, ikabhe bhene bhandunji 144,000 bhala, bhagombolwenje pa shilambolyo. 4 Bhene bhandunji bho bhanganayatiyanga na bhanabhakongwe, pabha pubhalinginji bha ukonjelo. Bhene bhanganayabho bhanakunkagulanga Mwana Ngondolo kokowe kushajende. Bhashigombolwanga kukopoka munkumbi gwa bhandunji bhana, nibhanganga nimbu kwa a Nnungu na kuka Mwana Ngondolo. 5 Bhangabheleketanga ya unami, wala bhanglebhanga. 6 Kungai, gunimmwene malaika juna aliguluka kunani ali na Ngani ja Mmbone ja a Nnungu, ja pitipiti, alunguye ku bhandu bhaatamangana nshilambolyo, bha ilambo yowe, na makabhila gowe, na bhandunji bha ibheleketi yowe, na ipinga yowe. (aiōnios g166) 7 Kwa lilobhe likulungwa gwashite. "Mwaatindibhalilanje a Nnungu na mwaakuyanje! Pabha lyubha lya ukumu liishe. Mwaatindibhalilanje bhenebho bhapengenyе kunnungu na shilambolyo na bhaali na injweshwe ya mashi." 8 Malaika jwa bhili jwa a Nnungu gwankagwile malaika jwa ntai jula alinkuti, "Agwile! Elo, Bhabhuloni nkulu agwile! Abhapangangaga bhandunji bha ilambo yowe ukana bhang'wanjanje, ukana gwa bhabha gwa labhalabha kwakwe!" 9 Malaika jwa tatu jwa a Nnungu gwabhakagwilenje bhahili bhala aibheleketete kwa utiya alinkuti, "Mundu jojowe akuntindibhalila jwene nnyama jula, na shanamu shakwe nikunda kulembwa lulembo lwakwe pashenyi

eu munkono gwakwe, 10 na jwalakwe shaapapile ukana gwa njimwa ja a Nnungu, utajilwe nshing'welo sha njimwa jabho gwangali kuimula na mashi. Jwene mundujo apinga potekwa kwa moto na bhonga pa ashimalaika bha ukonjelo na Mwana Ngondolo. 11 Na lyoui lya moto gwa mboteko yabhonji nitutuma kwenda kunani pitipiti. Bhene bhandunji bhantindibhalilenje jwene nnyama jula na shanamu shakwe nilembwa lulembo lwa lina lyakwe, bhakapumulilanga shilo na mui." (aiōn g165) 12 Kwa nneyo, bhandunji bha ukonjelo, bhaakundanga malajilo ga a Nnungu, nikwaakulupalila a Yesu, bhanapinjikwanga bhaipililanje. 13 Gumbilikene lilobhe kukopoka kunnungu lilinkuti, "Nnjandishe kuti, kutandubhila nnaino mbaya bhandunji bhaawanganga bhali bhalundenenje na Bhakulungwa." Na jwalakwe Mbumu, akuti! "Elo! Shibhapumulilanje shilaje shabhonji, pabha shibhalongananje na itendi yabhonji." 14 Nigunilimbweni liunde lyanawe. Na pantundu liunde lila ashinkupagwa mbuti Mwana juka Mundu atemi. Awete shilemba sha shaabhu muntwe gwakwe akamwile mbopo ja tema munkono gwakwe. 15 Kungai malaika juna gwakopweshe nniekalu, na kwa lilobhe lya utiya gwammalanjile jwene atemi pantundu liunde jula, "Shonde, tola mbopo jako ukaneng'ene, pabha miongwwe ja maneng'eno jiiishe, maneng'eno pa shilambolyo gatendeshe." 16 Bhai, bhatemi pantundu liunde bhala gubhaleshele mbopo jabho pa shilambolyo na maneng'eno pa shilambolyo na gunganeng'enwe. 17 Kungai malaika juna gwakopweshe nniekalu lili kunnungu, najwalakwe ali na mbopo jakwe ja tema. 18 Na malaika juna akwete mashili ga amulisha moto, gwakopweshe ku shitala, gwammalanjile kwa utiya malaika akwete mbopo ja tema jula, "Na ugwe utole mbopo jako, ukaneng'ene matunje ja shabhibhu ya pa shilambolyo, pabha shabhibhu yakwe ishejele!" 19 Bhai, jwene malaika jula gwaleshele mbopo jakwe pa shilambolyo, gwakabhile shabhibhu ya pa shilambolyo, gwaileshele nshikelelo shikulungwa sha minyila shabhibhu, shikelelo sha njimwa ja a Nnungu. 20 Shabhibhu guiminyilwe nshikelelo shaaliji kunyenje shilambo kula, gujikopweshe ndanje ja minyai nshikelelo mula, ja ishila shanga shika mundu nibhutuka, mwanja gwa maili mmia pa bhili.

15 Kabhili gunishibhweni shilangulo shina kunnungu, shikulungwa na sha imongwa. Bhashinkupagwanga ashimalaika bha a Nnungu shabha, bhakwetenje mambukute shabha ga kumpelo. Kwa gene mambukute shabhago, njimwa ja Nnungu jimalile. 2 Na kabhili gunishibhwenye shindu mbuti bhaali ja shiyoo, jiengenywa na moto. Gunaabhweneje kabhili bhandunji bhankombwelenje nnyama alugwilwe lina lyakwe kwa jene eshabhu jila, na shanamu shakwe. Bhene bhandunji bhajimingene nnyenje bhaali ja shiyoo, bhalingini na ingushingushi ibhapegwilenje na a Nnungu. 3 Bhalijimbanga lwimbo lwa a Musha, bhatumishi bha a Nnungu na lwimbo luka Mwana Ngondolo. "Mmwe Mmakulungwa a Nnungu Nkwete Mashili gowe, itendi yenu yaikulungwa na ya lapa! Mmwe a Mpalume bha ilambo ina. Mipanda jenu ni ja aki na ja kweli! 4 Mmakulungwa, gani akakunnjogopa mmwe? Gani akakulikuya lina lyenu? Mmwe jikape ni Mmaukonjelo. Ilambo yowe shiinjiile nikuntindibhalila, pabha itendi yenu ya aki imanyishe." 5 Gakapiteje genego, gunolile nikukubhona

kunnungu na nkati jakwe liema likong'ondela kupagwa kwa a Nnungu liugwilwe. 6 Bhai, ashimalaika shabha bha a Nnungu, bhakwetenje mambukute shabha bhala, gubhakopkengene nniekalu lya a Nnungumo, bhawashiywenje nngubho ya kitani ja takata, ya melemeta na bhatabhilwenje mishipi ja shaabhu pantima. 7 Na jumo munkumbi gwa iumbe nsheshe ikwete gumi ila, gwabhapelenje ashimalaika bha a Nnungu bhala mikungu shabha ja shaabhu jigumbele njimwa ja a Nnungu, bhakwete gumi gwa piti piti. (aiōn g165) 8 Liekalu likugumbalaga lyoui likopweshe muukonjelo gwa a Nnungu na mashili gabho, jwakwapi akombwele kujinjila nniekalu, mpaka gamalile mambukute ga ashimalaika shabha bha a Nnungu bhala.

16 Nigumbilikene lilobhe likulungwa kukopoka nniekalu, lilikwaabhalanjilanga ashimalaika shabha bha a Nnungu bhala lilinkuti, "Nnjendangane nkajitanje mikungu ja njimwa ya Nnungu nshilambolyo." 2 Bhai, malaika jwa nta jula gwapite jita nkungu gwakwe pa shilambolyo. Shangupe mabhanga ga potesheya, gakwaapatangaga bhowenji bhakwetenje lulembo luka nnyama jula, na bhashitindibhalilenje shanamu shakwe. 3 Na malaika jwa bhili gwapite jita nkungu gwakwe mbhaali. Na bhaali jikubhaga minyai malinga jika mundu awile, na iumbe yowe mbhaali guiwile. 4 Malaika jwa a Nnungu jwa tatu, gwapite jita nkungu gwakwe nnyushi ya mabhutuka, na mwinjweshwe ya mashi na yalakwe ikubhaga minyai. 5 Gumbilikene malaika nkulungwa jwa mashi alinkuti, "Mmwe mmaukonjelo, mmatangu na tangu! Nshitenda aki kuukumula nneyo. 6 Pabha bhashinkwaabulaganga bhandunji bha ukonjelo, na ashinkulondola bhahho, na mmwe nshikwapanganga minyai bhapapilanje, ishipinjikwa bhaukumulwanje nneyo!" 7 Gumbilikene lilobhe ku shitala lilinkuti, "Elo, Mmakulungwa a Nnungu Nkwete Mashili gowe! Ukumu yenu, ya kweli na ya aki!" 8 Na malaika jwa nsheshe gwajitile nkungu gwakwe kunani lyubha. Na lyubha gulipegwilwe mashili ga joka bhandu na moto gwakwe. 9 Bhai, bhandunji gubhatinywenje kwa kaje, nigubhaatukenenje a Nnungu bhakwete mashili kwa gene mambukutego. Ikabeje bhangaipetanga nikwaakuya a Nnungu. 10 Malaika jwa nng'ano gwajitile nkungu gwakwe pa ntundu shitengu sha ukulungwa shika nnyama jula. Lubhindu lukutabhaga muukulungwa gwakwe, bhandunji gubhaitaunenje nneje yabhonji kwa poteka. 11 Gubhaatukenenje a Nnungu bha kunnungu kwa ligongo lya mboteko yabhonji na mabhanga gahonji. Ikabeje bhangaipetanga itendi yabhonji yangali ya mmbone. 12 Na malaika jwa shita nigwajitile nkungu gwakwe pantundu lushi lukulungwa lwa mabhutuka lushemwa Pulateshi. Mashi gugajumilile, kwa nneyo guuyushile mpanda gwa pita bhapalume kukopoka kulikopoka lyubha. 13 Gunaabhweneje ashimbumu bhatatu bha nyata, bha mbuti yula, kukopoka nkang'wa muka lijoka jula, na nkang'wa muka nkulondola jwa unami jula. 14 Bhene bhanganjabho ni mbumu ya ashimaoka bhatendanga ilapo. Ni bhakwendangana ku bhapalume bha pa shilambolyo, nikwashemanga pamo kungondo ja lyene lyubha likulu lya a Nnungu Bhakwete Mashili gowe lila. 15 "Mpiilikane! Nne ngunakwiya malinga nngwii! Na mbaya mundu asheya akuno awete nngubho yakwe anajime jime makonope nitokomala." 16

Bhai, bhene ashimbumbho gubhaashemilenje pamo bhapalume ku mmabali jishemwa kwa Shiebhulania, Alimagedoni. 17 Na, malaika jwa shabha gwajitile nkungu gwakwe kunani. Lilobhe likulungwa likupilikanikaga kukopoka kushitengu sha ukulungwa, nniekalu, lilinkuti, "Uishile mpelo!" 18 Gwuitandwibhe kumeta na nnjai, na kulindimila, na kuungumila kukulungwa kwa shilambo, kukanabhe koposhela kutandubhila pubhampengeny mundu. 19 Shilambo shikulungwa shila shikugabhanikaga ipande itatu, na ilambo ina nshilambolyo ikuangabhanikaga. Na Bhabhuloni shilambo shikulu, shikukumbushilwaga na a Nnungu. Gushipegiwilwe shing'welo sha ukana gwa njimwa ja a Nnungu. 20 Na ilambo yowe itimbililwe na mashi ikuobhaga na itumbi yangabhoneka kabhili. 21 Ula ja matalila gamakulungwa, ga topa ga malinga kilo makumi nng'ano kwa kila limo, gugaanyeelenje bhandunji. Na bhandunji gubhaatukenenje a Nnungu kwa ligongo lya mboteko ya ula ja matalila jila. Pabha, lyene limbukute lya ula ja matalilajo pulyaaliji lya jogoya.

17 Malaika jumo munkumbi gwa bhakwetenje mikungu shabha bhala, nigwajile malanjila, "Jiya akuno, nikulangule ukumu japegiwilwe lijajana nkulu, atama pantundu mashi gamagwinji jula. 2 Bhapalume bhagonilenje nagwe jwenejo na bhaatamangana pa shilambolyo, bhakolelwenje ukana gwa labhalabha kwakwe." 3 Gwandolile, Mmbumu mpaka kuanga. Kweneko gunimmwene jwankongwe atemi pantundu nnyama jwanashe. Jwene nnyamajo ashinkujandikwa nshilu showe, mena ga matukano, ashinkukola na mitwe shabha na mbembe likumi limo. 4 Jwene jwankongwejo ashinkuwala nngubho ja langi ja shambalau na nnangali, ali aikelengelele na yuma ya shaabhu, na madini ga ela yaigwinji na lulu. Munkono gwakwe ashinkukamula shikombe sha shaabhu, shigumbele yangali ya mmbone, na ya nyata ya labhalabha kwakwe. 5 Pashenyi shakwe ashinkujandikwa lina lya nng'yo, "Bhabhuloni Nkulu, Nyinamundu jwa Majajana, na ya Nyata ya pa Shilambolyo." 6 Gunimmwene jwene jwankongwe akolelwe minyai ja bhandunji bha ukonjelo, na bhandunji bhahulegwenje kwa ligongo lya kwaakong'ondela a Yeshu. Ngammoneje nashinkukanganigwa kwa kaje. 7 Ikabheje malaika gwamalanjile, "Kwa ndi unakanganigwa? Nne shinukubhalanjile malombolelo ga nng'yo gaka jwene jwankongweju na nnyama jwannijelele akwete mitwe shabha na mbembe likumi limoju. 8 Jwene nnyama jugummwenejo, bhukala paaliji jwankoto, ikabheje nnaino awile. Nkali nneyo, akakabha kukwela kukopoka ku Jeanamu, ikabheje shabhulagwe." Bhatamangana pa shilambolyo shibhakanganigwanje, elo, bhandunji bhowe bhanganjandikwanga mena gabhonji nshitabhu sha gumi kumila nantando gwa shilambolyo, shibhakanganigwanje kummona jwene nnyamajo, aliji jwankoto bhukala, niwa na nnaino anakoposhela kabhili! (Abyssos g12) 9 Penepo panapinjikwa lunda na lumanyo! Mitwe shabha jila ni itumbi shabha yatamila jwene jwankongwejo. Na kabhili jene mitwejo ni bhapalume shabha. 10 Munkumbi gwa bhene bhapalume shabhabho, nng'ano bhagwilenje, jumo ni atagwala nnaino, na juna akanabhe ika, pushaishepo shalonjeye mobha gashokope. 11 Jwene nnyama aliji bhukala jwankoto, ikabheje nnaino jwakwapi kabhili, jwenejo

ni mpalume jwa nane, na jwalakwe nneila peila ni munkumbi gwa shabha bhala, na apinga bhulagwa. 12 "Mbembe likumi limo ila, ni bhapalume bhakanabhe tandubhanga kutagwala. Ikabheje shibhapegwanje mashili ga tagwala kwa shaa jimo nagwe nnyama jula. 13 Bhene likumi limo bhala bhanatumbililanga shindu shimo na shibhampanganje nnyama jula mashili na ukulungwa gwabhonji. 14 Shihakomananje ngondo naka Mwana Ngondolo, ikabheje Mwana Ngondolo shaabhakombolanje, pabha jwalakwe ni Nkulungwa jwa bhakulungwanje na Mpalume jwa bhapalume. Na shaabhe pamo na bhshemilwenje na agulwa bhala, na bhalinginji bha kulopalika." 15 Kabhili malaika gwamalanjile, "Mashi guugabhweni patemi lijajana pala, ni lugwinjili lwa bhandunji bha kila shilambo, na kila langi, na kila shibheleketi. 16 Na mbembe likumi limo yugwiibhwene na nnyama jula, shibhanshimanje lijajana jula. Shibhatolanje kila shindu shakwete, na bhannekanje makonope, shibhalyanganje nnyama jakwe na malepei, bhatinyanje na moto. 17 Pabha a Nnungu bhashinkutenda mitima jabhonji jitumbilile kutenda gaka jwenejo, yani bhatabhanile ashaayene, na kumpa nnyama jula ukulungwa gwabhonji gwa tagwala, mpaka pushigamailile gubhabheleketi a Nnungu gala." 18 "Na jwankongwe jugwammwene jula, ni shilambo shikulu shikwete ukulungwa kwa bhapalume bha pa shilambolyo."

18 Gakapeteje genego, gunimmwene malaika juna alituluka kukopoka kunnungu. Ashinkukola mashili ga punda, na shilambolyo shikulungaywaga kwa ukonjelo gwakwe. 2 Bhai, gwakweshiye lilobhe alinkuti, "Shigwile, shilambo shikulu sha Bhabhuloni shigwile! Nnaino shishibha ndamo ja mashetani, na ashimaoka bhanganji bha mmbone, ndamo ja ijuni yangali ya mmbone na ya nyata. 3 Pabha ilambo yowe ishikolelwa ukana gwa labhalabha, na bhapalume bha shilambolyo bhashigona nabhonji. Na bhaatendanga upindi bha pa shilambolyo, gubhapatilenje mali kwa ligongo lya shonanga shakwe." 4 Kungai gumbilikene lilobhe lina kukopoka kunnungu lilinkuti, "Mmandu bhangu, nshokanganane shene shilambosho, nnaikundikanyanje mwilebho yakwe, mwiembuyanje na mboteko yakwe. 5 Pabha ilebho yakwe ishupunda kushuluka, ishigumbala mpaka niika kunnungu, na a Nnungu bhaikumbushile ilebho yakwe. 6 Muntendelanj malinga shantendelenje mmanganya, muntendelanj pabhili yantendelenjeyo. Nshing'welo shakwemo munngumbashianje pabhili. 7 Mumpanganje mboteko na kuinjika, malinga shaitapaga, na malinga shaikonjaga. Pabha sha muntima akuti. 'Ndemi apano, nne akongwa a mpalume. Nne nngabha najwankongwe nshitenga, na wala nangali sha kwiigutanjila!' 8 Kwa lyene ligongolyo mambukute shiganng'imane lyubha limope, shiwo na shiilo na shibhanga. Shatininye na moto, pabha bhakunng'ukumula, ni a Nnungu Bhakwete Mashili gowe." 9 Bhapalume bha pa shilambolyo bhagonilenje nagwe jwenejo, akuno bhalikwiikonjanga kwa shonanga, shibhagutanje na kunngutanjila, pushibhalibhonanje lyo lya tiniywa kwakwe. 10 Shibhajimangane kwa talika kwa ligongo lya jogopa mboteko yakwe, bhalinkutinji, "Ole! Ole, nnole shilambo sha Bhabhuloni, shilambo shikulungwa shikwete mashili! Pabha kwa shaa jimope ukumu jako jikuishile." 11

Bhaatendanga upindi bha pa shilambolyo, shibhagutanje na kungutanjila, pabha jwakwa auma kabhili upindi gwabhonji, **12** Atendaga uma indu ya igwinji. Shaabhu na ela, na maganga ga ela yaigwinji, na lulu, na nngubho ya kitani ja mmbone, na nngubho ya langi ja shambalau, na alili, na nngubho yanashe, na kila nkongo gwa nunjila, na kila shikelelo shieleweywe kwa mbebe, na kila shikelelo sha mikongo ja ela yaigwinji, na sha shabha, na sha shitale, na sha malumalu, **13** na ndalashini, na ilunjilo, na lubhani, na mauta ga nunjila, na udi, na mvinyo, na mauta ga nsheituni, na utandi gwa mmbone, na ngano, na ng'ombe, na ngondolo, na palashi, na mutuka, na bhatumwa, yani bhandunji. **14** Bhaatendanga upindi bhalikummalanjilanga. "Mbwaiko yowe yugwaloleyaga ila iobhile, na utajili na kushuma kula kupelile, ukakombola kwiipata kabhili!" **15** Bhaatendanga upindi bhapatilenje mali kwa upindi na shene shilambosho, shibhajimangane kwa taliya kwa ligongo lya jogopa mboteko yakwe, bhaligutanga kwa ililo, **16** bhalinkutinji, "Ole! Ole, shene shilambo shikulungwashi. Gwayobhelele kuwalila nngubho ya kitani, ya langi ja shambalau, na yanashe, na kwiikwatula na shaabhu, na maganga ga ela yaigwinji, na lulu! **17** Kwa shaa jimope utajili gwako uobhile!" Na bhowe bhaendeshanga meli, na bhandunji bhowe bhakwendangana mmeli, na indu ina ikwenda mmashi, na bhandunji bhakwiipashilanga mmeli, na bhaakumulanga maengo mmeli, gubhajimimigene kwa taliya, **18** pushibhalibhonanje lyoui lya moto gwa tiniywa kwakwe, shibhagutanje kwa utiya bhalinkutinji. "Shikanabhe koposhela shilambo shikulungwa malinga shenesii!" **19** Gubhaitutulilenje ndutuli mmitwe jabhonji, akuno bhaligutanga kwa shililo, bhalinkutinji. "Ole! Ole, nnole shilambo shikulungwa shila! Bhowe bhakwetenje meli, bhapwaikenje na utajili gwakwe. Kwa shaa jimope indu yowe ititimile! **20** Nng'angalalanje kunnungu na mmandunji bha ukonjelo, ashimitume na ashinkulondola bha a Nnungu! Pabha a Nnungu bhashiukumula kwa ligongo lya itendi, yantendelenje mmanganya!" **21** Na malaika jumo akwete mashili, gwajinwile liganga lya mbuti liganga likulungwa lya yajila, gwalileshele mbhaali, alinkuti, "Nneyo na shilambo shikulu sha Bhabhuloni, shipinga leshelwa pai, na wala shikabhoneka kabhili. **22** Nyimbo ya bhaagomba ingushingushi na bhaajimba, na bhaagomba imbata na mbalapala, wala ikapilikanika kabhili munngwako. Munngwako akabhoneka kabhili pundi, wala akwete shiloi shoshowe. Na liganga lya yajila likapilikanika kabhili munngwako. **23** Shilangaya sha kandili shikalangaya kabhili munngwako, wala njobhela ya nng'angalo gwa ndoa, ukapilikanika kabhili munngwako. Pabha bhaatendanga upindi bhako, pubhalinginji bhandunji bha manyika pa shilambolyo. Ilambo yowe ishipuganywa kwa uabhi gwako." **24** Mmitala jako jibhoneshe minyai ja ashinkulondola, na bhandunji bha ukonjelo bha a Nnungu, na minyai ja bhandunji bhowe bhabhulegwenje pa shilambolyo.

19 Gakapiteje genega, gumbilikene lilobhe lya mbuti lilobhe likulungwa lya lugwinjili lwa bhandu kunnungu lilinkuti, "Aleluya! Ntapulo na ukonjelo, na mashili ni ya a Nnungu bhetu! **2** Pabha ukumu yabho, ni ya kweli, na ya aki. Bhashikunng'ukumula lijajana nkulu, apuganyaga shilambolyo kwa labhalabha kwakwe.

A Nnungu bhampanyangwile kwa ligongo lya kwaabhalaganga bhatumishi bhahbo!" **3** Kabhili nigubhashitenje, "Bhainiye a Nnungu! Lyoui lya moto utiniya shene shilambosho, lilitutuma kwenda kunani piti piti!" (*aiōn g165*) **4** Na bhanangulungwa makumi gabhili na nsheshe bhala, na iumbe nsheshe ikwete gumi ila, gubhaigwishiyenje pai, nikwaatindibhalila a Nnungu bhatemi pa shitengu sha ukulungwa bhalinkutinji, Amina! Aleluya! **5** Gulipilikanishe lilobhe kukopoka ku shitengu sha ukulungwa lilinkuti. "Mwainyanje a Nnungu bhetu, mmanganya ashintumishi bhahbo bhowe, mmowenje nkwaishimianga, mmashoko na mmakulungwanji." **6** Kabhili, gumbilikene njobhela ya mbuti njobhela ya lugwinjili lwa bhandunji, na mbuti ngungungu ja masi ga magwinji, na mbuti nnindimilo gwa punda gwa nnjai, lilinkuti, "Aleluya! Pabha Bhakulungwa a Nnungu bhetu Bhakwete Mashili gowe bhanatagwala! **7** Tuangalale na angalila, twakuye. Pabha lyubha lya ndoa jika Mwana Ngondolo liishe, na mwali nkulumbwa ali tayali. **8** Ashipegwa nngubho ya kitani, ja takata janawe, imelemeta awalile!" Jene nngubho ja kitani ja takatajo, ni itendi ya mmbone ya bhandunji bha ukonjelo. **9** Na malaika jula gwamalanjile, "Jandika gegano. Mbaya bhaashemilwenje ku kalamu ja ndoa jika Mwana Ngondolo!" Kabhili nigwamalanjile, "Genego ni malobhe ga kweli ga a Nnungu." **10** Bhai, nne ngugwaga pa makongono gakwe, ngulipinga kuntindibhalila. Ikabheje jwalakwe gwamalanjile, "Unatende nneyo! Nne ntumishiye, malinga ugwe na bhaakulupalila ajako, tubhowe tunakong'ondela ga a Yeshu. Gwaatindibhalile a Nnungu. Pabha ukong'ondelo gwa a Yeshu, ni mbumu jwa ukulondola." **11** Kungai, gunikubhwene kunnungu kuugwilwe, na kweneko ashinkupagwa palashi jumo jwanawe, na ankwelile jula lina iyakwe "Jwa Kulupalika" na "Jwa Kweli." Jwenejo anaukumula na komana ngondo kwa aki. **12** Na meyo gakwe mbuti lilamba lya moto, ashinkutabha ilemba yaigwinji muntwe. Ashinkujandikwa lina lyangalimanya mundu, ikabhe nnyenepe. **13** Ashinkuwala lijoo lishubhikwe mminyai. Na jwenejo lina iyakwe, "Lilobhe lya a Nnungu." **14** Makukute ga manjola ga kunnungu, gugankagwile bhali bhakwelilenje palashi bhanawe, na bhali bhawetenje nngubho ya kitani yanawe, ya takata. **15** Upanga gwa tema ulikopoka nkang'wa jakwe, na kwa gwene upangayo shaabhakombolanje bhandunji bha ilambo ina. Jwalakwe shatagwale kwa imbo ja shitale, na shaminye divai nshikelelo sha minyila shabhibhu ya nnjimwa jikulungwa ja Nnungu, Bhakwete Mashili gowe. **16** Nnijoo iyakwe, na nshiga shakwe, ashinkujandikwa lina, "A Mpalume bha Bhapalume, na Bhakulungwa bha Bhakulungwanji." **17** Kungai, gunimmwene malaika jumo ajimi pa lyubha. Gwakweshiye lilobhe kwaabhalanjilanga ashijuni bhowe bhaagulukanga kunani alinkuti, "Nnijyangane! Nng'imane pamo ku kalamu jikulu ja a Nnungu, **18** nnijyangane kunnijanganje nnyama ya bhapalume, na ya bhakulungwanji bha manjola, na ya bhandunji bhakwetenje mashili, na ya ashipalashi, na ya bhaakwelenga palashi bhahbo, nnijyangane kunijanganje nnyama ya bhandunji bhowe, bhalinginji bhangwana na bhatumwa, bhashoko na bhakulungwanji." **19** Kabhili, gunimmwene nnyama jula, ali pamo na a mpalume bha shilambolyo, na ashimanjola bhahonji bhaimenenje pamo, nkupinga bhakomane na jwene atemi

pantundu palashi, na likukute lyakwe lya manjola. **20** Ikabheje nnyama jula, gwatolilwe ubhanda pamo na nkulondola jwa unami, antendelaga ilapo. Kwa yene ilapoyo, ashikwaapuganyanga bhakwetenje lulembo luka nnyama bhala, na bhashitindibhalilenje shanamu shakwe. Jwene nnyamajo pamo nagwe nkulondola jwa unami jula, gubhaleshelwenje bhalinginji bhakotonji, nntanda likolela moto gwa bhonga. (Limnē Pyr g3041 g4442) **21** Makukute gaigele ga manjola, gugabhulegwenje na upanga gwakoposhelaga nkang'wa jika jwene akweile palashi jula. Ashiijuni bhowe bhakujukutangaga nnyama yabhonji.

20 Kabhili gunimmwene malaika jumo alituluka kukopoka kunnungu, ali na nshungulo gwa ku Jeanamu, na nndondolo gwankulungwa munkono gwakwe. (Abyssos g12) **2** Gwalikamwile lijoka lila, lijoka lya bhukala, lbhilishi eu Lishetani, gwalitabhile yaka elupu. **3** Malaika jwa a Nnungu jula gwalijaile ku Jeanamu, gwaagele nnango gwa jinjilila kweneko, na gwatajile muuli kupinga linakombole kupuganya kabhili ilambo, mpaka pushiimalile yaka elupu. Ikabheje ipitaga yene yakayo, inapinjikwa ligopolwe kabhili, kwa mobha gashokope. (Abyssos g12) **4** Alapu guniibhwene itengu ya ukulungwa na bhandu bhatemingene, bhene bhandunibho gubhapegwilwenje mashili ga ukumula. Nneila peila guniibhwene mitima ja bhandunji bhainjilwenje kwa ligongo lya kwaakong'ondela a Yesu, na kwa ligongo lya ilobhe lya a Nnungu. Bhene bhanganjabha bhanganitindibhalilanga nnyama jula, wala shanamu shakwe, na wala bhangalembwanga lulembo pashenyi, eu mmakono gabhonji. Gubhayushilenje nitagwala pamo na a Kilishitu, kwa yaka elupu. **5** Bhawilenje bhaigelenje bhala, bhangayukanga mpaka imalile yaka elupu. Kweneku ni kuyuywa kwa ntai. **6** Mboka yabhonji na ukonjelo, bhowe bhalinginji munkumbi gwa yuywa kwa ntai. Shiwo sha bhili shikakola mashili kwa bhene bhanganjabho, shibhabhanganje bhabhishila bha a Nnungu, na bha a Kilishitu, na shibhatagwalanje pamo na a Kilishitu kwa yaka elupu. **7** Na yaka elupu imalilaga, Lishetani shiligopolwe likoposhe nshitabho shakwe. **8** Bhai, na shilijende kuupuganya bhandu bha ilambo yowe, mmbali inansheshe ya shilambolyo, yani Gogu na Magogu. Lishetani shilibhashemanje pamo ku ngondo, gwinji gwabhonji shiubhe mbuti nng'anji gwa nnyenje bhaali. **9** Gubhapitengene mmbali yowe ya shilambolyo, gubhashitimbililenje shigono sha bhandunji bha ukonjelo, na shilambo shipingwa na a Nnungu shila. Ikabheje moto guutulwishe kukopoka kunnungu, ukwaapeyangaga. **10** Na lbhilishi abhapuganyangaga jula, gwaaleshelwe nntanda likolela moto gwa bhonga, mubhalinginji nnyama jula na nkulondola jwa unami jula, na shibhapotekwanje mwenemo, mui na shilo pitipiti. (aiōn g165, Limnē Pyr g3041 g4442) **11** Alapu, gunishibhwene shitengu shikulungwa shanawe sha ukulungwa, na jwene atemi pantundu jakwe. Shilambolyo na kumaunde gwiohbhile pa meyo gakwe na yangabhoneka kabhili. **12** Gunaabhweningi bhandunji bhawilenje bhakulungwanji na bhashoko, bhajimingene mmujo ja shitengu sha ukulungwa, na itabhu gwiunukwilwe. Na shitabhu shina, yani shitabhu sha gumi, na shenesho gushiuunkwilwe. Bhandunji bhawilenje gubhaukumulwenje ga itendi yabhonji, malinga shiijandikwe mmitabhu mula. **13** Bhaali jikukopoyaga

bhawilenje bhalinginji nkati jakwe, shiwo na kundamo ja bhawilenje ikaakopoyangaga bhawilenje bhalinginji mwenemo. Kila mundu gwaukumwilwe ga itendi yakwe. (Hadēs g86) **14** Shiwo na kundamo ja bhawilenje ikuleshelwaga nntanda lya moto. Na lyene litanda lya motoli, ni shiwo sha bhili. (Hadēs g86, Limnē Pyr g3041 g4442) **15** Mundu jojowe jwangabhoneka lina lyakwe lijandikwe nshitabhu sha gumi, alisheselwa nntanda lya moto lila. (Limnē Pyr g3041 g4442)

21 Alapu, gunikubhwene kunnungu kwa ambi, na shilambolyo sha ambi. Kunnungu kwa bhukala kula, na shilambolyo sha bhukala shila iobhile, wala bhaali jikapiliji kabhili. **2** Gunishibhwene shilambo sha ukonjelo, ku Yelushalemu kwa ambi, kulituluka kukopoka kunnungu kwa a Nnungu, shielewe ukoto mbuti mwali jwa shilombani, awashiywe kupinga aimane naka mbujegwe. **3** Na gumbilikene ilobhe likulungwa kukopoka ku shitengu sha ukulungwa lilinkuti, "Nnole! Ndamo ja a Nnungu jili pamo na bhandunji. Shibhatende ndamo jabho pamo na bhanganjabho, shibhabhanganje bhandu bhabbo, nabhalabho shibhabhe a Nnungu bhahonji. **4** Bhenebho shibhaaungutanje minyoi jabhonji jowe, pabha shiwo shikapagwa kabhili, wala kwiigutanjila, wala ililo wala mboteko, pabha ga bhukala gapitile." **5** Na bhene bhatemi pa shitengu sha ukulungwa bhala gubhashite, "Nnole, ngunaatenda yowe kubha ya ambi." Kabhili gubhamalanjile, "Nnjandishe kuti, gene malobhe gano, ni gaakulupalika na ga kweli!" **6** Kungai gubhamalanjile, Gamaliile! Nne Alpha na Omega, yani, Nantando na Mpelo. Akwete njotajo, shinimpe mashi ga papila, ga shinyenyei sha mashi ga gumi, gwayoyo. **7** Jwene shaakombolejo, shaapate yene mboka yowe, na nne shimme a Nnungu bhakwe, na jwalakwe shaabhe mwanangu. **8** Ikabheje bhandunji bha bhoga na bhakaakulupalilanga, na bhaatendanga wa nnjimwa, na bhaabbulaganga, na bha labhalabha, na bhaabhi, na bhakwiitindibhalilanga yanamu, na bha unami bhowe, ndamo jabhonji shijibhe nntanda likolela moto gwa bhonga, shenesho ni shiwo sha bhili. (Limnē Pyr g3041 g4442) **9** Na malaika jumo, munkumbi gwa shabha bhakwetenje mikungu shabha, jagumbele mambukute shabha ga kumpelo bhala, nigwajile malanjila, "Nnjiye akuno, ninnangule mwali nkulumbwa, nkagwe Mwana Ngondolo!" **10** Bhai niil Mmbumu, malaika jula gwambeleshe kuntundu shitumbi shikulungwa shashileu. Gwanangwile shilambo sha ukonjelo Yelushalemu, shilituluka kukopoka kunnungu, ku bhakulungwa a Nnungu, **11** shiling'anymia kwa ukonjelo gwa a Nnungu. Shilangaya shakwe pushaliji mbuti sha liganga lya mmbiya yaigwinji, mbuti yashipi ja takata malinga shiyoo. **12** Shashinkukola lugwani lukulungwa lwaluleu lwa matopali, na milango likumi limo na jibhili, na mmilango mula bhashinkupagwanga ashimalaika bha a Nnungu, likumi limo na bhabhili. Na kila pantundu nnango lyashinkujandikwa lina limo, lya munkumbi gwa mena ga makabhila likumi limo na gabhili, ga Ishilaeli. **13** Kila mmbali jashinkupagwa milango jitatu, kulikopoka lyubha milango jitatu, na kuliwila lyubha milango jitatu, na kuntundu jakwe, milango jitatu, na kwibhanda jakwe, milango jitatu. **14** Makumba ga lugwani lwa shene shilambosho, gashinkushengwa mmaganga ga tandubhila likumi limo na gabhili, na kila liganga pantundu

jakwe, pashinkujandikwa lina limo, lya munkumbi gwa mena ga mitume likumi limo na bhahili, bhaka Mwana Ngondolo bhala. **15** Na malaika abheleketaga na nne jula, ashinkukola imbo ja pimila ja shaabhu, nkupinga apime shene shilambosho, na milango jakwe, na makumba ga lugwani lwakwe. **16** Shilambo shiyene pushaliji sha ndumba nsheshe ya lingana kila upande. Bhai, nigwapimile shilambo shila kwa imbo jakwe, shashinkukola uleu, na shannyenje, na shipunda, puyaliji kilometa elupu mbili, na mmia pasheshe. **17** Gwapimile na likumba lya lugwani lwakwe, pulyaaliji shipunda mita makumi shita kwa shipimilo sha meyo ga shigundu, shapimile malaika jula. **18** Lwene lugwanilo lwashinkushengwa kwa maganga ga mmbiya yaigwinji ga yashipi, shilambo shiyene shashinkushengwa kwa shaabhu ja takata, ja mbuti shiyoo. **19** Kila liganga lya tandubhila lya lwene lugwanilo, lyashinkukelengelelwa na maganga ga mmbiya yaigwinji, ga kila namuna. Liganga lya ntai lya tandubhila pulyaaliji lya yashipi, na lya bhili yakuti shamawi, na lya tatu kalikedoni, na lya nsheshe shumalidi, **20** na lya nng'ano shadoniki, na lya shita akiki, na lya shabha kilisholito, na lya nane shabalajadi, na lya tisha yakuti ja lindani, na lya kumi kilishopulasho, na lya kumi na limo iakinto, na lya kumi na gabhili ametishito. **21** Na milango kumi na jihili jila, pujaliji lulu kumi na ibhili. Kila nnango gwashinkualaywa na lulu jimo. Mpanda njindo gwa shilambo, gwashinkualaywa na shaabhu ja takata mbuti shiyoo. **22** Nangalibhona liekalu shene shilambosho, pabha Bhakulungwa a Nnunu Bhakwete Mashili gowe naka Mwana Ngondolo jula, ni liekalu lyakwe. **23** Na shene shilambosho shikaalolela shilangaya sha lyubha wala sha lwei, pabha ukonjelo gwa a Nnunu unalangaya, na kandili jakwe ni Mwana Ngondolo jula. **24** Bhandunji bha ilambo ina, shibhaowanje nshilangaya shakwe, na bhapalume bha pa shilambolyo shibhapelekanje ukonjelo gwabhonji mwenemo. **25** Milango jakwe jikaugalwa mui gowe, pabha mwenemo shikapagwa shilo. **26** Ukonjelo na ishima ya bhandunji bha ilambo ina shiipeleke mwenemo. **27** Ikabheje shakwa shoshowe sha nyata shipinga jinjila mwenemo, wala mundu jojowe atenda indu yangali ya mmbone, eu ya unami akajinjila mwenemo. Ikabheje bhene bhajandikwenje nshitabhu sha gumi, shika Mwana Ngondolo ni shibhajinjilangane mwenemo.

22 Penepo Malaika jula, gwanangwile lushi lwa mashi ga mabhutuka, gakwete gumi, ga konja galikoposhela pa shitengu sha ukulungwa sha a Nnunu, na Mwana Ngondolo. **2** Lwene lushilo lwatendaga bhutuka pakatipakati mpanda njindo, gwa shene shilambo shila. Nnyenje lwene lushilo, gwashinkupagwa nkongo gwa gumi kila ng'ambu ja lushi. Gwene nkongogo gwatendaga ogola iepo ya namna likumi limo na ibhili, iepo yakwe yatendaga ogola kila mwei. Na maamba ga gwene nkongogo pugaliji ni ntelu gwa lamia bhandunji bha ilambo ina. **3** Pene pa shilambopo shikapagwa kabhili shindu shoshowe shiloshilwe, pabha shitengu sha ukulungwa gwa a Nnunu na Mwana Ngondolo shishipagwe mwenemo na bhatumishi bhabho, bhalikwaatindibhalilanga maengo. **4** Na bhalabhonji shibhalubhonanje lubhombu lwabho, numbe lina lyabho shilibe pa shenyi pa lubhombu lwabhonji. **5** Shilo shikapagwa kabhili,

wala bhakapinganga shilangaya sha kandili eu sha lyubha, pabha Bhakulungwa a Nnunu shibhabhe shilangaya shabhonji, na bhene bhanganyabho shibhatagwalanje pitipiti na pitipiti. **(aiōn g165)** **6** Numbe jwene malaika jula nigwanugulile, "Gegano malobhe gano ni gaakulupalika kaje na ga kweli. Bhakulungwa a Nnunu bhakwaapanganga a ashinkulondola Mbumu jwabho, bhashinkutuma malaika jwabho, kukwaalanguyanga bhatumishi babho gene gapinga koposhela shangupe gala." **7** Nnole, ngwiyajo nnainope, apatile mboka jwene akunda malobhe ga ukulondola ga sheshino shitabhu shino. **8** Nne a Yowana ni napilikene na kugabhona gegano. Na nne ngagabhoneje na kugapilikana, ngugwaga pai nkupinga nintindibhalile pa makongono, jwene malaika anangwiye genego. **9** Ikabheje jwenejo nigwanugulile, "Nnatende nneyo, nne ni ntumishi malinga mmwe, na bhaakulupalila ajenunji ashinkulondola, na bhowe bhaakundanga malobhe ga sheshino shitabhu shino. Mwaatindibhalile a Nnunu." **10** Numbe gwanugulile, "Nnaiye malobhe ga ukulondola gali amuno nshitabhu muno, pabha malanga gabhandishile ga koposhela kwa genega. **11** Atenda yangali ya mmbone, apunde kutenda yangali ya mmbone, na akwiinyatiya, apunde kwiinyatiya. Atenda ya mmbone, na apunde kutenda ya mmbone, na ali jwa ukonjelo, apunde kubha jwa ukonjelo." **12** A Yesu bhakuti, "Nnole! Ngwiyajo nnainope, shinimpe mundu upo, ilingana na itendi yakwe. **13** Nne ni Alpha na Omega, yani, Nantando na Mpelo." **14** Mbaya bhene bhaashapanga nngubho yabhonji, nkupinga bhakolanje aki ja jinjila nshilambo kupitila mmilango, na bhakolanje aki ja lya iepo, ya nkongo gwa gumi. **15** Ikabheje palanga bhapalinji, mmbwa, na bhaabhi, na bha labhalabha, na bha bhulaga, na bha tindibhalila yanamu, na bhowe bha pinganga kubheleketu unami, bhakajinjilanga mwenemo. **16** "Nne, a Yesu, njikuntuma malaika jwangu ankong'ondelanjegano mmakanisha. Nne ni jwa lubheleko lwa shipinga sha a Daudi. Nne ni lutondwa lwa nng'andu luubhala!" **17** Mbumu na a Mwali bhaalombwa, bhakutinji, "Nnjiye," na kila mundu apilikana genega na abheleketu, "Nnjiye," Akwete njotajo ajiye, na apingajo, apapile mashi ga gumi, gwayoyo. **18** Nne a Yowana ngunakwaaleyanga bhandu bhowe, bhaapiliikananga malobhe ga ukulondola ga shene shitabhu shino. Mundu jojowe ajenjesheyaga shindu shoshowe, a Nnunu shibhannjenjeshyey mambukute gajandikwe nshitabhu muno. **19** Mundu jojowe apunguyaga shoshowe, mmalobhe ga ukulondola ga shene shitabhu shino, a Nnunu shibhampokonyole shipande shakwe sha nkongo gwa gumi, na shipande shakwe sha shilambo sha ukonjelo, malinga shiijandikwe nshitabhu muno. **20** Na bhene bhaakong'ondela gegano bhakuti, "Kweli ngwiyajo nnainope!" Amina. Nnjiye Mmakulungwa a Yesu. **21** Ngunakumpinjilanga mmowe nema ja Bhakulungwa a Yesu. Amina.



Gunishibhwene shilambo sha ukonjelo, ku Yelushalemu kwa ambi, kulituluka kukopoka kunnungu kwa a Nnungu, shielelywe ukoto mbuti mwali jwa shilombani, awashiywe kupinga aimane naka mbujegwe. Na gumbilikene lilobhe likulungwa kukopoka ku shitengu sha ukulungwa lilinkuti, "Nnole! Ndamo ja a Nnungu jili pamo na bhandunji. Shibhatende ndamo jabho pamo na bhanganyabho, shibhabhanganje bhandu bhabho, nabhalabho shibhabhe a Nnungu bhabhonji."

Nng'ibhulo 21:2-3

Reader's Guide

Mwera at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

Mwera at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aidios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Mwera---Mwera-Bible/Noted

Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words and may wrongly imply *eternal* or *Hell*. * The note placement is skipped or adjusted for verses with non-standard numbering.

Abyssos

Luka 8:31
Bhaloma 10:7
Nng'ibhulo 9:1
Nng'ibhulo 9:2
Nng'ibhulo 9:11
Nng'ibhulo 11:7
Nng'ibhulo 17:8
Nng'ibhulo 20:1
Nng'ibhulo 20:3

aidios

Bhaloma 1:20
Yuda 1:6

aiōn

Matei 12:32
Matei 13:22
Matei 13:39
Matei 13:40
Matei 13:49
Matei 21:19
Matei 24:3
Matei 28:20
Maliko 3:29
Maliko 4:19
Maliko 10:30
Maliko 11:14
Luka 1:33
Luka 1:55
Luka 1:70
Luka 16:8
Luka 18:30
Luka 20:34
Luka 20:35
Yowana 4:14
Yowana 6:51
Yowana 6:58
Yowana 8:35
Yowana 8:51
Yowana 8:52
Yowana 9:32
Yowana 10:28
Yowana 11:26
Yowana 12:34
Yowana 13:8
Yowana 14:16

Itendi 3:21
Itendi 15:18
Bhaloma 1:25
Bhaloma 9:5
Bhaloma 11:36
Bhaloma 12:2
Bhaloma 16:27
1 Bhakolinto 1:20
1 Bhakolinto 2:6
1 Bhakolinto 2:7
1 Bhakolinto 2:8
1 Bhakolinto 3:18
1 Bhakolinto 8:13
1 Bhakolinto 10:11
2 Bhakolinto 4:4
2 Bhakolinto 9:9
2 Bhakolinto 11:31
Bhagalatia 1:4
Bhagalatia 1:5
Bhaepheso 1:21
Bhaepheso 2:2
Bhaepheso 2:7
Bhaepheso 3:9
Bhaepheso 3:11
Bhaepheso 3:21
Bhaepheso 6:12
Bhapilipi 4:20
Bhakoloshai 1:26
1 Timoteo 1:17
1 Timoteo 6:17
2 Timoteo 4:10
2 Timoteo 4:18
Tito 2:12
Bhaebhulania 1:2
Bhaebhulania 1:8
Bhaebhulania 5:6
Bhaebhulania 6:5
Bhaebhulania 6:20
Bhaebhulania 7:17
Bhaebhulania 7:21
Bhaebhulania 7:24
Bhaebhulania 7:28
Bhaebhulania 9:26
Bhaebhulania 11:3
Bhaebhulania 13:8
Bhaebhulania 13:21
1 Petili 1:23

1 Petili 1:25
1 Petili 4:11
1 Petili 5:11
2 Petili 3:18
1 Yowana 2:17
2 Yowana 1:2
Yuda 1:13
Yuda 1:25
Nng'ibhulo 1:6
Nng'ibhulo 1:18
Nng'ibhulo 4:9
Nng'ibhulo 4:10
Nng'ibhulo 5:13
Nng'ibhulo 7:12
Nng'ibhulo 10:6
Nng'ibhulo 11:15
Nng'ibhulo 14:11
Nng'ibhulo 15:7
Nng'ibhulo 19:3
Nng'ibhulo 20:10
Nng'ibhulo 22:5

aiōnios

Matei 18:8
Matei 19:16
Matei 19:29
Matei 25:41
Matei 25:46
Maliko 3:29
Maliko 10:17
Maliko 10:30
Luka 10:25
Luka 16:9
Luka 18:18
Luka 18:30
Yowana 3:15
Yowana 3:16
Yowana 3:36
Yowana 4:14
Yowana 4:36
Yowana 5:24
Yowana 5:39
Yowana 6:27
Yowana 6:40
Yowana 6:47
Yowana 6:54
Yowana 6:68

Yowana 10:28
Yowana 12:25
Yowana 12:50
Yowana 17:2
Yowana 17:3
Itendi 13:46
Itendi 13:48
Bhaloma 2:7
Bhaloma 5:21
Bhaloma 6:22
Bhaloma 6:23
Bhaloma 16:25
Bhaloma 16:26
2 Bhakolinto 4:17
2 Bhakolinto 4:18
2 Bhakolinto 5:1
Bhagalatia 6:8
2 Bhateshalonike 1:9
2 Bhateshalonike 2:16
1 Timoteo 1:16
1 Timoteo 6:12
1 Timoteo 6:16
2 Timoteo 1:9
2 Timoteo 2:10
Tito 1:2
Tito 3:7
Piliimoni 1:15
Bhaebhulania 5:9
Bhaebhulania 6:2
Bhaebhulania 9:12
Bhaebhulania 9:14
Bhaebhulania 9:15
Bhaebhulania 13:20
1 Petili 5:10
2 Petili 1:11
1 Yowana 1:2
1 Yowana 2:25
1 Yowana 3:15
1 Yowana 5:11
1 Yowana 5:13
1 Yowana 5:20
Yuda 1:7
Yuda 1:21
Nng'ibhulo 14:6

eleēsē

Bhaloma 11:32

Geenna

Matei 5:22
Matei 5:29
Matei 5:30
Matei 10:28
Matei 18:9
Matei 23:15
Matei 23:33
Maliko 9:43

Maliko 9:45
Maliko 9:47
Luka 12:5
Yakobho 3:6

Hadēs

Matei 11:23
Matei 16:18
Luka 10:15
Luka 16:23
Itendi 2:27
Itendi 2:31
1 Bhakolinto 15:55
Nng'ibhulo 1:18
Nng'ibhulo 6:8
Nng'ibhulo 20:13
Nng'ibhulo 20:14

Limnē Pyr

Nng'ibhulo 19:20
Nng'ibhulo 20:10
Nng'ibhulo 20:14
Nng'ibhulo 20:15
Nng'ibhulo 21:8

Sheol

Genesis 37:35
Genesis 42:38
Genesis 44:29
Genesis 44:31
Numbers 16:30
Numbers 16:33
Deuteronomy 32:22
1 Samuel 2:6
2 Samuel 22:6
1 Kings 2:6
1 Kings 2:9
Job 7:9
Job 11:8
Job 14:13
Job 17:13
Job 17:16
Job 21:13
Job 24:19
Job 26:6
Psalms 6:5
Psalms 9:17
Psalms 16:10
Psalms 18:5
Psalms 30:3
Psalms 31:17
Psalms 49:14
Psalms 49:15
Psalms 55:15
Psalms 86:13
Psalms 88:3
Psalms 89:48

Psalms 116:3
Psalms 139:8
Psalms 141:7
Proverbs 1:12
Proverbs 5:5
Proverbs 7:27
Proverbs 9:18
Proverbs 15:11
Proverbs 15:24
Proverbs 23:14
Proverbs 27:20
Proverbs 30:16
Ecclesiastes 9:10
Song of Solomon 8:6
Isaiah 5:14
Isaiah 7:11
Isaiah 14:9
Isaiah 14:11
Isaiah 14:15
Isaiah 28:15
Isaiah 28:18
Isaiah 38:10
Isaiah 38:18
Isaiah 57:9

Ezekiel 31:15
Ezekiel 31:16
Ezekiel 31:17
Ezekiel 32:21
Ezekiel 32:27
Hosea 13:14
Amos 9:2
Jonah 2:2
Habakkuk 2:5

Tartaroō

2 Petili 2:4

Questioned

2 Petili 2:17



Kwa ngulupai, a Bhulaimu bhashinkukunda pubhashemilwe na a Nnungu bhajende kushilambo shibhalajilwe kupegwa kwa miadi shibhe ulishi gwabho. Gubhaleshile shilambo shabho, bhali bhakakukumanya kubhakwenda. - Bhaebhulania 11:8

Israel's Exodus



"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt'" Exodus 13:17



Pabha nne Mwana juka Mundu nangaika kuutumishilwa, ikabhe kutumishila na shoya gumi gwangu kwa ligongo lya kwaagombolanga bhandu bhabhagwinji. - Maliko 10:45



Nne Pauli ntumwa jwa a Yesu Kilishitu, njemilwe na a Nnungu kubha ntume jwa lunguya Ngani ja Mmbone. - Bhaloma 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophecies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Uusher)

Jesus Christ born 4 B.C.

New Heavens and Earth

1956	Christ returns for his people
1830	Jim Elliot martyrd in Ecuador
1731	John Williams reaches Polynesia
1614	Zinzendorf leads Moravian mission
1572	Japanese kill 40,000 Christians
1517	Jesuits reach Mexico
1455	Martin Luther leads Reformation
1323	Gutenberg prints first Bible
1276	Franciscans reach Sumatra
1100	Ramon Llull trains missionaries
1054	Crusades tarnish the church
997	The Great Schism
864	Adalbert martyrd in Prussia
716	Bulgarian Prince Boris converts
635	Boniface reaches Germany
569	Alopen reaches China
432	Longinus reaches Alodia / Sudan
397	Saint Patrick reaches Ireland
341	Carthage ratifies Bible Canon
325	Ulfilas reaches Goth / Romania
250	Niceae proclaims God is Trinity
197	Denis reaches Paris, France
70	Tertullian writes Christian literature
61	Titus destroys the Jewish Temple
52	Paul imprisoned in Rome, Italy
39	Thomas reaches Malabar, India
33	Peter reaches Gentile Cornelius
	Holy Spirit empowers the Church

(Wikipedia, Timeline of Christian missions)

Resurrected 33 A.D.

What are we? ▶			Genesis 1:26 - 2:3		Mankind is created in God's image, male and female He created us																																																													
How are we sinful? ▶			Romans 5:12-19		Sin entered the world through Adam and then death through sin																																																													
Where are we? ▶			When are we? ▼																																																															
			Innocence		Fallen			Glory																																																										
▶			Eternity Past	Creation 4004 B.C.	Fall to sin No Law	Moses' Law 1500 B.C.	Christ 33 A.D.	Church Age Kingdom Age	New Heavens and Earth																																																									
			<table border="1"> <tr> <td rowspan="3">God</td> <td>Father</td> <td>John 10:30</td> <td rowspan="6">Genesis 1:31 God's perfect fellowship with Adam in The Garden of Eden</td> <td colspan="3">1 Timothy 6:16 Living in unapproachable light</td> <td rowspan="6">Acts 3:21 Philippians 2:11 Revelation 20:3 God's perfectly restored fellowship with all Mankind praising Christ as Lord in the Holy City</td> </tr> <tr> <td>Son</td> <td>God's perfect fellowship</td> <td colspan="2">John 8:58 Pre-incarnate</td> <td>John 1:14 Incarnate</td> <td>Luke 23:43 Paradise</td> </tr> <tr> <td>Holy Spirit</td> <td></td> <td colspan="2">Psalm 139:7 Everywhere</td> <td colspan="2">John 14:17 Living in believers</td> </tr> <tr> <td rowspan="3">Mankind</td> <td>Living</td> <td rowspan="6">Genesis 1:1 No Creation No people</td> <td colspan="3">Ephesians 2:1-5 Serving the Savior or Satan on Earth</td> </tr> <tr> <td>Deceased believing</td> <td colspan="3">Luke 16:22 Blessed in Paradise</td> </tr> <tr> <td>Deceased unbelieving</td> <td colspan="3">Luke 16:23, Revelation 20:5,13 Punished in Hades until the final judgment</td> </tr> <tr> <td rowspan="4">Angels</td> <td>Holy</td> <td colspan="3">Hebrews 1:14 Serving mankind at God's command</td> </tr> <tr> <td>Imprisoned</td> <td colspan="3">2 Peter 2:4, Jude 6 Imprisoned in Tartarus</td> </tr> <tr> <td>Fugitive</td> <td colspan="2" rowspan="3">Genesis 1:31 No Fall No unholy Angels</td> <td>Revelation 20:13 Thalaasa</td> <td rowspan="4">Matthew 25:41 Revelation 20:10 Lake of Fire prepared for the Devil and his Angels</td> </tr> <tr> <td>First Beast</td> <td colspan="2">1 Peter 5:8, Revelation 12:10</td> </tr> <tr> <td>False Prophet</td> <td colspan="2">Rebelling against Christ Accusing mankind</td> </tr> <tr> <td>Satan</td> <td></td> <td colspan="2">Revelation 19:20 Lake of Fire</td> </tr> <tr> <td colspan="2"></td> <td></td> <td colspan="2">Revelation 20:2 Abys</td> <td></td> </tr> </table>		God	Father	John 10:30	Genesis 1:31 God's perfect fellowship with Adam in The Garden of Eden	1 Timothy 6:16 Living in unapproachable light			Acts 3:21 Philippians 2:11 Revelation 20:3 God's perfectly restored fellowship with all Mankind praising Christ as Lord in the Holy City	Son	God's perfect fellowship	John 8:58 Pre-incarnate		John 1:14 Incarnate	Luke 23:43 Paradise	Holy Spirit		Psalm 139:7 Everywhere		John 14:17 Living in believers		Mankind	Living	Genesis 1:1 No Creation No people	Ephesians 2:1-5 Serving the Savior or Satan on Earth			Deceased believing	Luke 16:22 Blessed in Paradise			Deceased unbelieving	Luke 16:23, Revelation 20:5,13 Punished in Hades until the final judgment			Angels	Holy	Hebrews 1:14 Serving mankind at God's command			Imprisoned	2 Peter 2:4, Jude 6 Imprisoned in Tartarus			Fugitive	Genesis 1:31 No Fall No unholy Angels		Revelation 20:13 Thalaasa	Matthew 25:41 Revelation 20:10 Lake of Fire prepared for the Devil and his Angels	First Beast	1 Peter 5:8, Revelation 12:10		False Prophet	Rebelling against Christ Accusing mankind		Satan		Revelation 19:20 Lake of Fire					Revelation 20:2 Abys
God	Father	John 10:30	Genesis 1:31 God's perfect fellowship with Adam in The Garden of Eden	1 Timothy 6:16 Living in unapproachable light			Acts 3:21 Philippians 2:11 Revelation 20:3 God's perfectly restored fellowship with all Mankind praising Christ as Lord in the Holy City																																																											
	Son	God's perfect fellowship		John 8:58 Pre-incarnate		John 1:14 Incarnate			Luke 23:43 Paradise																																																									
	Holy Spirit			Psalm 139:7 Everywhere		John 14:17 Living in believers																																																												
Mankind	Living	Genesis 1:1 No Creation No people		Ephesians 2:1-5 Serving the Savior or Satan on Earth																																																														
	Deceased believing			Luke 16:22 Blessed in Paradise																																																														
	Deceased unbelieving			Luke 16:23, Revelation 20:5,13 Punished in Hades until the final judgment																																																														
Angels	Holy		Hebrews 1:14 Serving mankind at God's command																																																															
	Imprisoned		2 Peter 2:4, Jude 6 Imprisoned in Tartarus																																																															
	Fugitive		Genesis 1:31 No Fall No unholy Angels		Revelation 20:13 Thalaasa	Matthew 25:41 Revelation 20:10 Lake of Fire prepared for the Devil and his Angels																																																												
	First Beast	1 Peter 5:8, Revelation 12:10																																																																
False Prophet	Rebelling against Christ Accusing mankind																																																																	
Satan		Revelation 19:20 Lake of Fire																																																																
			Revelation 20:2 Abys																																																															
Why are we? ▶			Romans 11:25-36, Ephesian 2:7		For God has bound all over to disobedience in order to show mercy to all																																																													

Destiny

Mwera at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, *"the gates of Hades will not prevail,"* Matthew 16:18. Paul asks, *"Hades where is your victory?"* 1 Corinthians 15:55. John wrote, *"Hades gives up,"* Revelation 20:13.

Jesus comforts us saying, *"Do not be afraid,"* because he holds the keys to *unlock* death and Hades, Revelation 1:18. Yet too often our *Good News* sounds like a warning to *"be afraid"* because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, *"out of the frying pan, into the fire?"* Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, *"Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. Jesus said, *"You did not choose me, but I chose you,"* John 15:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philipians 2:9-11.



World Nations

*Bhai, nnjendangane nkaatendanje bhandunji bha ilambo yowe bhabhe bhaajiganywa bhangu, nnikwabhatishanga kwa lina lya Atati na lika Mwana na Mbumu jwa Ukonjelo,
- Matei 28:19*